



Yus Papí: Shuarjaí Yus  
Yamaram  
Chicham Najanamu

New Testament in Shuar

## Contents

Yúsan Shiir Chichamēn Mateu aarmia nu	1
Yúsan Shiir Chichamēn Márkus aarmia nu	52
Yúsan Shiir Chichamēn Rúkas aarmia nu	84
Yúsan Shiir Chichamēn Juan̄ aarmia nu	139
Jesusa Akatramur̄i Yusa Wakanj̄jiāi Túramu	177
Papru Rúmanmayā Shuaran papí akuptukma	231
Papru Kurintiunamayā Shuaran Emka papin aar akuptukma	252
Papru Kurintiunamayā Shuaran Ataksha papin aar akuptukma	273
Papru Karaseanmayā Shuaran Papí aar akuptukma	287
Papru Ipiasiunmayā Shuaran papí akuptukma	296
Papru Jiripiusnumīā Shuaran papí akuptukma	303
Papru Kurusenmayā Shuaran papí akuptukma	308
Papru Tisarúnikianmayā Shuaran Emka papin aar akuptukma	313
Papru Tisarúnikianmayā Shuaran Ataksha papin aar akuptukma	318
Papru Timiutéun Emka papin aar akuptukma	321
Papru Timiutéun Ataksha papin aar akuptukma	327
Papru Titiun papí áatramu	331
Papru Jirimiúnkan papí áatramu	334
Israer-Shuaran papí akuptukma	336
Sántiak papin áarar akuptukma	352
Pítiur Emka papin aar akupkamu	358
Pítiur Ataksha papin áarar akupkamu	365
Juan̄ Emka papin áarar akupkamu	369
Juan̄ Ataksha papin aar akupkamu	374
Juan̄ Nuyá̄ Ukunam papin aar akupkamu	375
Jútas papin áarar akuptukma	376
Apukarípsis Jesukrístu Juánkan paant iniaktusma	378



## **Yus Papi: Shuarjaj Yus Yamaram Chicham Najanamu**

**New Testament in Shuar (EC:jiv:Shuar)**

Language: Shuar

Provided by: Wycliffe Bible Translators, Inc.

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit [www.dbs.org](http://www.dbs.org) (USA), [www.bibleleague.ca](http://www.bibleleague.ca) (Canada), and [www.opendoors.org](http://www.opendoors.org) (Europe).

### **Copyright and Permission to Copy**

Copyright © 2012 Wycliffe Bible Translators, Inc.

Copyright © 2012 Wycliffe Bible Translators, Inc. Scripture text used by permission.

© 2012, Wycliffe Bible Translators, Inc. All rights reserved.

PDF, ePub, and MOBI Bible covers and design are copyrighted 2017 by the Digital Bible Society ([www.dbs.org](http://www.dbs.org)).

---

PDF generated on 2017-08-24 from source files dated 2017-08-24.

fb10d1f0-e2d5-5d8e-8a74-10846708c857

ISBN: 978-1-5313-0312-9

*Yúsan Shiir Chichamen*

**MATEU**

*aarmia nu*

**Jesukrístu weatrí**

*(Rúkas 3.23-38)*

**1** Jesukrístu weatrí ju áiniawai. Tura ashí nankaamas ti uunt weat Tawitcha Apráamsha áiniawai. <sup>2</sup>Apráama uchirí Isak. Tura Isaka uchirí Jakup. Jakupa uchirísha Jutá ni yachijiai. <sup>3</sup>Tura Jutá uchirín Páresan tura Sarancha Tamar jurermiayi. Páresa uchirísha Esum, nuna uchirísha Aram. <sup>4</sup>Nuna uchirísha Aminiatáp. Nuna uchirísha Nasun. Nuna uchirísha Sarmun. <sup>5</sup>Sarmunka uchiríncha Púusan Raap jurermiayi. Puusa uchirín Uwitian Ruut jurermiayi. Uwitia uchirísha Isaf. <sup>6</sup>Nuna uchirísha uunt akupin Tawit. Uunt akupin Tawitia uchiríncha Sarumúnkan Patsepa jurermiayi. Patsepasha emka Uríasa nuweeyayi.

<sup>7</sup>Sarumúnka uchirí Rupuam. Nuna uchirísha Apías. Nuna uchirísha Asa. <sup>8</sup>Asa uchirísha Jusapát. Nuna uchirísha Juram. Nuna uchirí Usías. <sup>9</sup>Usías uchirí Jutam. Nuna uchirí Akas. Nuna uchirí Esekías. <sup>10</sup>Esekías uchirí Manasés. Nuna uchirí Amun. Nuna uchirí Jusías. <sup>11</sup>Jusías uchirí Jekunías ni yachi armia nujai. Nuí Papirúnianmaya shuar Israer shuaran mesetjai nupetkar Papirúnia nunkanam achirar júkiarmiayi.

<sup>12</sup>Nu ukunmanka Jekunías uchirí Saratiár akiiniamiayi. Tura nuna uchirí Surupapír. <sup>13</sup>Surupapíra uchirí Awiut. Nuna uchirí Iriakím. Nuna uchirí Asur. <sup>14</sup>Asura uchirí Satuk. Nuna uchirí Akim. Nuna uchirí Eriut. <sup>15</sup>Eriuta uchirí Ereasár. Nuna uchirí Matan. Nuna uchirí Jakup. <sup>16</sup>Jakupa

uchirí Jusé Marí áishriya nu. Marisha Jesusan jurermiayi. Nu Jesuska shuáran uwemtikiartin asa Kristu tu anaikiamuiti.

<sup>17</sup>Tuma asamtai Apráamnumia Tawitnium Jesusa weatrí katurse (14) áiniawai. Tawitniumiasha Papirúnianam jukimiumna nuisha katurse weat áiniawai. Papirúnianam jukimiummayasha Kristunam ataksha katurse áiniawai.

**Jesukrístu akiiniamu**

*(Rúkas 2.1-7)*

<sup>18</sup>Jesukrístu akiiniamu júnis ámiayi. Ni nukurí Marí Jusejai anajmanairuyayi. Tura tsaniatsain Yusa Wakaní ajaprumtikiamiayi. <sup>19</sup>Ajaprukmetaisha Jusé Marin iniatsaatsuk nin ajapatnium enentáimpramiayi. Tura ti pénker asa aya iniaisatnium wakerimiayi aents nekainiatsain. <sup>20</sup>Nuna tu enentáimia pujai, mesekranam Yusa suntari tarí chicharuk tímiayi “Juséa, ame weatrum Tawitchakait. Tuma asam Marijiai nuatnaikiatin ashamkaip. Uchin jurertatna nuka Yusa Wakaníniuiti. <sup>21</sup>Uchin áishmankan takustatui tura nuna naari *JESUS* anaikiattame. Ashí ni shuarín ni tunaariya uwemtikiartin asa Jesus anaikiatniuiti” tímiayi.

<sup>22</sup>Yus ni etserniurijiai yaunchu timia nu uminkiat tusa nu túrunamiayi. Juna áamtikramiayi:

<sup>23</sup>“Nuwa natsa ajapruktatui tura uchin takustatui. Nuna náarisha Emanuér anainiaktatui.” Tu áarmaiti.

Emanuérsha nu chichamnum “Yus iijiai pujuwiti” tawai.

<sup>24</sup>Juresha mesekranmaya shintiar Yusa suntari timia núnisan Marin nuatkamiayi. <sup>25</sup>Tura uchin júreatsain tsaninchamiayi. Tura jurermatai uchin Jesus anaikiamiayi.

## Ti neka apach Jesusan eakarmiania nu

**2** Jutía nunkanam Pirin pépru ana nui Jesus akiiniamiayi. Nuisha nú nunka akupniuri Irutisauyayi. Akiini-amtai ti neka apach nantu tátainmaaniya Jerusaréñ péprunam táarmiayi. <sup>2</sup>Taar inintruiniak “¿Israer shuara úunt akupniuri tui akiiniait? tiarmiayi. Nantu tátainmaani pujaati ni yaari wáinkiamji. Tura tikishmatratai tusar winiaji” tiarmiayi.

<sup>3</sup>Irutis nuna antuk nusháa enentáimpramiayi. Tuma asamtai ashí Jerusaréñnumiá shuarsha antukar nusháa enentáimprarmiayi. <sup>4</sup>Irutis nuikia ashí Israer-patri uuntrincha tura yaunchu akupkamun jintinniuncha untsukarmiayi. Tura Kristu akiiniatniurin inintrusmiayi. <sup>5</sup>Tutai chichainiak “Jutía nunkanam Pirin pepru ana nui akiiniatniuiti, tiarmiayi. Yaunchu Yúsnan etserin tu áaruuti:

<sup>6</sup>“Jutía nunkanam, Pirin pepru, ishi-tiápchich ana nuyá nekas uunt akupin winittiawai. Nii ashí Israer shuaran, Wíi shuar áarmatai, péñker wáinkiatawai,” tawai Yus.” Tu tiarmiayi.

<sup>7</sup>Nuna tuñiakui Irutis ti neka apachin úusan, urutía yaa emka wáinkiamarum tusa aniasarmiayi. <sup>8</sup>Nuyá Pirinnum akupeak “Nui werum uchi péñker inintrusrum wáinkiatarum. Tura wáinkiarum ujatatarum. Wisha werin tikishmátuutaj” tímiayi.

<sup>9-10</sup>Tutai ti neka apach wearmiayi. Tura yaa, yajaya wáinkiarmania nu, tuke eem wémiayi. Tura yaan wáinkiar ti wararsarmiayi. Tura nú yaa uchi pujumia nui ejeniarmiayi. <sup>11</sup>Jeá wayawar uchincha ni nukurí Marijiai wáinkiarmai. Tura uchin tikishmatrarmiayi. Nuyá ni kajuntríyan kurincha, mirá kunkuin-

niasha, chíkich kunkuinniasha súarmi-ayi. <sup>12</sup>Nuyá mesekranam Yus “Irutisaini weerap” tutai chíkich jintianam wakеткиarmiayi.

## Ejiptunam pisaamu

<sup>13</sup>Ti neka apach waketrantai Yusa suntari mesekranam Jusen ujakmiayi. “Nantakim uchi ni nukuríjiai Ejiptu nunkanam jukim nui pujustá. Irutis uchin máataj tusa eaktatui. Tura ukunam ankant ajasmatai ujaktajme” tímiayi.

<sup>14</sup>Tutai Jusé kurat shintiar nú káshik uchincha nukuríjiai Ejiptunam jukimi-ayi. <sup>15</sup>Irutis jáatsain nui pujusarmi-ayi. Ejiptunam pujusmatai Yus yaunchu timia nu uminkiamiayi. Iis, Yúsnan etserin aak tímiayi: “Ejiptunmayan winia Uchirun untsukmajai.” Tu áarmiayi.

## Irutis uchin máawarat tusa akupkamu

<sup>16</sup>Irutissha ti neka apach nin ananka yajá waketrans nekáa ti kajekmiayi. Ti kajek ashí áishmanchin Pirinnumsha tura yantamach pujuarmia nunasha maawaarat tusa akupkamiayi. Ti neka apach ujakmia nuna enentáimias ashí jimiará uwin takakun tura nú uchichin máawarat tusa akupkamiayi. <sup>17</sup>Nuka Yusnan etserin Jeremías aarmia nu uminkiamiayi. Juna áarmiayi:

<sup>18</sup>“Ramá nunkanam ti útutainiak uur ajainiawai. Raker ti uutu asa atsankrachminiaiti ni uchirí jáarmatai.” Tu áarmiayi.

<sup>19</sup>Tura Irutis jakamtai Yusa suntari mesekranam Jusen ujakmiayi. <sup>20</sup>“Uchin máataj tiarmia nuka jákarai. Yamaikia ataksha uchi ni nukuríjiai jukim Israer nunkanam wakеткиtia” tímiayi. <sup>21</sup>Tutai Jusé nantaki uchincha nukuríjiai jukin Ejiptunmaya Israer nunkanam

waketkimiayi. <sup>22</sup>Túrasha Irutisa uchirí Arkiráú Jutía nunkanam uunt akupin ajasun nekáa nuí wétinian aránkámíayi. Mesekranmasha ujakma asa nuí pujutsuk Kariréa nunkanam wémiayi. <sup>23</sup>Nuí jeá Nasaréé péprunam pujusmiayi. “Nasarénumiá átatui” Yusnan etserin yaunchu tu etserkamú nujái uminkiamiayi.

### **Imiakratin Juan atsamunam etserkamiania nu**

*(Márkus 1.1-8; Rúkas 3.1-9, 15-17; Juan 1.19-28)*

**3** Nuyá imiakratin Juan Jutía nunkanam aents atsamunam etserki támiayi. <sup>2</sup>“Enentáim yapajíátarum. Tsawant ishichik ajasai Yus juí akupin ajastin.” Tu etserkamiayi.

<sup>3</sup>Nú Juan kan yaunchu Yúsnan etserin Isayas juna áarmiayi:

“Shuar atsamunam aents untsümü. Untsumuk “Atumí enentái Uunta jintí iwiarturtarum tura naka awajsatarum” tawai.” Tu áarmiayi.

<sup>4</sup>Nu Juan sha kamiyu ure najantramun entsauyayi. Emenmamkesha nuapeyayi. Tura yutai-títikriátsnasha chinijíai yúuyayi. <sup>5</sup>Tura Jerusaréé péprunmayá shuarsha tura ashí Jutía nunkanmayá shuarsha Jurtañ entsanam matsamiarmia nú shuarsha mash Juán kan tariarmiayi ni chichamen anturkatai tusar. <sup>6</sup>Tura ni tunaarín paant etserkarmatai Juan Jurtañ entsanam imiainiarmiayi.

<sup>7</sup>Juan sha Pariséuncha Satuséuncha imiatti tusa wininian wáiniak tímiayi “Napia áaniutirmincha, ¿ya atumniasha ti asutniátniunmayá uwempratniuncha ujatmakmarum? tímiayi. Asutiátin tsawant ishichik ajasai. <sup>8</sup>Tuma asamtai enentáim yapajíámuitkiuínkia péñker wekaamurmijíai paant iniakmatarum. <sup>9</sup>Atumsha “Íikia Apraám weeatí” tu enentáim tumasairap. Nujái

uwemprashtatrumé. Yus wakerakka ju kayan Apraám tiran ki najankainti, tímiayi. <sup>10</sup>Numi ajaktinia áintsan kampuwarín jacha atuttsamuiti. Tura numi péñker nereatsna nuka tsupikia jinium apeamu ártatui. <sup>11</sup>Wikia aya entsajáin imiajrumé atumi enentái yapajíáwakrumin. Antsu winia ukuruí winiana nuka péñker awajtamstataj tusa imiantinia áanis tura jía áanis Yusa Wakanin enketramprattarme. Wijíai nankaamantu asamtai wikia tsuntsumpruan ni sapatrínkisha atitrachminiaitjai. <sup>12</sup>Aruusa nerejai túruinia áintsan átatui. Awajtiutairín achikiuiti tura nujái saepen awajtitiawai. Tura neren péñker ikiustatui, antsu saepénka jinium apeattawai. Nu jisha tuke kajinchaiti.” Tu tímiayi Juan.

### **Juan Jesusan imiaimiu amia nu**

*(Márkus 1.9-11; Rúkas 3.21-22)*

<sup>13</sup>Nuyá Jesus Kariréa nunkanmayá winis Jurtañ entsanam támiayi Juan imiatti tusa. <sup>14</sup>Juan sha emka nakitiak Jesusan tímiayi “Ame winia imiatmini-aitme. Túrutamniaiatmesha ¿urukam- tai winia tarutnium?” tímiayi.

<sup>15</sup>Tura Jesus tímiayi “Ántsan asati ya- maikia. Núnisrik ashí Yus akupkamu umirkatniuitji.” Tutai Juan iniaisamiayi. <sup>16</sup>Tura Jesus imiani entsaya jíinkímtai nayaimp<sup>i</sup> uranmiayi. Tura Yusa Wakaní yámpitsa áintsan Jesusan tarim- iayi. Niisha wáinkiámiayi. <sup>17</sup>Túram- tai nayaimpinmayá Yus chichaak “Juka winia Uchiruiti. Ti aneamuiti. Ti shiir enentáimtajai” tímiayi.

### **Uunt iwianch Jesusan anañkataj tímiania nu**

*(Márkus 1.12-13; Rúkas 4.1-13)*

**4** Nu túrunamtai Yusa Wakaní Jesusan iwianchjai nekapmamtiksattsá aents atsamunam jukimiayi. <sup>2</sup>Nuí kuarenta

(40) tsawant, káshisha tsawaisha yurumtsuk pujak tsukarmiayi. <sup>3</sup>Nuñ uunt iwianch Jesusan nekapsataj tusa tarí tímiayi “Nekas Yusa Uchirínkiumka ju kaya apatuk najanata.”

<sup>4</sup>Tutai Jesus tímiayi “Yus-Papinium áarmaiti:

“Aents aya apatkujain iwiaaku pujuschamniaiti. Antsu Yus táman enentáimtuiniak nekas iwiaaku pujusartatui” tawai” tímiayi.

<sup>5</sup>Tutai uunt iwianch Jerusarén péprunam jukí Yusa Uunt Jee cháikín iwiak <sup>6</sup>tímiayi “Nekas Yusa Uchirínkiumka juya akaikim iniaata. Kame Yus-Papinium áarmaiti:

“Yus ni suntarín akatar akúptúrmaktatui. Nawemin kayanam ajiintsumnin wenkurmaktatui” tawai” tímiayi.

<sup>7</sup>Tutai Jesus tímiayi “Núnisan Yus-Papinium áarmaiti:

“Ame Úuntrum Yus “Nekapsataj” tiip” tawai” tímiayi.

<sup>8</sup>Ataksha uunt iwianch naint yakí wájakmanum iwiakmiayi tura nuyá ashí nunkanmaya péprun shiira nuna iniaktusmiayi. <sup>9</sup>Tura tímiayi “Winia tikishmatrurakminkia juna mash amastatjai.”

<sup>10</sup>Tutai Jesus tímiayi “Werumta, uunt iwianchi. Yus-Papinium aarma awai:

“Ame Úuntrum Yúsak tikishmatrata tura Niní shiir awajsata” tawai” tímiayi.

<sup>11</sup>Tutai uunt iwianch Jesusan ikiuak wémiayi. Túramtai Yusa suntarí tariar atsumamurín súsarimiayi.

### **Jesus Kariréa nunkanam etserkamiania nu**

*(Márkus 1.14-15; Rúkas 4.14-15)*

<sup>12</sup>Juan sepunam enketui taman antuk Jesus Kariréa nunkanam wémiayi. <sup>13</sup>Tura Nasarét péprunam pujutsuk Kapernáum péprunam we pujusmiayi. Kapernáumsha Kariréa antumianka kánmatkarin pujumiayi. Ti yaunchusha

Jakupu uchirí Sapurúnsha tura Nip-tarísha nu nunkanak nuñ pujustaitсар achikiaruyayi. <sup>14</sup>Jesus nuna túramtai yaunchu Yúsnan etserin Isayas aarmia nu uminkiamiayi. Juna áarmiayi:

<sup>15</sup>“Sapurúnsha Niptarísha nayaantsanam tíjiuch Jurtan entsa amainini nunkan achikiarumiayi. Nuka Kariréaiti Israer-shuarcha matsatania nuñ. <sup>16</sup>Nu aents kiritniunam pujuiniayatan ti tsáapninan wáinkiarumiayi. Jákatniunam pujuiniaj tsáapin tsáapnirmiayi.” Tu áarmaiti.

<sup>17</sup>Nuyá Jesus étseruk tímiayi “Tunaarum enentáimturum enentáim yapa-jjatarum. Ju nunkanam Yus akupkatin tsawant ishichik ajasai.”

### **Jesus kuaru aents namakan achinian ni unuiniamurí ajasarat tusa achikmiania nu** *(Márkus 1.16-20; Rúkas 5.1-11)*

<sup>18</sup>Jesus Kariréa antumianka kánmatkarin wesa jimiará áentsun nuámtak yáchinniun wáinkiamiayi. Chikichik Antresauyayi, chikichcha Semunkauyayi. Nu Semun núnisan Pitru náartiniuyayi. Namakan achin ásar namakan nekajai nankíak yujaarmiayi. <sup>19</sup>Nuna Jesus wáinkiar tiarmiayi “Nemartustarum. Túrakrumin shuarsha Yusna arti tusan yamá namak achíarmena núnisan shuaran-éau awajsatjarne.” <sup>20</sup>Tutai ni nekarin ikiukiar Nin nemariarmiayi.

<sup>21</sup>Nuyá ishichik wésan ataksha nuámtak yachinniun wáinkiamiayi. Jakupu Juanjai mai Sepetéu uchirí árimiayi. Niisha kanunam enkemsar ni nekarin ni aparíjjai iwiarainiak pujuriarmiayi. Tura Jesus “Nemartusta” tutai <sup>22</sup>nu chichamaik kanuncha tura aparíncha ikiukiar Jesusan nemariarmiayi.

## Jesus untsurí shuaran jintintiamiania nu

(Rúkas 6.17-19)

<sup>23</sup> Ashí Kariréa nuṅkanam Jesus Israer-shuar iruntainiam etserki wémiayi. Yus ju nuṅkanam akupkatin chichaman etserkamiayi. Tura untsurí sunkurjai jáinian ashí tsuármiai. <sup>24</sup> Ashí Siria nuṅkanam Jesus tsuákratman nekaawar ashí nánkamas sunkurjai wáitin armia nuna Jesusan tsuarti tusa itiariarmiayi. Ashí jaancha, najaimiancha, yajauch wakantrukuncha, wáuruncha, tampemaruncha Jesus tsuármiai. <sup>25</sup> Tura untsurí shuar Jesusan nemariarmiayi. Kariréa nuṅkanmayasha, Tekapurisnumiasha, Jerusarén péprunmayasha, Jutía nuṅkanmayasha, Jurtaṅ entsa amainiyasha Jesusan nemariarmiayi.

## Náinnium Jesus etserkamu

**5** Jesus untsurí shuar káunkarun wáiniak náinnium waka nuí pujusmiayi. Tura ni unuiniamuriṣha taar pujusarmiayi. <sup>2</sup> Nuyá Jesus júnis unuiniamiayi.

## Warastin ainia nu

(Rúkas 6.20-23)

<sup>3</sup> “Ame wakanim atsumamu nekamarum kakaram ajasrum warastarum. Tuma asarum Yus akupeamunam pachiinnuitrume. <sup>4</sup> Kúntuts pujarum nu warastarum. Yus atsaṅtamprattarme. <sup>5</sup> Péejchach enentáimtumarmena nu warastarum. Yus ashí nuṅkan amastatrume. <sup>6</sup> Eseer wekasataj tusa aya kitiamarum nu warastarum. Yus imiktamprattarme. <sup>7</sup> Waitnenkratniutiram warastarum. Yus waitnentramprrattarme. <sup>8</sup> Pénker enentáimniutiram warastarum. Yus wáinkiáttarme. <sup>9</sup> Chicham iwiarin árum nu warastarum. Yusa uchiṛi turamar-

tatui. <sup>10</sup> Pénker túrakrumin yajauch awajtamainiakui warastarum. Yus akupeamunam pachiinnuitrume. <sup>11</sup> Wíi shuar asakrumin katsekramainiakui, itit awajtamainiakui, tura ashí tsanumprutmainiakui warastarum. <sup>12</sup> Núnisaṅ yaunchu Yúsnan etserin armia nunasha túrawarmiayi. Túramtai shiir enentáimkiuram warastarum. Nayaimpiniam ti pénker akinkiattarme’ tímiayi.

## Ju nuṅkanam átum tsáapninia áintsarum tura weeya áintsarum árum

(Márkus 9.50; Rúkas 14.34-35)

<sup>13</sup> “Átumka ju nuṅkanam wee ana áintsanṅketrume. Tura wéeaitait jeakchaitkiuṅka míchuiti. ¿Nusha itiur yuámniak ati? Antsu ántraiti. Tuma asamtai aa najatai tepet tusar ajapashtinkiait’ tímiayi.

<sup>14</sup> “Átumka ju nuṅkanam shiripkia áintsanṅketrume. Náinniumka pepru úumkachiniaiti. <sup>15</sup> Núnisaṅ shiripik ekeemakam kajunnum enkeatsme. Antsu yakí sukúatsmek ashí jeanam ana nu paant atí tusam. <sup>16</sup> Núnisaṅ atumsha Yusjai pénker túramu paant atí. Tura ashí aents nuna iisar niisha Yus Apan shiir awajstartatui’ tímiayi.

## Yaunchu akupkamun pachis Jesus unuiniamiania nu

<sup>17</sup> “Muisais akupkamuncha tura yaunchu Yúsnan etserin etserkarmia nuna ántar awajstatawai” turutiirap. Antsu nuna Wikia umiktaj tusan táwitjai. <sup>18</sup> Nekasan tájarme. Ashí túrunatniua nu amúatsaiṅ nu akupkamu ishichkisha yapajniáshtatui. Nayaimpisha tura nuṅkasha tuke amúatsaiṅ nu akupkamusha amuukashtatui. <sup>19</sup> Nu asamtai shuar chikichik akupkamun, yúpichuch ana nunaksha, umirchakka tura chíkich



shuaran umirkashtinian unuiniakka Yus nekas akupin paant ajastatna nuí nú shuar uunt áchattawai. Antsu ashí shuar akupkamun umiana nu tura chíkich shuaran umirkatniun unuiniana nusha Yus nekas akupin paant ajastatna nuí, nu shuarka uunt átatui. <sup>20</sup> Tuma asamtai Yus akupeamunam pachiinkiataj tákumka Pariséujai nankaamas tura akupkamu jintinniuujai nankaamas eseera wekasatniuitrume' tmiyai.

**Kajeamun pachis Jesus unuiniamiania nu**

(Rúkas 12.57-59)

<sup>21</sup> 'Yaunchu tiniu armia nu ántichukaitrum: "Mankartuawairap. Mankartana nuka asutniátniuiti" tiniu ármiai. <sup>22</sup> Tura Wisha tájarme: Shuar ni yachin aya kajerakka nusha asutniátniuiti. Ni yachin kátsekea nuka akupniunam junaktiniaiti. Tura ni yachin "netsé" tákunka jinium akupnakminiaiti.'

<sup>23</sup> 'Tuma asamtai Yus susataj tusam wakerakum tura ame yatsum ámin itit enentáimturman enentáimpramka, <sup>24</sup> suamu nuí ikiuakum emka ame yatsum werim niijiaí iwiarata. Turam waketkim Yus suam nu susata.'

<sup>25</sup> 'Shuar úntnum júramkuiñkia jintian wesam niijiaí iwiarata úntnum ejetamtsajin. Túrachakminkia úntnum surutmaktatui tura niisha suntarnum surutmaktatui tura sepunam enketmat-tawai. <sup>26</sup> Tura nekas tajai, nuí enkemamka ashí rearchisha akikmachkumka jfinkishtatme' tmiyai.

**Tsanirmatniun pachis Jesus unuiniamiania nu**

<sup>27</sup> 'Yaunchu tiniu armia nu ántichukaitrum: "Tsanirmawaip." <sup>28</sup> Tura Wisha tájarme: Shuar nuwan tsanirmataj tu iiska nuikia ni enentáin tsanirmayi.'

<sup>29</sup> 'Tuma asamtai ame jiimi tunaanum yajauch awajtamkuiñkia ukuñkiam yajá ajapata. Ashí ame ayashim jinium esaatsajin aya chikichik ayashmi muchitmarí emesratin péñkeraiti. <sup>30</sup> Ame ewejmesha untsuurmetiat tunaanum ajunmakuñkia tsupikiam yajá ajapata. Ashí ame ayashim jinium esaatsajin aya chikichik ayashmi muchitmarí emesratin péñkeraiti.'

**Nuwa ajapatniun pachis Jesus unuiniamiania nu**

(Mateu 19.9; Márkus 10.11-12; Rúkas 16.18)

<sup>31</sup> 'Núnisan yaunchu tiniu ármiai: "Shuar ni nuarín ajapatniun wakera nuka papí najana susati." <sup>32</sup> Tura Wisha tájarme: Shuar ni nuarín tsanirmachun ajapeakka nuwan tsanirmamtiki-aiti. Tura ajapamujai nuatnaiyakka nuka tsanirmaiti.'

**Jesus aya nekasa nu titinian unuiniamiania nu**

<sup>33</sup> 'Núnisan yaunchu tiniu ármiai: "Yusa naari pachisan turattajai" tákumka nekas takamtsuk umiktiniaitme." <sup>34-37</sup> Tura Wisha tájarme: Áyatik "Ee" tákumka tura "Atsá" tákumka wáitruitsuk nuke titiá. Támena nu nekas umiktaj takum ame nú arant pachistiniaitkiumka nuka yajauchiiti, iwianchnumiáiti. Ti nekas tajai tusam nayaim pachischatniuitme. Nuka Uunt Yus pujutainti. Nunkasha pachischatniuiti Yusa tarimtairi asamtai. Jerusaren péprusha pachischatniuiti Uunt Akupin pujutai nuí asamtai. Múukmesha pachischatniuitme. Chikichik intiashkesha pújusha mukusasha awawsachminiaitme. Áyatik nekasa nu páchitsuk titiá.'

### Iikkiatniun pachis Jesus unuiniamiania nu

(Rúkas 6.29-30)

<sup>38</sup>‘Yaunchu tiniu armia nu ántichukaitrum: “Shuar máanikiar jii apujtukka niisha apujtuktiniaiti. Tura naj akarkasha ni najsha akarkatniuiti.”

<sup>39</sup>Tura Wisha tájarme: Yajauch shuar taritairap. Antsu ame yapimin ijiutmamtai áatú yapimsha tsankatkata.

<sup>40</sup>Tura pushirmin jurutramkitiaj tákuisha sakurmesha susata. <sup>41</sup>Tura káarkancha chikichik kirumitruk jurutkitia túramkui ámeká jimiará kirumitru ejeeta. <sup>42</sup>Seatmana nu susata. Ikiatmakuisha páchitsuk ikiasta.’

### Nemasri aneetniun Jesus unuiniamiania nu

(Rúkas 6.27-28, 32-36)

<sup>43</sup>‘Núnisan tiniu armia nu ántichukaitrum: “Ame shuarum aneeta tura nemasrumka kajerkata.” <sup>44</sup>Tura Wisha tájarme: Nemasrum aneetarum.

Yajauch chichartamna nusha shiir awajsata. Nakitramana nusha nawamkata. Tura katsekramainiana nu tura yajauch awajtamainiana nusha Yus áujtusarta. <sup>45</sup>Atumsha nu túrakrum atumí Aparí nayaimpiniam pujana nu túrana áitkiasrumek túrarme. Iista,

Yus yajauch shuarnumsha péñker shuarnumsha tsápin awajmatkiatsuk. Núnisan yumíncha yajauch shuar pujuiniamunmasha péñker shuar pujuiniamunmasha yútumtiktsuk.

<sup>46</sup>Aya atumin anenmainia nuke aneakmesha ¿yaki akirmakat? Yajauch shuarsha nuna túrin ániawai. <sup>47</sup>Aya ame yatsumek shiir chichaakmeká ¿warí péñkerak túram? Yus-shuarchasha nuna túrin ániawai. <sup>48</sup>Nu asamtai atumí Aparí Yus nayaimpiniam pujana najai métek ti péñker átiniaitrum.

<sup>49</sup>‘Aparu Yus, nayaimpiniam pujamna nu, ii Aparínme. Ame náarmincha shuar ántar pachischarti. <sup>50</sup>Ashí

### Pénker túratniun Jesus unuiniamiania nu

**6**‘Ashí íimiainiaín aya shuar iirsarti tusarum Yusna nu takasairap. Tu takaakrumniñkia Yus Apa nayaimpiniam pujana nu penké akirmakchattarme. <sup>2</sup>Nu asamtai shuar atsuma nu yayiakmeká ashí shuar újakairap. Anañkartin ainia nuka iruntainmasha tura pepru jintí wekasasha ashí íimiainiaín shiir túrajai tusar nuna túrin ániawai. Junasha “pénker túrawai” tu enentáimturarti tiniu ásar Yus akíatsain aya tu enentáimturmajain akinkiaruiti, nekas tajai. <sup>3</sup>Antsu átumka atsumainia nu yayiakmeká penké úukam túrata. Chikichkisha nu yáinman nekaashti. <sup>4</sup>Úukam túrakminkia ame Apa Yus úukman wainia nu, nuna akirmaktatui.’

### Yus áujsatniun Jesus unuiniamiania nu

(Rúkas 11.2-4)

<sup>5</sup>‘Atumsha Yus áujeakrumsha ántar chichamtin ainia núnis áujsaírap. Nu shuarka iruntainmasha tura pepru jintísha shuar iirsarti tusa wajakar Yúsán áujin ániawai. Nekasan tájarme, Yus akíatsain aya nu iismajain akinkiaruiti. <sup>6</sup>Tura ame Yus áujeakmeká ame kuár-turmin wayam waiti epenim nuí amek ame Apa Yus áujsaata. Nuna ame Apa Yus úuka túramu waitma asa akirmaktatui.’

<sup>7</sup>‘Yus áujeakmesha ántar esaram áujsaip. Yúsán nékainiatsna nuka “Esaram áujeakuinkia Yus anturtuktatui” tu enentáimainiawai. <sup>8</sup>Niijiai métek ajasairap. Átumka seatsrumniñ Yus Apa átum atsumamun nékawai. <sup>9</sup>Nu asamtai Yus áujkuram júnis títiniaitrum:

<sup>10</sup>‘Aparu Yus, nayaimpiniam pujamna nu, ii Aparínme. Ame náarmincha shuar ántar pachischarti. <sup>11</sup>Ashí

<sup>12</sup>‘Aparu Yus, nayaimpiniam pujamna nu, ii Aparínme. Ame náarmincha shuar ántar pachischarti. <sup>13</sup>Ashí

<sup>14</sup>‘Aparu Yus, nayaimpiniam pujamna nu, ii Aparínme. Ame náarmincha shuar ántar pachischarti. <sup>15</sup>Ashí

áentsnum ame akupkatin tsawantrum wari jeati. Ame wakeramuram nayaimpiniam umikma ana núnisan̄ ju nuṅkanmasha uminkiatí. <sup>11</sup> Aparu, ii yurumkarí ashí tsawant amasta. <sup>12</sup> Tura winia nemasrun tsan̄kurajna núnismek, Aparu, winia tunaaru tumashrisha tsan̄kurturta. <sup>13</sup> Tunáa wakeruktin tsan̄katrukaip. Antsu ashí tunaanumiá uwentikurta. Tuke ashí aents akupkamniatme. Núnisam Amesha tuke ti kakarmaitme. Tura ti shíraitme. Tuma asakmin seajme. Nuke atí.'

<sup>14</sup> 'Amesha chíkich shuar yajauch awajtamka nu tsan̄kureakminkia Yus Apa nayaimpiniam pujana nu amincha tsan̄kurtamprattawai. <sup>15</sup> Tura chíkich tsan̄kureachkumniṅkia Yus Apasha ame tunaarmincha tsan̄kurtamprashtatui.'

### Ijiamatniun pachis Jesus unuiniamiania nu

<sup>16</sup> 'Ijiamarum Yus áujkurmesha wake mesekrum susuntrairap. Anan̄kartin shuar chíkich shuar "ijiamaiti" tu enentáimtursarti tusa tuma ániawai. Nekasan tájame, Yúska akíatsain̄ aya nujaī akikma ániawai. <sup>17</sup> Antsu ámeke ijiamamsha péñker temashmaram péñker jaupmitia. <sup>18</sup> Shuar ijiamaiti tu enentáimturmasarain̄. Aya Yus Apak nekaattawai. Tura asa akirmaktatui.'

### Kuítian pachis Jesus unuiniamiania nu

(Rúkas 12.33-34)

<sup>19-20</sup> 'Ju nuṅkanmaya kuit ikiaun̄katniujaī nan̄kaamas nayaimpiniam kuit ikiaun̄kata. Juṅkia kayāa yúchakait tura mash meseatsuk. Tura kasasha wayá kasamtsuk. Antsu nayaimpinman̄ka kayāasha yuatsui tura mash meseatsui tura kasasha wayá kasamsui. <sup>21</sup> Kuítrum ana

nuj enentáimtustatme. Tuma asam nayaimpiniam ikiaun̄kata.'

### Ayashí tsáapnintri

(Rúkas 11.34-36)

<sup>22</sup> 'Ame jímijiaī tsáapin amiin wayamniaiti. Tuma asamtai ame jiiimi péñkeraitkiuṅkia amiin tsáapin wayá tuke tsáapniiti. <sup>23</sup> Antsu ame jiiimi yajauchitkiuṅkia tsáapin amiin wayachmin asamtai tuke kiritin átatui. Núnisan̄ yajauchia nu wakerakmeke péñkera nu ame enentáimiin wayachmin asamtai tuke kirit ajastatui. Nu kiritcha imiá yajauchiti.'

### Yussha kuitsha máimtek enentáimtuschamniaiti

(Rúkas 16.13)

<sup>24</sup> 'Shuar jimiará úuntrīn umirkatniun tujintiawai. Chikichan wakerak chikichnaka nakitrattawai. Chikichan umiruk chikichnaka umirkashtatui. Núnisan̄ átumka Yussha kuitcha máimtek enentáimtustin tujinkiattarme.'

### Yus ni uchirín péñker wáinkiaiti

(Rúkas 12.22-31)

<sup>25</sup> 'Tuma asamtai tájarme: Wariniak yuataj wariniak umartaj tura wariniak entsartaj tusarum nuke enentáimsairap. Yus iwiaaku átinian amasu asa yurumkancha amaschamniakait. Tura ju ayashniasha najana asa entsataincha amaschamniakait. <sup>26</sup> Chin̄kisha enentáimpratarum. Yakí nanamainiak yurumkan arakmainiatsui. Tura juuk yurumkan ikiuiniatsui. Tuma ain̄ Yus Apa nayaimpiniam pujana nú Yusak áyureatsuk. Atumsha chin̄kia nú nan̄kaamaschakaitrum. <sup>27</sup> Nu arantcha ti enentáimkiumsha ḡnujaī tsakartatmek?'

<sup>28</sup> 'Nuikia ḡurukamtai entsartincha timiá enentáimprum? Iistá, kukujsha takachuitiat tura najanchaitiat <sup>29</sup> ti shíirmach ániawai. Yaunchu uunt

akupin Sarumún ti shiir iwiarmamniuitiat kujukia tímianchayayi. <sup>30</sup>Iis, nupa yamá tsakaawai tura kashin aents tsupikiar jinium epeenawai. Tuma aiñ Yus ti shiir áentseatsuk. Nuna tura asa atumniasha nú péñker waitmakhattawak. ¿Urukamtai Yus nekas enentáimtsrum? <sup>31-32</sup>Ju nunkanam ana nu pachikiairap. Chíkich shuar, Yúsna nékainiatsna nu, warin yuattaj' warin umartataj' warin entsartataj' nuna ti pachiniawai. Tura atumsha tu enentáimsarum weerap. Ame Apa nayaimpiniam pujana nu ame atsumamurmin nékawai. <sup>33</sup>Tuma asamtai Yusjaj' shiir wekasatin tura Yus akupkamu ana nu umiktin emka enentáimsatarum. Túrakrumniñkia atsumamurmin Yus suramsattawai. <sup>34</sup>Kashin áatna nujaj' itiurchat enentáimsairap. Kashinkia nusháa itiurchatrijjaj' tsawarchattawak. Yamái tsawanta jujaj' máakchakait.'

### Chíkich sumamtikiawairap

(Rúkas 6.37-38, 41-42)

**7** 'Chikicha tunaari ti enentáimtusairap. Núnisan Yus atumí tunaari iirtamsashtatui. <sup>2</sup>Chíkich wárik sumamtikiatin enentáimkiumniñkia Yus núnisan sumamtikramattawai. Tura ame chikicha túramuri nekapmarmena nú nekapkajain amincha nekapmarmattawai. <sup>3</sup>Tuma asamtai ¿itiurtsuk atumi jjin numi enketna auk ítskesha atumi yachí jjin tsuat enketusha iyarum? <sup>4</sup>Ame jjiimiin numi tuke enketaisha ¿itiurtsuk ame yatsumi jjiya tsuátan jurustajme tame? <sup>5</sup>Ántar shuará, ame yáintaj' tákumka emka ame jjiimiin numi enketna nu jusata. Nuyá paant iistatme yatsumi jjin tsuat enketna nu jurustin.'

<sup>6</sup>'Ti shiira nuka yawá súsash-tiniaiti. Nuna nakitrar amincha

esatmichartimpiash. Kuítrumsha kuchi súsashtiniaiti. Aya najatrachartatuak.'

### Yus seakmin suramsattawai

(Rúkas 11.9-13; 6.31)

<sup>7</sup>'Yus seakrumin suramsattawai. Eakrumka wainkiattarme. "Winiajai" tákurmin awaintiamattarme. <sup>8</sup>Seana núnaka suñiawai. Eana nuka wáiniui. "Winiajai" tuinia núnaka awainiawai.'

<sup>9</sup>'Ame uchiram apatkun seatmakui ¿kayaash súsaintiam? <sup>10</sup>Tura namakan seatmakui ¿napíash súsaintiam? <sup>11</sup>Nuikia átum yajauchitirmesha atumi uchirí péñker ana nu tuke súuchakaitrum. Nuna nankaamas nuikia seakrumniñkia atumi Aparí nayaimpiniam pujana nu péñker ana nuna suramsashtatuak.'

<sup>12</sup>'Júnaka Muisaissha Yúsna etserniusha akupenawai: "Chíkich ámin túrutatí tusa wakerakmeka amesha núnismek túratá." Tu akupenawai.'

### Wañkaram jintiasha tura yupikiach jintiasha

(Rúkas 13.24)

<sup>13-14</sup>'Wañkaram jintia awai. Wayatniusha yúpichuchiiti. Nuñsha untsurí wáiniawai. Tura nusha menkatatniunam jeawai. Túrasha chíkich jintia awai. Nusha yupikiach asa itiurchataiti. Wayatniurisha yupikchiiti. Nu ishichik wáiniawai. Tura nusha iwiaaku pujustinnium jeawai. Tuma asamtai tuke iwiaaku pujustaj' tákurmeka yupipitin jintia achiktarum.'

### Nerejai numi nekaatainti

(Rúkas 6.43-44)

<sup>15</sup>'Aneartarum. Wáitruiniak "Wi Yúsna etserjai" tuinia nu írunui. Pátatek murikiua áinis yúpichuch áiniawai tura ni enentáin nekas úunt-yawá áinis áiniawai. Pátatek shiir chichainiawai tura ni enentáin

yajauch piakuiti. <sup>16</sup> Atumsha túramujají nin nekaatniuitrume. Naranmaya shuiya júukchamniaiti. ¿Tsachiksha kushínkiapen nerektatuak? <sup>17</sup> Núnisan pénker numia nu tuke pénkeran nereatsuk. Tura yajauch numia nu yajauchin nereatsuk. <sup>18</sup> Pénker numi yajauchin nereatsui. Núnisan yajauch numi pénkeran nereatsui. <sup>19</sup> Yajauch numi ajakar tsupirar jinium apeashtinkiait. <sup>20</sup> Tuma asamtai wáitrin ainia nuka túramujají nekanattawai.’

### Ashikia Yus akupeana nuí jeachartatui

(Rúkas 13.25-27)

<sup>21</sup> ‘Aya winia Apar nayaimpiniam pujana nuna wakeramurín umirin ainia nuke Yus akupeamunam pachiinkiertatui. Chíkichka “Uuntá, Uuntá” turutainiyat nayaimpiniam jeachartatui. <sup>22</sup> Amuukatin tsawant jeamtai untsurí turutiartatui “Uuntá, Uuntá, ame náaram pachisar ashí nunkanam etserkachmakají. Ame náarmesha pachisar yajauch wakanha jiiiki akupkamji. Tura ame náaram pachisar aentsti tujintiamu túramji” turutiartatui. <sup>23</sup> Nui chichainiakui “Werumtarum. Penke nékachuitjarme. Aya yajauchitrume” títiatjai.’

### Pénker ukurma tura yajauch ukurma

(Rúkas 6.47-49; Márkus 1.22)

<sup>24</sup> ‘Shuar winia chichamprun antuk umirkañka nu shuar ti pénker enentáimniuiti. Niisha ju shuarjají méteketete. Jeá jeamuk kayanam ukurmai. <sup>25</sup> Tura yumi ti yutuk entsa nujanñkruamai tura nase ti kakaram umpuimiai. Túmain pukukachmai ni ukurmari kayanam ukuamu asamtai. <sup>26</sup> Tura shuar winia chichamprun antuk umirtukchañka ju shuara núnisan enentáimchaiti. Jeá jeamuk náikminiam ukurmai. <sup>27</sup> Tura yumi yutuk entsa nujanñkruamai tura nase ti

kakaram umpuimiai. Túmakui jeá mash saanaki iniaamai” tímiayi Jesus.

<sup>28</sup> Jesus nuna tinia amukmatai ashí shuar ti enentáimprarmiyai. <sup>29</sup> “Yusa kakarmarijají unuitiamtsujik. Israer-shuara jintinniurinkia núnis unuiniainiatsui” tiarmiyai.

### Jesus tunamarun tsuarmiania nu

(Márkus 1.40-45; Rúkas 5.12-16)

**8** Jesus muraya támatai untsurí shuar Nin nemariarmiyai. <sup>2</sup> Nui shuar tunamaru Jesusan jearin tikishmatramiyai. Tura tímiayi “Uuntá, wakerakmekka tsuáramniaitme.”

<sup>3</sup> Tutai Jesus uwejéjají antin “Wakerajai. Pénker ajasta” tímiayi. Tutai tunamaru ni tunamarmari pénker ajasmiyai. <sup>4</sup> Tura Jesus tímiayi “Pai, penké etserkaip. Áyatik Israer-patri iniakmamsam Muisais timia nu susata ashí shuar nekaawarti tusam.”

### Jesus suntara uchirín tsuarmiania nu

(Rúkas 7.1-10)

<sup>5</sup> Jesus Kapernáum péprunam wayamtai apachi suntara kapitíántri Nin tarimiyai. <sup>6</sup> “Uuntá, tímiayi. Winia uchir tampeparu jeá tepes ti wait ajáa tepawai” tímiayi.

<sup>7</sup> Jessussha “Ayu, winin tsuartajai” tímiayi.

<sup>8</sup> Tutai kapitíán tímiayi “Uuntá, Ame ti nanñaamaku asam winia jearuí wayachminiatme. Áyatik “Pénker ajástí” tákumin winia uchir pénker ajatrustatui. <sup>9</sup> Iista, winiasha akuptuiniatsuk tura wisha suntaran akupenatsjak. Juna “Wetá” takui wéawai. Tura chikichnasha “Winitia” tutai winiawai. Tura takartinian “Ju túratá” tutai umíawai.”

<sup>10</sup> Kapitíán nuna tutai Jesus ti enentáimiuk Nin nemarainian tímiayi “Nekasan tájarme, Israer-shuar Yúsán tímiatrus enentáimtin atsawai. <sup>11</sup> Maa,

yajayá untsurí shuar Yus akupeana nuí jeawar Apraámjajsha Isakjajsha Jakupjajsha iruntrar yurumáwartatui.

<sup>12</sup>Tura Israer-shuar Yúsnum jeamnia áiniayat aa kiritniunam ajapnawartatui. Nuí ti úutin tura ti wáitsatin átatui.”

<sup>13</sup>Nuyá Jesus kapitíánin chicharuk “Jeemiin waketkitia. Nekas enentáim-tusu asakmin uchiram péñker ajatram-sattawai” tímiayi. Túramtai ni uchirí nu chichamtaik péñker ajatsamiayi.

### **Jesus Pitru tsatsarín tsuármiania nu**

*(Márkus 1.29-31; Rúkas 4.38-39)*

<sup>14</sup>Jesus Pitru jeen we Pitru tsatsar-in tsuemujai jaa tepan wáinkiamiayi.

<sup>15</sup>Tura ni uwején antinmatai tsuemun michatramiayi. Tura nuwá nantakin ashí ajamsarmiayi.

### **Jesus untsurí jáinian tsuármiania nu**

*(Márkus 1.32-34; Rúkas 4.40-41)*

<sup>16</sup>Kashi ajasmatai yajauch wakantrukarun Jesusan itiararmiayi. Tura nu yajauch wakanin chikichík chichamjai chicharas jiki akupiarmiayi. Ashí jáiniancha tsuármiai. <sup>17</sup>Yúsnan etserin Isayas “Ii pimpirmaríncha ii sunkuríncha jurutramkimiaji” yaunchu timia nu uminkiat tusa nu túrunamiayi.

### **Jesus nemarsatin**

*(Rúkas 9.57-62)*

<sup>18</sup>Shuar untsurí Jesusan káutkarmatai “Entsa amain katintai” tímiayi.

<sup>19</sup>Nuí Israer-shuara jintinniuri Jesusan tarí tímiayi “Uuntá, Ámin páchtsuk nemarsatniun wakerajme.”

<sup>20</sup>Tutai Jesus tímiayi “Kujanchmasha ni wáarín takaktsuk. Chínkisha pasunken takaktsuk. Tura Wi Yúsnumiáitiatan tepestiniur atsawai.”

<sup>21</sup>Nin nemarniusha tímiayi “Uunta, emka winia aparun iwiarsan ikiuuttajai.”

<sup>22</sup>Tura Jesus “Nemartusta, tímiayi. Wakannium jaka ainia nu jakan iwiarsarti” tímiayi.

### **Nasesha entsasha Jesusan umirkarmiania nu**

*(Márkus 4.35-41; Rúkas 8.22-25)*

<sup>23</sup>Nuyá Jesus ni unuiniamurijiai uunt kanunam enkemámiayi. <sup>24</sup>Nuí nase ti kakaram umpuimtai antumian ti tamparintin ajasmiai. Tura entsa kanunam yaráná piákmiayi. Tuma ain Jesus kanunam kanar tepemiayi. <sup>25</sup>Nuyá ni unuiniamuri kurashim Jesusan ishintiarar tiarmiayi “Uuntá, wayaji. Kakaram ajachkumninkia jakattaji.”

<sup>26</sup>Jesus tímiayi “¿Urukamtai timiá ashamarum, Yus enentáimtutskesha?” Nuyá wajaki nasencha entsan cha chicharkamiayi. Tutai mash miaaku ajasmiai. <sup>27</sup>Nuna íisar ni unuiniamuri ti enentáimsarmiayi. Tura tiarmiayi “Jusha ¿warí áentsuit? Nasesha entsasha Nin umirainiatsuk” tiarmiayi.

### **Jatara nunkanam Jesus yajauch wakantrukun tsuármiania nu**

*(Márkus 5.1-20; Rúkas 8.26-39)*

<sup>28</sup>Nuyá Jesus entsá amaini katin Jatara nunkanam jeamiayi. Nuí jimiará shuar yajauch wakantruku tuke iwiartainium pujú Jesusan tariarmiayi. Mai yajauch wakantruku ásar ti kajen ármiai. Tuma asantai shuar nu jintianam nankaamachu ármiai. <sup>29</sup>Niisha Jesusan wáinkiar kakantar tiarmiayi “¿Warí pujuram iijjai, Jesusá, Yusa Uchiría. Tsawant jeatsain in amukratkataj tusamek taum?” tiarmiayi. <sup>30</sup>Nuí arant kuchi untsurí shushunmak yujaararmiayi. <sup>31</sup>Yajauch wakancha Jesusan seainiak “Jiki akupkar-takmeka kuchíniam wayatin tsankatkar-tukta” tiarmiayi.

<sup>32</sup>Tutai Jesus “Pai, wetarum’ tímiayi. Yajauch wakancha shuara enentáiya jíinkiar kuchiniam enkemáwarmiayi. Túramtai kuchi wáurkiar arau utsanarmiayi. Nuyá entsá iniankar jakarmiayi.

<sup>33</sup>Kuchí wáinniusha nuna ashamkar péprunam tseke wéarmiayi. Nuí jeawar ashí túrunamun etserkarmiayi. Yajauch wakantrukun pénker ajasmancha etserkarmiayi. <sup>34</sup>Nuyá ashí nú peprunmaya shuar Jesusan inkiuntai tusar ashinkiararmiayi. Tura inkiunkar ni nunkeya waketkiti tusar seawarmiayi.

### Jesus emearun tsuármiania nu

(Márkus 2.1-12; Rúkas 5.17-26)

**9** Nuyá Jesus kanunam enkemar antumian amaini katinmiayi. Tura nuí ni péprurin Kapernáumnum jeamiayi. <sup>2</sup>Nuí jeamtai shuar emearu jaan patak yanakin ejeetiarmiayi. “Tsuártatui” nekas tu enentáimtuinia ásarmatai Jesus jaan tímiayi “Uchirú, kakaram ajasta. Ashí ame tunaarum tsankuramuiti.”

<sup>3</sup>Takuí Israer-shuara jintinniuri yajauch enentáimprar “Juka Yúsan ti yajauch chicharui” tiarmiayi.

<sup>4</sup>Tu enentáimainian Jesus nekáa tiarmiayi “¿Urukamtai imiá yajauch enentáimprum. <sup>5</sup>Tua imiá yúpichuchit. Shuara tunaarin tsankuratin yúpichuchikiai. Tura emearun “Nantakim wekasata” títin yúpichuchikiai? <sup>6</sup>Wi Aents Ajasua núchakaitai. Ju nunkanam Wi tunaan asakátratniuitjai. Wátsek, nu nekaatarum tusan juna iniakmastatjai.” Nuna tinia emearun “Wajaktia, tepetairam jukim jeemijn wetá” tímiayi. <sup>7</sup>Tutai emearu tsuámar nantaki ni jéen wémiayi. <sup>8</sup>Tura nuna ashí aents wáinkiar Yus kakarman shuáran susa asamtai ashamkar Yúsan shiir enentáimtusarmiayi.

### Jesus nemartusat tusa Mateun achíawai

(Márkus 2.13-17; Rúkas 5.27-32)

<sup>9</sup>Nuyá Jesus wémiayi. Nuí wesa Mateun kuit júutainium pujan wáiniak “Nemartusta” tímiayi. Tutai Mateu nuna ikuiak Jesusan nemarmiayi.

<sup>10</sup>Nú ukunmasha Mateu jéen yurumuk pujai yajauch armia nu Israer-shuar untsurí káunkar Jesusa unuiniamurijjai irunar yurumiarmiayi. <sup>11</sup>Pariséusha nuna ísar Jesusa unuiniamurin aniasarmiayi “¿Urukamtia atumí Uuntri kuitia achinjajsha tunaarinniuajajsha irunar yuruma?”

<sup>12</sup>Tura Jesus nuna antuk tímiayi “Pénker ainia nuka tsuákratniun atsumainiatsui. Antsu jainia nu tsuákratniun atsumainiawai. <sup>13</sup>Werum ju aarma unuimiutarum:

“Murik maam Winia surusum nujai “máakete” tátsujai. Antsu waitnenkartutain wakerajai,” Yus-Papinium tu áarmaiti.

Wikia “pénkeraitjai” tuńnian untsuktaj tusan táchaitjai. Antsu tunáa shuar ni enentáin yapajíáwarat tusan táwitjai” tímiayi.

### Ijjiarmatniun Jesusan aniasarmiania nu

(Márkus 2.18-22; Rúkas 5.33-39)

<sup>14</sup>Nuyá imiakratin Juanka unuini-amuri Jesusan tariar aniasarmiayi. “¿Urukamtai iikia tura Pariséusha ijiarmaj’ tura ame unuiniamurmeka ijiarmainiatsu?” tiarmiayi.

<sup>15</sup>Jesus ayak tímiayi “Nuatma nampernum ipiaamu ainia nu ¿ajakra uutu wayamniakait? Yamái-nuatpujakui úutchamin ániawai. Núnisan Wi pujakui ijjiarmashtin ániawai. Tura tsawant jeattawai nuatua

áintsan Wi junaktatjai. Antsu nuikia ijiarmawartatui' tímiayi.

<sup>16</sup> Mamuru pushí jaanakmatai yamaram tarach anujtukchatniuiti. Túramka nijiam yamaram tarach sumpeak mamushan chĩkiá nuna nankaamas jaaktatui. <sup>17</sup> Nijiamanch yamá nawar nuap najanamu arutum yaraachminiati. Túramka kariak nuap najanamun ijiakratniuiti, nijiamchisha ukaratniuiti, tura nuap najanamusha yajauch ajastiniati. Antsu yamaram nijiamanch yamaram nuap najanamunam yaraatniuiti. Nu túramka nijiamchisha nuap najanamusha mai péñker ártatui."

### **Jesus Jairu nawantrĩncha tura chĩkich nuwancha tsuármiania nu**

(Márkus 5.21-43; Rúkas 8.40-56)

<sup>18</sup> Jesus nuna taj Israer-shuara uuntri Jesusan tarí tikishmatar tímiayi "Winia nawantur jarutkayi, tura Ame winim ewejmijjai antinrukakminkia ataksha nantaktiatui." <sup>19</sup> Tutai Jesus ni unuinia-murijjai wajakiar nijjai wearmiayi.

<sup>20</sup> Tura jintiá weenai nuwá tuse (12) uwitin numpá ajapeak wáitias pujú asa Jesusa ukurinĩ amainian ni pushirin antinmiayi. <sup>21</sup> "Áyatik ni pushirin antin-naka péñker ajastatjai" tu enentaim-pramiayi. <sup>22</sup> Nuna nekáa Jesus ayan-tar nuwan tímiayi "Shiir enentáimprata, nawantru. Yus shiir enentáimtusu asam péñker ajasume." Nu chichamtaik ni jáa-muri péñker ajasmiayi.

<sup>23</sup> Nuyá Jesus uunta jeen jeamiayi. Tura nuĩ charaatum ajainiancha tura jakan iwiansatai tusar péeman umpuiniancha wáiniak <sup>24</sup> tímiayi "Aa jĩntratarum. Nuwáchikia jákachai antsu aya kanarai." Peñké jakan nékayat túratta nuna neka asa "aya kanarai" tímiayi. Takui aents Nin wishikrarmiayi. <sup>25</sup> Tura nuna ashí jjiir Jesus jeá wayá nuwáchin

uwejnum achik iniantkimiayi. Túram nantakmiayi. <sup>26</sup> Nu túramu ashí nu nunkanam etsernarmiayi.

### **Jesus kusurun jímíaran tsuármiania nu**

<sup>27</sup> Nuyá Jesus wéakuí jimíará shuar jji kusuru untsumki weriarmiayi. "Uuntá, ii Uuntri Tawit ame weatrum asamtai in waitnenkarturta" tiarmiayi. <sup>28</sup> Jesus jeá wayamtai jji kusuru tariarmiayi.

Tura Jesus aniasar "¿Juna túramniati túrutrumek?" tímiayi.

Niisha "Ee, Uunta" tiarmiayi.

<sup>29</sup> Tuíniakuí Jesus ni jjin antinkiar tímiayi "Átum nekas enentáimtarmena núnisan túrunati." <sup>30</sup> Nujai jji péñker ajasarmiayi. Nuyá Jesus "Etserkairap. Shuar peñké nekáwarain" tímiayi. <sup>31</sup> Tá-maitiat jjiinkiar Jesus túramun ashí nu nunkanam etserkarmiayi.

### **Jesus chichachun péñker awajsamiania nu**

<sup>32</sup> Nuyá wenai shuar yajauch wakantruku chichachun Jesusan itiararmiayi. <sup>33</sup> Tura Jesus yajauch wakanin jjiiki awemamtai nu chichachu chichakmiayi. Ashí nuna íisar ti enentáimprarmiayi. Tura tiarmiayi "Yáunchusha Israer nunkanam jujai métek túramu peñké atsuwiti." <sup>34</sup> Antsu Pariséuka yajauch enentáimtuiniak tiarmiayi "Nu shuar iwianchi uuntri kakarmarijjai yajauch wakanin jjiiki akupeawai."

### **Jesus shuaran waitnentawai**

<sup>35</sup> Jesus ashí péprunam we ni irun-tairin wayá "Yus akupeana nuĩ enkemá-tarum" tu etsermiayi. Tura ashí náñka-mas sunkurjai jáiniancha tsuármiai. <sup>36</sup> Shuaran íisar murik wáinchatia núnis pimpikiar tura kúntuts pujuinia asamtai waitnentrarmiayi. <sup>37-38</sup> Nuyá ni unuini-amurin tímiayi "Ju aents Yus-Chicham



ujaktiniaitji Yus-shuar ajasarat tusar. Nu takat ti núkap awai tura takarin ishichik ániawai. Nu takatka júuktinia áintsan̄kete. Júúktin tsawant jeamtai takau táasmatai takamtikin ujaktin átsuk takaun akupkat tusa. Atumsha núnisrumek Yus seatarum ni shuarin akupak áentsun júukarat tusarum.”

**Jesus tuse (12) unuiniamurin achikmiayi tuke nemarsatniun**

(*Márkus 3.13-19; Rúkas 6.12-16*)

**10** Nuyá Jesus tuse (12) unuiniamurin achik Yusa kakarmarin súarmiayi yajauch wakanin shuara enentáiya jiiiki akupkatniun. Núnisan̄ ashí sun̄kurjai jáinian tsuáartinian susamiayi.

<sup>2</sup>Jú ániawai Jesus tuse (12) unuiniamurin achikiarmia nu: Emka Semun̄ núnisan̄ Pitru náartiniuyayi. Nuyá ni yachi Antres. Nuyá nuámtak yáchtin Jakupusha Juansha, Sepetéu uchirí armia nu. <sup>3</sup>Nuyá Jiripi, Parturumí, Tumas, Mateu. Mateusha kuítian achiniuyayi. Arpeu uchirí Jakupusha. Ripú núnisan̄ Tateu náartiniuyayi. <sup>4</sup>Ásump<sup>i</sup> Semun̄sha nuyá Jútas Iskariúti Jesusan ukunam surukmia nu. Nu tuse (12) achikma ármiai.

**Jesus ni unuiniamurin etserkarti tusa akupkarmiania nu**

(*Márkus 6.7-13; Rúkas 9.1-6*)

<sup>5</sup>Nu tuse (12) unuiniamurin Jesus júnis chicharak akupkarmiayi. “Israer-shuarcha matsatmanum weerap. Samaria nun̄kanam péprunam weerap. <sup>6</sup>Antsu Israer-shuar murikua ánis Yusaiya wákaru ainia nu weritiarum. <sup>7</sup>“Tsawant ishichik ajasai Yus jú nun̄kanam akupin ajastin” tu etserki wetarum. <sup>8</sup>Tunamarusha chikich sun̄kurjai jainia nusha tsuarterum. Jakasha iniantkitiarum. Yajauch wakancha shuara enentáiya jiiiki

awematarum. Nu túratin kuítchajai kakaram susamuitrume, tuma asantai atumsha ashí ántrarmek túratarum.’

<sup>9</sup>‘Kurisha ashí kuitcha jukiirap. <sup>10</sup>Uyuncha jukiirap. Sapatcha tura ushukrustincha jukiirap. Antsu chikichik pushí jukitiarum. Takau asakrumin yurumkan ajampramsartin ániawai.’

<sup>11</sup>‘Péprunam jearmesha pénker shuar wáinkiarum nuí wayarum tuke nuin pujustarum. <sup>12</sup>Nu jeanam wayamsha “Jú jea shiir atí” titiá. <sup>13</sup>Nekas pénker shuaraitkiun̄ka shiir ajasarti. Antsu nu shuar pénker itiarmachkun̄ka shiir ajascharti. <sup>14</sup>Tura nánkamsan̄ atumin awaintiamainiachkuin̄kia anturtamainiachkuin̄kia nuyá jíinkitiarum. Nu shuar yajauch ásarmatai jíinkirum atumí naweya nun̄ka japimiarum ikiuktiarum. Ni tunaari aents nekaawarat tusarum túratarum. <sup>15</sup>Nu shuaran nekapsatin tsawant jeamtai Yus asutiáshtatuak. Sutum péprunmaya shuara nan̄kaamas Kumura péprunmaya shuarnasha nan̄kaamas Yus asutiáttawai nu shuaran’ tímiayi.

**Yajauch awajsatniun ujakmiania nu**

<sup>16</sup>‘Aneartarum. Wisha murik yawanum akupkatniua áintsanak akupeajrume. Tuma asantai shiir nawamkartin áyatrum aneartarum. <sup>17</sup>Yajauch shuarjai aneartarum. Akupniunam juramkiartatui. Israer-shuar iruntainiam asutiamawartatui. <sup>18</sup>Wíi shuar asakrumin uuntnumsha tura nuyá akupniunmasha juramkiartatui. Núnisrum akupniuncha tura Israer-shuarchancha winia chichamur ujaktatrume. <sup>19</sup>Tura akupniunam surutmakakrumnisha wariniak títiay tu enentáimprairap. Nuí uuntjai chichaakrumin Yus títinian jintintramattarme. <sup>20</sup>Nuin̄kia átum

enentáimmiajaj chichaschattarme antsu atumí Aparí Yusa Wakaní atumin chichamtikramsattarme.’

<sup>21</sup>‘Shuar ni yachincha máawarti tusa suruktatui. Apasha ni uchirín surukartatui. Uchisha ni aparín máawarti tusa surukartatui. <sup>22</sup>Tura Wíi shuar asakrumin mash muíjramkartatui. Tura tuke katsuntea nu uwemprattawai. <sup>23</sup>Chikichik péprunam yajauch awajtamainiakui chíkich péprunam pisartarum. Wi Aents Ajasuitjaj. Tuma asan nekasan tájarme, átum Israer-shuar mashi ujatsrumnin wantinkiattajaj.’

<sup>24</sup>‘Unuiniamuka nin unuiniana nuna nankaamaschaiti. Takarniusha ni uuntri nankaamaschaiti. <sup>25</sup>Unuiniamuka nin unuinia nujaj métek ajaska maak. Takarniusha ni úntrijaj métek ajaska maak. Wátsek, Winia atumí úntrin “Iwianchi uuntri” túrutainiakui atumniasha nuna nankaamas yajauch turamtatui.’

### **Yúsak ashamkatniuiti**

(Rúkas 12.2-9)

<sup>26</sup>‘Tuma asamtai aentska ashamkairap. Ashí uukma nu paant nekanattawai. <sup>27</sup>Ishishmasan kiritniunam ujaajrumna nu, tsawáí kakantrarum etserkatarum. <sup>28</sup>Aya ayashin main ainia nu ashamkairap. Wakanin máachmin ániawai. Antsu wakanniasha ayashniasha mai jinium emesramnia asamtai Yus ashamkatarum.’

<sup>29</sup>‘Jimiará chiniki penké ishichik kuitjaj surukmin ániawai. Túmaitiat Yus tsankateachkuinkia nunká jaka iniainiatsui. <sup>30</sup>Ame intiashmisha mash nekapmarmaiti. <sup>31</sup>Nu asamtai jákatin ashamkairap. Yusjaj átumka ti untsurí chinikijaj nankaamas péngerchakaitrum.’

### **Jesus natsantrashtiniaiti**

(Rúkas 12.8-9)

<sup>32</sup>‘Ashí shuar ashí íimiainiain Winia natsantruiniatsna núnaka Winia Apar yakí nayaimpiniam pujana nuí natsantrashtatjaj. <sup>33</sup>Antsu shuar íimiainiain Winia natsantra núnaka Wisha yakí nayaimpiniam winia Apar pujana nuí natsantrattajaj.’

### **Jesusa chichamejaj shuar akannartatui**

(Rúkas 12.51-53; 14.26-27)

<sup>34</sup>‘Ashí shuar nawamnaikiar shiir pujarat tusan ju nunkanam táchaitjaj. Nuna túrat tusarum enentáimturairap. Antsu wi tamaajaj shuar pénger ajararmatai yajauch shuar nin nakitrartatui. <sup>35</sup>Shuar ni aparín nakitrattawai. Nuwasha nukurín nakitrattawai. Najatísha tsatsarín nakitrattawai. <sup>36</sup>Tuma asa shuar ni shuarijaj nemasrintin ártatui.’

<sup>37</sup>‘Shuar ni aparíncha nukuríncha Wijijaj nankaamas aneakka Wíi shuar áchamniaiti. Núnisan ni uchiríncha nawantríncha nankaamas aneakka Wíi shuar áchamniaiti. <sup>38</sup>Tura ashí wáitsatniun surimiatsuk ni krúsrín yanaki jukí nemartachkunka Wíi shuar áchamniaiti. <sup>39</sup>Aya jú nunkanam pénger pujustaj tana nu ni iwiaakmarín emesattawai. Tura Winia anentu asa ju nunkanam pénger pujustinian páchiatsna nu tuke shiir pujustatui.’

### **Akinkiatin**

(Márkus 9.41)

<sup>40</sup>‘Atumin itiaarma nuka Winia itiaarui. Tura itiaarea nuka Winia akuptukmia nunasha itiaawai. <sup>41</sup>Yúsnan etserniuncha Yúsnumiá winiá asamtai itiaakka etserin akínkiáttana nujaj métek akínkiáttawai. Pénger shuárnasha pénger asamtai itiaakka

pénker shuar akínkiáttana nujai métek akínkiáttawai niisha. <sup>42</sup>Uchíncha Wíi shuar asamtai entsá michan shikirak súsaŋka imiá nekas nusha akínkiáttawai.” Tu tímiayi Jesus.

### Imiakratin Juan Jesusaj shuaran akupkamiania nu

(Rúkas 7.18-35)

**11** Tura tuse (12) unuiniaturin Jesus tinia akupkar Niisha nú nunka pérunam we Yus-Chichaman jintfak etserkamiayi.

<sup>2</sup>Tura Juan sepunam enkemas Kristu túramun antukmiayi. Antuk ni unuiniaturin jímiaran Jesusaj akupkamiayi. <sup>3</sup>Tura Jesusan aniasarmiayi “¿Nekas ame Kristu Yus akupkamu tátnia nukaitiam. Kame chikichak nákastataj?”

<sup>4</sup>Tutai Jesus tímiayi “Waketkirum ashí ántarmena nusha wáintrumna nusha Juan ujaktarum. <sup>5</sup>Kusurusha wáinmainiawai. Shutuapsha wekainiawai. Tunamarusha pénger ajainiawai. Empekarusha ántuiniawai. Jákarusha nantainiawai. Tura kuítrinchamasha uwempratin chicham ujakmaiti. Nu ujaktarum. <sup>6</sup>Túrasha yawetsuk Winia tuke shiir enentáimturna nú shuar shiir átatui.” Jesus nuna tutai waketkiarmiayi.

<sup>7</sup>Waketkiarmatai shuar káunkarun Jesus Juánkan pachis áujmatmiayi. “Shuar atsamunmasha ¿warí werimiarum? Pintiu nase umpúam atúu we juní we ajana nuka ¿íistai tusarumek wémarum? Kame Juankka nú shuarchaiti. <sup>8</sup>Nuikia ¿warí werimiarum. Shuar pénger iwiarmampra íistai tusarmek wémarum? Warí, pénger iwiarmampraka uunta jjen pujuiniatsuk. <sup>9</sup>Nuikia ¿warí werimiarum. Yúsnan etserniuk

werimiarum? Maa, túrachmashiuram. Túrasha Juankka yaunchu etserniun nankaamas enentáimtustiniaiti.

<sup>10</sup>Yaunchu Yus-Papinium áarmaiti:

“Winia akatramurun amiñi emka akupeajai ame jintimin iwiarat tusa.”

Juan nu akatramuiti. <sup>11</sup>Nekasan tájarme, shuar imiakratin Juanjai nankaamas uunt atsuwiti. Tuma ain Yus akupamunam pachiinia nu shuarnaka, nekasmianchancha, Juanjai nankaamas shiir enentáimtustiniaiti. Tuma asamtai nuj pachiinkiatin enentáimpratarum.’

<sup>12</sup>‘Kakaram shuarka imiakratin Juan támia nú tsawantnumia Yus akupeamunam ti pachiinkiatniun wakeruiniak kakarmajai pachiinkiatniun enentáimainiawai. <sup>13</sup>Juan pujumia nú yaunchu ashí Yúsnan etserin armia nusha tura Muisais akupkamusha Yus akupin ajastinian etserkamiayi. <sup>14</sup>Yaunchu Yúsnan etserin “Kristu táatsain Erías tátniaini” tímiayi. Tura nekaatin wakerakrumka Juan nu Eríasaiti. <sup>15</sup>Antuktin jeakrumka nekaatarum.’

<sup>16</sup>Ju áentsnasha ¿warijjai métek nakumkataj? Uchijjai métek áiniawai. Ni aijjai iruntrar nakurustaj táyatan tuñiawai <sup>17</sup>“Námpera áinis nakurustaitsar peem umpuarji túrasha jantsemáchurme. Nuyá iwiarsatniua áinis nakurustaitsar íwiareakur kantamtai kantamáji túrasha átum útcharme.” <sup>18</sup>Atumsha núnisaitrume. Kame Juan núkap yurumsuk nijiamchíncha úmutsuk wekaimiayi. Túmakui átumka “Yajauch wakantrukuiti” tímiarme. <sup>19</sup>Nuyá Wisha Aents Ajasu támajai. Tura yurumeakui tura úmakui “Ti yurumin ti nampenaiti. Ashí yajauch shuaran amikrinti” túrutrume. Wátsek, wi túramujai Yus nekas nékamu nekanattawai.”

**Yajauch péprunmaya shuaran  
chicharkamiania nu**

*(Rúkas 10.13-15)*

<sup>20</sup>Nuyá tujintiamun túramiania nú peprunmaya shuaran pachis Jesus chicharkamiayi. Tuma ain nuyá shuar ni enentáin yapajíácharu asamtai juna chicharkamiayi.

<sup>21</sup>“Wáinkiatá, Kurasín péprunmayatiram, Petsaitia péprunmayatirmesha. Nuí aents tujintiamun ti túraitjai. Tiru péprunmasha Setun péprunmasha nu tujintiamu túramuitkiuinikia yaunchu ni enentáin yapajíáwaraayi. Túrawar kúntuts pujutai pushín entsarar yunkunim ajakiaraayi. <sup>22</sup>Tura Wisha tájarme, nekapsatin tsawant jeamtai Yus atumin tí asuttiamattarme. Tirunmaya shuaran nankaamas tura Setunnumia shuaran nankaamas asuttiamattarme.’

<sup>23</sup>Tura atumsha Kapernáum péprunmayatirmesha, ashí nankaamas nankaamantu ajastin enentáimtumarme. Antsu ashí emestamprartatui. Atumijn aents tujintiamun ti túraitjai. Sutuma péprunam nu tujintiamu túramuitkiuinikia nu pepru yamaisha take aayi. <sup>24</sup>Tura Wisha tájarme, nekapsatin tsawant jeamtai Yus Sutumanmaya shuar nankaamas atumin asuttiamattarme.”

**“Winin ayampratarum” tímiania nu**

*(Rúkas 10.21-22)*

<sup>25</sup>Nuyá Jesus tímiayi “Shiir enentáimtajme, Aparu, ashí nayaimpisha nunkaasha Úuntrinme. Tuma asam Ame túram nu ti unuimiaru enentáimtumainia nuyá úukuitme antsu uchichia áinis nankaamantu enentáimtumainiatsna nú shuar paant awajtusuitme. <sup>26</sup>Ame, Aparu, núnis wakera asam túraitme.’

<sup>27</sup>Winia Apar ashí surusuiti. Wisha ni Uchirí asamtai Winia nékarui. Tura chíkich Winia nekas

nekarainiatsui. Yus Apancha Wiki nékajai. Tura Wi wakeraj nú shuaran winia Aparun paant awajtajai. Nu shuarsha winia Aparun nékainiawai. <sup>28</sup>Ashí pimpikniutirmesha itiurchat pujarmena nusha Winí winitiarum. Túrakrumnínkia ayamtikrattajrume. <sup>29</sup>Wi kajechu asan tura péejchach enentáimin asamtai Winí winirum unuimiartarum. Winia chichamur ántakrum umíakrumnínka atumí wakaní ayamprattawai. <sup>30</sup>Atumin akuptaj nú túratin yúpichuchiiti. Káarkasha Wi súajrumna nu wampuchiiti” tímiayi Jesus.

**Jesusa unuiniamurí  
ayampratin tsawantai trikiu  
neren pakaarmiania nu**

*(Márkus 2.23-28; Rúkas 6.1-5)*

**12** Nuyá Jesus ayampratin tsawantai ajanman ajapenin nankaamamiayi. Ni unuiniamurísha tsukarar trikiu neren majusar yukí wekasarmiyai. <sup>2</sup>Pariséu shuarsha nuna wáinkiar Jesusan aniasarmiyai “Iista, ame unuiniamuram ayampratin tsawantai túratin surimkiamua nuna túruiniawai.”

<sup>3</sup>Tutai Jesus tímiayi “Yaunchu uunt akupin Tawitcha tura nemarniusha tsukamainiak túrawarmia nu ántichukaitrum. <sup>4</sup>Yusa Uunt Jeen wayá Yus iniaktusma tantan yuámiayi. Nu tantasha aya Israer-patrik yúatin asamtai Tawitniasha tura ni nemanin ana nunasha suritkiamuyayi. Túmain yúawarmiyai. <sup>5</sup>Muisais akupkamunam aarma nu áujkachukaitrum. Israer-patrikia ayampratin tsawantai takainiayatan nusha tunaachuiti. <sup>6</sup>Nekas tájarme, yamá Yusa Jeen enentáimtustinia nuna nankaamas Wíniaka Aents Ajasuitjiana nu, nekas enentáimtursatniuitrume. <sup>7</sup>Yus-Papinium tawai:

“Murik maam Winia surusum nujai  
“maakete” tátsujai. Antsu  
waitnenkartutain wakerajai.”

Nu chicham nekas nékaitkiurmeka  
yamái túrarmena núnisrum tunáa  
túrachu ánrarum súmamtiki-  
achaintrume. <sup>8</sup>Wi Aents Ajasu asan  
ayampratin tsawantan Uuntrintjai.”

### **Shuara uwejé jakan Jesus tsuármiania nu**

(*Márkus 3.1-6; Rúkas 6.6-11*)

<sup>9</sup>Jesus nuyá wé Israer-shuar irun-  
tainiam wayamiayi. <sup>10</sup>Nui shuar ámi-  
ayi ni uwejé jaka. Tura Jesusan án-  
tar nekapsatai tusa wakeruinia ásar ani-  
iniak “¿Ayampratin tsawantai jaa shuar  
tsuarminkiait?” tiarmiayi.

<sup>11</sup>Tutai Jesus tímiayi “Atumsha  
atumí murikrí ayampratin tsawantai  
wānam akaiki iniamtai jusatai tusarum  
wéchaintrupash. <sup>12</sup>Antsu shuarka  
murikjai nankaamaschakait. Tuma  
asamtai ayampratin tsawantai sha  
pénker ana nu túramniaiti.” <sup>13</sup>Tinia  
iniais áishmankan uwejé jakan  
tímiayi “Uwejém takuitia.” Tutai  
uwejé takuí chíkich uwejéjai métek  
pénker ajasmiai. <sup>14</sup>Nuna túramtai  
Pariséu shuarsha aa júinkiar Jesus  
itiurak máawaintiaji<sup>i</sup> tusar chichaman  
najatiarmiayi.

### **Isayas Jesusnan tímia nu uminkiamiayi**

<sup>15</sup>Jesus nin máatniun nekaama nuyá  
júinkiamiayi tura wéakuí untsurí shuar  
nemariarmiayi. Untsurí jániancha  
tsuámiai. <sup>16</sup>Tsuar “etserkairap” tinia  
akupiarmiayi. <sup>17</sup>Yaunchu Yúsnan  
etserin Isayas tímia nu uminkiaiti tusa  
túrunamiayi. Niisha juna áarmiayi:

<sup>18</sup>“Júiti Wi achikmaj nu. Niisha  
Wi tájana nuna umin asamtai  
ti aneakun Nijijai waraajai.  
Winia Wakantru kakarmarin

takamtsuk susattajai. Túramtai  
winia uwempratin chichamprun  
ashí Israercha nunkanmasha  
etserkattawai. <sup>19</sup>Jiakchattawai  
tura kakaram chichaschattawai.  
Winia anturtukarat tusa péprunam  
weak untsukchartatui. <sup>20</sup>Akupin  
ajatsuk shuar pintiu punua núnis  
pimpiru ainia nuna kúpitsuk  
yáintatui. Núnisan shuar ji yama  
ikiapámu áinis kakarmachu ainia  
nuna ikiajniatsuk ikiakártatui.  
Tura ashí nupetak ti pénker  
kakaram akupin ajastatui. <sup>21</sup>Tura  
Israer-shuarchasha Nin nekas  
enentáimtusartatui.”

### **Jesusan “iwianchi uuntri kakarmarijjai túrawai” tiarmiania nu**

(*Márkus 3.19-30; Rúkas  
11.14-23; 12.10*)

<sup>22</sup>Nuyá Jesusan shuar yajauch  
wakantrukun itiararmiayi. Nu shuar  
jii kusurusha chichachusha ámiayi.  
Tura Jesus tsuármatai paant íimsamiayi  
tura chichakmiayi. <sup>23</sup>Nuna wáinkiar  
shuar shiir enentáimprar tiarmiayi  
“¿Tawitia uchirí pampanku iniannamu  
uwemtkkiartin tátinia nuáshit?”

<sup>24</sup>Tura Pariséu shuarsha nuna an-  
tukar yajauch enentáimtuiniak tiarmi-  
ayi “Júka iwianchi kapitántrin Pirsepún  
umirniuiti. Tuma asa nuna kakarmarijjai  
yajauch wakanin jii akupeawai.”

<sup>25</sup>Jesus tu enentáimainian neka  
asa tímiayi “Nú nunkanmaya  
shuar nuamtak kajernaiyakuinkia  
nú nunka wari meserschattawak.  
Núnisan nuamtak shuar ní shuarjai  
mánainiakka amunaikchartatuak.  
<sup>26</sup>Núnisan iwianch nuamtak jii  
akupnainiakka máanaikiar wárik  
amuukashatuak. <sup>27</sup>Kame Wi Pirsepú  
iwianchi kakarmarijjai iwianchin  
jii akupeakuinkia atumí uchirísha  
¿yana kakarmarijjain jii akupeana?

Ni túramurijjaj átum awajirma nekamaratum. <sup>28</sup>Wi Yusa Wakaní kakarmarijjaj yajauch wakanin jiiiki akupea asamtai atumsha Yusa akupeamurí atumiin jeartamarmena nu nekaatniuitrume.”

<sup>29</sup>‘Iista. Shuar kakaram shuara kuítrín kasarkatin wakerakka emka kakarman jínkiá aya túran ni jeen wayá kasarkamniaiti. Wi iwianchin jíikmiajaj uunt iwianch nupetkamua nu nekaamniaiti.’

<sup>30</sup>‘Wijjaj tsanin pujatsna nuka winia nemasruiti. Núnisan Winia yáintsuna nu aya itirchat nájateawai.’

<sup>31</sup>‘Tuma asamtai tájarne, Ashí shuar tunáa túruinia nusha yajauch chichainia nusha tsankuratin awai. Antsu Yusa Wakanin yajauch chicharin ainia nuka tsankurashiniaiti. <sup>32</sup>Winiasha Aents Ajasuitjiana nuna yajauch chichartuinia nú shuarsha tsankuramniaiti. Tura Yusa Wakanin yajauch áujmatainia nuka penké tsankurachminiaiti. Ju nunkanmasha tura ukunmasha tsankurnarchattawai’ tímiayi.

### Ni nerejaj numi nekaamniaiti

(Rúkas 6.43-45)

<sup>33</sup>‘Yutai numi péñkeran nereawai. Tseas numisha yajauchin nereawai. Ni nerejaj numi nekaamniaiti. Núniskete atumjai. <sup>34</sup>Tseas wenunniutirmesha, ¿atumsha itirak imiá yajauchitirmesha péñker chichamsha chichastarum? Shuar ni enentáin enentáimna nuna chichaawiti. <sup>35</sup>Péñker shuar péñker enentáimiu asa shiir chichaawiti. Tura yajauch shuar yajauch enentáimiu asa yajauch chichaawiti. <sup>36</sup>Tura Wisha tájarne, nekapsatin tsawant jeamtai ashí enentáimtsuk chichakma nuna Yúsan paant ujakartatui. <sup>37</sup>Iis, ame chichammijjaj nekanattarme. Péñker chichakuitkiumka sumamashtatme. Tura péñker chichakchaitkiumka sumamattame.”

### Nu shuar yajauch ásar iniakmamun seawarmiania nu

(Márkus 8.12; Rúkas 11.29-32)

<sup>38</sup>Pariséu shuarsha Israer-shuara jintinniurísha Jesusan chicharuk “Uuntá, ame Yúsaiyitjai tusam nayaimpinmaya kakarmajaj iniakmamun túrata, iisha wáinkiatái” tiarmiayi.

<sup>39</sup>Tutai Jesus tímiayi “Shuar yajauch tura Yúsan enentáimtachu ásar nayaimpinmaya iniakmamun seainiawai. Tuma asamtai, áyatik yaunchu Junas túrunamu iniakmastiniaiti. <sup>40</sup>Junas menaintiu kashi menaintiu tsawantcha namaka ampujen enkemsamiayi. Núnisnak Wi, Aents Ajasu asan, menaintiu kashi menaintiu tsawantcha nunká jakan tepestatjai. <sup>41</sup>Junás Níniwi péprunmaya shuaran Yus-Chichaman etserkamtai nu shuar ni tunaarín enentáimtsusar ni enentáin yapajíawarmiayi. Tura jui yamá Junasa nankaamas etserin pujawai. Wiitjai nusha, tura anturkachuitrume. Tuma asamtai nekapsatin tsawant jeamtai Níniwinmaya shuar juyá shuaran súmamtikiawartatui.’

<sup>42</sup>‘Yaunchu nuwá yajaya shuaran úunt akupniuriyayi. Nu nuwá Sarumún ti neka asamtai nin anturkataj tusa tarimiayi. Tura jui yamá Sarumúnjaj nankaamas anturkamnia pujawai. Nusha Wiitjai. Tuma asamtai nekapsatin tsawant jeamtai nu nuwá juyá shuaran súmamtikiawartatui’ tímiayi.

### Yajauch wakan jiiiki akupkamuitiat wáketna nu

(Rúkas 11.24-26)

<sup>43</sup>‘Shuara enentáiyá yajauch wakan jíinkin yumi penké yútatsna nuí wéawai. Tura nuí péñker pujustinian wáinkia ach ataksha waketkitniun enentáimiu. <sup>44</sup>“Wi jíinkimij nuí waketkittijai” tawai. Tura waketki shuara enen-

táin péñker iwiamu tura ankantán wáiniak <sup>45</sup>ni ain siati (7) iwianchin ni-ijjai nankaamas yajauchin itia shuara enentáin enkemáwartatui. Túrunamtai nu shuar nuiki nuna nankaamas yajauch ajastatui. Núnisan juyá shuar túrunawartatui” tímiayi Jesus.

**Jesusa yachí, Jesusa nukurí**

*(Márkus 3.31-35; Rúkas 8.19-21)*

<sup>46</sup>Jesus nu shuarjai tuke chichaak pujai ni nukurísha ni yachísha tariarmiayi. Tura aa wajasar Nijjai chichastaj tiarmiayi. <sup>47</sup>Túramtai Jesusan ujar “Ame nukusha yatsumsha aa wajasar chichastaj turamainiawai” tiarmiayi.

<sup>48</sup>Chichaman ujakmia nuna Jesus tímiayi “¿Ya ainia winia nukursha winia yatsursha?” <sup>49</sup>Nuyá ni unuiniamurín iniakmas tímiayi “Jú ániawai winia nukur tura winia yatsursha. <sup>50</sup>Ashí shuar winia Apar nayaimpiniam pujana nu wakera-mun umiiniana nu winia yatsur winia umar winia nukur ániawai” tímiayi.

**Untsurí métek-taku chichamjai  
Jesus unuiniamiania nu**

**(1) Atsaamin atsaampramiayi**

*(Márkus 4.1-9; Rúkas 8.4-8)*

**13** Nu tsawantai Jesus ni jeeya jíinkin antumianka kánmatkarín pujusmiayi. <sup>2</sup>Tura ti untsurí shuar káunkarmatai kanunam enkemar nu pujusmiayi. Shuarsha antumianka kánmatkarín pujusarmiayi. <sup>3</sup>Túrunawarmatai untsurí métek-taku chichamjai unuiniamiayi. “Atsaamin atsaamprataj tusa jíinkimiai, tímiayi. <sup>4</sup>Atsaamki wesa arakrí jintia písunmasha iniaarmai. Tura chiniki tariar yuawarmai. <sup>5</sup>Chikichcha kaya írunmanum iniaarmai. Nunka ishichik asamtai wárik tsapainiarmai. <sup>6</sup>Tura nantu etsanramtai péñker kankáprúrcharu asa sukuam káararmai.

<sup>7</sup>Chikichcha janí nupanam iniaarmai. Tura janí wárik tsakar nupetak ajakramai. <sup>8</sup>Chikichcha péñker nunkanam iniaarmai. Nusha péñker nerekar chikich siansha (100) nerekarmai. Tura chikichcha sesenta (60) nerekarmai. Tura chikichcha trainta (30) nerekarmai. <sup>9</sup>Kuishim ákuiníka antuktaram” tímiayi.

**“¿Urukamtai aya métek-taku  
chichamjai jintiam?”  
aniasarmiania nu**

*(Márkus 4.10-12; Rúkas 8.9-10)*

<sup>10</sup>Nuyá ni unuiniamurín Jesusan taruntar aniiniak “¿Urukamtai aya métek-taku chichamjai jú shuar unuiniam?” tiarmiayi.

<sup>11</sup>Tutai Jesus tímiayi “Urukuk jú nunkanam Yus akupin ati, nuka yaunchu nekanachmiayi. Tura yamaikia Yus ashí nuna atumin paant iniakturmawai. Antsu chikich nuna nekaachmin ániawai. <sup>12</sup>Kame núkap takakna nu shuar nú nukap patatnaktatui tura ti nukap takustatui. Antsu ishichik takakna nuka ishichik takakuk juruktinaiiti. Núnisan Yusna ti nekarum nú nukapka yúpichuch nekaattarme. Tura ishichik nékarum wárik kajinmatkittarme. <sup>13</sup>Tuma asamtai aya métek-taku chichamjai unuiniajai. Nú shuarka íniayatan wáiniániatsui. Ántuiniayatan ántachua núnis nékainiatsui. Túmainiak Winia nekarainiatsui. <sup>14</sup>Nujai yaunchu Yúsnan etserin Isayas timia nu uminkiaiti. Júná tímiayi:

“Ti ántayatrum anturkashtatrome. Wáiniatrumsha nekaashtatrome. <sup>15</sup>Jú shuara enentái kátsuram ásar péñkera nuna nakitiainiawai. Nu asamtai péñker ántuiniatsui, jíisha pusá áinis ániawai. Túrachkunka paant nekaawarainti, tura nekas antukarainti, tura enentáijjai

enentáimias Winia tsuarat tusa tarutiarainti.”

<sup>16</sup>Tura átumka paant wainkia asarum péñker anta asarum shíiraitrume.

<sup>17</sup>Nekasan tájarme, untsurí Yúsnan etserniusha tura péñker shuarsha átum yamáí wáintrum nuna wáinkiatniun wakeruiniyatan wáinkiacharmiayi. Tura átum yamáí ántarme nuna antuktinian wakeruiniyatan antukcharmiayi’ tímiayi.

### Jesus atsaampramu chichaman paant jintintiamiania nu

(*Márkus 4.13-20; Rúkas 8.11-15*)

<sup>18</sup>‘Ayu, antuktarum. Atsaampramu chichaman paant jintintiatjarme. <sup>19</sup>Árak jintia písunam iniaararma nuka shuar Yus-Chichaman ántayatan ni enentáin ikiuiniatsna núiti. Tura íwianch nu Yus-Chicham ni enentáin atsaampramu áinis antukman kajinmatkiawai. <sup>20</sup>Árak kaya írunmanum iniaararma nuka shuar Yus-Chichaman antuk waras umirainia núiti. <sup>21</sup>Tura núkap kan̄kaprurcharu ásar katsuiniatsui. Antsu itiurchatan íñkiuiniak tura Yus-Chichaman wakeruinia ásarmatai chíkich yajauch áujmatam wárik iniaisar ikiuiniawai. <sup>22</sup>Árak jan̄kí nupanam iniaararma nuka shuar Yus-Chichaman antuk emka umirniua núiti. Tura ju nun̄kanam írunna nuna tuke páchiniak ni kuítr̄ncha ti enentáimtuinia ásarmatai ashí Yus-Chichaman enentáimtamun núpeteawai. Tuma asamtai nu áentsnum Yus-Chicham atsaampramu nereatsui. Yus-Chicham ni enentáin takasma atsawai. <sup>23</sup>Tura árak péñker nun̄kanam iniaararma nuka shuar Yus-Chichaman antuk péñker umirainia núiti. Tura péñker nerenawai. Chíkich sian̄ (100) nerekarma núnis chikichcha sesenta (60) nerekarma núnis chikichcha trainta (30) nerekarma núnis áiniawai” tímiayi Jesus.

### (2) Yajauch nupa trikiunam atsaamkama

<sup>24</sup>Jesus ataksha ju métek-taku chichaman áujmatsamiayi. “Shuar Yus akupeamunam pachiinkiertin júnisaiti. Shuar péñker arakan, tríkiun ni nun̄ken araamai. <sup>25</sup>Tura ashí kanararmatai nemasr̄i kashi taa trikiu arakmanum yajauch nupan̄ aratak ikiukmiai. <sup>26</sup>Trikiu tsapakar nereakui nuyá yajauch nupasha nusháa nereku asa ti paant ajasmai. <sup>27</sup>Nuna ísar takainia nu ni úntr̄in werí tiarmai “Uunta, ¿péñker arak araachmakam. Itiura jusha yajauch nupasha tsapakuit?”

<sup>28</sup>‘Tutai nérentin timiai “Winia nemasur arakuiti.”

‘Takui ni takarniur̄i tiarmai “¿Yajauch nupan̄ uwerat tusam wakeramek?”

<sup>29</sup>‘Tutai timiai “Atsá, uwerairap. Yajauch nupa uweaj tukamarum trikiu uweniirum. <sup>30</sup>Iniaisatarum. Antsu métek tsakakti. Júuktin tsawant jeamtai winia takartinian emka yajauch nupan̄ uwer irumar jinkiawarat tusan akupkartatjai. Tura áesawartatui. Tura trikiu neren̄ júukar péñker ikiusarat tusan akupkartatjai” timiai” tímiayi Jesus.

### (3) Mustasa jin̄kiái

(*Márkus 4.30-32; Rúkas 13.18-19*)

<sup>31</sup>Jesus ataksha métek-taku chichaman áujmatsamiayi. “Shuar Yus akupeamunam pachiinkiertin mustasa jin̄kiaya áintsan̄kete. Shuar péñker nun̄ken araamai. <sup>32</sup>Mustasa jin̄kiáikia imiá uchichiitiat tsapái tsakaakka ashí numichij̄iái nan̄kaamas uunt ajawai. Ti uunt asamtai chin̄ki ni kanawen pasun̄mainiawai” tímiayi Jesus.



**(4) Karin enketatin***(Rúkas 13.20-21)*

<sup>33</sup>Núnisan chíkich métek-taku chichaman áujmatsamiayi. “Shuar Yus akupeamunam pachiinkiatin karinia áintsankete. Nuwa nijiamchiniam karinia enkea mashi páchimiawai. Tura nu mash karimtiawai” tímiayi.

**Jesus aya métek-taku chichamjain jintintiamiania nu***(Márkus 4.33-34)*

<sup>34-35</sup>Ashí nuna Jesus métek-taku chichamjai áujmatsamiayi. Yaunchu Yúsnan etserin timia nu uminkiat tusa túramiayi. Etserin juna áarmiayi:

“Métek-taku chichamjai áujmattiatjai. Yámankamtaiknumiá nékashtain etserkattajai” tu áarmiayi.

Nu asamtai aya métek-taku chichamjain áujmatmiayi Jesus.

**Jesus yajauch nupa trikiunam atsamkamun paant awajsamiania nu**

<sup>36</sup>Nuyá shuaran ikiukin Jesus jeá támiayi. Túramtai ni unuiniamurí tariar “Yajauch nupa áujmatmena nu paant awajzata” tiarmiayi.

<sup>37</sup>Tutai Jesus tímiayi “Wi Aents Ajasuitjai. Wi péñker arakan atsaamkaitjai. <sup>38</sup>Ashí nunka aja áintsaiti. Péñker jinkiái Yus-shuaran Yus akupea nuna nakumeawai. Yajauch nupa iwianchna ainia nuna nakumeawai. <sup>39</sup>Tura íwianch ii nemasri asa yajauch nupan arakuiti. Tura nunka amúamunam Yusa suntarí arakan júuktinia áintsan shuaran yaruaktatui. <sup>40</sup>Yajauch nupa irur jinium áesatniua áanis nunka amúamunam túrunattawai. <sup>41-42</sup>Nuí Wi Aents Ajasu asan winia suntarun akupkattajai. Tura ashí tunaan túruinia nunasha tura chikichan tunaanum útsuinia nunasha mash irurar jinium apeawartatui. Nuísha ti

úutin ti wáitsatniusha átatui. <sup>43</sup>Antsu péñker túruinia nuka ti shiir wincha ajasar ni Aparí akupeana nuí etsa núnis tsáapnin ajasartatui. Wats, kuishim átsuk. Antukta.’

**(5) Kuit wáinkiamu**

<sup>44</sup>“Shuar Yus akupeamunam pachiinkiatin kuit nunká uukma áintsankete. Shuar nu kuítian wáiniak nuín ataksha uukmai. Tura ti waras waketki nu kuit niiniu atí tusa ashí ni takakman suruk nu nunkan sumakmai.’

**(6) Kaya shiirmach ti kuitia nu**

<sup>45</sup>“Shuar Yus akupeamunam pachiinkiatin júnisaiti. Shuar kayachin ti shírman eak wekaana áintsankete. <sup>46</sup>Tura kayan ashí nankaamas kuit jeean wáiniak waketki ashí takakna nuna suruk nu kayan niiniu atí tusa súmawai.’

**(7) Neka**

<sup>47</sup>“Shuar Yus akupeamunam pachiinkiatin júnisaiti. Shuar nekajai namakan achía áintsankete. Nekan nayaantsanam ajuntak niisháa namakaim achíawai. <sup>48</sup>Tura nekanam nemarmatai kukar jiiki, nuí péñker namaknasha chaninnium chumpiniawai. Tura yajauch namaknaka ajapenawai. <sup>49</sup>Núnisan átatui nunka amúamunam. Yusa suntarí taar Yus-shuaran tura íwianch shuaran akantrattawai. <sup>50</sup>Tura íwianch shuarnaka uunt jinium apeattawai. Nuísha ti úutin ti wáitsatin átatui.” Nuna ashí ni unuiniamuríjjai áujmatsamiayi Jesus.

**Yamáí nekaamujáisha tura yaunchu nekaamujáisha Yus-shuaran yáintiniaiti**

<sup>51</sup>Jesus nuna tinia amuk “¿Jú mash antukurmek?’ tímiayi.

Tutai ni unuiniamuri “Ee, Uunta, ashí antukji” tiarmiayi.

<sup>52</sup> Tuiniakui Jesus tímiayi “Shuar ashí Yúsnan péñker unuimiaruka aents kuítriniua áintsankete. Ni ikiutairiya yamarmancha yaunchu sumakmancha jusamniaiti. Núnisan nu shuar yamáí nékamujajsha tura yaunchu nékamujajsha Yus-shuaran yáintiniati.”

### Jesus Nasarénum waketkimiania nu

(*Márkus 6.1-6; Rúkas 4.16-30*)

<sup>53</sup> Jesus nu métek-taku chichaman áujmatas amuk nuyá wémiayi. <sup>54</sup> Tura ni péprurín Nasarénum jeá Israer-shuar iruntainiam wayá unuiniamiayi. Tura nuyá shuar antukar tí enentaimprarmiyayi. Tura “¿Jusha tui imiá unuimiaruit, tiarmiayi. Itiurak aents tujintiamun túramniait? <sup>55</sup> Juka karpintíru uchirinchkait. Nukurísha Marichukait. Tura ni yachísha Jakupu, Jusé, Semun, Jútas áiniatsuk. <sup>56</sup> Tura ni umaísha iijjái írutra pujuiniatsuk. ¿Nuikia itiura mash neka?” tiarmiayi. <sup>57</sup> Túrawar Jesusan itiurchat enentáimturarmiayi.

Túramtai Jesus chicharuk “Yúsnan etserniun ashí shuar péñker anturainiawai, antsu aya nuna nunkeyanaka ni shuarínkia nin anturainiatsui” tímiayi. <sup>58</sup> Tura nú shuar Jesusan enentáimtuiniachu asamtai aentsti tujintiamun aya ishichik túramiyayi.

### Imiakratin Juan jakamu

(*Márkus 6.14-29; Rúkas 9.7-9*)

**14** Kariréa nunkanam Erutis akupniuyayi. Tura Jesus túramuncha antukmiayi. <sup>2</sup> Tura ni írutramurín tímiayi “Nuka imiakratin Juan jakamunmayá nantaki túrawai auka. Tuma asa aents tujintiamun túrawai” tímiayi. Kame Erutis Juan kan maa asa tímiayi.

<sup>3-4</sup> Akupin Erutis ni yachí Jiripi nuwen Jirutíasan akintrukmatai Juan Erutisan “Ame yatsumi nuwé akintrukchat-

niutme” tímiayi. Tutai Erutis Juan kan achik jirujai jinikiá sepunam enkeatarum tusa akupkamiayi. <sup>5</sup> Niisha Juan kan máataj tukamá aentsun ashamiarmiayi. Ashí aents “Juan Yúsnan etserniuiti” enentáimtuiniakui ashamiayi. <sup>6</sup> Tura akupin Erutis akiiniamu tsawantri jeamtai nú námpertin Jirutíasan nawantri ashí ipiaamu pujuiniamunam jantsemamiayi. Túramtai Erutis shiir enentáimtak <sup>7</sup> “Ame ashí wakeram nu seattia, tímiayi. Nekasan amastatjai, Yussha iirui” tímiayi.

<sup>8</sup> Tutai nu nuwach emka ni nukuri akatramu asa Erutisan chicharuk “Imiakratin Juan ka muuké tsupikiam amamkunam enkeram surústá” tímiayi.

<sup>9</sup> Tutai Erutis wake mesekmiayi. Túrasha “nekas Yus iirui” tiniu asa tura ni amikrísha antukaru asamtai umikmiayi. <sup>10</sup> Ni suntarín sepunmayan Juan ka muuken tsupik itiarti tusa akupkamiayi. <sup>11</sup> Tura amamkunam itiar nuwachin súsarmiayi. Tura niisha ni nukurí susamiayi.

<sup>12</sup> Nuyá Juan ka írutramuri tariar ayashí jukiar iwiarsarmiayi. Túrawar Jesusan ujauwearmiayi.

### Jesus senku mir (5000) áishman kan ayuramiania nu

(*Márkus 6.30-44; Rúkas 9.10-17; Juan 6.1-14*)

<sup>13</sup> Jesus nuna antuk Niniki ni unuiniamurijjain kanunam enkemar arant aents atsamunam wémiayi. Túrasha nuna aents nekaawar kukarak weriarmiayi Jesusan. <sup>14</sup> Kanunmayá jíiniyaj tukamá untsurí áentsun wáinkiamiayi. Tura wáiniak waitnentrarmiayi. Tura jáiniancha tsuáramiayi. <sup>15</sup> Kíakui ni unuiniamuri Nin tariar tiarmiayi “Kíawai, Uunta. Tura shuar tíjiych pujaaka at-sawai. Ju aents akupkarta. Péprunam wear sumak yuuwearti” tiarmiayi.

<sup>16</sup>Tutai Jesus tímiayi “¿Urukamtaik wearat? Antsu atumek ayuratarum.”

<sup>17</sup>Tutai tiarmiayi “Íikia takaktsuji. Aya senku (5) tantachik jimíarchik namakchijiain takakji.”

<sup>18</sup>Tuñiakui Jesus “Wats, nu itiertiaturum” tímiayi. <sup>19</sup>Tinia aents chírichriniam pujusarti tusa akupkamiayi. Nuyá senku (5) tantancha jímiar namaknasha achik nayaimpiniam fímias Yúsan yumínsamiayi. Tura puur ni unuiniaturum aents ayuratarum tusa súsarmiayi. <sup>20</sup>Ashí yurumáwar jémarmiayi. Tura nuyasha puunaruka tuse (12) chan̄kin tíarmiayi. <sup>21</sup>Nui yurumáwarmia nusha nuwasha uchisha nekapmatsuk senku mir (5000) aya áishman̄ áirmiayi.

### Jesus entsá pátatek wekasamiania nu

(Márkus 6.45-52; Juan̄ 6.16-21)

<sup>22</sup>Nuyá Jesus ni unuiniaturum kanunam enkemprarum amain émaa ajatarum tusa akupkarmiayi. Niisha áentsun akupkarmiayi. <sup>23</sup>Akupkarsha naint waka Yúsan áujumiayi. Káshisha nuí Nin̄ki tuke pujumiayi. <sup>24</sup>Tura antumian̄ tí wan̄karam asamtai kanu ajapén ajasmatai nase tukumma entsa tamparukmiayi. <sup>25</sup>Tsawaana aī nīi tuke wenai Jesus entsá pátatek wekas pujuiniaturum jeamiayi. <sup>26</sup>Tura ni unuiniaturum entsá pátatek wekaan wáinkiar ti sapijmiakarmiayi. Tura ashamainiak “wakanchashit” tiarmiayi.

<sup>27</sup>Tuñiakui Jesus tiarmiayi “Kakaram ajastarum. Wiitjai. Ashamprukairap.”

<sup>28</sup>Takui Pítiur chicharuk tímiayi “Uunta, Ámetkumka nuí wekasa jeatin unturkata.”

<sup>29</sup>Takui Jesus tímiayi “Wats, winitía.”

Tutai Pítiur kanunmaya akaikin Jesus wajana nuí jeataj tusa entsá pátatek wekasamiayi. <sup>30</sup>Tura ti nasen násentun nekáa ashamkamiayi. Ashama asa entsá

wayamiayi. Tura “Uuntá, achirkata” tu untsummiayi.

<sup>31</sup>Nu chichamtaik Jesus uwejnun achik júak “Maa, Yus imiá ishichik enentáimtuscheme” tímiayi. <sup>32</sup>Tura kanunam enkemáwarmatai nashesha menkakamiayi.

<sup>33</sup>Túramtai kanunam enkemarmia nusha Jesusan tikishmatar chicharuk “Nekas ame Yusa Uchir̄nme” tiarmiayi.

### Jesus Jinisarítiumiá shuaran tsuármiania nu

(Márkus 6.53-56)

<sup>34</sup>Tura amain̄ kat̄inkiar Jinisarít nun̄kanam jearmiayi. <sup>35</sup>Tura nuyá aents Jesusan nekaawar nu nun̄kanam ashí ujanairarmiayi. Túrawar jaancha ni pujamunam ititariarmiayi. <sup>36</sup>Ni pushir̄nkisha antīntai tusar seawarmiayi.

### Shuáran yajauch awajeana nuna Jesus jintintiamiania nu

(Márkus 7.1-23)

**15** Nuyá Jerusarén péprunmaya Paríséusha yaunchu akupkamu jintinniur̄isha Jesusan tariar aniasarmiayi <sup>2</sup>“¿Urukamtaí ame unuiniaturum ii uuntri yaunchu jintintrarmia nuna uminiatsu? Iis, ikijmiatskesha yurumáiniawai” tiarmiayi.

<sup>3</sup>Tuñiakui Jesus aniasarmiayi “¿Urukamtaí atumsha Yus akupkamu umirtsuk aya aents akupkamu umiirum?

<sup>4</sup>Iis, Yus tíchamkia:

“Ame apa, nukusha shiir enentáimtus-tarum.” Tura “Shuarsha ni apar̄ncha nukur̄ncha katsekka nu shuar jakati” tíchamkia.

<sup>5-6</sup>Antsu átumka tárume “Shuar ashí niiniu írúnna nuna mash “Yúsnaiti” takui nuikia nujai ni apar̄ncha nukur̄ncha yáin̄chamniaiti, tárume. Nin yáin̄tinian nakitiak ayatik “Ashí winia áini-

ana nu Yusna asamtai yáinçhamni-aitjame” títiniaiti” tárume. Núnisrum tákuram Yus akupkamu iniaisarum aya aents akupkamu umiirume, tímiayi. <sup>7</sup>Antra chichamtiniaitrum. Yúsnan etserin Isayas yaunchu nekas atumin áar-tampramiayi juna:

<sup>8</sup>“Ju aents ni wenejají shiir awajtuini-awai, tura ni enentáí jeachat pujuiniawai. <sup>9</sup>Tura tukeneasañ shiir awajtuiniawai. Aents chichamen jintintiainiayat “Yusa chichamente” tuiniawai.” Tu áarmiayi” tímiayi Jesus.

<sup>10</sup>Tinia shuaran untuk tiarmiayi “Ju antukrum péñker nekaatarum. <sup>11</sup>Aents yúana nuka shuáran yajauch awajsash-tatui. Antsu wenunmaya jiniia nuka shuáran yajauch awajeawai” tímiayi.

<sup>12</sup>Nuyá ni unuiniamurí Jesusan tariar “Maa, Pariséu ame chichammin antukar ti itiurchat enentáimprarai” tiarmiayi.

<sup>13-14</sup>Tuúniakui Jesus tímiayi “Íkiuk-tiarum. Kusuru áintsan áiniawai. Tura kusuruncha jintintiainiawai. Mai kusuru ásar mai wáanam akaiki iniaawartatui. Wats, ajanam nupá áintsan ainiawai. Tura ashí winia Apar nayaimpiniam pujana nu araachmaka takamtsuk uwé ajapamu átatui” tímiayi Jesus.

<sup>15</sup>Takui Pítur Jesusan tímiayi “Nu métek-taku chicham paant awajsata.”

<sup>16</sup>Tutai Jesus tímiayi “¿Atumsha nekaachurmek. <sup>17</sup>Enentáim-prachurmek? Ashí wenunam wayaana

nu wakenam wéatsuk. Tura nuyá iniañkastiniaiti. <sup>18</sup>Antsu wenunmaya jiniia nu enentáinmaya jiniu asa áentsun yajauch awajeawai. <sup>19</sup>Enentáinmaya ashí yajauch enentáimsatin jíiniainiawai. Mankartuatniusha, chikicha nuwé kasamkatniusha, tsanirmatniusha, kasamkatniusha, wáitruatniusha, yajauch áujmatsatniusha <sup>20</sup>ashí nu áiniawai nekaska shuáran yajauch

awajeana nu. Tura ikijmiatsuk yurumátniuka shuáran ni enentáin yajauch awajeatsui” tímiayi.

### **Nuwa Israer-shuarcha Jesusan enentáimtusmiania nu**

(Márkus 7.24-30)

<sup>21</sup>Jesus nuyá jiinki Tiru péprunmasha Sitiun péprunmasha wémiayi. <sup>22</sup>Tura nu nunkanmaya nuwa Jesusan tarí tími-ayi “Uunta, uunt akupin Tawit ame weatrum asamtai winia waitnentrurta. Nawantur yajauch wakantruku asa ti wáitrutawai” tímiayi.

<sup>23</sup>Tura Jesus áikchamiayi. Tura ni unuiniamurí tariar “Awemata, tiarmiayi. Tuke untsumki apapétmaji” tiarmiayi.

<sup>24</sup>Nuyá Jesus tímiayi “Aya Israer-shuarnum menkkakaru áinia nuna eaktinian Yus akuptukuiti.”

<sup>25</sup>Túrasha nuwa tikishmatar tímiayi “Uunta, waitnentrurta.”

<sup>26</sup>Tutai Jesus tímiayi “¿Uchí apatkurí jurukir yawá susamniakait?” tímiayi.

<sup>27</sup>Tutai nuwa tímiayi “Nekas, Uunta, tame. Tura yawasha ni aentsrí yurumainiakui nunká iniaarun yuúniatsuk.”

<sup>28</sup>Takui Jesus tímiayi “Maku, nekas Winia enentáimtursaitme. Ame wakeram núnisan atí” tímiayi. Tura nu chichamaik ni nawantrí péñker ajasmiai.

### **Jesus untsurí jáinian tsuararmiania nu**

<sup>29</sup>Jesus nuyá jiinki Kariréa antumianka káanmatkarin wakatkimiayi. Tura naint waka nuí pujusmiayi. <sup>30</sup>Nuú untsurí aents Nin tariar shutuapnasha kusuruncha chichachuncha tsupirkamuncha chíkich jáiniancha itiararmiayi. Túrawar nawenam aeprusarmiayi. Túram tsuararmiayi. <sup>31</sup>Nuna íisar chichachusha chichainiakui, tsupirkamusha péñker ajainiakui,

shutuapsha péñker wekainiakui, kususurusha wáinmainiakui, ti shiir enentáimprarmiyai. Yus ni áentsrín Israeran yáinmatai shiir yumínsarmiyai.

**Jesus kuaru mir (4000)  
áishmañkan ayuramiania nu**

*(Márkus 8.1-10)*

<sup>32</sup>Nuyá Jesus ni unuiniamurín untsukar tiarmiyai “Ju aentsun waitnentainiajai. Warí, menaintiu tsawant Wijíai yurumtsuk yujainiatsuk. Ayurtsuk ni jéen akupkachminiaitjai. Jintiá pimpiki wáitsartatui.”

<sup>33</sup>Ni unuiniamurí tiarmiyai “Túrasha, Uunta, ¿shuar atsaasha tuyan yurumak imiá sumaktají ju aents ayurawartincha?”

<sup>34</sup>Jesus aniasarmiyai “¿Urutma tanta takakrum?”

Tutai niisha “Siati (7) tanta nuyá ishichik namak takakji” tiarmiyai.

<sup>35</sup>Nuyá aents nunká pujusarti tusa akupkamiyai. <sup>36</sup>Tura siati tantan achik namaknasha achik nuyá Yúsan yumínsamiyai. Tura puur aents ayuratarum tusa ni unuiniamurín susamiyai. <sup>37</sup>Ashí yurumáwar jémararmiyai. Tura puunaru siati chañkin tiármiyai. <sup>38</sup>Tura nuí yurumáwaruka nuwasha uchisha nekapmatsuk aya áishmañkak kuaru mir (4000) ármiyai. <sup>39</sup>Nuyá Jesus áentsun akupak kanunam enkemar Maktara nunkanam wémiyai.

**Pariséusha Satuséusha iniakmamurín  
Jesusan seawarmiania nu**

*(Márkus 8.11-13; Rúkas 12.54-56)*

**16** Pariséusha tura Satuséusha Jesusan nekapsatai tusar tariarmiyai. Túrawar “Ame Yúsajyáitkiumka kakarmarmijíai nayaimpinnmayá iniakmasta, iisha wáinkiatái,” tiarmiyai.

<sup>2</sup>Tutai Jesus tímiyai “Átumka “Kapaaku péetar kintiamkui kashin esatrurtatui” tñiuitrume. <sup>3</sup>Túrasha “Te ajas kapaaku péetar tsawaakui yumi yajauch átatui” tñiuitrume. Tura nekasaiti. Maa, átumka nayaim ísrum ju nunkanam túrunattana nu nékarme. Antsu Yus yamáí jú nunkanam tura nuka nékatsrume. Antraitrume. <sup>4</sup>Aents yajauch ásar tura Yusan enentáimtachu ásar kakarmajai iniakmamun wakeruiniawai. Túrasha áyatik Junas túrunamia nuke iniakmastiniaiti” tímiyai. Tinia ik-  
i-uak wémiyai.

**Pariséusha Satuséusha  
jintintiaiania nu aneartiniaiti**

*(Márkus 8.14-21)*

<sup>5</sup>Tura entsá amaini katiñkiar ni unuiniamurí tantan júkitniun kajinmatkiarmiyai. <sup>6</sup>Nuyá Jesus tímiyai “Wáinkiatarum, Pariséusha Satuséusha wakaprutai takakainia nújaisha aneartarum.”

<sup>7</sup>Tutai ni unuiniamurí tiarmiyai “Ii tanta itiachakrin tátsuk.”

<sup>8</sup>Jesus nuna antuk tímiyai “¿Urukantai tanta itiachji tunaiyarum. Yusa kakarmari kajinmatkintrumek.

<sup>9</sup>Senku tantajai túramiaj nu kajinmatkintrumek. Senku mir (5000) áishmañkan ayurantai untsurí chañkin tiármia nu enentáimtsurmek. <sup>10</sup>Tura siati tantajai kuaru mir (4000) áishmañkan ayurantai nuna ishichik chañkin tiármia nu kajinmatkintrumek.

<sup>11</sup>Itiurak imiá nékatsrum? Wi Pariséu wakaprutairisha Satuséu wakaprutairisha aneartarum tákun penké tantan tátsujai” tímiyai. <sup>12</sup>Nuna Jesus takui ni unuiniamurísha nekaawarmiyai. Penké tantaa wakaprutairín tíchamiyai antsu Pariséusha Satuséusha unuiniatirín tímiyai.

**Pítiur Jesusan Yus anaikiamun  
paant ujakmiania nu**

*(Márkus 8.27-30; Rúkas 9.18-21)*

<sup>13</sup>Tura Sesaria-jiripiumam jeawar Jesus ni unuiniamurin aniasarmiayi “Aents Ajasuitjiana juna ¿yaiti turutainiawa Winia?”

<sup>14</sup>Niisha ayak tiarmiayi “Chíkich, imiakratin Juánkaiti turamainiawai. Chíkichka, Eríasaiti turamainiawai. Chikichcha Jeremíasaiti, chikichcha chíkich aents Yúsnan etserniuiti turamainiawai” tiarmiayi.

<sup>15</sup>Tutai nincha aniiniak “¿Atumsha yaiti túrutrum?” tímiayi.

<sup>16</sup>Semun Pítrusha “Ámetme Kristu, Yus Anaikiamu. Nekas iwiaaku Yusa Uchirinme” tímiayi.

<sup>17</sup>Tutai Jesus tímiayi “Shiiraitme Junasa uchirí Semunka. Núnaka aents ujatmakchaiti antsu winia Apar nayaimpiniam pujana nu ujatmakmatai nekaam tame. <sup>18</sup>Tura Wisha tájame, ame Pítruitme, kayach tútaim. Nu kayanam jea jeamtinia áintsan Yus-shuaran ekenin tsakatmartatjai. Túramtai jákatniusha tura Yusa nemasrisha nu jeamman pukukchattawai. <sup>19</sup>Yus akupeamu yawincha amastatjai. Ju nunkanam jinjatniusha atfatniusha amasmaiti. Tuma asamtai ame ju nunkanam suritiam nu nayaimpinmasha suritniaktatui. Tura ju nunkanam tsankateam nu nayaimpinmasha tsankatnaktatui” tímiayi. <sup>20</sup>Nuna tinia Jesus ni unuiniamurin Krístituitaj nu etserkairap tinia akupkarmiayi.

**Jesus Nin máatniun  
etsertumakmiania nu**

*(Márkus 8.37-9.1; Rúkas 9.22-27)*

<sup>21</sup>Nuyá Jesus juna unuiniatan nankammiayi. “Wi Jerusarennum wé-tiniatjai. Nuí Israer-shuara úuntrisha,

Israer-patri úuntrisha, Israer-shuara jintinniurisha ti wáitkiarsartatui. Nuyá mantuawartatui túrasha menaintiú tsawantai nantaktiatjai.”

<sup>22</sup>Takuí Pítiur arantach jukí chicharuk tímiayi “Uunta, nuka penké áchatniuiti. Áminkia túrutmacharminiaiti.”

<sup>23</sup>Jesus ayanmatar Pítrun tímiayi “Werumta, Satanása. Yajauch awajtame. Ámeka Yus wakeramu enentáimtsume. Antsu jú nunkanam enentáimainia áinis enentáimme.”

<sup>24</sup>Nuyá Jesus ashí ni unuiniamurin tímiayi “Shuar Winia nemartustaj tusa wakerakka ni wakeramurin iniais ni krusi yanaki Winia nemartusti. <sup>25</sup>Shuar áyatik penker pujustaj tákunka nu shuar uwemtsuk jakattawai. Antsu jákatniuitkuisha penker pujustinian enentáimtsuna nú shuar nekas iwiaakman wainkiattawai. <sup>26</sup>Wats, shuar ashí jú nunkanam írúnna nuna sumakka tura nujai ni wakaní emeseak ¿itiurak penker pujustin? Shuara wakaní emesramu ¿ashí jú nunkanam írúnna nujai iwiamniakait? <sup>27</sup>Wi Aents Ajasu asan, winia Aparu kakarmarijiaí tura ni suntarijiaí tana ashí shuaran ni takasmajai métek akiktatjai. <sup>28</sup>Paant tájarme, shuar juí wajainia ju játsuk Wi akupin ajasmatai wáitkiartatui” tímiayi.

**Jesus nushá iira ajasmiania nu**

*(Márkus 9.2-13; Rúkas 9.28-36)*

**17** Nuyá sais (6) tsawant nankaamasar Pítruncha, Jakupuncha, tura ni yachi Juannasha níniak júkiar Jesus náinnium yakí wakamiayi. <sup>2</sup>Nuí Jesus nusháa iira ajattsarmiayi. Ni yapisha etsaya áinis wincha ajasmiai. Ni pushirisha ti puju jiiitsumir ajasmiai. <sup>3</sup>Nuísha Muisaisnasha Eríasnasha Jesusjai chichainian wáinkiararmiayi. <sup>4</sup>Nuyá Pítiur Jesusan tímiayi “Uunta, ti

shiir pujaji jui. Wakerakminkia menaint áakmaktai, Áminiu chikichik tura chikich Muisaisnasha, tura chikichcha Eríasna.”<sup>5</sup> Tura Pítiur tu auju wajái yurañkim ti puju amuamiayi. Tura nu yurañminmaya chichaman antukarmiayi. “Juka winia aneamu Uchiruiti, tímiayi. Nin ti shiir enentáimtajai. Nii péñker anturkatarum” tímiayi. Tu chichasmiayi Yus.<sup>6</sup> Nuna ni unuiniamurí antukar ti ashamkar pákea ajakiarmiayi.<sup>7</sup> Túrunawarmatai Jesus táriar antiñ “Ashamkairap, nantaktiarum” tiarmiayi.<sup>8</sup> Tura pañkainiar íimiaj tukamá aya Jesusan wáinkiararmiayi.

<sup>9</sup>Nuyá náinniumiá akainiak Jesus tiarmiayi “Átum ísurmena nu penké etserkairap. Wi Aents Ajasu asan jakamunmaya nantaatsain etserkairap’ tímiayi.

<sup>10</sup>Nuyá ni unuiniamurí Jesusan aniiniak “¿Urukamtai in jintintramin “Kristu táatsain Erías emka tátiniaiti” tuinia?” tiarmiayi.

<sup>11</sup>Tuñiakui Jesus áikmiayi “Nekas Erías tátiniaiti. Tura nii mash iwiaratawai.<sup>12</sup> Kame nekas Erías táwiti tura nin nekaacharmai. Antsu aents wakeriarmia nuna túrawar yajauch awajsarmiayi. Núnisañ Winiasha, Aents Ajasu ain, wáitkiarsartatui.”<sup>13</sup> Nuna takui ni unuiniamurí imiakratin Juáñkan áujmatui, tu enentáimprarmiayi.

### **Jesus iwianchin jiki akupkiania nu**

(Márkus 9.14-29; Rúkas 9.37-43)

<sup>14</sup>Ataksha aents matsatmanum jeawarmatai shuar Jesusan tarí tikishmatramiayi.<sup>15</sup> Tura tímiayi “Uuntá, winia uchir waitnentrutata. Wainchi tukum ti wáitniuiti. Jiniumsha patamniuiti. Entsasha iniainaiti.<sup>16</sup> Ame unuiniamurmincha itiarjiai túrasha tujinkiarai.”

<sup>17</sup>Takui Jesus ashí tímiayi “Maa, Yus penké enentáimtichuitrume. Imiá úmichuitrume. ¿Wi atumin katsuntu ajatniukaitjarum? Wats, uchi itiaritjarum’ tímiayi.<sup>18</sup> Itiarim Jesus yajauch wakanin jiki akupkamiayi uchi ayashíniá. Túramtai nu chichamaik péñker ajasmiayi.

<sup>19</sup>Nuyá urum ni unuiniamurí Jesusjai niki pujusar áujmatainiak “¿Urukamtai yajauch wakan jiktin iikia tujinkiamaj?” tiarmiayi.

<sup>20</sup>Tuñiakui Jesus tiarmiayi “Yus nekas enentáimtachu asarum tujinkiarume. Túmaitiat nekasaiti mustasa jinikiái timiá uchichitiat ti uunt tsakaatsuk. Núnisañ Yus ishichkisha enentáimtakrumka nu naint ékemkata tutai nu naint túrunattawai. Penké tujinkiashtatrume Yus nekas enentáimtakrumka.<sup>21</sup> Kame nu yajauch wakan jiki akupkatniuka ijiamam Yus áujsatniuiti.”

### **Ataksha Jesus ni játniun ujakmiania nu**

(Márkus 9.30-32; Rúkas 9.43-45)

<sup>22</sup>Jesus ni unuiniamuríjiai Kariréa nunkanam wekas juna ujakarmiayi. “Wi Aents Ajasu asan, aentsnum surunkattajai tura mantamnattajai.<sup>23</sup> Túrutawarmatai menaintiú tsawantai nantaktiatjai.” Tura ni unuiniamurí nuna antukar ti kúntuts enentáimprarmiayi.

### **Jesus ankantaitiat akiktinia nuna akikmakmiania nu**

<sup>24</sup>Jesus ni unuiniamuríjiai Kapernáum péprunam jeawarmiayi. Tura kuítian achin Pítrun tariar aniasarmiayi “¿Atumi uuntrí Israer-patrin akiktinia nuna akínkiait?”

<sup>25</sup>Tutai Pítiur “Ee” tímiayi.

Tura Pítiur jeá wayá chichaatsain Jesus emka tímiayi “Chikich nunkanmaya akupin ¿yana kuítrijian

takainia. Ni shuáriniunkek atantainia. Antsu yajaya shuárnan atantainiatsuk. Nekaschak, Semunká?”

<sup>26</sup>Tutai Pítiur “Nekas yajaya shuárnan atantainiawai” tímiayi.

Jesus tímiayi “Nuikia ni shuari ankant ániawai. Iisha núnisrik nu akiknt ankantaitji. <sup>27</sup>Túrasha itiurchat enentáimpraraín tusar akiktai. Ame tsau jukim entsá wetá. Túram emka namak japikim iwiankam nuí kuit wáinkiat-tame. Nu jukim Wíniasha áminiusha akikmakta.”

**“¿Ya imiá nankaamantuit?”  
tunaiyarmiania nu**

(Márkus 9.33-37; Rúkas 9.46-48)

**18** Nu tsawantai ni unuiniamuri tariat Jesusan aniasarmiayi “Yus akupeamunam pachiinia nu ¿ya imiá nankaamantu áminiai?”

<sup>2</sup>Nuna tuíniakui Jesus uchin untsuk ajapen awajtusar <sup>3</sup>tímiayi “Tí nekasan tájarme, atumí enentáimtaii yapajjarum uchia ánis ajachkurmeka Yus akupeamunam pachiinkiachmini-aitrume. <sup>4</sup>Nu asamtai ju uchia ánis péechach enentáimtumana nuka Yus akupeana nuí nekas nankaamantu ajasminiai. <sup>5</sup>Nú arantcha Winia anentuk uchin itiaana nú shuar Winiasha itiaareawai’ tímiayi.

**Tsuumainti yajauch túrumtikiatin**

(Márkus 9.42-48; Rúkas 17.1-2)

<sup>6</sup>Shuar ju uchin Winia umirtana nuna tunaanum ajuarmatainkia nuna túratsain niisha kuntujén kayajai jinkiar nayaantsanam ajapen kunanam ajunmaitkiunka maak ainti, tímiayi. <sup>7</sup>Ju nunkanam tunáa iniaatai íruluk tuke itiurchataiti. Antsu shuar chikichan tunaanum ajuarka ti itiurchatan inkiuntai’ tímiayi.

<sup>8</sup>Nu asamtai ame uwejem tura nawem tunaanum ajunmatniuitkiunkia

tsupikiam ajapata. Kame muntuch pujustin tura ukunam nayaimpiniam wétin péñkeraiti. Antsu kajinkiashtin jinium takamtsuk jeatniuka imiá yajauchiiti. <sup>9</sup>Núnisan ame jimi tunaanum ajunmatniuitkiunkia ukuinkiam ajapata. Kame chikichik jijjai pujusam nayaimpiniam wétin péñkeraiti. Antsu jinium mai jintiuk wétin imiá yajauchiiti’ tímiayi.

**Murik menkaaka áujmatsamu**

(Rúkas 15.3-7)

<sup>10</sup>‘Uchi ainia nu nakitraitrap. Yusa sun-tari nin wáinkiatniua nu winia Aparui tjijuch pujuiniawai. <sup>11</sup>Kame wi Aents Ajasu asan, menkaakarun eaktajtsan táwitjai.’

<sup>12</sup>‘Enentáimpratarum. Shuar sian (100) murikiun takakuitiat chikichik menkakamtai untsurí menkakacharun náinnium matsaak, menkakan eaushtatuak. <sup>13</sup>Wáinkiasha untsurí menkakacharua nujai nankaamas waraschattawak. <sup>14</sup>Núnisan atumi Aparí nayaimpiniam pujana nu, nu uchi chikichkisha menkakacharti tawai’ tímiayi.

**Yus-shuarti tsankurnairatin**

(Rúkas 17.3)

<sup>15</sup>‘Chikich Yus-shuar ámin yajauch túrumakuinkia nii werim áujtsata. Tura ámechik werim ame yatsumjai chichasta. Anturtamkuinkia ame yátsum yáinkiume. <sup>16</sup>Tura anturtamchakuinkia nuyá chikichik shuar jimiará shuarsha jukim ataksha weritia. Túram ataksha áujnaisatarum, niisha paant nekaawarat tusam. <sup>17</sup>Túrasha yatsum tuke ántachkuinkia Yus-shuar iruntainiam iwaiainakta. Túrasha yatsum tuke ántachkuinkia Yus-shuaracha núnisan enentáimtusta nu shuar.’

<sup>18</sup>‘Nekasan tájarme, ju nunkanam suritiam nu nayaimpinmasha suritniak-



tatui. Tura ju nuṅkanam tsanṅkateam nu nayaimpinmasha tsanṅkatnaktatui.’

<sup>19</sup>Núnisnak tájarme, ju nuṅkanam pujusrum jimirá Yus-shuartiram métek enentáimprarum winia Apar nayaimpiniam pujana nu seakrumniṅkia wakerarmena nuna suramsattarme. <sup>20</sup>Jímiar menaintiusha Yus-shuar Winia enentáimturuk iruntrarmatai Wisha nui niijjái pujajai” tímiayi Jesus.

<sup>21</sup>Takui Pítiur werí Jesusan aniasmi-ayi “Uuntá, winia yatsur yajauch awaj-takui ḡurutma tsanṅkuratniuitiaj. Siátikik tsanṅkuratniuitiaj?”

<sup>22</sup>Jesus aiyak “Siátik tátsujme, antsu iniañnatsuk tsanṅkuratniuitme” tímiayi.

### Takakmau tsanṅkurachun pachis áujmatsamiania nu

<sup>23</sup>Tuma asa Jesus Yus akupeamunam pachiinkiaru tsanṅkurnairartiniaiti tusa ju métek-taku chichaman áujmatuk tímiayi, “Uunt akupin takarin tumashin akirkarat tusa untsukarmai. <sup>24</sup>Yama nánkamuk tí nukap tumashmakua nuna untsukmai. Akikmakchamnia ti tumashmakuyi. <sup>25</sup>Tura nu takakmau kuitri at-sakui uunt akupin “Yajasma áitkiasrum nuartiuk uchirtiuk ashí waririntiuk suruktarum, timiai. Nu kuitjái akirkati” timiai.

<sup>26</sup>Tutai nu takakmau uunt akupniun tikishmatar seak timiai “Uunta, waitneasam nákarsatá. Auka, mash akikattajame.” <sup>27</sup>Uunt akupin waitnentar mash tsanṅkur ankant akupkamai. <sup>28</sup>Tura nú chichamaik nú takakmau jiinki ni ain inkiunmai. Nú aisha nin ishichik tumashiiyi. Tura tsékenki suwenam achik chicharuk timiai “Wari akirkata tumashitmena nu.”

<sup>29</sup>Tura ni ai nin tikishmatar timiai “Waitneasam nákarsatá. Auka, mash akikattajame” timiai. <sup>30</sup>Túrasha nakitramai. Antsu tsanṅkurtsuk sepunam enkeamai ashí akirkatí tusa. <sup>31</sup>Chíkich

takakmau nuna wáinkiar ti kúntuts enentáimtuiniak uunt akupniun ashí etsertukarmai. <sup>32</sup>Nuna antuk uunt akupin untsuk itiaá timiai “Yajauchiitme. ḡWinia “waitnentrurta” túrutkumin tsanṅkurachmakjam?” <sup>33</sup>Amesha

núnismek ame aim tsanṅkuratniuitme” timiai. <sup>34</sup>Tinia uunt akupin kajekmai. Tura ashí tumashin akikmatsuk asutniati tusa suntarnum surukmai.”

<sup>35</sup>Jesus nuna áujmatas amúak tímiayi “Núnisan winia Apar nayaimpiniam pujana nu atumin túrutmattarme atumi yachi nekas enentáijjai tsanṅkureachkurminkia.”

### Jesus nuwá ajapatniun áujmatsamiania nu

(Márkus 10.1-12; Rúkas 16.18)

**19** Jesus nuna tinia ikiuak Kariréa nuṅkanmayá wémiayi. Tura Jurtan entsa amain Jutía nuṅkanam jeami-ayi. <sup>2</sup>Untsurí aents nemariarmiayi tura jáiniancha péñker awajsamiai.

<sup>3</sup>Nui Pariséu Jesusan nekapsataj tusar aniasarmiayi “ḡShuar ni nuwen itiurchat akui ajapamniakait?”

<sup>4</sup>Tutai Jesus tímiayi “ḡÁtumka Yus-Papí áujtsachukaitrum? Yámankamtaik Yuska shuáran áishmanṅkan nuwancha najanamiayi tawai. <sup>5</sup>Tuma asamtai áishman ni aparín ni nukurín ikiuki ni nuwejai tsanin chikichik ayashstinia áinis ajasartatui, tu áarmaiti, tímiayi. <sup>6</sup>Tuma asa jímiarcha antsu chikichik ayash áiniawai. Tuma asamtai shuar Yus apatkamia nuna, aents akankashtiniaiti’ tímiayi.

<sup>7</sup>Takui tiarmiayi “Nuikia ḡurukamtai papí áarar nuwá ajapatniun Muisais tsanṅkatkamia?”

<sup>8</sup>Tutai Jesus tiarmiayi “Timiá ántichu asakrumin nuwá ajapatniun tsanṅkatkamiayi. Túrasha émkaka núnischauyayi. <sup>9</sup>Wi tájarme, shuar ni nuwen chíkichjai pujuschan ajapeakka

tura chikichan nuatkun̄ka tsanirmayi. Chíkich áishman̄sha nuwā ajapamun nuátkañka nusha tsanirmayi” tímiayi.

<sup>10</sup>Takui ni unuiniamur̄i tiarmi-ayi “Nuikia áishman̄ ni nuwé pen̄ké ikiukchamniaitkiuñkia nuátkachminiaiti.”

<sup>11</sup>Jesus tiarmiayi “Nu chichamnaka mash antukchamin ániawai. Antsu Yus nuna umiktin susamua nuke antukmin ániawai. <sup>12</sup>Chíkich chíkich nuatkachmin ániawai. Chíkich nuátkachmin aki-niawaru ániawai. Chikichcha aentsjaj̄ nuátkachmin najanaru ániawai. Chikichcha nuátainiatsui Yus akupeamu takatan takastinian. Juna antuktinian jeáka antukti.”

### Jesus uchin shiir awajsamiania nu

(*Márkus 10.13-16; Rúkas 18.15-17*)

<sup>13</sup>Nuyá Jesusan uchin itiararmiayi. Nin antiñ Yúsan áujtusarat tusar wakeriarmiayi. Túruiniakui ni unuiniamur̄i chicharkarmiayi. <sup>14</sup>Túruiniakui Jesus tímiayi “Uchi Winí winitin tsankatkatarum. Suritkiairap. Kame ju uchia áintsañ péejchach ánian nunak Yus akupkamniaiti.” <sup>15</sup>Tinia uchin miniakas nuyá wémiayi.

### Kuítrintin Jesusjaj̄ chichasmiania nu

(*Márkus 10.17-31; Rúkas 18.18-30*)

<sup>16</sup>Shuar natsa Jesusan tarin aniasmi-ayi “Uuntá, pen̄keraitme. Tuma asam turuttia ¿warinia túrakna tuke iwiaaku áataj?” tímiayi.

<sup>17</sup>Tutai Jesus nin enentáimtikrataj tusa tímiayi “¿Urukamtai pen̄keraitme túrutam. Shuar pen̄kerka atsatsuk. Aya Yúskechukait? Wats, tuke iwiaaku pujustaj tákumka akupkamu umírkartá.”

<sup>18</sup>Tutai shuar “¿Tuna nekas umírkata-niuitaj?” tímiayi.

Takui Jesus tímiayi “Mañkartuawaip, tsanirmawaip, kasámkáip, chíkich shuar tsanumpruraip, <sup>19</sup>ame apa nukusha

umírkatá, ame shuárum ame ayashim aneamna nútiksamek aneeta.”

<sup>20</sup>Tutai natsa tímiayi “Núnaka úchichik mash umiki tsakaruitjaj. Nuyasha ¿warí táatrusa?” tímiayi.

<sup>21</sup>Takui Jesus tímiayi “Nekas pen̄ker átaj tákumka, weme ame kuítrum kuítrinchá ainia nu súsartá. Tura nayaimpiniam kuítrintin ajastatme. Nuyá Winia nemártústá” tímiayi Jesus. <sup>22</sup>Tura natsa nuna antuk kúntuts wémiayi ti kuítrintin asa.

<sup>23</sup>Nuyá Jesus ni unuiniamur̄in tiarmiayi “Nekasan tájarne, kuítrintin Yus akupeamunam pachiinkiatin ti itiruchataiti. <sup>24</sup>Ataksha tájarne, kamiriuka kawái nankaamas uunt asa auja j̄in wayachminiaiti. Núnisan̄ kuítrintin Yus akupeamunam pachiinkiatin ti itiruchataiti.”

<sup>25</sup>Ni unuiniamur̄i nuna antukar antúu ajarmiayi. Túrawar aniniainiarmiayi “¿Nuikia yaki uwempramniait?”

<sup>26</sup>Tuúniakui Jesus ashí ísar tímiayi “Aents uwempratniun nekas tujintiaini-awai antsu Yuska ashí tujintiatsui.”

<sup>27</sup>Nuyá Pítiur tímiayi “Uuntá, iikia ashí ikiukchajik Ámin nemarsatai tusar. ¿Warin̄ wáinkiattaj̄i iisha?”

<sup>28</sup>Jesus tímiayi “Nekasan tájame, ukunman̄ka ju nun̄ka yamaram ajastatui. Aents Ajasu asan, Wisha nui, uunt akupin ajastatjaj̄ tura atumsha winia nemartusutirmeka Wijiñ̄ métek akupin ajastatrumé ashí Israer-shuar akupkatin. <sup>29</sup>Tura shuar ni jeencha, yachin̄cha, umain̄cha, aparin̄cha, nukurin̄cha, nuarin̄cha, uchirin̄cha, tura nun̄kencha Winia anentu asa ikiukin wekaakka, nu shuar nii ikiukmia núnisan̄ yamaisha ti untsur̄i wáinkiatatawai tura ukunmasha tuke shiir pujustatui Yusjaj̄. <sup>30</sup>Untsur̄i yamá pen̄ker̄i ánianana nu ukunam ukunmaani pujusartatui, tura yapajíawar yamá

ukunmaya áiniana nu ukunam emka pujusartatui' tímiayi Jesus.

### Jesus takarniun pachis áujmatsamiania nu

**20** 'Yus akupeamunam pachiinkiatin júnisaiti. Nunka nérentin ni araamurin júuktaj tusa káshik iniartaj tusa júnkimiyai. <sup>2</sup>Chikichík tenariu kuit jean tsawant takamtsuk akiktajrume tusa chichas ni araamun júuktinian akupkarmiyai. <sup>3</sup>Nantu takuntaisha ataksha jiinki shuar yujan wáiniak <sup>4</sup>timiai "Atumsha winia arakur júuktin yáintkiatarum. Shiir akiktajrume." Tutai wearmai. <sup>5</sup>Ataksha tutupin aī nuyá áankúsha jiinki, núnisan tinia akupkarmai. <sup>6</sup>Ataksha nantu patamsai júnkimiai. Tura shuaran yujan wáiniak "¿Urukamtai takamtskesha áani pujarum?" timiai.'

<sup>7</sup>"Warí, iincha iniatmainiatsji" tiarmai.'

"Tuíniakui timiai "Atumsha winia nunkarui takautarum. Pénker akiktajrume."

<sup>8</sup>'Kirit ajátekiái takatrin wáinniun timiai "Takatan takasaru untsukam akikiarta. Kíarai nankamawaru emka akikiarta. Túram káshik nankamawarujai amuktá" timiai. <sup>9</sup>Takui nantu patamsa aī nankamawaru wayawarmatai chikichík tenariu kuit jean ashí akikiarmai. <sup>10</sup>Mash umintramtaí nuyá emka nankamawaru wayawar "nuna nankaamas achikchatjash" tu enentáimsarmai. Tura chikichík tenariu kuit jean achikiarmai. <sup>11</sup>Achikiar nérenniun itiurchat enentáimturarmai. <sup>12</sup>Tura tiarmai "Iikia ashí tsawant nantujai wáitsachjik. Ju shuarsha nantu patamsa aī nankamawaruka penké ishichik takasaraí. Túrasha iijjai métek akikiarume" tiarmai.

<sup>13</sup>Tutai nérentin chikichkiniak iniakmas timiai "Umpá, penké kasartsujme. Káshik chikichík tenariu kuit

jeá chichasar iijjai iwiarachjik, timiai. <sup>14</sup>Pai, ame kuítrum achikiume. Nantu patamsai takasuncha amijjai métek akiktinian wakerajai. <sup>15</sup>Warí, winia kuítrujai wi wakeramun túrachminkaitaj. Antsu wi tsanka asamtai ¿yajauch enentáimturmek?" timiai.'

<sup>16</sup>'Núnisaiti Yus-shuarnum. Émkaru áinia nu uku ártatui. Tura ukuya áiniana nu, emka ártatui. Untsurí ipiaamu áiniawai tura ishichik achikma áiniawai." Tu áujmatsamiayi Jesus.

### Jesus ataksha ni jákatniurin etserkamiania nu

(Márkus 10.32-34; Rúkas 18.31-34)

<sup>17</sup>Jesus Jerusarénnun jintiá wesa ni unuiniamurin akankin tiarmiyai <sup>18</sup>"Iistarum, Jerusarénnun wéaji. Nuisha Israer-patri úuntrin tura ni jintinniurincha Winia surutkartatui. Nuisha, wi Aents Ajasu aīn, "mantamnati" túrtiartatui. <sup>19</sup>Tura apachnium surutkartatui. Nuī katsekrukar, awattiar krúsnum máawarti tusar túrutawartatui. Túrasha jakayatan menaintiú tsawantai nantaktatjai" tímiayi.

### Jakupu tura Juanka nukurí Jesusan seamiayi

(Márkus 10.35-45)

<sup>20</sup>Nuyá Jakupusha Juansha, mai Sepetéu uchirí, nukuríjiai tariar Jesusan tikishmatrarmiyai. Tura nukurí Jesusan waitnentrutarat tusa seamiayi. <sup>21</sup>"¿Warí wakeram?" tímiayi Jesus.

Tutai nuwá tímiayi "Ame uunt akupin ajastatmena nuí winia uchir chikichik untsuurnumaani chikichcha menaanmaani akupkarti tusam apujusarta."

<sup>22</sup>Takui Jesus tiarmiyai "Atum seatrumna nu nékatsrume. ¿Wi wáitsatjatajna nujai métek túramniakaitrum? Wi wáitsatniun yapá umartinia áinis umartiniaitjai. Núnisan wáitsatniujai

imiatniau áintsan imiantiniaitjai. ¿Nú pininnumiá umarminkiaitrum. Núnisan imianminkiaitrum?”

Tutai “Páchitskea” tiarmiayi.

<sup>23</sup> Tuíniakui Jesus tímiayi “Ayu. Winia pininkruiya umartatrum. Wi imiantiatjana nujai imiantiatrum. Antsu Wijiai tsaninkia pujustinniaka Wikia íschatnuijtjai, antsu winia Apar iwiarturu áinia nuna nuí apusattawai” tímiayi.

<sup>24</sup> Chkích tias (10) unuiniamurí nuna antukar nu jímiaran kajerarmiayi.

<sup>25</sup> Túmainiakui Jesus untukar tiarmiayi “Ju nékarme, apachniunka kapitán ajasar ni shuarín nérenniau áinis ti akupenawai. Ni úntrisha waantu enentáimsar “wítjai akupniun” tu enentáimtikiainiawai. <sup>26</sup> Antsu atumjainkia núnis áchatnuiiti. Nankaamaku ajastaj tákuŋka chikicha yaintri átiniaiti. <sup>27</sup> Ame kapitántrum ajastaj tákuŋka ashí shuara yaintri ajástí. <sup>28</sup> Wisha Aents Ajasuitiatan, Winia yáintkiarat tusan táchaitjai antsu shuáran yáintaj tusan táwitjai. Untsurí shuaran tunáa tumashrín akikmatkataj tusan jákatnuijtjai. Nuna tarimjai” tímiayi Jesus.

### Jímiar jji kusurun Jesus tsuármiania nu

(Márkus 10.46-52; Rúkas 18.35-43)

<sup>29</sup> Jirikiú péprunmaya wénakuí untsurí aents Nín nemariarmiayi. <sup>30</sup> Nuí jintiá yantam jímiar jji kusuru pujuarmiayi. Jesus wéawai taman antukar kakantar untukarmiayi. “Uuntá, uunt akupin Tawitia Uchirínchukaitiam. Waitnentrutra” tiarmiayi.

<sup>31</sup> Tuíniakui “Takamatsatarum” tiarmiayi.

Tútaisha nú nankaamas untsumkarmiayi. “Uuntá, Tawitia Uchiriá, waitnentrutra” tiarmiayi.

<sup>32</sup> Tuíniakui Jesus wajas jji kusurun untukar aniasarmiayi “¿Warí itiurtukat tusarum wakerutarum?”

<sup>33</sup> “Uuntá, iimtiaí tusar wakeraji” tiarmiayi. <sup>34</sup> Tuíniakui Jesus nin waitnentrar ni jjin antinkiararmiayi. Nu chichamaik ímiar niisha Jesusan nemariarmiayi.

### Jesus Jerusarénum wayamiania nu

(Márkus 11.1-11; Rúkas 19.28-40; Juan 12.12-19)

**21** Jerusarénum nuntumsar Petpajái péprunam jeawarmiayi. Nusha Uriwiu náinnium ayamchiyai. Nuí jeawar Jesus ni unuiniamurín jímiaran akupeak tímiayi <sup>2</sup> “Tíjjuuch péprunam wérum umpuuru umpu-uruchijiai jinkiamu wáinkiatarme. Nu atiarum itartitarum. <sup>3</sup> Tura aents “Urukamtai áitkiarum” túramkurminkia “Uunt wakerawai, tura wárik awainkittiwai” titiarum” tímiayi.

<sup>4</sup> Tura nusha yaunchu Yúsnan etserin aarmia nu umínkiatí tusa tímiayi. Júnis áarmiayi:

<sup>5</sup> “Ashí Israer-shuarnum ju etserkatarum:

“Iistarum, atumi Akupniurí, péejchach ajas umpuurchiniam ekeemak winitramprume. Péejchach asa káarak áintstai umpuuru uchirín ekeemak winitrámtatrum,” titiarum.” Tu áarmaiti.

<sup>6</sup> Tutai nu jímiar unuiniamurí wear Jesus timia núnisan túrawarmiayi. <sup>7</sup> Umpuurchin nukurtiuk itiararmiayi. Tura ni pushirín áitkiaram Jesus entsamkamiayi. <sup>8</sup> Shuar untsurí ásar ni wéamunam pushirín áitkiarmiayi. Chikichcha nuká jurukar ni wéamunam áeprurarmiayi. <sup>9</sup> Shuar untsurí eem wearmia nusha tura uku winiarmia nusha kakantar untsumiarmiayi. “Juna weatri uunt akupin Tawit asamtai nankaamakuiti. Yusa náarijn

winiana ju ii Uuntrinti. Shiir atí. Nayaimpinmasha Yus shiir awajsatai.” Tu untsumiarmiayi.

<sup>10</sup> Jesus Jerusarénnun wayamtai ashí shuar ti enentáimainiak “¿Jusha yait?” tiarmiayi. <sup>11</sup> Chikichcha “Yúsnan etserin Jesusaiti, tiarmiayi. Nasarét pepru Kariréa nunkanmayaiti” tiarmiayi.

### **Yusa Uunt Jeen suruktinian Jesus surimkiamiania nu**

*(Márkus 11.15-19; Rúkas  
19.45-48; Juan 2.13-22)*

<sup>12</sup> Nuyá Jesus Yusa Uunt Jeen wayá kuítian súruiniak tura súmainiak pujan akúprámiayi. Kuítian yapajinia misaríncha ayanturmiayi tura yampitsa súruinia kutankríncha núnisan ayanturmiayi. <sup>13</sup> Nuyá tímiayi “Yus-Papinium áarchamukait,

“Yusa Jeenka Yus aujtai jéaiti.” Antsu átumka kasa matsamtaiya nútikiarme” tímiayi.

<sup>14</sup> Nuj Yusa Jeen jii kusurarusha shutuapsha Jesusan tariarmiayi. Túramtai tsuáramiayi. <sup>15</sup> Tura Israer-shuar pátrisha tura Israer-shuara jintinniurisha aents tujintiamun Jesus túrakui ísar kajerarmiayi. Nu arantcha uchi Yusa Jeen “Juna weatři uunt akupin Tawit asamtai nankaamakuiti” untsumainiakui Jesusan ti kajerarmiayi. <sup>16</sup> Tura tiarmiayi “¿Ju uchi tuinia nu ántamek?”

Tutai Jesus “Ee, ántajai, tímiayi. Átumka Yus-Papí juna tana juka áusachukaitrum. Júnis tawai,

“Uchisha kuírchisha Yusa náarin imiá shiir awajtusarat tusa Yus tsankatkaiti.” Tu áarmaiti.

<sup>17</sup> Nuna tinia ikiuiniak Jerusarénnunmiá jiinki Petania péprunam we nu kanarmiayi.

### **Jesus iikiu numin yuminkrimiayi**

*(Márkus 11.12-14, 20-26)*

<sup>18</sup> Kashin tsawaar Jerusarénnun waketas Jesus tsukaarmiayi. <sup>19</sup> Iikiu numi jintiá yantam wajan wániak akaktajtsa werimiayi. Tura werí aya núminiak wáinkiamiayi. Túra numin tímiayi “Atakka nerekhattame.” Takui nu chichamaik káarmiayi.

<sup>20</sup> Nuna wániak ni unuiniamuri ti enentáimprar aniasarmiayi “¿Urukaku imiá wárik jaka?”

<sup>21</sup> Tuíniakui Jesus tiarmiayi “Nekasan tájarme, Yus nekas enentáimtakrumka, “nekaspash túrat” táchakrum iikiun túrajna nusha túramniaitrum. Tura nu arantcha nu naint “Ékemtam nayaantsanam iniahta” tutai túrunattawai. <sup>22</sup> Ashí Yus áujeakum seamna nu, Yus nekas enentáimtakum seakmeke, wáinkiáttame” tímiayi.

### **Yusa kakarmarijiai Jesus takasmiania nu**

*(Márkus 11.27-33; Rúkas 20.1-8)*

<sup>23</sup> Yusa Uunt Jeen Jesus wayá unuiniamiayi. Turai Israer-patri uuntri tura Israer-shuara úuntriasha Jesusan tariar aniasarmiayi “¿Yana chichamejai ju túram. Ya ju túratniuncha akup-tamkait?” tiarmiayi.

<sup>24</sup> Tutai Jesus tiarmiayi “Wisha anias-taj tusan wakerajrume. Ju áirkakrumn-ínkia Wissha yana chichamejai túraj nuna ujaktatjarme. <sup>25</sup> Wats, ¿ya imiakratin Juan kan akupkamia. Yusak, aentsuk, ya akupkamia?”

Tutai nuámtak tunainiarmiayi. “Yus akupkamiayi” tákurnínkia “¿urukamta enentáimtichuitrum?” túramtatji.

<sup>26</sup> Kame “shuar akupkaiti” tákurnisha ashí aents mantamattaji. Warí, ashí niisha Juan Yúsnan etserniuyi tuíniatsuk” tiarmiayi. <sup>27</sup> Nuyá Jesusan “Nékatsji” tiarmiayi.

Tutai Jesussha aḡiniak “Wátsek, Wisha núnisnak akuptukua nuna ujakchattarume” tímiayi.

### **Jimiará uchi tiarmia nuna áujmatsamiania nu**

<sup>28</sup> Jesus unuuniak tiarmiayi “Enentáimpratarum. Shuar uchin jímiaran takakuuyi. Nuna chikichkin chicharuk timiai “Uchirú, arakur júuktin yamáí wetá.”

<sup>29</sup> “Tutai uchi “Atsá, nakitiajai” timiai. Tayat urum enentáimiar takaumai.’

<sup>30</sup> ‘Nuyá aparí chikichnasha werí núnisan timiai.’

“Tutai uchi “Apawa, páchitsuk wetajai” timiai, túrasha wéchamai.’

<sup>31</sup> ‘¿Túa ni aparí wakeramun umirkama?” tímiayi Jesus.

Tutai “Emkaa nu” tiarmiayi.

Tuúniakui Jesus tímiayi “Nekasan tájarme, yajauch shuar ainia nu tura tsanirma ainia nusha átumka pachintsrumniḡ nii emka Yus akupeamunam pachiiinkiertatui. <sup>32</sup> Iis, imiakratin Juan pénker wekasatniun etserkamiayi, túrasha antukchamarme. Antsu yajauch shuar ainia nu tura tsanirma ainia nu umirkarmiayi. Nusha wáinkiaitratrum atumi tunaari enentáimturchamarme’ tímiayi.

### **Yajauch takaun áujmatsamiania nu**

(Márkus 12.1-12; Rúkas 20.9-19)

<sup>33</sup> ‘Ju chíkich áujmatmasha antuktarum. Nunká nérentin uwa ajan ajamai. Tura wenuimiai. Uwa neketaincha najanamai. Kumpin jeancha najanamai. Tura mash pénker iwiar shuar wáitrukarti tusa apujkimiai. Tura niḡkia yajá nunkanam wemai. <sup>34</sup> Tura júuktin tsawant jeamtai juuk nakak akúptúrkartí tusa chíkich takarniurí akupkamai. <sup>35</sup> Tura nuḡ pujuinia nu, akupkamun achikiar chikichnaka katsumkar, chikichnasha máawar, chikichnasha kaya-

jai tukurar máawarmai. <sup>36</sup> Túrawar-matai nérentin takarniun nuna nanḡkaamas akupramai. Ataksha nuḡ pujuarmia nu núnisan túrawarmai. <sup>37</sup> Amúamunam ni uchirín akupeak “Winia uchir asamtai umirkachartimpiash” timiai. <sup>38</sup> Túrasha nu takau nérenniu uchirín wáinkiar “Nuna aparí jakamtai juna mashi júkish-tatuak, tiarmai. Maatai, túrar ii nérentin ajastai” tiarmai. <sup>39</sup> Tiar achikiar arant júkiar nuḡ máawarmai.” <sup>40</sup> Tinia Jesus aniasarmiayi “Nunká nérenniurí taa nu takaun çitiurkatin?” tímiayi.

<sup>41</sup> Tutai tiarmiayi “Nu shuar ti yajauch ásarmatai waitnantsuk máawartatui. Tura nu ajan chíkich takaun neren akanak nin susannia nuna apujsattawai” tiarmiayi.

<sup>42</sup> Tuúniakui Jesus tímiayi “Átumka Yus-Papikia çpenkek áujchaitrum? Júnis áarmaiti:

“Jeḡ jeamin utsanḡkarmia nú kaya ashí kayajai nanḡkaamas apujsamuiti. Núnaka ii Uuntri Yus túrait. Iisha ísar ti enentáimtaji.” Tu áarmaiti.

<sup>43</sup> Tuma asamtai tájarme, Yusna írussa nu wáinkiatárum tusa suramsamuitiat atumíya junas chíkich aents súnastatui. Niisha awanḡtukiartatui. <sup>44</sup> Tura shuar nu kayan tukumainia nuka kupintrartatui. Tura nu kaya shuarnum iniarka tsai tsai awajsattawai auka” tímiayi Jesus.

<sup>45</sup> Israer-patri uuntriḡsha Pariséusha Jesus áujmatman antukar “in túramji” tusar achiktaj tiarmiayi. <sup>46</sup> Tura ashí aents “Jesus Yúsnan éterui” tuinia ásar-matai nin ashamkarmiayi.

### **Métek-taku chichamjai nuatnaiyamun Jesus áujmatsamiania nu**

**22** Jesus ataksha áujmatuk juna tímiayi: <sup>2</sup> “Yus akupeamunam pachiiinkiertin júnis enentáimpramni-aiti. Uunt akupin ni uchirí nuáteakui nampermamai. <sup>3</sup> Túrak ni takarniurḡ

ipiaamautarum tusa akupkarmai. Tura ipiaamusha nakitrarmai. <sup>4</sup>Ataksha chíkich takarniuncha ipiaamakrum ju titiarum tusa akupkarmai. “Mash yurumkan iwiarajai, tawai, titiarum, timiai. “Waakasha máatarum tusan akupkarjai, tawai. Ajaermancha máatarum tusan akupkajai, tawai. Ashí nuatnaiyamunam winiarti,” tawai” titiarum” timiai. <sup>5</sup>Támaitiat nú ipiaamusha nakitrarmai. Chikichik ni nunken wemai. Chikichcha kuftian suruktinian wemai. <sup>6</sup>Chikichcha ipiakratniun achikiar yajauch awajsarmai, tura chikichnaka máawarmai. <sup>7</sup>Túramtai uunt akupin ti kajek, ni suntari mash máatarum túrarum ni jee mash ekeemáktárum tusa akupkarmai. <sup>8</sup>Nuyá ataksha ni takarniurín akupkamai. “Nuatnaikiatin jísat mash iwiamuiti, timiai. Tura nu ipiaamu winichmin armai. <sup>9</sup>Tuma asamtai pepru jintí werum ashí shuar náñkamas wáintrum nu ipiaatarum” timiai. <sup>10</sup>Takui takarniuri jíinkiar pepru jintín wajainian, yajauch shuarnasha péñker shuarnasha, ashí ipiaawarmai. Túramtai jea piákmai.’

<sup>11</sup>Nuyá uunt akupin ipiaamun ísartaj tusa wayamai. Nui shuaran péñker iwiamamprachun wáinkiamai. <sup>12</sup>Tura timiai “Umpá, ¿urukamtai nuatnaiyamunam entsatai pushí entsatsuk wayam?” Tutai nu áishman tákamtak pujusmiayi. <sup>13</sup>Nuyá uunt akupin yurumka ajaaman timiai “Achikrum nawenmasha uwejnumsha jínkiarum aa jíikrum kiritniunam ajapatarum. Nuísha ti úutin ti wáitsatin átatui” timiai. <sup>14</sup>Kame untsurí ipiaamu áiniawai antsu ishichik achikma áiniawai.”

### Uunt akupin Sésar akiktinia nu (Márkus 12.13-17; Rúkas 20.20-26)

<sup>15</sup>Nuyá Pariséu chichaman najatawar uyumtikiatai tusar tiarmiayi. <sup>16</sup>Túrawar ni shuaríncha tura akupin Erutisa nemarniurísha Jesusan akuptukarmiayi. Kame akupin Erutis uunt akupin Sésara kuitri wáinin asamtai nu apachniasha akupkarmiayi. Niísha jeariar Jesusan tiarmiayi “Uuntá, amesha nekas chicham chichaame. Nu nékaji. Chíkich shuar tuinia nu ántutsuk nekasam Yus-Chicham jintiame. Shuar shiir enentáimturarat tusam jintiatsme, tiarmiayi. <sup>17</sup>Tuma asamtai ju nekaatai tusar wakeraji. ¿Uunt akupin Sésar akikminkiait?” tiarmiayi.

<sup>18</sup>Jesus ni yajauch enentáijijai aníam nekáa tiarmiayi “Aya shiir chichamtiniaitrueme. ¿Urukamtai uyumatkiarkatin wakerutarum? tímiayi. <sup>19</sup>Wats, Sésar akiktinia nú kuit itiaritiarum.” Takui chikichik kuftian itiararmiayi. <sup>20</sup>Nuna iis Jesus aniasarmiayi “¿Jui yana yapimpiait tura yana naari áarmait?”

<sup>21</sup>Tutai “Uunt Sésarna” tiarmiayi.

Tuiniakui Jesus chicharuk tiarmiayi “Nuikia uunt Sésarna nu, Sésar susatarum. Tura Yusna nusha Yus susatarum” tímiayi. <sup>22</sup>Tura nuna antukar ti enentáimprarmiayi. Tura ikiuiniak wearmiayi.

### Jesusan jakamunmaya nantaktinian aniasarmiania nu

(Márkus 12.18-27; Rúkas 20.27-40)

<sup>23</sup>Nu tsawantaik Satuséusha Jesusan tariarmiayi. Satuséuka jakamunmaya nantakchatniuiti tuíniawai. Nuna tiniu ásar juna Jesusjai áujmatsarmiayi. <sup>24</sup>“Uuntá, Muisais juna áartampramijai, “áishman uchin yajutmatsuk jakamtainkia ni yachi nu nuwan nuatak ni yachin yajútmátrati,” tu áarmiayi,

tiarmiayi. <sup>25</sup> Ayu, fi shuarnum siati (7) yáchintin ármiai. Iwiairi nuatak uchin yajutmatsuk jakamiayi. Tura wajen ni yachin ikiurkimiayi. <sup>26</sup> Tura niisha nuatak uchin yajutmatsuk jakamiayi. Tura chikichcha núnisan jakamiayi. Tura chikichcha siati armia nu ashí nuatkar jákarmiayi. <sup>27</sup> Nuyá nuwasha jakamiayi. <sup>28</sup> Jakamunmaya nantakiar ¿yaki nekas ni aishri ati? Ashí nin nuatkacharmakia” tiarmiayi.

<sup>29</sup> Tuñiakui Jesus tímiayi “Yus-Chichamsha nékachkuram tura Yusa kakarmarisha nékachkuram nantaktin atsawai tákuram ti awajiarne. <sup>30</sup> Nekaatarum. Jakamunmaya nantakiaruka nuatkachartatui. Antsu Yusa suntari nayaimpiniam pujuinia núnisar nuartichu pujusartatui.

<sup>31</sup> Túrasha jakamunmaya nantakiartatna nu nekaatajtsa wakerakrumka ju enentáimsatarum. Muisais aarma nu áujtsachukaitrum. Júnisan áarmiayi:

<sup>32</sup> “Wiitjai Apraáma Yúsrinjai, Isaka Yúsrinjai, Jakupu Yúsrinjai.” Tu áarmiayi.

Watsek, Yuska jaká Yúsrinchuiti. Antsu iwiaaku ana nuna Yúsrinti, tímiayi. Iis, nu shuar imiá yaunchu jákaruítai Yusjai iwiaaku pujuiniak nantakmin ániawai” tímiayi. <sup>33</sup> Ashí aents nuna antukar nu jintintiam ti enentáimprarmiayi.

### **Yus akupkamu imiá enentáimtustinia nu**

(*Márkus 12.28-34*)

<sup>34</sup> Satuséu Jesusan aiktinian tujinkiar-matai Pariséu nuna antukar iruntrarmiayi. <sup>35</sup> Tura chikichik Pariséu jintintin asa Jesusan uyumtikiataj tusa aniasmiayi <sup>36</sup> “Uuntá, ¿túa Yus akupkamu imiá nankaamas enentáimtustiniait?”

<sup>37</sup> Tutai Jesus tímiayi “Júiti: “Ame Yúsrum ashí enentáimjai aneeta. Ashí ame wakanmijiaisha tura tuke enentáimtusam aneeta.” Tu áarmaiti,

tímiayi. <sup>38</sup> Núiti emka ashí akupkamu nankaamas enentáimtustinia nu. <sup>39</sup> Chikichcha jujai métek-taku awai. Nusha tawai: “Ame írutramuram ame ayashim aneamna nútiksamek aneeta.” <sup>40</sup> Nu jímiar akupkamu umirkam ashí Muisais akupkamia nusha tura ashí Yúsnan etserin unuinararmia nusha umirkattame” tímiayi.

### **Kristu Tawit weeaitat Yusa Uchirinti**

(*Márkus 12.35-37; Rúkas 20.41-44*)

<sup>41</sup> Tura Pariséu tuke irunar pujuiniakui <sup>42</sup> Jesussha aniasarmiayi “Kristu tutai ¿ya weeá átiniait. Warí enentáimtarum atumsha?”

Takui “Tawit weeá átiniaiti” tiarmiayi.

<sup>43</sup> Tuñiakui Jesus tiarmiayi “Nuikia ¿urukamtaí Tawit, Yusa Wakaní “titia” tutai, Krístun “winia Úuntur” tímia? Iis, Tawit juna tímiayi:

<sup>44</sup> “Uunt Yus winia Úunrun juna tímiayi: “Akupin pujutainium, winia untsuuruini, pujusam nákarasata. Ashí ame nemasrumin nupetkan Ámin umirtamkarti tusan amastatjai” tímiayi Yus.” Tu tímiayi Tawit.

<sup>45</sup> Watsek, Tawit Krístun “winia Úuntur” taisha ¿itiurak ni pampanmarí áti?” tímiayi Jesus. <sup>46</sup> Nuna takui penksha áikcharmiayi. Túrawar atakka uyumantikiatai tusar aniascharmiayi Jesusan.

### **Jesus Pariséuncha**

#### **Israer-shuara jintiniurincha “yajauchitrome” timiania nu**

(*Márkus 12.38-40; Rúkas 11.37-54; 20.45-47*)

**23** Jesus ni unuiniamurincha tura ashí shuárnasha tiarmiayi <sup>2</sup> “Israer-shuara jintiniurisha tura Pariséusha Muisais akupkamun paant ujatmainiawai. <sup>3</sup> Tuma asamtai



tuinia nu umirkatarum. Túrasha ni túruinia nu jumamkiirap. Nu shuar shiir chichainiyat nusháa túrin áiniawai. <sup>4</sup>Ti itiurchat ana nuna akupeenak ti emeram entsaktinia áintsan áentsun apujtuiniawai. Túrasha chikichik uwejejaisha ishichkisha takuitniun nakitiainiawai. <sup>5</sup>Aya shuar firsarti tusar ashí túruiniawai. Ashí shuar péñker enentáimturarti tusar Yus-Papin nijiaíncha tura kunturíncha ti wan̄karam awajsar anujak yujainiawai. Tura nu arantcha pushirj̄ sasariarman ashí shuarjaj̄ nan̄kaamas esaram awajas wekainiawai. <sup>6</sup>Nampernumsha péñker iwiaramunam pujustinian wakeruiniawai. Iruntainmasha nan̄kaamantu ajasa pujustinian wakeruiniawai. <sup>7</sup>Jintíá wekainiaksha ashí aents áujtuiniak “Jintínkiartiniá” turutiarti tusa wakeruiniawai’ tímiayi.

<sup>8</sup>“Túrasha átumka ashí shuar “Jintínkiartiniá” turutiarti tusa enentáimsashtiniaitrume. Átumka nuámtak yáchintrume. Átumka chikichik jintinkiertin ni naarj̄ Kristu takakrume. Nu asamtai “Jintínkiartiniá” túramcharmin áiniawai. <sup>9</sup>Ju nun̄kanmasha shuar “Aparú” tiirap. Chikichik nayaimpiniam pujana nu atumí Aparínti. <sup>10</sup>Atumi uuntrj̄ aya Krístuk asamtai “Uuntrú” túramcharmin áiniawai. <sup>11</sup>Antsu átum frútkamunmaya uunta nuka peejchach átiniaiti. <sup>12</sup>Shuar nan̄kaamantu ajastaj tákuin̄kia Yus nin peejchach awajsattawai. Antsu peejchach ana nuna Yus nin nan̄kaamaku awajsattawai’ tímiayi.

<sup>13</sup>‘Maa wáinkiatárum jintinniutirmesha, Pariséutirmesha. Ántrarum shiir chichamtiniaitrume. Yus akupeamunam wayátin waiti epenniuitrume. Atumsha wayatsuk chikichcha wayataj tuinia nusha suritniuitrume.’

<sup>14</sup>‘Maa wáinkiatárum jintinniutirmesha, Pariséutirmesha. Ántrarum shiir

chichamtiniaitrume. Wajé jee atanki-irum aents enentáimturarain̄ tusarum ti esaram Yus áujtiniaitrume. Túrin asarum átum ti asutniátniuitrume.’

<sup>15</sup>‘Maa wáinkiatárum jintinniutirmesha, Pariséutirmesha. Ántrarum shiir chichamtiniaitrume. Nun̄kanmasha nayaantsanmasha yajá wekainiuitrume chikichik shuar winí nemartusat tusarum. Tura atumi nemarī ajasmatai atumjaj̄ nan̄kaamas tunáa sumamannia awajearme.’

<sup>16</sup>‘Wáinkiatárum átumka. Jintinkiertiniaitrume nékachu asarum kusurua áiniuitrume. Ju jintíarme: “Shuar nekasan tajai tusa Yusa Jeeñ páchiakka nii tana nuna umitsuk ikiukminiaiti. Antsu nekasan tajai tusa Yusa Jeeñ kuri ana nuna páchiakka ti nekas umiktiniaiti” tíniuitrume.

<sup>17</sup>Nétsetrume. Yúsjaínkia ashí kuri ánrachukait. Antsu Yusa Jeeñ írúnna nuka aya nuin̄ ikusma asa Yusna ajasuiti. Tuma asamtai kurijijaj̄ nan̄kaamas Yusa Jee enentáimtustini-aiti. Enentáimcha asarum kusurua áinin wáakuitrume. <sup>18</sup>Nu arantcha tíniuitrume: “Shuar nekasan tajai tusa naman̄-maar-Yus-sútain páchiakka nii tana nuna umitsuk ikiukminiaiti. Antsu Yús-sutainiam naman̄ patasman páchiakka ti nekas umiktiniaiti” tíniuitrume.

<sup>19</sup>Nétsetrume. Pen̄ké naman̄ Yusjaj̄ ánrachukait. Aya Yús-sutainiam patasma asa nu naman̄ enentáimtuschatniukait. Enentáimcha asarum kusurua áinin wáakuitrume.

<sup>20</sup>Enentáimpratarum. Shuar nekasan tajai tusa Yús-sutain páchiakka aya sútainiak páchiatsui antsu sútaincha tura nuj̄ patasmancha mái-metek páchiawai. <sup>21</sup>Núnisan̄ shuar Yusa Jeeñ páchiakka aya nunak páchiatsui antsu Yus nu jeanam pujú asamtai nunasha páchiawai. <sup>22</sup>Núnisan̄ shuar nayaimpin páchiakka Yus pujutainchsetrume.

Peṅké naman Yusjají ánrachukait. Aya Yúa tura Yus nuí pujana nunasha páchiawai.’

<sup>23</sup>‘Maa wáinkiatarum jintinniutirmesha, Pariséutirmesha. Ánrarum shiir chichamtiniaitrum. Kumintsu nukésa, anisa nukésa, menta nukésa tias (10) akantram chikichik akankamu Yus súwitrum. Nuka péṅkeraiti, ikiukchatniuiti. Túramaitiat nekas péṅker túratniua nu túrutsuk ikiuwitrum. Yus nekas enentáimtustincha, waitnentáimtur-incha tura tuke péṅker túratniusha enentáimtsuk ikiuwitrum. <sup>24</sup>Átumka jintinkiertiniaiatrum nékachu asarum kusuru ániuitrum. Kutanam yajasmach enketu wáinkiuurmeka júwitrum. Túrayatrum kamiriu wáinkiuurmeka kawai nankaamas úunt ain takamtsuk kújawitrum.’

<sup>25</sup>‘Maa wáinkiatarum jintinniutirmesha, Pariséutirmesha. Ánrarum shiir chichamtiniaitrum. Átumka tsapasha pininsha initiaani nijiatsuk aya pátatek nijawitrum. Núnisrum pátatek shiir awajmamniuitrum tura enentáiminkia kasamkatniusha tura chíkichna wakeruktincha nujají piákuित्रume. <sup>26</sup>Kusuru ániuitrum, Pariséutirmeá. Antsu emka initiaani tsapasha pininsha nijaktarum. Túrakrumniñkia pátatkesha mai péṅker átatui. Núnisrum atumsha atumi enentáin ana nu shiir awajsarum pátatkesha shiir átatrum.’

<sup>27</sup>‘Maa wáinkiatarum jintinniutirmesha, Pariséutirmesha. Ánrarum shiir chichamtiniaitrum. Iwiarsamu pújujají yakarar shiir awajsamua ániuitrum. Aani shiir ániawai. Tura initkia jaká ukunchijají piákuiti. <sup>28</sup>Núnisaitrum atumsha. Chíkich shuar ísmaka ti shiira ániuitrum. Túrasha atumi enentáinikia ashí mujimiai piákuiti.’

<sup>29</sup>‘Maa wáinkiatarum jintinniutirmesha, Pariséutirmesha. Ánrarum shiir chichamtiniaitrum. Yaunchu Yúsnan etserin iwiarsamunam átumka shiir enentáimtakrum jea jeamkaitrum. Tura péṅker shuar yaunchu jákarusha shiir enentáimtur-tusarum ni iwiarsamu shiir awajearme. <sup>30</sup>Túrakrum ju tniuitrum: “Iikia yaunchu ii weatrijají pujaitkiurkia Yúsnan etserin máatin yáimkiachaají.” <sup>31</sup>Nujají ti paant chichaarme atumsha. “Ii weatri Yúsnan etserniun máawar tunáa túrin ármiayi” tárume. Tura “Yáimkiachaají” táyatrum, atumsha métek túrin asarum “Nijijají méteketji” tárume. <sup>32</sup>Wats, atumi weatri nankamawarmia nu átum amuktatrum’ tmiayi Jesus.

<sup>33</sup>‘Napia ániuitrum. Shuar aya yajauch awajniuitrum. Túmatirmesha Yus tunáa shuaran jinium akupkartatna nuya žitiurak uwempratarum? <sup>34</sup>Untsurí shuaran akuptuktatjarme. Yúsnan etserniuncha, ti nekancha, jintinkiertinnisha akuptuktatjarme. Tura atumsha chíkich máattarme, chíkichcha krúsnum ajintruarum máattarme, chíkichcha iruntai jeanam asutiáttarme, tura chíkichcha ashí nunkanam áintrattarme. <sup>35</sup>Nu tura asarum péṅker shuara numpé puarma nujají átum sumamattarme. Yá-mankamtaik Apir ti péṅker shuáraitiat máamuyayi. Tura ukunam Perekiasa uchrí Sakarías atumi uuntri Yusa Jee ámanum naman-maar-Yús-sutai ajapén aténkamunam máawarmiyai. Wats, Apir máamunmaya Sakarías máamunam ashí péṅker shuar ti untsurí máamujají sumamattarme. <sup>36</sup>Nekasan tájarme, yamáí pujuinia nú shuar ashí nujají sumamawartatui’ tmiayi Jesus.

**Jerusarénnumiá shuaran  
Jesus anak útmiania nu**

(Rúkas 13.34-35)

<sup>37</sup> ‘Jerusarénnumiátirmeá, Yúsnan etserin máiniaitrume. Yus akatar akupturmakmasha kayajai tukuram máiniaitrume. Túrin árumniñ waitnentajrume. Atash ni uchirin weana áitkiasnak weartinian wakerimjarne, tura nakitramarme. <sup>38</sup> Iistarum. Ame pépruram ajapamuiti. <sup>39</sup> Tura “Yusa náariñ winiana nu, shiir atí” títiatrumna nu tsawant jeatsain penké wáitkiashtatrum. Nuna tájarne” tímiayi Jesus.

**Yusa Uunt Jee saanaktinian  
Jesus ujakmiania nu**

(Márkus 13.1-2; Rúkas 21.5-6)

**24** Jesus Yusa Uunt Jeeñiá jiiñki weai ni unuiniamuriñ nin tiiari Jean iniaktusar áujmatsarmiayi. <sup>2</sup> Tura Jesus tiarmiayi “Nu mash yamá wáintrume. Tura nekasán tájarne ukunmanka mash saanaktiatui. Chikichík kayaksha ekentramuriñ atsuttawai” tímiayi.

**Amúamu tsawant nekaatin**

(Márkus 13.3-23; Rúkas 21.7-24; 12.22-24)

<sup>3</sup> Nuyá Uriwiu náinnium wear niñki nuñ pujusar ni unuiniamuriñ Jesusan aniasarmiayi “¿Nusha urutaik túrunatí. Tura ame tátincha tura nunka amuukatin tsawant jeakuisha warijiañ nekaattají? Nu ujakkata” tiarmiayi.

<sup>4</sup> Tuíniakui Jesus tímiayi “Aneartarum, anankramawairap. <sup>5</sup> Untsurí shuar winia náarun pachisar “wi Krístuitjai” tiar untsurí shuaran anankawartatui. <sup>6</sup> Ti untsurí meset chicham antuktatrumé túrasha sapijmiakairap. Núnisan átiniaiti nunka amúatsain. <sup>7</sup> Apachcha chíkich

nunkanmaya apachjai máaniawartatui. Tura ti tsukasha átatui. Sunkursha ti pampartatui. Uusha ti uurkartatui. Nuka untsurí nunkanam ashí túrunawartatui. <sup>8</sup> Nujai ti wáitsatin aya yama nankamui’ tímiayi.

<sup>9</sup> ‘Nuyá atumniasha yajauch awajsarti tusa surutmakartatui. Tura mantamawartatui. Tura winia naar pachia asakrumin ashí shuar muñframkartatui. <sup>10</sup> Nu tsawantai untsurí shuar Yúsán iniaisartatui. Túrawar nuamtak muñjiñiñiak surunairartatui. <sup>11</sup> Untsurí shuar wáitruiniak “wi Yúsnan etserniuitjai” tiartatui. Túrawar untsurí shuaran nusháa enentáimtikrartatui. <sup>12</sup> Tura tunáa ti ákui nuamtak anenaichartatui. <sup>13</sup> Tura shuar ashí nuna tuke katsuntra nu uwemprattawai. <sup>14</sup> Ashí aents nekaawarat tusa Yus-Chicham ashí nunkanam etsernaktatui. Túramtai amuukatin tsawant jeattawai” tímiayi.

<sup>15</sup> Shuar juna áujea nu enentáimprati. Kame Jesus tímiayi “Yúsnan etserin Taniar muñjiñiamtik tuke emesratin ana nuna yaunchu aar etserkamiayi. Nuka Yusa Jeeñ wantinkiamtai <sup>16</sup> ashí shuar Jutía nunkanam írúnna nu, muranam pisararti. <sup>17-18</sup> Ti wárik pisartin asamtai shuar jea yakí pujaksha tura shuar ajanam wekaakusha jeá waketki waririñ jukitijá tíchatí. Antsu nuyañ wárik pisarti. <sup>19</sup> Nu tsawantai nuwá ajamtincha tura kuírchin takaku ainia nusha ti wáitsartatui. <sup>20</sup> Ayampratin tsawantaisha tura michá nántutincha nu pisartin tsawant áchatí tusarum Yus seatarum. <sup>21</sup> Maa, nu tsawantai ti wáitsatin átatui. Ti yáunchusha núnisan wáitsatin atsuuyayi. Ukunmasha atsuttawai. <sup>22</sup> Nu wáitsatin ti esarmaitkiuñkia chikichíkisha uwemprachainti. Tura Yus nu wáitsatniun wárik amumtikiattawai. Shuar Niiniu ajasarat tusa achikma

ainia nu uwemprarat tusa wárik amumtikiattawai' tîmiayi.

<sup>23</sup>“Tura atumin “Júiti Kristu,” tuíniakuisha tura “Nuĵi pujawai” tuíniakuisha anturkairap. <sup>24</sup>Untsurí shuar Křístuĵtai tusar wantinkĵartatui. Untsurísha “Yúsnan etserniuitĵai” tiartatui. Tura shuáran anankataĵ tusar aents tujintiamun iniakmasartatui. Tura ti kakarman túruiniak Yús-shuarnasha anankamin áiniakuinĵkia anankawarainti. <sup>25</sup>Túrunatsain nuna emka ujaajrume. <sup>26</sup>Tuma asamtai “Iis, Kristu nuĵi aents atsamunam pujawai” túramainiakuisha nuĵi wéerap. “Juĵi úumak pujawai” tuíniakuisha anturkairap. <sup>27</sup>Núnisan úumkan táchattajai. Peem péetuk ti wárik ashí nunĵanam wáinkĵiachminkĵiat. Núnĵisnak wi Aents Aĵasuka winiakun paant wantinkĵattajai. <sup>28</sup>Wats, ĵaka tepaana nuĵi chuan káutkachartatuak' tîmiayi.

### Křistu tátrinĵi

(*Márkus 13.24-37; Rúkas 21.25-33; 17.26-30, 34-36*)

<sup>29</sup>“Ti wáitsatin nanĵkaasmatai ti wárik tsawái nantu kajinkĵattawai. Tura kashí nantusha etsantrashtatui. Yaasha ashí muchitrattawai. Nayaimpiniam kakaram ainia nusha peantrartatui. <sup>30</sup>Nuĵkia Wi Aents Aĵasuka, tátinĵiur paant átatui. Tura ashí nunĵanmaya aents Wi winiái wáitkiar asuttĵiamattajĵi tusar úutiartatui. Wĵisha ti kakaram tura Yusa wincharĵĵĵai yuranĵminiam winiái wáitkiartatui. <sup>31</sup>Yusa suntarin kachu kakaram umpuarterum tinia akupkamtai nu suntar ashí nunĵanmaya ashí Yús-shuaran, Yus achikma áarmatai, irurartatui' tîmiayi.

<sup>32</sup>‘Ikiu numirĵi nakumea nu nekaatarum. Ni nukĵen eteakui “esat nantu jeatemayi” tátsurmek. <sup>33</sup>Núnisan ashí ju wáinkĵiurmeka

“amuukatin tsawant nekas jeatemayi” tĵitiniatrume. <sup>34</sup>Nekasan táĵarme, yamá aents puĵuinia nu amúatsain ashí túrunattawai. <sup>35</sup>Nunĵkasha nayaimpĵisha amuukartatui antsu winia chĵichamur amuukashatui' tîmiayi.

<sup>36</sup>“Tura nu túrunatin tsawant nekanachminĵiati. Yusa suntarĵisha nékainĵatsui. Wĵisha Yusa Uchirĵintiatnak nékatsĵai. Antsu aya winia Aparuk nékawai' tîmiayi.

<sup>37</sup>‘Wi tátinĵiur jeamtai yaunchu Nuai puĵumia nú tsawantin túrunamia núnisan átatui. <sup>38</sup>Nu tsawantin, tuke amaartsain, aya júnisan aa asamtai yurumuk umarar puĵuarmiayi. Nuatnainĵarmiayi. Ni nawantrinĵha nuatmamĵiarmiayi. Tura tumá puĵuinĵi Nuai uunt kanunam enĵkemamtai <sup>39</sup>nu aents tuke nékainĵatsain ama amarak mash amuukarmiayi. Núnisan átatui Wi tátin jeamtai. <sup>40</sup>Nu tswantaĵk ĵimĵiará shuar aĵanam puĵuttawai. Chĵikĵichĵi junaktĵatui tura chĵikĵichĵia ikiunkĵittĵiawai. <sup>41</sup>Núnisan ĵimĵiará nuwá shana neĵeak puĵuttawai. Chĵikĵichĵi junaktĵatui chĵikĵichĵa ikiunkĵittĵiawai' tîmiayi.

<sup>42</sup>‘Nu asamtai atumsha iwiarnarum puĵustarum. Nekaachminĵiati uruk áĵntsuk tarĵĵiarum. <sup>43-44</sup>Tuma asamtai aneara puĵustarum. Wi nekaachmanum tátin júnisan enentáimpramĵiati. Shuar ju kashĵi kasa tátinĵian nekaanĵka kánutsuk kasa táawai tusa iwiarnar nákasainti. Núnĵisrum aneara puĵutarum.’

### Pĵenĵker takamĵtikniunĵha yajauch takamĵtikniunĵha ĵesus áujmatsamĵiania nu

(*Rúkas 12.41-48*)

<sup>45</sup>‘Shuar pĵenĵker umĵinian tura pĵenĵker enentáimniun áujmatsattajai. Nuna uuntrinĵi yajá irauweak “Yurumátin jeamtai winia takartin ayuratarum” tĵchan-

piash. <sup>46</sup>Nu takamtikniuncha ni uuntri taa takatrin tímiatrusan túran tarinkia shiir enentáimtusainti. <sup>47</sup>Nekasan tájame, umin asamtai ni uuntri ashí ni waririn wáitrukát tusa takatan susat-tawai. <sup>48-49</sup>Antsu úuntur wau táchat-tawai tusa takamtikin ni uuntri yáin-trin yajauch awajeak tura takatsuk aya yurumátniun tura nampektinian wararkunka nu takamtikin yajauchiiti. <sup>50</sup>Turai ni uuntri aya aneachma taa nu takamtikniun, yajauch asamtai, <sup>51</sup>ti kakaram asutiattawai. Yajauch shuar pujuinia nu akupkattawai. Nuisha ti wáitiak ti úuttiatui' tímiayi Jesus.

### Jesus tias (10) nuwan áujmatsamiania nu

**25** 'Yus akupeamunam pachiinkiatin júnis átatu. Nuatnaikiatin jísat akui tias nuwa natsa kantiran akaawar nuátkattana nu áishmankan inkiun jeá itiatat tusa wearmai. <sup>2</sup>Senku nuwa enentáimcha armai. Tura chíkich senku nuwa enentáimin armai. <sup>3</sup>Enentáimcha arma nú nuwa aya akaamunak juúniak amuukamtai yaraatniun asutin júkicharmai. <sup>4</sup>Antsu chíkich senku núwaka akaamuncha juúniak tura ataksha amuukamtai yaraatniun asutin júkiarmai. <sup>5</sup>Tura jíinkiar matai nuatkatín áishman wari taachkui kari pujakui kanararmai. <sup>6</sup>Nuyá kashi ajapén shuar unsumuk "Pai nuatkatín winiawai. Werirum inkiuntarum" timiai. <sup>7</sup>Tu unsumun antukar nantakiar kantiran akaatai tusa pujursarmai. <sup>8</sup>Nuyá senku nuwa enentáimcha arma nu, chíkich nuwa enentáimniun tiarmai "Incha atumi asutiri ishichik ajamprusaitia. Ii kantirisha kajiniawai."

<sup>9</sup>Tutai chíkich senku nuwa tiarmai "Atsá, warí incha jeartamchattaji. Tura atumnia penké jeashtatui. Nekaska su-

rutainium werum sumaka utumtarum' tiarmai.'

<sup>10</sup>"Tura nuyá senku nuwa enentáimcha arma nu, asutian sumak utitiai tusa wéarai ukunam nuatkatín áishman tamai. Túramtai enentáimin nuwa arma nuka nuatnaikiatin námpernam nuatkatiniujai wayawarmai. Túramtai wáitin epeniarmai. <sup>11</sup>Tura epeniarai enentáimcha nu táarmai. Tura tiarmai "Úuntá, waiti uratritia."

<sup>12</sup>"Tu unsumainiakui nu uunt kajerak chichak "Cha, zyátsukaitrum? Penké nékatsjarne" tiarmai." <sup>13</sup>Jesus nuna áujmatas umik tímiayi "Aents Ajasuitjai tura tátin tsawantrusha tura uruk ain tátaj nusha nékatsrume. Tuma asarum tuke iwiarnarum pujustarum' tímiayi.

### Kuit susamun áujmatsamiania nu

<sup>14</sup>"Núnisan Wi tátin júnisaiti. Shuar chíkich nunkanam wéak, ni takarni-urin untsukar ni kuítrin akanak súsar-mai. <sup>15</sup>Chikichkiniak senku mir (5.000) kuítian susamai. Chikichnasha jimiará mir (2.000) kuítian susamai. Tura chikichnasha chikichik mir (1.000) kuítian susamai. Nii takastin jearma nujai métek súsarmai. Tura ikiuak yajá we-mai. <sup>16</sup>Takarín senku mir kuítian achik-mia nujai takakmas ataksha senku mir kuítian patakmai. <sup>17</sup>Chikichcha núnisan jimiará míran achikmia nujai takakmas ataksha jimiará míran patakmai. <sup>18</sup>Tura chíkich shuar ni uuntri kuítrin chikichik míran achikmia nuna waa taur úukmai.'

<sup>19</sup>"Nuyá ukunam nu shuara uuntri támai. Tura kuítian súkiarma nujai itiurkarmakit tusa untsukarmai. <sup>20</sup>Emka senku mir kuítian achikmia nu tamai. Nuyá ni uuntrin chíkich senku mir patakman suak timiai "Uuntá, senku mir kuit surusmame. Pai, atak senku míran patasmajai."

<sup>21</sup>"Takui ni uuntri timiai "Ti pénger takakmauwitme. Nekas uminiatme.

Ishichkijiaisha ti pënker takakma asakmin ti núkap yamaikia amastatjai. Winí wayam wijiaí ti shiir warasta” timiai.’

<sup>22</sup> ‘Nuyá chíkich shuar jimirá míran achikmia nu tarí timiai “Uuntá, jimirá mir surusmame. Pai, ataksha jimirá míran patasmajai.”

<sup>23</sup> ‘Takui ni uuntri timiai “Ti pënker takakmauwitme. Nekas uminiaitme. Ishichkijiaisha ti pënker takakma asakmin ti núkap yamaikia amastatjai. Winí wayam wijiaí ti shiir warasta” timiai.’

<sup>24</sup> ‘Nuyá chíkich shuar chikichik míran achikmia nu tarí timiai “Uuntá, ti kajen asakmin tura araachiatam tura atsaamprachiatam júurtuktarum tiniu asakmin <sup>25</sup> sapijmiakun ame kuítrumniaka nunká táutran úukmajai. Pai, juíiti ame surukmiam nu” timiai.’

<sup>26</sup> ‘Takui ni uuntri timiai “Ámeke yajauchiitme. Aya nákiitme. Wi araachiatan tura atsaamprachiatan júurtuktarum tñiuítme túrutsumek. <sup>27</sup> Tu enentáimkiumka ¿urukamtai kuit-iruntainiam ikiurtuschamam? Nuikia wi táakun patasan achikiájai” timiai. <sup>28</sup> Nuna tinia nuí wajainian tiarmai “Ju shuar chikichik mir kuit atankirum tias mir kuítian takaka nu susatarum. <sup>29</sup> Kame núkap takakna nú shuar ataksha patatnastatui tura ampiniartatui. Antsu ishichik takakna nusha ishichik takakuitiat jurunkittiawai. <sup>30</sup> Ju umichu shuarsha aa kiritniunam ajapatarum. Nuí ti wáitiak ti úuttiatui” timiai”. Tu áujmatsamiayi Jesus.

### Akantratin áatna nu

<sup>31</sup> Jesus áujmatuk tímiayi ‘Aents Ajasuitjiana nu ashí akupin ajasan Yusa suntari énekma winittiajai. Tura Uunt Akupin asan shiir pujutairuí pujustatjai. <sup>32</sup> Túramtai ashí nunkanmaya aents

Winia irunturartatui. Túrunawarmatai akantrattatjai. Murikiu wáinin kachurtinian tura kachurtichujai akanea nútisanak shuáran akantrattatjai.

<sup>33</sup> Tura kachurtichunka, pënkerá nuna, untsuruini awajsartatjai. Tura kachurtinniaka, yajauchia nuna, menaruini awajsartatjai.

<sup>34</sup> Túran nekas Uunt Akupin asan untsuruini wajainian títiatjai “Atumniaka winia Apar shiir awajtamsaitrume. Wi akupeajna nuí winitiarum. Yus nunkan najanamia tímianaik átum nuí warastinian tsankatramkamiarme. <sup>35</sup> Kame Wi tsukamá wekai ayurtuamiarme. Kitiama wekaisha umartin surusmiarme. Wait ajá wekaisha itiaararum ajamprusmiarme. <sup>36</sup> Pushir atsaisha átumka surusmiarme. Jaa tepaisha íiráimiarme. Sepunam enketaisha tarum íiráimiarme” títiatjai. <sup>37</sup> Tutai untsuruini wajainia turutiartatui

“Uuntá, ¿urutia tsukamá wekaamnisha ayuramají. Urutiá iisha kitiama wekáa wainkiarsha umartincha amasmají. <sup>38</sup> Tura urutia wait ajá wekaamnisha tura pushiram mamurmataisha iisha amasmají. <sup>39</sup> Urutia iisha jaa tepamin tura sepunam enketmin wainkiarsha winitir íimijí?” turutiartatui.’

<sup>40</sup> ‘Turutainiakui Wi Uunt Akupin asan tiartatjai “Nekasan tájarme, ashí ju wí shuar péejchachisha waitnentramarum nu Winia anentakum túraitrume” tiartatjai’ tímiayi.

<sup>41</sup> ‘Wi Uunt Akupin asan menaruini wajainian tiartatjai “Atumsha yajá wetarum. Yajauchijiaí yuminkramuitrume. Yus uunt iwianchi ni suntarijiaí tuke kajinkiashtin jinium apeatniua nuí wétatrume atumsha. <sup>42</sup> Átumka Wi tsukamá ayurtuachmarme. Kitiamaisha umartin suruschamarme. <sup>43</sup> Wait ajá wekaisha ikiatrachmarme. Pushirun imiampraisha entsartin suruschamarme. Jaa tepaisha

tura sepunam enketaisha íraichmarme” tiartatjai.’

<sup>44</sup>“Tutai niisha turutiartatui “¿Urutia, Uuntá, tsukamakmesha, kitiamakmesha, wait ajaknísha, pushiram imiampramsha, jáakmesha, tura sepunam wait ajá pujamnisha íisha winitir yáinçhamaj’?” turutiartatui.’

<sup>45</sup>“Wi Uunt Akupin asan tiartatjai “Nekasan tájarme, Ashí Wíi shuar, péjchachisha waitnentrachmarum nuí Winiasha túrutachuitrume” tiartatjai. <sup>46</sup>Nu shuarka tuke wáitsatniunam weartatui. Tura Yus achikma ainia nusha tuke iwiaaku Yusjai pujustinnium weartatui” tímiayi Jesus.

### **Jesus achiktin chichaman jurusarmiania nu**

(Márkus 14.1-2; Rúkas 22.1-2; Juan 11.45-53)

**26** Jesus ashí nuna tinia umik ni unuiniamurin tiarmiayi <sup>2</sup>“Atumsha nékarme, Paskua jisat jeatin jimiarchik tsawant ajasai. Nuí Wi Aents Ajasu asamtai krúsnum máawarti tusar surtkartatui” tímiayi.

<sup>3</sup>Nuyá Israer-patri uuntriísha Israer-shuara jintinniurísha Israer-shuara úuntriísha Kaipiasa jeen áarin iruntrarmiayi. Kaipiassha Israer-patri uuntriíyayi. <sup>4</sup>Nuí anankatin chichamjai Jesus achikiar maatai tusar chichaman jurusarmiayi. <sup>5</sup>Tura tiarmiayi “Jístatin túrachminiaiti aents téetet ajarain tusar.”

### **Nuwa Jesusan kunkuinian ukatramiania nu**

(Márkus 14.3-9; Juan 12.1-8)

<sup>6</sup>Jesus Petania péprunam pujus tunamaru Semunka jeen pujumiayi. <sup>7</sup>Nuí pujaj nuwa ti kuit jeá kunkuinian arapástru tutai kaya najanamunam piakun itiamiayi. Tura Jesus misanam yurumátaj tusa pujan tarí nu kunkuinian ukatramiayi. <sup>8</sup>Túramtai

ni unuiniamurí nuna íisar kajerkar tiarmiayi “¿Urukamtai au kunkuin imiá kuítniasha áantrasha wasurea? <sup>9</sup>Antsu ti kuitjai suruk shuar kuítrincha ainia nuna yáítskesha” tiarmiayi.

<sup>10</sup>Jesus tuinian anturak tiarmiayi “¿Urukamtai ju nuwa yajauch enentáimtarum? Túrutana ju ti péñkeran túrayi. <sup>11</sup>Kuítrincha tuke atumjai pujushtatuak. Antsu Wikia atumjai tuke pujushtatjai. <sup>12</sup>Ju nuwa kunkuinjai ukatururai júka, Wi iwiarnastin asamtai áitkiarayi. <sup>13</sup>Nekasan tájarme, ashí nunkanam uwempratín chicham etsernakui tuke ju nuwa pachinias etsernaktatui. Túramtai ni túramurí kajinmankishtatui” tímiayi.

### **Jútas Jesusan surukmiania nu**

(Márkus 14.10-11; Rúkas 22.3-6)

<sup>14</sup>Nuyá Jesus tuse (12) unuiniamunmaya chikichik ni naari Jútas Iskar-iúti Jesusan suruktaj tusa Israer-patri uuntriin wémiayi. <sup>15</sup>Tura jeari tímiayi “Jesusan achikia amakui ¿urutmá akirkaintrum?” Takui trainta (30) kuítian akikiarmiayi. <sup>16</sup>Nu akikiam Jútas itiurak Jesusan súsaraintiaj tu enentáimias wekaimiayi.

### **Kristu jakamu enentaimtustin námper**

(Márkus 14.12-25; Rúkas 22.7-23; Juan 13.21-30; 1 Kurintianam 11.23-26)

<sup>17</sup>Wakapruachu tantan yurumáinia nú námper yama nankamkui Jesusa unuiniamurí tariar aniasarmiayi “¿Tui paskua námper iwiaarakrin yurumátam?” tiarmiayi.

<sup>18</sup>Tuúniakui Jesus tímiayi “Péprunam wetarum. Nuí chikichik shuara jeen jearum titiarum “Uunta chichaak “Winia tsawantur ishichik ajasai. Tuma asan paskua namperan winia unuiniamurjai ame jeemiin yurumátjai” tawai” titiarum” tímiayi. <sup>19</sup>Tutai ni

unuiniamurĭ wear Jesus timia nuna umikiar paskua nampertin yurumátniun iwiararmiayi.

<sup>20</sup>Tura kashi ajasáĭ Jesus ni tuse (12) unuiniamurĭjjai misanam yurumuk pujumiayi. <sup>21</sup>Nui yurumáiniaĭ Jesus tiarmiayi “Nekasan tájarme, átum pujarmena juyá chikichik Winia surutkattawai.”

<sup>22</sup>Nuna takui ti kúntuts enentáim-prar mai aní awajiararmiayi “Uuntá, ¿wiáshitiaj?”

<sup>23</sup>Mai tu awajenam Jesus tiarmiayi “Wi nú pinĭnnuman jimiartukan yuajna ju Winia surutkattawai. <sup>24</sup>Wi Aents Ajasu asan Yus Chicham tana nujai métek túrunattajai. Túrashashuar Winia surutkattana nuka ti asutniátin asa aki-inmainchu ajakuiti” tímiayi.

<sup>25</sup>Nuyá Jútas suruktaj tana nu Nin tímiayi “Uuntá nuikia ¿wiáshitiaj?”

Takui Jesus tímiayi “Ee, nekas ámetme.”

<sup>26</sup>Tura yurumuk pujuiniaĭ Jesus yurumkan achik Yúsan yumĭnsamiayi. Tura puur ni unuiniamurĭn suiniak tímiayi “Ju yuatarum. Juka winia ayashruiti.” <sup>27</sup>Nuyá pinĭnkian achik Yúsan yumĭnsamiayi. Tura suiniak tiarmiayi “Jusha ashí umartarum. <sup>28</sup>Juka winia numparuiti. Tura winia numpar puármatai, yamaram chicham nekas uminkiattawai tawai. Tura puármatai untsurĭ shuara tunaarĭn tsankurattawai. <sup>29</sup>Tura ataksha átum Yus akupea nuĭ jeatsrumĭn ju uwa yumĭrĭn umarchattajai. Tura tsawant jeamtai atumjai Yus akupeana nuĭ yamarman umartatjai” tímiayi Jesus.

**Pítiur natsantratniaua  
nuna Jesus ujakmiayi**

(*Márkus 14.26-31; Rúkas 22.31-34; Juan 13.36-38*)

<sup>30</sup>Yús-kantan kantamáwar umikiar Uriwiu nánnium weararmiayi. <sup>31</sup>Nui

Jesus tímiayi “Ju kashi átum Winia ashí natsantrurtatrome. Kame Yus-Papinium áarmaiti “Murikiu wáinnium mantuattajai túram murik pisarartatui.” Tu áarmaiti. <sup>32</sup>Tura nantakin Kariréa nunkanam Wi émkattajai átum wéatsrumĭn.”

<sup>33</sup>Takui Pítiur tímiayi “Chíkich natsantramainakuisha wikia túrashtatjai.”

<sup>34</sup>Tutai Jesus tímiayi “Nekasan tájarme, ju kashi atash shiniatsain menaintiú natsantrurtatme.”

<sup>35</sup>Pítiur tímiayi “Maa, Ámĭjjai métek mántuiniakuisha penkesha natsantrash-tatjame.” Ashí ni unuiniamurĭ núnisan tiarmiayi.

**Jesus Jitsemanĭ ajanam  
Yúsan áujsamiania nu**

(*Márkus 14.32-42; Rúkas 22.39-46*)

<sup>36</sup>Nuyá Jesus ni unuiniamurĭjjai Jitsemanĭ náartin ajanam jeá tímiayi “Juĭ pujusrum nákarsatarum. Aranta aĭ wena Yúsan áujsatjai.” <sup>37</sup>Tinia Pítruncha tura mai Sepetéu uchirĭ jukĭ wémiayi. Nuĭsha ti kúntuts enentáimiuk wake mesekmiayi. <sup>38</sup>Nuyá Jesus tímiayi “Ti kúntuts jakamnia enentáimjai. Atumsha juĭ pujusrum Wijĭjai métek iwiáa pujutarum.” <sup>39</sup>Tinia Jesus arantach we nuĭ tikishmar tsunsuma Yúsan áujeak tímiayi “Winia Aparú, Wi túrunatniaua nu nusháa iwiamnĭaitkiuinĭkia ju wáitsatniaua nu tsankatrukaip. Tura Wi wakeraj núniska áchati antsu Ame wakeram núnis atĭ” áujuk tímiayi.

<sup>40</sup>Nuyá ni menaintiu unuiniamurĭ pujuiniamunam waketki kanúu pujuinian jeariar Pítrun tímiayi “Átumka chikichik úraksha Wijĭjai iwiáa pujutin ¿tujinkĭarmek? <sup>41</sup>Iwiáa pujusrum Yus áujsatarum. Tunáa nupettamkairap. Enentáimin ti wakeriniaitrome túrashashuar ayashim pimpiruiti.”



<sup>42</sup> Tinia ataksha we Yúsán áujeak tími-ayi “Winia Aparú, Wi imiá nekasan wáit-satniuitkiuin̄kia nūl̄kia Ame wakeramna nu atí.” Tu áuj̄samiayi.

<sup>43</sup> Nuyá ataksha taa ni menaintiu unuiniamur̄i tarimiayi. Tura kar̄i ti nupeteam ataksha kanúu pujuarmiayi.

<sup>44</sup> Túmainiakui nin ikiukin ataksha áuj̄mia núnis̄an̄ Yúsán áuj̄sataj tusa waketkimiayi. <sup>45</sup> Áuj̄as umik ni unuiniamur̄i pujamunman̄ wémiayi. Tura tiarmiayi “Antsu yamaikia kanarum ayampratarum. Ura jeayi. Wi Aents Ajasu aín̄, tunaarintin shuarnum surunkatin jeayi. <sup>46</sup> Wari nantaktiarum. Wéartai. Súrutna nu winiawai” tímiayi.

### Jesusan achikiarmiania nu

(*Márkus 14.43-50; Rúkas 22.47-53; Juan̄ 18.2-11*)

<sup>47</sup> Jesus tu chichaī Jútas támiayi. Nusha ni unuiniamur̄iyayi. Nuj̄aīsha untsur̄ī shuar puniajāisha tura numij̄iāisha winiarmiayi. Nu shuaran Israer-patri uuntrīsha Israer-shuara úuntrīsha akupka ármiayi. <sup>48</sup> Jútas, Jesusan sura, tuke Jesusaī jeatsuk nu shuaran tiarmiayi “Wi miniakkan mukunattajna núiti. Nu achiktarum.” <sup>49</sup> Nu asamtai Jesusan tar̄i “Winiajaī Uuntá” tinia mukunamiayi.

<sup>50</sup> Takui Jesus tímiayi “Amikrú, ¿wari winitiam?” Nuyá achikiar Jesusan júkiarmiayi.

<sup>51</sup> Nuj̄ī chikichik Jesusa tsaníakmar̄i ni puniar̄in̄ ukuiniak shuara kuish̄in̄ tsupirkamiayi. Nu shuarsha Israer-patri uuntrī takarniur̄iyayi. <sup>52</sup> Túramtai Jesus tímiayi “Puniarum en̄keata. Ashí puniajaīi máanania nusha puniajaīi mantamnashatuak. <sup>53</sup> Wi wakeraknaka winia Aparun timiá untsur̄ī suntar̄in̄ seakui páchitsuk akupturkainti. ¿Nu nékatsmek? <sup>54</sup> Tura nuna túramtain̄kia Yus-Chichamnum tana nu uminkiachainti” tímiayi.

<sup>55</sup> Nuna tinia Jesus nu shuaran tiarmi-ayi “Átum kasá achiktaj tawa nútik-sarum puniajāisha numij̄iāisha tarut-niurme. Kame ashí tsawantaī Yusa Jeen atumjaīi pujusan Yus-Chichaman etsermiajaī. Nūisha achirkachmarme. <sup>56</sup> Antsu yamaikia yaunchu Yúsán et-serin áararmia nu umínkiat̄i tusarum jútikrarme.” Tu tímiayi Jesus.

Nuyá ni unuiniamur̄ī Jesusan Níniak ikiuiniak pisararmiayi.

### Israer-patri uuntrīin̄ Jesusan júkiarmiania nu

(*Márkus 14.63-65; Rúkas 22.54-55, 63-71; Juan̄ 18.12-14, 19-24*)

<sup>57</sup> Shuar Jesusan achikiarmia nusha Kaipiasaī júkiarmiayi. Nusha Israer-patri uuntrīiyayi. Nūisha Israer-shuara jintinniur̄isha Israer-shuara uuntrī armia nusha irunar matsarmiyayi. <sup>58</sup> Tura Pítur árantak Jesusan nemarkin uuntrī jeen aarīi jeamiayi. Tura suntar̄jaīi tsan̄in̄ pujusmiayi Jesusan itiurkart̄in̄ tusa.

<sup>59</sup> Tura Israer-patri úuntrīsha Israer-shuara úuntrīsha tura ashí naamka uunt armia nusha Jesusan wait-chichamjaīi súmamtikiataīi tusar áuj̄matiar̄miayi. <sup>60</sup> Untsur̄ī shuar ántar̄ tsanumpruiniakuisha máatin̄ chichaman nekaracharmiyayi. Nuyá jimiará shuar tsanumpruiniak <sup>61</sup> tiarmiayi “Jūī áishman̄ chichaak “Yusa Uunt Jeen yumpuaran ataksha menaintiú tsawantin̄ jeamminiait̄jaī,” tu chichamai” tiarmiayi.

<sup>62</sup> Nuyá Israer-patri uuntrīī wajaki Jesusan tímiayi “¿Áimtsmek. Turamainia nusha anturmammek?” <sup>63</sup> Túrash̄a Jesus tuke áimchamiayi. Túmakui Israer-patri uuntrīī chicharuk “Nekas iwiaaku Yusa náarīin̄ tájame nekasa nu táchakminkia Yus írmastatui. ¿Ame Krístukaitiam. Yusa Uchir̄in̄kaitiam? Paant etsérkatá” tímiayi.

<sup>64</sup>Tutai Jesus tímiayi “Ee, ame támena núitjai. Tura ataksha atumin tájarme, wi Aents Ajasu asan ti kakaram Yusa untsuuriní pujají wáitkiáttarme. Tura yurañminiam winiaísha wáitkiáttarme” tímiayi.

<sup>65</sup>Nuyá Patri uuntri nuna antuk ti kajek ni pushiri jaak tímiayi “Ju áishman ni chichamejai Yúsán nekas yajauch chicharniuiti. Nuyásha ¿warí atsumají? Atumsha Yúsán yajauch chicharu antukcharumek. <sup>66</sup>¿Waritia enentáimprum?”

Tutai “Sumamayi. Mantamnati” tiarmiayi. <sup>67</sup>Tiar usukiawarmiayi yapiniam. Tura awattiararmiayi.

Chikichcha yapiniam awati wishikiainiak tiarmiayi <sup>68</sup>“Ame Krístuchukaitiam. ¿Ya awattama? Íitsuk nekaata.” Tu chichariarmiayi.

#### **Pítiur Jesusan natsantramiania nu**

(*Márkus 14.66-72; Rúkas 22.56-62; Juan 18.15-18, 25-27*)

<sup>69</sup>Nu túmain Pítiur aa pujají nuwa chikichik jeari tímiayi “Amesha ju Kariréanmaya Jesus tutajijai wekaichamkam.”

<sup>70</sup>Tutai Pítiur ashí ántuiniamunam tímiayi “Nékatsjai. ¿Warittsuk chichaam?”

<sup>71</sup>Nuna tinia jíinkitaj tusa wéají chíkich shuar wáiniak nuí pujuinian tiarmiayi “Au áishmansha Nasarénumia Jesúsají wekainiuiti.”

<sup>72</sup>Tutai Pítiur ataksha tímiayi “Nekasan tájarme, ju áishman kan penké nékatsjai.”

<sup>73</sup>Árusan nuí pujuarmia nu Pítrun tariar tiarmiayi “Nekas amesha aujai wekaimiame. Warí, chichammijai páantaiti.”

<sup>74</sup>Tutai Pítiur “nekas Yus íirui” taku tímiayi “Nu áishman kan penké nékatsjai.” Nuna tai atash shiniukmiayi.

<sup>75</sup>Túramtai Pítiur Jesus nuik tímia nuna enentáimpramiayi. “Atash shiniatsain menaintiú natsantrurtatme” tímiayi Jesus. Pítiur nuna enentáimiar jiinki we ti útumiayi.

#### **Piratuí Jesusan júkiarmiania nu**

(*Márkus 15.1; Rúkas 23.1-2; Juan 18.28-32*)

**27** Kashin tsawarmatai Israer-patri uuntri sha Israer-shuara úuntri sha Jesus maatai tiarmiayi. <sup>2</sup>Tiar Jesusan jinjiawar apachi uuntrin Punsu Piratuí júkiarmiayi.

#### **Jútas máamamiania nu**

<sup>3</sup>Jútas Jesusan suruk tura máatai tuínian antuk enentáimiar trainta kuítian Israer-patri uuntrincha Israer-shuara úuntrincha awantukiarmiayi. <sup>4</sup>Tura tímiayi “Nu áishman tunaarinchán máatarum tusan surukan wi sumamajai.”

Takui tiarmiayi “Nusha íjijaisha warí urukatin. Nuka amek íischatniukaitiam.” <sup>5</sup>Tinia Jútas nuí Yusa Uunt Jee kuítian utsan ikiuak nuyá we kajempramiayi. <sup>6</sup>Nuyá Israer-patri uuntri nu kuítian júukar tiarmiayi “Ju kuit shuar sumakma asamtai Yusa kuítrijai irurchamniaiti.”

<sup>7</sup>Tura nuamtak áujmatsar “nunka sumaktai” tiar Nuwe Najantai nunkan sumakarmiayi yajaya shuar nuí iwiarsatniun. <sup>8</sup>Shuar sumakma kuitjai sumakma asamtai yamaisha Numpá Nunka tuke tuíniawai. <sup>9-10</sup>Nujai yaunchu Yúsán etserin Jeremías timia nu uminkiamiayi:

“Uunt Yus turutmia núnisan túrawarmiayi. Israer-shuar trainta kuítian seawarmatai nuna akantrar nujai Nuwe Najantai nunkan sumakarmiayi.” Tu áarmiayi.

### Piratu Jesusan aníasmiania nu

(*Márkus 15.2-5; Rúkas 23.3-5; Juan 18.33-38*)

<sup>11</sup> Jesusan apachi úuntriñ ejeniar-matai nii aniasmiayi “¿Nekasmek Israer-shuara uunt akupniuríntiam?”

Tutai Jesus “Ame támena núitjai’ tímiayi.

<sup>12</sup> Nuyá Israer-patri úuntriñsha Israer-shuara úuntriñsha súmamtikia Jesus pachischamiayi. <sup>13</sup> Nuyá Piratu tímiayi “Ashí yajauch chichartamainia nu ¿anturmammek?” <sup>14</sup> Tútaisha Jesus penké áimkiachmiayi. Túmakui akupin ti enentáimiar títinian nekaachmiayi.

### Piratu Jesusan “mantamnati” tímiania nu

(*Márkus 15.6-20; Rúkas 23.13-25; Juan 18.39-19.16*)

<sup>15</sup> Jísat tsawantin apachi uuntri Israer-shuar shiir enentáimprarat tusa sepunam enketun shuar wakeramun jiki ankant akupniuyayi. <sup>16</sup> Nui sepunam tunáa shuar Parapás náartin pujumiayi. Ashí shuar nékarmiayi. <sup>17</sup> Tuma asamtai Piratu Israer-shuar iruntrarun aniasmiayi “¿Yana ankant akupkat tusarum wakerarum. Parapásnak akupkattaj; Kristu tutai Jesusnak akupkattaj?” tímiayi. <sup>18</sup> Kame Israer-shuar ántar kajerainiak ni itiarmian nekaamiayi.

<sup>19</sup> Tura Piratu nuna inintrak pujai ni nuarí chichaman akuptukmiayi. “Ju péñker áishman súmamtikiatniujai pachiinkiaip. Mesekranam nii áitkiatnium nekaan wáitsan tsawarjai” tímiayi.

<sup>20</sup> Túrasha Israer-patri úuntriñsha Israer-shuara úuntriñsha “Parapás ankant wetí, tura Jesus mantamnati” titiarum tusar shuáran akatarmiayi. <sup>21</sup> Apachi akupniuri ataksha aniasarmiayi “Ju

jimiará áentsun ¿yana ankant akupkat tusarum wakerarum?”

Tutai “Parapás” tiarmiayi.

<sup>22</sup> Tutai aniasarmiayi “Jesusnasha. Yusa Anaikiamuri Kristu tuinia nunasha, ¿itiúrkáttaja?”

Tutai ashí “Krúsnum máatá” tiarmiayi.

<sup>23</sup> Tuíniakui Piratu tiarmiayi “¿Warí yajauchinia túrait?”

Tutai kakantar unsumuk “Krúsnum máatá” tiarmiayi.

<sup>24</sup> Tura Piratu Jesus uwentikrach-miniaitkiui antsu ashí shuar charaatum ajainiakui entsa uturtitiarum tusa seamiayi. Tura ashí íimiainiañ ikijmiak tímiayi “Ju péñker áishman máatnium wikia pachíintsujai. Antsu atumek íistarum.”

<sup>25</sup> Tutai ashí shuar tiarmiayi “Íik ii shuaríjjai ju áishman máatin íistaji.”

<sup>26</sup> Nuyá Piratu Parapásan ankant akupkamiayi. Tura Jesus asutiárum krúsnum máatárum tusa akupkamiayi.

<sup>27</sup> Nuyá akupin pujutai jeanam akupniu suntari Jesusan júkiar ashí suntaraim irunturarmiayi. <sup>28</sup> Tura pushiri áitkiar akupin entsatain kapaaku pushin áentsrarmiayi.

<sup>29</sup> Múuknúmsha tawaspan janí najanamun etsemtikiarmiayi. Tura karisun akupniu numirja áaniun untsuurñi ataksarmiayi. Túrawar wishikiainiak tikishmatrar tiarmiayi “Israer-shuara uunt akupniurñme.”

<sup>30</sup> Tiar usukiarmiayi. Tura karisun jurukiar múuknum awatiarmiayi.

<sup>31</sup> Tura núkap wishikrar kapaaku pushin áitkiar ni pushirñ áentsrarmiayi. Nuyá krúsnum maatai tusar júkiarmiayi.

### Jesusan krúsnum máawarmiania nu

(*Márkus 15.21-32; Rúkas 23.26-43; Juan 19.17-27*)

<sup>32</sup> Jesusan júki wésar Serini nunkanmaya shuaran, ni naari Semun, Je-

susa krúsrin jurukit tusar achikiarmi-  
ayi. <sup>33</sup>Nuyá Kúrkutanam ejeniarmi-  
ayi. Kúrkutaka, shuar chichamjainkia,  
muuka ukunch tútainti. <sup>34</sup>Nui Jesusan  
umutai yapájai pachimpra najanamun  
áartaj tusar súsarmiayi. Tura Jesus apas  
iis umarchamiayi.

<sup>35</sup>Krúsnum ajintrurar suntar yáki Je-  
susa pushirin jukit tusar nakurusar  
awakmakua nuna súsarmiayi. Nújainkia  
yaunchu Yúsnan etserin áarmia nu  
uminkiamiayi:

“Winia entsarumarun akantrarmiayi tura  
nakurusar awakmakua nuna winia  
pushirun súsarmiayi.” Tu áarmiayi.

<sup>36</sup>Nuyá wáinkiatái tusar pujursarmi-  
ayi. <sup>37</sup>Tura urukamtai máamuit ashí  
aents nekaawarti tusa áarman muuknu-  
maani anujtukarmiayi. *JUITI JESUS, IS-  
RAERA UUNT AKUPNIURI*

Tu áarmauyayi.

<sup>38</sup>Núnisan Nijjai métek jimiará  
kasa chikichkin untsuurnumani  
tura chikichnasha menaanmani  
krúsnum máawarmiayi. <sup>39</sup>Shuar  
nui nankaamainiak muuke peatar  
wishikiainiak <sup>40</sup>tiarmiayi “Ame Yusa  
Uunt Jee sáakim menaintiú tsawantin  
jeamtatjai tichakaitiam. Nekas Yusa  
Uchirinkiumka krúsnumia akaikim  
uwemprata” tiarmiayi.

<sup>41</sup>Núnisan Israer-patri úuntrisha,  
Israer-shuara jintinniurisha, Pariséusha,  
Israer-shuara úuntrisha, Jesusan  
wishikiainiak nuamtak tiarmiayi

<sup>42</sup>“Chikichnaka uwemtikraiti tura  
Nínkikia uwemtsui. Israera Uunt  
Akupniuríntkiunka krúsnumia  
akaikimtai nekas enentáimtustatji.

<sup>43</sup>“Yúsan nekas enentáimtiniaitjai”  
tawai. Wátsek, Yus nekas Nin aneakka  
uwemtikrati. “Wi Yusa Uchiríntjai”  
turamchamkaji” tiarmiayi. <sup>44</sup>Kasá  
shuarsha Nijjai ajintruamu armia  
nusha Nin wishikrarmiayi.

## Jesusa jakamuri

(*Márkus 15.33-41; Rúkas  
23.44-49; Juan 19.28-30*)

<sup>45</sup>Nuyá tutupin ai tee ajasmiai.  
Túrunayat ataksha aanku tsáapin  
ajasmiai. <sup>46</sup>Nuni ai Jesus kakantar  
untsunkamiayi. “Erí, Erí, rama  
sapaktani’ túmiayi. Nusha shuar  
chichamjainkia “Yusrú, Yusrú,  
¿urukamtai ajapa ikiurkiniam?”  
tawai. <sup>47</sup>Shuar nui wajarmia nusha  
nuna enentáimtsuk antukar tiarmiayi  
“Yaunchu Yúsnan etserniun Eriasan  
untsuawai.” <sup>48</sup>Tura chikichik tsékenki  
we uruchin itiamiayi. Tura churuinian  
ajamper sapapjai ijiú mukunati  
tusa susamiayi. <sup>49</sup>Tura chikichcha  
wishikeak tiarmiayi “Iniáisatá, Eriás  
tarí uwemtikratpiash.”

<sup>50</sup>Jesus ataksha kakantar untsamak  
nuyá jakamiayi. <sup>51</sup>Nu chichamaik  
Yusa Uunt Jee tarach ajamu yakiiniya  
achik nunkaani tseu jaanakmiayi.  
Nunkasha úurkamiayi. Kayasha  
jakukarmiayi. <sup>52</sup>Núnisan iwiarsamusha  
uraniarmatai untsurí Yus-shuar  
jákarusha nantakiarmiayi. <sup>53</sup>Nusha  
emka Jesus nantakmiatai niisha  
nantakiar iwiarsamun ikiukiar Yusa  
péprurín Jerusarénum wayawarmatai  
untsurí shuar wáinkiararmiayi.

<sup>54</sup>Nuyá suntar Jesusan wáinkiar  
nusha tura ni kapitiantrisha nunka  
úurkamtai nuyá chikichcha ashammai  
ajasmatai ti sapijmiakarmiayi. Tura  
tiarmiayi “Ju áishman nekas Yusa  
Uchirínti.”

<sup>55</sup>Nuisha nuwa Jesusan nemariarmia  
nu, arant wajasar, ii wajaarmiayi.  
Nusha Kariréanmaya pataatukiar  
Jesusan yainki ejeniarmiayi. <sup>56</sup>Nujai  
Máktaranmaya Marisha, Sepetéu  
nuwésha, tura chíkich Marisha áarmiayi.  
Chíkich Marikia Jakupuncha tura  
Jusencha nukuríyayi.

### Jesus iwiarsamu

(*Márkus 15.42-47; Rúkas 23.50-56; Juan 19.38-42*)

<sup>57</sup> Kiaraj shuar ti kufrintin Arimatéu péprunmaya ni naari Jusé támiayi. Nusha Jesusan enentáimtiniuyayi. <sup>58</sup> Nii Piratuj we Jesusa ayashin seamiayi. Nin súsarat tusa Piratu akupkamiayi. <sup>59</sup> Túram Jusé Jesusa ayashin krusnumia jusa ti péñker tarachjai penuarmiayi. <sup>60</sup> Tura kaya waa táurmanum yamaram amia nuj iwiarsamiayi. Ni iwiarsatin táuntikramunam Jusé iwiarsamiayi. Iwiaras kaya uuntjai etektuk ikiuak wémiayi. <sup>61</sup> Nuisha Máktaranmaya Marisha tura chíkich Marisha iwiarsamunam naka ii pujuarmiayi.

### Jesus iwiarsamun suntar wáinkiarmania nu

<sup>62</sup> Nú kiarain ayampratin tsawantna mash iwiarnakui Israer-patri úuntriasha Pariséusha Piratuj wearmiayi. <sup>63</sup> Tura tiarmiayi “Uuntá, nu wáitrin áishman iwiaaku pujus “Menaintiú tsawant jakan nantaktiatjai” tiniuyi. <sup>64</sup> Nu asantai iwiarsamunam menaintiu tsawant suntar wáinkiarat tusa akuptukta. Ni unuiniamurj kashi tariar tura ni ayashin kasamkar “Pai, nantakni” shuáran tiarain. Jujainkia nuna nankaamas shuáran anankawarainti” tiarmiayi.

<sup>65</sup> Tutai Piratu tiarmiayi “Nuj suntar takakrume. Werum iwiarsamu urakchamnia péñker wáinkiatárum.” <sup>66</sup> Tutai wear iwiarsamun urankashti tusar etektukma inkiunmanum serajai yakarar ni áarmarin anujtukarmiayi. Tura suntarnasha awajtukarmiayi.

### Jesusa nantakmiarij

(*Márkus 16.1-8; Rúkas 24.1-12; Juan 20.1-10*)

**28** Ayampratin tsawant nankaamas-matai tumintin yama tsawaana

aj Máktaranmaya Marisha chíkich Mar-ijjai iwiarsamu iyutai tusar wearmi-ayi. <sup>2</sup> Tumaj Yusa suntarij nayaimpinmaya iwiarsamun tari kaya atutka-mun urak nuj pujusmiayi. Túmakui nunka ti úurkamiayi. <sup>3</sup> Yusa suntarisha peemia tímiatrus wínchayuyi. Pushir-isha ti puju áuyayi. <sup>4</sup> Tura iwiarsamun wáiniarmia nú suntarsha nuna wáinkiar ashamainiak ti kuranjamiayi. Jaká áinis ajasarmiayi.

<sup>5</sup> Nuyá nayaimpinmaya suntar nuwan tímiayi “Ashamkairap. Jesus krúsnum máawarmia nu eatsrumek. <sup>6</sup> Juinkia pujatsui. Nii timia núnisan nantakniuiti. Pai, áepsarma nu ítiarum. <sup>7</sup> Wárik wérum ni unuiniamurj “Jesus jakamunmaya nantakni tura wari Kariréanam wétatui. Nuj werirum wáinkiatarme” titiarum. Wats, nunak tájai” tímiayi. <sup>8</sup> Tutai nu nuwa iwiarsamunmaya wárik jfinkiar ashamainiyat ti warasar tseke waketkiarmiayi ni unuiniamurj ujaktai tusar. <sup>9</sup> Tumaj Jesus wantintiukarmiayi. Tura “pujarmek” takui Jesusan tariar tikishmatrar nawencha miniakrusar shiir awajsarmiayi. <sup>10</sup> Túram Jesus tiarmiayi “Ashamprukairap. Werum winia yatsur ujatruktarum. Kariréanam weartí. Nuj wear wáitkiartatui. Tu ujaktarum” tímiayi.

### Suntar etserkarmiania nu

<sup>11</sup> Nuwa wéarmatai iwiarsamu wáinin suntarsha péprunam wéar Israer-patri úuntrin ashí túrunamun ujakarmiayi. <sup>12</sup> Niisha nuna antukar Israer-shuara úuntrijjai áujmatsatai tusar wearmiayi. Áujmatsar suntaran ti kuít akikiar <sup>13</sup> tiarmiayi “Atumsha étserkuram “Kashi kanararin ni unuiniamurj taar Jesusa ayashin kasamkarmai” titiarum. <sup>14</sup> Tura akupin átum kanarman nekamtaisha nijjai ii iwiarattaji atumin yajauch awajtamsain tusar” tiarmiayi.

<sup>15</sup>Nuyá suntarsha kuítian achikiar tiarmia nuna tímiatrusan titiái tusar wéarmiayi. Tura tuke yamaisha Israer-shuar tu túrunaiti tuíniawai.

**Jesus ni unuiniamurj̄n  
akatar akupkamiania nu**

*(Márkus 16.14-18; Rúkas  
24.36-49; Juan 20.19-23)*

<sup>16</sup>Nuyá ni auntse (11) unuiniamurj̄ Kariréanam wéarmiayi. Tura Jesus timia nú nainnium jeawar <sup>17</sup>nuj̄ Jesusan wáinkiar tikishmatrarmiayi. Kame chí-

kichka Jesusashit tuíniayat Nin wáinkiar tikishmatrarmiayi. <sup>18</sup>Nuyá Jesus tíjjiuch tantá tímiayi “Ashí nayaimpinmasha nun̄kasha akupkatniun kakarman surusuiti. <sup>19</sup>Tuma asamtai ashí nun̄kanam werum ashí shuar jintintiarum Wíi shuar awajsatarum. Túrarum Yus Apa náarij̄j̄ai, Yus Uchi náarij̄j̄ai, tura Yus Wakani náarij̄j̄ai imiaitarum. <sup>20</sup>Ashí atumin Wi akatramajrum nu nútiksarmek umik-tin unuiniartarum. Tura ju nekaatarum: Tuke tsawantaj̄ ikiutsuk atumj̄ai pujutta-jai” tímiayi Jesus.

*Yúsan Shiir Chichamen*

## MÁRKUS

*aarmia nu*

### Imiakratin Juan̄ka etserkamur̄i

*(Mateu 3.1-12; Rúkas 3.1-9,  
15-17; Juan̄ 1.19-28)*

**1** Jūi Jesukr̄istunu shiir chicham nán̄kameawai. Jesukr̄istu Yusa Uchir̄inti.

<sup>2</sup>Yusa imiakratin Juan̄kan pachis ni etserniur̄in Isayasan ti yaunchu ni Papir̄īin juna áamtikramiayi:

“Iisiana, ame wéamurm̄in emka wetí tusan winia akatramurun akupeajai. Niisha ame jintimin iwiarattawai. <sup>3</sup>Niisha aents atsamunam unsumuk juna títiatui: “Uunta jintī iwiarturatum; naka awajsatarum.”

Nuke áarmaiti.

<sup>4</sup>Wats, aents atsamunam imiakratin Juan̄ imiaittsa pujus étseruk, ““tunaarun Yus asakatrurat” tusarum, enentáim yapajárum imiantiarum” tímiayi. <sup>5</sup>An-turkatai tusar ashí Jutía nun̄kanmaya shuar tura Jerusarén peprunmaya shuarsha Nīin tariarmiayi. Taar, ni tunaar-in ujakarmatai, Juan̄ Jurtañ entsanam imiainiarmiayi.

<sup>6</sup>Juan̄sha kamiriu ur̄e najantramun entsauyayi. Emenmamkesha nuapeyayi. Tura chinijiāi yutai-títikriatsnasha yu-uyayi. <sup>7</sup>Niisha áentsun ujaak tímiayi “Wíjiāinkia nan̄kaamas ana nu winia ukurūi winittiwai. Niisha nekas ii Uun-trīi asamtai, wikia tsuntsmpruan ni sap-atr̄i jin̄kiamur̄inkisha atitrachminiaitjai. <sup>8</sup>Wikia entsajain̄ aya ayashmin imiaa-rume, antsu Nīnkia imiantinia áanis

Yusa Wakan̄i atumī enentáin enketram-prattarme” tímiayi.

### Juan̄ Jesusan imiaimiania nu

*(Mateu 3.13-17; Rúkas 3.21-22)*

<sup>9</sup>Juan̄ áentsun imiak pujurainiāi, Jesuska Nasarét pepru Kariréa nun̄kanam ana nuyá jiinki Juan̄kan tarimiayi. Tura Juan̄ Jurtañ entsanam Jesusan imiaimiayi. <sup>10</sup>Nuin̄, Jesus entsayā jiiniuk, nayaimpin uranniun wáinkiamiayi. Tura Yusa Wakan̄in yámpitsa núnin najanar Nīin taarun wáinkiamiayi. <sup>11</sup>Tura nayaimpinmaya chichaamun juna antukmiayi, “Ámeke winia aneamu Uchiruitme. Ámin shiir enentáimtajme.”

### Uunt iwianch Jesusan anañkataj tímiania nu

*(Mateu 4.1-11; Rúkas 4.1-13)*

<sup>12</sup>Nuyá wárik Yusa Wakan̄i Jesusan atsamunam jukimiayi. <sup>13</sup>Tura nūi, yajasma yujamunam, kuarenta tsawant pujumiayi. Nūi pujaī uunt iwianch Satanás naartin Jesusan nekapsataj tusa pujurmiayi. Túramtai Jesusan wáinkiatiai tusar nayaimpinmayā santar tariarmiayi.

### Kariréa nun̄kanam ni takatr̄in Jesus nan̄kammiania nu

*(Mateu 4.12-17; Rúkas 4.14-15)*

<sup>14</sup>Ukunam, Juan̄kan sepunam enkeawarmatai, Jesuska Kariréa nun̄kanam Yusa akupeamur̄in pachis shiir chichaman etserki támiayi. <sup>15</sup>“Tsawant jeayi. Shuarnum Yusa akupeamur̄i jeatemai. Tuma asamtai, yaunchu enentáimsamuram yapajárum, Uwempratin Chicham umirkatarum” tu etserkamiayi.

**Jesus namakan achinian  
ni unuinimurí ajasat tusa  
kuatru achikmiania nu**

*(Mateu 4.18-22; Rúkas 5.1-11)*

<sup>16</sup> Jesus Kariréa antumianka kánmatkariñ wekas, namakan achinian Semun nasha ni yachi Antresnasha nekan ajuntuk pujuinian wáinkiamiyai. <sup>17</sup> Wáiniak “Nemartustarum, tímiyai. Namak achiarmena nútiksanak áentsun-əu Yusna arti tusan awajsatjarne” tímiyai. <sup>18</sup> Tura nuyanka ni nekarin ajapa ikiuiniak Jesusan nemarsarmiyai.

<sup>19</sup> Nuyasha Jesus ishichik arantach wesa, Sepetéu uchirín Jakupun ni yachin Juánnasha kanunam ni nekarin apáa pujuinian wáinkiarimiyai. <sup>20</sup> Wáiniak, nemartusta tusa untukarmiiai. Tutai ni aparincha, ni aparí takarniurincha kanunam ikiuiniak Jesusan nemarsarmiyai.

**Jesus iwianchin áishmannumiá  
jiiki akupkamiania nu**

*(Rúkas 4.31-37)*

<sup>21</sup> Nuyá Kapernáum péprunam jeawarmiiai. Nuñ Israer-shuara ayampratin tsawantri jeakui Jesus Israer-shuar iruntainiam wayá Yus-Chichaman unuiniamiyai. <sup>22</sup> Tura ni jintinniurí jintintiarmitia nuna iniankas uunt chichamjai Jesus jintíakui ni chichamen anturkar ti enentáimprarmiyai. <sup>23</sup> Nuñsha nu iruntainiam áishman iwianchruku ámiyai. Niisha untsukum <sup>24</sup> “¿Warí itiurtamkattsamea incha taum, Nasarénumiá Jesusa? Wikia nékajme. Ámetme Tunaartichu Yúsaiya winiamna nu. In emestamprataj tusam táchamek” tímiyai.

<sup>25</sup> Tutai, Jesus kakantar chicharuk “Takamátsatá. Ni enentáiya jíinkitia, tájame” tímiyai.

<sup>26</sup> Tutai íwianch áishman kan ukurak ajakniñkiar untsamak kakaar aa jíinkimiyai. <sup>27</sup> Nuna wáinkiar, ashamkar nuámtak aniniaisarmiiai. “¿Ausha warinkit. Yamaram chicham warí chichamait? Ju Jesuska timiá kakaram asa ímia iwianchin akupeatsuk. Iisiana umirainiatsuk” tiarmiiai. <sup>28</sup> Tura ti wárik nu túrunamu ashí Kariréa nunkanam antunkamiyai.

**Jesus Semunka tsatsarin  
tsuármiania nu**

*(Mateu 8.14-15; Rúkas 4.38-39)*

<sup>29</sup> Nuyá Israer-shuara iruntai jeenia jinki Jesuska Jakupujai Juanjaisha we, Semun ni yachi Antresjai pujuarmia nuñ jeawarmiiai. <sup>30</sup> Semunka tsatsari tsuer peaknum jaa tepemiyai. Núnaka wárik Jesusan ujakarmiiai. <sup>31</sup> Nuñkia Jesus werí uwejnnum achik iniantkimiyai. Tura nu chichamaik michatramiyai. Michatar, péñker ajas, Jesusnasha ni nemarniurincha ayurawarmiiai.

**Untsurí jaan Jesus péñker  
awajсарmiania nu**

*(Mateu 8.16-17; Rúkas 4.40-41)*

<sup>32</sup> Nu tsawantai kjarai, ashí jáinian, iwianchrुकuncha Jesusan itiararmiiai. <sup>33</sup> Tura ashí nú péprunmaya shuar taar wáitiniam Jesusan káutkarmiiai. <sup>34</sup> Untsurí shuáran chíkich sunkuraim jáinian Jesus tsuararmiiai. Tura iwianchruku armia nuna enentáiyam iwianchin jíirkarmiiai. Jesuska íwianch nékamu asa, winia náarun ántar pachisarain tusa suritkarmiiai.

**Kariréa nunkanam Jesus  
Yus-Chichaman etserkamiania nu**

*(Rúkas 4.42-44)*

<sup>35</sup> Nuyá kashin káshik tsawaatsain Jesus nantaki Yusan áujсатаj tusa jiinki atsamunam wémiyai. <sup>36</sup> Tura Semun ni amikrijai Jesus wemaanum wéarmiiai.



<sup>37</sup>Nin wáinkiar “Ashi shuar Ámin eat-mainiawai” tiarmiayi.

<sup>38</sup>Tutai Jesus chichaak “Chíkich péprunmasha arantach wetai. Nui Yusa chichame etserkatai; nuna túrattsan táwitjai” tímiayi.

<sup>39</sup>Nuna tí ashí Kariréa nunkanam Israer-shuar iruntai jeanam etseras wekaimiayi; tura núnisan iwianchniasha jiki akupkini wekaimiayi.

### **Tunamaru shuaran Jesus tsuármiania nu**

(Mateu 8.1-4; Rúkas 5.12-16)

<sup>40</sup>Túramtai, ti tunamaru shuar Jesusan seatajtsa tarimiayi. Taa tikishmatar tímiayi “Wakerutakmeka tsuaratin tujintratsme.”

<sup>41</sup>Jesus nin waitnentak uwejejai antinmiayi. Antin “Wakerajme. Pénker ajasta” tímiayi. <sup>42</sup>Nu chichamaik, Jesus chichakmatai, ni sunkuri menkakamiayi. Tura pénker ajasmiayi.

<sup>43</sup>Túrunamtai Jesus kakantar chicharuk

<sup>44</sup>akupeak “Wáinkiatá, nánkamsam etseraip, tímiayi. Antsu weme, Israer-patirmin iniakmamsata. Túram ashí aents ame pénker ajasmarumin nekaawarat tusam, Muisais aar akupkiania nu umikiam súsatin ana nu susata” tímiayi. <sup>45</sup>Tura etserkaip támaiat, jinki ni túrunamurin mash etseramiayi. Tura nuna etserka asantai, péprunam, aents írunmanum wétinian Jesus nakitramiayi, antsu aa atsamunam pujumiayi. Tura ashí nunkanmaya Jesusan tariarmiayi.

### **Jesus emearun pénker awajsamiania nu**

(Mateu 9.1-8; Rúkas 5.17-26)

**2** Kapernáum péprunam Jesus ukunam ataksha wémiayi. Jeamtai, ni jeen pujan nekaawarmiayi. <sup>2</sup>Tuma asantai shuar wárik ti untsurí káutkarmiayi. Ti untsurí asantai, jea pi-

akmiayi; wáitinmasha ankantchauyayi. Jesuska Yus-Chichaman nu aentsun ujaak pujurmiayi. <sup>3</sup>Nuinkia ni amikrin emearun kuaru shuar tampumpuawar júkiar Jesusan itiararmiayi. <sup>4</sup>Tura jeawar, untsurí shuar írunu ásantai jeá wayatniun tujinkiararmiayi. Tuma ásar, yakinini wakar jea urakar, áankawar, tampunam ni amikrin Jesus pujamunam awaintuawar itiararmiayi. <sup>5</sup>Tura niisha Jesus nekas tsuártatui tu enentáimmarin Jesus nekáa emearun chicharuk, “Uchirú, ame tunaarumka tsankuramuiti” tímiayi.

<sup>6</sup>Israer-shuara jintinniurisha nuna antúu pujuarmiayi. Tura ni enentáijjai enentáimsar, <sup>7</sup>“¿Jusha urukamtai emearun tu chichara? Yúsan imiá yajauch chicharui. Warí, yaki tunaan asakarminiat; aya Yúsak tunaan asakarchamniakait” tu enentáimsarmiayi.

<sup>8</sup>Jesuska ni enentáimmarin nekarawar “¿Urukamtia átum tu enentáimprum? tímiayi. <sup>9</sup>Emearu, tunaarum tsankuramuiti títinjai,

emearu, wajakim tampuram entsakim wekasata títinjai ¿tuá imiá yúpichuchit?

<sup>10</sup>Wats wi, Aents Ajasu asan Yusa kakarmarijjai shuara tunaari tsankuramniatjiana nuna paant iwaintiuktajrume” tímiayi. Nuna tinia emearun chicharuk <sup>11</sup>“Wajaktia, tájame; túram tampuram jukim jéemiin wetá” tímiayi. <sup>12</sup>Nu chichamaik emearu wajaki, tampurin juki, ashí íimiainiain jinkimiayi.

Nuna túrunamtai ashí ashamkarmiayi. Tura “jútikiamu penké wáinchaitji” tiar Yusa náarin uunt awajsamiani.

### **Jesus Riwin untsukmiania nu**

(Mateu 9.9-13; Rúkas 5.27-32)

<sup>13</sup>Nuyá ukunam Jesus antumiannum waketkimiayi. Tura ashí shuar káunkarmatai jintintiawarmiayi.

<sup>14</sup>Tura jintintiawar amuk, akupin akitiai jeanam nankaamak, Arpeu uchirin Riwin pujan wáinkiamiyai. Wáiniak “Nemartusta” tímiyai. Tutai Ríwí wajaki Jesusan nemarsamiyai. <sup>15</sup>Chíkich tsawant, Riwishá Jesusan ni jeen itiaamiyai. Tura untsurí kuftian-juu shuarsha, yajauch shuarsha Jesusjai ni unuiniamuríjiaisha ashi nuim misanam pujuarmiiai. <sup>16</sup>Tura kuftian-juu shuarsha yajauch shuarsha Jesusjai irunar yurumánian wáinkiar, Pariséu jintinniurísha Israer-shuara jintinniurísha Jesusa unuiniamurin aniasarmiyai. “¿Urukamtai ame úntrum Jesus, kuftian-juu shuarjai tura yajauch shuarjaisha yuruma?” tiarmiiai.

<sup>17</sup>Jesus nuna antuk tímiyai “Jaachu shuar tsuákratniun atsumainiatsui. Antsu jaa ana nu tsuákratniun atsumainiawai. Wats, “pénkeraitjai” tuinia nú shuaran untsuktajtsan táchaitjai; antsu “tunaitjai” tuinia nú shuaran Winia ajasat tusan untsuktajtsan táwitjai” tímiyai.

### **Yurumtsuk Yus áujsatniun Jesusan aniasarmiania nu**

*(Mateu 9.14-17; Rúkas 5.33-39)*

<sup>18</sup>Juanka unuiniamurísha Pariséu unuiniamurísha yurumtsuk Yúsán áujarmiiai. Túmakui chíkich shuar Jesusan tariar chicharainiak, “Juanka unuiniamurísha, Pariséu unuiniamurísha yurumtsuk Yúsán áujainiatsuk; ¿ame unuiniamurmeka urukamtai yurumtsuk áujainiatsu?” tiarmiiai.

<sup>19</sup>Tutai Jesus chichaak, “¿Nuatma nampernum ipiaamu ainia nu ijar-mawartiniak ainia? Yama nuatu pujakui ni amikrj warainiak ijiarmachartin ainiaiawai. Núnisan winia unuiniamur, Wi pujakui, warainiak yurumtsuk pujuschartin áiniawai. <sup>20</sup>Tura tsawant

jeattawai, Winia jurukiartin. Nuinkia winia unuiniamur ijiarmawartatui’ tímiyai Jesus.

<sup>21</sup>Tura nuyá juna tímiyai ‘Mamuru pushí jaanakmatai yamaram tarach anujtukchatniuiti. Túramka nijiam yamaram tarach sumpeak mamushan chiníkiá nuna nankaamas jáaktatui. <sup>22</sup>Nijiamanch yamáí nawar nuap najanamu arutnum yaraachminiaiti. Túramka wakaprua karíak nuap najanamu ijiakratniuiti. Tura nijiamanch ukarattawai. Nuap najanamu yajauch ajastatui. Antsu yamaram nijiamanch yamaram nuap najanamunam yaraatniuiti” tímiyai.

### **Trikiu nerén yuawarmiania nu**

*(Mateu 12.1-8; Rúkas 6.1-5)*

<sup>23</sup>Chíkich ayampratin tsawantai Jesus ajanman ajapén nankaamarmiyai. Tura ni unuiniamurj trikiu nerén majukiar wearmiyai. <sup>24</sup>Nuna wáinkiar Pariséu Jesusan chicharainiak “¿Warí, urukamtai ame unuiniamuram ayampratin tsawant takastin surimkiamu aisha takainia?” tiarmiiai.

<sup>25</sup>Tutai Jesus tímiyai “Ii uuntri Tawitia túramurj Yús-Papinium áujkachukaitrum. Niisha ni nemarniurísha tsukamainiak, ni yurumkarj atsakui, túrawarmia nu áujkachukaitrum. <sup>26</sup>Apiatár Yusnan pujurniu uuntri pujaj Uunt Tawit Yusa Jeen wayamiyai. Tura Tawitkia, patri nankaamas uunt asa, pátrichuitiat, iniaktusma tantan, aya patri yútainiak, yuamiyai; tura ni nemarniuríncha ajamsamiyai. Nu áujkachukaitrum, tímiyai. <sup>27</sup>Ayampratin tsawantai túrashtinian umirkashtimpiash tusa Yuska aentsun najanachmiyai. Antsu aents ayamprarat tusa Yus ayampratin tsawantan tesamiyai. <sup>28</sup>Wisha, Aents Ajasu asan imia ayampratin tsawantan Nerenniurintjai” tímiyai.

### Uweje jakan Jesus tsuármiania nu

(Mateu 12.9-14; Rúkas 6.6-11)

**3** Ataksha chíkich tsawantai Israer-shuar iruntainiam Jesus wayamiayi. Nui shuar ámiayi, ni uweje jaka. <sup>2</sup>Tura tunáan túrayi titiai tusar wakeruiniak “ayampratin tsawantai tsuártimpiash” tusar, Pariséu shuarsha Jesusan ii pujuriarmiayi. <sup>3</sup>Nuinkia Jesus uweje jaka shuaran chicharuk “Ajapén wajasta” tímiayi. <sup>4</sup>Nuinkia mamikmaun chicharuk “¿Ayampratin tsawantai péñker túratin yajauch túratniujai tuá imiá péñkerait. Shuar uwentikratin máatniujai tuá imiá péñkerait?” tímiayi.

Nuna takui niisha pachischarmiayi.

<sup>5</sup>Tura Jesus kajek nin íyarmiayi; tura ni enentáin kátsuram ásarmatai kúntuts enentáimsamiayi. Tura shuáran chicharuk “Uwejem iniakmasta” tímiayi. Iniakmadatai ni uweje jaruku ataksha péñker ajatsamiayi. <sup>6</sup>Nuyá Pariséu shuar jíinkiar, Jesus maami tusar Erutis shuarjai áujmatsarmiayi.

### Untsurí shuar Jesusan káutkarmiania nu

<sup>7</sup>Nuyá Jesus ni unuiniamurijiai antumiannum wémiayi. Kariréa nunkanmaya untsurí shuarsha Jesusan nemariarmiayi. <sup>8</sup>Untsurí nunkanmayasha káunkarmiayi. Jutía nunkanmayasha, Jerusarén péprunmayasha, Itiumía nunkanmayasha, Jurtan entsa amainiasha, Tiru tura Setun pepru pujuinia nú nunkanmayasha, untsurí shuar ni túramurin nekaawar, Jesusan káutkarmiayi. <sup>9</sup>Untsurí káunkar chanuntawarain tusa Jesus ni unuiniamurin kanuram inianáastarum tusa seamiayi. <sup>10</sup>Kame untsurí shuaran Jesus nuik tsuaru asamtai, jaa shuar nuí káunkarmiania nu Jesusan

antintaj tusar shitianainiakui nuna seamiayi. <sup>11</sup>Tura iwianchrusha Jesusan wáinkiar tikishmatrarmiayi. Untsumainiak “Ame nekas Yusa Uchirínme” tiarmiayi. <sup>12</sup>Tura nuna etserkairap tusa Jesuska kakantramiayi.

### Jesus tuse shuaran anaikiarmiania nu

(Mateu 10.1-4; Rúkas 6.12-16)

<sup>13</sup>Nuyá Jesus náinnium wakamiayi. Tura anaikiatniun wakerimia nú shuaran untsumiayi. Tura niisha Jesusan weriarmiayi. <sup>14</sup>Tura Niiijai wekasar Yus-Chichaman unuinartinian tuse shuáran anaikiarmiayi. <sup>15</sup>Tura sunkur tsuártinian, iwianchcha jíiki akupkatniun ni kakarmarin súsarmiayi nú shuaran. <sup>16</sup>Ju shuáran anaikiamu ármiai: Semun, Jesus chíkich naarin Pítur apujtusmiania nu; <sup>17</sup>Sepetéu uchirí Jakupu, ni patai Juánsha; ipiamtajai métek kakaram ásarmatai nuna mai “Puanérjis” naari susamiayi. Nusha shuar chichamjainkia “ipiamta nuke” tawai. <sup>18</sup>Nuyá Antressha, Jiripi, Parturumí, Mateu, Tumas, Arpeu uchirí Jakupu, Tateu, ásump Semun, <sup>19</sup>Jútas Iskariúti. Jesusan ukunam surukmia nú Jútasauyayi. Anaik amukmatai jeá waketrarmiayi.

### Yusa Wakanin yajauch chicharna nu

(Mateu 12.22-32; Rúkas 11.14-23; 12.10)

<sup>20</sup>Waketkiarmatai, ti untsurí shuar taarmatai takatri ti akui, yurumátiniun jeacharmiayi. <sup>21</sup>Jesusa shuárishsha nuna nekaawar Jesus ti itirchat pujus wáurt-suash tu enentáimsar jukitiai tusar nu jeanam jeariarmiayi.

<sup>22</sup>Nuyá Israer-shuara jintinniuri Jerusarénnumia táarmiania nu, Jesusan áujmatainiak “Pirsepú enkea asa iwianchrukuiti. Tuma asa uunt iwianchi kakarmarjiai iwianchin jíiki akupeawai” tiarmiayi.

<sup>23</sup>Tutai Jesus winitiarum tusa nin untsukmiayi. Tura enentáimtikrataj tusa juna tímiayi: “¿Iwianch Satanáskesha itiuur ajapmamatin? <sup>24</sup>Chikichik nú nunkanmaya shuar nuámtak kajernaiyakuinkia, nu nunka wari meserchattawak. <sup>25</sup>Nuámtak shuar ni shuarijjai kajernaiyakuinkia nu shuarsha amunaikchartatuak. <sup>26</sup>Núnisan ¿Satanáskesha ni suntarjijai máaniakka itiuurak tuke pujusarat? Amunaikiartatui. <sup>27</sup>Nánkamas shuar kakaram shuara jeen wayá, nérenniun jinikiatsuk ni kuítrín kasarkachminiaiiti. Antsu nérenniun jinikiá ni kuítrín kasarkamniaiti. <sup>28</sup>Nekas tájarme, shuar tunáa ashí túruiniana nuka tsankuramniaiti. Winiasha winia Aparnasha yajauch áujmatusha tsankuramniaiti. <sup>29</sup>Antsu Yusa Wakanín yajauch áujmatna nuka tsankurachminiaiiti; antsu nu shuar ninki tuke sumamattawai.” <sup>30</sup>“Jesuska iwianchrukaiiti” tuíniakui Jesus nuni tímiayi.

### **Jesusa yachi Jesusa nukurí**

*(Mateu 12.46-50; Rúkas 5.19-21)*

<sup>31</sup>Nuyá ni yachi ni nukurijjai taar aa wajasar, Jesusan untsukat tusa akupkarmiyai. <sup>32</sup>Shuar Jesusan téntak pujuarmia nu tiarmiayi “Iis, nukusha, yatsumsha aa wajasar untsurmainiawai.”

<sup>33</sup>Tutai Jesus chichaak “Ya ainia winia nukursha yatsursha” tímiayi. <sup>34</sup>Nin téntakar pujuarmia nuna iis “Júiti winia nukurka, yatsurka, tímiayi. <sup>35</sup>Shuar Yusa wakeramurín uminiana nu winia yatsuruiti, winia umaruiti, winia nukuruiti” tímiayi.

### **Atsaamin atsaampramiania nu**

*(Mateu 13.1-9; Rúkas 8.4-8)*

**4** Nuyá jiinki antumianka yantamen Jesus ataksha unuiniartinian juarkimiayi. Tura untsurí shuar irun-

trarmatai, kanunam enkempramiayi. Shuarsha antumianka káanmatkarin pujuarmiayi. <sup>2</sup>Jesuka métek-taku chichamjai ti jintintiarimiayi. Jintintiuur juna tímiayi: <sup>3</sup>“Antuktarum. Atsaamin atsaamprataj tusa jínkimiai. <sup>4</sup>Atsaamkui ni arakri jintiá iniararmai. Chinki yakiya káutkar yuawarmai. <sup>5</sup>Chikichcha kaya írunmanum iniararmai, nunka ishichik ámanum. Tura nunka ishichik asamtai wárik tsapainiarmai. <sup>6</sup>Tura etsa etsantar sukuám kancape atsá asamtai káararmai. <sup>7</sup>Chikichcha janí nupanam iniararmai. Jankisha tsapainiar kankar ajakrarmai; túram nereckarmai. <sup>8</sup>Chikichcha pénger nunkanam iniararmai. Tura tsapainiar nereckarmai, chikich trainta, chikich sesenta, chikich sian nereckarmai. <sup>9</sup>Kuúshim ákuinkia antuktarum” tímiayi.

*(Mateu 13.10-17; Rúkas 8.9-10)*

<sup>10</sup>Untsurí wearmatai, ishichik Nijijai juakarmiania nu, ni tuse unuiniamurijjai aniasarmiyai “¿Ame jintintiamna nusha warimpiai?” tiarmiayi.

<sup>11</sup>Tutai Jesus chichaak “Yuska ni akupeamurín atumin paant nekamtikramatssa wakerutmarme. Antsu chikich shuarka aya métek-taku chichamjai jintintiawartatui. <sup>12</sup>Íniayatan wáinkiacharat tusa, antukarsha nekaacharat tusa, umirtsuk ni tunaari tsankurnacharat tusa túrattawai’ tímiayi.

*(Mateu 13.18-23; Rúkas 8.11-15)*

<sup>13</sup>Tura tímiayi ‘Wi jintintiajrumna nú métek-taku chicham nekaachurmek. Nu nékachurmeka ¿itiurak chikich métek-taku chichamsha nekaatarum? <sup>14</sup>Atsaamnia nuka Yus-Chichaman étserna nuna nakumui. <sup>15</sup>Jinikiá jintiá iniaarua nuna chikich shuar ántuiniamun nakumui. Nu shuar chichaman

ántuiniawai. Tura antukarmatai Satanás wárik tarí ni enentáin atsaampramun jurawai. <sup>16</sup> Chíkich shuar ántuiniamu kayanam atsaampramua núniskete. Niisha chichaman antukar wárik warainiak umiktasa wakeruiniawai. <sup>17</sup> Tura ni kan̄kape atsakui, aya ishichik katsuiniawai. Tura ukunam, Yus-Chichaman wakeruiniakui shuar kajeram tura chíkich itiurchatan wáinkiar Yúsaiya kanainiawai. <sup>18</sup> Chíkich ántuiniamuka jan̄ki nupanam atsaampramua núniskete. Nu shuar Yus-Chichaman ántuiniawai. <sup>19</sup> Ántuiniayat ju nun̄kanam ana nuna ti páchiniawai. Tuma ásar kuítian tura shiirmachin ti takustinian wakeruiniawai. Nú wakeramu ni enentáin Yus-Chicham ana nuna kan̄kar emenkatui. Tuma asamtai nerektinian tujintiainiawai. <sup>20</sup> Tura chíkich ántuiniamusha péñker núnkanam atsaampramua núniskete. Nú shuarsha Yus-Chichaman antukar umiiniawai. Tura nerenawai, chíkich shuar trainta, chíkich shuar sesenta chíkich shuar siañsha nerenawai.’

### **Ūkma ana nu paant nekanattawai**

*(Rúkas 8.16-18)*

<sup>21</sup> Nuyá Jesus juna tímiayi ‘¿Shuar shiripkin ekeemak itiá pitiaknum en̄keattawak. Peaknum wakenam ikiustatuak? Atsá. Antsu misanam ekentsashinkiait. <sup>22</sup> Núnisan̄ ashí ūkma ana nu ukunam paant nekanattawai. Tura núnisan̄ yamáishishmasa chichasmasha ukunam paant nekanattawai. <sup>23</sup> Kuíshim ákuin̄kia antuktarum.’ <sup>24</sup> Tura nuyá tímiayi ‘Ántarmena nu esetrarum enentáimsarum antuktarum. Urutá péñkerak enentáimsatarum, núnisan̄ Yuska ámin nekaatniun suramsattarme, tura nú núkap patatramsattarme. <sup>25</sup> Tuma asamtai shuar núkap takakna

nu patatnastatui. Antsu chíkich shuar ishichik takakuk jurunkittiawai.’

### **Yusa akupeamuri júnisaiti**

<sup>26</sup> Nuyá Jesus chichaak juna tímiayi ‘Yusa akupeamuri júnisaiti. Shuar jin̄kiain atsaampratniua núniskete. <sup>27</sup> Jin̄kiáin atsaamar, untsurí kanar, tsawar, uruksanpi tusa nákawai. Tura itiura tsapainia núnaka nékatsui. <sup>28</sup> Kame jin̄kiái nun̄kanam init aku nin̄ki tsapaatsuk; emka nukareawai, nuyá tuyureawai tura nujamar katsuawai. <sup>29</sup> Túruna káakmatai júuktin tsawant jeayi tusar juñiawai.’

*(Mateu 13.31-32; Rúkas 13.18-19)*

<sup>30</sup> Ataksha Jesus tímiayi ‘¿Yusa akupeamuri warijiāink̄i nakumkataj. Warijiāink̄i métek-takuit? <sup>31</sup> Mustasa jin̄kiaí araamua nujai métek-takuiti. Nu jin̄ki-aisha ashí nan̄kaamas ishitiupchichiti. <sup>32</sup> Tura araam tsapái ashí nan̄kaamas uunt ajawai; tura tseñkeakmarisha kámpuram asamtai nui mikintranam chin̄k-isha shiir ayamainiawai.’

*(Mateu 13.34-35)*

<sup>33</sup> Núnisan̄ Jesus untsurí métek-taku chichamjai Yus-Chichaman ujaamiayi. Nii nekaatniun jearmia nunak ujaamiayi. <sup>34</sup> Chíkich shuaran aya métek-taku chichamjai ujaamiayi; antsu ni unuiniamurijiāi Nin̄ki pujus ashí paant jintintramiayi.

### **Nasencha, entsanacha Jesus imijiánmia nu**

*(Mateu 8.23-27; Rúkas 8.22-25)*

<sup>35</sup> Nu tsawantai etsa akaikimtai Jesus ni unuiniamurin̄ chicharainiak “Entsa amain katiñtai” tímiayi. <sup>36</sup> Tutai kanunam en̄kempramiayi. Chíkich shuarnaka káanmatkanam ikiukiar Jesusan kanunam pujan júkiarmiayi. Chíkich kanunmayasha

atampriarmiayi. <sup>37</sup>Tura nasesha ti nasenkatasana nankammiayi; chíchimi kanunam yaráná piáktasa ajamiayi. <sup>38</sup>Jesuska kanú senkarin atampurus kanú tepemiayi. Tura, ni unuiniamurí Jesusan ishintiak chicharuk “Uunta ii wayajinia júka pachitmatmek” tiarmiayi.

<sup>39</sup>Tutai Jesus nantaki nasen kakantramiayi. Entsanha chicharuk “Takamatsata. Miaku ajasta” tímiayi. Tutai nasesha menkakamiayi, entsasha miaaku ajasmiai. <sup>40</sup>Túrunamtaí Jesus ni unuiniamurín chicharainiak “¿Urukamtaí ashamarum? Itiura Yus nekas enentáimtatsrum” tímiayi. <sup>41</sup>Tura imiá ashamainiak “¿Maa júsha yait? Nasesha entsasha nin umirainiatsuk” tunaiyarmiayi.

### **Jataranmayan iwianchrukun Jesus tsuármiania nu**

*(Mateu 8.28-34; Rúkas 8.26-39)*

**5** Nuyá antumian amaini Jatara nunkanam jeawarmiayi. <sup>2</sup>Jesus kanunmaya jiinkimtai áishman iwianchruku, shuar jakáa iwiartainiumiá wárik taa Jesusan inkiunmiayi. <sup>3</sup>Nu shuar iwiartainium tuke pujuyayi. Tura jirujainkia nin jinkiaatniun tujinkiarimiayi. <sup>4</sup>Jirujai nawenmasha, uwejunmsha tuke jinkiau ármiai. Túramaitiat jinkiaarman tsuriar tepet-tepet awajmiayi. Tura ti kakaram asamtaí nin nupetkachminiuyayi. <sup>5</sup>Tuke tsawajsha káshisha, iwiartainiumsha murasha kayajai ijiunmak unsumuu wekainiuyayi. <sup>6</sup>Tura yajayan wáiniak Jesusan tseke tarimiayi; tura tikishmatramiayi. <sup>7-8</sup>Túrunamtaí Jesus chicharuk “Iwianchiá, ni enentáiya jiinkitia, tájame” tímiayi.

Takui íwianch kakantar chichaak “¿Winiasha urukamtaí tarutnium, Uunt Nankaamaku Yusa Uchiri Jesúsá? Yus iirmanum wáitkiarsaip, tájame” tímiayi.

<sup>9</sup>Takui Jesus tímiayi “¿Ame náarme-sha yait?”

Tutai niisha ayak “Untsurí ásar wikia Untsurí-suntar tu anaikiamuitjai” tímiayi.

<sup>10</sup>Nuna ti amik, nu nunkanmaya akuptukain tusa Jesusan ti seamiai.

<sup>11</sup>Nuisha nainnium nuntumas untsurí kuchi shushunmak matsarmiai.

<sup>12</sup>Tuma asamtaí, kuchiniam enkemátin tsankatrukta tusar Jesusan seawarmiayi.

<sup>13</sup>Tuiniakui Jesus “ayu” tímiayi. Takui íwianch áishmankainia jiinkiar kuchiniam enkemáwarmiai. Kuchisha ti untsurí, jimiará mir (2.000) áchiawash. Ashí mash nánatanam iniaawar antumiannum iniankarmiayi. Nuisha entsá kajakar jakerarmiayi.

<sup>14</sup>Túrunamtaí kuchin wáinin pisarar péprunmasha shuarnumsha nuna etserarmiayi. Tuma asamtaí iyutai tusar ashintiukarmiayi. <sup>15</sup>Túrawar Jesusai jeawarmiayi. Jeawar áishman yaunchu iwianchrukun yamaikia penker ajasun pushirin entsar pujan wáinkiarimiayi. Wáinkiar ashankarmiayi. <sup>16</sup>Tura wakеткиar kuchi túrunamuncha iwianchruku penker ajasmancha mash etserkarmiayi. <sup>17</sup>Tuma asamtaí ni nunkeya jiinki wetá tusa seawarmiayi. Jesus kanunam enkemamtaí áishman nuik iwianchruku amia nu Jesusan chicharuk <sup>18</sup>“Wi Ámijiai tuke tsaninkian wekasatjai” tímiayi.

<sup>19</sup>Tura núnaka Jesus suritkiamiayi. “Antsu ame jeemiin, áminiumiin weme, ashí Uunt Yus túrutma nu tura waitnen-trampra nusha ujakarta” tímiayi.

<sup>20</sup>Tutai áishmansha wémiayi. Tura antsu Tekapuris nunkanam Jesus nin penker awajsamia nuna ashí shuaran ujakmiayi. Nu nunkanmaya shuarka nuna antukar ti enentáimprarmiayi.

### Jimiará jaan Jesus tsuármiania nu

(Mateu 9.18-26; Rúkas 8.40-56)

<sup>21</sup> Ataksha Jesus kanujai katinmatai, aents untsurí Nin irunturarmiayi. Jesuska antumianka káanmatkari wajamiayi. <sup>22</sup> Tura Israer-shuar iruntai jea náampruku, ni naari Jairu, támiayi. Taa, Jesusan wáiniak, piniakum teper-samiayi. <sup>23</sup> Piniakumar ti seak, “Winia nawantur jarutui. Winitiá, túram péñker ajasat tusam uwejmijiai antintrukta. Nuñkia jarutkashtatui” tímiayi.

<sup>24</sup> Tu tímiatai Jesus nijijai wémiayi. Tura untsurí shuar wena ásar Nin chánuarmiayi.

<sup>25</sup> Nui pachitkia nuwa ti jaa wémiayi. Niisha tuse uwí numpan ajapeak wáitias pujuyayi. <sup>26</sup> Ti untsurí tsuakratin nincha iisu armiayi. Tura iyamsha ti wáitias pujuyayi. Tura ni kuítríncha ashí ajapaitiat tsuámarchauyayi; antsu tsuamsha nu arant ajauyayi. <sup>27</sup> Nu nuwasha, Jesus túramun antuku asa, ni ukuurinj amainian ni pushirin antinmiayi. <sup>28</sup> “Wi aya ni pushirin antinnaka péñkerapi ajasaintjia” tu enentáimiar túramiayi. <sup>29</sup> Tura Jesusa pushirin antin nú chichamaik numpa ájapman menkakamiayi. Péñker ajasman ayashiin nekapramiayi. <sup>30</sup> Tura nuin Jesuska, ni kakarmarijijai tsuarman nekapmampramiayi. Tura nuna nekáa, ayantar chichaak “¿Yaki winia pushirun antintrukta?” tímiayi.

<sup>31</sup> Tutai ni unuiniamurj tiarmiayi, “Untsurí Ámin antinmainiasha ¿urukamtai “yaki winia antintkia” tame?”

<sup>32</sup> Tura Jesus, yaki túruta tusa ashi íimpramiayi. <sup>33</sup> Nuñkia nuwasha, ni ayashin túruna nuna nekáa, ti ashamak kuraimiayi. Tura Jesusan jeari tikishmatramiayi. Tura ni túrunamurinj ashí paant ujakmiayi. <sup>34</sup> Takui Jesus nin chicharuk “Nawantru, Winia nekas enentáimtursa asakmin, péñker awaj-

tamsaitme. Shiir wetá, tura tuke péñker pujusta” tímiayi.

<sup>35</sup> Tura Jesus nuna tuke chichas pujai, iruntai jea uuntri jeenia tariarmiayi. Tariar chicharainiak “Ame nawantrum jakayi. ¿Urukamtai Unuikiartin tuke itit awajsatam?” tiarmiayi.

<sup>36</sup> Tura Jesuska, nii tiarmia nuna ántayat, núnaka pachitsuk, iruntai jea uuntrin chicharuk “Ashamkaip; áyatik nekas enentáimtursata” tímiayi. <sup>37</sup> Tura Nijijai wétinian aya Pítruncha, Jakupuncha ni yachi Juanjai tsankatkarmiayi. <sup>38</sup> Iruntai jea uuntri jeen jeawar, áentsun charaatum ajainian, úutainian untsukum ajainiancha Jesus wáinkiamiayi. <sup>39</sup> Tura nuwach penké jakan nékayat, wayá nin chicharuk “¿Urukamtai timiá úutrum, tura wa wa ajarum? Nuwach jákachai, antsu kanarai” tímiayi.

<sup>40</sup> Nuna takui wishikrarmiayi. Tura Jesus ashí jiiir akupkarmiayi. Áyatik nuwachí aparín, nukuríncha tura Nijijai táaruncha nuwachí tepamurinj jukimiayi. <sup>41</sup> Tura wayawar Jesuska nuwachí uwejen achik tímiayi “Taritia kumi.” Nusha shuar chichamjainkia “nawantrú nantáktiá” tawai. <sup>42</sup> Nuwach tuse uwí takakuya nu, nú chichamaik nantaki wekasamiayi. Túramtai nuj pujuarmi- ania nu ti enentáimprarmiayi. <sup>43</sup> Jesuska chichaak “Atumsha penké et-serkairap’ tímiayi. Tura “nuwach ayuratarum” tímiayi.

### Jesus Nasarénum pujusma

(Mateu 13.53-58; Rúkas 4.16-30)

**6** Jesus nuyá jiiñki ni nunken waketkimiayi. Ni unuiniamurjsha nemariarmiayi. <sup>2</sup> Nuisha ayampratin tsawant jeamtai Israer-shuar iruntainiam wayá unuiniamiayi. Tura Jesusan anturkarmiania nu ti enentáimsarmiayi. “¿Jusha tui unuimiaruit. Ni nekaatniuríncha

yaki susait. Tura aentsti tujintiajnina nuna Niisha itiurak tura? <sup>3</sup>Jysha karpintíruchukait; Maríi uchirínchukait. Ni yachísha Jakupusha, Jusesha, Jútassha, Semunsha nékatsjik. Tura ni umaísha juí iijíai pujuiniatsuk” tiarmiayi. Túrawar Nin nekas enentáimtustinian tujinkiararmiayi.

<sup>4</sup>Túrasha Jesus nin chicharuk “Yúsnan etserniun chíkich nunkanmayaanka shiir anturainiawai. Antsu ní nunkeyanaka, ní shuarsha anturainiatsuí” tímiayi.

<sup>5</sup>Tura nuísha, ni nunkenkikia aentsti tujintiamun túratnium tujinkiamiayi. Antsu jaancha aya ishichik ni uwejejai antiñ tsuáirmiayi. <sup>6</sup>Tura nekas enentáimtacham “¿urukamtaí nusha?” tu enentáimsamiayi.

Nuyasha chíkich péprunam wayá, chíkich péprunam wayá Yus-Chichaman unuúniakní wekaimiayi.

### **Yus-Chicham etserkatarum tusa Jesus ni unuiniamurín akupkarmiania nu**

*(Mateu 10.5-15; Rúkas 9.1-6)*

<sup>7</sup>Tuse unuiniamurín untsuk jímiarchik jímiarchik werum Yus-Chicham etserkatarum tusa akupkarmiayi. Tura iwianchin nupetkarat tusa ni kakarmarín súsarmiayi. <sup>8</sup>Tura chicharuk “Jintíá yurumátniusha jukiirap, uyuntrumijíncha kuitcha enkearum jukiirap. Antsu aya áanik mashtun jukiirum wetarum. <sup>9</sup>Sapat uwekatarum, tura entsartíncha jímiar jukiirap, tímiayi. <sup>10</sup>Tura jea wayarmena nuín pujustarum; pujá-pujakuarum nuyá chíkich peprunmasha wetarum.

<sup>11</sup>Tura nánkamas aents atumin awaintiamainiachkuisha, anturta-mainiachkuisha, nuyá jíinkirum, nu shuar yajauch áiniawai tusarum, atumí nawe nunka akakekrum ikiuktiarum. Kame Yus áentsun nekapsattana nú tsawant jeamtaí, nu shuarnaka asutiattawai. Sutuma péprunmaya

shuarjai tura Kumura péprunmaya shuarjai nankaamas nin asutiattawai” tímiayi Jesus.

<sup>12</sup>Nuyá Jesusa unuiniamurí jíinkiar enentái yapajiar Yúsai enentáimtumartinian etserkarmiayi. <sup>13</sup>Tura iwianchruku enentáiyá iwianchin jíirki akupkarmiayi, tura asuitijíai yakarar untsurí jáinian tsuararmiayi.

### **Juanka jakamurí**

*(Mateu 14.1-12; Rúkas 9.7-9)*

<sup>14</sup>Jesusa náarin tura ni túramurín ashí aents áujmatin ásarmatai, uunt akupin Erutis nuna antukmiayi. Erutiska “Imiakratin Juan jakamunmaya nantakni. Tuma asa ti kakaram takaawai” tímiayi. <sup>15</sup>Tura chíkich shuar “Eríasaiti” tiarmiayi. Chikichcha “Yúsnan etserniuiti, yaunchu etserniuya núkete” tiarmiayi. <sup>16</sup>Erutis nuna antuk “Nekas Juánkaiti. Ni muuken tsupiktinian akupkamiay nu, jakamunmaya nantakniuiti” tímiayi. <sup>17-19</sup>Kame Uunt akupin Erutis, ni yachi Jiripi nuarín nuatkamiayi. Nu nuwá naarí Jirutíasaiti. Juansha uunt akupniun Erutisan chicharuk “Yatsumi nuarí akintrukchatniuitme’ tímiayi. Tutai nuwá Jirutías Juánkan ti kajerkamiayi. Tura Juánkan máataj tusa wakerimiayi. Túrawar uunt akupin Erutis nuna surimkamiayi. Antsu Juan achikrum sepunam enkeatarum tusa akupkamiayi. <sup>20</sup>Juansha tuke enentáijíai Yusa jintín wekainiuyayi. Erutis, ni esetar enentáimniun neka asa Juánkan ashamak Jirutías wakeramurín túrawarín tusa suritkamiayi. Kame Erutis Juan étserman nékachuitai antuktinian wakerimiayi.

<sup>21</sup>Jirutías, itiurak máawaj tu pujai, uunt akupin Erutis, ni akiiniamu tsawantrí jeamtaí, ni suntaríncha, Kariréa nunkanmaya



úuntrincha, kuítrintin armia nunasha untsukar, namperan najanamiayi. <sup>22</sup>Nuisha Jirutíasa nawantri wayá jantsemámtai Erutis tura nijjiaí nampernum matsarmia nusha shiir enentáimsarmiayi. Túramtai uunt akupin nuwáchin chicharuk “Ame wakeram nu seattia. Wi amastatjai. <sup>23</sup>Nekas tájame, ashí ame seatmena núnaka amastatjai. Wats, seatkumniñkia takakjana nuna jímiapetek nakakan, amastatjai” tímiayi.

<sup>24</sup>Tutai nuwách jiinki ni nukurín Jirutíasan chicharuk “¿Wariniak seat-taj?” tímiayi.

Tutai “Imiakratin Juanka muuke seata” tímiayi.

<sup>25</sup>Nu chichamaik nuwách wari wayá Erutisan chicharuk “Yamaikia uunt amamkunam Juanka muuken wakerajai” tímiayi.

<sup>26</sup>Nuna takui uunt akupin ti kuntuts enentáimpramiayi. Tura nii tiniu asa ni amikri matsatainia nu antukaru ásarmatai surimkiatniun tujinkiamiayi. <sup>27</sup>Tuma asa uunt akupin Juanka muuke itiat tusa ni suntarin wárikmas akupkamiayi. <sup>28</sup>Túramtai suntar wari we, sepunam Juanka muuken tsupikmiayi. Tsupik, amamkunam itía, nuwan susamiayi. Túram achik ni nukurín susamiayi. <sup>29</sup>Juan maamun antukar ni unuiniamuri ni ayashin iwarsatai tusar júkiarmiayi.

**Senku mir áishmañkan  
Jesus ayuramiania nu**

(Mateu 14.13-21; Rúkas  
9.10-17; Juan 6.1-14)

<sup>30</sup>Tura Jesusa unuiniamuri Nii akupkarma nu, ataksha waketki káunak irunturarmiayi. Ashí nii túrawarmia nuna, unuiniarmia nunasha ujakarmiayi. <sup>31</sup>Tura untsurí shuar táiniakui, niisha ankant ajastinniasha yurumátniuncha tujinkiamiayi. Tuma

asamtai Jesus chichaak “Iijiaí wemi aents atsuiniamunam; nuí ishichik ayamprarmi” tímiayi. <sup>32</sup>Nuyá Jesus ni unuiniamurijiaí kanunam enkemprar, aents atsuiniamunam jeatai tusar jíinkiararmiayi. <sup>33</sup>Túrasha shuar ni wéenan wáinkiararmiayi. Tura “Jesusaiti” tiarmiayi. Tuma ásar ashí péprunmaya untsurí shuar tseke ashintiukar, ni jeatniunam nákakarmiayi. <sup>34</sup>Jesus kanunmaya jiinki ti untsurí aents iruntrar matsatun wáinkiamiayi. Murik péñker wáinchataiya núnisan matsatu ásarmatai Jesus nin wáitnentrarmiayi. Tura núkap unuiniarmiai. <sup>35</sup>Nuyá kíkui ni unuiniamuri Jesusan tariar chicharainiak “Atsamunam pujatsjik; tura yamá kíatsuk. <sup>36</sup>Shuar wari akupkarta. Tíjiuch péprunmasha, shuarnumsha wearti, ni yurumkari sumarmakarat” tiarmiayi.

<sup>37</sup>Tutai Jesus chichaak “Atumek ayuratarum” tímiayi.

Tutai “Iisha ju shuar ayuratai tusar, ¿jimiara sian kuitjai yurumak sumaktai tusar wétinkiaitiai?” tiarmiayi.

<sup>38</sup>Tura Jesus ni unuiniamurín chicharainiak “Tanta takakrum nu iistarum ¿urutmak aa?” tímiayi.

Tutai nekapmarar chichainiak “Tán-taka sénkuchikiiti, tura namaksha jími-archikiiti” tiarmiayi.

<sup>39</sup>Tutai Jesus tímiayi “Ju shuar chírichriniam pujusarti tusar akupkatarum.” <sup>40</sup>Ankant ankant sian siansha, senkuenta senkuenta iruntrar matsamsarmiayi. <sup>41</sup>Jesuka senku tantancha, jímiar namaknasha jusa, yakí nayaimpinmaani íimias Yúsan yuminsamiayi. Tura yurumkan púurmiayi. Puur ni unuiniamurín súsarmiayi. Namaknasha puur súsarmiayi, ashí shuáran ajamsarat tusa. <sup>42</sup>Ashí yurumáwar ejemarmatai, <sup>43</sup>puunaruncha, namak ampirmancha achikiar, tuse chañkinian áimkiar

júkiarmiayi. <sup>44</sup> Nu yurumkan ti untsurí yurumáwarmiayi. Aya áishmanġak senġu mir (5.000) ármiai.

### Jesus entsá pátatek wekasamia nu

(Mateu 14.22-27; Juan 6.16-21)

<sup>45</sup> Nuyá Jesus ni unuiniamurġin chicharainiak “Kanunam enġemprarum, katiġkrum amain émaa ajatarum, Petsaitia péprunam. Wisħa ju shuaran áujas ikiuktatġai” tímiayi. <sup>46</sup> Shuáran áujas ikiuki Yusġai chichastaj tusa náinnium wémiayi.

<sup>47</sup> Tura kirit ajasmanum kánuka antumiannum ajapén nanammiai. Jesuska niġki juakmiayi. <sup>48</sup> Jesusa unuiniamurġisha wia-wiantainiakua ti pimpikiarmiayi, nase tukumma ásar. Nuna Jesus wáiniak tsawartin ishichik ajasmatai entsá pátatek wekas nin jeariarmiayi. Tura nanġaamaktiasa wea núnisan wémiayi. <sup>49</sup> Jesus entsá wekaan ni unuiniamurġi wáinkiar, wakanchashit, tu enentáimprarmiayi. Túrawar ti untsumkarmiayi. <sup>50</sup> Ashí wáinkiar ti ashamkarmiayi. Tura Jesus wárik nin chicharuk “Kakaram ajastarum, wíitġai Jesus; ashamprukairap” tímiayi. <sup>51-52</sup> Nuinġia entsayá kanunam waka enġempramiayi. Túramtai nasesħa majaantmiayi. Ni unuiniamurġinkia enentáġi kiritia áintsan ásmatai Jesus yurumkan núkap awajsamia nuna paant nekaatniun tuke tujinkarmiayi. Tuma ásar yamáı túrunamu itiurak aankia tusar ti enentáimprar sapijmiakarmiayi.

### Jinisarítnumiá shuáran Jesus tsuármiania nu

(Mateu 14.34-36)

<sup>53</sup> Nuyanġa katiġkiar, Jinisarít núġkanam jeawarmiayi. Jeawar kanun ajuġniarmiayi. <sup>54</sup> Kanunmayá jġintrarumatai, nu nuġkanmayá shuar Jesusan nekaawarmiayi. <sup>55</sup> Tura “Jesus pujawai” táman antukar, ashí

jeanmayá jaan ni peakrintiuk Jesus pujamunam itiaarmiayi. <sup>56</sup> Tura Jesus wekaak wémia nuġħa, péprunmasha, shuar matsatmanumħa, ishichik matsatkamunmasha jaan itiarar jintiá áeprusarmiayi. Túmainiak Jesusan pushirmin antġtaj tusar seawarmiayi. Tura ashí antġkiarmia nuka péġker ajasarmiayi.

### Jesus Pariséun áujmatsarmiania nu

(Mateu 15.1-20)

**7** Pariséuħa, Israer-shuara jintinniurġisha Jerusarénnumiá Jesusan tariarmiayi. <sup>2</sup> Tura Jesusa unuiniamurġin ikijmiatsuk yurumun wáinkiar “Israer-shuara túrutairġin túruiniatsui” tiarmiayi. <sup>3</sup> (Kame Pariséuħa, tura ashí Israer-shuarħa, ni uuntri jintintiamurġin umikiar ti núkap ikijmiarar yurumin ármiai. <sup>4</sup> Péprunmayá tari “ikijmiatsuk yurumasħtiniati” tiniu ármiai. Tura ti untsurí ni uuntri túrutairġi núnisan ármiai. “Tsapanħa, ichiġnasha, jirunħa, peaknasha niġiakartiniati” tiniu ármiai.) <sup>5</sup> Tuma asamtai Pariséuħa, Israer-shuara jintinniurġisha Jesusan chicharainiak “¿Urukamtai ame unuiniamuram ii uuntri jintintramniuitaj nuna túruiniatsu. Urukamtai ikijmiatskesħa yurumáinia?” tiarmiayi.

<sup>6</sup> Tutai Jesus tímiayi “Ántar chichamtiniatrume. Isayas yaunħu nekas atumin áartampramiayi juħa:

Ju aents ni weneġai Winia “ti péġkeraiti” turutainiawai, tímiayi Yus, tura ni enentáinġia jeachat pujuiniawai.

<sup>7</sup> Tura tukeneas Winia shiir awajtuiniawai. Aentsu chichame jintiainiayat, “Yus-Chichamaiti” tuġniawai.”

Tu áarmaiti. <sup>8</sup> Tura átum Yusa chichame iniaisarum, aentsu jintintiamurġi umirkarum, ichiġnasha, tsapanħa niġiaktin, tura ġhíkħ túrutaisha

áintsarmek untsurí túrarme. <sup>9</sup>Túrákrum Yus-Chichamka tsukintiaani ikiusurme atumí uuntri chichame umirkatai tusarum. <sup>10</sup>Kame Muisais yaunchu aar juna tíchamka:

Ame apa nukusha shiir enentáimtustarum.

Tura ataksha áarmiayi:

Shuarsha ni aparín, nukuríncha yajauch chichareakka, nu shuar jákatniuiti.

<sup>11-12</sup>Túrasha átumka Pariséutirmeka, antsu ju tárume: “Shuar ni aparín nu nukurín chicharuk “Wi yáintinian takakjana nu Kurpanaiti” takuínkia, atumsha péñkeraiti, aparíncha nukuríncha yáinchatí” tarume. (Kurpan tana nuka, Yus susamu, tawai.)

<sup>13</sup>Nekaatarum, Pariséutiram. “Íf yaunchu uuntri chichame tuke umiki wétiniaitji” tákurum, Yus-Chicham penké ántar chichama núnin awajearme. Núnisrumek chikichcha untsurí túrarme.” Tu tímiayi Jesus.

<sup>14</sup>Nuyá ataksha Jesus ashí shuáran untsukar “Mash anturtuktarum, ashí nekaatarum, tímiayi. <sup>15</sup>Aaya ayashnium wayaana nu, shuáran yajauch awajsachminiaiti; tura antsu ni enentáinia jiiina nu, yajauch awajsattawai. <sup>16</sup>Shuar nuna ántakka enentáimprati” tímiayi.

<sup>17</sup>Nuyá áentsun ikuiak, jea wayamtai, ni unuíniamurí aniasarmiyai “¿Nu métek-taku chicham warintia?” tiarmiayi.

<sup>18</sup>Tutai Jesus tímiayi “Atumsha nékatsrumek. Páantchakait; yurumak yúajnia nu, enentáiniam wayachu asa, shuáran yajauch awajsachminiaiti.

<sup>19</sup>Antsu wakenam wayá, nankaamas menkaatsuk” tímiayi. Nuna taku, ashí yurumak páchitsuk yuamniaiti, tímiayi. <sup>20</sup>Nuyá tímiayi “Shuara enentáinia jiiina nu, yajauch awajsamniaiti. <sup>21</sup>Shuara enentáinia, initia, yajauch enentáimsatniusha,

tsanirmatniusha, natsa tsanirmatniusha, shuar máatniusha, <sup>22</sup>kasamkatniusha, chikichna wakeruktincha, péñkercha túratniusha, anankatniusha, natsantain átincha, yajauch enentáimtustincha, tsanumpratniusha, waantu enentáimtu-mastincha, netse túratniusha, ashí nuka initia wininiatsuk. <sup>23</sup>Ashí nu tunáa ainia nu, shuara enentáinia jíiniu asa, shuáran yajauch awajainiawai” tímiayi.

### Serupinísianmaya nuwá Jesusan nekas enentáimtusmania nu

(Mateu 15.21-28)

<sup>24</sup>Tiru pepu, Setún péprusha Serupinísia nunkanam ámiayi. Nuka Israer-shuara nunkenchayuyai. Nu nunkanam Jesus wémiayi. Tura jeá, jeá wayáa pujusmiayi. Tura nui pujamun nu nunkanmaya shuar nekarawarain tusa nakitmiayi; túrasha uumkatniun tujinkiamiayi. <sup>25</sup>Wárik nu nunkanmaya nuwá Jesus pujan nekaamiayi. Nu núwaka nawantri iwianchrukuyai. Tuma asa Jesusan tarí ni nawen piniakum tepersamiayi.

<sup>26</sup>Nu nuwá Israer-shuarcha, Serupinísianmayayuyai. Túmaitiat, nawantru enentáiya iwianchin jiiirturkitia tusa Jesusan seamiyai.

<sup>27</sup>Tutai Jesus nuwan chicharuk “Uchi emka ejemarartí. Uchi apatkurí atankir yawach súsatin péñkerchaiti” tímiayi.

<sup>28</sup>Tutai nuwá ayak “Nekas, Uunta, tame. Tura yawachisha misanam wakenam pujuinia nu, uchi apatkun yurumuk juyumak kákeamun yuiniatsuk” tímiayi.

<sup>29</sup>Tutai Jesus tímiayi “Péñker tame. Tuma asam, shiir wetá; ame nawantrumi enentáiya iwianch jiiinkiyi” tímiayi.

<sup>30</sup>Takui niisha wémiayi. Tura ni jeen jeá, ni nawantrin íwianch jiiinkimtai péñker ajas peaknum tepan wáinkiamiayi.

### Jesus empekun tsuármiania nu

<sup>31</sup> Jesus Tirunmaya jiinki Setún péprunam nankaamarkutak, Tekapuris nunkanmaani nankaamaki, Kariréa antumiannum ataksha jeamiayi. <sup>32</sup> Nuj chichachu ámiayi, kuishin empeku. Nu shuáran Jesusan itiarar, ni uwejejai antinkiat tusar seawarmiayi. <sup>33</sup> Shuar matsatmanumiá Jesus nin akanki jukí kuishin tsara uwejejai tsutsukruamiayi. Tura usukia, nu shuara iniajn antintkiamiayi. <sup>34</sup> Tura nayaimpinmaani íimias súkaska mayati “Epata” tímiayi. Nuka, shuar chichamnumka “chinkiatí” tawai. <sup>35</sup> Nu chichamaik ni kuishisha chinkiamiayi, iniaisha séermiayi. Tura paant chichasmiayi. <sup>36</sup> Tura Jesus chicharainiak “Penké etserkairap” tímiayi. Jesuska surí-suritiamaitiat, nu nankaamas etseriarmiayi. <sup>37</sup> Tura ti enentáimprarmiayi. Enentáimprar, “Ju Jesus aya penkeran túrawai. Empekuncha ántumtikniaiti, tura chichachun chichamtikniaiti” tiarmiayi.

### Kuatu mir shuáran Jesus ayuramiania nu

(Mateu 15.32-39)

**8** Nu tsawantái shuar timiá untsurí iruntrarmiayi. Yurumkarí atsakui Jesus ni unuiniamurín untsukar juna tímiayi: <sup>2</sup> “Ju shuáran waitnentajai. Menaintiú tsawant Wijjai pujuinia ásarmatai ni yurumkarí amuukachaik. <sup>3</sup> Tura ni jeen ayurtsuk akupeamka, tsukariin jintiá pimpikiartatui, yajaya káunkaru ásar” tímiayi. <sup>4</sup> Tutai ni unuiniamurí chichainiak “Túrasha juí atsamunam, ju aents ejemararat tusar ¿tuyá yurumkak wáinkiat-tají?” tiarmiayi. <sup>5</sup> Tutai Jesus nin aniasmiayi “¿Urutmá tanta aa?”

Tutai “siati awai” tiarmiayi.

<sup>6</sup> Nuinkia ashí áentsun “nunká pujustarum” tiarmiayi. Tura tantan achik, Yúsan yuminsamiayi. Tura puuk, áentsun ajamsatarum tusa ni unuiniamurín susamiayi. <sup>7</sup> Tura uchich namaksha ishichik aan achik, Yúsan yumínkias, ni unuiniamurín chicharuk “Jusha shuar ajamsatarum” tímiayi. <sup>8</sup> Turam ashí yurumáwar ejemararmiayi. Ampirma púnaruncha siati chankinnium áimkiarmiayi. <sup>9</sup> Kuatru mir (4.000) shuar yurumáwarmiayi. Yurumáwar amikiarmatai, Jesus nin áujas akupkarmiayi. <sup>10</sup> Tura ni unuiniamuríjiai kanunam enkemprar Tarmanúta nunkanam wearmiayi.

### Pariséu Jesusan iniakmasta tiarmiania nu

(Mateu 16.1-4; Rúkas 12.54-56)

<sup>11</sup> Pariséu Jesusjai áujmatsatai tusar tariarmiayi. Nekapsatai tusar wakeru-iniak Nin chicharuk “Nayaimpinmaya kakaram iniakmasta” tiarmiayi.

<sup>12</sup> Tuíniakui Jesus kúntuts enentáimias, súkaska mayati “¿Urukamtai, yamaiya aentstiram, nayaimpinmaya kakarman iniakmasat tusarum wakerarum? Nuka penké sunaschattarme, paant tájarme” tímiayi.

<sup>13</sup> Nuyá nin ikiukiar ataksha kanunam enkemar amain katinmiayi.

### Pariséu túramuríjiai aneartarum, tímiayi Jesus

(Mateu 16.5-12)

<sup>14</sup> Tura ni unuiniamurí yurumak jukitiai tukamá kajinmatkiarmiayi. Kanunmanka aya chikichik tantanak takaku ármiai. <sup>15</sup> Jesussha ni unuiniamurín enentáimtikuiuk tímiayi “Wáinkiatarum; Pariséusha Erutissha wakaprutain takakainia nújaisha aneartarum” tímiayi.

<sup>16</sup>Tutai ni unuiniamuri<sup>sha</sup> tunaiyarmiayi “Tanta kajinmatkin asakrin nuna túramtsujiash” tiarmiayi.

<sup>17</sup>Tura Jesus nuna nekáa chichaak “¿Urukamtai aya yurumkak enentáimtarum? Tuke nékatsrumek. Penké enentáimtsurmek. Atumí enentái tuke kiritkiait? tímiayi. <sup>18</sup>Jimi aisha itiura wáintsurmea. Kuishim aisha itiura ántatsrum. Ashí kajinmatkintrumek. <sup>19</sup>Nekaatarum, nuik, senku tantan púuran senku mir áishman<sup>kan</sup> ayurachmakaj. ¿Tura ampirma urutmá chan<sup>kinnium</sup> chumpiamarum?” tímiayi.

Niisha tiarmiayi “Tuse chan<sup>kinnium</sup> chumpiamji.”

<sup>20</sup>Ataksha Jesus tímiayi “Tura siati tantajai kuaru mir shuaran ayuramtai, ¿ampirmasha urutmá chan<sup>kinnium</sup> chumpiamarum?”

Niisha “siati” tiarmiayi.

<sup>21</sup>Tuma asamtai Jesus tímiayi “¿Itiura imiá nékatsrum?”

### Jesus kusurun íimtiksamiania nu

<sup>22</sup>Nuyá Petsaitia péprunam jeawarmiayi. Jeawarmatai, áishman<sup>jii</sup> kusurun Jesusan itiararmiayi. Túrawar anti<sup>nta</sup> tusar seawarmiayi. <sup>23</sup>Tuma asamtai Jesus uwejn<sup>um</sup> achik péprunam aani en<sup>keki</sup> jukí jin<sup>usukijjai</sup> kuérmiayi. Tura uwejéjai antin “¿íimmek?” tímiayi.

<sup>24</sup>Tutai kusuru íimi tímiayi “Aentsun iijajai, túrasha paantcha. Numi wekainian áaniun iijajai” tímiayi.

<sup>25</sup>Nuyá ataksha Jesus ni uwejéjai kusuru jin<sup>anti</sup>miayi. Tura kusurusha úmamkes iis, pé<sup>nker</sup> ajas, ashí paant íimpramiayi. <sup>26</sup>Jesus chichaak “Jeemiin weakum péprunam wayawaip tura shuar ujakaip” tímiayi.

### Pítiur Jesusan “Yusa Anaikiamurinme” tímiania nu

(Mateu 16.13-20; Rúkas 9.18-21)

<sup>27</sup>Jesus ni unuiniamurijjai uunt pepru Sesaria-jiripiunam jeatsuk, tíj<sup>iuch</sup> uchich péprunam irasarmiayi. Jintía wésar Jesus ni unuiniamurin chicharainiak, “¿Yaiti turutainiawa Winia?” tímiayi.

<sup>28</sup>Tutai niisha áimkiarmiayi “Chíkich chichainiak, imiakratin Juan<sup>kaiti</sup>, tura-mainiawai. Chíkichcha, Eríasaiti, tura chíkichkia, yaunchu Yúsnan etserin nantakniua núiti, turamainiawai” tiarmiayi.

<sup>29</sup>Tutai Jesus tímiayi “Atumsha, ¿waritrome. Yáitijai?” tímiayi.

Tutai Pítiur tímiayi “Ámeka Krístu-itme; Yúsaiya akupkamuitme.”

<sup>30</sup>Tutai Jesus chichaak “Penké etserkairap” tímiayi.

### Jesus ni jákatniurin ujakmiania nu

(Mateu 16.21-28; Rúkas 9.22-27)

<sup>31</sup>Unuiniak: “Wi Aents Ajasuitjiana ju ti wáitsatniuitjai. Israer-shuarti ii uuntri<sup>sha</sup>, Patri úuntri<sup>sha</sup>, ii jintinniur<sup>isha</sup> Winia nakitrurar mantuawartatui. Túrasha menaintiu tsawant nan<sup>ka</sup>asmatai nantaktiniaitjai” tímiayi. <sup>32</sup>Nunasha paant ujakmiayi.

Tura Pítrusha Jesusan arantach jukí kakantramiayi. “Tu chichasaip” tímiayi.

<sup>33</sup>Tutai Jesus ayantmatar, ni unuiniamur<sup>in</sup> iis, Pítrun kakantar chicharuk “Satanása, werumta. Ámeka Yusna ana nu enentáimtatsme, antsu aya áentsnak enentáimtame” tímiayi. <sup>34</sup>Nuna tuasua amik tura nu<sup>i</sup> matsamarmia nunasha, ni unuiniamur<sup>in</sup>cha untsuk tímiayi, “Shuar Winia nekas nemartustasa wakerakka ni wakeramur<sup>inkia</sup> iniaisati; tura ni krus<sup>ri</sup> yanak<sup>i</sup> nemartustí. <sup>35</sup>Kame shuar ju nun<sup>kan</sup>am aya nin<sup>ki</sup> anenmamkun<sup>ka</sup> nu shuar ni iwiaakmar<sup>in</sup> emenkaktatui.

Antsu Winia anentu asa tura winia chichamprun anea asa, shuar aya péñker pujustinniak enentáimtsuna nu, nekas iwiaakman wáinkiatstawai. <sup>36</sup>Nekaata, shuar ashí ju nunkanam írunka nuna sumaksha túrasha ni wakanj jinium wéakuisha, ¿itiurak péñker pujusaint? <sup>37</sup>Shuarka wakanin uwentikrataj tusa wakerak ¿urutmak akikmakaint? <sup>38</sup>Antukturum. Yamaiya aents Yúsán nakitjar ajapawaru yajauch ainia nu íimiainiamunam shuar Winia natsantrakuñkia tura winia chichampruncha natsantakuñkia, wi, Aents Ajasuitjiana ju, winia Aparu kakarmarijiaj tura nayaimpinmaya péñker suntarjaj atak taakun, nú shuaran natsantrattajai Wisha.' Tu tímiayi Jesus.

**9** Ataksha Jesus nin chicharuk, 'Nekas tájarme, shuar játsuk Yus ni kakarmarijiaj aentsu enentáin akupkattana nú tsawantan wáinkiatartna nu juj iijiaj pujuiniawai' tímiayi.

### Jesus nusháa iira ajasmiania nu

(Mateu 17.1-13; Rúkas 9.28-36)

<sup>2</sup>Nuyá sais tsawant nankaamasmatai, Jesus Pítruncha, Jakupuncha, Juánnasha uunt náinnium júkiarmiayi. Nuisha Jesus nushá iira ajasmiai. <sup>3</sup>Ni pushirisha ti puju jítsumir ajattsarmiayi. Nujaj métek puju awajsatin ju nunkanam atsawai. <sup>4</sup>Túrunka nuj Erías, Muisaisjaj wantinkiar Jesusjaj chichainian wáinkiarmai. <sup>5</sup>Nuyasha Pítiur Jesusan chicharuk "Uuntá, ii juj pujustin ti péñkeraiti. Menaintiú áakmaktai, Áminiu chikichik, Muisaisna chikichik, Eríasnasha chikichik" tímiayi. <sup>6</sup>Jesusa unuiniamurj sapijmainiak, Pítiur wariniak titi nekaachmiayi. Nékachu asa nuna tímiayi.

<sup>7</sup>Tura yuranjim tara mikintiu awajsamiayi. Yuranminmaya chichaak

"Júiti winia aneamu Uchir. Nii anturkatarum" tímiayi.

<sup>8</sup>Nuyanka ni unuiniamurj ayantmar iiyaj tukamar aya Jesusnak wáinkiarmai. Chíkichkia atsuarmiayi.

<sup>9</sup>Nuyá náinniumia akainiak Jesus nin chicharuk "Wáinkiarumna nu etserkairap. Wi, Aents Ajasuitjiana ju jakamunmaya nantaatsain nu etserkairap" tímiayi.

<sup>10</sup>Tutai ni tímian ímiatrusan úukarmiayi. Tura "jakamunmaya nantaatsain tana nu, ¿wariniak ta?" nuamtak tunainiarmai. <sup>11</sup>Tura Jesusan aniasarmiayi "¿Urukamtaí Israerti ii jintinniurisha, Erías emka tátiniaiti, tuinia?" tiarmiayi.

<sup>12</sup>Tutai Jesus tímiayi "Nekas Erías ashí iwiarattsa emka tátiniaiti. ¿Tura Aents Ajasunun Yus-Papinium warintua?"

"Ti wáitsattawai; Nin nakittrartatui." Tu áarmaiti.

<sup>13</sup>Wi tájarme, Erías nekas táwiti. Tá-matai, shuar ashí ni wakeriarmia nuna nin túrawarmiayi. Yusa Papirijn Eríasa túrunatniurj aarma amia tímiatrusan túrawarmiayi" tímiayi Jesus.

### Jesus iwianchin jikj akupkiania nu

(Mateu 17.14-21; Rúkas 9.37-43)

<sup>14</sup>Tura ni unuiniamurj matsatmanum atak wáketuk, ti untsurj aents káutkar Israer-shuara jintinniurisha nijiaj tunai pujuinian wáinkiamiayi. <sup>15</sup>Tura aencha, Jesusan wáinkiar warainiak, tsékenki weriar, áujarmiayi. <sup>16</sup>Túrunawarmatai, Jesus chicharainiak, "Warí tunaiyarum?" tímiayi.

<sup>17</sup>Tutai chikichik ayak "Uuntá, winia uchirun Ámin itiarjame. Iwianchruku asa chichachuiti. <sup>18</sup>Túmakui íwianch enkemtakun paat ajar áepeawai; túram uchisha saun kaput apak nain kátetete awajeawai. Túram kakaakcha ame un-

uiniamurmin seamjai, jíirtukti tusan, túrasha tujintrutkarai” tímiayi.

<sup>19</sup>Tutai Jesus tímiayi “Yúsan enentáimtichutirmea urutmá tsawantak pujustaj atumjai. Urutmá katsuntrataj! Uchi itiatarum” tímiayi. <sup>20</sup>Takui uchin Jesusan itiararmiayi. Tura íwianch uchin enkemta Jesusan wáiniak uchin ajakramiayi. Uchisha chichiptur nunká iniaan péper-péper ajakin wenunam saun apakmiayi.

<sup>21</sup>Túrunamtai Jesus ni aparín aniasmiayi “¿Urutá yaunchu áinkiait?”

Tutai ni aparí tímiayi “Úchichik áinkiaiti. <sup>22</sup>Tuma asa tuke jutikiú pujurniuiti; jiniumsha apeawai, entsá maataj tusa ajuaawai. Yaintrukminiaitkiumka waitneasam yaintrukta” tímiayi.

<sup>23</sup>Tutai Jesus chicharuk “¿Urukamtai, yaintrukminiaitkiumka, tame? Nekaata, shuar Winia nekas enentáimturna nu ashí túramniaiti” tímiayi.

<sup>24</sup>Tutai uchi aparí kakantar chichaak, “Uuntá, nekas enentáimtajme. Nekas enentáimtustinian táasjana nu yáintkiata” tímiayi.

<sup>25</sup>Tura shuar untsurí káunainian Jesus wáiniak kakantuk “Empeku chichachu awajin iwianchi jíinkitia, tájame. Jíinkim ataksha wayawaipia” tímiayi. <sup>26</sup>Tura íwianch jiiniuk untsamak uchin we-werkasa ajakar chichichiptu áepkimiayi. Túram uchi jaka ímianis tepemiayi. Túrunamtai untsurí shuar “jakayi” tiarmiayi. <sup>27</sup>Támanak Jesus uwejen achik awajkimiyai, tura uchi nantaki wajakmiayi.

<sup>28</sup>Tura Jesus jeá wayamtai, nínki pujusar, ni unuiniamurí aniasar “¿Urukamtai iisha jíiktin tujinkiamaj?” tiarmiayi.

<sup>29</sup>Tutai Jesus tímiayi “Jú iwianchkia ijiamar Yus áujkur jíikminiaiti” tímiayi.

### Jesus ataksha ni jákatniurín ujakmiania nu

(Mateu 17.22-23; Rúkas 9.43-45)

<sup>30</sup>Nuyá jíinkiar Kariréa nunkanmaani nankaamakarmiayi. Ni unuiniamurín unuinia asa nu nankaamamun nekaawarajín tusa Jesus nakitmiayi. <sup>31</sup>Unuiniak juna tímiayi: “Wi Aents Ajasuitiaj juna mantamnati tusar achirkar surutkartatui. Tura máamuítiatnak, iwiarsamunmayan menaintiú tsawantai nantaktiatjai” tímiayi. <sup>32</sup>Tura nu chichaman nekaacharmiayi. Nékainiachiat, anintrustinian arantukarmiayi.

“¿Yaki imiá nankaamantuit?”

(Mateu 18.1-5; Rúkas 9.46-48)

<sup>33</sup>Nuyá Kapernáum péprunam jeawarmiayi. Tura Jesus jeá pujus ni unuiniamurín aniniak, “¿Atumsha jintiá winisrum warí áujmatmiarum?” tímiayi. <sup>34</sup>Tura natsarar pachischarmiaiyai. Kame jintiá wésar “iijijai ¿yaki imiá nankaamantu ajasat?” tunainiarmiayi. <sup>35</sup>Ni unuiniamurí pachischarmatai, Jesus pujus ashí tuse unuiniamurín irur chichaak “Shuar nekas nankaamantu ajastajtsa wakerakka, peejchachia nuke enentáimtumar shuara yáintri atí” tímiayi. <sup>36</sup>Tura uchin itiáa miniakas chichaak: <sup>37</sup>“Shuar uchin winia naarui shiir awajeakka Winia shiir awajtai. Tura Winia akuptukua nunasha shiir awajeawai” tímiayi.

“Shuar in nakitramachkuŋka  
in páchitkiawai”

(Rúkas 9.49-50; Mateu 10.42)

<sup>38</sup>Nuyá Juan Jesusan chicharuk “Uuntá, shuar ame náarmin pachis iwianchin akupea wainkiamji. Tura iijijai írutkachu asamtai nu túratin suritkiamji” tímiayi.

<sup>39</sup>Tutai Jesus tímiayi “Antsu suritkiairap. Shuar winia náarun pachis tujinkiamun túrakka, nu shuar wari tsanumprutratniun tujinkiattawai. <sup>40</sup>Shuar in nakitramachkuṅka, in páchitkiawai, tímiayi. <sup>41</sup>Winia nemarka asakrumin shuar yumiichinkesha ajampramkuka ántar túratsui; akikma átatui’ tímiayi.

(Mateu 18.6-9; Rúkas 17.1-2)

<sup>42</sup>“Tura shuar ju uchin Winia umirtuinia nuna yajauchin túrumtikiamtáin̄kia, ti asutniattawai. Tuma asamtai uchin yajauchin túrumtiktsáin̄ kuntujen kayajaī j̄inkiar nayaantsanam ajunmaka maak ainti. <sup>43</sup>Ame uwejmek yajauchin túrumtikramamniaitkuin̄kia tsupikta. Mai uwejtuk wáitsatniunam jeatniujain̄kia chikichík uwejjaī ju nuṅkanam pujusar tuke iwiaaku pujustinnium jeatin ti shiiraiti. Warí, wáitsatniunman̄ka ji kajinkiashtin awai, <sup>44</sup>jákaru akarísha jáiniatsui tura jisha tuke kapaawai. <sup>45</sup>Nawemsha yajauchin túrumtikramamniaitkuin̄kia nusha tsupikta. Mai nawentuk wáitsatniunam jeatniujain̄kia chikichík nawejaī ju nuṅkanam pujusar tuke iwiaaku pujustinnium jeatin ti shiiraiti. Wáitsatniunman̄ka ji kajinkiashtin awai, <sup>46</sup>jákaru akarísha jáiniatsui tura jisha tuke kapaawai. <sup>47</sup>Jimisha yajauchin túrumtikramamniaitkuin̄kia ukuinkiata. Mai j̄intiuk wáitsatniunam jeatniujain̄kia chikichík j̄ij̄ijaī ju nuṅkanam pujusar Yus akupeana nūi jeatin ti shiiraiti; <sup>48</sup>wáitsatniunman̄ka jákaru akarísha jáiniatsui tura jisha tuke kapaawai.

<sup>49</sup>Naman̄ Yus susamu weaktinia áintsan̄ aentstirmesha j̄ij̄ijaī nekap-nastatrumē. <sup>50</sup>Weesha ti penkeraitiat michumarka, ¿itiurak jea-jeat áting’? Wats, wee jeakua áintsarmek atumek

shiir enentáimtunaistarum” tímiayi Jesus.

### Nuwá ajapatniun Jesus áujmatsamiania nu

(Mateu 19.1-12; Rúkas 16.18)

**10** Jesus Kapernáumnumiá j̄iinki, Jutía nuṅkanam nan̄kaamaki, Juraṅ entsa amain jeamiayi. Nūi pujaī, aents ataksha Nin iruntrarmiayi. Iruntrarmatai tuke túrin asa ataksha unuiniamiayi. <sup>2</sup>Tura Pariséu Jesusan nekapsatai tusar wakeruiniak, Nin chicharainiak “¿Áishman̄ ni nuar̄i ajapatin tsan̄kamkamukait?” tiarmiayi.

<sup>3</sup>Tutai Jesus tímiayi “¿Muisais wariniak timia?”

<sup>4</sup>Tutai “Pap̄ij̄ijaī in ajapatniun tsan̄ka-tramkamiaji” tiarmiayi.

<sup>5</sup>Tutai Jesus tímiayi “Atumí enentái kátsuram asamtai nu chichaman atumin tsan̄katramkamiarme. <sup>6</sup>Tura Yus yámankamtaik ashí najanamia nūi, áishmannasha nuwancha najanamiayi. <sup>7</sup>Tuma asamtai áishman̄ ni apar̄incha nukur̄incha kanaki ikiuki, ni nuar̄ij̄ijaī tsan̄int̄iniaiti. <sup>8</sup>Warí, áishman̄ nuar̄ij̄ijaī j̄imiaraitiat chikichik ajasartatui. Tuma asamtai yamáí j̄imiarchaiti, antsu chikichik ajasuiti. <sup>9</sup>Tuma asa, Yus atsan̄kiania nuna, aents akankashtiniaiti” tímiayi.

<sup>10</sup>Tura urum jeá wayawar, Jesusa unuiniamur̄i nu chichaman ataksha aniasarmiayi. <sup>11</sup>Tuiniakui Jesus tímiayi “Shuar ni nuar̄in ajapa ikiuak chikichan nuátkan̄ka, emka nuar̄in yajauch awajas, ikiuak, tsanirmayi. <sup>12</sup>Nuwasha ni áishri ajapa ikiuak, chikichjaī niiniurtukka, ni-isha tsanirmayi” tímiayi.

### Jesus uchin shiir awajsamiania nu

(Mateu 19.13-15; Rúkas 18.15-17)

<sup>13</sup>Antin̄kiarat tusar uchin Jesusan itiararmiayi. Túruiniakui Jesusa unuiniamur̄i “itiairap” tiarmiayi.



<sup>14</sup>Tura Jesus nuna wáiniak, kajek juna tímiayi “Uchi Winí winitin tsankatruktarum. Suritkiairap. Iis, shuar ju uchia núnisan peejchach enentáimtu-mainia nu Yusa akupeamurin pachiinkiamniaiti. <sup>15</sup>Nuní asamtai tájarne, uchi umiana núnisan Yusa akupkamurin shuar umíachkuṅka nuna pachiinkiach-miniaiti. <sup>16</sup>Nuyá uchin miniakas, “Yus yáinmakarti” tímiayi.

### **Kuítrintin Jesusan áujsamiania nu**

*(Mateu 19.16-30; Rúkas 18.18-30)*

<sup>17</sup>Ukunam, Jesus nuyá weai, shuar tseke Nin tarimiayi. Tarí tikishmatar chicharuk “¿Uuntá, Amesha ti péñkeraitme. Tuma asam, turuttia, ¿warinia túrakna tuke iwiaaku átataj?” tímiayi.

<sup>18</sup>Tutai Jesus tímiayi, “¿Urukamtai Winia, péñkeraitme, túrutam? Shuarka chikichkisha péñkerka atsawai. Aya Yúsak péñkeraiti. <sup>19</sup>Yus akupkamu nékatsmek. Ju áiniawai: tsanirmawairap, mankartuawairap, kasamkairap, chíkich shuar tsanumprurairap, anankartuawairap, apasha nukusha umirkatarum. Nu áiniawai” tímiayi.

<sup>20</sup>Tutai kuítrintin chichaak “Uunta, núnaka úchichik mash umiki tsakaruit-jai” tímiayi.

<sup>21</sup>Tutai Jesus iis waitnenmai tímiayi “Chikichik táasume. Weme ashí áiniyu ana nu surukta. Túram nu kuit kuítrincha susarta. Túrakum nayaimpiniam kuítrum ikiaunhattme. Túram winitia, krus yanaktinia áintsamek itiurchatrum ain nemartusta” tímiayi.

<sup>22</sup>Tura kuítrintin nu chichaman antuk, wake mesek, kúntuts enentáimiar wémiayi, ti kuitrintin asa.

<sup>23</sup>Nii wématai, Jesus ashí ni téntakmarin iis, ni unuiniamurin chicharuk, “Kuítrintin ainia nu Yusa akupeamurin pachiinkiatin ti itiurchaiti” tímiayi. <sup>24</sup>Takui ni

unuiniamurí nuna antukar niisháa enentáimprarmiayi. Túramtai Jesus tímiayi “Uchiru antuktarum. Shuar kuítriniak enentáimtuinia nuka, Yusa akupeamurin pachiinkiatin penké itiurchataiti. <sup>25</sup>Uunt kamiriu auja jin wayatin ana nú nankaamas, kuítrintin Yusa akupeamurin pachiinkiatin itiurchataiti” tímiayi.

<sup>26</sup>Nuna antukar nú arant niisháa enentáimprarmiayi. “¿Nuinkia yaki uwempramniait?” tunaiyarimiayi.

<sup>27</sup>Tura Jesus nin iisar chichainiak “Aents niniki túrachminiaiti, antsu Yus túramniaiti. Yuska ashí túramniaiti” tímiayi.

<sup>28</sup>Nuyá Pítiur Nin chicharuk “Iis, iikia ashí ikiukir némartsujik” tímiayi.

<sup>29</sup>Tutai Jesussha tímiayi, “Nekas tájarne, shuar Winia nemartak Yus-Chichamnasha ipiampartasa wakerak ni jeencha, yachincha, umaincha, aparincha, nukurincha, nuarincha, uchirincha, nunkencha uyumatsuk ikiuakka, <sup>30</sup>nu shuar ju nunkanam sian patatnas jeencha, yachincha, umaincha, nukurincha, uchirincha, nunkencha, ju nunkanam wáitiatat sunastatui. Tura ukunam, nunka amuukamtai, nu shuarsha jáchatainiam tuke péñker pujustatui.

<sup>31</sup>Tura untsurí shuar yamáí penkeri ainia nu, ukunam ukunmaani pujusartatui, tura íksan untsurí shuar yamáí ukunmaya ainia nu, ukunam eem pujusartatui” tímiayi Jesus.

### **Jesus ni jákatniurí ataksha ujakmiania nu**

*(Mateu 20.17-19; Rúkas 18.31-34)*

<sup>32</sup>Nuyá arak Jerusarénnum wéenak, jintiak wearimiayi. Jesuska émak wémiayi. Ni unuiniamurisha niisháa enentáimprarmiayi. Ashamainiyatan Jesusan nemarsarmiayi. Túmainiaj atak ni nekas unuiniamurin

akankiar, ni túrunatniurín ujakmiayi. <sup>33</sup>Ujaak tímiayi “Antuktarum, arak Jerusarénnum wéaji. Nuí Winia, Aents Ajasuitjiana juna, Patri uuntriincha, jintinniummasha surutkartatui. Niisha apachnium mantamnati tusar surutkartatui. <sup>34</sup>Nusha Winia wishikrur, katsumprukar, usukruawar mantuawartatui. Túramaitiatnak menaintiú tsawantai nantaktiatjai” tímiayi.

### Jakupu Juanjai seawarmiania nu

(Mateu 20.20-28)

<sup>35</sup>Sepetéu uchirí Jakupusha Juansha Jesusan taruntarmiayi. Taruntar “Uuntá, ii seattajnia nu túrak tusar wakeraji” tiarmiayi.

<sup>36</sup>Tutai Jesus tímiayi “¿Warí itiurtukat tusam wakerutam?”

<sup>37</sup>Tutai “Ame nupetmaktin tsawantrum jeamtai, iisha Ámijjai pujustaitsar wakeraji, wi untsuurumini, winia yatsursha menaarmini. Nu tsankatrukta” tiarmiayi.

<sup>38</sup>Tura Jesus tímiayi “Átum seatrumna nu nékatsrume. Wi umartatjana nu umarminkaitrum. Tura Wi imiantiatjana núnisrum imianminkaitrum” tímiayi.

<sup>39</sup>Niisha tiarmiayi, “Túramnaitji, páchitskea.”

Tuíniakui Jesus tímiayi “Wats, Wi umartatjana nu umartatrume, tura Wi imiantiatjana núnisrumek imiantiatrume. <sup>40</sup>Túrasha winia untsuuruini, menaruinisha átum pujustinian Wikia súsashtiniaitjarne, antsu Yus wakerana nu nuin apujsattawai” tímiayi.

<sup>41</sup>Tura chíkich tias unuiniamuri nuna anturkar Jakupuncha, Juánnasha ti kakerkarmiayi. <sup>42</sup>Tura Jesus ni unuiniamurín irur tímiayi “Ju nékarme; Yus-shuarchanum akupniuitjai tuinia nu, waantu enentáimtumas, ni shuarín

ti akupeawai; tura uunt ainia nusha ashí shuar ti takamtikiainiawai. <sup>43</sup>Antsu atumjai núnisan atsutniuiti. Átumka, wi unuiniamutiram, uunt ajastaj tusarum wakerakrumka, ashí yáimin ajastiniaitrum. <sup>44</sup>Shuar atumí penkeri ajastajtsa wakerakka, takarniua nuke ajas, umirtamkatí. <sup>45</sup>Wisha, Aents Ajasuitjiana ju, shuar takartusarat tusan táchamjai, antsu ashí shuáran yáintaj tusan táwitjai. Wisha jarukan shuáran uwentikratajtsan táwitjai” tímiayi.

### Jesus Partimiásan tsuármiania nu

(Mateu 20.29-34; Rúkas 18.35-43)

<sup>46</sup>Jesus ni unuiniamurijjai, tura chíkich untsurí aentsjai Jirikiú péprunam jeawarmiayi. Nuyá Jirik-iúnmayasha jíinkiar weenai, Timiasa uchirí Partimiás, kusuru amia nu, jintiá yantam kuítian seamu pujumiayi. <sup>47</sup>Niisha, Nasarénumia Jesusaiti táman antuk, untsumuk “Uunt Jesusa, amesha Uunt Akupin Tawit weeachukaitiam, Yus anaikiachmakaitiam. Winiaja waitnentrurta” tímiayi.

<sup>48</sup>Tura untsurí nuí matsamarmia nu nin chicharainiak “Takamatsata” tiarmiayi.

Niisha nú nankaamas untsummiayi “Tawit weeá Jesúsá, winia waitnentrurta.”

<sup>49</sup>Nuna antuk Jesus wajatas, chichaak “Untsuktarum” tímiayi.

Takui shuar kusurun untsuiniak “Kakaram ajasta. Wajaktia; untsurmawai” tiarmiayi.

<sup>50</sup>Tuiniakui niisha esekmatairín ajapa ikiuak wajaki Jesusan tseke tarimiayi.

<sup>51</sup>Tura Jesus nin chicharuk “¿Winia itiurtukat tusamea wakerutam?” tímiayi.

Tutai kusuru chicharuk “Uunta, íimti-asan wakerajai” tímiayi.

<sup>52</sup>Tutai Jesus chichaak “Shiir wetá. Winia nekas enentáimtursa asam

pénker ajasume” tímiayi. Tura nu chichamaik ímprimiayi. Tura Jesusan nemarki wémiayi.

### Jesus Jerusarénnu wayámiania nu

(Mateu 21.1-11; Rúkas  
19.28-40; Juan 12.12-19)

**11** Wésar Jerusarénnu tura Petpajái péprusha Petania péprusha Uriwiu naint ínkiuasmak ámanum jeawar, Jesus jimiará unuiniamurín ujuikimiayi. <sup>2</sup>Ujuiak tímiayi “Aatuniní pépruchiniam werum nuin umpuuru uchich jin\_kiamu wáinkiatarme. Nu umpuuruka tuke entsamprukchamuiti. Nu atiarum utitiarum. <sup>3</sup>Tura “¿Urukamtia áitkiarum?” turamainiakuisha, “ii Uuntri wakerawai” titiarum” tímiayi. <sup>4</sup>Tutai wearmiayi. Tura umpuurun wáitiniam aani jin\_kiamun, jintiá yantamnum wajan wáinkiar atiawarmiayi. <sup>5</sup>Nu pujuarmia nu “¿Warí áitkiarum. Urukamtai umpuuru atíarum?” tiarmiayi. <sup>6</sup>Takui, niisha Jesus timia nu ujakam suritkiacharmiayi. <sup>7</sup>Tura umpuurun Jesusan itiarar pushirín umpuurunam awantkarmiayi. Túram Jesus entsamkamiayi. <sup>8</sup>Tura untsurí shuarsha pushirín jintianam ayapar áinkiarimiayi. Chíkichcha jintiá yantamnumián nukan juuk jintianam áintrarmiayi. <sup>9</sup>Eem wearmia nusha, uku winiarmia nusha warainiak “Jusanna” untsumkarmiayi. “Yusa náarín winiana nu imiá pénkeraiti. <sup>10</sup>Ii uuntri Tawitia akupeamurí tátatna nu imiá penker atí. Ii Yusrí naari shiir ati.” Tu untsumki wearmiayi. <sup>11</sup>Tura Jesus Jerusarénnu jeamiayi. Jeá, Yusa Uunt Jeen wayamiayi. Tura ashí iiyasua amik, kintiampráij tusa ni tuse unuiniamurijíají tjiyuch Petania péprunam wearmiayi.

### Jesus iikiu numin yumin\_kramiania nu

(Mateu 21.18-19)

<sup>12</sup>Kashin tsawar, Petanianmaya jintia wesa, Jesus tsukammiayi. <sup>13</sup>Tura arant wajan iikiu numirín núkenniun wáiniak, nereatsuash tusa iyumiayi. Tura neresh-tairín asamtai neren penké wáinkiach-miayi. <sup>14</sup>Nuyá iikiu numin yumin\_keak: “Ame nerem penké yunaashti” tímiayi. Ni unuiniamurísha nuna táman antukarmiayi.

### Yusa Uunt Jeen suruktiniam Jesus suritkiamiania nu

(Mateu 21.12-17; Rúkas  
19.45-48; Juan 2.13-22)

<sup>15</sup>Nuyá atak Jerusarénnu jeawarmiayi. Nuí Jesus Yusa Uunt Jeen wayá suruktai tusar pujuarmia nuna jiki akup-katasa nan\_kammiayi. Kuftian yapajin armia nuna misarín tura yampitsan súrin armia nuna kutankrincha ayanturmiayi. <sup>16</sup>Tura káarak entsaki Yusa Uunt Jeen nan\_kaamaktiniam suritkiarmiayi. <sup>17</sup>Nuyá “Yus áuj\_satai tusar ashí shuar Yusa jeen wayámnia átatuí” tú aarchamukait Yusa Papirín. Antsu átumka Yusa jee kasa matsamtaiya nútikiarme” tímiayi. <sup>18</sup>Aents nuí matsamarmia nu Jesusa chichamen antukar ti enentáim-prarmiayi. Tuma asamtai Israer-patri úntrisha, Israer-shuara jintinniurísha, nuna nekaawar, Jesusan ashamainiak mantamnati tusar chichaman jurusarmiayi. <sup>19</sup>Nuyá kíkui Jesus Jerusarénnu-miá jin\_kimiayi.

### Iikiu numin káarun wáinkiamiania nu

(Mateu 21.20-22)

<sup>20</sup>Kashin káshik nan\_kaamainiak iikiu numin kan\_kaptuk jaka wajan wáinkiarimiayi. <sup>21</sup>Tura Pítiur enentáimias Jesusan tímiayi “Uunta,

iista, iikiu Ame yumin<sub>u</sub>kramam nu kan<sub>u</sub>kaptuk káarchaik.”

<sup>22</sup>Tutai Jesus tímiayi “Yus nekas enentáimtustarum. <sup>23</sup>Iis, nekas tátsujrumek, shuar “Yus nekas túratpiash” tútsuk, tura “wi tájana nuna Yus nekas túrattawai” tu enentáimsar, ju náintian “jiinki nayaantsanam iniánti” tákuinkia, páchitsuk iniantatui, tímiayi. <sup>24</sup>Tuma asantai tájarne, ashí Yus áujukuram searmena nuna suramsattarme. “Wi seajna nuna yamá takakjai” tu enentáimkiurmeka, wáinkíattarme. <sup>25</sup>Tura Yus áujukuram pujarmena nu, kajernaiyamuram ákuinkia tsan<sub>u</sub>kurnáiratarum. Atumí Aparí nayaimpiniam pujana nu atumí tunaarín tsan<sub>u</sub>kurturti tusarum túratarum. <sup>26</sup>Atumsha tsan<sub>u</sub>kurnáiy-achkurminkia, núnisan atumí Aparí nayaimpiniam pujana nu atumí tunaarín tsan<sub>u</sub>kurtámprashtatrumé” tímiayi Jesus.

### **Yusa kakarmarijiaí Jesus takasmiania nu**

*(Mateu 21.23-27; Rúkas 20.1-8)*

<sup>27</sup>Ataksha Jerusarénum waketkiarmiayi. Jesus Yusa Uunt Jeeñ wekai, Israer-patri úuntri<sub>u</sub>sha, Israer-shuara jintinniur<sub>u</sub>sha, Israer-shuara iruntai-jee úuntri<sub>u</sub>sha Nin káutkar<sub>u</sub>miayi. <sup>28</sup>Káutkar Jesusan tiarmiayi “¿Yana kakarmarijiaí ju túram. Ame túramna nuna ya tsan<sub>u</sub>katrama?” tiarmiayi.

<sup>29</sup>Tuiniakui Jesus tímiayi, “Chikichkiniak aniatatjarne. Áirkatarum. Túrakrumni<sub>u</sub>kia Wisha winia takastinian tsan<sub>u</sub>katruk<sub>u</sub>mia nuna ujaktatjarne. <sup>30</sup>Wats, turuti<sub>u</sub>arum, ¿ya Juan imiaitniun tsan<sub>u</sub>katkama? ¿Shuar tsan<sub>u</sub>katkamka? ¿Yus tsan<sub>u</sub>katkamka? Áirkatarum” tímiayi.

<sup>31</sup>Tura niisha enentáimprar “Yus akupkai<sub>u</sub>” tákurninkia, “¿urukamtia umirkachuram?” turamchattajik.

<sup>32</sup>Antsu “shuar tsan<sub>u</sub>katkai<sub>u</sub>” tákurkia, ashí shuar ashamaji” tunainiarmiayi. Ashí aents Juan nekas Yúsnan etserniuiti, tu enentáimainiakui ashammiarmiayi. <sup>33</sup>Nuyá Jesusan tiarmiayi “Iikia nékatsji.”

Tutai Jesus tímiayi “Wisha núnisnak yana kakarmarijiaí takaaj nuna ujakchattajrume.”

### **Yajauch takau armia nu**

*(Mateu 21.33-46; Rúkas 20.9-19)*

**12** Jesus ju métek-taku chichaman unuiniamiayi: “Shuar uwa ajan ajam wenuimiai. Nuyá uwa nekeetain najanamai. Tura kumpin jean najanamai. Najana takartusti tusa shuáran ikiuak ni<sub>u</sub>nkia jeachat wémai. <sup>2</sup>Neretai tsawant jeamtai, ni takarniurín júukman akankat tusa akupkamai. <sup>3</sup>Tura ajanam takau arma nu, nu takarniun achik, katsumkar, áyatic awain<sub>u</sub>kiar<sub>u</sub>mai. <sup>4</sup>Ataksha chíkich takarniun akupkamai, tura nunasha kayajai tukurar, múuknum katsumkar, katsekar awain<sub>u</sub>kiar<sub>u</sub>mai. <sup>5</sup>Tuma ain ataksha chíkichan akupkamai, tura nunasha máawarmai. Ti untsurín akupramai. Chikichnasha katsumkarmai, chikichan máawarmai.

<sup>6</sup>Tura niijiaí chikichik tuke ámiayi, nuka ni aneamu uchir<sub>u</sub>. Nu uch- incha ukunam akupkamai. Akupeak “Winia uchir<sub>u</sub>naka shiir awajsartatui” tímiayi. <sup>7</sup>Tura ni uchir<sub>u</sub> winian wáinkiar, takau shuar nuámtak chichainiak “Júka ajá nérenniu uchir<sub>u</sub>nti. Wátsek, maatai; túramka ájaka iiniu átatui” tiar<sub>u</sub>mai. <sup>8</sup>Túsar achikiar máawarmai. Ayashincha ajanmayá ajapawarmai” tímiayi.

<sup>9</sup>Tura nuyá aniasmiayi, “¿Wats, warí enentáimsarum; ajá nérenniur<sub>u</sub> iturkat-tawa? Jeashtanmayá taa, ajá takainia nú shuaran amuktatui. Ni ajar<sub>u</sub>ncha chíkichan ikiastatui. <sup>10</sup>Ju, Yus-Papinium aarma ana nu áuj<sub>u</sub>sachukaitrum:

Kaya péñkernak, jeammin “yajauchiiti” tusar ajapawarmia nu ashí kaya-jai nankaamas péñker apujsamuiti.  
<sup>11</sup>Nusha Yus túramuiti. Iisha íisar ti enentáimtaji.

Nuke áarmaiti” tímiayi.

<sup>12</sup>Tura nú metek-taku chichamjai nin áujmatma asa achiktai tusar chichaman jurusarmiyai. Túmainiyat shuáran ashmainiak Jesusan ikiuiniak wearmiayi.

**Uunt akupin súsatin tura Yus súsatin**  
*(Mateu 22.15-22; Rúkas 20.20-26)*

<sup>13</sup>Tura wear, imiaamtikiar yajá chichakmatai nújai yajauch títai tusar Pariséu shuarnasha, Erutisa nemanin shuarnasha akatar Jesusan akuptukarmiyai. <sup>14</sup>Túram Nin jeariar chicharainiak: “Uuntá, aents nakitaiainiain tuke nekas chicham páchitsuk chichaame, nu nékaji. Aents pátatek iyatsme, antsu nekas Yusa jinti unuiniame. ¿Waritia enentáimiam, ii kuitri uunt Sesar súsatin péñkerkait. Susattajik. Suritkiattajik? Nu nekaatai tusar wakeraji” tiarmiayi.

<sup>15</sup>Tura Jesus ni yajauch enentáim-miarin nekara “¿Urukantai Winia ya-jauch titi tusarum wakerutarum? Kuit itiatarum, Wi íistaj” tímiayi.

<sup>16</sup>Tutai kuftian itiararmiayi.

Jesus nuna iis tímiayi, “¿Juisha yana yapí tura yana naari áarmait?” tímiayi.

Tutai “Uunt Sésarna” tiarmiayi.

<sup>17</sup>Nuyá Jesus tímiayi “Uunt Sésarna ana nu susatarum; túrarum Yúsna Yusa susatarum” tímiayi. Tura ni áimki-amurin antukar ti enentáimprarmiyai.

**Aents nantaktinian Satuséu anintrusarmiania nu**

*(Mateu 22.23-33; Rúkas 20.27-40)*

<sup>18</sup>Nuisha Satuséu aents, jakamun-maya nantaktin penké atsawai tiniu armia nu, Jesusan tariarmiayi. Taar Je-

susan chicharainiak: <sup>19</sup>“Uuntá, Muisais juna áatrampramijai:

“Áishman ni nuari júreatsain jakam-tainkia, yachin yajutmatratsa, ni yachi nu wajen nuátkatniuiti.”

<sup>20</sup>Wats, siati yachi áarmiayi. Iwiairi nuwan nuatak yajutmatsuk jakamiayi.

<sup>21</sup>Ni yachi wajen akinkiamiayi. Nusha núnisan yajutmatsuk jakamiayi. Nuna yachisha núnisan tura nuna yachisha núnisan túramiyai. <sup>22</sup>Tura ashí siati patainman, patainman nu nuwan nuátkarmiayi. Yajutmatsuk, yajutmatsuk jíiniawarmiyai. Tura ukunam nuwasha jakamiayi. <sup>23</sup>Nuinkia nantaktin tsawantai, nantakiarmatai, ¿yana nuarin ati? Ashí siati nuátkacharmaka” tiarmiayi.

<sup>24</sup>Tutai Jesus tímiayi ““Jakamun-maya nantaktin atsawai” tátsurmek. Yusa chichame tura Yusa kakarmari nékachu asarum awajiarne, tímiayi.

<sup>25</sup>Iimiatarum, aents jakamunmaya nantakiarmatai, nuatnaikiatin atsuttawai, antsu nayaimpinmaya suntara núnisan pujusartatui. <sup>26</sup>Tura jakamunmaya nantaktiniapitia tusarum nu nekaatin nekas wakerakrumka Muisais aarmia nu enentáimtustarum. Yuska numich-inmaya Muisaisan chicharuk “Wikia Apraáma Isaaka tura Jakupu Yúsríntjai” Yus tímiayi. <sup>27</sup>Yaunchu jákaru ain, Yus nuna taku, ayashnium jakayat iwiaaku pujuinia nuna Yusríntjai, tawai. Nekas jaka ainia nuna Yusrínchuiti. Nantaktin atsawai tau asarum awajirurme” tímiayi Jesus.

**Yus akupkamu imiá péñker ainia nu**

*(Mateu 22.34-40)*

<sup>28</sup>Jesussha Satuséusha áujmatnainian Israer-shuara jintinniuri taa anturkami-ayi. Anturak, Jesus ti penker áimkiui, niisha Jesusan juna aniasmiayi: “¿Yus akupkamu tuá imiá péñkerait?” tímiayi.

<sup>29</sup>Tutai Jesus tímiayi “Júiti Yus akupkamu imiá pé<sub>n</sub>ker: Antukta Israer shuará. Ii Yus<sub>r</sub>i úuntaiti, tura Ni<sub>n</sub>ki nekas Yúsaiti. <sup>30</sup>Tuma asamtai, tuke enentáimjái ti enentáimsam Uunt Yus aneeta. Túram ame iwiaakmarmesha, kakarmarmesha Yus íiktusta. Núiti nekas pé<sub>n</sub>ker akupkamu, tímiayi. <sup>31</sup>Nuyasha chikichcha awai, “ame ayashim aneamna tímiatrusmek ame írutramurmesha aneeta.” Chíkich nu nan<sub>k</sub>aamas pé<sub>n</sub>ker akupkamu atsawai’ tímiayi.

<sup>32</sup>Tutai jintintin tímiayi “Ee, pé<sub>n</sub>keraiti, Uunta. Nékasme<sub>k</sub> tame. Chikichík Yus awai, chíkichkia atsawai. <sup>33</sup>Tura tuke enentáijijái ti enentáimsar, ii kakarmarísha Yus íiktusar Nin aneakrikia, ii ayashí aneajnia núnik ii írutramurísha aneatniuitji. Nusha ashí Yus sutai ana nu<sub>j</sub>ai nan<sub>k</sub>aamas pé<sub>n</sub>keraiti’ tímiayi.

<sup>34</sup>Nuna tiniu asamtai Jesus ni pé<sub>n</sub>ker áimkian nekáa “Ameja Yus akupeamunam pachiiinkiatin ishichik táasume” tímiayi. Tura nuyá chíkich shuar Jesusan aniastinian arantukarmiayi.

### **Kristu tutai ¿yana uchirímpait?**

*(Mateu 22.41-46; Rúkas 20.41-44)*

<sup>35</sup>Jesus Yusa Uunt Jeen unuiniak pujumiayi. Tura chichaak “¿Urukamtai ii jintinniurí “Yus anaikiamu Krístun Tawitia shuari” tuinia?” <sup>36</sup>Tawit, antsu, Yusa Wakaní aarta tutai, Yus-Papinium juna áarmiayi:

Uunt winia Úuntrun tímiayi “Ame nemasrumin nupetkatin amuatsáin winia untsuuruinini pujusta”.

<sup>37</sup>Kame Tawitkia, Krístun áujmatuk, “winia Uuntru” taisha, ¿itiura ní shuarísha átink’?” tímiayi Jesus. Tuma asamtai untsurí shuar nu<sub>j</sub> matsamarmia nu ti shiir antukarmiayi.

### **“Israer-shuaran jintintin ainia nújái aneartarum” Jesus tímiania nu**

*(Mateu 23.1-36; Rúkas 11.37-54; 20.45-47)*

<sup>38</sup>Jesus unuiniak tímiayi, “Israer-shuara jintinniurí ainia nu<sub>j</sub>ái aneartarum. Niisha waantu enentáimtumasar, esaram pushin entsasar wekasatajtsar wakeruiniawai. Péprunmasha shuar shiir áujtusarat tusa wakeruiniawai. <sup>39</sup>Israer-shuar iruntainiam pen<sub>k</sub>erí pujutainium pujustinian wakeruiniawai. Nampernumsha pen<sub>k</sub>erí pujutainium pujustinniasha wakeruiniawai. <sup>40</sup>Tura wajé jeencha atantainiawai. Túrawar aents nekaracharat tusar ti esaram chichamjái Yúsan áujainiawai. Nincha chikichjái nan<sub>k</sub>aamas Yus asutiawartatui” tímiayi.

### **Waje kuítrín susamiania nu**

*(Rúkas 21.1-4)*

<sup>41</sup>Jesus Yusa Uunt Jeen kuit enketainiam naka pujus áents kuítrín chumpian wáinkiamiayi. Untsurí kúitrín tin núkap en<sub>k</sub>eawarmiayi. <sup>42</sup>Nuyá wajé kuítríncha taa jimiará uchich kuítian, reara áantsan, en<sub>k</sub>eamiayi. <sup>43</sup>Jesuska unuiniamurín untsuk “Nekas tájarme, ju wajé kuítrínchaitiat, ashí en<sub>k</sub>eena nú nan<sub>k</sub>aamas núkap en<sub>k</sub>eayi. <sup>44</sup>Iis, kuítrinniusha nii ampirma nuna en<sub>k</sub>eenawai, tura antsu ju nuwá kuítrínchaitiat, ampirmatsuk ni yurumatniurín takurmakman ashí en<sub>k</sub>eayi” tímiayi.

### **Yusa Uunt Jeen yumpuntratniun Jesus ujakmiania nu**

*(Mateu 24.1-2; Rúkas 21.5-6)*

**13** Yusa Uunt Jeenia Jesus jiinkimtai, unuiniamurí Nin

tímiayi “Iisia, Uunta, kayasha ti shiir áiniawai. Jeasha imiá úuntchakait.”

<sup>2</sup>Tutai Jesus tímiayi “Jü imiá uunt jea wáinmek. Kaya ekenramu au ashí mash yumpunrartatui” tímiayi.

### **Amuukatin tsawantin uruku átatna nu**

*(Mateu 24.3-28; Rúkas 21.7-24; 17.22-24)*

<sup>3</sup>Nuyá Uriwiu náinnium wakar, Yusa Uunt Jee naka pujusar, Pítrusha, Jakupusha, Juansha, Antressha, nínkimias Jesusan aniiniak <sup>4</sup>“Uuntá, tímiam nu, çurutiá túrunatta. Nu túrunatin jeakuisha itiura nekaattajia? Paant ujatmakta” tiarmiayi.

<sup>5</sup>Tutai Jesus tímiayi “Aneartarum, anankramawairap. <sup>6</sup>Nekaatarum, untsurí winia naarun pachisar winiartatui. Chíkich chíkich “Wíitjai Kristu” taku, untsurín anankawartatui. <sup>7</sup>Tura meset chicham ántakrumka, yajaya meset chicham ántakrumsha sapijmiakairap. Nekas túrunashtinkiait. Nujajsha amuukatin tsawantka tuke jeatsui, tímiayi. <sup>8</sup>Shuar chíkich shuarjai mesetan najanawartatui; apachcha chíkich apachjai núnisan mesetan najanawartatui. Untsurí nunkanam úrkattawai. Tsukasha ártatui, charaatum ajamusha núnisan ártatui. Tura nujai itiurchatka aya yama nankamui.’

<sup>9</sup>“Túmaitkui atumsha aneartarum. Akupin iruntainiumsha surutmakartatrume, tura íi shuar iruntainmasha katsumpramkartatrume. Wíi shuar asakrumin, kapitíannium, akupniunmasha juramkittiarume. Nuí jearum, Winia chichastatrume. <sup>10</sup>Nu túruntsain ashí áentsnum Yus-Chicham etsernaktiniaiti. <sup>11</sup>Atumin surutmaktasar juramainiakuisha, warintiajak tusarum ti enentáimsairap. Chichastin jeamtai, Yusa Wakaní

jintintramattarmena nu titiarum. Iis, atumí enentájjai tíchattarme, antsu Yusa Wakaní jintintiam títiatrume. <sup>12</sup>Nu tsawantin shuarsha ni yachín mantamnati tusa suruktatui. Apasha ni uchirín suruktatui. Uchisha aparíncha nukuríncha kajerak, jakati tusa suruktatui. Núnisan untsurí shuar túrawartatui. <sup>13</sup>Nuínkia Wíi shuar asakrumin ashí nakitramprartatui. Tura shuar yawetsuk katsuñrañka uwemprattawai” tímiayi.

<sup>14</sup>Nuyá Jesus tímiayi “Shuar juna áujeana nu nekaati. Yúsnan etserin, ni naarí Taniar, ti yajauch tuke emesin ana nuna yaunchu aar etserkamiayi. Nuka pujushtainiam pujan wáinkiumesha, ashí Jutía nunkanam pujarmena nu, náinnium pisartarum. <sup>15</sup>Jeá yakiini pujana nu akaiki wariri achiktajtsa, jeen wayashti. <sup>16</sup>Ajanam pujana nusha ni pushirín jukitiajtsa waketkishti. <sup>17</sup>Tura ajamtin áiniana nusha, kuírchin umuntsainia nusha, nu tsawantin timiá itiurchatan wáinkiertatui. <sup>18</sup>Tuma asamtai átum pisaarmena nuí yumitin ahati tusarum Yus seatarum. <sup>19</sup>Nu tsawantinkia ti wáitsatin ártatui. Yama nankamtaik Yus nunkan najanama nuísha, yamaisha ukunmasha timiu wáitsatin penké atsuttawai. <sup>20</sup>Tura Uunt Yus wáitsatin tsawantan ishichik awajsattajai tíchaitkuínkia, uwempratín penké atsuinti. Tura ni shuarín anaikiamia nuna yáintajtsa wakerak, nu tsawantan ishichik awajsattawai. <sup>21</sup>Nu tsawantai “júiti Kristu” túramkuínkia anturkairap. <sup>22</sup>Kame “Kístuitjai” ántar tuinia nu, tura “Yúsnan etserniuitjai” ántar tuinia nusha wantinkiertatui. Wantinkiar Yus anaikiamu shuárnasha anankatai tusar wakeruiniak, ni kakarmarín iniakmainiak aentsti tujintiamun túrartatui. <sup>23</sup>Tura átum aneartarum. Aetak, túruntsain ujakchajrumek’ tímiayi Jesus.

### Aents Ajasu tutai tátrintri

(Mateu 24.29-35,  
42-44; Rúkas 21.25-36)

<sup>24</sup> Jesus tuke unuiniak juna tími-ayi: “Tura nu wáitsatin nan̄kaamas-matai, etsaasha nantusha etsantrashtatui. <sup>25</sup> Yaasha nayaimpinmaya kakekartatui, tura nayaimpiniam kakaram ainia nu muchitrartatui. <sup>26</sup> Nuyasha ashí aents Winia wáitkiartatui. Wi, Aents Ajasuit-jiana ju, ti kakaran, ti wincha ajasan, yuranminiam winiáí wáitkiartatui. <sup>27</sup> Nui nayaimpinmaya suntarun akupkattajai, Wíi shuaran ashí nun̄kanmayan irurarat tusan. Arakaaniya, nun̄kaaniya, ashí nun̄ka nan̄katkamunmayan Wíi shuaran irurartatui.’

<sup>28</sup> ‘Ikiu numi nakumea nu nekaatarum. Ni chin̄kimpri pun̄kak nuke jeakuí, “ju nun̄kanam esat jeatemai” tátsurmek. <sup>29</sup> Núnisrumek Wi tájarmena nu wáinkiumeka, ni tatintri jeatemai tu nekaattarme. <sup>30</sup> Nekas tájarme, yamaí aents pujuinia nu kajin̄ amuiniatsain̄, ashí Wi tájana nu túrunatniuiti. <sup>31</sup> Nayaimpisha nun̄kasha amuukatniuiti. Tura winia chichampruka amuukashiniaiti. <sup>32</sup> Tura tsawantcha nekanachminiaiti. Nayaimpinmaya suntarsha nékainiatsui; Wisha Yusa Uchir̄ntiitan nékatsjai. Aya winia Aparuk nékawai. <sup>33</sup> Atumsha anearum enentáimprarum Yus aujsa pujustarum, tsawant nékachu asarum.’

<sup>34</sup> “Tura Wikia ju shuarjai méteketjai. Ju shuarsha jeachat weak, ni jeen ikiuawai. Ikiuak ni shuarin̄ wáitrukartí tusa apujas ikiuak ashí shuaran takatrin̄ súawai. Tura wáitin̄ wáinnun̄, “ameja péñker wáinkiaita” tímiyai. <sup>35</sup> Wikia nu jea nérenniua núnisnak, urutai tátataj nékachu asarum anearum pujustarum. Kíaraimpiash, tura ajapkeash, atash shiniukaimpiash, káshikiash tátatjai. <sup>36</sup> Nérentin̄ aya aneachmak taa, kanúu

tepai wáitkiaí tusarum anearum. <sup>37</sup> Wi atumin̄ tájana nu, ashí shuaran tajai, anearum pujustarum” tímiyai Jesus.

### Jesusan chichaman jurusarmiania nu

(Mateu 26.1-5; Rúkas  
22.1-2; Juan̄ 11.45-53)

**14** Jímiarchikí tsawant ajasmiaiyi paskua tutai námper jeatin. Paskua námperincha wakapruachu tantan yuatin námpernasha métek najanin̄ ármiyai. Israer-patri uuntrīsha, Israer-shuara jintinniur̄isha Jesusan anañkar achikiar maatai tusar wakeriarmiayi. <sup>2</sup> Túrasha “Jista tsawantin̄ túrachmi, aents charaatum ajarain̄ tusar” tiarmiayi.

### Nuwá kun̄kuinian Jesusan ukatramiania nu

(Mateu 26.6-13; Juan̄ 12.1-8)

<sup>3</sup> Jesussha Petania péprunam tunamaru Semun̄ka jeen misanam pujan, nuwá tarimiayi. Nartu kun̄kuinian arapástru tutai kaya najanamunam piakun̄ itiamiayi. Nu kun̄kuin̄ ti kuitiati. Mutí chuchuke kupik Jesusa muuken̄ kun̄kuinian ukatramiaiyi. <sup>4</sup> Tura nuí pujuarmia nu, kajerar tunaiyarmiayi “¿Urukamtai ju kun̄kuinian ántar wasurea? <sup>5</sup> Junasha súrakka, menaintiú sian̄ kuítnium surukminiuyi. Nu kuitcha kuítrinchan súsan̄ka maak” tiarmiayi. Tusa nuwan̄ kajerarmiaiyi.

<sup>6</sup> Antsu Jesus chicharainiak “Iniaisatarum. ¿Urukamtai au kajerarum? Winia shiir túrutayi, tímiyai. <sup>7</sup> Kuítrincha atumjai tuke íruntsuk. Wakerakrumka tuke péñker awajsatniuitrume. Antsu Wikia atumjai tuke pujushtatjai. <sup>8</sup> Ju nuwá ashí nii túramnia núnaka umikiaí. Wi jákatin̄ jeatsain̄, iwiarsatin̄ kun̄kuinian shiir ukatruai. <sup>9</sup> Nekas tájarme, ashí



nun<sup>h</sup>kanam Yus-Chicham etsernaktatna nu<sup>i</sup>, ju<sup>h</sup> nuwá túramurísha etsernaktatui, nin kajinmatkiarain<sup>h</sup> tusa” tímiayi.

### Jútas Jesusan suruktaj timiania nu

(Mateu 26.14-16; Rúkas 22.3-6)

<sup>10</sup>Nuyá Jútas Iskariúti, Jesusa unuiniamuríntiat, Israer-patri uuntrin<sup>h</sup> werimiayi, Jesusan suruktaj tusa. <sup>11</sup>Niisha nuna antukar, warasar “Kuit amasataji” tiarmiayi. Jútassha Jesusan itiu-rak yúpichuch tsankamkattaj tusa enentáimias wekaimiayi.

### Jesusjai iruntrar yurumáwarmia nu

(Mateu 26.17-29; Rúkas 22.7-23; Juan 13.21-30; 1 Kurintiunam 11.23-26)

<sup>12</sup>Wakapruachu tantan yuatin jísat nan<sup>h</sup>kama tsawant tsawarmatai, paskua námpertin yúatin murik máatin jeamtai, Jesusa unuiniamurí iniasarmiayi “Paskuatin murikiu yúatin iwiaratai tusar ¿tui<sup>h</sup> wétataji<sup>i</sup>. Tui<sup>h</sup> yurumattam?” tiarmiayi.

<sup>13</sup>Tutai Niisha jimiará unuiniamurín akatar akupeak “Péprunam wetarum. Nu<sup>i</sup> áishman<sup>h</sup> yumin jukí wéa wáinkiatarme. Nu áishman<sup>h</sup> nemarsatarum. <sup>14</sup>Wayana nu<sup>i</sup> jeá nérenniurí títiarum “Unt túramui, ¿wisha, unuiniamurjai<sup>h</sup> tui<sup>h</sup> yurumáttaj?” <sup>15</sup>Nu nérentin, yakí písunam uunt tesamunam ashí iwiaramun iniakturmastatrume. Nu<sup>i</sup> jísat ii najanatin iwiaratarum” tímiayi. <sup>16</sup>Ni unuiniamurí wear, péprunam jeawar, Jesus timia núnisan<sup>h</sup> wáinkiarimiayi. Tuma ásar paskua námperan iwiararmiayi.

<sup>17</sup>Nuyá kíakui Jesus ni tuse unuiniamurijjai<sup>h</sup> wayawarmiayi. <sup>18</sup>Niisha misanam pekaamak, yurumáiniak pujusar, Jesus tímiayi. “Nekas tájarne, chikichík shuar Wijjai<sup>h</sup> yurumna nu, surutkattawai.”

<sup>19</sup>Nujai<sup>h</sup> kúntuts enentáimprarmiayi. Chíkich chíkich Jesusan aniasar “wáshitaj<sup>h</sup>” tiarmiayi.

<sup>20</sup>Jesus tímiayi “Ju<sup>h</sup> misanam tuse irunar yurumprum nu, chikichik surutkattawai. Wijjai<sup>h</sup> pininum yurumkan ayak yuana núiti. <sup>21</sup>Nekas Wi, Aents Ajasuitjiana ju<sup>h</sup>, jákatniunam wéajai, áar-turma áintsanak. Tura áishman<sup>h</sup> súrutna nu ti wáitsattawai. Niisha akiinmainchu ajakuiti” tímiayi.

<sup>22</sup>Yurumainiak Jesus Yúsan yuminkias, yurumkan achik, puuk, chicharainiak “Achiktarum, jusha winia ayashruiti” tímiayi. <sup>23</sup>Pini<sup>h</sup>nasha achik, Yúsan yuminkias, ni unuiniamurín súsarmiayi. Ashí umararmiayi. <sup>24</sup>Umararmatai Jesus tímiayi “Júiti winia numpar, untsurín yáintajtsa puártinia nu. Nujai<sup>h</sup> Yamaram Chichaman Yus najanaiti. <sup>25</sup>Nekas tájarne, uwa yumirí ataksha ju<sup>i</sup> umarchattajai. Tura tsawant jeamtai, ukunmasha, Yus akupeana nu<sup>i</sup> yamarman umartatjai” tímiayi.

### Pítiur natsantratnia nuna Jesus ujakmiania nu

(Mateu 26.30-35; Rúkas 22.31-34; Juan 13.36-38)

<sup>26</sup>Yus-kantan kantámawar, jíinkiar, Uriwiu náinnium wearimiayi. <sup>27</sup>Nu<sup>h</sup>inkia Jesus nin tíarmiayi “Ju<sup>h</sup> kashi átum natsantrurtatrume. “Murikiu wáinnium máattajai, túramtai murik tsakinmakartatui” tu aarchamukait. <sup>28</sup>Tura ukunam Wi nantakin atumin Kariréanam émtuktajrume” tímiayi.

<sup>29</sup>Tutai Pítiur chicharuk “Ámin ashí natsantramainiakuisa, wikia natsantrashtatjame” tímiayi.

<sup>30</sup>Tutai Jesus tímiayi “Nekas tájame, ju<sup>h</sup> kashi atash jimiará shiniatsain<sup>h</sup>, natsantrurtatme. “Núnaka nékatsjai” menaintiú turuttiatme” tímiayi.

<sup>31</sup>Tutai Pítiur kakaram chichaak “Ámijjai<sup>h</sup> métek máantuiniakuisha, núnaka penké tíchattajai” tímiayi. Ashí ni unuiniamurí núnisan<sup>h</sup> tiarmiayi.

### Jesus Jitsemaní ajanam Yúsan áujksamiania nu

(Mateu 26.36-46; Rúkas 22.39-46)

<sup>32</sup> Nuyá Jitsemaní ajanam wearimi-ayi. Jeawar Jesus ni unuiniamurín tími-ayi. “Juí pujustarum, Yúsan áujsatasa pujají”. <sup>33</sup> Pítrun, Jakupuncha, Juán-nasha jukimiayi. Tura Jesuska ti kuntuts enentáimiar wake mesek nekapsatasa nankammiayi. <sup>34</sup> Tura nin chicharuk “Wi ti kuntuts enentáimjai, tura jakamnia nekapeajai. Juí iimia pujutarum” tími-ayi. <sup>35</sup> Jesussha ishichik arantach we, nunká piniakumar tepes Yúsan aujmi-ayi. “Ju wáitsatin átatna nu, túrutat-niuitkuinkia iniaitiusta” tu seamiai. <sup>36</sup> Tuke áujuk tímiayi “Apawá, ashí tujinchaitme. Pininnumiá ashí umartinia áantsan ti nekapsatajna nú wáitsatniun, jurutkitia. Antsu Wi wakeraj nucha, ame wakeramuram túrunati.” <sup>37</sup> Tura ni unuiniamurín tarin, kanúu tepenan wáinkiamiayi. Pítrun tímiayi “¿Semunka kánamek. Kanutsuk ishichk-isha iimia pujustin tujinkiammek? <sup>38</sup> An-earum Yus áujstarum, tunaanum ini-aarajj tusarum. Atumí wakanjin kakarmaitrume, antsu atumí ayashjin kakarmachuitrume” tímiayi.

<sup>39</sup> Ataksha we, nuik Yúsan áujsama núnisan áujsamiai. <sup>40</sup> Ataksha waketruki, ni unuiniamurín kanúu tepenan tarimiayi. Kari ti pujá asamtai, Jesusan áujsatniun tujinkiamiayi. <sup>41</sup> Jesus ataksha we, tarí tímiayi “Kanarum ayampratarum. Máakete. Jeayi. Wi, Aents Ajasuitjiana ju, tunáa shuarnum surukmaitjai. <sup>42</sup> Nantáktiárum, wemí. Iis, Winia súrutna nu nuntumsai” tímiayi Jesus.

### Jesusan achikiarmiania nu

(Mateu 26.47-56; Rúkas 22.47-53; Juan 18.2-11)

<sup>43</sup> Jesus nuna chicháa pujá unuinia-murí Jútas tarimiayi. Nijijai untsurí aents puniá takaku, tura numincha takaku káutarmiayi. Israer-patri uuntri, Israer-shuara jintinniuri, tura Israer-shuara úuntri akupkarma asa káutkarmiayi. <sup>44</sup> Káuntsajin Jútas chicharainiak, “Wi mukunattaj áujkin núiti Jesus. Achiiurum, pépker emetarum jukitiarum” tímiayi. <sup>45</sup> Tura Jesusan tarí, mukunuk áujas “Uuntá, Uuntá” tímiayi. <sup>46</sup> Túramtai aencha Jesusan achikiar emetawarmiayi. <sup>47</sup> Túruiniakui nuí wajatusha puniari úkuitsan, patri uuntri takarniurín awati ni kuishin tsupirkamiayi.

<sup>48</sup> Túram Jesus áentsun tímiayi “Kasakaitiaj. Puniajai numijjai, kasá nútiksarmek achirkatai tusarum tarutniurme. <sup>49</sup> Ashí tsawant atumjai Yusa Uunt Jeen wayan unuiniakun pujuchmakaj. Túmaj nuí achirkachmarme. Tura Yus timia nu uminkiat tusa ju túrunayi.” <sup>50</sup> Nuinkia ni unuiniamurí Niniak ikiuiniak pisararmiayi.

### Natsa pisarmiania nu

<sup>51</sup> Tura áishman nátsaach aya tarachin penumas Jesusan atamprimiayi. Tura natsaach suntar achikiam <sup>52</sup> tarachrin ajapa ikiuak misú tsékenkimiayi.

### Patri uuntriin Jesusan júkiarmiania nu

(Mateu 26.57-68; Rúkas 22.54-55, 63-71; Juan 18.12-14, 19-24)

<sup>53</sup> Patri uuntriin Jesusan ejeniarmiayi. Nuí Patri uuntriisha, Israer-shuara jintinniurisha, Israer-shuara uuntriisha irunturarmiayi. <sup>54</sup> Tura Pítiur íkian nemarki Patri jeen aach jeá, Patri suntarijjai

jinia anamuk pujumiayi. <sup>55</sup> Patri uuntri ashí naamka uunt armia nujai iruntrar maatai tusar wakeruiniak shuar Jesusan tsanumprurat tusar eatkarmiayi. Nu chichamjai mantamnati, tiarmiayi. Túrasha wáinkiacharmiayi. <sup>56</sup> Túrasha untsurí shuar Jesusan tsanumpruiniayatan yapajjá yapajjá chichainia ásar-matai wáinkiacharmiayi. <sup>57</sup> Nuyá chíkich wajakiar wáitruiniak juna tiarmiayi <sup>58</sup> “Yusa Uunt Jeen, aents jeamarmia nuna yumpuntiatjai. Túran menaintiú tsawantai, chikichan, aents jeamchamun jeamtatjai” tau antukmaji” tiarmiayi.

<sup>59</sup> Tura tuke yapajjáwar tiarmiayi.

<sup>60</sup> Nui sha Patri uuntri ajapén wajaki Jesusan chicharuk “¿Áimsatin penké tujintimek. Warinia turamainia?” tímiayi.

<sup>61</sup> Tura Jesus takamtak áimsuk pujumiayi.

Patri uuntri atak chicharuk “¿Ame nekas Yusa Anaikiamurinkaitiam. Ii Yusrí Uunt tajinia nuna Uchirinkaitiam?”

<sup>62</sup> Tutai Jesus tímiayi “Ee, núitjai. Winia, Aents Ajasu tutaintiajna nu Kakaram Yusa untsuurinjí pujai wáitkiattarme. Tura nayaimpinmaya yuranminiam winiaí wáitkiattarme” tímiayi.

<sup>63</sup> Tutai Patri uuntri kajek, ni pushirin jaak tímiayi “¿Chíkich títincha warí atsumají? <sup>64</sup> Nii tana nujai Yúsan kátsekeamu antukurme. ¿Warintia enentáimprum?” tímiayi.

Takui “jakamniaiti” ashí tiarmiayi. <sup>65</sup> Chíkich chíkich Jesusan usukiáwarmiayi. Jiin epetkar awatiar “¿Ya áitkiarma? etserkata” tiarmiayi. Patri suntarísha yapiniam awatiarmiayi.

### **Pítiur Jesusan natsantramiania nu**

(Mateu 26.69-75; Rúkas 22.56-62;  
Juan 18.15-18, 25-29)

<sup>66</sup> Núnaka túruiniaí Pítru nunká, jea aani pujan, nuwa Patri uuntri

takarniuriya nu tarimiayi. <sup>67</sup> Niisha Pitrun jinia anamu pujan wáinkiamiayi. Wáiniak, “Amesha Nasaretnumia Jesusjai wekaichukaitiam” tímiayi.

<sup>68</sup> Tutai Pítiur chicharuk, “Nékatsjai. Ame támena nuna nékatsjai” tímiayi. Tura aa wáitiainiam jiinkimiayi. Tumai atash shiniukmiayi.

<sup>69</sup> Nu núwasha Pitrun ataksha wáiniak, shuáran nuí pujuinian tímiayi “Júiti ni shuari.”

<sup>70</sup> Tura ataksha “atsá” tímiayi.

Ishichik árusan, shuar nuí pujuarmia nu ataksha Pitrun chicharuk “Nekas ni shuarinme. Kariréanmaya shuárchakaitiam. Auyá shuara nuní chichaame” tiarmiayi.

<sup>71</sup> Tutai Pítrusha kakantar chichaak, “Ju áishmanña átum tárugna núnaka nékatsjai. Wáitrukuinkia Yus írsati” tímiayi. <sup>72</sup> Nuyá ataksha atash shiniukmiayi. Pítrusha, Jesus nuik timian enentáimmiayi. Iis, Jesus nuik tíchamka “Atash jimiar shiniatsain, ame, núnaka nékatsjai, menaintiu turuttiatme” tíchamka. Pítru nuna enentáimias ti útmiayi.

### **Jesusan Piratúí ejeniarmiania nu**

(Mateu 27.1-2, 11-14; Rúkas  
23.1-5; Juan 18.28-38)

**15** Tura kashin káshik Patri uuntri, Israer-shuara úuntriijjai, Israer-shuara jintinniurijjai, ashí naamka armia nujai irunturar, chichaman jurusarmiayi. Túrawar Jesusan jinkiamun apach kapitían Piratuúin ejeniarmiayi. <sup>2</sup> Ejeniar matai Piratu aniasmiayi “¿Amesha Israer-shuara Uuntrin káitiam?”

Tutai Jesussha “Ame k tame” tímiayi.

<sup>3</sup> Nuyá Patri uuntri ti tsanumpruarmiayi. <sup>4</sup> Ataksha Piratu aniasmiayi “¿Áimsatin penké tujintimek? Ti untsurí etserturmainiatsuk.” <sup>5</sup> Tura

Jesus nunasha áikchamiayi. Túmakui Piratu ti enentáimpramiayi.

### Jesusan, mantamnati, tíarmiania nu

(Mateu 27.15-31; Rúkas 23.13-25; Juan 18.38–19.16)

6-7 Shuar ámiayi, ni naari Parapás. Niisha ni shuarijijai meset ámanum, shuaran maa asamtai sepunam enkeamuyayi. Tura námper tsawantai Piratu sepunmaya chikichik shuarnak jiki akupniuyayi, aents seawarmia nuna. <sup>8</sup>Nuisha untsurí shuar Piratun káutkar tiarmiayi “Ame ju námpertin tuke túramna nu túratá. <sup>9-10</sup>Patri uuntri Jesusan kajeraru ásar surukarmiayi. Piratusha, nuna nekáa chicharainiak “Israer-shuartiram ¿atumí akupniurin jiki akupkattajak? ¿Nu wakerarmek?” tímiayi.

<sup>11</sup>Tutai Patri uuntri áentsun chichainiak ““Antsu Parapás jikim akúpkatá” titiarum” tiarmiayi.

<sup>12</sup>Tutai Parapásan seawarmatai Piratu ataksha chicharainiak “Jesusnasha, átum ii akupniuri tarumna nuna, ¿itiurkattaja?” tímiayi.

<sup>13</sup>Ataksha ni kakantar tiarmiayi “Krúsnum mantamnati.”

<sup>14</sup>Piratusha nin tiarmiayi “¿Warí tunaana túriniait?” tímiayi.

Takui niisha nú nankaamas kakantar tíarmiayi “Krúsnum mantamnati.”

<sup>15</sup>Tuma asamtai, aents shiir enentáimprarti tusa, Piratu tunáa shuaran, Parapásan jiki akupkamiayi. Tura Jesusnasha katsumkarum krusnum ajintrurtarum tusa suntaran tsankatkamiayi. <sup>16</sup>Tiniu asamtai suntar Jesusan jukiar, kapitiani jeen awayawarmiayi. Nu jea naari Piritiúriuiti. Túrawar untsurí suntaran untsukarmiayi. <sup>17</sup>Ashí káunkar, pushin kapaanniun Jesusan áentsrarmiayi. Tawasap janke najanamun et-senkrumtikiarmiayi. <sup>18</sup>Nuisha Jesusan

ájusar “Shíiraitme, Jesúsá, Israer-shuara akupniuriya” wishikiainiak tiarmiayi. <sup>19</sup>Muuknumsha sapapjai awatiarmiayi; nuyá usukiawarmiayi, túrawar ántar tikishmatrarmiayi. <sup>20</sup>Tura Jesusan wishikrar amukar, kapaantin pushin áitkiar, ni pushirin áentsrarmiayi. Túrawar krúsnum ajintrurtai tusar jikiarmiayi.

### Jesusa jakamuri

(Mateu 27.32-44; Rúkas 23.26-43; Juan 19.17-27)

<sup>21</sup>Semuñ Serini núñkanmaya shuárayayi. Arijantruncha, Rupuncha aparíyayi. Semuñkan takatnumia winian suntar emetawarmiayi, Jesusa krusrin yanaki jukiti tusar. <sup>22</sup>Jesusnasha Kúrkuta nánnium júkiarmiayi. Kúrkuta, shuar chichamjainkia, muuka ukunch naint, tutainti.

<sup>23</sup>Jeawarmatai, karía, mira kunkuinjai pachimprar áartaj tusa susarmiyayi Jesusan. Túrasha umarchamiayi. <sup>24-25</sup>Nantu yakí jatemsamtaí krúsnum ayapar ajintrurar ikiusarmiayi. Túrawar suntar yaki jukit tusar nakurutajijai nakurusar Jesusa pushirin yaruakarmiayi. <sup>26</sup>Urukamtaí máamuit, ashí aents nuna nekaawarat tusa, ni krusrin ju aarmauyayi: *ISRAER SHUARA AKUPNIURI*

<sup>27</sup>Nu nánnium jimiará kasa shuaran Nijijai máawarmiayi. Chikichik Jesusa untsurini krúsnum, chikichik ni menarini krúsnum máawarmiayi. <sup>28</sup>Yus-Papinium aarma ana nujai uminkiauyayi. Nui “tunáa shuarjai nekapmarmauyayi” tu áarmaiti.

<sup>29</sup>Shuar nankaamainiak, muuke pearar, Jesusan katsekainiak tiarmiayi “Iisia, amesha, “Yusa Uunt Jeen yumpuntiatjai, tura menaintiú tsawantai ataksha jeamkattajai” tíchakaitiam, tiarmiayi. <sup>30</sup>Amek krúsnumia akaikim uwemprata.”

<sup>31</sup>Núnisan Patri uuntrisha, Israer-shuara

jintinniurisha Jesusan wishikrar chicharnaisarmiayi “Chikichan uwemtikraitiat, Niñki uwempratniun tujintiawai. <sup>32</sup>Yusa anaikiamuri Krístuashit, ii akupniuriniashit, tiarmiayi. Wats, yamáí krúsnumiá akáikítí, iisha nu íisar Yus-shuar ajastai” wishikiainiak ántar nuna tiarmiayi. Jesusjai krúsnum ajintruamusha Nin wishikiarmiayi.

(Mateu 27.45-56; Rúkas 23.44-49; Juan 19.28-30)

<sup>33</sup>Tutupin jeamtai ti kiritin ajasmiayi ashí nunkanam. Tura, nantu nunkaach ajasmatai ataksha tsaapnirmiyayi. <sup>34</sup>Nuin Jesus kakantar untsumuk tímiayi “Iruí, Iruí, rama sapaktani.” Nuka shuar chichamjainkia, “Yusrú, Yusrú, ¿urukamtai ajapa ikiurkiniam?” tawai. <sup>35</sup>Shuar nuí pujuarmia nu, nu chichaman nékachu ásar, nuna antukar “Eríasan untsúawai” tíarmiayi. <sup>36</sup>Chikichik shuar churuinian uruchjai ajamper, sapapjai ijiú mukunati tusa susamiayi. Tura tímiayi “Wajastarum, Erías Nin jukitiaj tusa winishtimpiash. Iistai” tímiayi.

<sup>37</sup>Nuinkia Jesus kakaram untsamak jakamiayi. <sup>38</sup>Túramtai Yusa Uunt Jeen ejamu niñki jaanakmiayi, yakíya nunká. <sup>39</sup>Suntara kapitántrisha Jesusan ayamtus wajamia nu, Jesus kakaram untsamak jaamun iis tímiayi “Nuka ti nekas Yusa Uchiriyayi.”

<sup>40</sup>Nuwasha arant ii pujuarmiayi. Nu nuwajai Máktara péprunmaya Marí, chíkich Marisha, Sarumáisha pujuarmiyayi. Chíkich Marisha uchich Jakupuncha Jusenchá nukuríyayi. <sup>41</sup>Nu núwaka, Kariréa nunkanam Jesus wekaimia nuí, Nin nemarsar yáintaitsar wekasarmiayi. Untsurí chíkich nuwasha Jesusjai Jerusarénnum wear, nu nuwajai arant ii pujuarmiayi.

## Jesusan iwiarsarmiania nu

(Mateu 27.57-61; Rúkas 23.50-56; Juan 19.38-42)

<sup>42</sup>Kiatemamtai, ayampratin tsawant jeatsain, námper iwiaratín tsawant asamtai, <sup>43</sup>Arimiatíanmaya Jusé arantutsuk, kakaram ajas, Piratuí jeá Jesusa ayashin seatajtsa utuamiayi. Nu Jusenchá ashí irunin ainia nu anturin árimiayi. Niisha Yus ju nunkanam akupin ajasat tusa nákasmiayi. <sup>44</sup>Tura Jesusa ayashin seam, Piratusha “wárik jaka” tímiayi. Tuma asa suntara kapitántrin untsurak “¿Nekas jakayik?” tímiayi. <sup>45</sup>Tutai kapitán “Ee” takui, Jesusa ayashin Jusén tsankatkamiayi. <sup>46</sup>Jusesha puju tarachin péñkeran sumarak, Jesusa ayashin itiar áepas penuarmiayi. Tura yamaram kaya táurmanum ikiusmiayi. Ikius wáitiniam kayan átutmiayi. <sup>47</sup>Tura Máktaranmaya Marí, Jusé nukurí Marijjai ni ikiumun ii wajarmiayi.

## Jesus nantakmiania nu

(Mateu 28.1-10; Rúkas 24.1-12; Juan 20.1-10)

**16** Tura ayampratin tsawant nankaasmatai, Máktaranmaya Marisha, Jakupu nukurí Marisha, Sarumáisha, kunkuinian Jesusa ayashin kuertai tusar sumakarmiayi. <sup>2</sup>Tura kashin Tumintin, ti káshik, nantu yáma jiniiai, iwiarsamunam jeararmiayi. <sup>3</sup>Wésar chichainiak “Iwiarsamu wáitiri kayancha ¿yaki akanketramkattaj?” tiarmiayi. <sup>4</sup>Jear uunt kaya akankekman wáinkiararmiayi. <sup>5</sup>Iwiarsamunam wayawar, natsan esaram puju pushin entsar, untsuurnumaani pujan wáinkiar ti ashamkarmiayi. <sup>6</sup>Túmainiakui natsa tímiayi “Ashamkairap. Nasarétnumiá Jesus krúsnum jakama nu éarme. Iniantkimiuiti. Juí pujatsui. Wátsek, ju ikiusmanum íistarum. <sup>7</sup>Túrarum werum

Pítrusha, chíkich unuiniamurísha ju ujaktarum. Kariréanam atumin émkíyi. Turammarumna núnisan túruna wáinkíattarme” tímiayi. <sup>8</sup>Niisha ti ashamainiak purushniarar iwiarsamunmaya tseke wearmiayi. Ti ashamainia ásar, chíkichkinkesha ujakcharmiayi.

**Máktaranmaya Marin Jesus  
wantintiúkmiania nu**

*(Juan 20.11-18)*

<sup>9</sup>Émkaka Tumin tin ti káshik Jesus nantaki, Máktaranmaya Marin wantintiúkmíayi. Nu María enentáiyá siati iwianchin Jesus yaunchu ajapruyayi. <sup>10-11</sup>Marisha Jesusa nemari kúntuts uutu matsatainian werí, “Jesus iwíiakui, imia wi wainkíajai” tímiayi. Támaítat anturkacharmiayi.

**Jesus jimiara shuaran  
wantintiukmiania nu**

*(Rúkas 24.13-35)*

<sup>12</sup>Tura urum jimiara shuar Jerusarénnumiá tsaniñ weenan, Jesus nusháa iira ajas tarimiayi. <sup>13</sup>Niisha Jesusan wáinkiar waketiari, unuiniamurín ujakarmiayi, tura ni chíchaméncha anturkacharmiayi.

**Jesus ni unuiniamurín  
akupkarmiania nu**

*(Mateu 28.16-20; Rúkas 24.36-49; Juan 20.19-23)*

<sup>14</sup>Nuyasha Jesusa auntse unuiniamurín misanam pekaamkar pujuinian

Jesus tarimiayi. “¿Atumí enentái urukamtai kátsuram ainia, urukamtai Winia nekas enentáimtursachuram?” tímiayi. Ni nantakmiarín wáinkiaru chíchamén anturkacharu ásar matai kakantramiayi. <sup>15</sup>Nuyá chíchaak “Ashí nunkanam wetarum. Túrarum ashí shuarum Yusa shiir chíchame etserkatarum. <sup>16</sup>Shuar anturak imiani uwemprartatui. Shuar antukcharka, tuke sumamawartatui. <sup>17</sup>Shuar winia náarum pachis, Yúsan nekas enentáimtakka, juna túrawartatui, Yusa kakarmarín iniakmastaj tusa: iwianchin jíiki akupkartatui; chíkich chíchamjái chíchasarukamtai Winia nekas enentáimturtatui; <sup>18</sup>napincha achiksha, tseasnasha úmaksha, jaa ajaschartatui. Jaa shuaran ni uwejejái antiñ, nu shuaran péñker awajsartatui.” Tu tímiayi.

**Jesus nayaimpiniam wakamiania nu**

*(Rúkas 24.50-53)*

<sup>19</sup>Jesus chíchas amukmatai, Yus nayaimpiniam júkimiayi. Túruna Yusa untsuuríni pujusmiayi. <sup>20</sup>Ni unuiniamurísha jíinkiar, ashí nunkanam Yus-Chichaman etserkarmiayi. Tura Uunt Yus nin yáinmiayi. Tura etserainiakui, ashí aents ni kakarmarín nekaawarat tusa, aentsti tujintiamun túratniun susamiayi. Nuke atí.

*Yúsán Shiir Chichamen*

**RÚKAS**

*aarmia nu*

**1** Nekas iiní Jesus túramia nuna “ímiatrusan áartajai” untsurí aents tiarmiayi. <sup>2</sup>Yámankamtaikniumiãñ ísarmia nú shuar, tura Yus-Chichaman etserkatniun yáinkiarmlia nusha in unuitiamprarmia nútiksaran áartinian wakeriarmliai. <sup>3</sup>Wisha núnisnak esetsaran enentáimsan, yámankamtaikniumiãñ nuna nekaamjai. Tuma asan túrunamia nuna ímiatrusnak amincha áatratajtsan wakerimjiame, winia úuntur Tiupiru. <sup>4</sup>Jintinramawarma nú nankaamas nekaata tusan wakerakun áatjame.

**Imiakratin Juanãa  
akiiniatniurin ujakmliania nu**

<sup>5</sup>Jutía nunkanam uunt akupin Erutis akupkamia nú tsawantin Israer-shuar Yúsnan pujurin ámiayi, ni naari Sakarías. Niisha Aptías weeayuyai. Ni nuweshá Irisapít Arun weeayuyai. Irisapítia úuntriãsha Israer-shuar Yúsnan pujurin ármiai. <sup>6</sup>Yúsjaisha Sakaríassha Irisapítãha mái-metek pénker ármiai. Yus akupkamia nunasha umirin ármiai. Tuma asamtai penkesha chíkich nin yajauch chicharkatin atsuarmiayi. <sup>7</sup>Yusjai pénker wekainiyat Irisapít júrechuyayi. Túrusha mai úuntach ármiai.

<sup>8-9</sup>Israer-shuar Yúsnan pujurin chíkich weeanmayã nuyá chíkich weenam, ankant ankant Yusa jeen takáu ármiai. Chíkich tsawant, Sakarías weeá takastin amia nu, Sakaríaska kunkuinian ekeemaktaj tusa inít wayatniuyayi. <sup>10</sup>Inít kunkuinian ekeemai untsurí aents aani matsamsar

Yúsán áujtak pujuarmiayi. <sup>11</sup>Sakarías inít pujai kunkuin ekeematainiam untsuurnumaani aya aneachma nayaimpinmayã suntar wajamiayi. <sup>12</sup>Nuna wajan wáiniak Sakaríaska purushnairmiayi. <sup>13</sup>Túrusha nayaimpinmayã suntar chicharuk tímiayi “Sapijmiakaip Sakarías. Nekaata. Ame seamna nuna Yus anturtamkayi. Tura ame nuwem Irisapít uchin takustatui. Nii akiiniamtai, “Juan” anaikiata. <sup>14-15</sup>Ame uchiram akiiniattana nuka Yusjaisha nankaamantu átatui. Tuma asamtai akiiniamtai, amesha shiir enentáimsam warastatme. Tura chíkich aents untsurí warasartatui. Ame uchirmesha karía ainia nuna umarchattawai. Tura áetak akiinchanak Yusa Wakaní pimiutkattawai, tímiayi. <sup>16</sup>Tura ni shuarin Israer-shuar áiniana nuna, ii Uuntri Yusjai ataksha nawamtikiartatui. <sup>17</sup>Uunt Yúsaiyã akatramu átatui. Yaunchu Yúsnan etserin Erías kakaram etserkamia núnisan niisha etserkattawai. Nujai shuaran ni uchiríjjai nawamtikiartatui. Tura umichu áinia nuna eseer enentáimtikrartatui. Ni Uuntri taakui ni enentái iwíaramu arti tusa etserkattawai” tímiayi nayaimpinmayã suntar.

<sup>18</sup>Nuna takui Sakarías nayaimpinmayã suntaran tímiayi “¿Nunasha warijjain paant nekaataj? Wisha nuarjai mái-metek ti úuntchichukaitaj” tímiayi.

<sup>19</sup>Tutai nayaimpinmayã suntar tímiayi “Wikia Kapriiraitjai, Yusa suntarintjai. Nii akatturmatai chichastájam tusan tura nu shiir chichaman ujaktájam tusan tarijme, tímiayi. <sup>20</sup>Túrusha wi tájamna nu “nekasaiti” tu enentáimprachume. Tura asam uchiram akiintsain muut ajasatme. Chichastin penké tújinkiattame. Tura wi tájana nu, tsawant jeamtai túrunattawai.”

<sup>21</sup> Nuna tumaj Yusa jeen aani pujusar, Sakaríasan nákas pujuarmiayi. “¿Urukamtaik init we imiá menkaka?” tu enentáimprarmiayi. <sup>22</sup> Nuyá Sakarías jiinkimtai, áusartaj tukamá tujinkiararmiayi. Sakaríaska, muut ajasu asa, aya úwijmiasan chichamiayi. Túmakui, Sakarías inít pujus Yúsai wáimiakun nekaawarmiayi.

<sup>23</sup> Yusa jeen takastin tsawantri amuukamtai Sakaríaska ni jeen waketkimiayi. <sup>24</sup> Nuyá ukunam ni nuari Irisapít ajaprukmiayi. Tura senku nantutin aya jean pujusmiayi. <sup>25</sup> Jeá pujus, “Aents wishikruiniakui natsantan jurutkitiaj tusa uchi takustinian Yus tsankatrukai” tu enentáimpramiayi Irisapít.

**Jesusa akiiniatniurin  
nayaimpinmaya  
suntar etserkamiania nu**

<sup>26</sup> Nu senku nantu nankaasmatai Yus ni suntarin Kapriiran Nasarét péprunam akupkamiayi. Nu pepru Kariréa nunkanam pujawai. <sup>27</sup> Nasarénumia nuwan, naari Marí, iyutí tusa akuptukmiayi. Nu núwaka áishmanjai pujuchuyayi. Niisha Jusejai nuatnaikiatsa anajmanair pujumiayi. Juseka uunt Tawit weeayuyayi. <sup>28</sup> Wats, nayaimpinmaya suntar Marí pujamunam wayá tímiayi “Yus pénker enentáimturma asamtai, ámin winitjiamé, Mariya. Yuska ámin nemartamuk ashí nuwá nankaamas pénker awajtamui” tímiayi.

<sup>29</sup> Tura Marisha nayaimpinmaya suntaran wáiniak, chichaamun nékatsuk “Urukamtaik tu chicháa” tu enentáimpramiayi. <sup>30</sup> Nuyá nayaimpinmaya suntar chicharuk tímiayi “Mariya, sapijmiakaip. Yus shiir enentáimturmawai. <sup>31</sup> Antukta. Amesha ajapruktatme. Túram Uchi takustatme. Nusha “Jesus” anaikiata. <sup>32–33</sup> Niisha

uunt átatui. Nincha “Uunt Nankaamaku Yusa Uchiri” tiartatui. Tura Uunt Yuska yaunchu Tawitian uunt akupniuri awajsamia núnisan ame Uchirmin ame shuárumin Israer tutain Uunt akupin awajsattawai. Ni akupeamurisha Yus susamu asa penké amuukashtiniaiti” tímiayi.

<sup>34</sup> Nayaimpinmaya suntar nuna tutai Marí tímiayi “Nusha winia áishur at-saisha, ¿itiurak túrunataj?”

<sup>35</sup> Tutai nayaimpinmaya suntar Marín tímiayi “Yusa Wakaní tarutramtatui. Tura yuranmia núnisan Uunt Yusa kakarmari ijirmattawai. Nu tuma asamtai Uchi akiiniattana nu Yúsaiya asamtai, “Yusa Uchirinti” tiartatui, tímiayi. <sup>36</sup> Tura Irisapít ame kaná kaimia nusha núnisan weamtanam ajaprukai. Iis, “júrechuiti” tiarmia nu, yamaikia sais nantu pujawai ajamtin. <sup>37</sup> Yúsjainkia itiurchatka penké atsawai” tímiayi.

<sup>38</sup> Tutai Marí tímiayi “Yus wakeramun túriniaitjai wikia. Ame tame nuna Yus wakerana nuna túrutati, tajai” tímiayi. Nuna tímiatai nayaimpinmaya suntarka wémiayi.

**Irisapítian Marí iyumiania nu**

<sup>39–40</sup> Nu tsawant Marí wárikmas muranam Jutía nunkanam ni kaná kain Irisapítian iyutaj tusa wémiayi. Sakaríasai jeá, ni jeen wayá, Irisapítian áusamiayi.

<sup>41</sup> Marí áujeamun antukmatai Irisapítia ampujén uchiri muchitki-amiai. Tumaj Yusa Wakaní ni enentáin pimiutkamiayi. <sup>42</sup> Nuinkia kakantar chichaak Marin tímiayi “Yus amincha ti shiir awajtamsaiti. Tura Uchiram akiiniattana nusha Yus shiir awajsamuiti. <sup>43</sup> Kairua, ame winia Uuntru nukurí áminin, Yus winia ti waitnentra asa, áusata tusa ámin akuptamkachaik, tímiayi. <sup>44</sup> Warí, wisha ame áujtamna nuna ántakui



ampujruj uchi waras muchitrukayi.  
<sup>45</sup>Amesha Yus turámiania nu umikiu asam shiir pujame. Yus tímia nu túrunattawai auka” tímiayi.

<sup>46</sup>Nuna tinia iniaisantai Marí juna tímiayi:

“Wikia tuke enentairjai “Yus timiá úntaiti” tajai. <sup>47</sup>Tura Uunt Yuska winia Uwemtikruru asamtai ti waraajai. <sup>48-49</sup>Wisha péejchach ain ni wakeramurin umiktajtsan wakerakuí winia enentáimturayi. Tuma asamtai ashí aents, “Marincha Yus shiir awajsaiti” tuke turutiartatui. Yuska imiá penker tura imiá kakaram ana nu winia ti uuntan túrutaiti. Tuma asamtai ashí aents “Marincha Yus shiir awajsaiti” turutiartatui. Núnaka yamá nankamamunak tuke turutú ajartatui. <sup>50</sup>Tura Nin umirkatniun wakerana nunasha Yus tuke waitnentrartatui. <sup>51</sup>Ti iturchatan páchitsuk túrait Nii. “Nankaamantuitjai” tu enentáimtumainia nuna nupetkaiti. <sup>52</sup>Ashí akupin ainia nuna awakkaruít. Tura íksan péejchach ainia nuna uunt awajsaruít. <sup>53</sup>Pénker ana nuna kitiainiakui Yus péñkeran súsaruít. Tura antsu “ashí takakjai” tuinia nuna aya júnik awajsaruít. <sup>54</sup>Israer-shuar Niiniu ájinia núnaka waitnentratniun kajinmattsuk yáinmákuitji. <sup>55</sup>Yaunchu ii Uuntrí Apráaman tura ní shuarnasha “túrattajai” timia nuna ímiatrusan tuke túrait.” Nuní tímiayi Marí.

<sup>56</sup>Marikia Irisapítjai menaintiú nantu pujus ni jeen waketkimiayi.

### **Imiakratin Juanka akiiniamurí**

<sup>57</sup>Nuyasha ni jurertin tsawantrí jeamtai Irisapítcha uchin áishmankan takusmiayi. <sup>58</sup>Tura ni shuarísha, ni írutra-

murísha “Irisapítian Yus ti shiir yáinmi-ayi” tuíniak, nin iyuwearmiayi. Tura máí-metek warasarmiai.

<sup>59</sup>Israer-shuar túrutai júnisaiti: uchi akiiniamurí uchu tsawant jeamtai, shunichirí nuapen tsupiktin awai, sirkunsisiún tutai. Yus nuna tú tiniu asamtai tuke túrin ármiai. Wats, Irisapítia uchrí akiiniamuríniá uchu tsawant jeamtai tsupirkatai tusar ni jeen jearmiayi. Nuínkia ni aparí naarí Sakarías anaikiataitsar wakeriarmiai. <sup>60</sup>Tura ni nukurí tímiayi “Atsá. Antsu ni naarí Juan átatui.”

<sup>61</sup>Tutai tiarmiayi “¿Nusha urukamtia? Amée shuarumsha nu náartincha áwak’ tiarmiayi. <sup>62</sup>Nuínkia uchi aparín “¿Warí anaikiatajtsam wakeram?” tusar aya úwejejain iniasarmiai.

<sup>63</sup>Tutai uchí aparísha “Nakash surusta; áartaj tusan wakerajai” tusa aya úwejejain iniakmamiayi. Takui nakash susam, ni naarí Juánkaiti, tu áarmiai. Nuna wáinkiar “Ayawá urukakun ta” tu enentáimprarmiai. <sup>64</sup>Nú chichamaik Sakarías chichatsuk pujamun chichakmiayi. Tura nuin Yusa náaríncha shiir awajsamiayi. <sup>65</sup>Nuínkia ni írutramurísha ashamkarmiai; tura ashí Jutía nunka murá amia nuí nu túrunamun ujakam ashí nekaawarmiai. <sup>66</sup>Nu túrunamun antukar ti enentáimsarmiai. Tura “ju uchin Yus nekas pujurtsuk. Tuma asamtai uunt ajas ¿urukuk ati?” tu enentáimprarmiai.

### **Sakarías Yus jintintiam tímiania nu**

<sup>67</sup>Uchí aparí Sakarías, Yusa Wakaní pimiutkam tura Yus jintintiam, juna tímiayi:

<sup>68</sup>“Israer-shuartí ii Yusrí naarí shiir awajsatniuitji. Ii Yúsriisha tarut-maitji. Tura uwemtikrampraitji. <sup>69</sup>Yaunchu ii uuntrí Tawit Yusa wakeramuríjiai uunt akupin

áchamkia. Tura ni ukurin ti kakaram Uwemtikiartinian suramsaitji. <sup>70-72</sup>Yuska ii nemasriya tura in nakitramainiajnina nuyá uwentikrampratniun enentáimsamia nuna, yaunchu ni etserniurin penker armia nuna ujakmiayi. “Winia ti penker chichamprun tájana nuna yapajitsuk umirkan tuke wáitnentratajrume” yaunchu ii úuntrin tímiania nunasha ni etserniurin ujakarmiayi. Yaunchu nu ujakma yamá iisha wainji. <sup>73-75</sup>Nu ujakman Yuska yá-mankamtaik imiá yaunchu ii uuntri Apráaman tíchamkia. Apráaman ujakmia nu júiti: “Wi wakeraj nútiksaran, Winia umirtukar penker wekainia nuna ni nemasriya uwentikrattajai. Sapijmiatsuk winia tuke takartusarat tusan túrattajai” Yus tímiayi Apráaman. Iisha ni shuari asakrin, nuna taku incha túramaji. <sup>76</sup>Tura amincha, uchiru, “Uunt Yusna etserniuiiti” turamartatui. Amesha ni tátintri iwarataj tusam Uuntai émkim wétatme. <sup>77</sup>Ni shuari, ni tunaari tsankurnar uwemprarat tusam túrattame. <sup>78-79</sup>Yuska ashí shuaran anea asa, incha wáitnentramak ni pujamunmaya ni tsáapnintrin suramsaitji. Ni enentáin kiritniunam wekainia nuna, mesertinnium jeatemá áarmatai, ni tsáapnintri jeat<sup>i</sup> tusa túraiti. Tura ashí incha ii enentáin imiatkinchanum wekasarmí tusa túraiti.” Nuní tímiayi Sakarías.

<sup>80</sup>Uchisha tsakarmiayi. Tura Yúsán nekaki-nekaki wémiayi. Israer shuar-num etserkatin tsawantri jeatsainkia at-samunam pujuyayi.

## Jesusa akiiniamurj

(Mateu 1.18-25)

**2**Wats, Juan akiiniamia nú uwitin uunt akupin Akustu ashí nunkanam áentsun nekapmararti tu chichakmiayi. <sup>2</sup>Nu nekapmartinian yaunchu túrushtain yamá túriarmiayi. Siria nunkanam Seriniu akupin pujái túrawarmiayi. <sup>3</sup>Ni naari áartaj tusa ashí shuar ni nunkenin wétin ármiai. <sup>4</sup>Tuma asamtai Jusé Nasarét péprunmaya Kariréa nunkanam amia nuyá jinki Pirin péprunam Jutía nunkanam amia nuí wémiayi. Juseka Tawit weeanam akiinia asa, ni nekas nunkenka Pirinkauyayi. <sup>5</sup>Nu asamtai, ni náarin áartaj tusa Jusé wémiayi Marijjai. Marisha Jusé núweyayi. Tura tsanincharuyayi. Túmaitiat Marisha Yusa Wakaní kakarmarijjai ajamtiniuyayi. <sup>6</sup>Tura nuí Pirinnum pujuiniaí Marí takustintri jeamiayi. <sup>7</sup>Nuú iwiairin uchin áishmankan takusmiayi. Tura uchi penutaijjai penuar, waaka yurumtainiam áepsamiayi. Írar kanutainiam pujustin ankant atsá asamtai túrawarmiayi.

## Murikiun wáinniun nayaimpinmaya suntar Yus akatar akuptukmia nu

<sup>8</sup>Tura Pirinnum tjiuch murikiun wáinin kashi murikrin wáiniuk pujuarmiayi. <sup>9</sup>Túmainiaí nayaimpinmaya suntar murikiun wáinin matsatainian wantintiukmiayi. Tura Yúsnumiaí tsáapnin ní matsatainiamunam etsantramiayi. Túrunamtai murikiun wáinniuka ti ashamkarmiayi. <sup>10</sup>Túrasha nayaimpinmaya suntar tímiayi “Ashamprukairap. Ashí áentsnum ti warastin atí tusan ti penker chichaman itiarjarme. <sup>11</sup>Júiti: yamá tsawantai uunt Tawitia péprurin Pirinnum yaunchu Yus anaikiamu KRISTU tutai, uwentikramprataj tusa

akiintiurmarme. Nu Uchisha ashí áentsun akupniuiti, tímiayi. <sup>12</sup>Tura jujai nekaattarme: uchi penutaijjai penuarma waaka yurumtainiam tepá wáinkiatarme. Nu wáinkiarum nekas júiti, tu nekaattarme.” <sup>13</sup>Nu chichamaik nayaimpinmaya suntar ti unturí, nayaimpinmaya káunkarmiayi. Túrawar Yusa naarin shiir awajainiak juna tiarmiayi:

<sup>14</sup>“Nayaimpinmasha Yus nankaamantuiti tu enentámtusarti. Tura ju nunkanmasha Yusjai nawamnaikiaru ainia nu imiatkinchanum pujusarti.” Tu tiarmiayi.

<sup>15</sup>Tura Yusa suntari nayaimpiniam waketkiarmatai murikiun wáinin tiarmiayi “Wats, Pirinnum wárik wetái. Nu túrunamu Yus turamajnia nu iyumi” tiarmiayi.

<sup>16</sup>Nuna tiar wárik wearmiayi. Tura Marincha Jusencha wáinkiarumiayi. Tura uchincha waaka yurumtainiam tepan wáinkiarumiayi. <sup>17</sup>Wear nuna wáinkiar, nayaimpinmaya suntar uchi túrunamurin timia nuna etserkarmiayi.

<sup>18</sup>Tura murikiun wáinin tiarmia nuna antukaruka ti enentámtusarmiayi.

<sup>19</sup>Túrasha Marikia ashí túrunamia nuna ni enentájjiainkia enentámtu pujumiayi. <sup>20</sup>Tura murikiun wáinniuka antukarmia nuna enentámtusar, tura ísarmia nunasha enentámtusar “Nayaimpinmaya suntar ujatmakmajnia tímiatrusan túrunayi” tiarmiayi. Tuma ásar Yusa náarin shiir awajsar kantampruawar waketkiarmiayi.

### **Uchin Jesusan Yusa Uunt Jeen itiarmania nu**

<sup>21</sup>Tura uchi akiiniamu uchu tsawant jeamtai, ni túrutairin túrin ásar, ni shunichiri nuapen tsupirkarmiayi. Túrawar Marí ajapratsain nayaimpinmaya suntar tímia nútiksai “Jesus” anaikiarmiayi. <sup>22</sup>Tura Muisais akiiniatniunam akup-

kamia núnisan, tsawantri jeamtai, Yusa Uunt Jeen Jerusarénnum uchin Yus iiktustai tusar júkiarmiayi. <sup>23</sup>Kame Yus-Papinium ju aarma awai:

“Ashí uchi iwiairi áishman akiinkinunka Yusna átatui.” <sup>24</sup>Tuma asamtai, Marí Yusa Uunt Jeen wáitsuk pujamu wayatniuri jeamtai, uchin Yus iisti tusa Yusa Uunt Jeen Jerusarénnum pujana nu itiarumiayi. Tura yampitsan jmiaran súsarmiayi. Muisais akupkamun uminiak nuna túrawarmiayi.

<sup>25</sup>Nu túmai Semeún naartin áishman Jerusarénnum pujumiayi. Semeúnsha Yusa Wakaní pujurma asa pénger áishmankauyayi. Yusan nekas enentámtiniuyayi. Yusa anaikiamurijjai Israer-shuar ankant ajastin jeati tusa nákauyayi. <sup>26</sup>“Winia anaikiamur KRISTU tutai wáintsuk jákashtatme”

uunt Yusa Wakaní tu jintintiamiayi. <sup>27</sup>Nú Semeún Yusa Wakani “wetá” tutai, Yusa Uunt Jeen wémiayi. Tura nú tsawantai Muisais tímia núnisan umirkatai tusar Marisha Jusesha uchin Jesusan Yusa Uunt Jeen itiarumiayi.

<sup>28</sup>Itiariarmatai Semeún uchin jusa miniakas Yusan áujuk juna tímiayi:

<sup>29</sup>“Yamaikia, Uunta, Amijn wi jeatin ankant atí. Turutmiamna nu ímiatrusmek umikiume. <sup>30-31</sup>Ju Uchi ashí aents uwentikrartá tusam susamna nuna yamá imia winia jirujai wáinkiajai. <sup>32</sup>Israer-shuaracha ainia nu tsáapninium wekasarat tusa akuptukmaiti ju Uchi. Tura Israer-shuar Áminiuram ájnia nuna ashí aents shiir enentámtikrartí tusam ju Uchi akuptukmaitji. Nuna wáinkian shiir enentámsan jákatniuitjai.”

<sup>33</sup>Tura Semeún Uchiniun tu chicharkui Jusesha Jesusa nukurísha ti enentáimprarmiayi. <sup>34</sup>Semeúnsha chichaak “Yus shiir

enentáimturmasartí” nin tímiayi. Nuyasha Marin chicharuk tímiayi “Nekaata. Ju Uchin Israer-shuartisha untsurí nakitrar iniarartatji. Tura chíkích Israer-shuartikia ju Uchin shiir enentáimtusar ti wararsartatji. Tura Uchiram Yusa kakarmarín ti paant iniakmastatui. Tuma aín untsurí Aun yajauch chichariartatui. <sup>35</sup>Nujai shuar ni enentáin warinia enentáimia nu, paant átatui. Maa, ashí nu tímakuí, ijiumua núnismek ame enentáimin ti wáitsattame, Mariya.” Tu chichasmiayi Semeún.

<sup>36</sup>Nuwasha Ana naartin nuí Yusa Uunt Jeen pujumiayi. Niisha Yúsnan etserniuyayi. Ni aparísha Panuíruyayi tura Aser shuaruyayi nu nuwá. Niisha ti úuntchiyayi. Niisha yama nuat-naikiamujai siati uwi ni áishrijiai tsan-in pujusarmiyai. <sup>37</sup>Tura wajemamiayi. Tura uchenta kuaru uwi takakuyayi. Tura ninkia Yusa Uunt Jeenia jíintsuk káshisha tsawaisha tuke Yúsan áujniuyayi. Tura yurumsuk Yúsan áujniuyayi. <sup>38</sup>Semeún tuasua amikmatai Anasha taa, Uchin wáiniak Yúsan yuminsamiayi. Tura Jerusarénum Yus uwentikrampratai tusa nákarmia nuna áujkunka uchin áujmat wémiayi.

### Nasarénum waketkiarmiania nu

<sup>39</sup>Nuyá Yus tímia nuna ashí túrawar amikiar Kariréa nunkanam, kame nii pujumia nú peprunam Nasarénum Jusesha Marisha Uchisha waketkiarmiyai. <sup>40</sup>Uchi Jesus tsakaki, kakaram ajaki tura nú nankaamas nekaki wémiayi. Tura Yus Nin ti shiir awajsamiayi.

### Jesus Yusa Uunt Jeen túrunamuri

<sup>41</sup>Jusesha, Jesusa nukurísha tuke uwitin paskua námper jeakui Jerusarénum weu ármiyai. <sup>42</sup>Ni túrutairi túruiniak, Jerusarénum weak Jesusan tuse uwi jeamtai júkiarmiyai.

<sup>43</sup>Námper amuukamtai ni nukurísha Jusesha nékachmanum Jesuska Jerusarénum juákmiayi. <sup>44</sup>Marisha Jusesha “wíi shuarjai winiawai” tusa, núnaka eatsuk chikichík tsawant wekasarmiyai. Nuyá wáinkiataj tukamá, ni shuariin tura ni nékamunam eakarsha, <sup>45</sup>wáinkiacharmiyai. Nuinkia Jerusarénum ataksha waketrukiarmiyai, eaktai tusar. <sup>46</sup>Tura menaintiú tsawant eakar Yusa Uunt Jeen Yus akupkamun jintinnian anturak anintru pujan wáinkiararmiyai. <sup>47</sup>Tura nuí ashí Jesusan anturkarmiania nu, niisha ti nékakuí tura áimtanash ti penker áimkiui, ti enentáimturarmiyai.

<sup>48</sup>Ni aparísha nukurísha tumáa pujan wáinkiar, ti enentáimprarmiyai. Tura ni nukurí chichaak tímiayi “Uchiru, ¿ausha urukamtai itiurchat enentáimtikurram? Ame apasha wisha urukayik tusar ti eakjame” tímiayi.

<sup>49</sup>Tutai Jesus tímiayi “¿Urukamtai eattrum? Winia Aparnan túratniuitjiana nuka nékatsrumek” tímiayi.

<sup>50</sup>Tura tímia núnaka penké nekaacharmiyai. <sup>51</sup>Nuyá Jesus niijiai Nasarénum waketkimiayi. Ninkia tuke umiriarmiyai. Ashí nu túrunamun Marikia tuke enentáimtu pujumiayi. <sup>52</sup>Jesuska tsakaki, tura nekaki wémiayi. Yussha tura aencha Nin shiir enentáimtiarmiyai.

### Imiakratin Juanca etserkamuri

(Mateu 3.1-12; Márkus 1.1-8; Juan 1.19-28)

**3** Tipiriu uunt akupin pujamu kinse uwi jeamtai, Jutía nunkanam Punseu Piratu akupin pujumiayi. Tura Kariréa nunkanam Erutis akupin pujumiayi. Itiurea nunkanmasha Trakuniti nunkanmasha ni yachi Jiripi akupin pujumiayi. Tura Apirinia nunkanam Risnias akupin pujumiayi. <sup>2</sup>Tura nu uwitin Anassha Kaipiássha Israer-patri uun-

tri pujuarmiayi. Nu uwitin Sakaríasa uchirí Juan atsamunam pujan Yúsaiya chichaman antukmiayi. <sup>3</sup>Nuyá Jurtañ entsanam supichik matsamarma nuna Juan wekaatusar juna tímiayi “Winia tunaarun Yus tsankurturat tusarum, enentai yapajíarum imiantiarum.” Tu ujakmiayi. <sup>4</sup>Nu ujakman Isayas yaunchu juna áarmiayi:

Atsamunan wekaana nu untsunum ántuiniawai. Nii untsunuk juna tawai: Atumí enentái Uunta jinti iwíarturtarum; naka awajsatarum. <sup>5</sup>Jápaaka ainia nusha áimkiamu arti. Naint ainia nusha paka awajsamu arti. Jintia apijiaru ainia nusha naka jiikmia arti. Tura pujutrin ainia nusha métekrak paka awajsamu arti. <sup>6</sup>Túrunamtai ashí nunkanmaya aents Yúsaiya uwempratin aan nekaawartatui.

<sup>7</sup>Untsurí aents imiatit tusar tariarmia nuna Juan chicharainiak tímiayi “Napia áaniutirmincha, ti asutniátin jeatemáttana nuyá uwempratarum tusa ¿ya ujatmakuram? tímiayi. <sup>8</sup>“Íikia Apraám weeaitji, tuma asakrin Yus shiir enentáimturmají” tu enentáimtumasaírap. Antsu enentáim yapajíamuitkiuinikia péñker wekaamurmijíai paant iniakmatarum. Warí, Yus wakerakka, ju kayan Apraáma shuarin páchitsuk najankainti, tímiayi. <sup>9</sup>Aneartarum. Numi ajaktinian kampuwarin jacha atuttsamuíti. Numi péñker nereatsna nuka ajakar jinium apeamu ártatui” tímiayi.

<sup>10</sup>Tutai aentska enentáimprar “¿Nuinikia itíurkatjik?” tiarmiayi.

<sup>11</sup>Tutai Juan tímiayi “Jimiará pushin takakna nu, takaktsuna nuna chikichan súsatniuiti. Yurumkan takakna nusha takaktsuna nuna ajamsatniuiti” tímiayi.

<sup>12</sup>Uunt akupniu kuítrín juu armia nú shuar imiantiaj tusar Juánkan we-

riar aniasarmiayi. “Uunta, ¿iisha warí itíurkatjik?” tiarmiayi.

<sup>13</sup>Tutai Juan tímiayi “Kuit uunt akupin tana nu iniankasrum achikiairap.”

<sup>14</sup>Suntarsha aniasarmiayi “Uunta, ¿iisha warí itíurkatjik?”

Juansha tímiayi “Ame kakarmarmijíai chikichna jurukip. Tura nin tsanumpruraip. Tura uunt akupin akirmana nújain warasta” tímiayi.

<sup>15</sup>“Ju Juan Yusa anaikiamurínchuashit” tu enentáimsar paant nekaataitsar náarmiayi.

<sup>16</sup>Tumaj Juan tímiayi “Wikia aya ayashmin entsanam imiajrumé. Tura wijíai nankaamas ana nu tátatui. Ni sapatri jinkiamurínkisha atitrachminiaitjai. Niisha taa, imiantinia áanis tura jíiya áanis Yusa Wakanin enketramprattarme. <sup>17</sup>Shuar aruasan awajtia núnisan, nusha yajauch ana nuna ajapa aya péñker nak júuktatui. Neren ikiustatui tura yajauchinkia ji tuke kajinchatainiam apeattawai” tímiayi.

<sup>18</sup>Juan nu arant shiir chichaman áentsun ti núkap ujakarmiayi.

<sup>19</sup>Tura nuyasha akupin Erutisan chicharkamiayi. Ni yachí Jiripi nuarín Jirutíasan kasararak nuatkui tura chíkich yajauchincha túrakui chicharkamiayi.

<sup>20</sup>Tura Erutis núnaka ántutsuk chíkich yajauchin túramiayi. Juánkan achik sepunam enkeamiayi.

### Jesusa imianmiari

(Mateu 3.13-17; Márkus 1.9-11)

<sup>21</sup>Nu túruntsain, Juansha ashí nú nunkanmaya áentsun imiak pujurainaj Jessusha imianmiayi. Niisha Yusan áujuk pujai nayaimpisha uranmiayi. <sup>22</sup>Tura Yusa Wakaní yámpits najanar paant tarurmiayi. Tura Yus nayaimpinmaya chicharuk “Amek winia aneamur Uchiruitme; Ámin ti wararjame” tímiayi.

## Jesukrístu shuari

(Mateu 1.1-17)

<sup>23</sup> Jesus trainta (30) uwí takaku asa ni takatrín nan̄kamamiayi. “Jusé uchirínti” tiniu armiayi. Jusésha Iria uchiríyayi. <sup>24</sup> Irísha Matata uchiríyayi; Matat Riwi uchiríyayi; Riwí Mirkía uchiríyayi; Mirki Jana uchiríyayi. Jana Jusé uchiríyayi; <sup>25</sup> Jusé Matatíasa uchiríyayi; Matatías Amusa uchiríyayi; Amus Najuma uchiríyayi; Najum Esrí uchiríyayi; Esrí Nakaia uchiríyayi; <sup>26</sup> Nakai Maata uchiríyayi; Maat Matatíasa uchiríyayi; Matatías Semái uchiríyayi; Semái Jusé uchiríyayi; Jusé Jutáa uchiríyayi; <sup>27</sup> Jutá Juana uchiríyayi; Juana Resa uchiríyayi; Resa Surupapira uchiríyayi; Surupapir Saratiira uchiríyayi; Saratiir Nerí uchiríyayi; <sup>28</sup> Neri Mirkí uchiríyayi; Mirki Atí uchiríyayi; Atí Kusama uchiríyayi; Kusam Irmutama uchiríyayi; Irmutam Ira uchiríyayi; <sup>29</sup> Ir Jusué uchiríyayi; Jusué Irieséra uchiríyayi; Iriesér Jurema uchiríyayi; Jurem Matata uchiríyayi; <sup>30</sup> Matat Riwi uchiríyayi; Riwí Semeún̄ka uchiríyayi; Semeún̄ Jutáa uchiríyayi; Jutá Jusé uchiríyayi; Jusé Junan̄ka uchiríyayi; Junan̄ Iriakímia uchiríyayi; <sup>31</sup> Iriakím Mirea uchiríyayi; Mirea Mainián̄ka uchiríyayi; Mainián̄ Matata uchiríyayi; Matata Natañka uchiríyayi; <sup>32</sup> Natan̄ Tawitia uchiríyayi; Tawit Isai uchiríyayi; Isai Upitia uchiríyayi; Upit Puusa uchiríyayi; Puus Saramún̄ka uchiríyayi; Saramún̄ Naasun̄ka uchiríyayi; <sup>33</sup> Naasun̄ Aminiatapa uchiríyayi; Aminiatap Arama uchiríyayi; Aram Esruma uchiríyayi; Esrum Paresa uchiríyayi; Páres Jutáa uchiríyayi; <sup>34</sup> Jutá Jakupa uchiríyayi; Jakup Isaka uchiríyayi; Isak Apraáma uchiríyayi; Apraám Tarea uchiríyayi; Taré Nakura uchiríyayi; <sup>35</sup> Nakur Seruka

uchiríyayi; Seruk Rakaua uchiríyayi; Rakau Pirikia uchiríyayi; Pirik Epera uchiríyayi; Eper Sará uchiríyayi; <sup>36</sup> Sara Kainián̄ka uchiríyayi; Kainián̄ Arpaksata uchiríyayi; Arpaksat Sema uchiríyayi; Sem Nuaia uchiríyayi; Nuai Ramikia uchiríyayi; <sup>37</sup> Ramik Matusarín̄ka uchiríyayi; Matusarín̄ Enuka uchiríyayi; Enuk Jaritia uchiríyayi; Jarit Maararíra uchiríyayi; Maararír Kainián̄ka uchiríyayi; <sup>38</sup> Kainián̄ Enusa uchiríyayi; Enus Seta uchiríyayi; Set Atan̄ka uchiríyayi; tura Atan̄ Yus najanamuyayi.

## Jesusa nekapsamuri

(Mateu 4.1-11; Márkus 1.12-13)

**4** Jesusa enentáin Yusa Wakan̄í pimiutkamiayi. Jesussha Jurtañ entsanmayá waketkimtai Yusa Wakan̄í aents atsamunam jukimiayi. <sup>2</sup> Tura nuísha kuarenta tsawant pujusmiayi. Tura íwianch Nin tunaanum ajuaraintiajtai tusa pujurmiayi. Nu kuarenta tsawantin Jesus yurumtsuk pujá asa ti tsukammiai. <sup>3</sup> Nuín̄kia íwianch chicharuk “Amesha nekas Yusa Uchiríntkiumka ju kaya apatuk najanata” tímiayi.

<sup>4</sup> Tutai Jesus tímiayi “Yus-Papí tawai: “Aya apatukujain̄ shuar iwiaaku pujuschamniaiti. Antsu ashí Yus-Chicham tana nujai nekas iwiaaku pujusminiaiti,” tawai” tímiayi.

<sup>5</sup> Tura nuyá íwianch naint yakí wá-jakmanum jukí, ashí nun̄ka ainia nuna ju chichamaik iniaktusmiayi. <sup>6-7</sup> Tura chicharuk tímiayi “Ashí ju nun̄ka wáin-mena nu wíniaiti. Tura wi wakerajna nú shuaran súsatniuitjai. Tuma asam-tai tikishmatrurakminkia ju nun̄kanam ashí akupkatniun susattajme. Tura nuí ni warirí ainia nusha áminiu átatui” tímiayi.

<sup>8</sup> Tutai Jesus tímiayi “Yus-Papí tawai:

“Aya Nínki Yus ame Úntrum tikishmatram enentáimtustiniaitme.”  
Tau asamtai, werumta, iwianchi”  
tímiayi.

<sup>9</sup> Ataksha íwianch Jesusan Jerusarén péprunam jukimiayi. Tura Yusa Uunt Jee yakiini iwiak tímiayi: <sup>10</sup> “Yus-Papí tatsuk:

“Yuska ni suntarín wáinkiatá tusa akup-turmaktatui. <sup>11</sup> Kayanam ajintraín tusa wenkurmaktatui.”

Tuma asamtai nekas Yusa Uchirínki-umka juyá akaikim iniaata” tímiayi. <sup>12</sup> Tutai Jesus ámiuk tímiayi “Yus-Papí junasha tawai:

Yus ame Úntrum nekapsataj tiip.”

<sup>13</sup> Tuma asamtai íwianch penké tujintiak ishichik tsawant Jesusan iniaisamiayi.

### **Kariréa nunkanam Jesus ni takatrín nankamamiania nu**

*(Mateu 4.12-17; Márkus 1.14-15)*

<sup>14</sup> Jesus ni enentáin Yusa Wakaní kakarmarí pimiutkamu ajas Kariréa nunkanam waketkimiayi. Nu nunkanam nankaamantu túramurín áujmatiarmiayi. <sup>15</sup> Nu nunkanam ashí péprunam Israer-shuar iruntai jea armia nuí unuiniarmiayi. Tura anturkarmia nuka ni náarín shiir awajsarmiayi.

### **Jesus Nasarétnum pujumiania nu**

*(Mateu 13.53-58; Márkus 6.1-6)*

<sup>16</sup> Ni tsakarmarín Nasarétnum Jesus wémiayi. Tura Israer-shuar ayampratin tsawantin iruntai jeanam wayamiayi, tuke turin asa. Tura wayá Yus-Papin áujzataj tusa wajakmiayi. <sup>17</sup> Nuínkia Yúsnan etserin Isayasa áarmarín súsarmiayi. Nuna urak, nuí juna áarman wáinkiamiayi:

<sup>18</sup> Yusa Wakaní winí pujurtawai. Shuar warainiachun shiir chichaman ujak-tinian anaitiukuiti. Kúntuts enentáimiar wake mesek pujuinian tsuár-

tinian akuptukuiti. Tura jji kusurun-cha íimtiktinian, tura yajauch awajsamu ainia nuna pénker awajsatniuncha, <sup>19</sup> tura Uunt Yus, shuáran yaintin tsawantrí jeán etserkatniuncha akuptukuiti.

<sup>20</sup> Nu áarman aujsua amik papin nukukmiayi. Tura iruntai jeanam yáimin pujan susa iniais Nínkia etserkataj tusa pujusmiayi. Tura ashí shuar pujuarmia nu émamkes ii pujuarmiayi. <sup>21</sup> Jesussha chicharuk tímiayi “Yus-Chicham yamá antukurmena nu yamá tsawantin túrunayi.”

<sup>22</sup> Jesusan ashí pénker áuj-matiarmiayi. Tura Jesus ti shiir chichaakui ti enentáimprar “Juka Jusé uchirínchukait” tiarmiayi.

<sup>23</sup> Tu enentáimiainiakui, Jesus chicharuk “Atumsha shuar tuke tuinia núnisrumek, “tsuákratniuitkiyumka amek tsuámarta,” turuttiatrume. Kapernáum péprunam aentsti túrachmin túramamna núnismek juísha túrata tusarum nu turuttiatrume.

<sup>24</sup> Túrusha nekas tájarme, Yúsnan etserniun ni nunkenkikía nii tana nuna anturainiatsui. <sup>25</sup> Nuyasha tájarme, Irías pujumia nú tsawantin, menaintiú uwí nankaamas yumi yutukcha asamtai ashí Israer núnkanam ti tsuka amia nuí ti untsurí waje irunmiayi. <sup>26</sup> Tuma ain nu wajen yainti tusa Yus Iríasan akuptukchamiayi. Antsu chíkich nunkanmaya wajen Sarepta péprunam pujumia nuna yainti tusa akuptukmiayi. Sarepta pepru Sitiún péprunam tíjiuch pujawai. <sup>27</sup> Núnisan ii nunkesha Iriséu pujumia nu tsawantin ti untsurí tunamaru iruniarmiayi. Tura núnaka tsuárcharmia. Antsu chíkich nunka, Sírianmaya Naaman kan tsuármiayi” tímiayi Jesus.

<sup>28</sup> Israer-shuarsha iruntai jeen pujuarmia nu, nuna antukar ti kajerkarmi-

ayi. <sup>29</sup>Tura wajakar Jesusan jiki pepunmaya akupkarmiyi. Tura pepru amia nu naint yakí nankatkamunam, nuyá akaki ajuatai tusar júkiarmiyi. <sup>30</sup>Túrasha Jesuska irunar matsatainiamunman etempraktak jinki wémiayi.

**Iwianchrukun Jesus tsuármiania nu**  
(Márkus 1.21-28)

<sup>31</sup>Nuyá Jesus Kariréa nunkanam Kapernáum pepru amia nu wémiayi. Tura Israer-shuara ayampratin tsawantrijn tuke etserki wémiayi. <sup>32</sup>Yusa kakarmarin takaku asa nujai etserkamiayi. Tuma asamtai “Yusa kakarmarijjai unuitiamtujuk” tiar ti enentáimprarmiyi.

<sup>33</sup>Chíkich tsawantai áishman iwianchruku Israer-shuar iruntai jeanam pujumia nu untsukum tiamiayi, <sup>34</sup>“Inikiartusta. Iikia Áminkia pachistin nakitijai. ¿Warí, incha amukratkataj tusam táchamek? Wikia nékajme. Ámeke ti penker Tunaarincha núitme” tiamiayi.

<sup>35</sup>Tutai Jesus iwianchin kakantar chicharuk “Takamatsata. Ju áishman ikiuktia” tiamiayi.

Tutai nu chichamaik íwianch áishmannumia jinki weak nuká ajuant ikiukmiayi. Túrasha nekas yajauch awajtsuk ikiukmiayi.

<sup>36</sup>Ashí pujuarmiania nu ti enentáimiar mai tunai ajarimiayi. “¿Jusha warí chichamait? Ju áishman Yusa kakarmarijjai iwianchin jiki awemat-suk” tiarmiayi.

<sup>37</sup>Tura ashí nú nunkanam Jesusa túramurin áujmatiarimiayi.

**Semuñ Pitru tsatsarín**  
**Jesus tsuármiania nu**

(Mateu 8.14-15; Márkus 1.29-31)

<sup>38</sup>Jesussha Israer-shuara iruntai jeenia jinki Semuñka jeen wémiayi. Semuñka tsatsari tsuer ti jáamiayi. Ti

jaakui Jesusan “tsuárturtá” tiarmiayi. <sup>39</sup>Jesussha jaa tepan tsuntsumprua tsuemun “michatrata” tiamiayi. Tutai nú chichamaik nuwasha michatramiyi. Nú chichamaik nantaki nincha ayurawarmiyi.

**Untsurí jaan Jesus tsuármiania nu**  
(Mateu 8.16-17; Márkus 1.32-34)

<sup>40</sup>Etsa akaikin ai ni shuari nankamas sunkurjai jaarmia nuna Jesusan ikiaatkarmiyi. Jesussha jáinian chikichkiniak chikichkiniak uwejejai antinkiar tsuármiyi. <sup>41</sup>Ti untsurí iwianchruku armia nunasha iwianchrin jirkiarmiyi. Jiinkiar íwianchia untsumainiak “Ámeke Yusa Uchirínme” Jesusan tiarmiayi. Tura niisha “Jesuska Yusa anaikiamurinti” tu nékainiakui Jesus kakantar chicharak itiatmamtikiarimiayi.

**Kariréa nunkanam**  
**Jesus etserkamiania nu**

(Márkus 1.35-39)

<sup>42</sup>Kashin káshik tsawaak Jesus pepunmaya jinki atsamunam Niniki wémiayi. Tura shuarsha eakiar ni pujamunam jeariarmiyi. Tura iijjai tuke pujusat tusar emetataitsar wakariarmiyi. <sup>43</sup>Túmain Jesus tiamiayi “Yus ii enentáin akupkatajtsa wakera nú shiir chichaman chíkich péprunam matsatainia nunasha ujaktinaijtjai. Nu túrata tusa akupkamuitjai” tiamiayi. <sup>44</sup>Tuma asamtai Kariréa nunkanam Israer-shuar iruntai jeanam Jesus tuke etserki wémiayi.

**Namakan ti untsurín**  
**achikiarmiania nu**

(Mateu 4.18-22; Márkus 1.16-20)

**5** Chíkich tsawantai Jesus Jinisarít antumianka tutainium káanmatkari pujai ti untsurí shuar, Yusa chichamen antuktai tusar wakeruiniak Jesusai



káunkarmiayi. Antuktai tusar wakeruiniak kae ajattsarmiayi. <sup>2</sup>Tura jimiara kanun antumiangkan káanmatkariin tepan wáinkiararmiayi. Ni nérenniurinkia jíinkiar ni nekarin nijjá pujuinia asamtai kánuka ankant ármiai. <sup>3</sup>Tuma asamtai Jesus Semunka kanurín enkempramiayi. Tura Semunkan chicharuk “Ishichik ajapén juruktía” tímiayi. Nuinkia kanunam enkemas áentsun káanmatkanam pujuinian unuiniamiayi. <sup>4</sup>Unuiniasua amik Semunkan chicharuk “Kanu kunanam jukim neka aj ajunkatarum” tímiayi.

<sup>5</sup>Tutai Semun tímiayi “Túrasha, Uuntá, káshisha tuke aju-junkuar tsawarji. Túrasha penké achikchaji. Kame áankisha Ame támajaj ajunkatjai” tímiayi.

<sup>6</sup>Tura ajunkar namakan ti untsurín achikiarmiayi. Túram nekasha jaanaki wémiayi. <sup>7</sup>Tuma asamtai ni írutkamurín chíkich kanunam pujuinian uwejéjaj “winitia, yáintkiamniuram” tusar untsukarmiayi. Niisha táarmiayi. Túrawar jimiara kanunam métej awajsarmiayi. Tura kanusha init wayastatuk ajamiayi. <sup>8</sup>Nuna túramtai Semun Pftiur Jesusan tikishmatar tímiayi “Uuntá, wikia ti tunaitjai. ¿Wíjjaiisha itiurak pujustam?” <sup>9</sup>Semunsha ni írutkamurijjaj namakan timiá untsurín wáinkiar ashamkarmiayi. Tuma asa Semunsha nuní tímiayi. <sup>10</sup>Tura Sepetéu uchirí Jakupusha Juansha Semunjaj pujuarmia nusha ashamkarmiayi. Tura Jesus Semunkan tímiayi “Ashamkaip. Yamaikia namaka-achinia áintsamek aents-éau ajastatme.” <sup>11</sup>Nuyasha kanurín kukar júkiar, ashí takakmarincha ikiukiari Jesusan nemarki wearmiayi.

### **Tunamaru áishmankan Jesus tsuármiania nu**

*(Mateu 8.1-4; Márkus 1.40-45)*

<sup>12</sup>Ukunam Jesus chíkich péprunam pujaj tunamaru áishman taa Jesusan wáiniak tikishmatar nunká shushuma pankái Jesusan tímiayi “Uuntá, wakerutakmeka páchitsuk tsuáramniatme.”

<sup>13</sup>Nuna tutai Jesus antin tímiayi “Wakerajai. Tsuaajme.” Tura nú chichamaik tunamarusha pénker ajasmiai. <sup>14</sup>Túrasha Jesus chicharuk “Ámeká nu etserkaip, tímiayi. Antsu Israer-shuar Patrii werim ame pénker ajasmanum Muisáis akupkamia núnismek susata. Nujaj ashí shuar ame pénker ajasmarmín nekaawartatui” tímiayi.

<sup>15</sup>Tura Jesusa túramurí ti etsernamiayi. Túmakui untsurí aents anturkataj tusar káutkarmiayi. Tura ni sunkurincha tsuámartaj tusar káutiarmiayi. <sup>16</sup>Núnisan Jesuska aents atsuiniamunam we ni Aparin áujmiayi.

### **Emearun Jesus tsuármiania nu**

*(Mateu 9.1-8; Márkus 2.1-12)*

<sup>17</sup>Chíkich tsawantaj Jesus unuiniak pujaj Pariséu aents tura Israer-shuara jintinniurisha Kariréa péprunmayasha, Jutía péprunmayasha tura Jerusarénnu-miasha káunkarmia nu antúu pujuarmi-ayi. Jaa tsuártinian Yusa kakarmarin takakuyayi Jesus. <sup>18</sup>Nuinkia emearun tampumpua kuaru shuar itiararmiayi. Jesus pujamunam init awayattsar wak-eriarmiayi. <sup>19</sup>Tura shuar ti untsurí pi-aku asamtai wayamnia atsumiai. Tú-maitkui yakiini wear jean urakar, aents kae ajas matsatmanum Jesus pujamunam emearun tampunam nená itiararmi-ayi. <sup>20</sup>Nin itiarmanianu, Jesus Yusa kakarmarin takakui, tú enentáimtamun

Jesus nekáa emearun tímiayi “Ame tunaarum tsankuramuitme.”

<sup>21</sup> Nuinkia Israer-shuara jintinniurisha, Pariséusha ni enentáin enentáimsar “¿Jusha yait Yúsa náarín yajauch awajtin? Warí, aya Yúsak tunaan tsankurachminkiait” tu enentáimsarmiayi.

<sup>22</sup> Tura Jesus ni enentáimsamurín nekáa tímiayi “¿Urukamtai tú enentáimprarum átum? <sup>23</sup> Nuinkia ¿warí imiá yúpichuchit, tsuártiniak, ni tunaarí tsankuratniuk? <sup>24</sup> Wats, Aents Ajasu tutai Wisha tunaan tsankuratniun Yusa kakarmarín takakjai. Jujai nekaatarum tusan wats itiurchat tárúmna nuna túrattajai.” Nuyá emearun chicharuk tímiayi “Amesha wajakim, tampuram achikiam ame jeemiin wetá.”

<sup>25</sup> Nú chichamaik emearu niisha ímiainiamunman tampurín achik wajaki ni jjeen Yúsan wararki wémiayi. <sup>26</sup> Túmakui ashí shuar ti enentáimprar Yusa náarín shiir awajsarmiayi. Tura ashamainiak “aentsti tujinkiamu yamáí wáinkiaji” tiarmiayi.

### Riwín Jesus untsukmiania nu

(Mateu 9.9-13; Márkus 2.13-17)

<sup>27</sup> Ukunam Jesus wekas akupniu kuítrín-juu, naarí Riwí, ni chíkich naarí Mateu, akupin akitiai jjeanam pujan wáinkiamiayi. Wáiniak “nemartusta” tímiayi. <sup>28</sup> Tutai Riwí wajaki takakmarínkia ikuak Jesusan nemarsamiayi.

<sup>29</sup> Nuyá ukunam Riwí namperan Jesusan najatamiayi. Tura untsurí akupniu kuítrín-juu tura chíkich shuarsha káunkar misanam pujuarmiayi. <sup>30</sup> Tura Pariséusha Israer-shuara jintinniurisha Jesusan tsanumpruiniak Jesusa unuiniamurín tiarmiayi “¿Maaj, urukamtai

atumsha akupniu kuítrín-juu ainia nújajsha tura chíkich yajauch shuarjajsha iruntrarum yurumprum?”

<sup>31</sup> Tutai Jesus áimkiamiayi “Shuar jaachu péñker ainiana nu ¿tsuákratniun atsumainiawak? Antsu jaa ainia nu tsuákratniun atsumainiawai. <sup>32</sup> “Wikia péñkeraitjai” tuinia nuna untsuktajtsan táchaitjai. Antsu yajauch shuar ni enentáin yapajjá Winia ajasat tusan untsuajai” tímiayi.

### Yurumtsuk Yus áujsatniun Jesusan aniasarmiania nu

(Mateu 9.14-17; Márkus 2.18-22)

<sup>33</sup> Nuyá Jesusan aníak tiarmiayi “Juanka unuiniamurisha, Pariséu unuiniamurisha yurumtsuk Yúsan áujainiatsuk. Tura ame unuiniamurmeka ¿urukamtai ijarma Yúsan áujainiatsu?” tiarmiayi.

<sup>34</sup> Tutai Jesus tímiayi “Nuatma nampernum, ¿ipiaamu ainia nu ijiarmamniakait, yamáí-nuatu pujai? <sup>35</sup> Atsá. Wats Wisha ukunam junaktiatjai; nuinkia ijiarmatin átatui” tímiayi.

<sup>36</sup> Tura junasha nujai métek-taku unuiniamiayi: “¿Yamaram pushí tsupikiar nujai arut pushiniam anujtukminkiait? Nu túramka yamaram pushí yajauch ajasaintiui; túrasha shiir anujkam arut pushijjai mai metek yamaram wáinkiachminiaiti. <sup>37</sup> Núnisan nijiamanch yamáí nawamu nuap najanam arutnum yaraachminiaiti. Túramka nijiamanch kariak ijiakratniuiti; túmak nijiamchisha nuap najanamusha mai metek menkainiawai. <sup>38</sup> Tuma asamtai nijiamanch yamáí nawamu yamaram nuap najanamunam yaraatniuiti. Nu túramka mai metek péñker átiniaiti. <sup>39</sup> Yaunchu nawamu úmana nuka yamarman nakitrattui. “Yaunchu nawamu imiá péñkeraiti” tiártatui” tímiayi Jesus.

**Ayampratin tsawantaj trikiu  
neren achikiarmiania nu**

(*Mateu 12.1-8; Márkus 2.23-28*)

**6** Ayampratin tsawantaj Jesussha unuiniamurijjai araanunam wekasar, unuiniamurisha trikiu neren majurkutak wekainiarmiayi; tura tishisar neren yuawarmiayi. <sup>2</sup>Nuna túruiniakui Pariséu tiarmiayi “Maaj, atumsha ayampratin tsawantaj takaschatniua nu, ¿urukamtaí takaarum?”

<sup>3</sup>Takui Jesus ayak tímiayi “Yaunchu uunt akupin Tawitcha tura nemarniusha tsukamainiak túrawarmia nu ántichukaitrum. <sup>4</sup>Tawit Yusa Jeen wayá, Yus iniaktusma tantan yuámiayi; tura nemarniuncha ajamsamiayi. Tura nu tantancha aya Israer-shuara Pátriri yúatin ármiai. Tuma aiñ Tawitcha yajauchin túrutsuk achikmiayi, tímiayi. <sup>5</sup>Wisha Aents Ajasuitkiun ayampratin tsawantan Nérenniurintjai” tímiayi Jesus.

**Shuara uweje jakaan  
Jesus tsuármiania nu**

(*Mateu 12.9-14; Márkus 3.1-6*)

<sup>6</sup>Chíkich ayampratin tsawantaj Israer-shuar iruntai jeanam Jesus wayá unuiniartasa nan kamamiayi. Nuñ shuar uweje untsuuria nu jakaa pujumiayi. <sup>7</sup>Tura Israer-shuara jintinniurisha, Pariséusha Jesusan “yajauch túrayi” titiai tusar wakeruniak, “ju ayampratin tsawantaj nu shuaran tsuartimpiash” tusar ii pujuarmiayi. <sup>8</sup>Túrasha Jesuska ni enentáimmarin nekariarmiayi. Túmayat uweje jakaan chicharuk “Juñ ajapén wajasta” tímiayi. Tutai áishman ajapén wajasmiai. <sup>9</sup>Nuñkia iruniarmiania nuna Jesus tímiayi “Enentáimpratarum. Ayampratin tsawantaj yajauch túratin, péñker túratniujai ¿tuá péñkerait?”

¿Uwemtikratin, máatniujajsha tuá péñkerait?” tímiayi. <sup>10</sup>Nuyá téntakarmia nuna iis áishman kan tímiayi “Uwejem takuitia.” Áishmansha uwejen takuimtai nú chichamaik péñker ajasmiai. <sup>11</sup>Tura chíkichkia ti kajerkararmiayi. Túrawar “Jesus warí itiurkamniakit” tusar aniniaisarmiayi.

**Tuse unuiniamun Jesus  
anaikiarmiania nu**

(*Mateu 10.1-4; Márkus 3.13-19*)

<sup>12</sup>Nuyá Jesus Yúsan áujasataj tusa náinnium wakamiayi. Tura nu kashi Yúsan au-aujkua tsawarmiayi. <sup>13</sup>Tsawarmatai unuiniamurin ikiankar tuse anaikiarmiayi. “Winia akatramuruitrume” tímiayi. <sup>14</sup>Ju ármiai: Emka, Semun chíkich naari Pítur apujtusmia nu; tura nuyá ni yachi Antres, Jakupusha, Juansha, Jiripisha, Parturumisha, <sup>15</sup>Mateusha, Tumassha, Arpeu uchiri Jakupusha, Ásump Semunsha, <sup>16</sup>Jakupu yachi Jútassha, tura Jútas Iskariúti Jesusan ukunam surukmia nu. Nu tuse achikma ármiai.

**Untsurí shuaran  
Jesus yáñkiarmiania nu**

(*Mateu 4.23-25*)

<sup>17</sup>Niijjai Jesus náinniumia pakanam taawarmiayi. Nuñ pujusarmiayi. Nuñsha untsurí unuiniamurisha, tura Jutía nun kanmaya, tura Jerusarennumia tura nayaantsanam ayamach Tiru, tura Setun péprunmaya ti untsurí aents antuktaitsar pujuarmiayi. Jesus tsuarati tusar káunkarmiayi. <sup>18</sup>Iwianchrukusha tsuámararmiayi. <sup>19</sup>Jesus tsuártinian tujinkiachu asantai ashí shuar antiñtaj tusar wakeriarmiayi.

**Náinnium Jesus etserkamu**

(*Mateu 5.1-12*)

<sup>20</sup>Ni unuiniamurin Jesus iis juna tímiayi: ““Yusan atsumajai” tárugna nu, Yus

akupeamunam páchitkiaiitume; tuma asamtai warasminiaiitume.’

<sup>21</sup> ‘Yamáí tsukamarmena nu ukunam ejemartatume. Tuma asamtai warasminiaiitume. Yamái útrumna nu, ukunmaṅka wishirtatume. Tuma asamtai warasminiaiitume.’

<sup>22</sup> ‘Atumin nakitramprarmatai, ajapramawarmataisha, tura Winia Aents Ajasu tutaiya nú shuar ajasuiti tusar tsanumprutmak katsekkrarmataisha warasminiaiitume.’

<sup>23</sup> ‘Túramtai nayaimpiniam ti shiir ana nu núkap sunastin átatui tu enentáimsarum ti warastarum. Warí, ju shuara uuntri yaunchu Yúsna etserniun nútiksaran yajauch awajsacharmakia.’

<sup>24</sup> ‘Tura kuítrinnitiram atumsha atumí waratairi aya yamaik waintrume. Ukunmaṅka waraschattarme.’

<sup>25</sup> ‘Atsumatsjai, tu enentáimprumna nu, ukunmaṅka atsumattarme. Nuṅkia waraschattarme. Yamái wishíarmena nu, ukunmaṅka wáitiakrum úttiatume. Nuṅkia waraschattarme.’

<sup>26</sup> ‘Ashí aents atumin shiir awajtamkurmin aneartarum. Nujai waraschatniuitume. Warí nuna uuntri ántar-yusnan etserin armia nuna nútiksaran yaunchu shiir awajsarmiayi.’

**Ii nemasri aneatniun  
Jesus unuiniamiayi**

(Mateu 5.38-48; 7.12)

<sup>27</sup> ‘Winia anturtarmena nuna juna tájarme: Ame nemasrum aneata, nakitramainia nusha shiir awajsata; <sup>28</sup> yajauch chichartamainia nusha shiir enentáimtusarta; katsekramainia nusha Yus áujtusarta. <sup>29</sup> Ame yapimin ijiutmamtai áatú yapirui sha ijiuti tusam iniaktusta; ame pushirmin jurutramkitiaj tuíniakuisha sákurmencha jukiti tusam iniaisata. <sup>30</sup> Seatmana nu susata, tura áminiun jurutramainiakuisha ataksha awanturkitia tiip. <sup>31</sup> Chíkich winia túru-

tati tusam wakeramna nútiksamek chikichcha túrata.’

<sup>32</sup> ‘Iista, aya atumin anenmainia nuke aneakmesha, ḡnusha warí péñkera túrarum? Yajauch shuarsha nuna túrin ániawai. <sup>33</sup> Tura atumniasha péñker awajtamainia nuke péñker awajkurmesha ḡnusha warí péñkera túrarum? Yajauch shuarsha nuna túrin ániawai. <sup>34</sup> Awanturkimmniaiti tu enentáimtarum nuke íkiakrumsha ḡnusha warí péñkera túrarum? Yajauch shuar nuamtak yajauch shuarjai awanturkimmniaiti tu enentáimsar ikianainiawai. <sup>35</sup> Tura atumsha nemasrum aneatniuitume, tura péñker túratniuitume, tura awanturkittiawai tu enentáimsuk ikiastiniaitume. Túrakrumñkia Uunt Yus péñker akirmaktatume; tura ni uchiríntjai tu iniakmastatume. Yuska, “yuminsajme” ticha nunasha tura yajauch shuarnasha shiir awajeawai. <sup>36</sup> Ii Aparí waitnentrannia nútiksarmek atumsha waitnentratarum.’

**Chikicha túramuri ti  
enentáimtusairap**

(Mateu 7.1-5)

<sup>37</sup> ‘Chikicha túramuri ti enentáimtusairap. Núnisan Yuska atumí tunaarín iirtamsashtatui. Chikicha tunaarín “nuke asutniatniuiti” tiirap. Núnisan Yus atumin sumantikramashtatume. Tsanḡkurnairatarum. Núnisan Yus tsanḡkurtamprattawai. <sup>38</sup> Chikichcha susata. Núnisan Yus atumin suramsattarme. Niisha péñker nekapma, tura núkap ati tusa teeka awajas tura patas núkap enkea emetsaj amastatui. Atum chíkich túrarmena nútiksann atumniasha túrutmattarme.”

<sup>39</sup> Tura nuyasha juna métek-taku chichaman ujakarmiayi: “Jij kusurusha ḡitiurak chíkich kusuruncha jukimmniait. Mai metek waṅanam iniaashtatuak?

<sup>40</sup>Unuiniamua nu unuiniana nuna nan̄kaamas áchatniuiti. Túrasha niisha ti unuimiatar unuiniana nujaj̄ métek nekaamniaiti.’

<sup>41</sup>‘¿Itiurtsuk atumi j̄iin numi en̄ketna auk ítskesha atumí yachí j̄iin tsuat en̄ketusha iiyarum?’ <sup>42</sup>Ame j̄iimj̄iin numi tuke en̄ketaisha ¿itiurtsuk ame yatsumi j̄iija tsuátan jurustajme tame? ¿Ántrairume! Emka ame j̄iimj̄iin numi en̄ketna nu jusata. Nuñkia paant wáinkiateme yatsumi j̄iin tsuat en̄ketna nu jurustin.’

### Nerejaj̄i numi nekaatainti

(Mateu 7.17-20; 12.34-35)

<sup>43</sup>‘Pénker numi yajauchin nereatsui; tura yajauch numi péñkeran nereatsui. <sup>44</sup>Numisha ni nerēn nékanui. Tsachikniumiasha kushin̄kiap júukchamniaiti. Tura naranmaya shuinia júukchamniaiti. <sup>45</sup>Núnisan péñker shuar ni enentáí péñker asamtai péñkeran chichaawai; tura yajauch shuar, enentáí yajauch asamtai yajauchin chichaawai. Páantchakait. Enentáin pimiutkamu ana nuyan̄ ni wenejaj̄i chichaawai.’

### Jimiará jea ukurtin

(Mateu 7.24-27)

<sup>46</sup>‘Wi tájana nu túrachiatrumsha ¿urukamtai Winia, Uunta, túrutrum? <sup>47</sup>Shuar winia chichamprun ántuinia nu jea jeammajaj̄i métekete. Winia anturtuk umíana nu jujaj̄i métekete: <sup>48</sup>Shuar jean̄ jeamuk emka init taur kayanam ukurmai. Tura yumi ti yutuk, entsa nujan̄krua tukummaiat pukukachmai kayanam ukuamu asa. <sup>49</sup>Antsu Winia anturtukiat umiatsna nuka jujaj̄i métekete: Shuar jean̄ jeamuk aya naikminiam jeammai. Tura entsa nujan̄krua tukumpram nu jeaka pukukamai. Tura mash sántramai.” Tu unuiniamiayi Jesus.

## Suntara yáintriñ Jesus tsuármiania nu

(Mateu 8.5-13)

**7** Jesus áentsun unuiniasua amik Kapernáum péprunam wémiayi. <sup>2</sup>Nuj Rúmanmaya suntara kapitíantri pujumiayi. Nu kapitían̄i takarniuri, ti aneamuri, jakamnia jaamiayi. <sup>3</sup>Tura Jesusan pachis áujmataianian antuk, ame shuarum Jesusan itiatiti tura winia takarniun tsuárturti tusa Israer-shuara úuntriñ akupkamiayi. <sup>4</sup>Niisha Jesusan weriar, umirtukat tusa ti seainiak tiarmiayi “Ju kapitían̄i nekas yáintriñ péñkeraiti. <sup>5</sup>Niisha yajaya apachitiat in shiir enentáimturmají. Tura iruntai jean̄ jeamtinniasha nin̄ki chicharkaiti, tura yayawai.”

<sup>6</sup>Nuyá Jesus niijaj̄i wémiayi. Tura ni jean̄ jeastatuk jatemsamtai kapitían̄cha ni amikriñ akatar ju titiarum tusa Jesusan akuptukarmiayi. Niisha Jesusan chicharuk juna tiarmiayi “Uuntá, ántram wayataj tu enentáimsaip. Ame ti nan̄kaamaku asam winia jearuí wayachminiaitme. <sup>7</sup>Tuma asakmin imia wiki Amiin̄ jeatniun arantukjame. Ayatik “pénker ajastí” tákumin winia takarniusha péñker ajatrustatui. <sup>8</sup>Wi nékajai. Winia úuntur winia akuptuiniawai. Tura wisha suntaran akupenajai. Nunasha wi “wetá” takui wéawai. Tura chikichnasha “winitia” tutai winiawai. Tura winia takartinian “ju túratá” tutai umíawai.” Tu tímiayi.

<sup>9</sup>Jesus nuna antuk ti enentáimias ni nemarainian tímiayi “Nekas tájarme Israer-shuar Yúsan tímiatrus enentáimtinian wáinchaitjai.”

<sup>10</sup>Tura kapitiani akatramuri jeá wakеткиar, takarniuri péñker ajasun wáinkiarimiayi.

### Wajé uchrin̄ Jesus iniantkimiania nu

<sup>11</sup> Nuyá ukunam chíkich pepru Naín tutainium ni unuiniamurijjai tura chíkich untsurí aentsjai Jesus wémiayi.

<sup>12</sup> Tura péprunam nuntumas jakaan iwiarsatai tusar juńnian wáinkiamiayi. Jakáa nukurí wájeyayi, tura uchirí jakamia núchikiiyayi. Tura ti untsurí nu peprunmaya nin nemarsarmiayi.

<sup>13</sup> Jesus nu wajen wáiniak tura waitnentar “úutip” tímiayi.

<sup>14</sup> Nuńkia Jesus jakaa enkerman tarunt antinmiayi; nuna juńniasha wajasarmiayi. Nuńkia Jesus jakaan chicharuk “Umpa nantaktia, tájame” tímiayi.

<sup>15</sup> Tutai niisha nantaki pujus chichaamiayi. Tura Jesus ni nukurin̄ “Jujú uchiram” tímiayi.

<sup>16</sup> Tura matsamiarmia nu, nuna wáinkiar ashamkarmiayi. Tura Yusa náarin̄ shiir awajsarmiayi. Tura chichainiak, “Yúsnan etserniuchukait Niisha. Ataksha Yúsnan etserin uunt ana nu tarutramji” tiarmiayi. Tura “Israer-shuarti Niiniu ájnia nuna yáinmaktai tusa Yus tarutramji” tiarmiayi.

<sup>17</sup> Tura ashí Jutía nunkanmayasha tura ni írutkamu nunka ármia nuyasha Jesus túramia nuna nekaawarmiayi.

### Imiakratin Juan̄ sepunam pujak ni amikrin̄ akatar Jesusan akuptukarmiania nu

(Mateu 11.2-19)

<sup>18</sup> Juan̄ ni írutkamurí ujakam Jesus túramun nekaamiayi. Nekáa ni írutkamurín̄ jímiaran untsukmiayi. <sup>19</sup> Tura Jesusai akupkarmiayi. “Atumsha Jesus aniastarum. ¿Amesha nekas Kristu Yus akupkamu táinia núkaitiam. Kame chíkichak nákastataj? titiarum. Nu nekáa ikiuutarum’ tímiayi.

<sup>20</sup> Tutai niisha Jesusan werí jeariar tiarmiayi “Incha imiakratin Juan̄ akatar akuptamkaji. ¿Amesha nekas táinia núkaitiam. Chíkichak nákastataj? Nu nekaatai tusar wakeraji” tiarmiayi.

<sup>21</sup> Wats, nii jeawarmia nuí Jesus untsurí jaan tsuártasa pujurmiayi. Iwianchrunkuncha iwianchrin̄ jírki akupkatasa pujurmiayi. Tura kusuruncha fímtikmiayi. <sup>22</sup> Tuma asa Jesus akatramun juna tímiayi: “Waketkirum ashí átum antukurmena nusha, wáinkiarumna nusha ujaktarum. Kusurusha wáinmainiawai; shutuap ainia nu péńker wekainiawai; tunamarusha tsuámainiawai; empekusha ántuiniawai; jakaasha atak iwiaaku ajainiawai; tura kuítrinchannumsha uwempratin chicham ujakmaiti. Juan̄ nu ujaktarum. <sup>23</sup> Yawetsuk Winia tuke shiir enentáimturna nú shuar shiir átatui” tímiayi Jesus.

<sup>24</sup> Waketkiarmatai Jesus Juánkan pachis áujmatman antuk shuar matsamiarmia nuí juna tímiayi: “Shuar atsamunmasha ¿warí werimiarum. Pintiu nase umpúam atúu we juní we ajana nu iistai tusarmek wémarum? Juan̄ núnischaiti. <sup>25</sup> Nuikia ¿warí werimiarum. Shuar péńker iwiarmampra ístai tusarmek wémarum? Warí, péńker iwiarmampraka uunt akupniu jeen̄ pujuiniatsuk. <sup>26</sup> Nuńkia ¿warí werimiarum. Yúsnan etserniuk werimiarum? Maa, nú nankaamas wáinkiarne. <sup>27</sup> Yaunchu Yus-Chichamnum ju áarmaiti:

“Winia akatramurun amíini emka aku peajai ame jintimin̄ iwiarat tusan.” Juan̄ nu akatramuiti. <sup>28</sup> Nekasan tájarme, Yúsnan etserin imiakratin Juan̄jai nankaamas uunt atsuwiti. Túmaitiat Yus akupeamunam páchinia nu shuarka nekas imianchaitiat, Juan̄jai nankaamas átatui” tímiayi. <sup>29</sup> Penké shuarsha, kuítian-juusha,

Juan imiaimujaj imianiarma nu, Jesus timian antukar Yusa náarjn shiir awajsarmiayi. <sup>30</sup>Túrasha Pariséusha Israer-shuara jintinniurisha Yus yáintaj támaitiat Juan imiaamujaj imiancha ásar nakitrarmiayi. <sup>31</sup>Nuiñkia Uunt Jesus tímiayi “Yamaiya áentstiram, warijiajn métek árum nuna paant títiatjarne. <sup>32</sup>Uchijiai métek árum. Ni aijjai iruntrar nakurustaj tukamá tuñiawai “Námpera áinis nakurustaisar peem umpuarji, túrasha jantsemáchurme. Nuyá iwiarsatniua áinis nakurustaisar íwiareakur kantamtai kantamáaji, túrasha átum úutcharme.” Tu tuñiawai. <sup>33</sup>Atumsha núnisaitrume. Kame Juan núkap yurumsuk úmutsuk wekaimiayi. Túmakui átumka “iwianchrukuiti” tímiarme. <sup>34</sup>Nuyá Wisha Aents Ajasan támajai. Tura yurumá úmakuisha “ti yurumin tura ti nampenaiti; kame ashí yajauch shuaran tura kuítian-juu amikrinti” túrutrume. <sup>35</sup>Wats, nekas neka ainia nu, Yusa nekatairjn iniakmainiawai.” Tu tímiayi.

### Pariséu Semuñ náartin Jesusan ni jeen ipiaamiania nu

<sup>36</sup>“Winí yurumáitia” tusa Pariséu Jesusan ipiaamiayi. Tutai Jesus ni jeen werí misanam pujusmiayi. <sup>37</sup>Nuiñkia nu péprunmayá yajauch nuwá, Jesus Pariséu jeen yurumáttsa weyi táman antuk, kayá mutinium kunkuin asuiti áimkiamun takukí jearmiayi. <sup>38</sup>Tura úutki Jesusa nawen pujuras neajkijijai nijjarmiayi. Tura intiashijjai japirmiayi; nuyá nawenam mukuta kunkuinian ni nawen ukatramiayi. <sup>39</sup>Pariséu Jesusan ipiaamia nu, nuna wáiniak juna enentáimsamiayi: “Ju nekas Yúsnan etserniuitkiunka, ju yajauch nuwá ántiana nuna nekaawainti. Warí, niisha netse nuwáchukait” tu enentáimsamiayi.

<sup>40</sup>Nuiñkia Jesus Pariséu chicharuk tímiayi “Semunká, ámin titiaj tusan wakerajai.”

Tutai Pariséu chichaak “Turuttiá, Uuntá” tímiayi.

<sup>41</sup>Tutai Jesus tímiayi “Kuítian ikiamniun jimiará áishman tumashmakarmiayi. Chíkich kiniantus (500) tura chíkichka aya senkuentak tumashmakmiayi. <sup>42</sup>Akiktin tsawant jeamtai máí-metek takakcha árimiayi. Tuma asamtai kuítian ikiamin ni tumashrjn máí-metek asakátrarmiayi. Wats, turuttiá ¿tú áishmanka ikiamniun nekas aneamia?” tímiayi.

<sup>43</sup>Tutai Semuñ tímiayi “Enta, núkap tumashrjn tsankuramia nu.”

<sup>44</sup>Tutai Jesus tímiayi “Nekas tame.” Nuiñkia nu nuwan iis Semunkan tímiayi “Ju nuwá wáintsumek. Ame jeemiin wayamtai winia nawer nijjartin entsa suruschamame; antsu ju nuwáka nawerun neajkijijai nijjarturai, tura intiashijjai japirturai. <sup>45</sup>Mukutam áujtuscamame; antsu ninkia nawerun tuke mukutui. <sup>46</sup>Winia muukaruisha asuiti ikiurtuschamame; antsu ninkia nawerui kunkuin asuitin ukatrurai. <sup>47</sup>Nu tuma asamtai tájame, niisha Winia ti anentu asamtai ni tunaari untsurí ana nu tsankuramuiti. Tura tunaar ishichik awai tau tsankuramu ana nuka ishichik anenkratniuiti.” Tu tímiayi Jesus.

<sup>48</sup>Nuiñkia nuwan tímiayi “Ame tunaarum tsankuramuitme.”

<sup>49</sup>Tura chíkich ipiaamu Jesusjai misanam pujuarmiania nu “¿Jusha ya asan tunaancha tsankurea?” nuamtak tunainiarmiayi.

<sup>50</sup>Tura Jesus nuwan chicharuk ““Uwemtkiartiniaiti” tu enentáimturu asam uwempraitme. Shiir wetá” tímiayi.

### Nuwá Jesusan yáinkiarmania nu

**8** Nuyá untsurí péprunam Jesus wekaráktak Yus akupeana nuna shiir chichaman etserkini wekaimiayi. Tura ni unuiniamurí tuse ármia nu nemarsarmiayi. <sup>2</sup>Yaunchu untsurí nuwá jaa armia nuna tura iwianchruku armia nunasha Jesus tsuáramiayi. Nu nuwasha Nin nemarsarmiayi. Nusha ju ármiai: Maktaranmayá Marí, siati íwianch jíirkimiuyania nusha <sup>3</sup>tura uunt akupin Erutisa takarniurí Chusa nuwé Juancha, tura Susancha; tura chíkich untsurí ni takakmarin súsar Jesusan yáinkiarmai.

### Atsaamin atsaampramun Jesus unuiniamiania nu

(Mateu 13.1-9; Márkus 4.1-9)

<sup>4</sup>Untsurí péprunmayá Jesusan iis-tai tusar jíinkiarmai. Tura untsurí káunkarmatai ju métek-taku chichaman Jesus unuiniamiai:

<sup>5</sup>“Atsaamin atsaamprataj tusa jíinkimiayi. Atsaamki wesa jinkiái jintiá iniaararmiayi. Túrunamtai weenak najakarmiayi. Nuyá chiniki tariar yuawarmiayi. <sup>6</sup>Chíkich jinkiái kaya írunmanum iniaararmiayi. Nu jinkiái tsapainiar, wárik nantu sukuam káararmiayi. <sup>7</sup>Chíkich jinkiái janíiniam iniaararmiayi. Tura janíinsha jinkiáisha máí-metek tsapainiar, janíin kaníin ajakramiayi. <sup>8</sup>Tura chíkich jinkiáisha pénker nuníinam iniaararmiayi. Tura tsapainiar, pénker nerekar chíkichkia siansha (100) nerekararmiayi.” Tuasua amik kakantar chichaak Jesus tímiayi “Kuishim ákuiníin antuktatum.”

(Mateu 13.10-17; Márkus 4.10-12)

<sup>9</sup>Nuyá ni unuiniamurí Jesusan aniak tiarmiayi “Ju métek-taku chicham tamena nu ¿warintkumea tame?”

<sup>10</sup>Tutai Jesus tímiayi “Atumnia Yus ni akuptairin nekaachma ana nuna nekamtikramprume. Tura chikichnaka, wáiniainiyat kusurua núnin árti tusan, tura ántuiniyat nekaacharat tusan aya métek-taku chichamjai jintintiatjai,” tímiayi.

### Atsaampramu chichaman Jesus paant jintintiamiania nu

(Mateu 13.18-23; Márkus 4.13-20)

<sup>11</sup>‘Wats, ju nekaatarum, tímiayi. Jinkiáisha Yusa chichamen nakumui. <sup>12</sup>Jintiá iniaaru tana nuka shuar aya ántana nuna nakumui. Yúsan nekas enentáimtus uwempracharti tusa íwianch wárik taa nu chichaman ni enentáiyán júawai. <sup>13</sup>Kayanam iniaaru tana nuka shuar antuk waras umiana nuna nakumui. Tura nú shuar kaníin atsá asamtai, ishichik tsawantiniin umikiar itiurchatan wáinkiar wárik kanainiawai. <sup>14</sup>Janíiniam iniaaru tana nuka tuke enentáijiai umiátsna nuna nakumui. Nu shuarsha ántuiniawai, túrasha ni wakeramurijiai wekainiawai. Ju nuníinman ana nuna ti páchiniakui, tura kuítian ti wakeruiniakui, warastinniak enentáimtuiniakui, Yus-Chicham ni enentáin takaatsui. Nujai kaníin karma ásar nerektinian tujintiainiawai. <sup>15</sup>Tura jinkiái pénker nuníinam iniaaru tana nuka shuar antuk umiinia nuna nakumui. Niisha antukarmia nuna pénker enentáimtusar, yawetsuk umirkar ti pénker nerenawai.’

### Ashí iwaiiniakma átatui

(Márkus 4.21-25)

<sup>16</sup>‘¿Shiripkin ekeemak nukuktinkiait? Peaknum waaptak ikiuschatniuiti. Antsu jeanam wáiniana nu paant wáinkiarat tusa yakí ekentsatniuiti. <sup>17</sup>Núnisan ashí nekaachma ana nu paant átatui. Tura úukma ana nu nekanattawai. Tura iwaiiniakma átatui. <sup>18</sup>Tuma asamtai



anearum péñker antuktarum. Shuar takakna nu patatsamnia átatui. Túrasha takaktsuna nu, takakjai tu enentáimtu-mana nuka jurunkíttiawai.” Tu timiayi.

### **Jesusa nukurí, Jesusa yachi**

*(Mateu 12.46-50; Márkus 3.31-35)*

<sup>19</sup> Jesus pujamunam nukurí ni yachísha tariarmiayi. <sup>20</sup> Turamtai Jesusan tiarmiayi “Ame nukusha yatsumsha aq wajasar untsurmainiawai.”

<sup>21</sup> Tutai Jesus tímiayi “Ee, nukuruiti, yatsuruiti, tura Yus tana nuna antuk umána nusha winia nukuruiti, winia yatsuruiti.”

### **Nasesha entsasha Jesusan umirkarmiania nu**

*(Mateu 8.23-27; Márkus 4.35-41)*

<sup>22</sup> Chíkich tsawantai Jesus ni unuiniamurijjai kanunam enkemprar “Antumian amaini wetai” tímiayi.

<sup>23</sup> Entsanam wesar Jesus kanarmiayi. Tura aya aneachma nase ti kakaram násentkui chíchimi tampá tukumar kanun init awayastatuk awajmiayi.

<sup>24</sup> Túram nuñkia Jesusan ishintiainiak “Uuntá, iisha entsá wayaaji” tiarmiayi. Nuñkia Jesus nantaki nasencha entsan cha chicharkamiayi. Nú chichamaik nasesha menkakamiayi, tura entsasha miaaku ajasmiayi. <sup>25</sup> Nuyá ni unuiniamurin chicharuk “¿Urukamtai Winia enentáimtursachuram?” tímiayi.

Tura niisha ashamainiak, ti enentáim-prar “¿Ausha warí áishmankait? Nasesha entsasha Nii chicharkam umirainiat-suk” tiarmiayi.

### **Jatara nunkanam Jesus iwianchrukun tsuármiania nu**

*(Mateu 8.28-34; Márkus 5.1-20)*

<sup>26</sup> Kariréa nunka amaini Jatara nunkanam jeawarmiayi. <sup>27</sup> Kanunmaya Jesus jiinkimtai nu péprunmaya áishman Nin taruntamiayi. Nu áishmansha

yaunchu iwianchrukuyayi. Misú wekas, jeá pujutsuk aents iwiansamunam pujuyayi. <sup>28-29</sup> Íwianchkia nu

aishman kan ti kakaram nupet wémiayi. Tura emetatai tusar uwejencha nawencha jirujai jinkia wearmiayi. Túrasha tujinkiarmiayi. Niisha jiruncha tsurí wémiayi. Tura íwianch aents atsamunam útsuk awemamiayi. Nu aishman Jesusan wáiniak tikishmatar kakantar chicharuk “¿Urukamtai winiisha tarutnium, Uunt Nankaamaku Yusa Uchiri Jesusa? Winia wáitkiarsaip tusan seajme” tímiayi. Íwianch nin pujurun Jesus jiki akupeam tu tímiayi. <sup>30</sup> Jesus nu áishman kan anias “¿yáitiam?” tímiayi.

Tutai nii chichaak “Wikia Untsurintjai” tímiayi. Untsurí íwianch nin pujurma asa nuna tímiayi.

<sup>31</sup> “In uunt wáanam ii jiinkimij nuin akuptukam amutkaip” íwianch seawarmiayi Jesusan. <sup>32</sup> Nui ishichik arantach náinnium untsurí kuchi shushunmak yujaarmiayi. Tura íwianch chichainiak, “Antsu kuchiniam wayatin tsankatrukta” tiarmiayi.

Tutai Jesuska “Ayu, wetarum” tímiayi.

<sup>33</sup> Nuna takui íwianch áishmannumia jinkiar kuchiniam wayawarmiayi. Túram kuchisha nánatanam akaiki iniaawar entsanam utsanawarmiayi. Túrunawar jakekarmiayi.

<sup>34</sup> Kuchin wáinniusha túrunan wáinkiar, ashamkar, péprunmasha tura arantcha etserkatai tusar tseke wearmiayi. <sup>35</sup> Etserkarmatai, iyutai tusar untsurí shuar wearmiayi. Tura Jesus pujamunam jeawar, íwianch jintiukiarmia nú áishman kan péñker

ajas pushí entsar Jesusa nawen pujan wáinkarmiayi. Tura ashamkarmiayi. <sup>36</sup> Iwianchruku áishman tsuáрман wáinkarmia nu yama taan ujakarmiayi.

<sup>37</sup> Tura ti ashamainiak Jatara

nunkanmaya aents ashí Jesusan “Wetá” tiarmiayi. Tutai Jesus kanunam enkemar wémiayi. <sup>38</sup>Íwianch jíintiukiarmia nú áishman Jesusan, wisha ame wéamunam winitiaj tusa seamiayi. Tutai Jesus nuna suritiak, <sup>39</sup>“Antsu ame jeemiin weme Yus ámin túrutma nu ashí etserkata” tímiayi. Tutai áishman we Jesus nin túramia nuna ashí nu péprunam etserkamiayi.

**Jairu nawantrincha tura chíkich nuwancha Jesus tsuármiania nu**

*(Mateu 9.18-26; Márkus 5.21-43)*

<sup>40</sup>Tura Jesus katiñki Kariréanam tatí tusar nákas pujuarmiayi. Tuma ásar Nii waketki katiñki támatai nu aencha warasar áujarmiayi. <sup>41</sup>Tumaj Israer-shuara iruntai jeá uuntri Jairu naartin támiayi. Nii taa, Jesusa nawen tikishmatar “Winia jearui waitneasam winítrítia” tímiayi. <sup>42</sup>Ni nawantri chikichik amia nu, tuse uwí takaku, jakatasa pujaku nuna tímiayi.

Jesus “ayu” tinia weakui ti untsurí aents nemarmiayi. Tura untsurí shuar kaé ajas weena ásar chanuawarmiayi.

<sup>43</sup>Nui nuwá páchitkia wémiayi. Ni-isha tuse uwí numpa ajapeak wáitias pujuyayi. Tsuákratniua nuísha ni kuftrin ashí ajapaitiat tsuámarchauyayi. <sup>44</sup>Jesusa úkuriñi winiá weantuk ni pushirí nánkatramurin antinmiayi. Nuna tura nú chichamaik numpé ajapeamuncha péñker ajasmiai. <sup>45</sup>Nuinikia Jesus chichaak “¿Ya Winia antintkia?” tímiayi.

Tura “penkesha antinchajme” tuñiakui Pítiur ni tsaniakmarijiai Jesusan chicharuk “Uuntá, ti untsurí antinmasha, tura ti untsurí chanunmaini-asha ¿itiura “ya Winia antintkia” tame?” tíarmiayi.

<sup>46</sup>Tútaisha Jesus tímiayi “Nekas Winia antintkiayi. Winia kakarmarjai tsuárajna nuna nékajai” tímiayi.

<sup>47</sup>Nuyá nu nuwasha, nekarayapi tusa kuranki taa Jesusa nawen tikishma-tramiayi. Tura ashí aents ántuiniamunam urukaku antinikia tura itiura wárik péñker ajasmia nuna ujakmiayi.

<sup>48</sup>Nuinikia Jesus nuwan tímiayi “Nawantrú, shiir wetá. Winia nekas enentáimtursa asam péñker ajasume.”

<sup>49</sup>Jesus tuke chichas pujai uunt Jairu jea, ti untsurí antinmasha, turenia taa, Jáirun tímiayi “Ame nawantrum jakayi. Unuikiartín tuke itit awajipia” tímiayi.

<sup>50</sup>Tura Jesus nuna antuk tímiayi “Ashamkaip. Áyatik Winia nekas enentáimtura. Túrakmin nawantrum péñker ajastatui” tímiayi.

<sup>51</sup>Jeá jeawar Jesussha Nijiai untsurí wayatniun surimkiarmiayi. Antsu aya Pítrun, Jakupun, Juánnasha tura nuwachi aparín nukuríncha wayatniun tsanekatkamiayi. <sup>52</sup>Ashí úutainiak atakka wáinkiashtatjapi tu úutiarmiayi. Túmainiakui Jesus penké jakaan nékayat tímiayi “Úutirpa. Nuwachkia jákachai, antsu kanarai” tímiayi.

<sup>53</sup>Jakaancha urukaku ta tusar wishikrarmiayi. <sup>54</sup>Nuyá Jesus nuwachi uwejen achik, kákantar chicharuk “Nawantru nantaktia” tímiayi. <sup>55</sup>Túram niisha jakayat atak iwiaaku ajasmiai. Tura nú chichamaik nantakmiayi; túrunamtai Jesus “ayuratarum” tímiayi. <sup>56</sup>Nuwachi aparí nukurísha ti enentáimprarmiayi. Tura Jesus “Ju túramu penké etserkairap” tímiayi.

**Jesus ni unuiniamurin etserkati tusa akupkarmiania nu**

*(Mateu 10.5-15; Márkus 6.7-13)*

**9** Ni tuse unuiniamurin ikiaanak ni chichamejai iwianchrukun enentáyan iwianchin jiiirki akupkatniun tura sunkurjai jaa tsuártinnisha ni kakarmarín súarmiayi. <sup>2</sup>“Yus akupin ajastin ujaktarum, tura jaa tsuártarum” tinia akupkarmiayi Jesus. <sup>3</sup>Nuyá

tímiayi “Wéakrum áyatik wetarum. Ushukrustincha, uyuncha, yurumkasha, kuitcha penké jukiirap. Aya chikichík pushí jukitiarum. <sup>4</sup>Nánkamas jeanam jearum wayarmeka nuin pujustarum. Nuin pujusrumek chíkich péprunam wéakrum jíinkitiarum, tímiayi. <sup>5</sup>Tura atumin awáintiamatniun nakitiana nú péprunmaya jíinkirum nawemiya nunka akakekum ikiuktiarum. Awáintiamachma paant ati tusarum nu túrtarum” tímiayi.

<sup>6</sup>Nuyá jíinkiar ashí péprunam uwem-pratin chichaman ujakiar wearmiayi; tura ashí péprunam jáiniancha tsuákiar wearmiayi.

### **Erutis “Jesusan fístaj” tímiania nu**

*(Mateu 14.1-12; Márkus 6.14-29)*

<sup>7-8</sup>Uunt akupin Erutis Jesus túramun antukmiayi. Nu túramun chíkich shuarka “Juan jakamunmaya nantaki túrawai” tu wearmiayi. Chíkichkia, “yaunchu Yúsnan etserin Eriás wantiniak túrawai” tu wearmiayi. Chíkichkia, “chíkich yaunchu etserin nantaki túrawai” tiarmiayi. Tuma asantai Erutis penké nekaachmiayi. <sup>9</sup>Tura tímiayi “Wiki, Juanka muuke tsupirkatarum, tíchamkaj. Tuma aisha, ¿ju shuar, ni túramurí ashí shuar chichainia nusha yátsukait?” Tu enentámiuk “iistaj” tímiayi.

### **Senku mir áishmankan Jesus ayuramiania nu**

*(Mateu 14.13-21; Márkus 6.30-44; Juan 6.1-14)*

<sup>10</sup>Atak Jesusa akatramurí waketki taar ni túramurín Jesusan ujakarmi-ayi. Nuinkia aents atsamunam Petsaitia péprunam tíjiuch weak nuí júkiarmi-ayi. <sup>11</sup>Tura penké shuar nuna nekaawar nemariarmiayi. Túram Jesus nin shiir áujсамиayi. Tura Yusa akuptairí pachis

unuiniamiayi. Tura jaa armia nuna tsuáramiayi.

<sup>12</sup>Tura kíakui, tuse unuiniamu Jesusan wériar tiarmiayi “Uuntá, shuar akupkachminiashit. Tíjiuch péprunmasha, shúarnumkesha wear ni yurumátniurín sumarmakarti, tura kanartintrín wáinkarti. Juí pujajnia juinkia penké atsawai” tiarmiayi.

<sup>13</sup>Tutai Jesus tímiayi “Atumsha ayuratarum.”

Tutai chichainiak “Iisha aya senku tanta tura namaksha jímiarchik takakji. Ju shuar ayuratin sumaktai tusar wétini-aitji” tiarmiayi.

<sup>14</sup>Áishmansha ti untsurí senku mir (5000) jeeá ámiayi. Tura Jesus ni unuiniaturín chicharainak ““senkuenta senkuenta kanaarum ankant ankant pujustarum,” titiarum” tímiayi.

<sup>15</sup>Túrawarmatai ashí pujusarmiayi. <sup>16</sup>Nuyá senku tantan tura jimiará namaknasha Jesus achik, yakinií íimias Yúsán yuminsamiayi. Nuyá ajamsarat tusa ni unuiniaturín súsararmiayi. <sup>17</sup>Ashí yurumáwar ejemarmiayi. Tura ampirman tuse chaninnium áimkiarmiayi.

### **Jesus Yusa anaikiamurinti ujakma amia nu**

*(Mateu 16.13-19; Márkus 8.27-29)*

<sup>18</sup>Jesus ni unuiniaturíjiaí áentsnumiá kanaki pujuarmiayi. Jesus Yúsán aujsua umik ni unuiniaturín tiarmiayi “¿Yáiti turutainia Winia?”

<sup>19</sup>Niisha áimkiarmiayi, “Chíkich “Imiakratin Juánkaiti” turamainiawai; chikichcha “Íriásaiti” tura chíkichkia “yaunchu Yúsnan etserin nantakniua núiti” turamainiawai” tiarmiayi.

<sup>20</sup>Tutai “Tura atumsha ¿yáiti túrutrum?” tiarmiayi.

Takui Pítiur chichaak “Ámeká Yusa Anaikiamurí, Kristu tutai, núitme” tímiayi.

<sup>21</sup> Tutai Jesus “Penké etserkairap” tímiayi.

### Ni jákatniurin Jesus ujakmiania nu

(Mateu 16.20-28; Márkus 8.30–9.1)

<sup>22</sup> Nuyá Jesus tímiayi “Wi Aents Ajasuitjiana ju ti waitsatniuitjai. Wíi shuara uuntri, tura ni Pátriri úntrisha tura ni jintinniurisha nakitrurar maantuáwartatui. Túrasha iwiartusarmatai menaintiu tsawant jeamtai nantaktiatjai.”

<sup>23</sup> Nuyá ashí áentsun chicharuk juna tímiayi “Shuar Winia nekas nemartustajtsa wakerakka ni wakeramurinkia iniaisati. Tuke tsawant ni krusi yanaki nemartusti. <sup>24</sup> Kame shuar ju nunkanam aya penker pujustaj tákunka nu shuar uwemtsuk jakattawai. Antsu Winia anentu asa penker pujustinniak enentáimtsuna nú shuarka nekas iwiaakman wáinkiatstawai. <sup>25</sup> Iimiata, shuar ashí ju nunkanam ana nuna súmakui tura jinium wétin ákuisha zitiurak penker pujusat? <sup>26</sup> Wi Aents Ajasuitjiana ju Winiasha tura winia chichampruncha shuar natsantraitkuinkia, winia wincharujai, winia Aparu wincharijjai tura nayaimpinmaya penker suntara wincharijjai atak táakun shuar natsantrurmia nuna natsantrattajai Wi. <sup>27</sup> Tura shuar Yusa akuptairin wáintsuk jákachartatna nu ju pujuiniawai. Nuna nekas tájarne” tímiayi.

### Jesus nusháa iira ajasmiania nu

(Mateu 17.1-8; Márkus 9.2-8)

<sup>28</sup> Nuna tuasua amik nuyá chikich semanatin Yúsan áusataj tusa Jesus náinnium wakamiayi. Pítiur, Jakupu, Juanjai nemariarmiayi. <sup>29</sup> Jesus auju pujus nusháa iira ajattsarmiayi. Ni pushirisha ti puju jíitsumir ajasmiai. <sup>30</sup> Nuinkia jimiará áishman Nijjai chicháa wajarmiayi. Nuka Muisáis Eríasjai árimiayi. <sup>31</sup> Níincha wincha

jíitsumir téntakarimiayi. Tura Jesus wáitias Jerusarénnum jákatniurin amia nuna áujmatiarmiayi. <sup>32</sup> Pítiur ni tsaniakmarijjai kari ti pujainia iwiáa pujuarmiayi. Tuma ásar Jesusan tura jimiará áishmanjai jíitsumir ajas wajainian wáinkiarimiayi. <sup>33</sup> Tura nu áishman Jesusan ikiuki weenai Pítiur Jesusan chicharuk “Uuntá, iisha ti shiir pujatsjik. Menaintiu áakmaktai, Áminiusha, Muisaisnasha, Eríasnasha áakmaktai” tímiayi. Tura Pítrusha enentáimtsuk nuna tímiayi. <sup>34</sup> Nuna chicháa pujai yuran kim tarí kaput amuawarmiayi. Tura yuran kim amuam ti ashamkarmiayi. <sup>35</sup> Nuinkia yuran minmaya ju chichaamun antukarmiayi: “Juka winia aneamu Uchiruiti. Nii anturkatarum.” <sup>36</sup> Chichaamun antasua amikiar Jesus ninki wajan wáinkiarimiayi. Nuinkia takamtak pujuarmiayi. Tura wáinkiarimia nuna penké etserkacharmiayi.

### Uchi iwianchrukun Jesus tsuármiania nu

(Mateu 17.14-21; Márkus 9.14-29)

<sup>37</sup> Kashin tsawantai, náinniumia táarmatai, ti untsurí shuar Jesus inkiuntai tusar wearimiayi. <sup>38</sup> Nu shuarnumia chikichik áishman Jesusan untsuak tímiayi “Uuntá, waitneasam uchir firtústá. Uchirsha júchikiiti. <sup>39</sup> Íwianch achik núpeteam niisha nánkamas untsumui. Tura chichichiptu ajas wenunmasha saun kaput apaawai. Íwianch nin tuke yajauch awajas ankant awajsatniun nakitiawai. <sup>40</sup> Túmakui ame unuiniamurmin iwianchin jíirtukit tusan seamjai. Túrasha tujinkiarmai” tímiayi.

<sup>41</sup> Tutai Jesus tímiayi “Yus enentáimtichutirmin, tutupnik wekaichatirmin zurut má tsawanttsuk atumjai pujustaj. Urut má katsun-

tratjatsuk? Uchiram juí itiatá”  
tímiayi.

<sup>42</sup>Tura uchi winiaí íwianch nunká  
ajuant chichichiuptu áepsamiayi. Tura Je-  
sus iwianchin kakantar chicharkamiayi.  
Tura uchin péñker awajas ni aparin  
awañtuki susamiayi. <sup>43</sup>Tura ashí pu-  
juarmia nu ti enentáimprar “Yuska imiá  
úuntchakait” tiarmiayi.

### Jesus ni jákatniurin ataksha ujakmiania nu

(Mateu 17.22-23; Márkus 9.30-32)

Jesus túramun ti enentáimtu pujuini-  
aí Jesus ni unuiniamurin tímiayi <sup>44</sup>“Wi  
tájarmena ju péñker antuktarum. Winia  
Aents Ajasu tútain surutkartatui.”

<sup>45</sup>Tura Nii timia nuna unuiniamurí  
nekaacharmiayi. Nekaawarain tusa  
paantcha awajsamuyayi. Tura warinkit  
tusa anitrustinniasha arantukarmiayi.

“¿Yaki imiá nankaamantuit?”

(Mateu 18.1-5; Márkus 9.33-37)

<sup>46</sup>Nuyá ni unuiniamurí, yaki imiá  
nankaamaku ati tusa, nuamtak mai tunai  
ajarmiayi. <sup>47</sup>Tura ni enentáimsamurín  
Jesus nekaamiayi. Tuma asa uchin achik  
ni pujamunam itiamiayi. <sup>48</sup>Itiá tímiayi  
“Winia anentuk ju uchin shiir awajeana  
nuka Winiasha shiir awajtawai. Tura  
Winia shiir awajtana nuka Winia akup-  
tana nunasha shiir awajeawai. Kame  
átum nankaamantuchu tárugna nu ti  
nekas nankaamantuiti’ tímiayi.

(Márkus 9.38-40)

<sup>49</sup>Nuyá Juan tímiayi “Uuntá, shuar  
ame náarmin pachis iwianchin jiki aku-  
pea nu wáinkiamji. Tura in páchitkiachu  
asamtai nuka suritkiamji.”

<sup>50</sup>Tutai Jesus tímiayi “Antsu suritki-  
airap. Shuar in nakitramachkunka in  
páchitkiawai.”

### Jesus Jakupun Juánnasha chicharkarmiania nu

<sup>51</sup>Jesus, nayaimpiniam waketkitniuri  
jeatemamtai, enentáimmia ímatrusan  
Jerusarénum we-wémiayi. <sup>52</sup>Wesa,  
kanartinian wáinkiarat tusa akatar  
émtikiarmiayi. Tura niisha Samaria  
péprunam jeawarmiayi. <sup>53</sup>Tura  
Samarianmaya aentska, Jerusarénum  
wéenan nekaawaru ásar itiaatniun  
nakitrarmiayi. <sup>54</sup>Jesusa unuiniamurí  
Jakupusha Juánsa nuna nekaawar,  
Jesusan tiarmiayi “¿Uuntá, Erías  
yaunchu túramia núnisrik iisha túrat  
tusam wakeramek. Nayaimpinmaya ji  
tara Samarianmaya aentsun amukarti,  
títiatjik?”

<sup>55</sup>Tutai Jesus nin ísar kakantar  
chicharuk tímiayi “Atumsha atumi  
enentái urukukit nuka nekamatsrume.  
<sup>56</sup>Wi Aents Ajasu áentsun emesratsan  
táchaitjai. Antsu uwemtikratajtsan  
táwitjai” tímiayi. Nuyá chíkich  
péprunam wearmiayi.

### Jesus nemarsatin

(Mateu 8.19-22)

<sup>57</sup>Jintiá weenai, chíkich áishman Je-  
susan chicharuk “Uuntá, tuí wétatam  
nuisha nemarsatjame” tímiayi.

<sup>58</sup>Tutai Jesus tímiayi “Kujanchmasha  
ni wáarin takaktsuk. Chínkisha pa-  
sunken takaktsuk. Tura Wi Yusa Uchirín-  
tatan tepesan ayampratniur atsawai.”

<sup>59</sup>Chíkich áishmankan Jesus “Nemar-  
tusta” tímiayi.

Tutai nii chichaak “Antsu, Uuntá,  
winia apar jakamtai, iwiarsa ikiuakun  
nemarsatjame. Nu tsanákátruktá”  
tímiayi.

<sup>60</sup>Tutai Jesus tímiayi “Jakaa ainia  
nu ni shuarin iwiarsatniunka enentáim-  
tusarti. Tura ámeke weme Yus-shuar  
átin urukukit nu etserkata” tímiayi.

<sup>61</sup>Nuyá chíkich tímiayi “Uuntá, nemarsataj tusan wakerajme. Túrasha wíi shuaran emka áujsan ikuweartaj tsan<sup>á</sup>kátrúktá” tímiayi.

<sup>62</sup>Tutai Jesus tímiayi “Shuar arayát ukunmaani apajas iimna nu, Yus aku-peana nu<sup>i</sup> takaschamniaiti.”

**Ni unuiniamur<sup>i</sup>n setenta armia  
nuna Jesus etserkatarum  
tusa akupkarmiania nu**

**10** Nuyá ukunam chíkich unuiniamur<sup>i</sup>n setenta anaikiarmiayi Jesus. Tura jímiar jímiaran apatak émkitiarum tusa ashí péprunam ashí nun<sup>á</sup>kanam ni wétin amia nu<sup>i</sup> akupkamiayi. <sup>2</sup>Akupeak tímiayi “Nekas tájarme, Yus-Chicham étserkum, júuktinia núnisan, aents Yus-shuar awajsatin ti awai. Tura çyaki júukat, aya ishichik takainiasha? Tuma asamtai ni takarniur<sup>i</sup> akupkat tusarum Nerentin seatarum. <sup>3</sup>Wetarum. Átumka murikiua núninaitrume. Uunt yawá yujamua núninnium tsuumai ámunam akupeajrume. <sup>4</sup>Yurumkasha, kuitcha, sapatcha júkiirap; shuarjai jintiá áujmamsatai tusarum wajasairap. <sup>5</sup>Jeá wayákrum emka ju titiarum: “Ju jeanam pujuinia nuna Yus shiir awajsarti.” <sup>6</sup>Nérentin “Ee, nuna wakerajai” tákuin<sup>á</sup>kia túrunattawai. Tura “Atsá, wakeratsjai” tákuin<sup>á</sup>kia, “nuin<sup>á</sup>kia túrunashti” titiarum. <sup>7</sup>Jeá wayattarmena nú jeanman pujustarum. Tura ajampramsattarmena nu yuatarum. Warí, takaana nu akinkiashtinkiait. Chíkich jeanam nu<sup>i</sup> werum nu<sup>i</sup> werum ajairap. <sup>8</sup>Awaintiamawartatna nú peprunam jearmeka ajampramsartatna nu yuatarum. <sup>9</sup>Jaa ainia nu tsuártarum. Túrurum “Yus ju nun<sup>á</sup>kanam akupin ajastin ishichik ajatemsai” nu peprunmayá shuar titiarum. <sup>10</sup>Íksarmek itiaarmachartatna nú peprunam jearum,

jintiá wajasrum ju titiarum, <sup>11</sup>“Yusna nakitra asakrumin, atumi pépruriniá nun<sup>á</sup>ka ii nawen peema japirar akakekji. Túrasha ju paant nekaatarum: Yus ju nun<sup>á</sup>kanam akupkatin ishichik ajatemsai.” <sup>12</sup>Yusa nekapsatin tsawantri jeamtai nu peprunmayá shuaran ti asutiáttawai. Yaunchu Sutumanmayá shuaran asutiámia nujai nan<sup>á</sup>kaamas asutiáttawai. Núnaka paant tájarme tímiayi.

*(Mateu 11.20-24)*

<sup>13</sup>Wáinkiatá, Kurasín péprunmayatiram. Wáinkiatá Petsaitia péprunmayatirmesha. Atumí péprur<sup>i</sup>n aents tujintiamun ti túraitjai. Warí, yaunchu Tiru péprunmasha, Setun péprunmasha nu tujintiamu túramuitkuin<sup>á</sup>kia yaunchu ni enentáin yapajíawar<sup>á</sup>yai. Túrawar kúntuts pujutai pushin entsarar yun<sup>á</sup>kunim ajakiar<sup>á</sup>yai. <sup>14</sup>Tura atumsha aents tujintiamu túramu wáiniatrum yapajjachu asakrumin Tirunmayá tura Setunnumiá aentsjai nan<sup>á</sup>kaamas asutniáttarme. <sup>15</sup>Tura atumsha Kapernáunnumiátirmesha, “ti nan<sup>á</sup>kaamantu ajasar nayaimpiniam jeattaji” tu enentáimtsurmek. Maaj, antsu jaka matsamtainium jeattarme, auka” tímiayi.

<sup>16</sup>Tura Jesus ni unuiniamur<sup>i</sup>n ju-nasha tímiayi: “Atumin anturtamainiakka Winiasha anturtuiniawai; atumin nakitramainiakka Winiasha nakitruiniawai; tura nú arant, Winia nakittrakka Winia akuptukua nunasha nakitiawai.” Tú áujas Jesus nin akupkarmiaiyi.

**Setenta unuiniamu  
waketki táarmiania nu**

<sup>17</sup>Ukunam nu setenta unuiniamu warasar waketki táarmiaiyi. Tura chichainiak “Uuntá, ame náarmiin

íwianch jjiiki akupeam umirtamkamji” tiarmiayi.

<sup>18</sup>Tutai Jesus tímiayi “Ee, Wisha nayaimpinmaya peem peetna núnisan, uunt iwianch Satanásan akaiki iniaan wáinkiamjai. <sup>19</sup>Atumniaka winia kakarmarun susamjarme, napi najarmasha titiñ najarmasha yajauch awajtamsairum tusan; tura ii nemasri kakarmari nupetkatniuncha susamjarme. <sup>20</sup>Túrasha íwianch umirtamkui nu enentámsam warasairap. Antsu atumí naariñ nayaimpiniam aarma aa asamtai warastarum” tímiayi Jesus.

### Jesus warasmiayi

(Mateu 11.25-27; 13.16-17)

<sup>21</sup>Nuñkia ni enentáin Yusa Wakaní waramtiksam Jesus juna tímiayi: “Aparú, ashí nayaimpijijai nunka Úuntrinme; tuma asam ju túrunamu ti unuimiaru enentáimtumainia nuyá úukuitme; antsu uchichia núnis nankaamantuchu enentáimtumainia nú shuar paant awajtusuitme. Ee, Aparú, núnik wakerichmakum. Tuma asamtai shiir enentáimtajme, Aparú” tímiayi.

<sup>22</sup>“Winia Apar ashí surusuiti. Wisha ni Uchiriñ asamtai Winia nékarui. Tura chíkich Winia nekas nekarainiatsui. Yus Apancha Wiki nékajai. Tura Wi wakeraj nú shuaran winia Aparun paant awajtajai. Nú shuarsha winia Aparun nékainiawai.” Tu tímiayi Jesus.

<sup>23-24</sup>Nuyá ni unuiniamurin iis tímiayi “Wi tájarme, untsurí Yúsnan etserniusha tura uunt akupniusha átum yamá wáintrum nuna wáinkiatniun wakeruiniayatan wáinkiacharmiayi. Tura átum yamá ántarme nuna antuktinian wakeruiniayatan antukcharmiayi. Tura Yus achirmaku asakrumin, wáintrumna nu ti péñkeraiti” tímiayi.

### Samarianmaya áishman katsumkamun yainmia nuna Jesus unuiniamiania nu

<sup>25</sup>Nuyá akupkamun jintinkiartin Jesus warintiak chichakat tusa wajatki werimiayi. Werí iniimiayi “Uuntá, wi tuke iwiaaku átaj takun ¿warinia túratniuitiaj?” tímiayi.

<sup>26</sup>Tutai Jesus ayak “¿Yús-Papinium Muisáis áрманum waritia áarmait. Waritia enentáimiam?” tímiayi.

<sup>27</sup>Akupkamun jintinkiartin ayak tímiayi “Juna tawai: Ti enentámsam, tuke enentáimjai Uunt Yus aneeta. Ame kakarmaram, iwiaakmarmesha Yus íiktusta. Tura ame ayashim aneamna núnismek ame írutramurmesha aneeta. Núchakait” tímiayi.

<sup>28</sup>Tutai Jesus tímiayi “Pénker áimsame. Nu túrakmeka tuke iwiaaku átatme.”

<sup>29</sup>Tutai akupkamun jintinkiartin ni anintramun kúishtumaktajtsa wakerak “Winia írutramursha ¿ya ainia?” tímiayi.

<sup>30</sup>Takui Jesus tímiayi “Jerusarénnumiá jintia Jirikiú péprunam jeana nú jintianam áishman wean, kasa áishman tariar ni waririn, pushirincha kasarkarmiayi. Tura katsumkar mayái ashirak ajuantar ikiukiarmiayi.

<sup>31</sup>Tura Israer-shuar Patri ukunman winis nu áishmankan wáiniak aya íikian iis ikiukmiayi. <sup>32</sup>Nuyá ukunam Patri yáintriñsha nu jintianam wesa, nu áishmankan wáiniak, áyatik iis ikiuak wémiayi. <sup>33</sup>Tura nuyá Samaria nunkanmaya áishmansha nu jintianman wesa, nu áishmankan wáiniak ní shuarinchunak wáitnéntramiayi.

<sup>34</sup>Nuyá nu áishmankan weantuk ni numpamnamurin asuitijjai tura wíniujai tsuar jaanchjijai penuarmiayi. Tura ni kawairiin ekenak jukimiayi. Tura írar kanutainiam jukí ejé nu áishmankan péñker wáinkiamiayi. <sup>35</sup>Tura kashin

tsawarmatai Samarianmaya áishman weak jimiara kuítian jusa jeá nérenniurin susamiayi. Susa tímiayi “Ju áishman péñker wáitrukta. Tura wi amaajna ju táasmataisha wi wáketkun akiktajme” tímiayi. <sup>36</sup> Ayu, ámiijiaisha, nu menaintiu áiniana nu, ¿tuá imiá nekas katsumkamun waitnentrámia?” tímiayi Jesus.

<sup>37</sup> Takui akupkamun jintinkiertin chichaak “Entá, katsumkamun waitnentrámia núa” tímiayi.

Tutai Jesus tímiayi “Amesha weme núnismek túrata.”

### Marta ni kajijai Marí jeen Jesus pujusmiania nu

<sup>38</sup> Nuyá Jesus jintiá wesa chíkich péprunam jeamiayi. Nu péprunmaya nuwá naari Marta ni jeen itiaamiayi. <sup>39</sup> Marta kají ámiayi ni naari Marí. Marisha unuiniamun anturkataj tusa Jesusa nawen pujursamiayi. <sup>40</sup> Tura Már-taka ni takatrin ti enentáimtak Jesusan weantuk tímiayi “Uuntá Jesusá, ¿winia kajir takatan winiak íiktursainia nuka enentáimsumek? Winia yáintá turuttia” tímiayi.

<sup>41</sup> Tutai Jesus tímiayi “Maaj Martá, untsurí túratin ana nu ti enentáimsam itit awajtamui. <sup>42</sup> Tura aya chikichik nekas túratniuiti. Marikia nekas péñker ana nuna achikiai. Nusha péñké jurunkishtatui” tímiayi.

### Jesus Yus áujsatniun unuiniamiania nu

(Mateu 6.9-15; 7.7-11)

**11** Chíkich tsawantaj Jesus Yúsán áujsataj tusa atsamunam pujumiayi. Áujsua amikmatai ni unuiniamuri chikichik Nin tímiayi “Uuntá, imiakratin Juan ni unuiniamurin unuiniamia núnismek Yus áujsatin unuitiurta.”

<sup>2</sup> Tutai Jesus tímiayi “Yus áujkuram ju titiarum:

Aparu Yus, nayaimpiniam pujamna nu, ii Aparínme. Ame náarmincha shuar ántar pachischarti. Ashí áentsnum ame akupkatin tsawantrum wari jeati. Ame wakeramuram nayaimpiniam umikma ana núnisan ju nunkanmasha uminkiatí. <sup>3</sup> Aparú, ii yurumkarí ashí tsawant amasta. <sup>4</sup> Tura winia nemasrun tsankurajna núnismek, Aparú, winia tunaaru tumashrisha tsankurturta. Tunáa wakeruktin tsankatrukaip. Antsu ashí tunaanumiá uwemtikrurta.”

<sup>5-6</sup> Nuyá Jesus juna tímiayi. “Wats, ju titiái. Kashi ajapén amikrum werishtameash. Tura “Winia amikiur yajaya winia jearui yama tayi. Tura ajamsatniun péñké takaksujai. Tuma asamtai amikru, menaintiu apatuk ajamprustá” tíchatameash. <sup>7</sup> Tura nii inít pujusan chichaak “Warí, wáitisha epenmiaiti, tura winia uchirsha wijijai ashí tepeenawai. Itiur nantakniak amastaj. Itit awajtipia” turamchanpiash. <sup>8</sup> Wats, paant tájarme, niisha amikrum asa, nantaki ikiatmastinian nakitiat, itit awajtin tusa nantaki ashí wakeramna nuna suramsattawai. <sup>9</sup> Tuma asamtai tájarme: Yus seatarum; túrakrumin suramsattarme. Eakrumka wáinkiatarme. “Winiajai” tákurmin awaintiamattarme. <sup>10</sup> Seana núnaka súniatsuk. Eana nuka wáintsuk. “Winiajai” tuinia núnaka awainiatsuk.”

<sup>11</sup> ‘Wats, átum uchirtintiram, ame uchiram apatkun seatmakui ¿kayaash súsaintiam? Namakan seatmakui ¿napíash súsaintiam? <sup>12</sup> Nujintian seatmakuisha ¿titiñkiash súsaintiam? <sup>13</sup> Warí, átum imiá yajauchitirmesha atumí uchiri péñker ana nu tuke súchakaitrum. Atumí Aparí nayaimpiniam pujana nu, seakrumniñkia nú nankaamas ni Wakanin suramsattawai.” Tu unuiniamiayi.



### Jesusan “iwianchi kakarmarijijai túrawai” tiarmiayi

(Mateu 12.22-30; Márkus 3.19-27)

<sup>14</sup> Shuar iwianchruku asa chichachu ámiayi. Nuna enentáyan nu iwianchin Jesus jiki akupkamiayi. Íwianch jiinkimtai chichachu chichasmiayi. Túramtai shuar nu pujuarmia nu ti enentáimprarmiayi. <sup>15</sup> Tura chikich tiarmiayi “Juka iwianchi kapitántri Satanásan, ni chikich naari Pirsepún umirniuiti. Tuma asa nuna kakarmarijijai iwianchin jiki akupeawai.”

<sup>16</sup> Tura chikichkia, nekas Yúsnumia taawashit tusar “Nayaimpinmaya kakaram ana nu iniakmasam aents tujintiamu túrata” Jesusan tiarmiayi.

<sup>17</sup> Tura Jesus tu enentáimiainian neka asa tímiayi “Núu nunkanmayan shuar nuamtak kajernaiakuinkia nú nunka wárik meserchattawak; nuamtak shuarsha ni shuarijijai kajernaiyaksha amunaikchartatuak. <sup>18</sup> Wíniaka “Pirsepú iwianchi kakarmarijijai iwianchin jiki akupeawai” túruttsurmek. Tuma asamtai tájarme, uunt iwianch Satanás naartin, ni suntarijijai kajernaiyaksha çitiur tuke kakaram á tink? <sup>19</sup> Tura Wi Pirsepú kakarmarijijai iwianchin jiki akupeakuinkia, atumi shuarisha çyana kakarmarijijain iwianchin jiki akupena? Niisha “iwianchi kakarmarijijai túrichuitji” tuiniaisha çitiura Winiasha, “iwianchi kakarmarijijai túraití” turutminiaitrum? <sup>20</sup> Wikia Yusa kakarmarijijai iwianchin jikin akupeajai. Nu nekaarum Yus atumi enentáin akupin ajasuana nu nékarme.’

<sup>21</sup> ‘Kakaram áishman kúishtumaktajtsa iwiarnar wajas jeen wáinkui, ni wariri init ana nusha tímiatrusan áiniawai. <sup>22</sup> Antsu nijijai nankaamas kakaram ana nu winiakka nupetkashtatuak. Tura kúishtumaktinian iwiar takakman

jurawai. Tura kasamkámun ni amikrin súawai. Kakaram áishman iwianchin nakumeawai. Tura nujai nankaamas kakaram áishman Winia nakumprawai. <sup>23</sup> Iista. Winia nemartatsna nu winia nemasruiti. Núnisan Winia yáintsuna nuka aya iturchat nájateawai.’

### Iwianch jiki akupkamuitiat wáketna nuna ujakmiania nu

(Mateu 12.43-45)

<sup>24</sup> Nuyá Jesus juna tímiayi: ‘Shuara enentáiya íwianch jiinki ayamprataj tusa yumi penké yútatsna nu wéawai. Tura ayampratniun wáincha asa ataksha waketitniun enentáimui. “Wi jiinkimij nuin waketitjai” tawai. <sup>25</sup> Tura wakетки pénger iwiaramun tura ankant aan wáiniui. <sup>26</sup> Nuna wáiniak, ni ain siati iwianchin nijijai nankaamas yajauchin itia enkemáwartatui. Túrunamtai nu shuar nuiki nuna nankaamas yajauch ajastatui.” Tu tímiayi Jesus.

### Nekas warastin

<sup>27</sup> Shuar iruniarmia nu Jesus nuna chichaa pujai, nuwa untsukum “Ame nukun Yus ti yáinkiai. Ni ampujén ame pujuschamkam. Ámin amuntstamachmakam” tímiayi.

<sup>28</sup> Tutai Jesus tímiayi “Antsu ni chichamen antukar umirainia nuna, nukurjai nankaamas Yus ti yáinkiaru ániawai, tajai” tímiayi.

(Mateu 12.38-42; Márkus 8.12)

<sup>29</sup> Shuar untsurí Niin káunkarmatai Jesus tímiayi “Yamaiya shuarka yajauch ániawai. Yajauch ásar, chichartuiniak “Nekas Yúsnumiakitkiumka aents tujintiamua nu túram Yusa kakarmari iniakmasta” turutainiawai. Túrashá áyatik yaunchu Junas túrunamujai iniakmasmia nujain nekaatin ániawai. <sup>30</sup> Kame Junas túrunamujai Níniwi péprunmaya shuaran yaunchu Yus ni kakarmarin

iniakmasmia núnisan̄ yamaisha Aents Ajasu tutainjiana nu Wi túrunamujaj̄i Yuska ni kakarmariñ iniakturmastatrume. <sup>31</sup> Yaunchu Sarumún uunt akupin pujaj̄i Sepa núnkanmayā nuwá akupin Sarumúnka chichamen̄ nekaataj tusa ti jeashtanmayā támiayi. Tura yamaikia Sarumun̄jaj̄i nan̄kaamas pujaj̄i átumka anturtatsrume. Tuma asamtai Wi tájarme, Yus ashí shuaran nekapsattana nu tsawant jeamtai nu nuwá, akupniun pénker anturka asamtai, Yus ímianum pénker átatu. Antsu atumsha Winia anturtukcha asakrumin Yus ímianum yajauch átatrume. <sup>32</sup> Tura Yúsnan etserin Junas Níniwi péprunmayā shuarnum Yus Chichaman etserkamtai nu shuar ni tunaar̄in enentáimtusar enentáin̄ yajaj̄iawarmiayi. Tura juī yamáí Junasjaj̄i nan̄kaamas etserin pujajaj̄i. ¡Tuma asamtai nekapsatin tsawant jeamtai Níniwinmayā shuar yamayī shuar árumna nuna sumamtikramattarme!

### Ayashi tsáapnintri

(Mateu 5.15; 6.22-23)

<sup>33</sup> ¡Shirikip ekeemakar úuktinkiait? Pitiaknumsha en̄keashtiniaiti. Antsu shuar jeá wayana nu paant ímsat tusar yakí ekensatniuiti. <sup>34</sup> Ame j̄imij̄ij̄aj̄i wáinkiam nujaj̄i wekasatin nekaattame. Tuma asamtai ame j̄imij̄ij̄aj̄i pénker ana nu wáinkiumka pénker wekasattame; antsu ame j̄imij̄ij̄aj̄i yajauch ana nu wáinkiumka, kiritniunam wekasatniua núnisan̄ yajauchiniam wekasattame. <sup>35</sup> Anearta. Enentáimin tsáapin ana nu kiritin ajaschati tusam anearam wekasata. <sup>36</sup> Ame ayashmiin̄ kirit ajatsuk aya tsáapniniaitkiuin̄kia, shirikip paant awajea núnisan̄ ashí paant wáinkiaitame” tímiayi.

### Pariséuncha, Israer-shuara j̄intinniur̄isha “yajauchittrume” tímiayi Jesus

(Mateu 23.1-36; Márkus 12.38-40; Rúkas 20.45-47)

<sup>37</sup> Jesus chichasua amikmatai Pariséu shuar, winia jearūi yurumáitia tusa untukmiayi. Tutai Jesus wayá misanam pujusmiayi. <sup>38</sup> Tura Israer-shuar ikijmiartin ana nuna túrutsuk aya pujakui Pariséusha nuna wáiniak “maa ¿urukamtia tura?” tu enentáimsamiayi.

<sup>39</sup> Tura Uunt Jesus tímiayi “Pariséutirmeka atumí yurumtair̄i aya pátatek nijaktin ti wakeriniaittrume. Atumsha nu yurumtaij̄ij̄aj̄i méteketrume. Pátatek pénker túrarme. Tura atumí enentáinkia kasamkatniusha tura yajuchia nusha piakuiti. <sup>40</sup> ¡Enentáimcha! Warí, ashí pátatek wáiniaj̄i nuna Yus najanachmakia; tura init paantcha ana nunasha Yúsak najanachmakia. <sup>41-42</sup> Aneartarum, Pariséutirmesha. Aya nuka méntasha, anissha tura aya apatkusha Yus súsatin ti enentáimprume. Nukasha tsuriasrum apatkusha tias ana nuyá chikichik achikrum, Yúsnaiti tátsurmek. Tura antsu nu túratin iniaitsuk pénker wekasatniusha, Yus anenmarmena nusha pénker enentáimsatniuitrume. Wats init, enentáimin ana nútiksarmek jusam susarta. Nuiñkia ashí chamir átatu.’

<sup>43</sup> ‘Tura aneartarum Pariséutirmesha. Yus áujtai jeanam pen̄ker̄i pujutainium pujustin wakerarme. Tura jintiá aents ímiainiamunam ti shiir áujtusarat tusarum wakerarme.’

<sup>44</sup> ‘Jintinniutirmesha, Pariséutirmesha máí-metek aneartarum. ¡Antar shiir chichamtinia! Iwiarsamu paantcha núniniaittrume. Shuar nu nan̄kaamaksha nájamiat nékatsui. Núnisan̄ shuar atumi

chichame antukar yajauchia nuna nekartamturme.”

<sup>45</sup>Nuikia Israer-shuara jintinniuri chikichik Jesusan chicharuk tímiayi “Uuntá, nu tákum incha yajauch chichareame.”

<sup>46</sup>Tutai Jesus tímiayi “Atumsha jintinniutiram aneartarum. Atumí akupkamurijjai káarak ti kijin entsakchamnia súarme. Tura átumka yáintaj tusarum atumí uwejejaisha penké ántiatsrume.”

<sup>47</sup>‘Aneartarum tájarne. Yaunchu atumí uuntri Yúsnan éterniun máawarmia nuna iwiarsamuri átum jeamniutrum nu etserin ti pénger ásarmatai kajinmatkishtin. <sup>48</sup>Nu túrakrum atumí uuntri túrawarmia nu, “yajauchichuiti” tarume. Warí, niisha máawarmiayi, tura atumsha máawarai táyatrurum nijijai méteketrum. Warí, Yúsnan etserniu iwiarsamuri jeamkuram atumek sumarmar.’

<sup>49</sup>‘Atumí túramuri nekáa Yus júna yaunchu tímiayi: “Winia etserturniun tura winia akatramurnasha niin akuptukartatjai. Túramtai chikichnaka máawartatui, tura chikichnaka pataatukartatui.” <sup>50</sup>Tuma asamtai ashí ni etserniuri maamu ainia nuna, yamaiya éentstirmin Yus sumamtikramattarme. Nunka najanamunmaya jukí <sup>51</sup>yamá ímiajai maamu ainia nuna, kame Apir maamunmaya jukí yamá Sakarías maamua tímiajai anitrustatui. Namañ maar Yus sutai ámanum tura Yus-jea ámanum ajapén atenkamunam máawarmia nú Sakaríasan tajai. Nu tuma asamtai tájarne, ni etserniuri maantamawarmia nuna yamá matsatrumna nútirmin aninmasartatui.’

<sup>52</sup>‘Jintinniutiram aneartarum. Waiti asakatniua núnisrumek nekas nekaatin surimiarme. Atumkesha nékatsrume. Tura nekaataj tana nusha suritiarme” tímiayi.

<sup>53-54</sup>Jesus nuna takui Pariséusha, jintinniusha ti kakerkarmiayi. Tura nii tana nujai “yajauch túrame” titiai tusar wakeruiniak untsurí anintriarmiayi.

**12** Nu tumai shuar ti untsurí káunkarmiayi. Ti kaunka ásar nawen mai-najatnai ajarmiayi. Tura Jesus ni unuiniamuriñ tútan juarkimiayi. “Pariséu ántar chichamtin ániawai. Nuka wakaprutaia núnisaiti. Wakaprutaikia nijiamanch yumirniun yama enkeam páantchaiti. Tura ukunam nekaamniaiti. <sup>2</sup>Núnisan ashí paantcha ana nu iwiainiakma átatui. Uukma ana nusha nekaamu átatui. <sup>3</sup>Nu tuma asamtai, kiritniunam tímiarmena nusha tsawái tsáapin ajasmanum antunkattawai. Tura jea init pujusrum ishishmasrum tímiarmena nusha áa ti paant etsernaktatui.’

### Yusak ashamkatniuiti

(Mateu 10.28-31)

<sup>4</sup>‘Amikrutiram, aya ayashmin main ainia nu ashamkairap, tájarne. Ayashmin maa nú arantka máashtatui. <sup>5</sup>Tura ya nekas ashamkatniutrum, nuna paant jintintiattajrume. Ame ayashmi maa, nuyá ámin jinium akuptamkatniun tuttintiatsna nu ashamkatarum. Ee, Yus ashamkatarum, tájarne.’

<sup>6</sup>‘Jimiará chiniki ishitiúpchich ishichik kuitjai surukchatniukait. Túrusha Yussha nu chinikin penké kajinmatkishtatui. <sup>7</sup>Wats, ashamkairap. Untsurí chinikijjai nankaamas Yuska atumin enentámturmarme. Warí, ame intiashmin mash Yus nekapmaruiti.’

(Mateu 10.32-33; 12.32; 10.19-20)

<sup>8</sup>‘Ashí shuar ashí ímiainiamunam Winia Aents Ajasu tutain, Winia natsantruiniatsna núnaka, Wisha Yusa suntarí ímiainiamunam natsantrashtatjai; <sup>9</sup>antsu shuar ímiainiamunam Winia

natsantrana núnaka Wisha Yusa suntari ímiamiunam natsantrattajai.’

<sup>10</sup> ‘Winia, Aents Ajasu tutain, shuar yajauch chichartakuñkia nusha tsankuramniaiti, tura Yusa Wakaníncha yajauch chicharkuñkia nuka penké tsankurachminiaiti.’

<sup>11</sup> ‘Wats, Israer-shuar iruntai jean-masha, tura Israer-shuar kapitiánni-umsha, uuntnumsha juramainiakui, an-mainiakuissha warintiajak usam ti enentáimsáip. <sup>12</sup> Ame áimkiatin jeam-tai, Yusa Wakanj ame títiatmena nuna jintinramattawai,” tu timiayi.

### **Kuítiak enentáimtuschatniuitji**

<sup>13</sup> Chíkich áishman Jesusan tímiayi “Uuntá, ii aparí ikiurtamkimiaj nuna yatsur winiasha nakak surustí, titia” tímiayi.

<sup>14</sup> Tutai Jesus tímiayi “Áishmanka, atumin nu túratin anaikiamukaitiaj.”

<sup>15</sup> Nuyá tímiayi “Pénker enentáimsatarum. Nii takakna nújain shuar iwiaaku, áchatniuiti. Tuma asamtai kuítrintin ajastin aya nuke enentáimsaip.”

<sup>16</sup> Nuyá juna métek-taku chichaman unuiniak tímiayi:

“Kuítrintin áishman ni aariyan arakan ti nukap juukmai. <sup>17</sup> Tura “¿Ti nukap asamtai tuin ikiustaj. Itiurkatjak?” tu enentáimsamiai. <sup>18</sup> Wats, wi nékajai. Winia ikiutái-jearun ashiran nú nankaamas úntan najanatjai. Tura nuj ashí ikiustajai. <sup>19</sup> Nuñkia untsurí uwitin shiir pujustinian ikiusman takustatjai. Tuma asamtai, ayampran, yurumán, umaran shiir pujustatjai” timiai.’

<sup>20</sup> ‘Tura Yus nin chicharuk timiai “Netse. Yamái kashi jakattame. Nuñkia imiá núkap ikiusumna nusha ¿yana átata?” timiai” tímiayi.

<sup>21</sup> Nuyá Jesus tímiayi “Shuar niñki kuítrin ikiauntumna nu, núnisaiti. Túrashá Yusjai fismaka kuítrinchaitei.”

### **Yus ni uchirín penker wáinkiaiti**

(Mateu 6.25-34)

<sup>22</sup> Nuyá ni unuiniamurin Jesus juna tímiayi: “Warí yuarik pujustají tura warin entsatají tusarum nuke ti enentáimsairap. <sup>23</sup> Yus iwiaaku átinian amasu asa yurumkancha amastatui. Tura ju ayashniasha najana asa entsataincha amastatui. <sup>24</sup> Chínkisha enentáimsatarum. Niisha arakmainiatsui. Juuk yurumkan ikiuiniatsui. Tuma ain Yuska ni yurumátniurin tuke súawai. Atumsha chinñkia nú nankaamaschakaitrum. <sup>25</sup> Tura ya shuarak, ti enentáimtana nujai nú naya ajasminiait. <sup>26</sup> Kame yúpichuch ana nusha túrachminiaitiatrumsha, ¿urukamtai chíkich ainia nusha ti enentáimtarum?”

<sup>27</sup> ‘Ístá, kukujsa takaachitiat tura nájanchitiat ti shífirmach ániawai. Yaunchu akupin Sarumún ti shiir iwiarmamniuitiat kukujsa tímianchauryayi. <sup>28</sup> Iis, nupa yamá tsakaawai tura kashin aents tsupikiar jinium apeánawai. Tuma ain Yus ti shiir awajeatsuk. Nuna tura asa atumniasha nú pénker wáitmakchattawak. ¿Urukamtai Yus nekas enentáimtatsrum? <sup>29-30</sup> Ju nunkanam ana nu ti pachirap. Chíkich shuar, Yúsán nékainiatsna nu, warin yuatají, warin umartají nuna ti pachiniawai. Tura atumsha tu enentáimsairap. Urukattjak, tiirap. Ame Apa nayaimpiniam pujana nu, ashí atsumarmena nuna nékawai. <sup>31</sup> Antsu emka Yusna nu enentáimtustarum. Túrakrumñkia atsumamna nuna Yus suramsattawai.’

### **Kuítian pachis Jesus unuiniamiania nu**

(Mateu 6.19-21)

<sup>32</sup> ‘Winia murikrutiram ashamkairap. Untsuríchuitrume. Túrashá atumí

Apari ni akuptairin pachitmaktasa ti wakerutmarme. <sup>33-34</sup> Kuítrum tui aa, nuí tuke enentáimtittiarme. Tume asantai takakrumna nu surukrum atsumainia nu susatarum. Nuka enketai arut ajatsna nuí enkeatnua núniskete. Túrakrum nayaimpinmaya kuit amuatsna nu íkiauwearme. Nuísha kasa nu kuitian kasamkataj tusa wayachminiati, tura kayaasha nu kuitian yúatniun tujintiawai.’

### **Anearar wekasatniuitji**

<sup>35-36</sup> ‘Ju enentáimsatarum. Ni uuntri nuatnaikiatin námpernumiá taa, “uraitia” takui, takarniuri jinia ekeemakar wárik urattiai tusar nakáa pujuiniawai. Atumsha núnisrumek Wi atumi Uuntri támatai, shiir itiaatai tusarum anearum wekasatarum. <sup>37</sup> Ni uuntri taak iwiáa pujuinian wáinkiarai nuka shiir pujuiniawai. Nu úuntak iwiar, “misanam pujustarum” ni takarniurin títiatui tura yurumkan sústartatui. <sup>38</sup> Kashi ajapén taaksha tura tsawaana ai taaksha ni takarniurin iwiáa pujuinian wáinkiuinika, nu takarin shiir pujuiniawai. <sup>39</sup> Tura jusha nekaatarum. Jeenniua nu, kasa tátinian nékaitkiunika, iwiáa pujusaayi. Kasa wayá kasamkatniun suritkiaayi. <sup>40</sup> Atumsha núnisrumek, anearum pujustarum. Wi Aents Ajasu tutai aya aneachmanum tátatjai” tímiayi.

### **Pénker takarin yajauch takarniujai**

*(Mateu 24.45-51)*

<sup>41</sup> Nuyá Pítiur aniasmiayi “¿Aya ínkik unuiniartaj tusam nu métek-taku chicham támek. Kame ashí nekaawarat tusamek tame?’ tímiayi.

<sup>42</sup> Tutai Jesus tímiayi “Atumsha pénger takatan wáinnua núnisketrume. Takatan wáinin ni uuntri takatrin takainia nuna, yurumátin jeamtai, ayurkamna núiti ni úuntrin shiir umirna

nu, tura pénger enentáimtana nu. <sup>43</sup> Ni uuntri taa, takatrin tímiatrusan túran wáinkiuinika nu wáinniusha shiir enentáimsamniaiti. <sup>44</sup> Umirin asamtai, ni uuntri ashí ni waririn wáitrukak tusa apujsettawai. Nuna paant tájarne. <sup>45</sup> Tura nu takatan wáinniusha “úuntur wau táchattawai” tu enentáimias, ni uuntri takarniurin yajauch awajeakuinika tura niniki ti yurumá, ti umar nampeakuinika, <sup>46</sup> nuinika ni uuntri ni nákachmanum aya aneachma taa ti asutiáttawai. Umichu pujuinia nuí akupkattawai.’

<sup>47</sup> ‘Takaran ni uuntri wakera nuna nékayat, iwiartsuk umitsuk pujakka ti awatramu átatui. <sup>48</sup> Túrasha takarin nékachu asa, asutniámnia túrakka, ishichik awatnartatui. Núkap susamu ana núnaka núkap seawartatui. Núkap ataksamu ana núnaka núnisan nankaamas seawartatui.’

### **Jesusjai shuar akannartatui**

*(Mateu 10.34-36)*

<sup>49</sup> ‘Jijjai nekapsatnua nútiksanak nunkanam jinia ikiapartaj tusan tamajai. Tura túrunat tusan ti wakerajai. <sup>50</sup> Imiantinia núnisan itiurchat ukatruktatui. Nusha wárik amuukat tusan ti wakerajai. <sup>51</sup> “Ashí shuar shiir pujusarat tusa táwiti” tu enentáimturumek. Núchaiti. Antsu shuar tesanairat tusan táwitjai. <sup>52</sup> Yamái jukimiutak chikichik shuarnum senku ainia nu akannakartatui; menaintiu shuar ni shuarin jímíaran nakitrartatui. Jímíarsha ni shuarin menaintiun nakitrartatui. <sup>53</sup> Apasha ni uchirin nakitrattawai. Núnisan uchisha ni aparin nakitrattawai. Nukusha ni nawantrin nakitrattawai, nawantrisha nukurin nakitrattawai. Tsatsarisha ni najatin nakitrattawai; najatisha tsatsarin nakitrattawai.”

(Mateu 16.1-4; Márkus 8.11-13)

<sup>54</sup> Jesus áentsun chicharuk junasha tímiayi “Atumsha nantu akaatainmaani kíarmatai “yutuktatui” tátsurmek. Nusha nekas tárume. <sup>55</sup> Tura anaarania nase násenkamtai “séejik átatui” tárume. Tura nekas tárume. <sup>56</sup> Yurañminmasha nunkanmasha túruna nu nékarme. Túmaitatrumsha ju tsawantai túrunattana nusha çitiura nékatsrum? ;Maaj, ántrairume!”

### Nemasrumjaisha nawamnaikiata

(Mateu 5.25-26)

<sup>57</sup> “Túrasha péñker ana nusha çurukamtai atumek enentáimsarum wáintsuram? <sup>58</sup> Irutramuram úuntnum júramkuinikia jintia wésamek “nuamtak iwiartai” titiá. Túrachkumninikia akupniunam juramkittieme. Tura niisha suntarnum akuptamkattame. Tura niisha sepunam enketmattawai. <sup>59</sup> Tura nekas tajai, nuí enkemamka ashí rearchisha akikmachkumka jñinkishtatme” tímiayi.

### Ii enentái yapajíatniuitji

**13** Nu tsawantin chícham ujaktai tusar Jesusan tariarmiayi. Kariréa nunkanam Israer-shuar ni waakarín máawar Yus susatai tusar pujuiniaí, Piratu nin maa, nuna numpen waaka numpejai pachimpramun ujakarmiayi. <sup>2</sup> Tura Jesus tímiayi “çWarí enentáimsarum? Kariréanmaya áishman tárumna nu, chíkich Kariréanmaya áishmanjai nankaamas yajauch ásar túrunawarai çtu enentáimprumek? <sup>3</sup> Atsá; atumí enentái yapajíáchkurmeka núnisrumek atumsha jakattarme. Nuna paant tájarme, tímiayi. <sup>4</sup> Tura tiasiúchu áishman yakí jea Seruí kupiniak iniaak nekenkarmiania nu, çwarí enentáimtarum? Chíkich Jerusarénnumia shuarjai nankaamas

tunáa ásar túrunawarai çtu enentáimprumek? <sup>5</sup> Atsá, tájarme. Atumí enentái yapajíáchkurmeka núnisrumek atumsha jakattarme.”

### Iikiu numi nereatsna nu

<sup>6</sup> Junasha Jesus métek-taku chichaman tímiauyi. Júiti:

Shuar ni ajarín iikiu numin araamun takakuyi. Nerekchiash tusa iyumai. Túrasha nere atumai. <sup>7</sup> Nuiñkia ni ajarín wáinniun timiai “Antukta, menaintiú uwitin juna nere átai tusan waketrú pujajai; túrasha penké wáinkiachjai. Ajakta. çUrukamtai ántrash wajastata?”

<sup>8</sup> Tutai ajá wáinin timiai “Atsá, uuntá; ju uwitin wajastí. Wajamurín takarsatjai tura péñker nunkan matsatkatjai. <sup>9</sup> Nujai nerechchampiash. Tura tuke nereachkuinikia nuiñkia ajakta” timiai”, tímiayi.

### Nuwan punuá kaarun Jesus tsuármiania nu

<sup>10</sup> Ayampratin tsawantai Israer-shuar iruntai jeanam Jesus unuiniak pujumiayi. <sup>11</sup> Nuiñsha nuwa pujumiayi. Nu nuwasha tiasiúchu uwitin tuke jaa pujumiayi. Íwianch nin yajauch awajas apuna tuke ikiarumiayi. Túramu asa pankáí nakuenkataj tukamá penké tujinmiayi. <sup>12</sup> Jesus nuna wáiniak, chicharuk “Nawantrú, ame jaamurmiya ankant ajasume” tímiayi.

<sup>13</sup> Nuna tinia ni uwejejai antinmiayi. Tura nú chichamaik nuwasha pankái nakuenkamiayi. Tura Yusa náarín uunt awajsamiayi. <sup>14</sup> Tura Jesus ayampratin tsawantai tsuaru asantai, iruntai jea uuntri kajak iruntrarmia nuna tímiayi “Sais tsawantin takaschatniukait; ayampratin tsawantai tsuámartaj tusarum táchatniuitrume. Sais tsawant ana nuí tátiniaitrume.”

<sup>15</sup> Tura Jesus tímiayi, “;Ántar chichamtinia! çatumí waakarisha

atumi umpuururisha yumi aartai tusarum ayampratin tsawantin atíarum júatsrumek? <sup>16</sup>Tura ju nuwasha, atumi shuari Apraám shuarnumiá akiiniaiti. Nii tiasiúchu uwí Satanás yajauch awajsamujai jinkiamuyayi. Nincha ayampratin tsawant aiñ yajauch awajsamunmayá atíachminkiait” tímiayi.

<sup>17</sup>Jesus nuna takuí ni nemasriša nat-saararmiayi. Tura penké shuar ni péñker túramurin wáinkiar warasarmiayi.

### Mustasa jinkiaí

(Mateu 13.31-32; Márkus 4.30-32)

<sup>18</sup>Nuyá Jesus tímiayi “¿Yusa aku-peamuri warijjain métek-takuit? <sup>19</sup>Mustasa jinkiaíjjai métek-takuiti. Mustasa jinkiaíncha shuar ni ajariin araamiayi. Tsapái, tsakaak, uunt numi ajasmiayi. Ti uunt asamtai chiniki ni kanawen pasunmarmiayi.”

(Mateu 13.33)

<sup>20</sup>Tura junasha tímiayi: “¿Yusa akupeamuri warijjain métek-takuit? <sup>21</sup>Tanta wakaprutaia métek-takuiti. Arinia núkap ana nuñ nuwá wakaprutain ishichik enkéamiayi. Túram ashí wakapruamiayi.” Tu tímiayi.

### Yupikiach waiti

(Mateu 7.13-14, 21-23)

<sup>22</sup>Jesus Jerusaréñnum jeattsá weak untsurí peprunam wayá unuiniarkutak wémiayi. <sup>23</sup>Weají chíkich shuar aniasmiayi “Uuntá, ¿uwemainia nu ishichikikiat?”

<sup>24</sup>Tutai Jesus tímiayi “Yupikiach wáitiniam wayataj tusam ti wakeri-tiarum. Kame untsurí wayataj tusar wakeriartatui, túrasha tujinkiertatui, tájarme. <sup>25</sup>Jeá nérenniurí wáitin epenmiatai, atumsha aa wajarum nu, wáitiniam wajasrum untsúakrum “Uuntá, uratritia” títiatrume. Túrasha

“Nékatsjarme. ¿Tuyantskaitrum?” turamtatrume. <sup>26</sup>Nuyá átum títiatrume “Túrasha, uuntá, iisha ámijjai yurumámji, ámijjai umarmaji. Tura ii pépruríncha unuiniamame.” <sup>27</sup>Túrasha nii títiatui “Tuyantskaitrum, nékatsjarme, tátsujrumek. Yajauch túrintirmeka winiyañka kanaktiarum.”

<sup>28</sup>‘Nuyá Apraámsha, Isaksha, Jakupsha tura ashí Yúsnan etserin Yus akupeana nuñ wayáwaru wáinkiarum tura aa ajapam pujusrum ti úutkuram naim tásarara ajattarme. <sup>29</sup>Tura Yus akupeana nuñ, nantu tatainmaaniyasha nantu akaatainmaaniyasha, arakiasha, nunkaaniyasha taar, imia Israer-shuarchaitiat yurumátai tusar pujusartatui. Tura atumsha, “Apraám shuáraitjai” táyatrum, wayashtatrume. <sup>30</sup>Nuñsha yamá ukunmaani ainia nusha emka ártatui; tura yamá emka ainia nusha nuñsha ukunmaani ártatui.”

### Jerusaréñnumaani Jesus wémiayi

(Mateu 23.37-39)

<sup>31</sup>Nu tsawantai Pariséu aents Jesu-san tariar tiarmiayi “Erutis mantamattsá wakerutmawai. Tuma asamtai juyañka wetá.”

<sup>32</sup>Tutai Jesus tímiayi “Werum nu kujancham ju titiarum: “Ístá. Yamaisha ishichik tsawant iwianchin jjiin akupkartajai; túran jaancha tsuárartajai. Tura ukunam amuktatjai.” <sup>33</sup>Tura Jerusaréñnumaani ishichik tsawant tuke wétiniaitjai. Yúsnan etserin aya Jerusaréñnuman jákatniuiti.”

<sup>34</sup>‘Jerusaréñnumiáitiram, Yúsnan etserin máiniaitrum; tura Yus akatar akupturmakmania nusha kayajai tukurum máiniaitrum! Tuma aín atash ni shiamprín etektana núnisnak Wishá weaktasan wakerimjiarme, túrasha nakitramarme. <sup>35</sup>Iistarum. Atumniasha Yus ajapramaitrum. Tura “Yusa náariin winiana nu, shiir atí”

títíatrumna nú tsawant jeatsain penké wáitkiashtatrumé. Nuna tájarne” tímiayi Jesus.

### Áishman eaak-jaan Jesus tsuármiania nu

**14** Ayampratin tsawantai Pariséu uuntri jeen Jesus yurumáttsa wémiayi. Tura chíkich Pariséu wariniak túrat tusar ii pujuarmiayi. <sup>2</sup>Nui áishman eaak-jaa Jesus pujamunam naka pujumiayi. <sup>3</sup>Jintinniuncha Pariséuncha Jesus aniasmiayi “¿Warí tárúm? ¿Ayampratin tsawantai jaa tsuárminkiait. Tsuárchamniakait?” tímiayi.

<sup>4</sup>Tura niisha áimtsuk pujuarmiayi. Nuinkia jaan antiñ tsuármiaiyi. Tura “shiiir wetá” tímiayi. <sup>5</sup>Nuyá Pariséun chicharuk, “Atumí umpuuararisha, waakarisha waa táurmanum akaiki iniamtai, ayampratin tsawant ain nu chichamaik júatsrumek” tímiayi.

<sup>6</sup>Takui áimkiatniun penké tujinkiarimiayi.

### Nuátnaikiatin nampernum ipiaamu ármia nu

<sup>7</sup>Ipiaamusha penkeri pujutainium pujustaitsar ti wakeruiniakui, Jesus nuna wániak juna jintintramiayi:

<sup>8</sup>“Nuátnaikiatin nampernum penkeri pujutainium pujusaip. Nui pujakminkia, chíkich ámijjai nankaamas penkeri táchatpiash.”

<sup>9</sup>Tura ipiatmania nu chichartamuk “Chíkich iiktusta” turamchatpiash. Nuinkia chíkich nánkatkamu pujutainium wéakum natsartatme. <sup>10</sup>Antsu ipiatmakmin, nánkatkamu pujutainium pujustá. Nuinkia ipiatmamnia nu chichartamuk “Amikru, ámeke juí penkeri pujutainium pujustá” turamtatui. Nujai chíkich ipiaamu ainia nu, “nekas penkerinti” turamartatui. <sup>11</sup>Iimiata, “penkerintjai” tu enentáimtuma nuka péejchach

awajnastatui. Tura ímianchach enentáimtúmana nuka waantu ajastiniaiti.”

<sup>12</sup>Nuyá Nin ipiaamua nuna chicharuk tímiayi “Amesha yurumáiti tusam untsuktajtsam wakerakmeke, ame amikrumsha, yatsumsha, ame shuarumsha, írutramuram kufrintin ainia nusha ipiaawaip. Nii ipiaamka, ataksha íksan ámin ipiatmashtatuak. Nujai akikma átatme. <sup>13</sup>Antsu yurumáiti tusam untsuktajtsam wakerakmeke, kufrincha, wekaicha, shutuapsha, kusurusha ipiaawarta. <sup>14</sup>Niisha akirmaktinian tujintianiawai. Pénker shuar nantakiartatna nui akinkiatatme. Nu tuma asamtai warastatme” tímiayi.

### Uunt namperan Jesus nekapmá chichasmiania nu

<sup>15</sup>Nu misanam pujuarmia nuyá, chikichik Jesus chichaamun antuk, Jesusan tímiayi “Yus akupeamunam pachiiiniak, yurumkunka ti shiiir ainti.”

<sup>16</sup>Nuna takui Jesus juna jintintiamiayi: “Áishman namperan nájanuk, untsurí shuaran taartí tusa akatar akupkamai. <sup>17</sup>Yurumátin jeamtai “Winitiarum, yurumátin jeayi” tu tiarta tusa ni takarniurin akupkamai. <sup>18</sup>Tura winichminiaitji tusar ashí ujakarmai. Chíkich timiai “Nunkan yamá sumarmakjai. Iyutaj tusa wéakun winishtatjai. Tsankurturti” timiai. <sup>19</sup>Tura chíkich chichaak “Wisha tias waakan sumarmakjai. Nekapsatsan wakerajai. Tuma asan winishtatjai. Tsankurturti” timiai. <sup>20</sup>Tura chíkich chichaak “Yamá nuatnaikijai. Tuma asan winishtatjai” timiai. <sup>21</sup>Takarín wakетки ni úuntrin ashí nuna ujakmai. Nuna antuk niisha kajekmiayi. Tura ni takarniurin timiai “Ju péprunam pénker jintianmasha tura uchich jintiachinmasha weme, kufrincha



tura wekaichasha, shutuapsha, kusurusha itiaarta.” <sup>22</sup>Nuyá ukunam ni takarniurí taa chicharuk “Uuntá, ame turutniamna nútiksanak túramjai; túrasha tuke ankantawai” timiai.’

<sup>23</sup>“Tutai ni uuntri chichaak “Jintianam weme, chíkich jintiachiniam weme, wáinmena nu ashí awayawarta. Winia jearuí piakat tusan wakerajai. <sup>24</sup>Emka ipiaawarmajnia nuka penké chikichkísha wininkia yurumáchartauí, tajarme’ tímiayi.”

### Kristu nemarsatin yúpichuchihuiti

<sup>25</sup>Untsurí aents Jesusjai irunki wearmiayi. Niisha nuna apajas iis juna tímiayi:

<sup>26</sup>“Shuar ni aparíncha, ni nukuríncha, nuaríncha uchiríncha, yachíncha, umajíncha Wijjají nankaamas enentáimtakka, tura shiir pujustinian wakerak Winí winitniun nakitiakka winia unuini-amur ajaschamniaiti. <sup>27</sup>Ni wakeramurín ajakeak ni krusrj yanakí nemartatsna nu winia unuiniampur ajaschamniaiti.’

<sup>28</sup>‘Jea yakí jeamtaj tusam wakerakmeke, kuítian urutmak ajapawaintiaj tusam tura urutmajaink<sup>i</sup> amukaintiaj tusam emka enentáimsashtatmek. <sup>29</sup>Túrutsuk aya ukura iniaisam amuktin tujinkiakminkia, nuna wáiniainia nu, wishikiainiak juna tiartatui: <sup>30</sup>“Íiskua. Nu shuar jeamtinian nankamamiayi. Túrasha amuktinian tujinkiamiayi.”

<sup>31</sup>“Tura uunt kapitíán chíkich kapitíanjai mesetan najanatin áchatpiash. Emka, niisha pujus, tias mir (10.000) suntarjai painti mir (20.000) suntar winiana nuna nupetkaintjash tusa enentáimsashtatuak. <sup>32</sup>Tujintiakka, chíkich kapitíán jeachat pujaanak, nawamnaikiatai tusa akatar akupkash-tatuak. <sup>33</sup>Wats, “Kristu unuiniamurí ajastinjai, wi takakjana juna warí winia

itiurtawa” tu enentáimsatniuitrume. Túrachkurmeke winia unuiniampur ajastin tujinkiarne.’

### Wee michumarka yajauchiiti

(Mateu 5.13; Márkus 9.50)

<sup>34</sup>‘Weeka jeaku péñkeraiti. Tura michumarka çitiurak atak péñker ati? <sup>35</sup>Wee michumarka araakmatniunmasha yayaatsui. Tura tsuatnum ikiusmasha ántraiti. Aya ajapatniukete. Kuishim ákuinkia antuktarum” tímiayi.

### Jesus murik menkakamu chichaman unuiniamiania nu

(Mateu 18.10-14)

**15** Akupniu kuítrin-juu tura yajauch shuarsha Jesusan anturkatai tusar tarú wearmiayi. <sup>2</sup>Tuma asamtai Pariséusha, Israer-shuara jintinniurísha Jesusan áujmatainiak “Jusha tunáa shuaran itiaawai tura nijijai yurumáiniawai” tiarmiayi.

<sup>3</sup>Nuna tuiniakui Jesus ju métek-taku chichaman jintintiwarmiayi:

<sup>4</sup>“Shuar siañ (100) murikiun takuschampiash. Nu siánumia chíkichik menkakamtai nuwintia nuwinkia ni matsatmarijn ikiuak, menkaka nuna ti eakchattawak. Wáintsuk iniaisashtatui. <sup>5</sup>Tura wáiniak yakainium awañkek waras jeen wáketui. <sup>6</sup>Tura jeen jea ni amikrin, írutramuríncha ikiaanak “Wijjají warastarum. Murikiur menkaka nuna wáinkiajai” tawai. <sup>7</sup>Wats, nuwintia nuiwi péñker shuar akui nayaimpiniam warastin awai. Tura antsu chikichík yajauch shuar ni enentáin yapajámtainkia, nú nankaamas warastin átatui, tájarme’ tímiayi.

### Kuit emeñkakman Jesus unuiniamiania nu

<sup>8</sup>Nuyá chíkich enentáimsatai. Nuwá tias kuítian takakna nuna chikichik meñkakamtai, wáinkiataj tusa jinia ekeemak, jeñ japimiak émamkes eakchattawak. <sup>9</sup>Tura wáiniak ni amikrín, írutramuríncha ikiaanak, “Wijjai warastarum. Kuit meñkakamia nuna wáinkiajai” tawai. <sup>10</sup>Núnisan yajauch shuar ni enentáin yapajjámtai, Yusa suntari matsatmanum ti warastin awai” tímiayi.

### Uchi ni aparín waketkitniun Jesus unuiniamiania nu

<sup>11</sup>Nuyá Jesus juna unuiniamiayi:

“Áishman jimiará uchin takakuyi. <sup>12</sup>Tura pátatka uchi ni aparín timiai “Apawá, surustiniaitmena nu yamá surusta.”

“Tutai ni aparí ni kufrín jímiapetek nakak mai uchin susamai. <sup>13</sup>Ishichik tsawant nankaamasaj pátatka uchi ni warirín irur jukí jeachat chíkich núnkanam wémai. Nuñsha nánkamas yajauchin túrak kufrín ashí ajapamai. <sup>14</sup>Ni kuitri ashí amuuka aín nu nunkanam ti tsuka ámai. Niñsha núnisan tsukarín wáitsamai. <sup>15</sup>Túmak takatan eaktajtsa nu nunkanmaya apachiin werimiai. Nu áishmansha kuchirín wáitrukta tusa akupkamai. <sup>16</sup>Uchi ti tsukamak kuchi ukatramun niisha yuátajtsa ti wakerimiai. Túrusha penké súcharmai. <sup>17</sup>Tumáa pujus nuñkia enentáimpramai. “Winia aparuí takau shuar péñkeran ti yurumáiniawai. Tura wikia juí tsukaruí wáitajjai. <sup>18</sup>Wats, aparuí waketkitjai. Tura aparun chicharkun “Apawá Yúsjaisha ámijjaisha tunaan túrajai, titiajai. <sup>19</sup>Ame uchiram áchamniaitjai yamaikia. Ame takarniurmea áantsanak átaj tusan wakerajai” titiajai” tu

enentáimsamai. <sup>20</sup>Tura wajaki ni aparín waketkimiai’ tímiayi.

“Tura ni aparísha jeachat winian wáiniak waitnentramai. Aparí tsékeñki inkiun miniakak mukunámai. <sup>21</sup>Nuñkia uchirísha timiai “Apawá, Yúsjaisha ámijjaisha tunaan túrajai. Ame uchiram áchamniaitjai.”

<sup>22</sup>“Túrusha ni aparínkia ni takarniurín chicharuk “Ti penker pushí itiarum áentsratarum, timiai. Tura uwejnun aweetaisha aweemtikiatarum. Tura sapatcha aweemtikiatarum. <sup>23</sup>Túrarum waaka nueram ana nu maatarum. Námper nájankur shiir enentáimsar yurumámai. <sup>24</sup>Warí, ju winia uchir jakaapitia tu enentáimsamjai. Túrusha iwiaakui. Meñkakama nuna wáinkiajai.” Nuñkia ti warasarmai’ tímiayi.

<sup>25</sup>“Tumaj iwiáj úchikia takatnum pujumai. Tura wáketuk, jeá nuntumas jantsemáiniak túntuiyamun antukmai. <sup>26</sup>Nuñkia yaintri matsatun chikichkiniak untuk “¿Warimpait?” timiai.’

<sup>27</sup>“Tura nii chichaak “Ame yátsum tayi. Túramtai ame apa waaka nueram maatai tawai, ame yatsum péñker tau asamtai” timiai.’

<sup>28</sup>“Tura iwiaj uchi kajek wayatniun nakitramai.’

“Tuma asamtai ni aparí jiintiuki “wayata” timiai.’

<sup>29</sup>“Tura uchisha aparín chicharuk “Wisha ámin umirkun untsurí uwitin ame takatrumin túraitjai. Nu nékame. Túrusha winia amikrujai námper najanatin chiipiuksha penké surichuitme. <sup>30</sup>Tura ju ame uchiram nuwajaj yajauchin túrak ame kuítrumin wasurkania nu támatai, waaka nueram máachumek” timiai.’

<sup>31</sup>“Takui aparí chicharuk “Uchirú, ámeke wijjai tuke pujame. Tura wi takakjana nusha ashí áminuiti. <sup>32</sup>Tura

ame yatsum jákaiti tu enentáimsamij nu iwiaakuiti. Menkaka nu yamaikia wáinkiaji. Tuma asamtai námper najanar waraschatniukaitiaj” timiai” tímiayi.

### Takatan wáinin

**16** Ju métek-taku chichamnasha Jesus ni unuiniamu? “Tura nii chichaak “Ame yátsrín unuiniamiayi.

“Kuítrintin áishmańka takatrín wáinniurí ámai. Tura nérenniun ujainiak “Ame wáinniuram ame kuítrumin náńkamas ajapeawai” tiarmai.’

<sup>2</sup>“Nuna antuk ni wáinniurín untsuk “¿Warinia jusha turamainia? timiai. Yamaikia winia wáinniur áchattame. Tuma asamtai winia kuítrujai ititurkamea nu iniaktursata” timiai.’

<sup>3</sup>“Tutai takatan wáinin enentáimsamamai. “Maaj, wisha ititurkatjak, timiai. Nunka táurtinniaasha jeatsjai. “Kuit surusta” títinniaasha natsamajai.

<sup>4</sup>Winia takatur atsakui yurumkan ajamprusarat tusan túratajna nuna nekajai” tu enentáimsamamai. <sup>5</sup>Nuyá nérenniun tumashmaku armia nuna ankant ankant untsukarmai. Emka tamia nuna chicharuk “¿Winia úuntur urutma tumashmakuitiam?” timiai.’

<sup>6</sup>“Niisha áimiuk “Asuitin siań taru tumashiitjai” timiai.’

“Tutai takata wáinin chicharuk “Pai. Papinium tumashrum ana nu juá: wárik-masmek pujusam, nu papí jaakam, chíkich papinium aya senkuentachik aarta” timiai.’

<sup>7</sup>“Nuyá chíkich tumashmaku támatai “¿Amesha urutmá tumashiitiam?” timiai.’

“Tutai nii chichaak “Shana siań taru tumashiitjai” timiai.’

“Tutai “Pai. Papinium tumashrum ana nu júiti. Chíkich papinium aya uchentak aarta” timiai.’

<sup>8</sup>Nuyá takata wáinniu untrí nuna nekáa “Nii yajauch túriniaitiat imiá enentáimniuiti” timiai’ tímiayi.

Nuyá Jesus tímiayi ‘Yus-shuarjai nankaamas Yus-shuarcha aijjai ni túratniuriniak takainiak imiá enentáimkia áiniawai.’

<sup>9</sup>“Ju nunkanam anankatin átsuk. Tura kuitsha aya ju nunkanmayankete. Tuma asamtai atumsha kuitrumjai “shuuran yańtaj” tu enentáimsatarum. Kuitjai yańtin amuukamtaí atumsha amuicha jeanam ipiaamu átaj tusarum túratarum.”

<sup>10</sup>“Shuar ishichik takakna nujai péńker túrakka, núkap takakna nujaiśha péńker túrattawai. Tura ishichik takakna nujai péńker túrachkunka, núkap takakna nujaiśha péńker túrashtatui. <sup>11</sup>Tuma asamtai ju nunkanmaya anankartin kuitjai péńker túrachkurmeke, tuke átin ana nujai takastincha ¿itiur takastarumek? <sup>12</sup>Takakme nuna Yus ikiatmasuiti. Nujai péńker túrachkurminkia, atumnia átinia nuna ¿itiurak suramsat’?

<sup>13</sup>“Takarniurí jimiará úuntrintin ajastinian tujintiawai. Warí, chíkichnaka aneak chíkichnaka nakitrashta túrattawai. Turya senkuentachik aarta” timiaituak. Chíkichan umiruk chíkichnaka umirkashtatui. Yussha kuitcha máí-metek enentáimtuschamniaitrume” tímiayi Jesus.

<sup>14</sup>Pariséusha kuítian anen armia nu, ashí ni táman antukar Jesusan wishikrarmiayi. <sup>15</sup>Túmakui Jesus nin tímiayi “Atumsha aents ímmianum péńker awajmamprume. Túrasha atumí enentáincha Yus péńker nékawai. Kame winia “nankaamantuiti” turutit tusa wakera nuna Yuska nakitiawai.’

### Yaunchu etserkamu, yamái etserkamu

<sup>16</sup>‘Juan étsertsain Muisáis aar akupkama nunasha tura Yúsnan etserin unuiniarmia nunasha antuktin ármiai. Tura yamaisha tímianiaí ti shiir chicham awai. Yus akupeana nuí urukukit nuka paant etserkamuiti. Tura ashí shuar nuí pachiinkiataj tusar ni kakarmarijjaín ti takainiawai.’

<sup>17</sup>‘Túrasha yaunchu akupkamu ashí chicham uminkiatniuiti. Nu chicham uminkiashtinkia nayaimpisha nunkasha amukatniujai nankaamas itiurchataiti.’\*

<sup>18</sup>‘Áishman nuarín ajapa chikichan nuátkunka tsanirmawai. Tura nuwá ajapamu niiniurtakka nusha núnisan tsanirmawai.’

### Kuítrintin áishman Rásarujai

<sup>19</sup>‘Áishman kuítrintin ámai. Niisha imiá shiir pushin ti kuit ainia nujai iwiarmanniuyi. Tura tuke tsawant yurumak ti kuit amia nujai namperan najanniuyi. <sup>20</sup>Tura kuítrincha ámai ni naari Rásaru. Niisha kuchapruku tunamaruyi. Tuke tsawant kuítrinniu wáitirijn pujuyi. <sup>21</sup>Ti tsukamak kuítrinniu misarina kakekan yuattsá wakerimiai. Tura yawasha ni kuchaprin nukatiarmai. <sup>22</sup>Kuítrincha jakamai. Jakantai jaka shiir pujutainium, Apraám pujumia nuí nayaimpinmaya suntar júkiarmai. Kuítrinniu sha jakamai. Jakantai iwiarsarmai. <sup>23</sup>Jaka pujutainium wáitias pujus, pankái ímias, Rásarun Apraámjai pujuinian wáinkiamai. <sup>24</sup>Wáiniak untsukum “Apawá Apramá wáitnentrurta, timiai. Rásaruka tsara uwejejai entsan uchupir winia iniairun imichturat akupturkata. Wisha juí jinium pujusan ti waitiajai” timiai.’

<sup>25</sup>‘Tutai Apraám timiai “Uchirú enentáimpratá. Ame nunká iwiaaku pujusam ti shiir pujumame. Antsu Rásaruka nuí ti yajauch pujumai. Tura niisha yamaikia juí áyamui tura ámeká wáitiamé. <sup>26</sup>Tura nú arant nánata ti uunt awai. Tuma asantai juyá aí wétinian wakeruiniayat tujintiainiawai. Tura aya juí tátinian wakeruinia nusha tujintiainiawai.”’

<sup>27</sup>‘Nuinkia kuítrintin timiai “Nuinkia apawá Apramá, juna seajme. Winia aparú jeen Rasaru akupturkata. <sup>28</sup>Nuisha winia yatsur senku matsatainiawai. Niisha ju wáitsatniunam tácharat tusa ujákartí, tájame” timiai.’

<sup>29</sup>‘Tutai Apraám timiai “Muisáis áarman tura Yúsnan etserin áarman takakainiawai. Nuna umikiarti.”’

<sup>30</sup>‘Tutai kuítrintin áimkiamai “Túrasha apawa Apramá, antsu jakamunmaya nantaki, shuar we ujakam enentáin yapajjáwarainti.”’

<sup>31</sup>‘Tura Apraám timiai “Muisáis áarman tura Yúsnan etserin áarman an-turainiachkunja jaka nantaki we ujakmasha antukchartatui” timiai.” Tu áujmatsamiayi Jesus.

### Yajauch túrumtikiatin ti tsúumainti

(Mateu 18.6-7, 21-22; Márkus 9.42)

**17** Jesus ni unuiniamurín juna tímiai, “Aentsun yajauchin túrumtikiattana nu tuke átatui. Tura shuar ni ain tunaan wakerumtikna nu aneartí. <sup>2</sup>Ju shuar uchich ainia nuna yajauchinium túrumtikna nuna Yus imiá asutiáttawai. Tuma asantai nuna túratsain uunt kayajai kuntujnum jinkiá nayaantsanam ajunkam maak ainti. <sup>3</sup>Túrasha atumek ímiastarum. Ame yatsum ámin tunáa túrutmamtainkia chicharkata; tura niisha “tsankururta” túramkuinkia tsankurata. <sup>4</sup>Chikichík

\* 16:17 Mateu 19.1 ya senkuentachik aarta” timiai-12; Márkus 10.1-12

tsawantiniñ siati túrutmamtai, tura “tsaṅkurturta, atakka túrashtatjai,” siati túramkuinkia, tuke tsaṅkurata.”

### **Yus nekas enentáimtakrika tujinkiashtatji**

<sup>5</sup> Jesusa unuiniamurj Nin chicharuk “Yus enentáimtajnia nú naṅkaamas enentáimtustin yáinmaktá” tiarmiayi.

<sup>6</sup> Tutai Jesus tímiayi “Mustasa jinkiái ti ishitiúpchich ana núnisan ishichk-isha Yus enentáimtaitkiurmeka, siki-umuru numi wajana nu, “Wajamur-miyaṅka ukuiniakam nayaantsanam waja-asta” tákurmin nú numi umirtamkainti.’

### **Yusa takatrj takasar “ti penker túraitji” tíchatniuitji**

<sup>7</sup> Atumí takarniurj arakmasua amik, waakancha iis támatai, ¿nú chichamaik amesha, “Winitía, yurumáitía” tíintmek? <sup>8</sup> Atsá. Antsu, “yurumak iwiarturata. Wi yurumátin tura umartincha surusminiam iwiarnarta. Nuyá ame yurumátá.” Nu tíchaintmek. <sup>9</sup> Nii túratin ana nunak túratsuk. Tuma asamtai yuminsashtatme. <sup>10</sup> Atumsha núnisrumek Yus túramna nu ashí umikiam “ti penker túraitjai” tíchatniuitme. Antsu “aya ii túratniurj ana nuke tura asar iikia ántraitji” títiniaitme.” Tu tímiayi Jesus.

### **Tias áishmaṅkan tunamarun Jesus tsuáarmiania nu**

<sup>11</sup> Jesus Jerusaréṅnum wesa Kariréa nunka ikiuki Samaria nunkanam naṅkaamakmiayi. <sup>12</sup> Tura péprunam jeamtai, tias áishman ripra sunkurjai tunamaru armia nu, arant wajasarmiayi. <sup>13</sup> Tura untsumainiak “Uunt Jesúsá, waitnentrurta” tiarmiayi.

<sup>14</sup> Jesus nin wáiniak, “Pátrij werirum iniaktumastarum” tímiayi.

Tura wésar péñker ajasarmiayi. <sup>15</sup> Nuyá chikichik ni tsuamarman nekáa kakantar chichaki Yusa náarin uunt

awajki waketki Jesusan tarimiayi. <sup>16</sup> Yuminsataj tusa Jesusan tikishmatar piniakumar tepesmiayi. Nu áishmaṅka Samarianmayauyayi.

<sup>17</sup> Nuna wáiniak Jesus tímiayi “Tsuámaru tiáschakait. ¿Chíkich nuiwisha tui pujuinia? <sup>18</sup> ¿Ju yajaya áishman níñkik Yusa naari uunt awasataj tusa waketki tai?” <sup>19</sup> Nuyá áishmaṅkan tímiayi, “Winia nekas enentáimtura asam péñker ajasume. Wajakim shiir weta” tímiayi Jesus.

### **¿Yusa akupeamurj urutaik ati?**

(Mateu 24.23-28, 36-41)

<sup>20</sup> Pariséu aents Jesusan aniak “¿Yusa akupeamurj urutaik ati?” tiarmiayi.

Tutai Jesus tímiayi, “Yusa akupeamurj paant wáinkiachminiaiti. “Yamaí naṅkamnaya” tichamniaiti. <sup>21</sup> “Juí awai, nuisha awai” tíchamniaiti. Warí, Yusa akupeamurinkia atumiñ pujawai” tímiayi.

<sup>22</sup> Nuyá ni unuiniamurj chicharuk juna tímiayi: “Tsawant jeattawai atumsha Winia Aents Ajasu tutain “aya chikichík tsawantkesha Nii wáinkiarkia mak” turuttiatrume. Túrashta tujinkiatarme. <sup>23</sup> Aents Ajasu tutai “juí pujawai, nuisha pujawai” tuñiakui weriirap. Tana nu nemariirap. <sup>24</sup> Wi, Aents Ajasuitjana nu tátinian tsawantur jeamtai paant wáitkiattarme. Peem péetuk ashí nayaimpin tsáapnin awajna núnisan wi taamu paant átatui. <sup>25</sup> Tura nu túruntsain yamai pujuinia nu Winia nakitruiniakui ti wáitsatniuitjai. <sup>26</sup> Winia atak tátiniur jeamtai, yaunchu Nuái pujumia nú tsawantin túrunamia núnisan túrunattawai. <sup>27</sup> Yurumáwarmiayi, umararmiayi, nuatnaikiarmiayi, ni nawantrj nuatnakat tusa surukarmiayi. Tumáa pujuiniá Nuái uunt kanunam enkemprantai, amarak nu aentsnasha mash amuukarmiayi. <sup>28</sup> Tura Sutuma

péprunmasha Rauta írutramurísha  
 núnisaran Yusa asutiátniuri  
 enentáimtutsuk pujuarmiayi.  
 Yurumáwarmiayi, umararmiayi,  
 sumakarmiayi, surukarmiayi, ajancha  
 ajamarmiayi, jeancha jeammarmiayi.  
<sup>29</sup>Tura Raut Sutuma péprunmaya  
 jiinkimtai asupri tutai kaya keek yútana  
 áintsan nayaimpinmaya kakeetuk  
 nu áentsun mash máawarmiayi.  
<sup>30</sup>Núnisan winia atak tátiniur jeamtai  
 enentáimtsuk pujusartatui.'

<sup>31</sup>'Nu tsawant jeamtai jea yakiini  
 pujana nú shuar ni warirín achiktaj  
 tusa akaikishti. Jeá wayashti. Tura  
 kampunniunam wekaana nú shuar  
 ni jeen waketkishti. <sup>32</sup>Rauta nuarí  
 túrunamu enentáimpratarum.  
<sup>33</sup>Aya ju nunkanmayan enentáimias  
 "iwiaaku átaj" tana nu ni iwiaakmarín  
 emenkáktatui. Tura ju nunkanam  
 ni iwiaakmarín emenkana nu nekas  
 iwiaakma ana nuna wáinkíáttawai.  
<sup>34</sup>Paant tájarme. Nú káshitin jimiará  
 áishman nuu peaknuman kanúu  
 tepeartatui. Chikichik junaktiatui,  
 chíkíchkia ikiunkittiwai. <sup>35</sup>Jimiará  
 nuwá máí-metek nekée pujuartatui.  
 Chikichik junaktiatui, chíkíchkia  
 ikiunkittiwai. <sup>36</sup>Jimiará áishman  
 kampuniunam wekainiartatui.  
 Chikichik junaktiatui, chíkíchkia  
 ikiunkittiwai." Tu tímiayi.

<sup>37</sup>Nuna antukar "Uunta ¿túi  
 túrunatta?" tiarmiayi.

Tutai ni chichaak "Jaka tepana nuí  
 chuan káutkartatui."

### Shuar yawetsuk Yúsan tuke áujsatniuiti

**18** Shuar yawetsuk Yúsan tuke áu-  
 jsatniua nuna unuiniartaj tusa Je-  
 sus ju métek-taku chichaman tímiayi:

<sup>2</sup>"Chíkích péprunam shuaran  
 akupin amai. Nú áishman Yúsnasha  
 ashamchauyi; shuárnasha péñker

enentáimtichuyi. <sup>3</sup>Tura nú péprunam  
 waje amai. Niisha shuáran akupniun  
 chicharuk "Áishman winia yajauch  
 awajtusmania nu írtusta" tusa tuke  
 waketrú pujuyi. <sup>4</sup>Yámankamtaikkia  
 nin anturkatniun nakitmiái. Tura  
 ukunam enentáimias "Wisha Yúsan  
 ashamachiatnak shuárnasha péñker  
 enentáimtichuitiatnak ju waje tana  
 nuna túrattajai. <sup>5</sup>Warí niisha tuke  
 taa itit awajtatsuk. Tuma asantai nin  
 kajerkaij tusan wárik túrattajai" timiai"  
 tímiayi.

<sup>6</sup>Nuyá uunt Jesus tímiayi "Shuaran  
 akupin yajauchiitiat nuna timiai.  
<sup>7</sup>Tura Yus ti péñker asa, ni achikmarin  
 tsawaisha, káshisha untsuamka  
 nú nankaamas anturkashtatuak.  
 ¿Yáitsuk menkakatuak? <sup>8</sup>Atsá, wárik  
 yáinkiertatui, tájarme. Tura Wi Aents  
 Ajasuitjiana ju atak támatai, ¿shuaran  
 tuke Winia nekas enentáimturainia  
 nuna wáinkiatjash?" tímiayi Jesus.

### Pariséusha, kuítian-juuncha Yúsan áujsarmia nu

<sup>9</sup>"Péñkeraitjai" tu enentáimtumainiak  
 chikichnaka yajauch enentáimtiarmia  
 nuna Jesus nekapmá chichasmiayi. Juna  
 tímiayi:

<sup>10</sup>"Jimiará áishman Yusa Uunt  
 Jeen Yus áujsatai tusar wearmai.  
 Chíkíchkia Pariséuuyi, chíkíchkia  
 kuítian-juuyi. <sup>11</sup>Pariséusha wajaki  
 Yúsan áujuk júnis tímiayi: "Yusrú,  
 chíkích áishman kasa, yajauch,  
 tsanirmau ainia nujai métekcha asan  
 yuminsajme. Tura ju kuítian-juu wajana  
 jújaisha métekchaitjai. <sup>12</sup>Warí, Ame  
 akupkamna nuna iniankasan wisha  
 chikichík semanatinin jimiará tsawant  
 ijarman áujeajai; tura wi achiajna nuna  
 tiásnumia chikichkiniak Yúsnaiti tusan  
 akankan súajai." Tu tímiái.'

<sup>13</sup>"Tura kuítian-juusha arant wajas,  
 nayaimpinmaani pankái ímsatniunke-

sha natsaamak, tsuntsuma, ni netsepen awatí “Yusá, ti tunaitjai. Waitnétrurtá” timiai.’

<sup>14</sup>Wats tájarme, nu kuítian-juu shuar Yus ímmianum ni enentái péñker awajnas ni jeen waketkimiai. Tura Pariséuka tamia núnisan waketkimiai. Nekaatarum. Shuar nankaamantu enentáimtumana nuka pééjchach awajnastatui. Tura antsu pééjchach enentáimtumana nu, nankaamantu awajnastatui” tímiayi Jesus.

### **Uchisha Jesusna áminiaiiti**

*(Mateu 19.13-15; Márkus 10.13-16)*

<sup>15</sup>Jesus antin<sub>u</sub>kiarat tusar uchin itiar<sub>u</sub>armiai. Tura Jesusa unu<sub>u</sub>iniamur<sub>u</sub>jsha nuna wáinkiar suritkiarmiai. <sup>16</sup>Tura Jesus nin untukar tímiayi “Uchi Winí winitin tsan<sub>u</sub>kamkatarum, surimkiarap. Enentáimsatarum. Uchichia áintsan enentáimtumana nú shuárak Yus ni enentáin akupin ajasminiaiiti. <sup>17</sup>Uchi ni úun<sub>u</sub>tr<sub>u</sub>n umira núnisan shuar Yúsán umíachkunka Yus ni enentáin akupin ajaschamniaiiti.” Tu tímiayi Jesus.

### **Kuítrintin áishman Jesusjai áujmatsamiania nu**

*(Mateu 19.16-30; Márkus 10.17-31)*

<sup>18</sup>Shuara uun<sub>u</sub>tr<sub>u</sub>i Jesusan tarí áuj<sub>u</sub>sami-ayi. “Uuntá, amesha péñkeraitme. Tuma asam, turuttia, ¿warinia túrakna tuke iwiaaku átataj?” tímiayi.

<sup>19</sup>Tutai Jesus, “¿Urukamtia Winia, péñkeraitme, túrutam? Aents péñkerka atsawai. Aya Yusak péñkeraiti. <sup>20</sup>Tura Yus akupkamu ana nu péñker nékame. Tsanirmawairap, mankartuawairap, kasamkairap, tsanumprurairap, ame apasha, nukusha shiir enentáimtustarum. Nusha nékame” tímiayi.

<sup>21</sup>Tutai áishman tímiayi “Uuntá, úchichik mash umiki tsakaruitjai.”

<sup>22</sup>Jesus nuna antuk “Chikichik taatramsai, tímiayi. Ame takakmena nu ashí surukam kuítr<sub>u</sub>ncha ainia nu susarta. Nuin<sub>u</sub>kia nayaimpiniam kuítrum átatui. Túram nemartustaj tusam winitia.”

<sup>23</sup>Tura nuna antuk, nu áishman ti kuítrintin asa ti kuntuts enentáimprami-ayi. <sup>24</sup>Tura kúntuts enentáimprantai Jesus nuna nekáa “Kuítrintin ainia nu Yus akupeamunam pachiinkiatin ti iturchataiti, tímiayi. <sup>25</sup>Kamiriuka, uunt ana nu, auja jin wayat<sub>u</sub>n itiurchataiti. Tura shuar kuítr<sub>u</sub>n ti enentáimtana nu Yus akupeamunam pachiinkiatin nú nan<sub>u</sub>kaamas iturchataiti.” Tu tímiayi.

<sup>26</sup>Tura nuna antukarmia nu tiarmiayi “¿Nuin<sub>u</sub>kia yaki uwempramniait?”

<sup>27</sup>Tutai Jesus tímiayi “Aents tujintiaiania nuna Yuska páchitsuk túramniaiiti.”

<sup>28</sup>Nuyá Pítiur Nin chicharuk tímiayi “Uuntá, iikia Ámin nemarsataj tusar ii takakmaaka ikiukji.”

<sup>29-30</sup>Tutai Jesus tímiayi “Shuar Yus akupeana nuna túrataj tusa ni jeen ikiuakka tura núnisan ni apar<sub>u</sub>ncha, nukur<sub>u</sub>ncha, yach<sub>u</sub>nkisha, nuwenkesha, uchir<sub>u</sub>nkisha ikiuakka ju nun<sub>u</sub>kanmasha núkap wáinkiat<sub>u</sub>tawai nu shuar. Tura tuke iwiaaku pujustinniasha wáinkiat<sub>u</sub>tawai.”

### **Ataksha ni jákatniur<sub>u</sub>n Jesus ujakmiania nu**

*(Mateu 20.17-19; Márkus 10.32-34)*

<sup>31</sup>Jesus ni tuse unu<sub>u</sub>iniamur<sub>u</sub>n akanki ikiaan<sub>u</sub>ak juna tímiayi:

“Jerusar<sub>u</sub>nnum jeatemaji. Ju<sub>u</sub>jsha Jerusar<sub>u</sub>nnum Winia, Aents Ajasu tutain, túrunatniur<sub>u</sub>n Yúsán etserin yaunchu áat<sub>u</sub>ruarmia nu uminkiat<sub>u</sub>tawai. <sup>32</sup>Apachnium surutkartatui. Túrawar wishikrur<sub>u</sub>r, katsekruk<sub>u</sub>r usukru-awartatui. <sup>33</sup>Awatiar mantuáwartatui.

Túramaitiatnak menaintiú tsawantai nantaktiatjai” tímiayi.

<sup>34</sup>Tura Nii tímiania nuna nekas túrunattawai, tícharmiayi. Wariniak ta tusar nekaacharmiayi.

### Jirikiúnmaya áishmankan Jesus ímtikmiania nu

(Mateu 20.29-34; Márkus 10.46-52)

<sup>35</sup>Jesus Jirikiú péprunam nuntumsai, nuí áishman jii kusuru, kuítian surusarat tusa jintiá pujumiayi. <sup>36</sup>Untsurí aents nankaamainian antuk “¿warinkit?” tímiayi.

<sup>37</sup>Tutai, “Nasarénnumia Jesus nankaamawai” tiarmiayi.

<sup>38</sup>Kusurusha nuna antuk untsukum “Jesusá, Uunt Kapitán Tawit weeachukaitiam. Tátiniuya núchakaitiam. Winiaja waitnentrutra” tímiayi.

<sup>39</sup>Eemak wearmiania nu chicharainiak “takamatsata” tiarmiayi.

Tutaisha nú arant untsukum “Tawit weeachukaitiam; winiaja waitnentrutra” tímiayi.

<sup>40</sup>Nuinkia Jesus wajas “itiatarum” tímiayi. Tura nii támatai, <sup>41</sup>“¿Warí itiuurukat tusamea wakerutam?” tímiayi.

Tutai kusuru áimiuk “Uuntá, ímtiasan wakerajai” tímiayi.

<sup>42</sup>Tutai Jesus chichaak “Ímtia. Winia nekas enentáimtura asam pénger ajasume” tímiayi.

<sup>43</sup>Nu chichamaik kusuru ímmiayi. Tura Yusa naari uunt awajki Jesusan nemarmiayi. Tura ashí aents nuna wáinkarmia nusha Yusa náarin uunt awajarmiayi.

### Sakú Jesusjai

**19** Nuyá Jirikiú péprunam wayá nuí wekaikini ajamiayi. <sup>2</sup>Nu kuítrintin áishman ni naari Sakú pujumiayi. Nu Sakú kuítian-juu úntriyayi. <sup>3</sup>Aents ti káunkámtai, Sakú ti sítarach

asa, Jesusan ístaj tukamá tujinkiamiayi. <sup>4</sup>Tuma asa Jesus nuke nankaamak-tin asantai, eemki tsékiniki sikiumuru numi wajamunam wakamiayi iistaj tusa. <sup>5</sup>Jesus nuí nankaamak pankáí ímias chicharuk “Sakú wárik akáikitiá. Ame jeemiin yamá kanartiniaitjai” tímiayi.

<sup>6</sup>Tutai Sakúsha wárik akaiki, shiir enentáimias Jesusan itiaamiayi. <sup>7</sup>Ashí aents nuna wáinkiar “Maaj, Jesus tuná áishmanka jeen pujawai” tusa mai tunaim ajarmiayi.

<sup>8</sup>Nuyá Sakú wajaki Jesusan chicharuk “Ístá Uuntá, wi takakjana juna jímiapetek nakakan kuítrinha ainia nuna susartatjai. Tura wáitruan chikichan kasarkaitkiuncha menaintiú patatsan awainkittiajai” tímiayi.

<sup>9</sup>Tutai Jesus tímiayi “Ju áishman Apraáma shuárintiat yamá niisha níiniujai uwempra asa nekas Apraáma shuari ajasuiti. <sup>10</sup>Wisha Aents Ajasu asan menkararu ainia nuna eakan uwentikrartaj tusan táwitjai.” Tu tímiayi.

### Kuítian nekamá chichasmiayi

<sup>11</sup>Nu aents Jesusan anturkarmia nu “Jerusarénnum jeawakrin Nii, Yus anaikiamu asa, wárik akupin ajastatuí” tu enentáimsarmiayi. Tuma asantai wésar Jerusarénnum nuntumsarai, nuna enentáimsarain tusa Jesus juna métek-takun chichasmiayi:

<sup>12</sup>“Áishman penkeri amai. Nu áishmansha jeachat chíkich núnkanam kapitán náamkan tátaj tusa wemai. <sup>13</sup>Tura wétsuk ni takarniurín tias armia nuna untsukarmai. Tura ankant ankant kuit kurijiai nankaamas pénger armia nuna suíniak “Ju kuitjai wi táatsain takamá ajatarum” timiai.”

<sup>14</sup>“Tura ni nunkenia shuarka nakitiar-mai. Túmainiak “nu áishman ii kapitán-tri ajasain tusar nakitajai” nu titiá tusar áishmankan akatrar akuptukarmai.”



<sup>15</sup>Tuma ain kapitián náamak ni nunkén waketki tamai. Taa “winia kuítrumjai warí túrarum” títiaj tusa ni takarniurin kuitia súsarmia nuna untsukarmai.’

<sup>16</sup>Ni takarniuri emka chikichik taa “ame kuítrumjai takakmasan tias patasan achikmajai” timiai.’

<sup>17</sup>Tutai kapitián chichaak “Pénker túrame. Ishichik susamjamna nújaink’ wi tímiajna tímiatrusmek túrame. Tuma asakmin tias péprun akupin awajsattajme” timiai.’

<sup>18</sup>Chíkich taa “Ístá Uuntá, ame kuítrumjai takakmasan senku patasan achikjai” timiai.’

<sup>19</sup>Nunasha chicharuk “Amincha senku péprun akupin awajsattajme” timiai.’

<sup>20</sup>Nuyá chíkich taa “Uuntá, ame kuítrumin paniijai ijjan ikiusmajai.

<sup>21</sup>Amesha kakaram chichau asakmin, ikiuschiatam achin asakmin tura arakmachiatam juu asakmin ashankamjame” timiai.’

<sup>22</sup>Tutai kapitián timiai “Maaj, amesha ti yajauchiitme. Ame támena nuke makurmawai. Wi kakaram chichau aisha, ikiuschiatan achin aisha tura araknasha arakmachiatan juu aisha, <sup>23</sup>nuinkia ¿urukamtia kuit-ikiutainiam ikiuschamam? Nuinkia wi atak táakun patasan achikiaajna” timiai. <sup>24</sup>Tura nui wajarmia nuna chicharuk “Kuítian takakmari juruktiarum; túrarum tias takakna nú shuar susatarum” timiai.’

<sup>25</sup>Tura niisha chichainiak “túrasha Uuntá, tias takakja” tiarmai.’

<sup>26</sup>Tutai kapitián chichaak “Takakna nujai takaakunkia patatnastatui tájarme. Tura takakna nujai takaachkunkia ishichik takakkuisha jurunkittiwai. <sup>27</sup>Tura winia nemasur kapitián ajasin tusar nakitrurarmia nu itiatarum. Tura wisha íimiain máatárum” timiai.’ Tu tímiaiyi Jesus.

## Jerusarénnum Jesus wayamiai

(Mateu 21.1-11; Márkus 11.1-11; Juan 12.12-19)

<sup>28</sup>Nuna tuasua amik Jesus Jerusarénnumaani wémiayi. <sup>29</sup>Petpajái pepu tura Petania péprusha Uriwiu náinnium tjiuchiyi; nui jeastatuk ajatemas ni unuiniamurin jímiaran chicharuk, <sup>30</sup>“Tjiuch péprunam wetarum. Túrarum nui umpuuruch ekemtukchamu jinkiamu wajá wáinkiatarme. Nu atárum itiatarum. <sup>31</sup>Tura “¿urukamtai atárum?” turamainiakuisa, “ii uuntri wakerawai” títiarum” tímiaiyi.

<sup>32</sup>Tutai unuiniamuri wear, Jesus timia ímiatrusan wáinkiarmiayi <sup>33</sup>Tura umpuuruchin atíakui nérentin chichainiak “¿Urukamtai umpuuruchsha atárum?” tiarmiayi.

<sup>34</sup>Tutai unuiniamusha “Ii uuntri wakerawai” tiarmiayi.

<sup>35</sup>Tura umpuuruchin Jesusan itiarmiayi. Túrawar ni pushirin umpuuruchiniam awantkar Jesusan ekenkarmiai. <sup>36</sup>Tura Jesus wétinnium ni pushirin jintianam ayaparar áintrarmiai. <sup>37</sup>Tura Uriwiu naint awankénamunam tjiuch ajasarmatai untsuri aents Jesusan nemariarmia nu warainiak kakantar untsumainiak aents tujintiamun untsuri túran wáinkiaru ásar Yusa náarin uunt awajsarmiai. <sup>38</sup>“Yusa náarin winiana ju*u* ii uunt Akupniuiti. Nincha Yus shiir awajsati. Nayaimpiniam pujuinia nu shiir enentáimsar Yusa náarin uunt awajsati” tiarmiayi.

<sup>39</sup>Tura Pariséu aents nui páchitra pujuarmia nu Jesusan chicharainiak “Uuntá, nemartamainia nu “takamat-sata” tiarta” tiarmiayi.

<sup>40</sup>Tutai Jesus tímiaiyi “Nunkia ju*u* takamatsarmatainkia, kayasha untsumkarainti. Nuna paant tájarme”

tímiayi. <sup>41</sup>Jerusarénnu tjiyuch ajatemas péprun wáiniak útuk júnis tímiayi: <sup>42</sup>“Jerusarénnu shuártiram, ju tsawantinkesha shiir pujustintrum nekaarmeka maak. Túrasa yamaikia nekaatin nankaamasai. <sup>43</sup>Kame ti itiurchat tsawant jeartamtatume. Atumi nemasri nunkejai aa-tanishan tanishmarar téntatramkattarme. Mesetan najatramattarme, tura áatusha junisha mash árenmaktatume. <sup>44</sup>Túrutma nunká ajuumartatume. Tura atumiin pujuinia nuna máawartatui. Tura ashí emesarmatai ishichkisha kaya irumpramusha penké atsuttawai. Wi Yusa anaikiamurin tarijrumna nu nekaachu asakrumin túrutmattarme.” Tu tímiayi.

### **Yusa Uunt Jeen suruktinian Jesus surinkiamiania nu**

(Mateu 21.12-17; Márkus  
11.15-19; Juan 2.13-22)

<sup>45</sup>Nuyá Jesus Yusa Uunt Jeen wayá suruktasa pujuarmia nuna sumaktasa pujuarmia nunasha jiki awemarmiayi.

<sup>46</sup>Túrak juna tímiayi:

“Yús-Papinium yaunchu aarma awai: “Winia jearka Yus áusatin jeaiti” tu áarmaiti. Túrasa átumka kasáa matsam-taiya nútikiarme” tímiayi.

<sup>47</sup>Tuke tsawantin Yusa Uunt Jeen Jesus uwempratin chichaman unuiniak pu-jai Israer-patri úuntriša, Israer-shuara jintinniurisha, tura pepu úuntriša, itiur máamniakit tusar ti enentáimsarmiyai. <sup>48</sup>Túrasa ashí aents émamkes anturainiakui máatniun tujinkiararmiayi.

### **Yusa kakarmarijjai Jesus takasmiania nu**

(Mateu 21.23-27; Márkus 11.27-33)

**20** Yusa Uunt Jeen Jesus uwempratin chichaman unuiniak pu-jai Israer-patri úuntriša, Israer-shuara jintinniurisha, Israer-shuara úuntriša

táarmiayi. <sup>2</sup>Taar Jesusan chicharainiak “¿Yana chichamejai ju túram? ¿Ya ju túratniuncha akuptamkait?” tiarmiayi.

<sup>3</sup>Tutai Jesus tímiayi “Wisha aniaastajrum tusan wakerajrume. <sup>4</sup>¿Ya Juánasha imiakrattia tusa akupkamia? ¿Yusak? ¿Aentsuk? Turuttiarum” tímiayi.

<sup>5</sup>Tútaisha niisha nuamtak warintiajik mai tunai ajararmiayi. ““Yus akupkaiti” tákurniškia, “¿urukamtai enentáimtuscharum?” turamatjai. <sup>6</sup>Túrasa “aents akupkaiti” tákurnisha ashí aents kayajai tukurmar mantamattajai. Warí “Juan Yúsnan etserniuiti” tuániatsuk” tiarmiayi. <sup>7</sup>Nuškia Jesusan áiniak “Iisha nékatsji, Juan imiakratinniasha yátsuk akupkamia” tiarmiayi.

<sup>8</sup>Tutai Jesus tímiayi “Wisha núnisnak winia akuptukua nuna tíchattajrume” tímiayi.

### **Pénker-takachu armia nu**

(Mateu 21.33-44; Márkus 12.1-11)

<sup>9</sup>Nuyá Jesus ju métek-taku chichamjai aentsun jintintiamiayi:

“Áishman ni ajariin uwa araa amuk, shuaran takartusti tusa ikiukmiai. Tura ninkia wau táchataj tusa jeachat wémai.

<sup>10</sup>Tura júuktin tsawant jeamtai juukman akanak jurumkit tusa takarniurin takau shuariin akuptukmai. Tura takarniurincha katsumkar áyatik awainkiarmai.

<sup>11</sup>Nuyá nérentin chikich takarniurin akupkamai; tura nunasha núnisan katsekkar, awatiar, sútsuk akupkarmai. <sup>12</sup>Nuyá ataksha chikichan akupkamai. Tura nunasha takau shuar katsumkar akupkarmai.’

<sup>13</sup>‘Nuyá ukunam ajá nérenniuri “Itiurkatjak, timiai. Winia aneamu uchirun akupkattajai. Nin wáinkiar shiir enentáimtuschartimpiash” timiai.’

<sup>14</sup>‘Túrasa takau shuar nuna wáinkiar, nuamtak chichainiak “Jyuka ajá nérenniuri ajastatui. Maatai. Nuikia

aja iiniu átatui” tiarmai. <sup>15</sup> Nuna tuíniak ajanmaya jiiki máawarmai.’

Nuyá Jesus aniasmiayi ‘Wats ¿wari enentáimsarum, ajá nérenniuri iturkat-tawa? <sup>16</sup> Niisha taa, nu takau shuáran máawartatui. Tura núnkanka chikichan susattawai” tímiayi.

Nuna anturkar “Yus núnaka tsankatkashti” tiarmiayi.

<sup>17</sup> Tura Jesus nin émamkes ísar tímiayi “¿Nuikia Yus-Papinium áarma nu warintua? Ju áarmaiti:

Kayan pénkernak jea jeamin “yajauchi-iti” tusar ajapawarmia nu ashí kaya-jai nánkaamas pénker apujsamuiti. <sup>18</sup> Nu kayan tukumainia nuka kupin-trattawai. Tura nu kaya shuarnum iniarka nu shuaran tsai tsai awajsattawai. Tu áarmaiti.

### Pariséu achiktai tusar wakeriarmiania nu

(Mateu 21.45-46; 22.15-22; Márkus 12.12-17)

<sup>19</sup> Israer-patri uuntri tura Israer-shuara jintinniurisha “nu métek-taku chichamjai in túramji” tu nekaawar nuik<sup>i</sup> Jesusan achiktar emetatai tusar wakeriarmiai. Tura untsurí shuar Jesusan wakeruiniakui, ashamainiak túracharmiai. <sup>20</sup> Tura Kapitíánnium suruktai tusar wakeruiniak mamikmau shuaran Jesusan akuptukarmiayi. Nu shuar pénker shuara núnisan jeariar, Jesus nékatsuk yajauch chichakat tusar, aniaataj tusar wearmiayi. Ni chichakmarijiai uuntnum suruktai tusar túrawarmiayi. <sup>21</sup> Tu enentáimsar tíarmiayi “Uuntá, ame tuke nekas chicham chichaame, nu nékaji. Aents pátatek íyatsme, antsu nekas Yusa jinti jintintia. <sup>22</sup> Wats turuttia, ¿Rúmanmaya uunt akupin ii kuitri akiktin pénkerkai? ¿Akiktinkiait? ¿Suritkiatniukait? Nu nekaatai tusar wakeraji” tiarmiayi.

<sup>23</sup> Tura Jesuska ni yajauch enentáim-samurin nekáa chicharainiak, <sup>24</sup> “Kuit itiatatum. ¿Yana yapi tura yana naari ju áarmait?” tímiayi.

Tutai nii tiarmiayi “uunt akupniunu.”

<sup>25</sup> Tutai Jesus tímiayi “uunt akupniunu átinia nu uunt akupin susatarum. Tura Yusna átinia nu, Yus susatarum.”

<sup>26</sup> Aents ántamunam ni chichakmar-ijiai achiktiniam penké tujinkiarimiayi. Antsu aya ímprimiayi tura takamtak pujusarmiayi.

### Satuséusha achiktai tusar wakeriarmiania nu

(Mateu 22.23-33; Márkus 12.18-27)

<sup>27</sup> Nuyá Satuséu “jakamunmaya penké nantakchamniaiti” tuinia nu, Jesusan aniaatai tusar tariarmiayi. <sup>28</sup> Aniniak tiarmiayi “Uuntá, Muisáis juna áar-tampramiai: “Áishman ni nuarí júreat-sain jakamtainkia ni yachi nu wajen nuátkatí, yachin yajutmatratsa.” Tu áarmaiti, tiarmiayi. <sup>29</sup> Wats, siati yachi áрмаi, tiarmiayi. Iwiairi nuwan nuatak yajutmatsuk jakamai. <sup>30</sup> Ni yachi wajen akintia, nuátak, niisha yajutmatsuk jakamai. <sup>31</sup> Nuna yachisha núnisan nu wajen nuátkamai; tura núnisan ashí siati nuna pataink<sup>i</sup> nuátkarmai. Yajutmatsuk yajutmatsuk kajinkiarmai. <sup>32</sup> Tura ukunam nuwasha jakamai. <sup>33</sup> Nantaktin tsawantai, nantakiarmatai, ¿yana nuarin<sup>i</sup> ati? Ashí siati nuátkacharmaka” tiarmiayi.

<sup>34</sup> Tutai Jesus tímiayi “Ju nunkanman nuatnaikiatin awai. <sup>35</sup> Tura nantakiar atak iwiaaku ámin ainia nuka nuatnaikiachartatui. <sup>36</sup> Warí, jákashtin ániatsuk. Nayaimpinmaya suntara áintsan ajasartatui. Tura nantakiaru ásar Yusa uchiri ajasartatui. <sup>37</sup> Tura jákaru nantakiartin ainia nuna imia Muisáis jintíamiayi. Warí, numichiniam ji wajái keamunan Yus nijijai chichaamun, Yus-Papinium Muisaiska áarmiayi. Nú áarmanum Uunt Yus Apráama, Isaka tura

Jakupu Yúsrinti, tímiayi. Nú áishman yaunchu jákaru ain “ni Yúsrinti” tímiayi. Nuna taku nantaktin awai tu jintíamiayi.<sup>38</sup> Kame jaka menkakatniunam pujuinia nuna Yúsrinchuiti. Tuma asamtai jakáa Yúsrinti tíchamniaiti. Antsu iwiaaku ainia nuna Yúsrinti. Ashi Niiniun iwiaarkainiawai” tímiayi.

<sup>39</sup> Nuna antukar Israer-shuara jintinniuri “pénker tame, Uuntá” tiarmiayi.

<sup>40</sup> Tura nuyánka aniastinian arantukarmiayi.

### ¿Kristu tutai yana uchirimpiait?

(Mateu 22.41-46; Márkus 12.35-37)

<sup>41</sup> Nuyá Jesus tímiayi “Yus anaikiamu Kristu tutaisha, ¿itiura “Aya Tawit weeaiti” tárúm? <sup>42</sup> Warí, Sarmu papinium Tawit nínki juna tátsuk:

“Uunt winia Úuntrun “Akupin pujutainium Winia untsuuruini pujustá, tímiayi. <sup>43</sup> Ame nemasrumin núpeteatsain nui pujustá” tímiayi.” Tú áarmaiti.

<sup>44</sup> Kame Tawitkia, Krístun chicharuk, “winia Úuntur” tajsha, ¿itiurak Kristu tutai Tawitia pampanmarí átink<sup>i</sup>?” Tú tímiayi Jesus.

### Israer-shuaran jintintin ainia nuyá aneartarum

(Mateu 23.1-36; Márkus 12.38-40; Rúkas 11.37-54)

<sup>45</sup> Ashí aents Nin anturkatasa pujuinai ni unuiniamurin Jesus juna tímiayi:

<sup>46</sup> “Israer-shuaran jintintin ainia nuyá aneartarum. Niisha esaram pushin entsarar wekasataitsar wakeruiniawai. Tura jintiá ti shiir áujtusarat tusar wakeruiniawai; tura iruntai jeanam penkeri pujutainium pujustinian wakeruiniawai. Tura nampernumsha uunt pujutainium pujustaj tusa wakeruiniawai. <sup>47</sup> Túrasha wajé jeencha atantainiawai. Túrawar aents nekaracharat tusar ti esaram chichamjai

Yúsan áujainiawai. Nincha chíkichjai nankaamas Yus asutiáwartatui.”

### Waje ni kufrin susamia nu

(Márkus 12.41-44)

**21** Yusa Uunt Jēen kufrintin kuit enketainiam kuítian enkeenan Jesus wáinkiamiayi. <sup>2</sup> Tura waje kufrincha jimiará uchich kuítian, reara áaniun, enkean wáinkiamiayi. <sup>3</sup> Wáiniak tímiayi “Nekas tájarme, ju waje kufrinchaitiat, ashí enkeena nú nankaamas núkap enkeayi. <sup>4</sup> Warí, chikichcha ampirma nuna enkeenawai. Tura niisha aya núchiniak takurmakman ampirmatsuk ashí enkeayi.”

### Yusa Uunt Jēen saanaktinian Jesus ujakmiania nu

(Mateu 24.1-2; Márkus 13.1-2)

<sup>5</sup> Yusa Uunt Jēen kaya shiirmach armia nuna tura chíkich shiirmach susamu armia nunasha chíkich shuar áujmatuk pujuarmiayi. Nuyá Jesus tímiayi:

<sup>6</sup> “Átum yamá shiir wáintrumna nu ashí emesnartatui. Kaya ekenramusha mash yumpuuntrartatui” tímiayi.

### Amuukatin tsawantin uruku átata nu nekaatin

(Mateu 24.3-28; Márkus 13.3-23)

<sup>7</sup> Nuyá Jesusan chicharainiak “Uuntá, nusha ¿urutaik túrunat<sup>i</sup>? ¿Kame ju túrunatin jeatemamtaisha warijain nekaattaj<sup>i</sup>?” tiarmiayi.

<sup>8</sup> Tutai Jesus tímiayi “Aneartarum; anannawairap. Nekaatarum. Winia náarun pachisar, “wi Krístuitjai” tau ti untsurí jíntrartatui. “Nunka amuukatin jeayi” tu etserkartatui. Tuíniakui anturkarum nemariirap. <sup>9</sup> Tura meset chichamsha, kapitián mesetan nájanmasha antukrum sapijmiakairap. Nusha emka túrunatniuiti. Túrasha nú chichamaik amuukatin tsawant jeashtatui.’

<sup>10</sup>Nuyá tuke chicharuk tímiayi ‘Shuar chíkich nunkanmayá shuarjai mesetnum ti nekas maaniawartatui. <sup>11</sup>Ti uurrkattawai; untsurí nunkanam tsukasha, sunkursha ti átatui. Nayaimpinmasha ti ashammai nánkamas túrunattawai. Nujai Yus ni kakarmarin iniakmstatui.’

<sup>12</sup>‘Tura ju túruntsain atumin pataaturmakar achirmakartatui. Iruntai jeanmasha makarmartai tusar juramkiartatui. Sepunmasha enketmattarme. Tura winia naar páchia asakrumin, akupniunmasha, úntnumsha juramkiartatui. <sup>13</sup>Nuinkia atumin túrutmakrumin wi túramu etserkatin arutmattarme. <sup>14-15</sup>Tura atumi nemasri nakitramainiak “wáitiaiti” titinian tujinkiarat tusan, winia nekatairjai chichastinian amasatjarme. Tuma asamtai “Jurakuisha warinia tiniak kíishtumaktaj tusan áetak enentáimsashtatjai” titiarum.’

<sup>16</sup>‘Tura imia atumí aparisha surutmakartatui. Atumí yachisha, atumí shuarisha amikrumsha núnisaran surutmakartatui. Tura máamunka máawartatui. <sup>17</sup>Tura Winia ajasaru asakrumin ashí aents nakitramprartatui. <sup>18</sup>Tura penké ishichkisha yajauch awajtamsachartatui. <sup>19</sup>Katsuntrarmeka iwiaaku átin wáinkiatarme.’

<sup>20</sup>‘Ju pepru Jerusarénka aa tanishriin suntar téntakar matsatu wáinkiumeka, emesratin jeá nekaattarme. <sup>21</sup>Nuikia jui Jutía nunkanam pujuinia nu, nánnium pisartin áiniawai; tura jui Jerusarénnum pujuinia nusha juyanka jiinki wétin ainiawai. Tura ajanam pujuinia nusha, péprunam waketkishtin áiniawai. <sup>22</sup>Nu tsawantincha Yus asutiámun wáinkiaratui. Yús-Papinium nu túrunatin yaunchu aarma nu uminkiatawai nu tsawantin. <sup>23</sup>Nunkanam ti wáitsatin átatui. Tura ju aents ti asutniawartatui. Tuma asamtai nuwá ajamtin ainia nusha,

tura uchi kuírchin takakainia nusha imiá itiurchatan wáinkiaratui. <sup>24</sup>Tura juyá aents mesetnum jákartatui. Tura chikichnaka ashí nunkanam misaawar júkiartatui; tura yajaya apach, Yúsnan enentáimtuiniatsna nu, jui Jerusarénnum wayawar najakartatui. Nu túratniunka Yus tsanatkkana nuin túrawartatui.’

### Aents Ajasu tutai tátintri

(Mateu 24.29-35, 42-44;

Márkus 13.24-37)

<sup>25</sup>‘Nuinkia etsanmasha, nantunmasha, yánmasha Yuska ni kakarmarin iniakmak nusháa túrattawai. Nunkanmasha ashí aents páchim enentáimprartatui. Tura nayaantsanam chíchimi ti aku tantáa ajakui ti ashamkartatui. <sup>26</sup>Tura túrunatin ana nuna enentáimsar mayái ashinkiaratui. Warí, nayaimpiniam kakaram ainia nusha peantrartatui. <sup>27</sup>Nuyá Winia, Aents Ajasu tutain, yuranminiam ti shiir ajasan winiai wáitkiartatui. <sup>28</sup>Nu túrunatin nánkamkui uwempratin jeatemayi tusarum kakaarum shiir enentáimsatarum.’

<sup>29</sup>Tura ju chichamnasha nekapmamiayi. ‘Ikiu numi tura nánkamas numisha enentáimsatarum. <sup>30</sup>Ju nunkanam ni nuké yama punkakmatai “esat jeatemayi” tátsurmek. <sup>31</sup>Núnisan Wi tájana nu wáinkiumeka, Wi ju nunkanam akupin ajastin jeatema nu nekaatarum.’

<sup>32</sup>‘Tura aents yamá pujuinia nu jáatsain nusha ashí túrunattawai. Núnaka paant tájarme. <sup>33</sup>Nayaimpisha nunkasha amuukartatui. Tura winia chichampruka amuukachminiaiti. <sup>34-35</sup>Nu tsawant aya aneachma jeattawai. Ashí aents ju nunkanam pujuinia nu, nuna enentáimtsuk pujuinia jeattawai. Tuma asamtai atumsha anearum wekasatarum.

Yajauchiniam emetnarum, aya yurumátniuk, aya umartiniak enentáimtusurum, ju nunkanam ana nu ti wakerakrumniñkia péñker enentáimsatin tujinkiattarme. Nu atsutí tusarum tura nu tsawant aya áwak-tamkajj tusarum péñker wekasatarum. <sup>36</sup>Anearum wekasatarum. Túrunattana nuj katsuñtrataj tusarum Yus aujsa pujustarum. Túrarum Aents Ajasu tutai fimmiánium péñker átaj tusarum túratarum.”

<sup>37</sup>Tuke tsawant tsawajsha Yusa Uunt Jeeñ Jesus unuiniamiayi. Tura káshikia Uriwiu náinnium we-wémiayi. <sup>38</sup>Tura tuke tsawant Yusa Uunt Jeeñ Jesus chichaamun anturkatai tusar káshik tariarmiayi.

### Jesus achiktin chichaman jurusarmiania nu

(Mateu 26.1-5, 14-16; Márkus 14.1-2, 10-11; Juan 11.45-53)

**22** Wakaprutai enketaachma tanta yuatin námper, paskua tutai, jeatemamiayi. <sup>2</sup>Israer-shuara Pátririjsha Israer-shuara jintinniurijsha áentsun ashamainia ásar, itiurak máawaintiaj<sup>i</sup> tusar ti enentáimsarmiayi.

<sup>3</sup>Nuñkia Iskariúti Jútsan enentáin íwianch wáintiamiayi. Nú Jútsaka Jesusa unuiniamurijin páchitkiauyayi. <sup>4</sup>Israer-patri úuntrin tura Yusa Uunt Jee kapitíán pujuarmia nuna werimiayi. Tura Jesusan tu surukminiaiti tusa niijjai chichasarmiayi. <sup>5</sup>Niisha nuna antukar warasar “kuit amastatji” Jútsan tiarmiayi. <sup>6</sup>Niisha “ayu” tinia, aents nékachmanum suruktaj tu enentáimsamiayi.

### Kristu jakamu enentáimtustin námper

(Mateu 26.17-29; Márkus 14.12-25; Juan 13.21-30; 1 Kurintianam 11.23-26)

<sup>7</sup>Wats, wakaprutai enketaachma tanta yúatin námper jeamiayi. Paskua tutainium murikchin máatin ármiai. <sup>8</sup>Tura Jesus Pitruncha, Juánnasha akupeak “Paskua tutai námper iwiaratarum” tímiayi.

<sup>9</sup>Tutai niisha chichainiak “¿Tui iwiarat tusamea wakeram?” tiarmiayi.

<sup>10</sup>Tutai Jesus juna tímiayi “Péprunam wetarum. Jearum áishman yumin takaku wekáa wáinkiattarme. Nú áishman nemarsatarum. Tura jeá wayaakui, <sup>11</sup>nú jea nérenniuri chichareakrum “Uunt chichartamuk unuiniamurjai paskua yurumátin ¿tui aa? turamui” titiarum, tímiayi. <sup>12</sup>Tákurmin nu nérentin yakí písunam uunt kuártun ashí iwiaramun iniakturmastatrum. Nui ii yurumátin iwiaratarum” tímiayi.

<sup>13</sup>Tutai niisha wear Jesus tímiania tímiatrusan wáinkiarimiayi. Tura paskua namperan nu iwiararmiayi.

<sup>14</sup>Yurumátin jeamtai ni unuiniamurijjai Jesus misanam pujusarmiayi. <sup>15</sup>Pujusarmatai, Jesus chichaak “Wisha játsuk atumjai ju paskua najanatniun ti wakerimjai, <sup>16</sup>atakka ju nunkanam atumjai najanashtin asan. Tura antsu Yus akupeana nu jear atak najanattaji” tímiayi.

<sup>17</sup>Nuyá pininjian achik, Yúsan yuminkias, ni unuiniamurjin tímiayi “Ju pinin achikrum sunaisatarum. <sup>18</sup>Atakka ju nunkanam uwa yumirin atumjai umarchattajai, tajarme. Tura antsu Yus akupin ajastin jeamtai atak iijjai umar-tatji” tímiayi.

<sup>19</sup>Nuyasha yurumkan achik, Yúsan yuminkias puuk susarmiayi. Tura chicharainiak “Juka winia

ayashruti. Winia ayashur atum pénker pujustinnium surunkattana núiti. Winia enentáimtursarum yuatarum” tímiayi.

<sup>20</sup>Tura yurumsua amikiarmatai piniñkian achik, “Ju piniñ winia numparun nakumea asa uwempratin yamaram chicham najanamun nakumeawai. Winia numpar atumnian puartamprattawai’ tímiayi.

<sup>21</sup>“Túrasha winia surutkattana nu Wijjaj métek ju misanam pujawai. <sup>22</sup>Kame Wi, Aents Ajasuitijana ju, Yus iwiamua nútíksanak jakattajai. Túrasha Winia surutkana nu nekaatí. Ti asutniattawai” tímiayi. <sup>23</sup>Nuna antukar “Wíashitiaj, yákit” tunaim ajarmiayi.

### **Nañkaamantu ana nu**

<sup>24</sup>“¿Iijjaj yaki imiá nañkaamantu aint?” tunaim ajarmiayi. <sup>25</sup>Tura Jesus tímiayi “Ju nunkanam akupin ainia nu, waantu enentáimtumasar akupenawai. Tura akupenakuí “pénker túrin áiniawai” tuñiawai. <sup>26</sup>Tura atumjainkia nuka atsutí. Antsu nañkaamantu ana nu, uchichia núnik ajastiniaiti; akupeana nusha takarniua núnik ajastiniaiti. <sup>27</sup>Enentáimsatarum. Misanam pujus yurumna nu, yurumkan ajamana nujaj ¿tuá imiá nekas nañkaamantuit? ¿Yurumna nu nekas nañkaamantuchukait? Tura Wisha atumin yurumkan ajamna núnisnak pujajai.’

<sup>28</sup>“Winia itiurchatrun wáinmiaj nuj atumsha Wijjaj tuke pujumarme. <sup>29</sup>Tuma asakrumin akupin ajastinian winia Apar surusu asamtai Wisha nútíksanak akupkatniun súajrume. Wi akupkatjana nuj atumsha Wijjaj yurumáttarme, tura Wijjaj umartatrume, tájarme. <sup>30</sup>Tura akupin pujutainium pujusrum, Israer-shuar

tuse írutkamu akupkattarme tajai.” Tu tímiayi.

### **Pítur “atsá nékatsjai” tíinian Jesus ujakmiania nu**

(Mateu 26.31-35; Márkus  
14.27-31; Juan 13.36-38)

<sup>31</sup>Nuyá Uunt Jesus tímiayi, “Nekaatá, Semunká. Trikiu neré tsatsamátniua áintsan Satanás atumi enentáin páchim enentáimtikramprataj tusa seayi. <sup>32</sup>Tuma ain Yus enentáimtustinian kajinmatkiin tusan Wisha Yúsan seamjai. Tura Yúsnum waketkim ame yatsum ikiakárarta” tímiayi.

<sup>33</sup>Tutai Semun tímiayi “Uuntá, sepunam enketmainiakuisha wisha nemarsatajme. Tura mantamainiakuisha métek jakatjai” tímiayi.

<sup>34</sup>Tutai Jesus tímiayi “Pitrú, nekas tájame, yamaik atash shiniatsain ame menaintiú natsantrurtatme” tímiayi.

### **Itiurchat winiawai**

<sup>35</sup>Nuyá Jesus tímiayi “Wisha yurumkajainchu, kuítjainchu, sapatjainchu akupkamjarmena nu ¿táatramsamkarum?”

Niisha “Atsá penké táatramsachmaji” tiarmiayi.

<sup>36</sup>Tutai Nii tímiayi “Antsu yamaikia yurumkan takakkunka takustí, kuítniasha núnisan; tura puniancha takakchakka ni pushirín suruk punian sumakti. <sup>37</sup>Nekaatarum. Yus-Papinium yaunchu aarma ana nu wi túrunamujaj uminkiattawai. Juiti aarma: Yajauch shuarnum pachikiarmiayi. Warí, Yus-Papinium ashí Winia aarma ana nu uminkiatniuiti.”

<sup>38</sup>Tutai ni unuiniamurí tiarmiayi “Uuntá, juí jimiara puniá awai.”

Tutai Niisha “Asati” tímiayi.

### Jitsemaní ajanam Jesus Yúsan áujksamiania nu

(Mateu 26.36-46; Márkus 14.32-42)

<sup>39</sup> Nuyá Jesus jíinkimiayi. Tura tuke túrin asa Uriwiu náinnium wémiayi. Ni unuiniamurijsa nemariarmiayi.

<sup>40</sup> Ai jeá nin chicharuk “Itiurchat winiakui iniarajj tusarum Yus áujssatarum” tímiayi. <sup>41</sup> Tuasua amik arantach, kaya nankimiam jeana núnik Jesus wémiayi. Tura Yúsan áujssataj tusa tikishmarmiyayi. <sup>42</sup> Tikishmar juna tímiayi “Apawá, pininnum yapá umartinia ántsañ Wi wáitsattajna nu wakerakmeke jurutkitia. Tura Wi wakerajna nucha antsu Ame wakeramna nu atí, tajai” tímiayi.

<sup>43</sup> Nuyá, ikiakártaj tusa Yusa suntari nayaimpinmaya tarimiayi. <sup>44</sup> Tura Jesus imiá wáitias pujak nú kakaram Yúsan áujssamiayi. Tura ni searmarijsa numpá ántsañ nunká kitiawarmiayi.

<sup>45</sup> Yúsan aujsua amik wajaki ni unuiniamuriñ werimiayi. Tura kúntuts enentáimmiarijjijai ti pimpiki kanúu tepenan tarimiayi. <sup>46</sup> Nuiñkia chicharainiak “¿Urukamtai kanúu teparum? Itiurchat winiakui iniarajj tusarum nantakrum Yus áujssatarum” tímiayi.

### Jesusan achikiarmiania nu

(Mateu 26.47-56; Márkus 14.43-50; Juan 18.2-11)

<sup>47</sup> Jesus tuke chichaa pujai, untsurí shuar táarmiayi. Tura nuní eemka Jesusa unuiniamuri Jútas naartin winimiayi. Tura Jesusan mukunatajtsa tarunmiayi. <sup>48</sup> Támatái Jesus chicharuk “Jútasá, ¿Aents Ajasu tutai mukunamek surutkat-tam?” tímiayi.

<sup>49</sup> Jesusjai pujuarmia nu, túmamun wáinkiar “¿Uunt puniajai fjuiartatjik?” tiarmiayi. <sup>50</sup> Tura chikichik Patri uuntri takarniurí kuishin untsuuriñ tsupirkamiayi.

<sup>51</sup> Tura Jesus tímiayi “Iniaisatarum.” Nuna tinia ni kuishin antiñ tsuármiayi. <sup>52</sup> Nuyá Israer-patri úuntrin, Yus-jea úuntrincha, tura pepru úuntrincha, Nin achiktaj tusa tariarmia nuna chicharuk “¿Wisha kasakaitiaj. Urukamtai puniajaijsa numijiajsa tarutniuram? <sup>53</sup> Nuik Yusa Uunt Jeen tuke tsawant atumjai pujumaj nuí achirkacharmie. Túrasa átum kiritniumiaj kakarmajai nupetkatin yamá tsawantin tsankatkamuitrume” tímiayi Jesus.

### Pítiur “Jesusnaka nékatsjai” tímiania nu

(Mateu 26.57-58, 69-75; Márkus 14.53-54, 66-72; Juan 18.12-18, 25-27)

<sup>54</sup> Nuiñkia Jesusan achikiar emetawar Israer-patri uuntri jeen júkiarmiayi. Tura Pítrusha íkian nemarki wémiayi. <sup>55</sup> Tura aach jinia ikiapáarmiayi. Túrawar anamuk pujuarmiayi. Pítrusha nijijai pujusmiayi. <sup>56</sup> Tura nuwá, Patri takarniurí amia nu, Pítiur jinia anamuk pujan wáiniak “Ju áishmansha Nijijai pujumiayi” tímiayi.

<sup>57</sup> Tutai Pítiur chichaak “Nuwá, Nin nékatsjai” tímiayi.

<sup>58</sup> Tura árusañ chíkich nin wáiniak “Amesha Niin páchitkaiatme” tímiayi.

Tutai Pítiur tímiayi “Atsá. Wikia áinkia páchitkiatsjai” tímiayi.

<sup>59</sup> Chikichik ura nankaasmatai chíkich apach chichaak “Nekas ju áishmansha Nijijai pujumiayi. Warí, niisha Kariréanmayanchakait” tímiayi.

<sup>60</sup> Tutai Pítiur chichaak “Ame támena núnaka nékatsjai” tímiayi. Nú chichamaik Pítiur chicháa pujaink<sup>i</sup> atash shiniukmiayi. <sup>61</sup> Tura nuiñkia Uunt Jesus Pítrun apajas íismiayi. Túra “atash shiniatsain ame menaintiu natsantrur-tatme” Uunt Jesus timia nuna enentáimpramiayi. <sup>62</sup> Nuyá Pítiur jiinki ti útumiayi.



### Jesusan wishikrarmiayi

(Mateu 26.67-68; Márkus 14.65)

<sup>63</sup> Áishman Jesusan wáiniarmiania nu ti wishikiainiak awattiararmiayi. <sup>64</sup> Jiin epetkar yapiniam awattiar chicharainiak “Nekamata, ya awatama” tiarmiayi. <sup>65</sup> Tura katsekainiak ti untsurí chikich-nasha nan̄kamas tiarmiayi.

### Uunt Iruntainiam Jesusan ejeniarmiania nu

(Mateu 26.59-66; Márkus 14.55-64; Juan̄ 18.19-24)

<sup>66</sup> Tsawarmatai, Israer-shuara úuntrisha, Israer-patri úuntrisha, Israer-shuara jintinniurisha iruntrar ni iruntairiin ejeniarmiayi. Nui chicharainiak <sup>67</sup> “Paant titiá. ¿Yus anaikiamu Kristu tutaia núkaitiam?” tiarmiayi.

Tutai Jesus tímiayi “Wi “ee” tákuisha, “nekasaiti” tíchattarme. <sup>68</sup> Tura Wi aníamsha áirkashtatrome, túrasha akuptukchattarme. <sup>69</sup> Tura wárik Wisha Aents Ajasuitjiana nu, ashí nan̄kaamaku ajasan, Yusa untsuurin̄i pujustajai” tímiayi.

<sup>70</sup> Tutai niisha tiarmiayi “¿Nuin̄kia amesha Yusa Uchirin̄kaitiam?”

Tutai Jesus tímiayi “Ee, Wíitjai, átum Winia túrutrum núnisnak.”

<sup>71</sup> Tutai niisha tiarmiayi “Warí, ¿iisha chíkich ujatkat tusar atsumajik? Imia nin̄ki chichaamu antukchajik” tiarmiayi.

### Piratuí Jesusan júkiarmiania nu

(Mateu 27.1-2, 11-14; Márkus 15.1-5; Juan̄ 18.28-38)

**23** Nuyá ashí Uunt iruntrarmia nu wajatkiar Rúmanmaya akupin Piratuí Jesusan júkiarmiayi. <sup>2</sup> Nui jeawar, Piratun chicharainiak “Ju áishman íi shuaran awajimtkiar enentáimtkiainia

nu nekaamji. Rúmanmaya uunt akupin Sésaran kuit akiktinian suritramaji. Tura nu arant Nin̄ki, akupin Kristu tutaintjai, tawai” tiarmiayi.

<sup>3</sup> Tutai Piratu Jesusan chicharuk “¿Ame Israer-shuara akupniurinkáitiam?” tímiayi.

Tutai Jesus tímiayi “Ee, núitjai, ame támena núnisnak.”

<sup>4</sup> Nuyá Israer-patri úuntrincha tura aents nui iruntrarmia nunasha Piratu chicharainiak “Ju áishman tunaan túran penké wáinkichuitjai, tajai” tímiayi.

<sup>5</sup> Túrasha niisha nú kakantar chicharainiak “Antsu nekas ashí Jutía nunkanmaya aentsun ni unuiniana nujai akajenawai. Kariréa nunkanmaya nan̄kaamas ímiajaisha tayi” tímiayi.

<sup>6</sup> Piratusha nuna antuk “Nu áishman ¿Kariréanmayankáit?” tímiayi.

<sup>7</sup> “Ee” tuiniakui, Erutisan akuptukarmiayi. Erutiska Kariréanmaya aentsun akupniuyayi. Túmaitiat nu tsawantin Jerusarénnum ishichik tsawant pujusmiayi.

<sup>8</sup> Erutiska Jesusan ístaj tusa ti wakerimiayi. Jesusa túramurin̄ áujmatman ti antukmiayi. Tuma asa, “Wi ímiai aents tujintiamun túrashtimpiash” tusa Jesusan wáiniak warasmiayi. <sup>9</sup> Jesusan ti nukap aniasmiayi; túramsha penké áimkiachmiayi. <sup>10</sup> Nui sha Israer-patri úuntrisha, tura Israer-shuara jintinniurisha yajauchiiti tusar charaatum awajiararmiayi. <sup>11</sup> Tura Erutissha ni suntarijiaí Jesusan yajauch enentáimtuiniak Nin wishikiainiak ti penker pushin, akupniu entsatairiya ánniun, áentsrarmiayi. Nuyasha Erutis ataksha Piratuín̄ akupkamiayi. <sup>12</sup> Túram nu tsawant Piratu Erutisjai nawamnaikiarmiayi. Kame yáunchuka nemasnaikiau ármiayi.

**Jesusan “mantamnati” tiarmiania nu**

(Mateu 27.15-26; Márkus  
15.6-15; Juan 18.39–19.16)

<sup>13</sup>Nuyá Israer-patri úuntriñ aentsu úuntrijjai tura penké aentsjai Piratu ikiaanak tímiayi <sup>14</sup>“Ju áishman aentsu awajimtikuii tusarum itiartintrume. Túrasha átum fimprumniñ anintrusan yajauch átum tárumna nuna penké nekarachjai. <sup>15</sup>Erutissha núnisan yajauchin nekaachai. Warí, juí awainkichmaka. Nuikia páantchakait jú aishman jakamnia tunaanka túrichuiti” tímiayi.

<sup>16–17</sup>Túraitiat tuke túrutai asamtai, jísat jeakui sepunmaya chikichík áishman kan Piratu ankant akupkatin ámiayi. Tuma asamtai, nii chichaak “juna asutián awematjai” tímiayi.

<sup>18</sup>Tura aencha iruntrar ti unsumainiak “Atsá; jucha. Ju nakitiaji. Antsu Parapás akupkata” tiarmiayi. <sup>19</sup>Nu Parapássha akupniun nakitiat mesetan najana asa tura mankartin asa sepunam enkeamuyayi.

<sup>20</sup>Piratuka Jesusan akupkattsa wakerak ataksha aentsun áusarmiyai. <sup>21</sup>Túrasha nú arant unsumainiak “Atsá. Krúsnum mantamnati” tiarmiayi.

<sup>22</sup>Tura ataksha Piratu chicharainiak “¿Urukantai. Warí tunaan túrait? Jakamnia tunaan túrachias tusan, aniasan penké nekarachjai. Asutián akupkatjai” tímiayi.

<sup>23</sup>Tura niisha kakaram unsumainiak “Jesus mantamnati” tiarmiayi. Kame aencha tura Patri úuntriñsha ti unsumaina ásarmatai ni wakeramuri tsankatnakarmiyai. <sup>24</sup>Nii wakeriarmia nuna Piratu “túratatai” tímiayi. <sup>25</sup>Tuma asa Parapásan, mesetan najanin tura mankartin amia nuna akupkamiayi. Tura Jesusnaka ni wakeramun túrawarti tusa íktusarmiyai.

**Jesusan krúsnum  
ajintrurarmiania nu**

(Mateu 27.32-44; Márkus  
15.21-32; Juan 19.17-27)

<sup>26</sup>Jesusan jukitiasa pujuiniaí Serini nunkanmaya Semun ni pépruriya Jerusarénnum yama jeamiayi. Nin achikiar, Jesusa krusi ayantkar “ni ukuri wetá” tiarmiayi.

<sup>27</sup>Untsurí aents Jesusan nemariarmiayi. Tura untsurí nuwasha ti kuntuts enentáimiainiak útkiar tura wa-wa ajakiar wearmiayi. <sup>28</sup>Túmainiakui Jesus nin iis, “Jerusarénnumia nuwatiram Winia enentáimtusarum úuttiirap. Antsu atumniak tura atumi uchiri enentáimtusarum úuttiarum.

<sup>29</sup>Warí, ti iturchat tsawant jeawartatui. Tuma asamtai “Uchirtichu ainia nu, ajaprukchana nu tura amuntsachu ainia nu, chíkich aentsjai nankaamas penker pujuiniawai” tiartatui. <sup>30</sup>Nu tsawantai aents chicharainiak “Náint in nekentmak yuturmaartai” tiartatui.

<sup>31</sup>Warí, numi sameka áinis yajauch aya nánkamna ainsa ju itiurchat átsuk. Tura numi kukaru ainiamtai ituirak nú yajauch túrunachat.” Tu timiayi Jesus.

<sup>32</sup>Tura Jesusjai krúsnum maatai tusar jímiar yajauch áishman kan júkiarmiayi.

<sup>33</sup>Karawír nain tutainium jeawar Jesusan krúsnum ajintrurarmiyai. Tura Jesusa untsurini chikichík yajauch áishman kan tura ni menariní chíkich yajauch áishman kan núnisan krúsnum ajintrurarmiyai.

<sup>34</sup>Tura Jesus krúsnum ajintraku pujuiram, chichaak “Apawá, tsankurarta. Nii áitkiainia nuna nékainiatsui” tímiayi.

Tura suntar pujuarmiania nu, yaki Jesusa pushiri jukit tusar nakurusarmiyai. <sup>35</sup>Péprunmaya aents ii wajatiarmiayi. Tura uunt armia nusha Nin wishikiainiak “Chikichnaka uwentikniuiti. Wats, yamá nekas Yusa

anaikiamurj Kristu tútainkiunka imia Niŋki uwémprati” tiarmiayi.

<sup>36</sup>Suntarsha Nin wishikrarmiayi. Tariar churuńian aartai tusar awajarmiayi. <sup>37</sup>Tura chicharainiak “Amesha nekas Israer-shuara uunt akupniurinkiumka amek uwemprata” tiarmiayi. <sup>38</sup>Tura muuknumaani, Kriaku chichamjai, Rúmanmaya apach chichamjajsha tura Israer chichamjajsha ju árar anujkamu ámiayi: *JÚITI ISRAER-SHUARA UUNT AKUPIN*

<sup>39</sup>Chikichík yajauch áishman nuj ajin-truamu amia nu kátsekeak chicharuk “Amesha nekas Yusa anaikiamurjntkiumka amek uwemprata tura incha uwentikramprata” tímiayi. <sup>40</sup>Tura chíkich ni tsaniakmarin kakantar chicharuk “¿Amesha Nijjiaí métek asutniátasa pujayatam, Yus ashamatsmek? tímiayi. <sup>41</sup>Iikia yajauch asar wáitsatniuitji; ii tunaari akikmakur wáitaiji. Antsu ju áishmanka yajauchin túrichuiti” tímiayi.

<sup>42</sup>Nuyá Jesusan chicharuk “Amesha akupin ajasam winiasha enentáimtur-sata” tímiayi.

<sup>43</sup>Tutai Jesus chicharuk “Nekas tájame, jakar shiir pujutainium yamá tsawant Wijjiaí pujustatme” tímiayi.

### Jesusa jakamuri

(*Mateu 27.45-56; Márkus 15.33-41; Juan 19.28-30*)

<sup>44</sup>Tutupin ají ashí nunkanam ti kirit ajasmiayi. Tura menaintiú ura nankaamasu ain, nantu nunkaach ajassha tuke kirit ámiayi. <sup>45</sup>Tsawái nantusha mushatmarmiayi. Tura Jerusarénum Yusa Uunt Jeencha tarach ajamu aa jímiapetek nakaakamiayi. <sup>46</sup>Nuyá Jesus untsujuk “Apawá, winia wakantrun Amiin ikiuajai” tímiayi. Nuna tinia jakamiayi.

<sup>47</sup>Suntara kapitiantri nu túrunamun wáiniak, Yusa náarin shiir awajeak

“Jusha imiá nekas péñker áishmankuyi” tímiayi.

<sup>48</sup>Tura untsurj aents pujuarmia nu, nu túrunamun wáinkiar ti kuntuts enentáimiainiak ni netsepen paat awatiar wakеткиarmiayi. <sup>49</sup>Tura Jesusa amikriřha tura nuwa Kariréanmaya Nin nemariarmia nusha íkian wajasar ii wajarmiayi.

### Jesusan iwiarsarmiania nu

(*Mateu 27.57-61; Márkus 15.42-47; Juan 19.38-42*)

<sup>50</sup>Naka enentáimin péñker áishman ámiayi ni naari Jusé. Arimatéa pepru Jutía nunkanam ana nuyayuyayi. Israer-shuara Uunt Iruntairin páchitkiauyayi.

<sup>51</sup>Yus ju nunkanam akupin ajasat tusa Jusé nakas pujumiayi. Tuma asa Uunt Iruntainium Jesusan túrawarmia nuna nakitmiayi. <sup>52</sup>Tuma asamtai Piratuj we Jesusa ayashin seamiayi. <sup>53</sup>Piratu “ayu” takui, Jesusa ayashin krúsnumia jusa tarachjai penuar kaya táurmanum iwiarsamiayi. Nu táurmanum chíkich iwiarsachmauyayi. <sup>54</sup>Iwiaratin tsawantaj, ayampratin tsawant tsawatatuk ajasmatai túrunamiayi.

<sup>55</sup>Tura nuwa Kariréanmaya jukiniutak Jesusan nemarsarmia nusha iwiarsamunam weriar, Jesusa ayashí itiur ikiusmait nuna iisarmiayi. <sup>56</sup>Iisar ikiuak ni jeen wakеткиarmiayi. Tura Jesusa ayashí mejeenin tusar kunkuinian iwiararmiayi. Tura ayampratin tsawantaj, Israer-shuar akupkamun umikiar ayamprarmiayi.

### Jesus nantakmiania nu

(*Mateu 28.1-10; Márkus 16.1-8; Juan 20.1-10*)

**24** Tumińtin káshik kunkuinian iwiamun júkiar nu nuwa Jesus iwiarsamunam weriararmiayi. Tura chíkich nuwasha atampriarmiayi. <sup>2</sup>Tura iwiarsamu kaya atutkamu urani

aan wáinkiarmai. <sup>3</sup>Tura wayawar uunt Jesusa ayashin wáinkiacharmai. <sup>4</sup>Wáinkiachu ásar ashamkarmiai. Tura “ítiurkatjik” tiarmiayi. Tumaí jimiara áishman kan pushin wincharpatniun entsaru nin ayamach wajainian wáinkiarmai. <sup>5</sup>Nuna wáinkiar ti sapijmiainiak tsunsumawarmiai. Tímakui nu áishman chicharainiak “¿Iwiaakusha urukamtaí jakaanumsha e<sub>ar</sub>um? tiarmiayi. <sup>6</sup>Juí pujatsui. Antsu nantakni. Nékatsumek. Niisha Kariréanam tuke pujus <sup>7</sup>“Wi, Aents Ajasuitjiana nu, yajauch aentsnum surunkattajai. Túran krúsnum mantamnattajai. Tura menaintiú tsawantai nantaktiatjai” turamchamkarum” tímiayi.

<sup>8</sup>Nuna takui Jesus timian enentáimprarmiai. <sup>9</sup>Tura iwiarsamunmaya waketki taar, Jesusa unuiniamurin auntse armia nuna tura chikichnasha ashí nu túrunamun ujakarmiai. <sup>10</sup>Jesusa unuiniamurin ujakarmia nu ju áiniawai: Maktaranmaya Marí, Juánasha, Jakupu nukurí Marisha, tura chíkich nuwajai. <sup>11</sup>Tura Jesusa unuiniamurisha nuwa tuñiakui sha nekasaiti tu enentáimtsuk “wáuruk tuñiawai” tiarmiayi.

<sup>12</sup>Túrasha Pítrusha jiinki Jesus iwiarsamunam tsékenki werimiayi. Jeá, init iis, aya tárachik tepenan wáinkiamiayi. Tura túrunamia nuna ti enentáimiar ni jeen waketkimiai.

**Emaús wetai jántianmaani  
túrunamia nu**

(Márkus 16.12-13)

<sup>13</sup>Nu tsawantai k Jesusa nemarniuri jímia Emaús péprunam wéarmiayi. Emaúska Jerusarénumia auntse kirumitru jeá pujawai. <sup>14</sup>Túrunamia nuna chichaki wearmai. <sup>15</sup>“Ítiurkit” tu aujmatki weenai imia Jesus taa nuí páchiniak niijiai wearmai. <sup>16</sup>Tura

wáinkariat nekaashtin asamtaí yait nekaacharmiai.

<sup>17</sup>We-wénakua Jesus chicharainiak “Jintiasha ¿warí áujmatkirum wéarum? ¿Urukamtaí kúntuts enentáimprum?” tímiayi.

<sup>18</sup>Chikichik, Kreupas náartin chicharuk “Jerusarénum túruna nuna ashí nékainiawai. ¿Ámeke amekék túrunamia nu nékachu páchitkiam?” tímiayi.

<sup>19</sup>Tutai Jesus tímiayi “¿Warí urukait?”

Tutai tiarmiayi “Entá, Nasarénumia Jesusa túrunamurí taji. Niisha Yúsnan etserin asa Yusa kakarmarijiai chichasmiai tura nuna kakarmarijiai takasmiai. Núnaka ashí aents nékainiawai. <sup>20</sup>Tura ii Pátriri uuntri tura ii pépruri uuntri “tunáa jakamnia túrayi” tusar “krúsnum mantamnati” tiarmiayi. <sup>21</sup>Tura ii Israer-aentstin uwemtikrampratin tu enentáimсамji. Tura ni maa-musha menaintiú tsawant nankaamasai. <sup>22-23</sup>Túrasha ii nuwa ni iwiarsamunam yamaí káshik weriar ni ayashin wáinkiacharmai. Tura “Yusa suntari wáinkiaji tura “Jesus iwiaakui” túramji” tiarmai. Nuna tu ujatmakakrin ti enentáimpraji. <sup>24</sup>Nuyá íi shuar iwiarsamun weriar, nuwa tiarmia tímiatrusan wáinkiarmai. Tura Jesusnaka wáinkiacharmai.” Tu ujakarmai Jesusan.

<sup>25</sup>Nuyá Jesus nin chicharainiak “Enentáimchaitrume. Ashí Yúsnan etserin tiarmia nu wau enentáimtsurume. <sup>26</sup>¿Yusa anaikiamuri, Kristu tutai, shiir awajnatsum ti wáitsashtinkiait?” tímiayi.

<sup>27</sup>Tura nuyá Yus-Papinium Muisáis aarmia nuyá jukin ashí Yúsnan etserin ni túrunatniurin áararmia nuna jintinti-atasa nan kamamiayi.

<sup>28</sup>Ayu, nii wearmia nú peprunam jeawarmiai. Tura Jesuska nuí nan kaamaki wétaj tau ajamiayi. <sup>29</sup>Tura ni-

isha chicharainiak “Weep. Iijiai pujustá. Warí, nantu akaikiyi, kirit ajatemsai” tiarmiayi.

Tutai Jesus niijiai pujustaj tusa wayamiayi. <sup>30</sup>Tura niijiai irunar misanam pujus, yurumkan achik, Yúsán yuminkias nincha puuk súarmiayi. <sup>31</sup>Nu chichamaik, ni jii uranniua núnikiarматаi Jesusan nekaawarmiayi. Tura Niisha nú chichamaik menkakamiayi. <sup>32</sup>Tura nu shuarsha mai tunai ajainiak “Jintia winis Niisha Yus-Papin jintinramuk nekas ii enentáin shiir enentáintikramprachmakaj” tiarmiayi.

<sup>33</sup>Nuyá, Emaúsnumia wárik jfinkiar Jerusarénum waketkiarmiayi. Nui Jesusa unuiniamurin auntse armia nuna tura chikich shuar Jesusan nemariarmia nunasha iruntrar pujuinian wáinkiar-miayi. <sup>34</sup>Auntse armia nusha tiarmiayi “Uunt Jesus nekas nantakni. Semun Nin wáinkiaiti.”

<sup>35</sup>Tutai niisha jintiá túrunamun ujakarmiayi. “Jesus yurumkan ajaamakui nui nekaamji” tiarmiayi.

### **Ni unuiniamurin Jesus wantintiu kmiania nu**

*(Mateu 28.16-20; Márkus 16.14-18; Juan 20.19-23)*

<sup>36</sup>Nuna áujmatuk pujuiniaí Jesus aya aneachma ajapén wajas “Shiir enentáim-satarum” tímiayi.

<sup>37</sup>Nuna antukar, ti sapijmiakar, wakanchashit, enentáimsarmiayi. <sup>38</sup>Tura Jesus chicharainiak “¿Urukam-tai sapijmiakrum wakanchashit, tu enentáimsarum? <sup>39</sup>Winia uwejrusha, nawersha írtustarum. Wíkiitjai. Takarsa írsatarum. Warí, wakancha ayashtinkiait, ukunchtinkiait” tímiayi.

<sup>40</sup>Nuna tinia ni uwejencha nawencha iniaktusarmiayi. <sup>41</sup>Warainiyat sapijmiainia ásar, Niimpiashit tu enentáimtusarmiayi. Tuma asamtai, nin

chicharainiak “¿yurumak takakrumek?” tímiayi. <sup>42</sup>Takui, namaknasha, míshkincha súarmiayi. <sup>43</sup>Tura Jesus nuna achik niisha ímiainiamunman yuamiayi. <sup>44</sup>Tura nin tiarmiayi “Winia túrutawarma nuna, Wi atumjai nuik pujusan tímiajrum. Nekas uminkiatniuyayi. Iis, wi túrunatniurun Muisáis aarmia nusha, Yúsán etserin aarmia nusha, tura Sarmu papinium aarma ana nusha ashí uminkiatniuyayi” tímiayi.

<sup>45</sup>Nuyá Yus-Papinium aarman jintintiwarmiayi. <sup>46</sup>Jintintiu k juna tímiayi: “Yusa anaikiamurí Kristu tutai jaka menaintiú tsawantai jakamunmaya nantaktinia nu yáunchuk áarmauyayi. Tura Wi nú Kristuchukaitai. <sup>47</sup>Winia náarun pachisar, Jerusarénumia nan kama ashí nun kanam nu chicham etsernaktinia nu áarmauyayi. Shuar ni tunaari tsankurnarat tusar enentáin yapajátniuiti. Tura tu etserkatnia nusha yaunchu áarmauyayi. <sup>48</sup>Tura wi túrunamu neka asarum etserkatniuitrume, tímiayi. <sup>49</sup>Tura winia Apar, winia Wakantrun susartatjai, turammarumna nuna akuptuktatjar-me. Tura nayaimpinmaya táatsain jui Jerusaré péprunam pujústárum. Taa ni kakarmarin suramsattarme.” Tu tímiayi.

### **Jesus nayaimpiniam wakamiania nu**

*(Márkus 16.19-20)*

<sup>50</sup>Nuyá Jesus Jerusaré péprunmaya júkiar Petania péprunam ejeniarmiayi. Tura nui ni uweje takui, “Yus yáinmakarti” tímiayi. <sup>51</sup>Nuna tu pujus, niya kanakmiayi. Tura nayaimpiniam junakmiayi. <sup>52</sup>Ni unuiniamurisha Nin imiá shiir enentáimtusarmiayi. Tura nuyá ti warasar Jerusarénum waketkiarmiayi. <sup>53</sup>Tura Yusa Uunt Jeen pujusar Yusa náarin shiir awajú pujuarmiayi. Áukete.

*Yúsan Shiir Chichamen*

**JUAN**

*aarmia nu*

**Chícham aents ajasmiania nu**

**1** Ashí nan̄kamamia nú yaunchu Yusa Uchirí tuke pujuyayi. Niisha Yúsan ti paant awajeakui, Chícham t́miniaiti. Chichamsha Yusjaj̄i pujuyayi. Chichamsha Yúsauyayi. <sup>2</sup>Yáman̄kamtaik Niisha pujuyayi Yusjaj̄i. <sup>3</sup>Ashí najanamu ainia nu Niijjaj̄i najanamuiti. Nii najanachmaka pen̄ké atsawai. <sup>4</sup>Niisha iwiaaku átinia nérenniuti. Nu iwiaaku atincha tsáapninia áinis Yusna ana nuna ashí shuaran paant nekamtikiamniaiti. <sup>5</sup>Nu tsáapnin kiritniunam tsáapniawai. Tura kiritniusha tsáapninian ikiajniaktinian tujinkiaiti.

<sup>6</sup>Áishman̄ ámiayi, Yus akupkamu, ni naari Juan̄. <sup>7</sup>Niisha tsáapnin chichaman etserkatajtsa támiayi. Nuna étseruk ashí umirkarat tusa támiayi. <sup>8</sup>Juan̄sha nu tsáapninchaulyayi. Áyatik akupkamuyayi tsáapnin chichaman etserkat tusa. <sup>9</sup>Nu tsáapninkia nekas tsaapniniaiti. Ju nun̄kanam taa ashí shuaran enentáin tsáapniartiniaiti.

<sup>10</sup>Chichamsha taramiayi ju nun̄kanam. Tura nun̄kasha ni najanamu ain̄, nun̄kaya aents Nin nekaacharmiayi. <sup>11</sup>Támiayi ni nun̄kén tura ni shuarsha ni enentáin itiaacharmiayi. <sup>12</sup>Tuma ain̄ ch́kích shuar Nin enentáimtuiniak ni enentáin itiaawarua nuna Yusa uchirí ajastinian Yus tsan̄katkamiayi. <sup>13</sup>Niisha Yusa uchirí ajasar ataksha númpentin ayashímkiacharmai. Áentsnúmiá akiiniachu áiniawai niisha. Áishman̄ wakeramujaj̄isha akiiniacharmai. Antsu Yúsnumiá akiiniawaru ásar Yusa uchirí áiniawai.

<sup>14</sup>Nú Chichamsha ayashtin ajas iijjaj̄i núkap tsawant pujumiayi. Yusa anenkratairijjaj̄i piakuyi. Aya nekasa nunak chichaamiayi. Núnisan̄ ni pen̄kerin̄, aya Yusa Uchirí chikichkia nu takusminia nuna iniakmamiayi. Nusha iisha paant wáinkiaitji. <sup>15</sup>Juan̄sha Nin neka asa, étseruk t́miayi “Júiti wi t́miaj nu: “Winia ukuruin̄ winittiana nu wíjjaj̄inkia émkaiti. Maa, wi atsaisha tuke pujuyayi” tiniujaj̄i.” Tu etserkamiayi.

<sup>16</sup>Chichamsha ti anenkartin asa ashí pen̄ker ana nuna iniaitsuk śramji. <sup>17</sup>Yusa akupeamur̄in Muisais yaunchu jintintraiti, antsu aneatniuncha tura ashí nekas ana nunasha Jesukrístu jintintraiti. <sup>18</sup>Chikichkisha Yúsan pen̄ké wáinkiachuiti. Tura ni Uchirí chikichkia nu tuke Niijjaj̄i tsaníaku asa Yúsan paant awajturmasuitji.

**Imiakratin Juan̄ Jesukrístunun etserkamiania nu**

*(Mateu 3.11-12; Márkus 1.7-8; Rúkas 3.15-17)*

<sup>19</sup>Jerusarénnumiá Israer-shuar ni Pátririn̄cha Riwi-shuarjaj̄i Juankaj̄i akupkarmiayi yákit tusar.

<sup>20</sup>Inintruiniakui paant ujakmiayi. “Wikia Krístuchitjaj̄i” t́miayi.

<sup>21</sup>Takui ataksha aniasarmiayi “¿Nuikia yáitiam. Yúsnan etserin yaunchu amia nú Eriaskaitiam?” tiarmiayi.

Juan̄sha “Atsá, núchaitjaj̄i” t́miayi.

Nuyá ataksha aniasarmiayi “Nuikia ¿Yúsnan etserin tátinia núkáitiam?” tiarmiayi.

Niisha “Atsá” t́miayi.

<sup>22</sup>Takui “¿Nu arantcha yáitiam. In akuptamkajnia nusha warí títiataj̄i. War-intia enentáimiam?” tiarmiayi.

<sup>23</sup>Juan̄sha t́miayi “Yúsnan etserin Isayas yaunchu timia núitjaj̄i. Niisha áarmiayi “Aents atsamu nun̄kanam

shuar untsumui “Ii uuntri jintí naka awajsatarum,” tu untsumui.” Núnaka Isayas áaruiti. Tura wikia untsumna nú shuaraitjai” tímiayi.

<sup>24</sup> Juanjají chichainiakka Pariséu akupkarma ármiai.

<sup>25</sup> Niisha tiarmiayi “Nuikia Kírs-tuchuitatmesha, Erfaschaitatmesha, Yúsnan etserin tátinia núchaitatmesha ¿urukamtai imiakratam?” tiarmiayi.

<sup>26</sup> Juansha tímiayi “Wikia entsajajín imiakratjai. Tura átum írutramunam shuar átum nékatsrumna nu wajaawai.

<sup>27</sup> Niisha winia ukuruinjí winiyat wíjiaínkia ti nankaamantuiti. Nii ti péñker asamtai wisha ni sapatrí jínkiamuríncha atitrachminiaitjai” tímiayi.

<sup>28</sup> Nuka Petapara peprunam túrunamiayi. Petaparasha Juan imiakratmia nuí Jurtañ entsa amain amai.

### Jesus Yusa Murikrínti

<sup>29</sup> Nuyá kashin Juan Jesusan winian wáiniak tímiayi “Iistarum. Núiti Yusa Murikrí ashí aentsu tunaarín júana nu.

<sup>30</sup> Núiti wi timiaj nu, “Winia ukuruí winiana nu wíjiaínkia nankaamantuiti. Tura wi atsáisha tuke pujuyayi” tímiajai.

<sup>31</sup> Wisha Nin nekaachmajai. Tura ashí Israer-shuar Nin nekaawarat tusan imiakin támajai” tímiayi.

<sup>32</sup> Nuyá tímiayi “Yusa Wakanin yámpitsa núnin nayaimpinmayan táarun wáinkiamjai. Tura ekemsamai.

<sup>33</sup> Nu túruntsajín tuke Nin nekaachmajai. Tura Yuska winia imiakrattinian akuptak turutmiai “Chikichik shuarnum Yusa Wakaní tara ekemsa wáinkiam,

nujají nekaattame. Yusa Péñker Wakaníjiaí imiakratniua núiti” túrutmiayi. Tura nujají Nin nekaamjai.

<sup>34</sup> Yamaikia wainkia asan ti paant nékajai tí nekas Yusa Uchirínti” tímiayi Juan.

### Jesusa unuiniamurí emka armia nu

<sup>35</sup> Kashincha ataksha Juan nuí wajasmiayi ni unuiniamurí jímiarjai. <sup>36</sup> Jesussha nuí nankaamakui Juan tímiayi “Iistarum, Yusa Murikrí áuwiti.”

<sup>37</sup> Juanka unuiniamurí nuna antukar mai Jesusan pataatukarmiayi. <sup>38</sup> Jesussha úkumur ímias nu jímiaran wininian wáinkiamiai.

Tura tímiayi “¿Ya earum?”

Niisha “Uuntá, ¿tuí pujam?” tiarmiayi.

<sup>39</sup> Jesussha tímiayi “Wats, iitiarum.”

Niisha wear ni pujutairín wáinkiarimiayi. Tura áankú ajasmatai nu tsawantai nuí kintiamprarmiayi.

<sup>40</sup> Juanka chichamen antukar Jesusan pataatukaruka jímiar ármiai. Chikichik Antresauyayi. Niisha Semun Pítru yachiiyayi. <sup>41</sup> Antressha wárik ni yachí Semunkan eaktajtsa wémiayi. Tura wáiniak “Misías wáinkiaji” tímiayi. Misíaska ni chichamen “Kristu” tawai. Kristuka Israer-shuaran yainkíarat tusa Yus anaikiamuiti.

<sup>42</sup> Nuyá Antres ni yachí Semunkan Jesus pujamunam jukimiayi. Jesussha wáiniak tímiayi “Ámetme Semun, Junasa uchirí. Túrusha Sépas átatme.” Sépaska Israer-shuar chichamnum kaya tawai. Tura Kriaku chichamnum nuka Pítruiti.

### Jesus Jiripijají tura

#### Natanaérjají chichasmiania nu

<sup>43</sup> Kashincha Jesus Kariréa nunkanam wétajtsa pujumiayi. Tura Jiripin wáiniak “Nemartusta” tímiayi.

<sup>44</sup> Jiripisha Petsaitia péprunmayayuyayi. Antressha Pítrusha nu péprunmayayuyayi. <sup>45</sup> Nuyá Jiripi Natanaéran eakmiayi.

Tura wáiniak tímiayi “Muisais Yus akupkamu papinium “Anaikiamu táatui” tu áarchamkia. Yaunchu Yúsnan etserniusha ujakcharmakia. Nu shuar

wáinkiaji. Jesusaiti, Jusé uchirí. Nasaré t péprunmayaiti.”

<sup>46</sup>Natanaérsha tímiayi “¿Nasarétnu-mia péñker shuar áminkiait?”

Jiripisha “Winim ítiá” tímiayi.

<sup>47</sup>Jesussha Natanaéran tíjiuch winian wáiniak tímiayi “Ju shuar iistarum. Ti péñker Israer-shuaraiti. Penké anankartichuiti.”

<sup>48</sup>Natanaérsha tímiayi “¿Itiur nékaram?”

Jesussha tímiayi “Jiripi tuke unturmatsajin wáinkiajme ikiu numirin ejamkam wajamin.”

<sup>49</sup>Natanaér nuikia tímiayi, “Uunta, nekas Yusa Uchirínme. Israer-shuar akupniuitme” tímiayi.

<sup>50</sup>Tura Jesus tímiayi “¿Aya wi “Ikiu numirin ajamkam wajamin wáinkiajme” takui Winia enentámturamek? Antsu nuna nankaamas nekaachmin ana nusha wáinkiaítame” tímiayi. <sup>51</sup>Nuyasha Jesus tímiayi “Wi nekas tájarme, Aents Ajasu asan atumsha nayaim uranmi-anum Yusa suntari Winin tara waka ajainia wáinkiaítarme.” Tu tímiayi.

### Nuatnaikiatin jísat Kaná péprunam ámiania nu

**2** Menaintiu tsawant nankaasmatai nuatnaikiatin jísat Kaná péprunam ámiayi. Kaná péprusha Kariréa nunkanmauyayi. Jesusa nukurísha nuí pujumi-ayi. <sup>2</sup>Jesussha ni unuiniamurísha nu nu-atnaiyamunam ipiaamu ámiayi.

<sup>3</sup>Umutai amuukamtaí Jesusa nukurí tímiayi “Umutai amuukai. Penké takakainiatsui.”

<sup>4</sup>Tura Jesus tímiayi “Nukuá, ¿urukam-tai Winia túrutam? Iniáitiústá. Winia kakarmar iniakmastin jeaatsui.”

<sup>5</sup>Nuyá umutain wáinmainia nuna ni nukurí tímiayi “Ashí ni tana nu umiktárum.”

<sup>6</sup>Nuí kayajají najanamu yumi-yaraatai sais (6) ámiayi. Nu yaraatanimaya

Israer-shuar ni ewejéncha ni nawencha nijiamau ámiayi Yus shiir enentámtursatí tusar. Chíkich chíkich yaraatanium uchenta (80) rítrusha, sian (100) rítrusha yumi wayamniauyayi.

<sup>7</sup>Nuyá Jesus umutain wáinmaun “Ju yaraatai ámpratarum” tímiayi. Takui mete ámprarmiyai. <sup>8</sup>Ámprarmatai Jesus tímiayi “Pai, ishichik shikikrum námper chicharu suutarum.” Tutai nútiksaj túrawarmiyai.

<sup>9</sup>Jista chicharusha nu umutai ajasun nekápramiayi. Yaraatanimaya yumi jusamun nekaachmai niisha tura umutai ajamau jusaru ásar nékarmai. Jista chicharusha nuwatun untuk <sup>10</sup>tímiayi “Jístanmanka péñker umutain emka suíniatsuk. Tura jémarmatainkia tímianchan suiniatsuk. Túrasha ámeke péñker umutai ikusam yamá jíjkchamek” tímiayi.

<sup>11</sup>Jesus túramu Kananum Kariréa nunkanam túrunamiayi. Nújainkia Jesus emka ni kakarmarin paant iniaktusmi-ayi. Nuna ísar ni unuiniamurísha Nin enentámtusarmiyai.

<sup>12</sup>Nuyá Kapernáum péprunam wémi-ayi. Ni nukurísha ni yachísha ni unuini-amurísha nemariarmiyai. Nuísha untsurí tsawant pujusarmiyai.

### Yusa Uunt Jeen suruktinian Jesus surimkiamiania nu

(Mateu 21.12-13; Márkus 11.15-18; Rúkas 19.45-46)

<sup>13</sup>Israer-shuara namperi, paskua tutai, ishichik ajasmatai Jesus Jerusarénnum wémiayi. <sup>14</sup>Nuí jeá Yusa Uunt Jeen súru-inian wáinkiaímiayi. Turuncha murikni-asha yampitsnasha súrin ámiayi. Chikichcha ni misarin pujusar kuítian yapa-jíniancha wáinkiaímiayi.

<sup>15</sup>Nuna wáiniak yaranken chapik-mar asutkiartutain najana nujaí ashí waakartiuk murikrintiuk aa jíirmiayi.



Kuítian yapajniu misaríncha ayantar ni kuíttrin nunká utsankarmiayi. <sup>16</sup>Yampit-san súrinniasha tímiayi “Nuka juyá jíítiarum. Winia Aparu Jeen surutai jea najanawairap” tímiayi.

<sup>17</sup>Nuna físar ni unuiniamurí yaunchu Yus-Papinium áarman enentáimprarmiayi. Ju áarmaiti: “Ame Jeem shiir atí tusan ti wakerukuitjai.”

<sup>18</sup>Nuikia Israer-shuara uuntri Jesusan aniasarmiayi “Juna túramniaitjai tusam ¿warí kakarmak iniakmastatam?”

<sup>19</sup>Jesussha tímiayi “Ju Jeá sáakiakrumin menaintiú tsawantái iniantaittíajai Wikia.”

<sup>20</sup>Israer-shuarsha tiarmiayi “Kuarentisáis (46) uwitin juna jeamtinian pujursarmiayi. Amesha menaintiú tsawantái jeamtámeash.”

<sup>21</sup>Kame Jesus “Jeá” chichayat ni ayashin tímiayi. <sup>22</sup>Tuma asamtai Jesus ukunam jakamunmayá nantakmiatai ni unuiniamurí ni timian enentáimprarm ni chichamencha tura yaunchu Yus-Papinium áarmancha “Nekasaiti” tu enentáimtusarmiayi.

### Jesus ashí shuara enentáin nékawai

<sup>23</sup>Paskua námpertin ti untsurí Jerusarénnum pujuarmia nu, Jesus aents tujintiamun túramtai, nuna wáinkiar Nin nekas enentáimtusarmiayi. <sup>24</sup>Tuma ain Jesus ashí neka asa ninkia enentáimtuscharmiayi. <sup>25</sup>Niniki ashí shuara enentáin neka asa chíkich ujatkat tusa atsumchamiayi.

### Jesus Nikiutémujai

**3** Shuar ámiayi ni naari Nikiutému. Niisha Pariséu asa nii tuinia áintsan Yúsnan takauyayi. Niisha Israer-shuara uuntriayi. <sup>2</sup>Niisha kashi Jesusai irastajtsa wé tímiayi “Uuntá, shuáran unuiniarat tusa Yus akúptámkaiti. Nu paant nékaji. Yúsaiyanchuitkiumka

aentsti tujintiamu túramna nu tujinkiaintme’ tímiayi.

<sup>3</sup>Jesussha tímiayi “Tí nekas tájame. Atak yamaram akiiniachuka Yus akupeamunam pachiinkiashtatui.”

<sup>4</sup>Tutai Nikiutému aniasmiayi “¿Itiurak shuar uunta nu ataksha akiiniat. Ataksha ni nukurí ampujén enkemprarniakait atak akiiniatniuna?”

<sup>5</sup>Ataksha Jesus tímiayi “Ti nekas tájame. Shuar entsayasha tura Wakanniumiasha akiiniachuka Yus akupeamunam penké pachiinkiashtatui.

<sup>6</sup>Ayashniumiá akiinia nuka ayashchakait. Núnisan Wakanniumiá akiinia nuka wakanchakait. <sup>7</sup>Wi “atak yamaram akiiniatniuiti” takui itiurchat enentáimpraip. <sup>8</sup>Nase enentáimpratá. Nase nánkamsan umpúawai. Amesha ántame tura tuyan winiá túrasha tuin weti nékatsme. Núniskete ashí Wakanniumiá akiinia nu.”

<sup>9</sup>Tuma asamtai Nikiutémuasha atak anias “¿Jusha itiurak áminiat?” tímiayi.

<sup>10</sup>Jesus áikmiayi “Ame Israer-shuara jintinniuríntiatmesha ¿itiura nékatsmea? <sup>11</sup>Ti nekasán tájame. Nekas nékatur chichaaji. Íismajnia nusha ujaaji. Tuma ain ii chichame ántatsrume. <sup>12</sup>Aya ju nunkanmayá túramu ujaam ántachkurmeka ¿itiurak nayaimpinmayá túramusha antuktarum?”

<sup>13</sup>“Shuar chikichkisha nayaimpiniam waka atsawai. Aya Wiki, nayaimpinmayá taran Aents Ajasu asan, túraitjai. Tura Wikia nayaimpinmayaitjai. <sup>14</sup>Tura Winiasa, Aents Ajasu ain, mantuawartatui. Iis, yaunchu Israer-shuar atsamunam wekainiak napijiai ti jáiniakui tuke tsuamarti tusa Muisais napin jirú najana yakí numiniam awajaimiayi. Núnisnak Wissha awajnitniuitjai. <sup>15</sup>Nújainkia ashí Winia enentáimturna nuka jinium wétsuk Yusai tuke iwiaaku pujustatui.”

### Yuska ashí shuaran ti aneawai

<sup>16</sup>Yuska ashí shuaran ti anea asa, ni Uchirín chikichik ana nuna shuáran uwemtikrarat tusa tsankatkamiayi. Ashí shuar Nin enentáimtana nu, jinium wécharat tusa, antsu Yúsnum tuke iwiaaku pujusarat tusa ni Uchirín akúpturmakmiaji. <sup>17</sup>Yus áentsun kajerak jinium surukat tusa ni Uchirín akupkachmiayi. Antsu uwemtikrarat tusa akupkamiayi.

<sup>18</sup>Yusa Uchirín enentáimtana nuka jinium penké surunkashtiniaiti. Tura Nin enentáimtatsna nuka, Yusa Uchirín chikichik ana nuna enentáimtachu asa, páchitsuk jinium surukmaiti. <sup>19</sup>Yusa Uchirí tsáapninia áintsan ii tunaari paant awajturmajai. Nu tsáapnisha ju nunkanam táraiti. Shuar tunáa ti tura ásar tsáapninian nakitrar kiritniun wakeriarmai. Nuna tura ásar jinium surunkaruíti. <sup>20</sup>Ashí tunaan túruinia nuka tsáapninian mujiainiawai. Túrawar yupitiainiawai ni tunáa túramu paant ajasaj tusa. <sup>21</sup>Antsu ashí nekas túratniun umiiniana nuka tsáapninian weantainiawai. Yus ni enentáj pujuram tsáapninium takainiawai. Nuka ti paantaiti.

### Imiakratin Juan ataksha Jesusnan chichasmiania nu

<sup>22</sup>Nuyá Jessusha ni unuiniamurijiaisha Jutía nunkanam wear nuí pujusar imiakratiarmiayi. <sup>23</sup>Juansha Enun nunkanam, Sarim tíjiuchia nuí, imiakratuk pujumiayi entsa nuí núkap aa asamtai. Tura aents táarmatai imiainiarmiayi. <sup>24</sup>Nusha Juánkan sepunam enkenatsain túrunamiayi.

<sup>25</sup>Tura Juanka unuiniamuri Israer-shuarjai jianaiktinian nan kamawarmiayi. “¿Ya imiakratma imiá penkerait?” tusar áujmatiararmiayi. <sup>26</sup>Juánkai inintrustai tusar wéarmiayi.

“Uunta, ame nuik Jurtan entsa amain pujakum shuar nuí pujá “núiti Yusa Murikri” tíchamkum. Yamaikia imiakratui tura ashí shuar Nin nemarainiawai” tiarmiayi.

<sup>27</sup>Tutai Juan tímiayi “Ashí kakarmaka aya Yúsaiyan chakait. <sup>28</sup>Wisha paant tímiajai “Wikia Krístuchuitjai antsu ni jintin iwiarat tusan emka akupkamuitjai.” Nusha antukmarme. <sup>29</sup>Kame shuar nuwan nuatna nuna áishrinti. Nuatnaiyak áishman nuwejai áujnainiakui, ni amikri sha nuna antuk ti waraatsuk. Wisha núnisnak aents Jesusai wénakui ti waraajai. <sup>30</sup>Niisha tuke nan kaamaku uunt ajastiniaiti antsu wikia tuke tímiancha ajastiniaitjai.” Juan tu chichasmiayi.

### Nayaimpinmaya tara nu

<sup>31</sup>Nayaimpinmaya tara nuka ashí nan kaamakuiti. Nun kaya nuka, nun kaya asa jú nun kanmayanak áujmatui. Nayaimpinmaya tara nuka ashí nan kaamakuiti <sup>32</sup>tura nuí antukmancha íismancha áujmatui. Túrasha ni chichamen ántuiniatsui. <sup>33</sup>Antsu ni chichamen ántana nuka “Yusa chichame imiá nekasaiti” tawai. <sup>34</sup>Yus akupkamuka Yusa chichamen étserui. Yuska ni Wakanín ementutsuk susa asamtai tu étserui. <sup>35</sup>Yus Apa ni Uchirín anea asa ashí ana nuna iistí tusa ataksaiti. <sup>36</sup>Shuar Yusa Uchirín enentáimta nuka yamaram iwiaakmanum akiinia asa tuke Yusai shiir pujustiniaiti. Antsu Yusa Uchirín enentáimtatsna nuka nu iwiaakmanum akiiniachuiti antsu Yus tuke nin kajerkaiti.

### Jesus Samaria nunkanmaya nuwajai chichasmiania nu

**4** “Jesus untsurí shuaran ni nemarkin awajeawai; kame Juanjai nan kaamas untsurí imiawai” taman Pariseu shuar antukarmiayi. <sup>2</sup>Nekaska

Jesus imiakratchamiayi, antsu ni unuiniamuri túrawarmiayi. <sup>3</sup>Pariséu nu chichaman antukarman Jesussha nekáa Jutía nunkanmaya jiinki Kariréa nunkanam waketkimiayi.

<sup>4</sup>Wáketuk Samaria nunkanmaani nankaamaktiniuyayi. <sup>5</sup>Samaria nunkanam wéak Sekar péprunam jeamiayi.

Nu pepru jeastatuk Jakupa nunke ámiayi. Jakupsha nu nunkan ni uchirín Jusén tí yaunchu susamiayi. <sup>6</sup>Nuisha yumirmat ámiayi. Jakup taurma asamtai “Jakupa yumirmatrí” tiarmiayi.

Tutupin jeamtai Jesussha pimpiki winis yumirmat ayamach pujusmiayi. <sup>7</sup>Nu jupají Samarianmaya nuwá yumí shikiktajtsa támiayi. Tura Jesus “Entsa surusta” tímiayi. <sup>8</sup>Jesusa unuiniamurísha yurumkan péprunam sumaktajtsa wéaru asamtai aya Jesusak pujumiayi.

<sup>9</sup>Samarianmaya nuwá Jesusan tímiayi “¿Itiura Israer-shuaraitiatmesha Samarianmaya nuwá aisha entsa seatam?” Kame Israer-shuar Samarianmaya shuarjainkia penké chichachu ásar nuna tímiayi.

<sup>10</sup>Jesussha tímiayi “Yus súamu nékakmeka tura entsa surusta tájam nusha nékakmeka ame antsu seattínme tura Wikia iwiaaku entsan amasantjai.”

<sup>11</sup>Nuwásha tímiayi “Uunta, entsasha ti iniaiti tura shikiktíncha takaktsume. ¿Tuyan iwiaaku entsasha surustam? <sup>12</sup>Ii uuntrí Jakup jú yumirmatan taur juyanák niisha ni uchirísha ni waakarísha umararmiayi. Nuyá ikiurtamkimijai. ¿Amesha Jakupjai nankaamas kakarmakaitiam?”

<sup>13</sup>Jesussha tímiayi “Ashí shuar jú entsan umarka ataksha kitiamtiatui.

<sup>14</sup>Antsu Wi súajna nú entsan umarka penké kitiamchattawai. Antsu nu entsa Wi susamuka ni enentáin púkunia áintsan tuke pajamtiatui nujai tuke iwaaku pujustí tusa.

<sup>15</sup>Tutai nuwá tímiayi “Uuntá, winiasha nu entsa surusta. Wisha kitiamcha átaj. Tura jú entsan cha shikiktíncha táchataj” tímiayi.

<sup>16</sup>Nuyasha Jesus tímiayi “Áishrum untsukam utitia, turam júi tatá.”

<sup>17</sup>Nuwásha “Winia áishur atsawai” tímiayi.

Tutai Jesus tímiayi “Maa, nekas tame. Áishrum atsawai. <sup>18</sup>Kame ame áishrum senku (5) takusuitme. Yamái takakmena nusha ame áishrumchaiti. Nekas tame.”

<sup>19</sup>Nuna antuk nuwásha tímiayi “Uunta, ame Yúsnan etserniuchukaitiam. <sup>20</sup>Ii úuntrínkia tuke Samarianam pujuarmia nu jú nainnium Yúsan tikishmatrarmiayi. Antsu átum Israer-shuar árumna nu aya Jerusarénum Yus tikishmátratniuiti tárume.”

<sup>21</sup>Jesus tímiayi “Nuwá, enentáimsata. Tsawant jeattawai átum jú náinniumsha tátsuk tura Jerusarénumsha wétsuk Yus Apa tikishmatratin. <sup>22</sup>Átum tikishmatrum nuka nékatsrume. Iikia tikishmatrajnia nu nékaji. Israer-shuarnumia Uwemtikkiartin winiakui nékaji. <sup>23</sup>Tsawant winittiana nu yamá jeayi. Ashí shuar Yus Apan nekas tikishmatainiakka tuke wakanjai tuke enentáijjiaisha awajitsuk tikishmatrartatui. Núnisan tikishmatrurat tusa wakerawai Yus Apa. <sup>24</sup>Yuska Wakaniiti tura ashí Nin tikishmatainia nuka tuke wakanjjiai tura tuke enentáijjiai awajitsuk tikishmatratin áiniawai.”

<sup>25</sup>Nuwásha tímiayi “Anaikiamua nu tátiniati. Nusha Krístuiti. Niisha taa ashí jintintramattaji.”

<sup>26</sup>Jesus tímiayi “Wiiitjai. Ámin chichaaajmena nú Krístuitjai.”

<sup>27</sup>Nuin ni unuiniamuri táarmiayi tura nuwajai chichaa pujan wáinkiar ti enentáimprurarmiayi. Tumaitiat “¿Warí wak-erakmea nuwajai chichaaam?” títinian

arantukarmiayi. <sup>28</sup> Nuyanka nuwa ni yu-mirin ikiuki péprunam we ashí áentsun tímiayi <sup>29</sup> “Winiirum ítiarum, shuar ashí wi túramun túruta nu. ¿Juka Krístuit-tiya?” <sup>30</sup> Tutai péprunmaya jíinkiar Jesus pujamunam wearmiayi.

<sup>31</sup> Jeainiatsain ni unuiniamuri seak tiarmiayi “Uunta, yurumáta.”

<sup>32</sup> Tura Jesus tímiayi “Wi yúatniunka takakjai átum nékachman.”

<sup>33</sup> Ni uniuiniamuri sha nuámtak an-niasarmiayi “¿Chíkich shuar yurumak itiarim tátsuash?” tiarmiayi.

<sup>34</sup> Tura Jesus tímiayi “Winia akuptukua nuna wakeramuri túrakun tura ni takatrin takaakun Wíjjiainkia yurumátniua áintsan ikiakáatui.

<sup>35</sup> Átumka “Tuke kuaru nantu árak júuktin taasai” tátsurmek. Túrasha Wi tájarme, shuar wininia nu iistarum. Yus-Chicham ni enentain araamuiti. Tura júuktin tsawant jeayi. <sup>36</sup> Arakan júaka akinkiatniuiti. Júukmataisha nu shuar uwemprar tuke iwiaaku pujusartatui. Núnisan arakan araana nusha júana nusha mai metek warasartatui. <sup>37</sup> Tiniu armia nuka nekasaiti: “Chikichik araawai chíkichcha júawai.” <sup>38</sup> Iis, chíkich araakmamu júuktinian akupkaitjarme. Átum araachiatrumek chíkich takasmanum atumsha pachiiintiukuitrume” tímiayi.

<sup>39</sup> Tura núwaka péprunam jeá “Ashí wi túramun ujakayi” takui untsurí shuar Jesusan ti shiir enentáimtusarmi-ayi. Niisha Samarianmaya shuar árimi-ayi. <sup>40</sup> Nu asantai ashí Jesusai taar ni-ijjai pujusát tusa seawarmiayi. Tutai Jesus jimiará tsawant nuí pujusmiayi. <sup>41</sup> Nú shuar untsurí ni chichamen antukar Jesusan ti shiir enentáimturarmi-ayi. <sup>42</sup> Nuyá nuwan tiarmiayi “Yamaikia aya ame chichammijjai Jesus enentáimtatsji antsu imia iisha ni chichamen

anturkaji. Tura nékaji nekas Krístuiti, ashí shuaran Uwentikin.”

### Jesus akupniu takarniuri uchirin tsuármiania nu

<sup>43</sup> Jimiará tsawant nankaasmatai Jesus Samaria nunkanmaya jíinki Kariréa nunkanam wémiayi. <sup>44</sup> Kariréasha Jesusa nunke asantai, ainsha Jesus timia áintsan ámiayi: “Yúsnan etserniun ashí shuar pénker anturainiawai antsu nuna nunkeyanka nin anturainiatsui.” <sup>45</sup> Tuma ain Kariréa nunkanam jeantai auya shuarsha Jerusarénnum paskua námpernum wearu ásar tura ashí ni túramun nuí wainkia ásar ti shiir awajsarmiayi.

<sup>46</sup> Nuyá Jesus Kaná péprunam atak támiayi. Nu péprunmasha nuik Jesus yu-min umutai awajsamiayi. Jesussha nuí pujai yajá péprunam Kapernáumnum akupniu takarin ámiayi. Ni uchirísha jaa tepemiayi. <sup>47</sup> Niisha Jesus Jutíanmaya Kariréa nunkanam taman antuk Jesusai wémiayi. Tura ni uchirí jákatin tepakui ni jeen we ni uchirín tsuarat tusa Jesusan seamiayi.

<sup>48</sup> Jesussha tímiayi “Aya aents túrach-minian túrakui ísrum aya nújain Winia enentáimtarme.”

<sup>49</sup> Tura takarin tímiayi “Uunta, winia uchir jáatsain wari winitia.”

<sup>50</sup> Nuiinkia Jesus tímiayi “Jeemiin waketkitia. Yamaikia ame uchiram pénker ajasai.” Tutai nú aishman Jesus táman antuk wémiayi.

<sup>51</sup> Ni jeen jeátemántai ni takarni-urí inkiun tiarmiayi “Yamaikia uchiram pénker ajasai.”

<sup>52</sup> Apasha inintrusmiayi nantu urukaim pénker ajasma.

Niisha tiarmiayi “Yau, nantu pukuntamtaí, tsuemun michatramai” tiarmiayi.

Nuna antuk uchí aparísha enentáimsamai. <sup>53</sup> Nantu pukunta ai

Jesus “Ame uchiram péñker ajasai” timia nuní aijn michatraití. Tuma asamtai niisha ashí ni shuarísha Jesusan nekas enentáimturarmiayi.

<sup>54</sup> Jesus nu túramujai ni kakarmarín jimiara iniakmasmiayi. Nunasha Jutíanmaya jiiñki Kariréa nunkanam jeá túramiayi.

### Petesta amia nuñ tampemaron Jesus tsuármiania nu

**5** Nu nankaamasmatai, Israer-shuar namperan najanainiakui Jesus ataksha Jerusarénum waketkimiayi. <sup>2</sup> Jerusaréñ yama wayamunam murik wayatín waiti tíjiuch amia nuñ entsa pajamtai jeammauyayi. Nu pajamtain Petesta tiarmiayi. Nuna wáitirísha senku (5) ármiayi. <sup>3</sup> Nuñ untsurí jáiniak nunkanam tepearimiayi. Kusurusha shutuapsha tampemakusha tepesar entsa miartukat tusa nákasarmiayi. <sup>4</sup> Kame ni tátaj taku Yusa suntari táuyayi entsan umuchkiattsá. Nuyanka emka shuar entsá wayá nu ni jáamuriya tsuámarmiayi. <sup>5</sup> Áishman traintiúchu (38) uwi jaa tepá nuñ ámiayi.

<sup>6</sup> Jessusha nu shuaran nuñ tepan wáinkiámiayi. Tura untsurí uwitín jaa tepan nekáa aniasmiayi “¿Shiir ajastiniak wakeram?”

<sup>7</sup> Tutai jaasha tímiayi “Uunta, entsa muchitkiui ¿winia yaki enkétát? Kame wi enkemátaj tai chíkich emka enkemáiniawai.”

<sup>8</sup> Nuyá Jesus tímiayi “Nantaktia. Ame peakrum jukim wetá.”

<sup>9</sup> Nu chichamtaik áishman shiir ajasmiayi. Tura ni peakrín jukí wémiayi. Nusha ayampratin tsawantaj túrunamiayi. <sup>10</sup> Tuma asamtai Israer-shuar shiir ajasun tiarmiayi “Yamáí ayampratin tsawantaiti. Peakrum júkishtiniaitme” tiarmiayi.

<sup>11</sup> Áishmansha tímiayi “Winia tsuara nu “Peakrum jukim wetá” turutni” tímiayi.

<sup>12</sup> Nuñkia aniasarmiayi “¿Ya “Peakrum jukim wetá” túramam?” tiarmiayi. <sup>13</sup> Tura áishmansha Nin tsuárun nékachmiayi. Untsurí shuar nuñ aa asamtai tura Jesus weu asamtai nin nekaachmiayi.

<sup>14</sup> Atak Jesus Yusa Uunt Jeen áishman kan wáiniak tímiayi “Antukta. Yamaikia shiir ajasume. Atak tunáa túrawaip; nu arant ajasáim” tímiayi.

<sup>15</sup> Nuñkia áishman Jesus nin tsuármán nekáa Israer-shuaran ujakmiayi.

<sup>16</sup> Tuma asamtai ayampratin tsawantaj túramtai Israer-shuar Jesusan maatai tusar áintrarimiayi. <sup>17</sup> Tura Jesus tímiayi “Wina Apar tuke yamaisha takawiti. Núnisnak Wissha takaajai.”

<sup>18</sup> Tutai Israer-shuar nuna nankaamas maatai tusa wakeriarmiayi. Ayampratin tsawantaj takaakui kakerkarmiayi. Tura nu arantcha “Yus winia Aparuiti” takui Yusjai métek enentáimtumawai tusar nu arant kakerkarmiayi.

### Yusa Uchirí túramnia nu

<sup>19</sup> Nuyá Jesus tímiayi “Ti nekas tájarme, Yusa Uchirínkia ni enentáijiañ takaatsui. Antsu aya winia Apar takaana nuna ísan métek takaajai. Ashí winia Apar túramun Wissha ni Uchirí asan métek takaajai. <sup>20</sup> Ni Uchirí asamtai winia Apar anentui tura ashí tura nuna iniakturui. Tura nuna nankaamas tujinkiamnian iniaktursattawai Wissha túratniun. Tura nuna túrakui ashamkat-tarme. <sup>21</sup> Winia Apar jakamunmayan iwiaaku ajasat tusa Ni wakerana nuna iniantesatuk. Núnisnak, ni Uchirí asan, Wi wakeraj nuna iwiaaku awásámniait-jai. <sup>22</sup> Winia Aparka súmamtiktsui antsu shuar súmamtikiatniun ni Uchirín sú-saiti. <sup>23</sup> Tuma asamtai ashí shuar Yus Apan shiir awajainia áintsan ni Uchirín-

cha métek shiir awajsatin ániawai. Yus Apa ni Uchirín akupka asamtai, Uchin shiir awajeatsna nuka Yus Apancha shiir awajeatsui' tímiayi.

<sup>24</sup>“Ti nekasaiti. Winia chichamprun ántana nú shuarka Winia Akuptukun enentáimtak ni iwiaakmarin tuke amuukashtinian takakui. Nu shuarsha ayashí iwiaakuiat jákauyi antsu yamá nekas iwiaakui. Tuma asa sumamshatui. <sup>25</sup>Ti nekasaiti. Tsawant winittiana nu jeayi. Nu tsawant jaka ainia nu Wi unsumman antukar umirkarka iwiaaku ajasartatui. <sup>26</sup>Iis, winia Apar iwiaaku awajsatniun takakui. Tura Winiasha, ni Uchirí asamtai, iwiaaku awajsatniun surusuiti. <sup>27</sup>Nu arantcha wi Aents Ajasu asamtai, shuaran súmamtikiatniun surusuiti. <sup>28</sup>“Ju chicham itiruchataiti” enentáimprairap. Atak tsawantai wi unsumman ashí jákaru ainia nu antukartatui. <sup>29</sup>Tura ashí iwiansamunmaya jíinkiertatui. Pénker túrawarusha nantakiar tuke iwiaaku pujusartatui. Antsu tunáa túrawarusha nantakiar jinium surunkartatui’ tímiayi.

**“Jesus nekas Yúsaiyáiti”  
tu áujmatainia nu**

<sup>30</sup>Imia Wíki takaatsjai. Antsu Yus tana núnisnak súmamtikeajai. Wi wakeraj nuna enentáimtsuk antsu winia Apar wakera nuna wakerukan, Nii akupta asamtai, awajitsuk súmamtikjai. <sup>31</sup>Aya Wiki “Yúsaiyáitjai” tákunka winia chichamur ántar ainti. <sup>32</sup>Chikichcha awai. Niisha “Yúsaiyáiti” túrutui. Ni chichamesha imiá nekasaiti. <sup>33</sup>Atumsha Juanakai wi túramu inintrusmarme tura nii timia nu nekasaiti. <sup>34</sup>Tuma aiñ aents táman atsumatsjai. Antsu Juanaka chichame

enentáimkiuram uwempratarum tusan tájarme. <sup>35</sup>Juansha jiya núnis keemai. Atumsha ishichik tsawantin nú tsáapninnium warastin enentáimprarmarme. <sup>36</sup>Tura Winia “Yúsaiyáiti” túrutna nu, Juanjai nankaamas péñkeran takakjai. Wi takasma núiti. Winia Apar takastinian surusma nuna takaakun nujai páantaiti Yus Apa akupkamuitjai. <sup>37</sup>Winia Aparsha, akuptuku asa, ayamprutui. Túrusha átumka ni chichamesha antukchaitrume tura wáintiash wáinkiachuitrume. <sup>38</sup>Yus Apa akuptukuiti. Tuma asamtai Winia enentáimturhakrum winia Aparu chichamesha atumi enentáin wayachuiti. <sup>39</sup>Átumka Yus-Chicham yaunchu aarma nuí iwiaaku átinian wáinkiataj tusarum ti unuimiaruitrume. Nu chichamsha Wínian áujmatui. <sup>40</sup>Tuma aiñ nekas iwiaaku átaj tusarum Winí tátin nakitiarme” tímiayi.

<sup>41</sup>“Shuar Winia “shíiraiti” túrutaini-akuisha nuna páchiatsjai. <sup>42</sup>Maa, Wi nékajrume. Átumka Yus aneatsrume. <sup>43</sup>Winia Apar akuptukmatai táwitjai túrusha nakitrarme. Antsu chíkichka ní enentáijiañ jeartamkuinkia nuka átum wakerarme. <sup>44</sup>Átumka nuámtak “Shiir enentáimtursatí” tu enentáim-tunaiyarme. Tura Yus enentáimturma nuka páchiatsrume. Nújainkia ¿itiurak Yus enentáimtustam? <sup>45</sup>“Ii tunaarín Yusaj etserturmaktatji” turutiirap. “Muisais akupkamun umirkan uwemprattajai” tátsurmek. Antsu Muisais aarma nujai atumí tunaarí etsernaktatui. <sup>46</sup>Iis, Muisais Winia áatrurmiayi. Atumsha ni timia enentáimtakrumka Winiasha enentáimturaintrume. <sup>47</sup>Tura ni aarma enentáimtachkurmeka ¿itiurak wi tama enentáimtustarum?” tímiayi Jesus.

### Jesus senku mir (5.000) áishmankan ayurawarmiania nu

(Mateu 14.13-21; Márkus 6.30-44; Rúkas 9.10-17)

**6** Nu nankaamasmatai Jesus Kariréa antumiannum amain katinmiayi. Nu antumiansha Tipirias antumian tuiniawai. Jimiará náartiniaiti. <sup>2</sup>Untsurí shuar Jesus ti jáinian timiá wárik tsuan wáinkiaru ásar Nin nemariarmiayi. <sup>3-4</sup>Israer-shuara paskuanamperi ishichik ajasmatai Jesussha ni unuiniamurijjai náinnium waka nu pujusmiayi. <sup>5</sup>Jesussha untsurí aents wininian wániak Jiripin tímiayi “Tímiá untsurí shuar ayuratniusha ¿tuyan yurumak sumaktaj?” tímiayi. <sup>6</sup>Kame Jesuska Nii túrattana nuna neka asa Jiripi warittin tusa tímiayi.

<sup>7</sup>Jiripisha nuyá tímiayi “Tímiá nukap kuitjai tanta sumakmesha ashí ishichik susamsha jeachaintjia” tímiayi.

<sup>8</sup>Nuyá chíkich unuiniamurí Antres, Pitru yachi, tímiayi <sup>9</sup>“Uchi juí senku (5) tantan jimiará namakjai takakui. Ausha timiá untsurínmasha jeatpiash” tímiayi.

<sup>10</sup>Nuyanka ““Ashí pujustarum” titiarum” tímiayi Jesus.

Áishmansha nuwasha uchisha irunmiayi. Tura chírichri núkap aa asamtai nuísha senku mir (5.000) áishman pujusarmiayi. <sup>11</sup>Jesussha nu tantan achik Yúsan yuminkias ni unuiniamurín susamiayi. Niisha ashí nuí pujuinian súsarmiayi. Namaknasha núnisan ashí ni wakeriarmiania nuna súsarmiayi.

<sup>12</sup>Jémararmataisha Jesus ni unuiniamurín tímiayi “Ampirma júukrum chaninnium chumpiatarum. Wasúrnákain.” <sup>13</sup>Niisha senku (5) tantanmayá ampirman júukar tuse (12) chaninnium áimkiarmiayi.

<sup>14</sup>Nu shuarsha Jesus túramun íisar tiarmiayi “Ju nekas Yúsnan etserin tá-tinia núchakait.” <sup>15</sup>Shuar Jesusan uunt

akupin awajsataj tutai Jesus nekáa Nínki náinnium wémiayi.

### Jesus entsá pátatek nanamas wekasamiania nu

(Mateu 14.22-27; Márkus 6.45-52)

<sup>16</sup>Kíakui Jesusa unuiniamurí antumiannum wearmiayi. <sup>17</sup>Káshisha Jesus tuke táchamtai uunt kanunam enkemáwar Kapernáum péprunam wéenak jínkiarmiayi. <sup>18</sup>Tura nase ti umpúakui chíchimi ti wajaimiayi. <sup>19</sup>Ajapén ajaras Jesus entsá pátatek nanamas tíjiuch winian wáinkiar ashamkarmiayi. <sup>20</sup>Tura Jesus “Wíitjai. Ashamprukairap” tímiayi. <sup>21</sup>Nújainkia ti shiir warasar kanunam itiaawarmiayi. Tura nu chichamtaik ni wéamunam jeawarmiayi.

### Shuar Jesusan eak wekainiawai

<sup>22</sup>Kashincha chíkich shuar amain ayuramunam kanararu nekaawarmai. Jesusa unuiniamurí Jesusjainchu chikichik kanu amia nujai wéarun nekaawarmai. <sup>23</sup>Nuí chichak matsatai Tipirias péprunmayá chíkich kanu táarmiayi. Yau Jesus Yúsan yuminkias tantan ayuramunam tíjiuch táarmatai <sup>24</sup>nu shuar, Jesussha ni unuiniamurísha nuí atsuiniakui, nu kanunam enkemáwar Kapernáum péprunam Jesusan eáktajtsa wearmiayi.

### Jesus apatkua áintsankete

<sup>25</sup>Entsa amain Jesusan wáinkiar aniasarmiayi “Uunta, ¿urutía juísha támam?”

<sup>26</sup>Jesussha tímiayi “Ti nekas tájarme. Aents tujintiamu nekáa asarum éatsurme. Antsu tanta yuarum jémaru asarum éatrume. <sup>27</sup>Juyá yurumak amuukatin asamtai ti pachisairap. Antsu amuukashtin yurumak tuke iwiaaku pujustinian amaana nu takarsatniuiti. Nú yurumkanka Wi, Aents Ajasu asan,

susattajrume. Yus Apa nuna túratniun surus “Juka shuáran Yáinkíartiniaiti” túrutui” tímiayi.

<sup>28</sup> Tutai inintrusarmiayi “¿Warí túratniuitiaj? Yus wakerana nu umiktin?”

<sup>29</sup> Jesussha tímiayi “Yus akupta asa Winia enentáimtursarat tusa wakerawai.”

<sup>30</sup> Tutai aniasarmiayi “¿Aentsti tujintiamuka warí túrattam ii físar Ámin nekas enentáimtustin? Chikichcha túratá. <sup>31</sup> Yaunchu ii uuntri aents atsamunam maná yurumkan nayaimpinmaya susamun yurumáwarmiayi. Yus-Chichamnum núnik áarmaiti: “Nayaimpinmaya yurumkan Yus susamiayi.” Tu áarmaiti” tiarmiayi.

<sup>32</sup> Jesussha tímiayi “Wi tájana nu nekasaiti. Muisais atumí úuntriñ nayaimpinmaya yurumkan súsachmiayi. Antsu winia Apar yamá nekas apatkun nayaimpinmaya súramui. <sup>33</sup> Iis, Yusaiya apatkunka, nayaimpinmaya tára nu súramui tura nekas apatuk asa ashí shuaran nekas iwiaakman súawai.”

<sup>34</sup> Tutai “Uunta, nu apatuk tuke amasta” tiarmiayi.

<sup>35</sup> Tura Jesussha tímiayi “Wiitjai nu apatuk nekas iwiaakman súana nu. Winí winiana nú shuar penké tsukamashtatui, tura Winia enentáimturna nusha tuke kitiaarchattawai. <sup>36</sup> Túrasha wi túramu wáinkíurmesha winia chichamur enentáimtatsrume. <sup>37</sup> Ashí shuaran winia Apar tsankatrukarmiania nu, Wíi shuar ajasartatui. Winin winiana núnaka penké nakitrashtatjai. <sup>38</sup> Wi wakeraj nuna túratniun táchaitjai antsu Winia akuptukmia nuna umirkatniun táwitjai. <sup>39</sup> Winia Apar akuptukuiti tura juna wakerawai. Ashí winia tsankatrukman emenkátsuk amuukatin tsawantai iniantkiarat tusa wakerawai. <sup>40</sup> Yus Apa wakerana nu júiti. Ashí

shuar Winia “Yusa Uchirinti” tu enentáimturkui yamaram iwiaakman tuke takusat tusa wakerawai. Nú shuarnaka amuukatin tsawantai iniantkittiajai” tímiayi Jesus.

<sup>41</sup> Tura Jesus “Wiitjai, nayaimpinmaya apatuk akupkamu” takui Israer-shuar Jesusan áujmatirmiayi.

<sup>42</sup> Tura tiarmiayi “Ju Jesuschakait, Jusé uchiríya nu. Iikia ni aparísha nukurísha nékatsjik. ¿Itiurak “Nayaimpinmaya táraitjai” ta?” tiarmiayi.

<sup>43</sup> Jesussha tímiayi “Tu áujmatrukairap. <sup>44</sup> Shuáran winia Apar akúpturkachuitkiunkia penké weanturkachainti. Tura Winia akupturna nuna amuukatin tsawantai iniántkittiajai. <sup>45</sup> Yúsnan etserniu áarmarín tawai “Ashí Yus jintintiamu ártatui”. Núnisañ ashí Yusa chichamen antukar unuimiatainiakka Winí táiniawai” tímiayi.

<sup>46</sup> ‘Aya Wiki Yúsaiya tau asan Yúsan wáinkiaitjai. Chikichka penké wáinkiachuiti. <sup>47</sup> Ti nekas tájarne. Winia enentáimturna nú shuarka yamaram iwiaakman amuukashтинian takakui. <sup>48</sup> Wikia iwiaakman súana nú apatkuitjai. <sup>49</sup> Iis, atumí uuntri aents atsamunam maná yurumkan yúawariatsha ashí jákarmiayi. <sup>50</sup> Antsu Wi tájana nú apatkun shuar yúakka jákachartatui. <sup>51</sup> Wikia nayaimpinmaya iwiaaku apatkuitjai. Nu apatkun shuar yuakka tuke iwiaaku átiniaiti. Nu apatkun Wi susattaj nusha winia ayashruiti. Ashí shuar Yusai iwiaaku pujusarti tusan winia ayashrun susattajai” tímiayi Jesus.

<sup>52</sup> Nuyá nuámtak áujmattsar tiarmiayi “¿Itiurak ni ayashínkeshha ayurtamat-taj?” tiarmiayi.

<sup>53</sup> Jesussha tímiayi “Ti nekas tájarne, Wi Aents Ajasu asantai winia ayashur yúatniuitrume. Winia ayashur yúachmeka tura winia numpar umarchamka nekas iwiaaku pujatsrume.



<sup>54</sup>Winia ayashrun yúana nuka tura winia numparun úmakka yamaram iwiaakman amuukashtinian takakui. Tura nu shuaran amuukatin tsawantai iniántkíttiajai. <sup>55</sup>Winia ayashruka nekas yurumkaiti tura winia numparsha nekas umutainti. <sup>56</sup>Winia ayashruncha yúaka tura winia numparnasha úmaka Wijíai tsanin pujawai tura Wisha nu shuarjai tsaninkian pujajai. <sup>57</sup>Yus Apa, Winia akuptukuka, nu iwiaakma nérenniuiti. Tuma asantai ni iwiaakmarin iwiaaku pujajai. Núnisan Winia yurakka winia iwiaakmarui iwiaaku pujustatui. <sup>58</sup>Nayaimpinmaya apatkun tajai. Ju apatuk maná yurumka áintsachuiti. Atumí uuntri maná yurumkan yuawarsha ashí jákarmiayi. Antsu ju apatkun shuar yúakka tuke iwiaaku pujustatui” tímiayi Jesus. <sup>59</sup>Núnaka Jesus Israer-shuar iruntainiam unuiniarmiayi.

### Iwiaaku chicham

<sup>60</sup>Nu chichaman antukar Jesusa unuiniamuri chicharainiak “Nii tana nu ti itiurchat asantai ¿yaki antukminiait?” tiarmiayi.

<sup>61</sup>Jesussha ni áujmatman nekáa tímiayi “Átum “ju chicham itiurchataiti” tárumek. <sup>62</sup>Wátsek, Wi nayaimpiniam pujumiaj nuí waketkimtaisha ¿urukawaintrumek? <sup>63</sup>Warí, aya wakanik iwiaakman súwaiti. Ayashkia penké áantrai nekas iwiaaku awajsatniun. Wi tájana nujai imiá nekas wakankia iwiaaku awajsamniaiti” tímiayi Jesus. <sup>64</sup>Tura Jesus Nin enentáimtachun tura Nin suruktatna nunasha yaunchu neka asa ni unuiniamurin tímiayi “Atumíncha winia chichamprun enentáimtachu tuke awai. <sup>65</sup>Nu asantai tímiajrume “Shuáran winia Apar akupturkachmaitkiunkia penké

weanturkachainti” tímiajai” tímiayi Jesus.

<sup>66</sup>Nuyasha ni nemarniuri untsurí armia nu Jesusan ikiukiar atakka Niijjai wekasacharmiayi. <sup>67</sup>Nuyá Jesus ni tuse (12) unuiniamurin chicharainiak “¿Atumsha wétin wakerarmek?” tímiayi.

<sup>68</sup>Semuñ Pítrusha áikmiayi “Uunta, ¿yáinin wetaj? Ame chichammijian nekas iwiaaku áminiaiti. <sup>69</sup>Ame Kristu asam nekas iwiaaku Yusa Uchirínme. Nuka enentáimtusar ti paant nékaji” tímiayi.

<sup>70</sup>Jesussha tímiayi “Ashí tuse (12) árumna nu achikiuitjarme nekas Wí shuar ajastin. Tuma ain atumín chikichik iwianchiiti” tímiayi. <sup>71</sup>Nuna taku Jútas Iskariútin, Semunka uchirín, enentáimtus tímiayi. Jútassha ni unuiniamurintiat Jesusan ukunam surukmiayi.

### Jesusa yachísha Nin enentáimtuscharmiaiyi

**7** Nu nankaamasmatai Jesus Kariréa nunkanam wekaimiayi. Jutía nunkanam wéchamiai Israel-shuara uuntri nuí máataj tutai. <sup>2</sup>Tura Israel-shuar aak aakmatai namperi jeatemantai <sup>3</sup>Jesusa yachí wishikiainiak tiarmiayi “¿Urukamtaí juísha pujam? Jutía nunkanam wetá, aisha ame unuiniamuram túram nuna ísarat. <sup>4</sup>Ashí shuar nekaawarat tákumka úukam túrawaip. Ti tujintiamu túriniaitkiunka ashí shuar fimmianum túratá” tiarmiayi. <sup>5</sup>Ni yachísha ishichkisha Nin enentáimtachu ásar tiarmiayi.

<sup>6</sup>Tura Jesus tímiayi “Winia tsawantur nampernum wétin jeatsui. Atum-jainkia nánkamas tsawant wétin penkeraiti. <sup>7</sup>Ju nunkanmaya aents atumni-aka kajertamatsrume. Antsu ni tunaarin etsertin asantai Wíniaka kajertuini-awai. <sup>8</sup>Átumka nampernum wetarum.

Wikia tsawantur jeachkui wéatsjai.”  
<sup>9</sup> Juna tinia Jesuska Kariréa nunkanam juákmiayi.

### Aak aakmatai nampernum Jesus timia nu

<sup>10</sup> Ni yachi wearmatai Jessussha nampernum wémiayi. Tura nekarawarain tusa úumak wémiayi. <sup>11</sup> Israer-shuara úuntrisha námper irunturmanum eakar “Nu aishmansha ¿tuin pujá?” tiarmiayi. <sup>12</sup> Ashí shuarsha Nin áujmatiarimiayi. Chikich “pénkeraiti” tiarmiayi. Tura chikichcha “Pénkerchaiti. Aya anañkartawai” tiarmiayi. <sup>13</sup> Tura Israer-shuara úuntrin ashamainiak uuk áujmatiarimiayi.

<sup>14</sup> Nampersha ajapén ajasmatai Jesus Yusa Uunt Jeen wayá shuáran unuiniamiayi. <sup>15</sup> Israer-shuara úuntrisha nuna íisar ti enentáimsar chichaak “Jusha unuimiátrachiatcha ¿itiurak imiá neka?” tiarmiayi.

<sup>16</sup> Jessussha tímiayi “Wi unuiniajna nu winia chichampruchuiti antsu Winia akuptukua Núnan unuiniajai. <sup>17</sup> Yus wakerana nuna shuar nekas umiktinian wakerakka winia chichamprun nekaattawai. Nekas Yúsnaitkiuinikia, nuna nekaattawai. Aya wi enentáimmiajajain chichaakuisha, nuna nekaattawai. <sup>18</sup> Ni enentáimmiajajai chichaana nuka ashí shiir enentáimtursarti tusa chichaawai. Antsu nin akupka nuna shiir awajserti tusa wakerak, nekas wáitratsuk tawai. <sup>19</sup> Muisais Yusa akupkamurin atumí uuntrin amaschamka. Tuma ain nu umitsuk mantuatin wakerutarme” tímiayi Jesus.

<sup>20</sup> Nu shuarsha tiarmiayi “Wáurtsmek. ¿Ya mantamataj tusa wakera?”

<sup>21</sup> Jessussha tímiayi “Ayampratin tsawantaj chikichkí túramtai ti enentáimtsurmek. <sup>22</sup> Muisais ashí tsupirnaktinian akupkachmiayi. Antsu

ni uuntrinikia nuna akupka ániawai. Tuma ain átumka Muisais akupkamu umiktai tusarum ayampratin tsawantajsha uchi áishman tsúpirnaitrume. <sup>23</sup> Wátsek, Muisais akupkamu uminkiatí tusarum ayampratin tsawantajsha uchi áishman tsúpirkurmekaka ¿urukamtai Wi ayampratin tsawantaj áishmanka ayashí takamtsuk tsuármatai kajertarum? <sup>24</sup> Shuar túrana nu íisam wárik súmamtikiawaip. Antsu inintrúsam paant nekaam, neka nu enentáimtusta” tímiayi Jesus.

### Jesus Yúsnumiá akupkamuiti

<sup>25</sup> Nuyá Jerusarénnumiá shuar tiarmiayi “Maatai tuinia núchakait. <sup>26</sup> Tura nuí ashí ántamunam étserei tura suntar páchiniatsui. ¿Ii uuntrisha “Nekas Krístituiti” tu enentáimtuiniawash? <sup>27</sup> Antsu nekas Kristu taa tuyan winiá nekanash-tatui tura ju pujamuka ashí nékaji” tiarmiayi.

<sup>28</sup> Jesus nuna antuk, Yusa Uunt Jeen wajá kakaram chichaak tímiayi “Winia nekararum tuyá winiaj nu nékarme. Kame núnisrum enentáimprume. Tura winia enentáirjajai táchaitjai antsu winia Apar akuptukuiti. Niisha ti nekas akupniusha átumka nékatsrume. <sup>29</sup> Antsu Winia akuptukuitkiui aiyá tau asan Wikia nékajai” tímiayi. <sup>30</sup> Nuyá sepunam enkeataj táyat achikcharmiayi ni tsawantri jeachu asamtai. <sup>31</sup> Tura untsurí shuar Nin enentáimtusar “Kristu ta ¿nuna nankaamas aentsti tujintiamun túratpiash?” tiarmiayi.

### “Eátkáttarme tura wáitkiashtrume” tímiayi Jesus

<sup>32</sup> Pariséusha Israer-patri úuntrisha Jesusnan timian antukar suntaran akupkarmiayi Jesusan achikiar sepunam enkeawarat tusar. <sup>33</sup> Nuyá Jessussha tímiayi “Aya ishichik tsawant atumjai pujustatjai. Nuyá

ataksha Winia akuptuku pujana nuḡi waketkittiajai. <sup>34</sup>Átumka eátkáttarme tura Wi wéajna nuḡi wéchamniaitkiuram wáitkiashtatrumé.”

<sup>35</sup>Israer-shuarsha nuamtak aniniaisarmiayi “¿Jusha tuḡi wéakuin iisha wáinkiashtataj<sup>i</sup>. Israer-shuar apachnium pujuinia nuḡi we apachin unuiniartatuak. <sup>36</sup>Nii timia nu ititurkit. “Átumka eátkáttarme tura Wi wéajna nuḡi wéchamniaitkiuram wáitkiashtatrumé” tana nu ititurkit?” tiarmiayi.

**Yamaram iwiaakman súana nú entsa**

<sup>37</sup>Jista amúamunam ti shiir najanawarmia nu tsawantaj Jesus wajaki kakaram chichaak tímiayi “Shuar ni enentáin kitiamakka Winin taa umar kitiakén imíkráti. <sup>38</sup>Winia enentáimturna nuka ni enentáiyá entsa wa áintsan yamaram iwiaakman súana nú entsa jiinkittiwai.”

<sup>39</sup>Nuna taku Jesus “Ashí Yúsán enentáimtusarun Yusa Shiir Wakaní súsatniuiti” tímiayi. Tura núnisan Yus-Papiniumsha áarmaiti. Antsu Jesus tuke nayaimpiniam wéatsajin Yusa Wakaní shuar súasachmauyayi.

**Shuarsha niisháa niisháa enentáimprarmiania nu**

<sup>40</sup>Chíkich shuarsha nuna antukar “Ju nekas Yúsán etserin tátinia núiti” tiarmiayi. <sup>41</sup>Chikichcha “Ju nekas Krístuiti” tiarmiayi. Tura chíkichkia Jesus Kariréanmayaiti tu enentáimiainiak tiarmiayi “Warí, ¿Kariréa nunkanmayá Kristu áminkiait? <sup>42</sup>Yus-Papinium paant tawai “Krístuka yaunchu uunt akupin Tawit weeanmayá akiinatniuiti, tawai. Tura Tawitia pépruriyá Pirinnumia átiniaiti” tawai” tiarmiayi. <sup>43</sup>Tuma asamtai shuar niisháa niisháa enentáimprar kanakiarmiayi. <sup>44</sup>Chíkich aiyá nuka

“sepunam enkeatai” tiarmiayi túrasha túracharmiayi.

**Israer-shuara uuntrí Jesusan enentáimtuscharmiania nu**

<sup>45</sup>Suntarsha waketkiarmiayi. Tura Pariséusha Israer-patri uuntrisha “¿Urukamtai itiachuram?” tiarmiayi.

<sup>46</sup>Suntarsha tiarmiayi “Chikichkisha ju áishman chichaa áanis chichaschaiti” tiarmiayi.

<sup>47</sup>Nuyá Pariséu tiarmiayi “Atumsha anannarume. <sup>48</sup>Pariséutisha uuntcha nuna enentáimtuiniawash. <sup>49</sup>Penké shuarka yaunchu akupkamun nékachua nuka yajauchiniam yuminkramu áiniawai” tiarmiayi.

<sup>50</sup>Nikiutémusha, kashi Jesusan tarimia nu, Pariséuítiat tímiayi <sup>51</sup>“Ti shuartikia, shuar ni túramun etserkamu ántutsuk súmamtikiachminiaiti” tímiayi.

<sup>52</sup>Nuinikia niisha tiarmiayi “Wats, amesha Kariréanmayanchuashitiam. Yus-Chicham áujsam nekaattame. Kariréanmayá Yúsán etserin penké táiniatsui” tiarmiayi.

**Nuwa wáinmakman Jesusan itiararmiania nu**

<sup>53</sup>Nuyá ashí ni jeen waketkiarmiayi.

**8** Tura Jesuska Uriwiu náinnium wémiayi. <sup>2</sup>Tura kashin tsawar Yusa Uunt Jeen atak támatai ashí shuar Nin káutkararmiayi. Túrawarmatai Jesus pujus unuiniarmiayi. <sup>3</sup>Nuyá Israer-shuara jintinniurisha Pariséusha nuwan wáinmakman Jesusan itiararmiayi. Tura ashí iruntramunam ajapén awajsarmiayi. <sup>4</sup>Tura Jesusan tiarmiayi “Uunta, ju nuwa tsanirma pujá achinkiaiyi. <sup>5</sup>Muisais akupkamunmasha nuna túraka “kayajai tukurar máatniuiti” tawai. ¿Amesha warintmea?” tiarmiayi. <sup>6</sup>Aya

mamikmar nekapsatai tusar tiarmiayi. Nin sumamtikiatniun wakeriarmiayi.

Nuyá Jesus tsuntsumá ni uwejéjaj niunká áarmiayi. <sup>7</sup>Tura tuke iníam wajaki tímiayi “Ayu, atumíya tunáa túrichu ákunka kayan achik nin emka tukuti” tímiayi. <sup>8</sup>Tura nuna t̄i, ataksha tsuntsumá nunká áimiayi.

<sup>9</sup>Tura ni chichamen antukar ni enentáin sumamawar úntunmiá jukí chikichik chikichik jiinki wéarmiayi.

Ashí wéarmatai Jesus Nínki nuwájaj juákmiayi. <sup>10</sup>Jesussha wajaki aya nuwanak wáiniak tímiayi “¿Ámin súmamtikramainia nusha tuiñ pujuinia. Chikichikisha áwak?” tímiayi.

<sup>11</sup>Niisha “Atsá, Uunta. Chikichikisha atsawai” tímiayi.

Nuyá Jesus tímiayi. “Ayu. Wissha súmamtikiatsjame. Yamaikia weme atakka tunáa túrawaip” tímiayi.

### Jesus tsáapnia áintsankete

<sup>12</sup>Ataksha Jesus Yusa Uunt Jeen iruntrarun tímiayi “Ju nunkanam Wi tsáapnia áintsan shuara enentáin tsáapniajai. Ashí Wijíaj tsaniñ wekaana nú shuar ni enentáin kiritniunam wekasash-tatui antsu tsáapnin yamaram iwiaakman súana nujaj wekasattawai.”

<sup>13</sup>Pariséu nuikia tiarmiayi “Ame péñkerum tau asam támena nu áantraiti.”

<sup>14</sup>Jesus tímiayi “Tuyá winiaj tura tui weaj nu nékatsrume, tura Wikia nékajai. Tuma asan winia péñkerun táyatanak tájana nu péñkeraiti. <sup>15</sup>Ju nunkanmaya aents enentáimmiyajaj enentáimtakrum ti súmamtikrume. Tura Wikia chikichinkesha súmamtiktusujai. <sup>16</sup>Tura súmamtikkiunka awajitsuk túrajai. Iis, Wiki shuar túramun péñkerashit tusan enentáimtsujai antsu winia Apar Winia akuptukua nusha Wijíaj métek shuar túramun nékawai. <sup>17</sup>Atumí akup-kamuriñ áarmaiti: “Jimiará shuar mai

nú chichamnak tákuinikia nu chicham nekasaiti.” <sup>18</sup>Wátsek Wissha winia Aparsha mai métek taji. Winia Aparsha akuptukuiti” tímiayi.

<sup>19</sup>Tutai “¿Ame apasha tui pujá?” tiarmiayi.

Jesussha tímiayi “Átumka Winiasha winia Aparsha nékatsrume. Winia nékarkurmeka winia Aparsha nekaawaintrume.” <sup>20</sup>Nuna Yusa Uunt Jeen Yusa kuítrín suinia nuí tímiayi. Tuma ain sepunam enkeatniun achikcharmiayi ni tsawantri jeachu asamtai.

### “Wi wéajna nuí wéchamniaitrume” tímiayi Jesus

<sup>21</sup>Jesus ataksha tímiayi “Wikia wéajai. Atumsha eátkáttarme tura wi wéamunam wéchamniaitkiuram atumí tunaarijjaj jakattarme.”

<sup>22</sup>Israer-shuarsha tiarmiayi “Wi wéamunam wéchamniaitrume” tutai, nuinikia máamatpiash” tiarmiayi.

<sup>23</sup>Nuinikia Jesus tímiayi “Átumka nunkayaitrume antsu Wikia nayaimpinmayaitjai. Ju nunkayaitrume tura Wikia juyanchuitjai. <sup>24</sup>Tuma asamtai tájarme “Atumi tunaarijjaj jakattarme.” Nekas Wi tájana núitjai. Tura nu enentáimtachkurmeka atumi tunaarijjaj jakattarme” tímiayi.

<sup>25</sup>Niisha aniasarmiayi “¿Amesha yáitiam?”

Jesussha tímiayi “Yaunchu tájarme. <sup>26</sup>Nu arantcha atumin súmamtikiatjarum tusan ti tímniaitjai. Winia Apar akuptukua nuka tuke nekasa nuna tawai. Tura aya ni taman antukan ashí shuaran nunak tajai” tímiayi. <sup>27</sup>Tuma ain ni Aparin áujmatman péñké nekaacharmiayi. <sup>28</sup>Tuma asamtai tímiayi “Aents Ajasuitjiana ju, numiniam ajintruarum yakí takuriakrumin nújainkia nekarattarme. Wi tájana núitjai tura winia enentáir-jaj takatsuk aya winia Apar unuítur-

manak tájai. <sup>29</sup> Winia akuptukua nuka tuke Wíjiaín pujawai. Winia Apar wak-eramun tuke shiir túrakui ikiurkichiiti” tímiayi. <sup>30</sup> Tutai untsurí shuar Nin nekas enentáimtusarmiayi.

### **Yus-shuarsha tura tunaanum emetamusha**

<sup>31</sup> Israer-shuaran Nin shiir enentáimtusarmia nuna Jesus tímiayi “Wi tájar-mena nu yawetsuk túrakrumka nekas winia unuiniatur átatrume. <sup>32</sup> Nújaiísha timiá nekas ana nu nekaattarme tura nekas ankant ajastatrume” tímiayi.

<sup>33</sup> Niisha tiarmiayi “Iisha Apraám weeaitji. Chikicha takarniur átai tusar penké emetachmaitji. ¿Urukamtai “Ankant ajastatrume” tame?” tiarmiayi.

<sup>34</sup> Jesus tímiayi “Timiá nekasaiti, ashí shuar tunaan túruinia nuka nu tunaa-jai emetamuiti. Tuma asa takarniua núnisan ajasuiti. <sup>35</sup> Takarniusha ajapnamnia asamtai Yus atumin ajapramamniaitrume. Tura Akupniu Uchirínkia ni Aparíjiaí tuke pujawai. <sup>36</sup> Tuma asamtai Akupniu Uchirí ankant awajtamsamtainkia imiá nekas ankant pujustatrume. <sup>37</sup> Átum Apraám weeaitrume nékajai. Túmaitiatrum winia chichamur ántachu asarum mantuataj tárume. <sup>38</sup> Winia Apar iniaktursamun áujmatjai. Átumka atumí uuntri timia túrarme” tímiayi.

<sup>39</sup> Tutai niisha tiarmiayi “Íikia Israer-shuar asakrin ii úuntriníka Apraámaiti” tiarmiayi.

Tura Jesus tímiayi “Nekas enentáimin Apraám weeaitkiurmeka níiya núnis túrawaintrume. <sup>40</sup> Nekas ana nuna Yus iniaktursamta nuna ujakjarne, tuma aín mantuataj tarume. Apraámka nuní túrachmiayi. <sup>41</sup> Antsu atumí uuntri túrana áintsarum túrarme” tímiayi.

Tutai niisha tiarmiayi “Warí, tsanirnumiá akiiniachuitji. Ii uuntri Yúskete. Niisha ii Aparínti.”

<sup>42</sup> Tura Jesus tímiayi “Yus nekas atumi Aparíntkiuiníka Winiasha anentíntrume Yúsnumiá tau asamtai. Wisha winia enentáimmiarjai jui táchaitjai antsu Yus akuptukuiti. <sup>43</sup> ¿Urukamtai Wi tájana nu imiá nékatsrum? Wi tájana nu nakitia asarum winia chichamur ántatsrume. <sup>44</sup> Atumí aparínkia úunt iwianchiiti. Tura niiniu asarum nii wakera nu túrarme. Yámankamtaiksha úunt iwianchkia tuke mankartini-aiti. Nekas ana nunasha nakitiawai tuke wáitrin asa. Wáittraksha níniu-nak chichaawai. Iis, waitia uuntri asa tuke wáitriniaiti. <sup>45</sup> Tura Wikia nekas takui átum enentáimtursume. <sup>46</sup> ¿Yaki chikichí tunaajai súmamtikruamniait? Nuikia Wi nekasa nuna tau aisha ¿urukamtai enentáimtursume? <sup>47</sup> Yús-shuarka Yus timian ántawai tura átum Yúsnachu asarum Wi tájana nu naki-tiarme” tímiayi.

### **Apraám akiintsain Jesus pujumiayi**

<sup>48</sup> Nuikia Israer-shuar tiarmiayi “Maa, ti nekas tátsujik “Ame Samarianmaya shuáraitme. Tuke yajauch áiniawai nusha. Nu arantcha iwianchrukuitme amesha” nekas taji” tiarmiayi.

<sup>49</sup> Jesussha tímiayi “Iwianchrukchaitjai. Áyatik winia Aparun shiir enentáimtikiajai. Tura átumka yajauch chichartarme. <sup>50</sup> Wikia “shiir enentáimturarti” tátsujai túrasha Yuska ashí shuar Winia shiir enentáimturat tusa wakerawai. Niisha Yus asa ashí shuar túramun penkerashit tusa nekaattawai. <sup>51</sup> Ti nekasaiti. Wi tájana nuna enentáimta nú shuarka penké jákashtiniaiti” tímiayi.

<sup>52</sup> Nuiñkia Israer-shuar tiarmiayi “Pai, yamaikia ti paant íwianch takakme. Apraámsha ashí Yúsnan etserniusha jákaruiti tura Ame “Wi tájana nuna enentáimtaka penké jákashtiniaiti” tát-sumek tiarmiayi. <sup>53</sup> ¿Nuñkia ii uuntri

Apraám nan̄kaamaskaitiam. Niisha tura Yúsnan etserniusha jákacharuk áinia. Itiurak imiá nan̄kaamantu enentáimtumam?” tiarmiayi.

<sup>54</sup> Jesussha tímiayi “Wiki shiir enentáimtumaknaka penké áantrai. Antsu Winia shiir enentáimturna nu winia Aparuiti. Nusha átumka “winia Yúsruiti” tárumna núiti. <sup>55</sup> Nusha táyatrum Nin nékatsrume. Wikia Nin nékajai. “Nin nékatsjai” tákunka atumjai métek wáitrin áintjai. Tura Nin neka asan Nii tana nuna tuke túrniaitjai. <sup>56</sup> Apraámka, atumí uuntri, imiá yaunchu jákaitiat Wi ju nun̄kanam tátinian wararas nákasmiayi. Tura wáitiak ti shiir warartusmiayi” tímiayi.

<sup>57</sup> Nuyá Israer-shuar Jesusan tiarmiayi “Warí, sen̄kuenta (50) uwí takaktsume túmaitiatam Apraáman wáinkiamjai tame.”

<sup>58</sup> Jesussha tímiayi “Ti nekas tájarne, Apraámka pujatsain Wikia pujajai” tímiayi Jesus.

<sup>59</sup> Nuna takui kayan achikiar “Jesusan tukutai” tiarmiayi. Tura Jesus úumak ni matsatmanum ajapénin weak Yusa Uunt Jeenia jiinki wémiayi.

### Kusuru akiinian Jesus tsuármiania nu

**9** Jesus ni unuiniamurijjai wesa áishman̄kan kusuru akiinian wáinkiamiayi. <sup>2</sup> Ni unuiniamurisha aniasarmiayi “Uunta, jusha zurukamtaí kusuru akiiniawit. Yana tunaarijjain kusuru akiini-ait. Niiniuajaiimpiash, apariniuajaiimpiash túrunawit?” tiarmiayi.

<sup>3</sup> Jesus tímiayi “Ni tunaarijjainchusha ni apariniuajainchusha túrunaiti. Antsu Yus ni ayashín túratniua nu paant atí tusa túrunaiti. <sup>4</sup> Tsawajikia takastini-aiti. Yamaikia Winia akuptukua nuna takatrín túratniuitjai. Kashi ajasmataí takastin atsuttawai. <sup>5</sup> Jú nun̄kanam pujakun shuara enentáin tsáapnimtikratniuitjai” tímiayi. <sup>6</sup> Nuna chichas nun̄ká

usukmi nun̄kajai pachimiar kusuru jjin yakarmiayi. <sup>7</sup> Nuyá chichaak “Siruí pajamtaí entsanam nijiamauta” tímiayi. Siruísha nu chichamnum “akupkamu” tawai. Kusurusha we nijiamar pen̄ker ímiar támiayi.

<sup>8</sup> Nuyá ni írutkamurisha nuik wáinin ármia nusha tiarmiayi “Juka pujus tuke kuítian seamniuya núchakait.” <sup>9</sup> Chíkich “Ee, núkete” tiarmiayi. Chíkichcha “Atsá, núchaiti; kame nuash tumainti” tiarmiayi.

Tura nin̄ki “Ee, wiitjai” tímiayi.

<sup>10</sup> Tutai aniiniak “¿Itiurak yamaikia ímiam?” tiarmiayi.

<sup>11</sup> Niisha tímiayi “Áishman̄ Jesusa nu tsakusan jíirun yakartur “Siruí pajamtaí entsanam nijiamauta” turutmiai. Takui wena nijiamaran paant iimpramjai” tímiayi.

<sup>12</sup> Tutai “Nu áishmansha tuiñ pujá” tiarmiayi.

Niisha “Cha, nékatsjai” tímiayi.

### Pariséu kusuru tsuáрман inintrusarmiania nu

<sup>13</sup> Nuyá kusuru tsuáрман Pariséunam júkiarmiayi. <sup>14</sup> Kame Jesus kusurun tsuarmia nuí ayampratin tsawantauyayi. <sup>15</sup> Tuma asamtaí Pariséusha itiurak ímniun tusar aniasarmiayi.

Niisha tímiayi “Jiiruin tsakusan yakaarámtaí, nijiamaran paant iimjai.”

<sup>16</sup> Nuyá chíkich Pariséu shuarnumiá nuamtak tunaiyar “Juna tsuáruka Yúsaiyanchuiti. Kame ayampratin tsawantaí túraití” tiarmiayi.

Tura chíkichcha “Tunáa shuaraitkuin̄kia júnisan túratniun tujinkiaayi” tiarmiayi. Nujai akannaikiarmiayi.

<sup>17</sup> Tsuármacha ataksha aniasarmiayi “Ámin tsuármarua nu ¿warí enentáimtam?” tiarmiayi.

Tutai “Wikia “Yúsnan etserniuiti” tajaí” tímiayi.

<sup>18</sup>Tura Israer-shuar nekas kusuruitiat yamá iimiui tu enentámtuscharmiayi Pariseu. Tuma ásar ni aparíncha untsukar <sup>19</sup>inintrusarmiayi “¿Ame uchiram kusuru akiinia tárumna nukait. Itiurak yamaikia iimia?” tiarmiayi.

<sup>20</sup>Ni aparísha tiarmiayi “I uchirínkia kusuru akiinama nu nékaji. <sup>21</sup>Tura iisha nékatsji itiurak yamaikia iimia. ¿Yátsuk péñker tsuáruit? Niisha úntchakait, nii aniastarum. Nínki ujatmakarti” tiarmiayi. <sup>22</sup>Sapijmiak tiarmiayi. Israer-shuara úuntrínkia “Jesus Yus akupkamu asa nekas Krístuiti” tuinia núnaka Israer-shuara iruntainmaya jiiki akupnakti tiniu ásarматаi tsuarma aparí ashankarmiayi. <sup>23</sup>Nu asamtai ni aparí “Niisha úntchakait, nii aniastarum” tiarmiayi.

<sup>24</sup>Nuínkia Israer-shuara uuntri kusuru tsuárman ataksha untsuk tiarmiayi “Yus ímmianum nekasa nu titiá, ju áishmankka tunaarinniuii nékaji” tiarmiayi.

<sup>25</sup>Tutai tímiayi “Kame tunaarinchashit. Nékatsjai. Antsu junak nékajai. Yaunchu kusuruitiatan yamaikia ímjiai.”

<sup>26</sup>Ataksha aniiniak “¿Itiurtámkama. Itiur ímtikrammia?” tiarmiayi.

<sup>27</sup>Niisha tímiayi “Yaunchu tájarne tura anturtatsrume. ¿Urukamta ataksha titi tusa wakerarum. Niiniu ajastin enentáimprumek?” tímiayi.

<sup>28</sup>Nuínkia katsekkar “Ámeke ní shuarínme. Tura iikia Muisaisa shuáríntji, tiarmiayi. <sup>29</sup>Yus Muisaisan akupkaiti iikia nékaji antsu nu áishman nékatsji. ¿Tuyánskait?” tiarmiayi.

<sup>30</sup>Áishman tsuarma tímiayi “¿Ausha itiurtsuk áminiait? Winia ímtikruma nu átumka nékatsrume tuyáñkit. <sup>31</sup>Paant nékaji tunaarinniun Yus anturtsui. Tikishmatar ni wakeramun túruinia nunak anturui. <sup>32</sup>Yáunchusha kusuru akiinian tsuáruka tuke atsuwaiti.

<sup>33</sup>Ju áishman Yúsaiyanchuitkiunka penké túrachayai” tímiayi.

<sup>34</sup>Nuínkia tiarmiayi “Ámeke tunaarintin akiiniaitiatmesha ¿in jintintin átaj tamek?” Nuna tiar jiiki awemarmiayi.

### Wakanín kusurua nu

<sup>35</sup>Kusuru tsuarman jiiki awemarma nuna Jesus nekaamiayi. Tura wáiniak “Yusa Uchiría nu enentáimtamek” tímiayi.

<sup>36</sup>Tsuarma tímiayi “Uunta, turuttia wisha nekaan enentáimtustaj.”

<sup>37</sup>Jesussha tímiayi “Wainme. Wiitjai ámijíai chichaajna nu.”

<sup>38</sup>Tutai, tikishmatar “Uunta, enentáimtajme” Jesusan tímiayi.

<sup>39</sup>Nuyá Jesus tímiayi “Shuara enentáin nekaan, akantratajtsan táwitjai. Ni enentáin kusuru ain iimtiknian tura ananmamuk “Yusnan nekaan paant ímjiai” tana nuna ukusturtinian táwitjai” tímiayi.

<sup>40</sup>Tutai Pariséu shuar nuí pujuarmia nu nuna antukar “¿Nuínkia iikia kusu-rukaitiaj?” tiarmiayi.

<sup>41</sup>Jesussha tímiayi “Átum kusuruitkiurmeka atumí tunaari wáinchakrum sumamachu áintrume. Tura “paant ímjiai” tau asarum sumamaitrume” tímiayi.

### Iikia murikiua áintsar aji

**10** Jesus tímiayi “Wi tájana nu ti nekasaiti. Shuar murikiun takakna nu ni murikrín wenuimiunam kashi ikuawai. Tura murik wenuimiunam pujuiniakui yajauch shuar murikiun kasamkatniun wakerakka wáitiniam wayachmin asa tanishnum waruk yajá wayawainti. <sup>2</sup>Antsu murikiu wáinniuka wáitiniam wayawai. <sup>3</sup>Waiti wáinniuka nekas murikiun wáinniun wáitin uratui. Muriksha ni wáinniuri chichamen nékainiawai. Niisha ashí ni murikrín

chikichik chikichik náarín anaitius untsúawai. Tura tsawáikia ni murikrín jiiiki ayurtainiam yarumui. <sup>4</sup>Tura ashí ni murikrín jiiir émtuki wéawai. Muriksha ni chichamen ántuiniak untsuam nemarainiawai. <sup>5</sup>Chíkich shuárnaka nékachu ásar nemarainiatsui. Antsu ni chichamen nékainiachu ásar pisainiawai.” <sup>6</sup>Nu métek-taku chichamnaka Jesus áujmatsamiayi tura shuar antukar nekaacharmiayi.

### Pénker wáinniuka Jesusaiti

<sup>7</sup>Nuyá Jesus tímiayi “Ti nekasán tá-jarme. Wenuimiu wáitirí murik wainia nuka Wiitjai. Shuarsha murikiu áintsar Winí wayamin ániawai. <sup>8</sup>Wi táatsain ashí táaruka kasa ániak winia shuarun kasamkatai tusa wakeriarmiayi. Tura winia murikiur Wíi shuar ániak nu shuaran anturkacharmiayi. <sup>9</sup>Wikia wáititjai. Ashí Winin wayáaka uwemprat-tawai. Tura murikiua áintsan wenuimiumaya jiiinki pénker yurumáttawai tura atak wayá ayamprattawai’ tímiayi.

<sup>10</sup>‘Kásaka aya kasamkatniuncha máatniuncha emesratniuncha wakerawai. Antsu Wikia yamaram iwiaakman tuke shiir atsumtsuk takusarti tusan táwitjai. <sup>11</sup>Wikia pénker wáinniuitjai. Pénker wáinniuka ni murikrín uwemtikrartaj tusa jakattawai. <sup>12</sup>Antsu aya kuitjai takauka ni murikrichu ániakui tura nekas wáinniuchu asa pénker wáintsui. Kame uunt yawá winiakui murikiun ikiuki pisaawai. Uunt yawasha murikiun achik tsakinmawai. <sup>13</sup>Nu shuarsha akikiam takáa asa murikiun enentáimtatsui. Nu asamtai aya pisaawai’ tímiayi.

<sup>14-15</sup>‘Wikia pénker wáinniuitjai. Winia Aparsha nékarui. Wisha Aparun nékajai. Núnisnak murikrun nékajai tura winia murikrusha nékarui. Wisha murikiun uwemtikrataj tusan jakattajai. <sup>16</sup>Chíkich muriknasha takakjai. Nusha

ju wenuimiumayanchu ániawai. Nunasha itiattajai. Nu muriksha Winia umirtukar ashí métek matsamsar chikichik wenuimiumaya ajasartatui tura chikichik wáinin átatui’ tímiayi.

<sup>17</sup>‘Winia murikrun uwemtikrataj tusan jakattajai turan atak nantaktiat-jai. Nu asamtai winia Apar anentui. <sup>18</sup>Wi wakerakun jakattajai. Wi wakerachkuinkia chíkichkia mantuachmini-aiti. Jákatniuncha tura nantaktinniasha winia Apar surusuiti’ tímiayi Jesus.

<sup>19</sup>Israer-shuarsha nuna antukar niisháa enentáimprar kanakiarmiayi. <sup>20</sup>Untsurí tiarmiayi “¿Urukamtai ántarum wáuruk tausha. Yajauch wakanin takaktsuk?” <sup>21</sup>Tura chikichcha tiarmiayi “¿Yajauch wakantrin-niusha núnisan chichasminkiait. Yajauch wakantrinniusha kusurun íimtikramniashit?” tiarmiayi.

### Israer-shuarsha Jesusan nakitiarmiiania nu

<sup>22</sup>Micha nantutin Israer-shuar Jerusarénum namperan najanainiawai. Nu nampernumsha Yusa Uunt Jee atak jeamman enentáimtuiniawai. <sup>23</sup>Jesussha Yusa Uunt Jee áachiniam wekasamiayi Sarumúnka wáitirija nui.

<sup>24</sup>Israer-shuarsha Nin téntakar tiarmi-ayi “¿Ame nekas Kristukaitiam? Ju chichamaik etserkata. ¿Urukamtia nekas paant tátsum?” tiarmiayi.

<sup>25</sup>Tutai Jesus tímiayi “Yaunchu tiniu ain enentáimturachmarme. Winia Apar akupkamun takaaajna nu ti paant awajttawai. <sup>26</sup>Tura átumka winia murikrichu asarum enentáimturtsurme. <sup>27</sup>Wisha winia murikrun untsuam anturtuiniak nemartuiniawai. Wisha wínianak mash nékajai. <sup>28</sup>Tura yamaram iwiaakman tuke jákashtinian súajai. Nu asamtai niisha menkakachartatui antsu Wi wainkia asamtai ¿yaki jurutkit? <sup>29</sup>Winia



Apar murikiun surusuiti. Niisha ashí nan̄kaamas kakaram asamtai ¿yaki uwejéyan atankit? <sup>30</sup>Wisha winia Aparjái iisha aya chikichkiitji” tímiayi Jesus.

<sup>31</sup>Tutai Israer-shuarsha atak kayan achikiar tukutaj tiarmiayi.

<sup>32</sup>Jessussha tímiayi “Winia Aparu kakarmarijiaí ti untsurí péñkera nuna takasuitjai. ¿Tújajimpia mantuattarum?”

<sup>33</sup>Israer-shuarsha Nin tiarmiayi “Pénker túra asakmin máataj tátsuji antsu Yus yajauch chicharkumin túrattaji. Ámeká shuáraitatam Yusa nuke enentáimtumame” tiarmiayi.

<sup>34</sup>Nuyá Jessussha tímiayi “Atumí akupeamuriin Yus timia nu áarmaiti: “Átum yúsaitrume” tawai. <sup>35</sup>Kame Yus-Papinium aarma nu tuke nekaschakait. Tuma asamtai ni chichamen antukarun Yuska “yúsaitrume” takui nuikia ti nekaschakait.

<sup>36</sup>Niisha yúsaitkiuñkia nuikia Yus Apa anaikia ju nun̄kanam akupkamu asan ti nekas Yúschakaitaj. Nújain̄kia wi “Yusa Uchirintjai” takui ¿itiurak “Yusan yajauch chicharui” túrutrum?

<sup>37</sup>Winia Apar túramu túrachkuñkia enentáimtursairap. <sup>38</sup>Tura nekas túrakuñkia enentáimtursatarum. Tura Winia nakitrakrumsha nuikia wi túramu enentáimtustarum. Nujain̄kia winia Apar Winin pujamu ashí nekaattarme.

Núnisnak Wisha Niin pujajai. Iisha chikichkiitji.” <sup>39</sup>Tutai ataksha sepunam enkeatai tiarmiayi. Túrasha Jesus uwempramiayi.

<sup>40</sup>Nuyá Jesus Jurtan̄ entsa amain wé yaunchu Juan̄ imiakrattainium pujusmiayi. <sup>41</sup>Ti untsurí shuar iyuwar tiarmiayi “Nekas Juan̄ka aentsti tujintiamun túrachiat ashí Jesusnan timia nu nekasaiti” tu tiarmiayi. <sup>42</sup>Nuisha untsurí Jesusan enentáimtusarmiayi.

## Rásaru jakamu

**11** Petania péprunam áishman̄, ni naari Rásaru, jaa pujumiayi. Nu péprunam Marí ni kajjiaí Mártajai pujumiayi. <sup>2</sup>Niisha Rásaru umai ármiayi. Nu Marisha ukunmanka kun̄kuinian sumak Jesusan kuer ni intiashjiaí japirmiayi. <sup>3</sup>Tura Rásaru jaakui ni umai Jesusan chichaman akuptuiniak tiarmiayi “Uunta, ame amikrum jaawai.”

<sup>4</sup>Jessussha nuna antuk tímiayi “Tuke jakataj tusa jaatsui. Antsu Yusa kakarmarisha tura ni Uchirí kakarmarisha jú sun̄kur tsuármanum paant atí tusa jaawai.” <sup>5</sup>Jesus Mártancha ni kajin̄cha tura ni umai Rásaruncha nekas aneemiayi. <sup>6</sup>Túmaitiat Rásaru jaawai taman antukiat ni pujamunam jimiará tsawant pujusmiayi. <sup>7</sup>Nuyá ni unuiniamurín “Ataksha Jutía nun̄kanam wetái” tímiayi.

<sup>8</sup>Tura ni unuiniamurisha tiarmiayi “Uunta, nuiksha Israer-shuar kayajai tukurmar mantamatai tícharmaka. ¿Nuí ataksha wétai támek?”

<sup>9</sup>Jessussha ju métek-taku chichaman tímiayi “Tsawajkia páantchakait. Tsawaj wekaana nu paant asamtai tukumkash-tatui. <sup>10</sup>Tura kashi wekaana nusha kirit asamtai tukumkáttawai. Núnisan̄ Wfi tuke pujakun winia takatrun takastini-aitjai. Túraknasha itiurchatan wáinkiashtatjai.” <sup>11</sup>Nuyásha Jesus atak tímiayi “Ii amikrú Rásaru kanarai. Wi ishintiartatjai.”

<sup>12</sup>Tutai ni unuiniamurí tiarmiayi “Uunta, aya kanarka nuñkia péñker ajastatui.” <sup>13</sup>Jesuska Rásaru jakamu nékayat “kanarai” tímiayi. Tura ni unuiniamurí Rásaru kajinmakua áintsan̄ kanarai enentáimprarmiayi.

<sup>14</sup>Jesus nuikia ti paant tímiayi “Rásaru yamaikia jakayi. <sup>15</sup>Tura nuí pujuscha asan kúntuts pujatsjai. Jean túrattajna nu íisrum ti nekas

enentáimtusattarme. Nuna nekaan shiir enentáimjai. Wátsek, iyutai.”  
<sup>16</sup>Nuyá Jimiampramu Tumas chíkich unuiniamurí nuj armia nuna “Iisha weri Niijíai métek jakatai” tímiayi.

**Iwiaaku átinniaasha jaka nantaktinniaasha Jesus nérenniuiti**

<sup>17</sup>Nuj taa, Rásarun kuaru tsawant ikiusman wáinkiamiayi. <sup>18</sup>Petania pépruka Jerusarénumia menaintiú kirumitru áinis tíjiuchiiti. <sup>19</sup>Tuma asantai untsurí Israer-shuar Mártasha Marísha, ni umai jakamtaí uutkui atsankrataj tusa weriarmiayi. <sup>20</sup>Mártasha Jesus tíjiuch ajasun nekáa inkiuntajtsa wémiayi. Antsu Marikia jeá pujumiayi. <sup>21</sup>Tura Marta Jesusan inkiun tímiayi “Uunta, Ame pujakminkia winia umar jákachaayi. <sup>22</sup>Tura tuke nékajai ashí Yus seamna nuna súramui.”

<sup>23</sup>Jesussha tímiayi “Ame umaimisha nantaktiatui.”

<sup>24</sup>Mártasha tímiayi “Nekas, ashí amuamunam jákaru nantaktin tsawantai nantaktiatui. Nuna nékajai.”

<sup>25</sup>Nuyá Jesus tímiayi “Iwiaaku átinia nérentin asan Wikia iniantkartiniaitjai. Winia enentáimturna nuka jakasha nantaktiatui. <sup>26</sup>Tura ashí iwiaaku pujana nusha Winia enentáimturaka penke jákashtatui. ¿Nu nekasaiti tu enentáimtamek?”

<sup>27</sup>Niisha “Ee, Uunta, ame Yusa Uchirínme. Krístuitme, uwemtikiartin jú nunkanam tátinia nu” tímiayi.

**Jesus Rásaru iwiansamunam taa úutmiania nu**

<sup>28</sup>Mártasha nuna tí, ni kai Marin untsuk úukan tímiayi “Uunt jui taa untsurmawai.” <sup>29</sup>Marisha nuna antuk wárik wajaki Jesusa iyuttsa wémiayi. <sup>30</sup>Jesussha péprunam jeatsuk Marta inkiunmanum pujumiayi. <sup>31</sup>Marí wari wajakí wématai Israer-shuar nu jeanam at-

sankrattsa pujuiniasha nuna íisar weri-armiayi. Iwiarsamunam úuttiasa wéat-suash tusa weriarmiayi. <sup>32</sup>Marisha Jesus pujamunam jeá tikishmatar tímiayi “Uunta, Ame pujakminkia winia umar jákachaayi.”

<sup>33</sup>Jesussha Marincha tura niijiai úutuncha wáiniak wáitnentaimta asa ti kúntuts pujusmiayi. <sup>34</sup>Tura “Tui iwiansamarum” tímiayi.

Niisha “Uunta, iitia” tiarmiayi.

<sup>35</sup>Jesussha úutmiayi. <sup>36</sup>Israer-shuarsha “Ti aneatsuk” tiarmiayi. <sup>37</sup>Tura chíkich “Kusuru tsuáru chukait. Nii pujakuisha Rásaru jákaampiash” tiarmiayi.

**Rásaru iniantkimiu**

<sup>38</sup>Jesussha ti kúntuts enentáimiar iwiansamunam weankámiayi. Náinnium asa paka taurma áuyayi. Tura kaya atutkamuyayi. <sup>39</sup>Tura Jesus “Kaya jurustarum” tímiayi.

Rásaru umai Marta tímiayi “Uunta, kuaru tsawant jákaiti. Mejeatsuk’ tímiayi.

<sup>40</sup>Tura Jesus tímiayi “Yus enentáimtakmeke Yusa kakarmari wáinkiatame tíchamkajam.” <sup>41</sup>Nuikia kayarin uratiarmatai Jesus nayaimpin iis tímiayi “Aparu, Winia anturtakmin yuminisajme. <sup>42</sup>Winiasha tuke anturtame tura ju shuaran pénker enentáimtikrataj tusan tajai. Ame akuptukuitmena nuna nekarmawarti.” <sup>43</sup>Nuna tinia kakaram untsuak “Rásaru jíinkitia” tímiayi. <sup>44</sup>Nujainkia penuarmartiuk jíinkimiayi. Yapinmasha jaanchjiai ijiamuyayi. Tura Jesus “Atirtarum. Wéti” tímiayi.

**Jesusan achiktin chichaman jurusarmiania nu**

*(Mateu 26.1-5; Márkus 14.1-2; Rúkas 22.1-2)*

<sup>45</sup>Untsurí Israer-shuar Marin nemariaru Jesus túramun íisar

enentámtusarmiayi. <sup>46</sup>Tura chíkichkia Pariséunam wear Jesus túramun ujakarmiayi. <sup>47</sup>Nuna antukar Pariséusha Israer-patri úuntrisha ashí naamka uunt armia nujai iruntrar tiarmiayi “¿Warí itiurkamniait? Nu shuarka aentsti tujintiamun ti túratsuk. <sup>48</sup>Aya júnik iniaiyakrinkia ashí shuar Nin enentámtuschartatuak. Nuyá Rúmanmaya apach taar mesetan najanawatatui tura in amutmakar Yusa Uunt Jeencha emesartatui.”

<sup>49</sup>Nu uwitin Kaipias Israer-patri uuntriyayi. Niisha tímiayi “Átumka nékatsrume. <sup>50</sup>¿Ashí Israer-shuar mesertin pénkerkait. Antsu aya chikichik shuar jákatin pénkerchakait?” tímiayi. <sup>51</sup>Kaipiaska aya ni enentámmiajain tíchamiayi. Antsu nu uwitin Israer-patri uuntrii asamtai Yus nuna enentámtikramiayi. Nújainkia Israer-shuar Jesus jaruktinian ujakmiayi. <sup>52</sup>Tura aya Israer-shuarnakcha antsu niijaisha ashí nunkanam Yus-shuar ajararun irurtajtsa jákatniuyi. <sup>53</sup>Tuma asamtai nu tsawantiniin Israer-shuara uuntrii Jesus máatai tusar áujmatsarmiayi.

<sup>54</sup>Nu asamtai Jesus paant wantiniak Israer-shuarnum wekaichmiayi. Antsu Jutía nunkanmaya jiinki atsamu nunkanam Eprain pepru tíjuch wémiayi. Tura nui pujusmiayi ni unuiniamurijai.

<sup>55</sup>Israer-shuara namperi paskua ishichik jatemsamtai untsuri shuar yajá péprunmaya Jerusarennum káunkarmiayi. Kame paskua jeatsain Muisais timia núnisann ni ayashísha enentáisha iwiarnarat tusa wakierarmiayi. <sup>56</sup>Jesusnasha eak yujarmiayi. Tura Yusa Uunt Jeen pujusar nuamtak aniniaisar “¿Warí enentáimiam. Jístanam tatimpiash?” tiarmiayi. <sup>57</sup>Pariséusha Israer-patri uuntrisha akupainiak “Jesus pujá

nekaamka ujatkata” tiarmiayi. Jesusan sepunam enkeatai tusar tiarmiayi.

### Marí Jesusan kunkuinian kuérmiania nu

(Mateu 26.6-13; Márkus 14.3-9)

**12** Paskua jísat jeatin sais tsawant ajasmatai Jesus Petania péprunam wémiayi. Jesus jakamunmaya iniantkimia nú Rásaru nuin pujumiayi. <sup>2</sup>Jesus jeamta ayurawarmiayi. Rásarusha niijai yurumámiayi. Mártasha yurumkan iwiasmakmiayi. <sup>3</sup>Tura Marikia kunkuinian ti kuitjai ritru ajapén sumak itiamiayi. Tura Jesusa nawen kuer ni intiashijai japirmiayi. Jeasha nu kunkuinai ti shiir kunkunmiaiyi. <sup>4</sup>Jútas Iskariúti, Semunka uchiri, nui pujumiayi. Niisha Jesusa unuiniamurintai ukunam Jesusan surukmiayi máawarat tusa. Niisha tímiayi <sup>5</sup>“¿Urukamtai nu kunkuinian ti kuitjai surukchama kutrinchan súatniun?” <sup>6</sup>Kame kutrinchan enentámtak tíchamiayi. Antsu unuiniamu kutrin wainkia asa yúpichuch kasamkamniuyayi. Tuma asa nuna tímiayi.

<sup>7</sup>Tura Jesus tímiayi “Iniaisata. Wi iwiarnakui kuératniun sumak ikiurtusuiti. <sup>8</sup>Kutrincha tuke atumjai íruntuk. Antsu Wikia atumjai tuke pujuschattajai” tímiayi.

### Rásaruncha máataj tiarmiania nu

<sup>9</sup>Israer-shuarsha Jesus Petania péprunam pujan antukar Jesus íistaisar weriarmiayi. Rásaruncha Jesus jakamunmaya iniantkimia nusha iyutai tusar wearmiayi. <sup>10</sup>Túramtai Israer-patri uuntrinkia chichaman jurusarmiayi Rásaru maatai tusar. <sup>11</sup>Untsuri Israer-shuar Rásaru iniantkimiun nekaawar Israer-patrin ikiukiar Jesusan enentámtusarmiayi.

Túrawardatai Rásaruncha máatniun wakerukarmiayi.

**Jesus Jerusarénum  
shiir wayamiania nu**

*(Mateu 21.1-11; Márkus  
11.1-11; Rúkas 19.28-40)*

<sup>12</sup> Paskua namperan pachiiintuiktajtsa ti untsurí shuar Jerusarénum wearmiayi. Kashin tsawar Jesus nú peprunam tátnian nekaawarmiayi. <sup>13</sup> Niisha tintiuki nuké áinis nukan júurar Jesusan inkiuntai tusar jíinkiararmiayi. Túraward untsumainiak “Shiir tati, tiarmiayi. Yusa kakarmarijiai winiana nu tí péñkeraiti. Israer-shuara uuntri asa shiir atí” tu untsumiarmiayi. <sup>14</sup> Jesussha umpuurun wáiniak entsamkamai. Núnisan áarmaiti Yus-Chichamnum:

<sup>15</sup> “Seun péprunmayá shuara, ashamkairap. Atumí Akupniuri umpuurunam entsamak winiawai.”

<sup>16</sup> Nu chichamaik Jesusa unuiniamuri nu túrunamun nekaacharmiayi. Tura ukunam Jesus nayaimpiniam shiir waketkimtai enentáimprarmiayi. Ashí Jesusna aarma núnisan túrunamiayi.

<sup>17</sup> Jesus Rásarun iwiarsamunmayá ini-antkimiun wáinkiarua nú shuar nuna áujmatiararmiayi. <sup>18</sup> Tuma asamtai shuar Jesus nu tujintiamun túramtai nekaawar Jesusan inkiunktaj tusar jíinkiararmiayi. <sup>19</sup> Tura Pariséusha nuamtak tiarmiayi “Iis, penké tujinkiaji. Maa iista, ashí shuar Nin nemarainiatsuk.”

**Kriaku apach Jesusjai chichastinian  
wakeriarmiania nu**

<sup>20</sup> Paskua nampernum Yus shiir awajsatniun Jerusarénum weriaruka untsurí nunkanmayá shuar ármiai. Kriaku apachcha ármiai. <sup>21</sup> Niisha Jiripin weantukarmiayi. Kame nu Jiripi Petsaitia péprunmayáuyayi. Petsaitia péprusha Kariréa nunkanam awai. Nincha Kriaku apach seainiak “Uunta,

Jesusjai chichastaisar wakeraji” tiarmiayi. <sup>22</sup> Jiripisha Antresan werí ujakmiayi. Nuyá niijiai métek tsaninkiar Jesusan weriar ujakarmiayi.

<sup>23</sup> Jesussha tímiayi “Wi Aents Ajasuit-jiana ju tsawantur jeayi. Túramtai shiir awájnástajai. <sup>24</sup> Wi tájana nu ti nekasaiti. Jínkiaia ántsanketjai. Araachmaka níñki pujatsuk. Antsu araamka tsapain jinkiaichiri kaushmariat nerek ti untsurí ajatsuk. Núnisnak Wi jakamtai ti untsurí shuar yamaram iwiaakman takusartatui. <sup>25</sup> Shuarsha jinkiaia nuke aya ju nunkanam péñker pujustinian enentáimkiunka ántar pujak nekas iwiaakmarin emenkkattatui. Tura ju nunkanam péñker pujustinian enentáimtsuk jákatniuncha ashamchaa nú shuarka nekas iwiaakman wáiniak tuke iwiaaku átatui. <sup>26</sup> Shuar winia átaj takunka nemartusti. Túranka Wi pujajna nui Wíi shuar tuke átatui. Núnisan Wíi shuar winia takatrun takáa nuna winia Aparsha shiir enentáimtustatui’ tímiayi.

**Jesus ni jákatniun étseru**

<sup>27</sup> “Yamaikia enentáiruñ ti itiurchat pujajai. ¿Warittajak. “Aparu, ju túrunatniunmayá uwemtikrurta” titiajash? Antsu jú túrunatniun táwitjai. <sup>28</sup> Aparu, wi túramujai ashí shuar ame náarmin shiir enentáimturarti” tímiayi Jesus.

Tutai nayaimpinmayá chichaman antukarmiayi. “Winia náarun shiir awaj-saitjai tura ataksha shiir awaj-sattajai” tímiayi.

<sup>29</sup> Shuarsha nui pujuinia “ipiamtachuashit” tiarmiayi. Tura chikichcha “Nayaimpinmayá suntar Nin chichasai” tiarmiayi.

<sup>30</sup> Jesussha tímiayi “Wi antuktinian chichaschayi antsu átum nekaatarum tusa chichasai. <sup>31</sup> Yamaikia nunkanam makumatin jeayi. Tura íwianch ju nunkanam akupniua nu nupetnak ajapnattawai. <sup>32</sup> Tura numiniam

awajnaintai ashí nunkanmayanka shuar enentáimturartatui” tímiayi. <sup>33</sup> Juna taku krúsum jákatniun ujakmiayi.

<sup>34</sup> Shuarsha awajirar tiarmiayi “Yaunchu Yus akupkamu papiniumia áujsar nékaji. Kristu tutai tuke jáatsuk iwiaaku pujustiniaiti. ¿Itiurak nuikia “Aents Ajasu numiniam awajnaitniuiti” tame? Aents Ajasuka Kristuchukait, Yus anaikiamu. Núchaitkiuinikia Aents Ajasuka yait?” tiarmiayi.

<sup>35</sup> Nuinkia Jesus tímiayi “Wi tsáap-ninia áintsanketjai. Tsáapnisha atumfin aya ishichik tsawantin tsáapniartatui. Tsáapin ana juik wekasatarum kirit ajat-sain. Kame kiritniunam wekaana nusha nékatsui itiuranimpia wea. <sup>36</sup> Tsáap-nin wáinkuram nin enentáimtustarum. Túrakrum winia tsáapnintruí wekasat-tarme.” Jesussha nuna ti wémiayi uu-mak pujustaj tusa.

**Untsurí Israer-shuar Jesusan enentáimtuscharmiania nu**

<sup>37</sup> Jesus aentsti tujintiamun ti untsurí túramtaisha Nin enentáimtuscharmiayi.

<sup>38</sup> Yúsnan etserin Isayas yaunchu aarma uminkiatniuyi:

“Uunta, ¿ya ii ujam antukuit. Yusa kakarmarisha yana iniaktusuit?” tu áarmaiti.

<sup>39</sup> Nuna uminiak Jesusan enentáimtuscharmiayi. Tura nu arantcha Isayas áarmiayi:

<sup>40</sup> “Yus nin kusuru awajsaiti tura ni enentáincha kátsuram awajsaiti. Ni jijijai fimsain tusa tura ni enentáijijai nekaawain tusa túrait. Kame ni tunaari iisar enentáimtuiniakui Yus nin tsuárinti” tu áarmaiti.

<sup>41</sup> Isayas yaunchu Jesusan nayaimpiniam ti shiir pujan wáiniak nuna tímiayi.

<sup>42</sup> Tuma ain untsurí Israer-shuarsha tura ni uuntrinmayasha Jesusan nekas enentáimtusarmiayi. Tura

niisha Pariséun ashamainiak paant tícharmiayi. Israer-shuara iruntairiya jiiiki awetamaj tusa ashammiarmiayi. <sup>43</sup> Yus shiir enentáimtursati tutsuk antsu shuar shiir enentáimtursati tusar túrawarmiayi.

**Shuaran sumamtikiatniun táchaitjai antsu uwentikratniun táwitjai, timiania nu**

<sup>44</sup> Jesus kakantar untsukum tímiayi “Winia enentáimturuk aya Winiak enentáimturtsui antsu winia Aparun Winia akuptukua nunasha enentáimtawai. <sup>45</sup> Winia wáitkiusha Winia Aparnasha wáinui. <sup>46</sup> Wikia tsáapnin asan Winia enentáimturainia nuka kiritniunam wekasain tusan ju nunkanam táwitjai. <sup>47</sup> Shuaran sumamtikiatniun táchaitjai antsu uwentikratniun táwitjai. Tuma asantai shuar winia chichamprun antuk umíachkunka sumamaiti. Tura Wikia sumamtikiachuitjai. <sup>48</sup> Winia nakitrur chichampruncha enentáimtachuka sumamtikiamuiti. Wi timiaj nuka amuukatin tsawantai nin sumamtikiattawai. <sup>49</sup> Wi enentáimmiyajain chichaatsjai. Winia Apar akattur akuptukuiti. Tura chichastinia nuna surusuiti. <sup>50</sup> Wisha nékajai, ashí winia Apar akupeamuka yamaram iwiaakman tuke amuukashtinian súawai. Tuma asantai winia Apar túrutmia núnisnak tajai” tímiayi Jesus.

**Jesus ni unuiniamuri nawen nijiatramiania nu**

**13** Paskua jísat jeatin chikichik tsawant ajasmatai Jesusa tsawantri jeatemayi. Túramtai ju nunkan ikiuki ni Aparin wétiniuyi. Jesussha nuna nekaamiayi. Ashí Níiniun ju nunkanam pujuinian tuke anea asa amúamunmasha yapajitsuk tuke aneemiayi. <sup>2</sup> Nu tsawantajsha murikiun

yúatin ármiai. Tura yurumátin jeatsain, uunt iwianch Semunka uchirí Jútas Iskariúti enentáin Jesusan surukat tusa enentáimtikramiayi. <sup>3</sup>Tura Jesus Yusaiya tau asa waketkitniuyi. Tura Yus Apa ashí mash susamiayi akupin atí tusa. Jesussha nuna nekáa <sup>4</sup>chíkich yurumuk pujuiniaí wajakmiayi. Tura pushirín ámiak awankéman emenmamamiayi. <sup>5</sup>Nuyá nijaamatainíum entsan yará ni unuiniamurí nawen nijiatramiayi. Tura awankémjai japirmiayi. <sup>6</sup>Semun Pítrunam jeamtai Pítiur tímiayi “Uunta, ¿Winia nawer nijiertaj tamek?”

<sup>7</sup>Jesussha tímiayi “Wi túrajna nu yamáí nékatsme tura ukunam nekaattame.”

<sup>8</sup>Tura Pítiur tímiayi “Peñké winia nawer nijiarhattame.”

Jesussha tímiayi “Wi nijaachkuinikia Wijjai tsaninkia pujuschaniaitme.”

<sup>9</sup>Tutai Semun Pítiur tímiayi “Nuinkia, Uunta, aya nawerkechu antsu uwejrusha tura muukarsha nijiatrurta.”

<sup>10</sup>Tura Jesus tímiayi “Yamáí mainkia ayashí shiir asamtai aya naweniní niji-amártiniaiti. Atumí enentáin ashí péñkeraitrume. Túrashashí shuarcha” tímiayi. <sup>11</sup>Kame Jútas Nin suruktinian nekáa “ashí shuarcha” tímiayi.

<sup>12</sup>Jesussha nijiar umik ni pushirín entsarmiayi. Tura atak pujus tímiayi “¿Atumsha Wi túrajna nu nekaarmek? <sup>13</sup>Wi atumí Uuntrí asamtai nekas “Uunta” túrutrume. Nusha péñkeraiti. <sup>14</sup>Tura Jintinniuitiatan tura Úuntaitiatan atumí nawen nijiarhajak. Atumsha núnisrumek nuamtak náwem nijiatnairatarum. <sup>15</sup>Atumin nekapruatsan túramjai. Atumsha núnisrumek túratarum. <sup>16</sup>Ti nekasan tajai. Takarniuka ni uuntrí nankaamaschaiti. Akupkamusha akupea nuna nankaamaschaiti. <sup>17</sup>Nu nekaarum túrakrumka shiir átatrume.’

<sup>18</sup>“Tura tájana nuna ashí tátsujrume. Anaikaitiaj núnaka Wi nékajai. Tura Yus-Chicham uminkiatniuiti, nékajai. Ju aarmaiti:

“Wijjai yurumna nu winia nemasur ajasai.”

<sup>19</sup>Nuka túmatsain ujaajrume. Nuyá túrunamtai Yusa Uchiríntjai nusha paant nekaattarme. <sup>20</sup>Wi tájana nu nekasaiti. Shuar Wi akupeaj nuna shiir itiaakka Winiasha shiir itiaarui. Tura Winia shiir itiaarna nusha Winia Akuptukuncha itiaawai” tímiayi.

### Jesus Jútas Nin suruktinian étserui

(Mateu 26.20-25; Márkus

14.17-21; Rúkas 22.21-23)

<sup>21</sup>Nuna ti, Jesus ni enentáin ti itiu- chat enentáimpramiayi. Tura paant tímiayi “Nekas tajai, chikichik jui atumjai pujana nu Winia surutkattawai.”

<sup>22</sup>Tutai ni unuiniamurí nuamtak íni- aisar “¿Yanak ta?” tiarmiayi. <sup>23</sup>Chikichik unuiniamurí, Jesus ti aneamu, Nijjai tsanin yurumuk pujumiayi.

<sup>24</sup>Tuma asamtai Semun Pítiur ni uwe- jéjai iniakmas “Aniasta, ¿yanak áujmata?” tímiayi.

<sup>25</sup>Tutai Jesusan áyanmatsan aniasmi- ayi. “¿Yait, Uunta?” tímiayi.

<sup>26</sup>Jesussha ayak “Tantan túumnium ajunkan susattaj núiti” tímiayi. Nújain tantan túumnium ajun Semunka uchirín Jútas Iskariútin susamiayi. <sup>27</sup>Tura wárik Jútas tantan achikmatai íwianch ni enentáin wayamiayi. Nuyá Jesus tímiayi “Túratamna nu wárik túrata.”

<sup>28</sup>Tura ashí nuí yurumainiak pujuarmia nusha wariniak ta tusa nekaacharmiayi. <sup>29</sup>“Kuítríncha kuit súsarta” tátsuash tu enentáimprarmiayi. Tura chikichcha “nampernum yurumátin atsumajnia nu sumakta” tátsuash, tu enentáimprarmiayi. Jútas kuítian wáinin asamtai tu

enentáimprarmiyai. <sup>30</sup>Jútas tantan yua kashi ajasmanum jíinkimiyai.

### Yamaram akupkamu

<sup>31</sup>Jútas jíinkimtai Jesus tímiyai “Wi Aents Ajasu asamtai winia kakarmar yamaikia paant átatui. Tura wi túramujai Yusa kakarmarisha ti paant átatui. <sup>32</sup>Wi Yusa kakarmarin paant awajeakui Wisha ni Uchirí asamtai winia kakarmarnasha Yuska wárik paant awajsattawai. <sup>33</sup>Uchichiru, atumjai ti untsurí tsawant pujuschattajai yamaikia. Wi Israer-shuaran tímiaj nútiksanak atumin tájarme. Atumsha Winia éatkáttarme tura wi wéamunam winishtatume. <sup>34</sup>Ju yamaram akupeamun amaajai nuamtak mai anenai ajatarum tusan. Wi atumin aneajrumna núnisrumek atumsha nuamtak mai anenai ajatniuitrume. <sup>35</sup>Anenaiyakrumniñkia nujai ashí shuar “Kristu unuiniamuri áiniawai” túramartatui.

### Pítur Nin natsantratniun Jesus ujakmiania nu

(Mateu 26.31-35; Márkus 14.27-31; Rúkas 22.33-34)

<sup>36</sup>Semuñ Pítur Jesusan aniasmiyai “Uunta, ¿tua wéam?”

Jesussha tímiyai “Wi wéajna nuí yamaikia winichminiaitrume. Tura ukunam winittiarne.”

<sup>37</sup>Nuyá Pítur tímiyai “Uunta, ¿urukamtai yamaikia winichminiaitiaj? Ámin yáintajtsan jakataj tajai.”

<sup>38</sup>Jesussha tímiyai “¿Nekasmek táme? Ti nekas tájame, atash shiniatsain Winia menáintiú natsantrurtatme” tímiyai.

### Jesus Yus-jintiaiti

**14** “Kúntuts pujusairap. Yus enentáimtustarum, Winiasha enentáimtursatarum. <sup>2</sup>Winia Aparuí átum pujustin ti ankant awai.

Tura nuna iwiarataj tusan Aparuí wéajai, nekasaiti. Nekaschaitkiuñkia ¿itiurak ujakaajrum? <sup>3</sup>Tura iwiaaran amukan ataksha tátatjai. Tura tana yaruaktatjarne, wi pujamunam atumsha pujusúk tusan. <sup>4</sup>Wi wéaj nu nékarme tura jintiasha nékarme” tímiyai Jesus.

<sup>5</sup>Tumas tímiyai “Uunta, Ame weam nu nékatsji. ¿Jintiasha itiurak nekaattai?”

<sup>6</sup>Jesussha tímiyai “Wi nekas jintiaitjai. Wíjjainchu wekaana nuka winia Aparuí jeatniun penké tujintiaiwai. Tura Wisha tuke nekas tiniu asan nekas ana nuna shuáran nékamtikiajai. Wisha shuáran yamaram iwiaakman tuke amuukashtinian súwitjai. <sup>7</sup>Winia nékarkurmeka winia Aparsha nekaawaintrume. Yamaisha Nii wáinkia asarum nékarme” tímiyai.

<sup>8</sup>Nuñkia Jiripisha tímiyai “Uunta, Apasha wáinkiarka maak.”

<sup>9</sup>Jesussha tímiyai “Jiripi, atumjai ti pujusu aisha ¿tuke nékartsumek? Winia wáitkia nuka Winia Aparnasha wáinkiaiti. ¿Itiurak, nuikia, “Apasha wáinkiarka maak” tame? <sup>10</sup>Winia Aparjai tsaniñkian pujakun tura winia Aparsha Wíjjai pujakui tuke chikichkiitji. ¿Nu nékatsrumek? Wi tájarmena nu Winia chichampruchuiti. Yus Apa Winí pujak ni wakeramun takaawai. <sup>11</sup>Nekaatarum. Wisha winia Aparjai tsaniñkia pujakur nekas chikichkiitji. “Nu chicham itiurchataiti” enentáimkiurmeka wi túramu nuikia enentáimpratarum. Wi túramujai chikichik ájinia nu páantchakait. <sup>12</sup>Wi tájarmena nu ti nekasaiti. Winia enentáimturna nu Wi túrajna nuna túrattawai. Tura winia Aparuí wéakui nuna nankaamas tujintiamun túrattawai. <sup>13</sup>Ashí Winia enentáimtursarum seatrumna nuna amastatjai. Nújainkia winia

Apar shiir awajnastatui. <sup>14</sup>Winia enentáimtursarum seakrumninkia ashí túrattajai' tímiayi.

**Jesus Yusa Wakanín akupkattawai**

<sup>15</sup>'Atumsha anentkurmeka winia chichamur umiktarum. <sup>16</sup>Tura wéakun winia Aparun chikichan akupturmakti tusan seattajai. Niisha atumjai tuke pujak atsantamprartatui. <sup>17</sup>Nusha Yusa Wakanínti. Yus-shuarcha Nin nekaachmin ániawai. Tuma asamtai ni enentáin wayachminiaiti. Antsu átumka atumi enentáin pujakui Nii nékarme. Niisha atumí enentáin tuke pujustatui. <sup>18</sup>Mitiaikia áitkiasnak ikiukchattajrume. Atumíin atak tátatjai. <sup>19</sup>Ishichik tsawant nankaamasmatai chíkich shuar irunna nu wáitkiachartatui. Tura Wi iwiaaku asamtai átumka nu iwiaakmajai pujustatrume. Tuma asarum wáitkiattarme. <sup>20</sup>Tura nu tsawantai ju nekaattarme. Wisha winia Aparjai tsaninkia pujakur chikichkiitji. Núnisnak Wisha atumjai tsaninkian pujajai. Tura atumsha Wijjai tsaninkia pujarme. <sup>21</sup>Shuar Winia anentuka wi akupkamun nekáa umíawai. Nú shuarnaka winia Aparsha aneawai. Wisha nin anejajai tura nekarati tusan iniaktustatjai." Jesus nuna tímiayi.

<sup>22</sup>Chíkich Jútas, Iskariútichu, tímiayi "Uunta, ¿urukamtaí ashí shuarnum iniaktutskesha aya in iniaktustatam?"

<sup>23</sup>Jesus tímiayi "Winia anentuka tá-jana nuna enentáimtawai. Winia Aparsha nu shuaran aneattawai. Tura Wisha winia Aparnum nu shuarjai tsaninkia pujustatji. <sup>24</sup>Antsu Winia anentchaka tá-jana nuna enentáimtatsui. Átum ántar-mena nú chichamka wíniachuiti, antsu Yus Apa Winia akuptukua Núnaiti' tímiayi.

<sup>25</sup>'Atumjai tuke pujakun nuna tá-jarme. <sup>26</sup>Yus Apa ni Shiir Wakanin atumin yáinmak atsantamprarat tusa akup-

turmaktatrume. Wi seam túrattawai. Nu Wakancha ashí Wi ujakjarmena nuna atak enentáimtikramprar ashí unuiti-amprartatui' tímiayi.

<sup>27</sup>'Imiatkinchanum pujustarum. Imiatkinchanum pujajna núnisrumek pujustarum tusan amaajai. Jú nunkan-manka warastin wáinkiashtatruke. Antsu itiurchatnum pujayatrumkesha Wijjai imiatkinchanum pujustatrume. Ashamsuk pujustarum. Itiurchat enentáimprairap. <sup>28</sup>Nuik timiaj nu antukmarme. Aparuí wena atak atumíin tátatjai. Winia Aparka Wijjai nankaamas úntaiti. Tuma asamtai ti nekas anentkurmeka "Aparuí wéajai" takui ashí warasaarme. <sup>29</sup>Nuka túmatsain ujaajrume. Túrunamtaí nuyá Winia enentáimtursattarme" tímiayi.

<sup>30</sup>'Jú nunkanmayan akupin winiakui atumjai núkap chichaschattajai yamaikia. Wíniaka nupettukchamniaiti.

<sup>31</sup>Tura Wikia winia Aparun anejajai tura Nii akupturkama nuna tuke túrajai. Ashí shuar nuna nekaawarti tusa ashí túrunatniuiti. Wajaktiarum. Juyá wetái' tímiayi.

**Numi arakma áintsanketjai**

**15** 'Winia iwiaakmarun amaakun numi arakma áintsanketjai. Wikia kampuintjai atumsha kanawentrume. Winia Aparsha arakan wáiniua núnisaiti. <sup>2</sup>Winia kanawernasha nereatsna núnaka tsupik ájapeawai. Tura nereana núnaka púruawai nú nukap nerekat tusa. <sup>3</sup>Wi ujakjarmena nujai puruarmaitrume. <sup>4</sup>Numí kanawesha kampuin áchitkiachkunka níngki nerechamniaiti. Núnisrumek atumsha Winí áchitkiachkurmeka nerechamniaitrume. Wi atumjai áchitkij núnisrumek atumsha Winí tuke áchitkia atarum' tímiayi.

<sup>5</sup>'Wikia kampuintjai atumsha kanawentrume. Kampuinikia kanawen



áhitkia núnisnak achiakjarme. Tura kanawe ni kampuiniñ áhitkia núnisrum Winí áhitkia atarum. Túrakrumka núkap nerektatrume. Antsu Wíjiainchuka péñker túratin penké tujintiarme. <sup>6</sup>Winí áhitkiachuka ajapam kukartatui. Kanawesha kukarmatai shuar irumkar áesawartatui' tímiayi.

<sup>7</sup>Tuke Winí áhitkiaiitkiurmeka tura winia chichamprusha kajinmattsuk emetarmeka átum wakerarmena nu seakrumin amastatjai. <sup>8</sup>Átum núkap nereakrumniñkia ashí shuar “Nekas Jesusa unuiniamurinti” túramartatui tura winia Aparnasha shiir awajstartatui. <sup>9</sup>Winia Apar anenna nútiksanak Wisha atumin aneajrume. Winia aneamur tuke atarum. <sup>10</sup>Winia Aparu akupkamurñ umiakun tuke ni aneamurintjai. Núnisrumek winia akupkamur umiakrumka tuke winia aneamur átatrume' tímiayi.

<sup>11</sup>Wi waraajna áintsarmek warastarum tusan nuna tájarme. Tura ti shiir warastatrume. <sup>12</sup>Wi akupkamu júiti: “Wi aneajrumna nútiksarmek ashí anenaitiarum.” <sup>13</sup>Shuar ni amikrñ yáintaj tusa jakañka ti anekartichukait. <sup>14</sup>Wi akupeamu takaakrumka atumsha winia amikruitrume. <sup>15</sup>Takarniuka ni uuntri takaana nuna nékatsui. Tuma asamtai “winia takarniuruitrume” tátsujrume. Antsu ashí winia Apar táman ujaku asan “winia amikruitrume” tájarme. <sup>16</sup>Aya atumí enentáimsamurijiañ Wí shuar ajaschamarme. Antsu akatramur ajastarum tusan atumniaka achikjarme Wi. Winia takatur takastiniaitrume. Túrarum péñker túratniuitrume nerektinia áintsarmek. Tura nu nere amuutsuk tuke átiniaiti. Tuma asamtai winia Apar searmena nuna amastatui. <sup>17</sup>Júnaka akupeajrume: Nuamtak mai anenai ajatarum' tímiayi.

### Yus-shuaracha Jesunasha Níiniuncha nakitiainiawai

<sup>18</sup>Ju nunkanmaya shuar Winia emka nakitrurar atumniasha nakitramarme. <sup>19</sup>Atumsha ju nunkanmaya shuaraitkiurminkia niiniua nútiksan anenmaintrume. Antsu Wí shuar ajastarum tusan ju nunkanmaya achikmajrume. Túramtai nekas ju nunkanmayanchuitrume yamaikia. Nu asamtai nu shuar nakitramainiawai. <sup>20</sup>“Takarniuka ni uuntri nankaamaschaiti” tíchamkajrum. Shuar Winia yajauch awajtusaru ásar atumniasha yajauch awajtamsartatui. Chikichcha umirtukaru ásar atumniasha umirtamkartatui. <sup>21</sup>Winia Akuptukun nékachu ásar Winia enentáimturkurmin yajauch awajtamsartatui' tímiayi.

<sup>22</sup>Wi tana Yus-Chichaman nin ujakchamtañkia tunaanum sumamacharaayi. Antsu ujakma ásar “Nékachkun túraitjai” tíchamin áiniawai. <sup>23</sup>Winia nakitruinia nuka winia Aparnasha nakitiainiawai. <sup>24</sup>Aents penké túrachman túrachuitkiuñkia tunaanum sumamacharainti. Antsu wi túramun wáinkiaru áiniayat Winiasha tura winia Aparnasha nakitiainiawai. <sup>25</sup>Yaunchu Yus akupkamunam áarmaiti:

“Penké ántar nakitrurarmai.” Nu chicham uminkiatu tusa túrunaiti' tímiayi.

<sup>26</sup>Tura atsantamprattsa yáinmana nuna winia Aparuiya akuptuktatjarme. Niisha tuke nekas tiniu Wakaniiti. Niisha Yusaia taa atumin nekamtikramprattarme. <sup>27</sup>Atumsha yaunchu Wijiañ pujusu asarum nekamtikiattarme' tímiayi.

**16**Átum kanartukairum tusan jú-naka tájarme. <sup>2</sup>Israer-shuar iruntainiumia jiiiki akuptamkattarme. Nu arantcha mantamainiaksha “Yúsan shiir awajstattan túrajai” tíartatui. <sup>3</sup>Nu shuar

Winiasha tura winia Aparnasha nékachu ásar túrutmawartatui. <sup>4</sup>Núnaka yamáí tájame. Tura túrunamtai “núnisan átini-aiti” timiaj nu nekaarum itiurchat enentáimprairap’ tímiayi.

### Yusa Wakaní túrana nu

‘Atumjai tuke pujá asan núnaka yaunchu ujakchamajrume. <sup>5</sup>Antsu yamaikia wáketcjai winia Akuptukmia nujai pujustaj tusan. Tuma áin wéajna nu inintratsrume. <sup>6</sup>Antsu nuna takuí ti kuntuts enentáimprarme. <sup>7</sup>Tura Wi wématai atumjainkia nuna nankaamas péñker átatui. Iis, Wi wéaknaka atumin yainmaktinia nuna akupkattajai tura wéachkuinkia táchattawai. Nuka ti nekasaiti. <sup>8</sup>Yusa Wakaní taa ashí jú nunkanmaya aentsun ju menaintiun nekamtikiattawai. Ni tunaari aan nekamtikiattawai. Péñker tunaajainchu wekasamniana nunasha nekamtikiattawai. Tura Yus tunaanum súmamtikiamniana nunasha nekamtikiattawai. <sup>9</sup>Winia enentáimturainiachu tunáarintin áiniawai. <sup>10</sup>Winia Aparuí wáketcui wáitkiashtatrume. Tuma asamtai ashí shuar wí péñker tunaajainchu wekaamun nekaawartatui. <sup>11</sup>Tura ju nunkanam akupniunka Yus tunaanum súmamtikia asa shuarnasha súmamtikiamniati. Nuna paant nekaawartatui’ tímiayi.

<sup>12</sup>‘Nu arantcha núkap tíntjiarme túrasha átumka nekaachaintrume. <sup>13</sup>Yusa Wakaní ashí nekas tiniu asa ashí nekasa nuna unuitiamprattarme. Ni enentáimmiajai tíchattawai antsu winia Aparuí antukma nuna ujatmaktatui. Ukunam átatna nunasha ujatmaktatui. <sup>14</sup>Ashí Wínian ujatmak Winia shiir awajtustatui. <sup>15</sup>Ashí winia Apar takakna nusha Wíniati. Nu asamtai “ashí Wínian ujatmaktatui” tajai’ tímiayi.

### Kúntuts pujuiniayat ukunam warasartatui

<sup>16</sup>‘Ishichik pujusrum Winia wáitkiash-tatrume. Nuyá ataksha ishichik pujusrum ataksha wáitkiattarme. Wisha winia Aparuí wéajai” tímiayi.

<sup>17</sup>Nuyá ni unuiniamurí nuamtak aniniaisarmiayi “¿Jú chichamsha warimpait? “Ishichik pujusrum wáitkiash-tatrume tura ataksha ishichik pujusrum wáitkiattarme tura Aparuí wéajai” tátsuk. <sup>18</sup>“Ishichik pujusrum” tana nusha ¿warimpait? Nii tana nu ántatsji” tiarmiayi.

<sup>19</sup>Jesusha nin aniaistai táman nekáa tímiayi “Ishichik pujusrum wáitkiash-tatrume nuyá ataksha ishichik pujusrum wáitkiattarme” tímiajai. ¿Núchakait átum inintrustin wakerarmena nu? <sup>20</sup>Ti nekas tájarme: Átumka kúntuts pujusrum úttiatrume tura Yus-shuarcha warásártatui. Tuma ain<sup>k</sup> átum kúntuts pujayatrume ukunam warastatrume. <sup>21</sup>Iis, nuwasha jurertin tsawant jeamtai najaimiak wáitiatsuk. Tura uchin jurerka ti waraak wáitsamunka enentáimtsui. <sup>22</sup>Atumsha núnisrumek yamaik kúntuts pujarme. Tura atak fítjarum tusan winiakui ti shiir atumí enentáin warastatrume. Nu warastinian jurutramkichminia ániawai.’

<sup>23</sup>‘Nu tsawantinkia penké ininsashtatrume. Ti nekas tájarme Winia enentáimtursarum winia Apar searum nuna ashí amastatui. <sup>24</sup>Yamaisha Winia enentáimtursarum winia Apar seachurme. Seakrumninkia amastatui ti shiir warasaruk tusa’ tímiayi.

### Jesus jú nunkanmayan nupetkaiti

<sup>25</sup>‘Métek-taku chichamjai nakumkan nuna tímiajai. Tura ukunmanka nujai chichatsuk winia Aparnan paant

ujaktatjarme. <sup>26-27</sup> Nu tsawantai átumka Winia enentáimtursarum winia Apar seattarme. Winia Aparsha atumin anea asantai Wi Nin áujsatín atumashtatrome. Winia anentu asarum tura winia Aparuíya taman enentáimtakrumin Niisha anenmawai. <sup>28</sup> Winia Aparuíya jíínkin jú nunkanam táwitjai. Yamaikia jú nunkanmaya jíínkin ataksha Aparuí wáketjai” tímiayi.

<sup>29</sup> Nuyá ni unuiniamurí tiarmiayi “Yamaikia métek-taku chichamjainchu chichaame. <sup>30</sup> Mash nékaitme. Shuar Ámin ininmatsain péñker áimkiatin nékame. Nu nekaar Ame nekas Yúsnúmiáitme tu enentáimtaji” tiarmiayi.

<sup>31</sup> Tura Jesus tímiayi “¿Nekasash enentáimtarum? <sup>32</sup> Ti warik átumka ashamkarum niisháa tsakinmaktatrome tura Winiak ikiurkittiarne. Antsu winia Apar pujakui Wiki pujatsjai. <sup>33</sup> Winia enentáimturkuram imiatkinchanum pujusarat tusan tájarme. Jú nunkanam ti wáitsattarme. Tura Wi jú nunkanmayan nupetka asantai warastarum” tímiayi Jesus.

### Jesus ni unuiniamurín Yúsan áujtawai

**17** Nuna tí Jesus nayaimpinmaani ímias tímiayi “Aparu, yamáí jeayi ame Uchiram shiir awajsatín. Núnisan ame Uchirmisha péñker awajtamsattawai. <sup>2</sup> Ashí shuara Akupniurí najataitme. Nujáinkia Winia surusumna nú shuaran yamaram iwiaakman tuke amuukashtinian súsaitjai. <sup>3</sup> Aparu, chíkich atsawai. Amek nekas Yúsaitme. Wisha Jesuskrústuitjai Ame akuptukmamna nu. Nu asantai ashí shuar nuna enentáimtak yamaram iwiaakman tuke amuukashtinian takakui.’

<sup>4</sup> ‘Ashí túratniun akuptukmamna nuna amukuitjai. Túran ju nunkanam shiir

awajsaitjame. <sup>5</sup> Nuna túramtai, Aparu, ti yaunchu jú nunka atsaisha Ámijíai pujakui shiir awajtusmamna núnismek yamaisha shiir awajtusta.’

<sup>6</sup> ‘Ashí jú nunkanmaya surusmamna nú shuaran Ámin nekamtikiamjai. Áminiu ániakui surusmame. Niisha ame chichammin umirtámkaruiti. <sup>7</sup> Ashí Wi takaajna nu Amek surusuitme. Niisha nuna nékainiawai. <sup>8</sup> Ame chichamem surusmam nuna ujakam niisha umirtámkaruiti. Ame akuptukakmin Amiiníya táwitjai. Nu nekasaiti tu enentáimtuiniawai.’

<sup>9</sup> ‘Nin yainkiarta tusan seajme. Jú nunkanmaya shuaran Ámin enentáimturmainiatsna nuna seattsujai. Antsu Ame surusmam nuna, Áminiu ajarasmatai, yainkiarta tusan seajme. <sup>10</sup> Ashí Winia ainia nuka Áminiuiti. Tura ashí Áminiu ainia nuka Winia ániawai. Winia péñkerusha ni túramunam paant awajsaiti.’

<sup>11</sup> ‘Wikia yamaikia jú nunkanam pujuschattajai. Tura nu shuarka juí pujuatatui. Antsu Ámijíai pujustajtsan winiakui ashí surusumna nuka, Aparu, ti shiir asam ame kakarmarmijíai wáinkiatata. Wisha Ámijíai chikichik ájinia núnisan niisha ashí iruntrar chikichik ajararti. <sup>12</sup> Juí níijíai pujakun ame kakarmarmijíai ti péñker wáinkiamjai. Antsu Yus-Chichamnum aarma uminkiatitusa aya chikichik menkakaiti. Niisha tuke emesnartinia núiti.’

<sup>13</sup> ‘Yamaikia Amiini winiajai. Tura juí tuke pujakun júna tájame. Niisha Wi waraajna núnisar ti shiir warasarat tusan tajai. <sup>14</sup> Wi jú nunkanmayan chuitjai. Niisha núnisan jú nunkanmayan chu ániawai. Tuma asantai ame chichammin Wi susantai jú nunkanmaya shuarka nin nakitiainiawai. <sup>15</sup> Jú nunkanmaya jííki tusan seatsjame. Antsu íwianch nin nupetkain tusan seajme. <sup>16</sup> Wi

juyanchuitaj áintsan niisha juyanchu áiniawai. <sup>17</sup>Ame chichammin ti nekasa nuna ántuiniakui péñker awajsata. <sup>18</sup>Juya shuarnum akuptukmam áintsan Wissha nin chíkich shuarnum akupeajai. <sup>19</sup>Aya Áminiuinak takastaj tusan enentáimtimjai. Túra asamtai niisha aya Áminiuinak takastinian enentáimpratin áiniawai' áujtak tímiayi.

<sup>20</sup>'Aya níniunkeka seatsjame antsu ashí ni chichamen antukar Winia enentáimtursartatna nusha ame yáñkiarta tusan seajme. <sup>21</sup>Ashí niisha chikichiniak enentáimtusarti tusan seajme. Wissha Amesha, Aparu, chikichik ájinia núnisan niisha Iijjai iruntrar chikichik ajastai tusar seajme. Wíi shuar chikichik najanata tusan seajme. Nuyá ju nunkanmaya shuar akuptukuitmena nuna nekaawartatui. <sup>22</sup>Ame shiir awajtursamna núnisnak Wissha nin shiir awajsaitjai. Iikia chikichik ájinia núnisan niisha chikichik ajasarti tusan túraitjai. <sup>23</sup>Wi ni enentáin pujakui Amesha Winin pujakmin penké chikichik ajasarti. Túramtai ashí shuar juna nekaawartatui: Ame akuptukuitme, tura Winia anenmena áintsam nu shuarsha aneame. Wíi shuar chikichik ajasmajai ashí shuar nuna nekaawartatui.'

<sup>24</sup>'Aparu, shuar surusmam nu, Wi pujustatjana nuí pujusarti tusan seajme. Tura ti shiir awajtusmamna nuna ísarti tusan nuna seajme. Ju nunka najanchamunman tuke anentin asam ti shiir awajtusuitme. <sup>25</sup>Aparu, ti péñker áminin ju nunkanmaya shuar nekarmainiatsui. Antsu Wi nékajme. Ju shuarsha ame akuptukman nékainiawai. <sup>26</sup>Nú shuaran Ámin nekarmawarti tusan jintintiaitjai. Tura nu arantcha jintintiatattajai. Nújainkia Wissha ni enentáin pujarkui Winia anenmena áintsan niisha anenkratin ajasartatui" áujtak tímiayi Jesus.

### Suntar Jesusan achikiarmiania nu

(Mateu 26.47-56; Márkus 14.43-50; Rúkas 22.47-53)

**18** Jesussha nuna tinia amuk ni unuiniamurijjai Setrun entsá katin numi arakananum wémiayi. <sup>2</sup>Jútassha Nin suruktajtsa pujumia nuka nu ajan nekaamiayi. Untsurí tsawant Jesus ni unuiniamurijjai nuí iruntramtai Jútas Jesusan nuí wáinkiatniun enentáimpramiayi. <sup>3</sup>Tura untsurí suntarjaisha Jesusan tariamiayi. Pariséusha Israer-shuar Patri uuntrisha suntarnasha Yusa Jeen wáiniuncha Jesusan achikiarat tusa akupkarmiayi. Niisha machitniasha nankincha rámparancha jiniasha júkiar weriarmiayi. <sup>4</sup>Jesussha ashí átinia nuna neka asa jiintiuki "¿Ya eaarum?" tímiayi.

<sup>5</sup>Niisha "Nasarénumia Jesus" tiarmiayi.

Jesussha "Wiitjai" tímiayi.

Jútassha Jesusan surukua nu niijjai pujuarmiayi. <sup>6</sup>Tura Jesus "Wiitjai" takui ti ashamkar úkumur waketaianiak iniaararmiayi.

<sup>7</sup>Ataksha Jesus "¿Ya eaarum?" tímiayi.

Niisha "Nasarénumia Jesus" tiarmiayi.

<sup>8</sup>Nuiñkia Jesus tímiayi "Wiitjai, tájarme. Winia eatkurmeka Wíi shuar ainia júka wakеткиarti" tímiayi. <sup>9</sup>Jesus nuik aukuk "Winia Apar surusma nu menkakacharai" timia nu uminkiatit tusa Jesus "wakеткиarti" tímiayi.

<sup>10</sup>Nuyá Semun Pítiur machitian jusa Marku kuishin untsurnumaani tsupirkamiayi. Markusha Israer-patri uuntrí takarniuriyayi. <sup>11</sup>Túramtai Jesus Pítrun tímiayi "Machitrumka awainki ikiusta. Winia Apar wáitsatniun surakuñkia ¿wáitsashtinkaitaj?"

### Israer-patri úuntriñiam júkiarmiania nu

(Mateu 26.57-58; Márkus 14.53-54; Rúkas 22.54)

<sup>12</sup> Nuiñkia apach suntarsha ni kapi-tiántriñsha Yusa Jeen wainniusha Jesusan achikiar jinñkiawarmiayi. <sup>13</sup> Nuyá Anasa jeen júkiarmiayi. Anassa Kaipiasa wearíyayi. Tura Kaipias nu uwitin Israer-patri uuntriñiyayi. <sup>14</sup> Kaipiasa nuik “¿Ashí Israer-shuar mesertin péñkerkait. Antsu aya chikichik shuar jákatin péñkerchakait?” timia núiti.

### Pítiur Jesusan natsantramiania nu

(Mateu 26.69-70; Márkus 14.66-68; Rúkas 22.55-57)

<sup>15</sup> Semun Pítiur chíkich unuiniamu-jai Jesusa uku weriarmiayi. Israer-patri uuntri nú unuiniamunka nékauyayi. Tuma asamtai ni jeen jeawar, suntar Jesusjai aa tanishnum wáiniakui niisha wayamiayi. <sup>16</sup> Tura Pítiur aa wáitiniam wajaamiayi. Túramtai chíkich unuiniamu jiinki wáitin wáinia nú nuwajai chichas Pítrun awayámiayi. Nuñ nékanu asa yúpichuch awayámiayi. <sup>17</sup> Waiti wáinniusha Pítrun aniasmiayi “¿Amesha nuna unuiniamurinchukaitiam?”

Pítrusha “Atsá, núchaitjai” tímiayi. <sup>18</sup> Tsetsek asamtai suntarsha tura nuñ takarniusha jinia ikiapárar ni nawen anaak pujuarmiayi. Pítrusha nuñ pachiniak anamuk pujumiayi.

### Kaipias Jesusan aniasmiania nu

(Mateu 26.59-66; Márkus 14.55-64; Rúkas 22.66-71)

<sup>19</sup> Israer-patri uuntri Jesusan aniasmiayi “Ame unuiniamurmesha ¿ya ainia. Tura warí nin jintintiaitiam?”

<sup>20</sup> Jesussha tímiayi “Ashí íimiainiain tuke etserniuitjai. Israer-shuar iruntainmasha Yusa Uunt Jeencha Israer-shuar irunainia nuñ arantutsuk tuke

etserkaitjai. <sup>21</sup> ¿Urukamtai Winia inintiam? Winia chichamprun antukua nu aniastarum. Wi timian nii ujatmakarti. Wi timiancha niisha nékainiatsuk.”

<sup>22</sup> Jesus nuna takui Yusa Jeen wáiniua nu nuñ pujá Jesusan yapiniam awati tímiayi “¿Núnisan nekas úuntnum chichastinkait?”

<sup>23</sup> Jesussha tímiayi “¿Warinmampa yajauch aa? Turuttia. Tura tájana nu péñkeraitkiuñkia ¿urukamtai awatiniam?” <sup>24</sup> Nuyá Anas Jesusan jinkiá Kaipias takaamunam akupkamiayi Kaipias Patri uuntri asamtai.

### Pítiur ataksha Jesusan natsantramiania nu

(Mateu 26.71-75; Márkus 14.69-72; Rúkas 22.58-62)

<sup>25</sup> Tuke Anasa jeen chichainiai Pítiur jinia anamuk puján shuar aniak “¿Amesha Jesusa unuiniamurinchukaitiam?” tiarmiayi.

Pítrusha “Atsá, wíchaitjai” tímiayi.

<sup>26</sup> Chíkich takarin, Marku shuari, nuñ pujumiayi. Pítiur Marku kuñshin tsupirkamia nuna shuari asa tímiayi “¿Ajanam Jesusjai wekaamin wáinkiachmakajam?”

<sup>27</sup> Pítrusha ataksha “atsá” taiñ atash shiniukmiayi.

### Piratu Jesusan aniasmiania nu

(Mateu 27.1-2, 11-14; Márkus 15.1-5; Rúkas 23.1-5)

<sup>28</sup> Nuyá Kaipiasaiya Jesusan júkiar tsawant tsawaamunam apach kapitán Piratu takatai jeanam ejeniarmiayi. Israer-shuarsha ni uuntri akupkamia nunisar wapik ajasaij tusar nu jeanam wayacharmiayi. Wayawarka paskua nampernum yurumáchmin ármiayi. <sup>29</sup> Nu asamtai Piratu niijjai chichastaj tusa jíinki tímiayi “¿Jú áishmansha warí tunáa túrait?”

<sup>30</sup>Niisha “Tunaarinchaitkiuinkia amiini itichaajji” tiarmiayi.

<sup>31</sup>Tutai Piratu tímiayi “Atumek júkirum atumí akuptammarijjai ni tunaari nekaatarum.”

Israer-shuarsha tiarmiayi “Antsu iikia Israer-shuarkitia tunáa shuarsha máach-miniaitji.” <sup>32</sup>Yaunchu Jesus ni jákatniurín enentáimtus “Wi awajnaítuiitjai” tímiayi. Niisha krúsnum awajnain asamtai apach máataijjai Nii timia nu uminkiamiayi.

<sup>33</sup>Piratusha atak jeá wayá Jesusan untsuk “¿Ámeke Israera Uunt Akupniurinkaitiam?” tímiayi.

<sup>34</sup>Jesussha tímiayi “¿Amekek nu inin-tram. Kame chíkich túramainiatsuash?”

<sup>35</sup>Piratusha tímiayi “¿Wi Israer-shuarkaitiaj? Ameer shuarak Israer-patri uuntrijjai winin itiarmarai. ¿Warí tunáa túraitiam?”

<sup>36</sup>Nuiñkia Jesus tímiayi “Wi jú nunkanam akupniuchitjai. Juyaitkiuinkia Winia nemartuiniana nu máanaikiaraayyi. Túrawarmatai Israer-shuarnum surutkacharaayyi. Antsu juyān akupniuchitjai.”

<sup>37</sup>Piratusha “¿Nuikia ame nekas uunt akupniukaitiam?” tímiayi.

Jesussha tímiayi “Ee, ame támena nu nekasaiti. Jú nunkanam akiinian ashí shuaran nekas ana nuna ujakтинian táwitjai. Ashí shuar nekas ana nuna umirniuka Wi táman ántawai.”

<sup>38</sup>Tura Piratu “¿Nekasa nusha warimpiait?” tímiayi.

### **Piratu Jesusan mantamnatniun tímiania nu**

*(Mateu 27.15-31; Márkus 15.6-20; Rúkas 23.13-25)*

Piratusha nuna tí, atak Israer-shuarjai chichastajtsa jiinki tímiayi “Jú aishmañka tunaarín penké wáittsujai.

<sup>39</sup>Tura ashí uwitin paskua nampernum sepunmayā shuar ankant akupkatniuiti.

Núnisrum tuke searme. Tuma asamtai, ¿yamaikia Israera Uunt Akupniurín ankant akupkattajak?” tímiayi.

<sup>40</sup>Nuiñkia ashí kakantar untsumainiak “Jú akupkaip; antsu Parapás akupkatá” tiarmiayi. Nu Parapássha kásauyayi.

**19** Nuyá Piratu suntran akupkami-ayi Jesusan asutiáwarat tusa. <sup>2</sup>Suntarsha Jesusan wishikrar tawasap janke najanamun etsenkrumtikiarmiayi. Yamakai pushincha uunt akupniua áintsan áentsrarmiayi. <sup>3</sup>Nuyá “Israera Uuntriā, kakaram ajasta” tiar yapiniam awatiarmiayi. <sup>4</sup>Nuyá Piratu atak jiinki tímiayi “Átum wáinkiarum nekaatarum tusan Jesusan jíiktiaitjai. Wikia tunaarinkia penké wáittsujai.” <sup>5</sup>Tímiatai Jesussha janke etsenkruku tura pushin yamakairman entsaru jíinkimiayi. Tura Piratu nuí káunkarun tiarmiayi “Pai juiti, fistarum.”

<sup>6</sup>Israer-patri uuntrisha suntarsha Jesusan físar ataksha ataksha kakantar untsumainiak “Krúsnum jakati” tiarmiayi.

Piratusha “Átum júkiirum máatarum. Ni tunaarín penké wáittsujai” tímiayi.

<sup>7</sup>Tura Israer-shuar tiarmiayi “Nu shuar “Yusa Uchiríntjai” takui jákatniuiti. Iiniu akupeamu aarma nuí núniskete” tiarmiayi. <sup>8</sup>Nuna antuk Piratusha nu nankaamas ashamkamiayi.

<sup>9</sup>Ataksha init wayá Jesusan aniasmiayi “¿Tuyampaitiam?” Tura Jesussha penké áikchamiayi. <sup>10</sup>Nuyá Piratu tímiayi “¿Urukamtia winia áirtsum. Wi jeajna nu nékatsmek? Wakeraknaka krúsnum máatniuncha tura ankant akupkatniuncha jeajai.”

<sup>11</sup>Tutai Jesussha tímiayi “Yus nuna amaschaitkiuinkia penké tujinkiaintme. Nu asamtai amiin surutka nu ámin nankaamas tunaarinniuiti.”

<sup>12</sup>Piratusha nú chichamtaik Jesusan ankant akupkattsa wakerimiayi. Antsu

Israer-shuar untsumainiak tiarmiayi “Ju ankant iníakmeka ame úunt akupniu amikrinchuitme. Juka “úunt akupniuit-jai” taku atumí uunt akupniurí nemas-rinti” tu untsumkarmiayi.

<sup>13</sup> Piratusha taman antuk akupin pujutainium pujus Jesusan untsukmiayi. Nui kaya ukatkamu asamtai Israer-shuara chichamen Kapata anaikiarmiayi. <sup>14</sup> Paskua jisat jeatsain nantu tupin ajatsain Piratu Israer-shuaran tímiayi “Uunt akupniuram íistarum.”

<sup>15</sup> Tura ashí “Jakati, jakati, krúsnum máatá” tu untsumkarmiayi.

Tura Piratu “¿Atumí uunt akupniurin krúsnum máattajak?” tímiayi.

Tura Israer-patri uuntri tiarmiayi “Atumí uunt kapitíántrumek in akuptamji. Chíkichka atsawai.”

<sup>16</sup> Tutai Piratu Jesusan krusnum mantamnatí tusa tsankatkarmiayi. Tutai ni-isha Jesusan júkiar wearmiayi.

### **Jesusan krúsnum máawarmiania nu**

(*Mateu 27.32-34; Márkus 15.21-32; Rúkas 23.26-43*)

<sup>17</sup> Jesussha ni krusri yanaki Kúrkuta náinnium wémiayi. Kúrkuta naarisha Israer-shuara chichamen “muuka ukunch” tawai. <sup>18</sup> Nui krúsnum ajintrurar awajainiarmiayi. Tura mai pae jimiará shuuran chikichik chikichik awajainiarmiayi. Tura Jesus ajapén ámiayi. <sup>19</sup> Piratusha Jesusa krúsrin uunt árman anujkamiayi. *NASARETNUMIA JESUS, ISRAERA UUNT AKUPNIURÍ* Tu áarmauyayi. <sup>20</sup> Israer chichamjaisha Kriaku chichamjaisha Rúmanmaya chichamjaisha áarmauyayi. Menaintiu chichamnum aarma asamtai tura Jesusarén pepru tíjiuch asamtai Israer-shuar ti untsurí áujiarmiayi. <sup>21</sup> Nu asamtai Israer-patri uuntri Piratun jeariar “Israera Uunt Akupniurí” áaraip. Antsu “Israera Uunt Akupniurintjai tawai” tu aarta” tiarmiayi.

<sup>22</sup> Tura Piratu nincha ákiar “Wi áaraj nuke átatui” tímiayi.

<sup>23</sup> Suntarsha Jesusan krúsnum awajainiar ni entsarmarin kuátru akankar ankant ankant júkiarmiayi. Tura ni pushirin apatsuk najanamu asamtai jáaktinian nakitarmiayi. Kame yakíya nunkaani apaiyíachma takamtsukuyi. <sup>24</sup> Tuma asamtai suntar tiarmiayi “Juka jáakchatai. Antsu nakurakin yának ati nu jukiti.” Nújainkia yaunchu Yus-Chichamnum aarma nu uminkiamiayi:

“Winia entsarmarun akantrarmiayi tura nakurusar awakmakua nuna winia pushirun súarmiayi” áarmaiti.

<sup>25</sup> Krúsnumsha Jesusa nukurísha Kriú-pasa nuarí Marisha tura Máktaran-maya Marisha wajaarmiayi. <sup>26</sup> Jesus ni nukuríncha tura ni ti aneamu unuiniamuríncha tura ni ti aneamu unuiniamuríncha tímiayi “Nukuru, ju ame uchirmea áintsan atí.” <sup>27</sup> Nuyá ni unuiniamuríncha tímiayi “Ju ame nukua áintsan atí.” Nu tsawantaik nu unuiniamurí ni jeen jukí awayámiayi.

### **Jesusa jakamurí**

(*Mateu 27.45-56; Márkus 15.33-41; Rúkas 23.44-49*)

<sup>28</sup> Nuyá ashí uminkiamtai Jesus nuna nekáa yaunchu Yus-Papinium aarma uminkiatí tusa “kitiamajai” tímiayi. <sup>29</sup> Nui sha pininnum churuín ámiayi. Tura shuar nuna uruchjai ejampar sapapjai iju mukunaati tusa susamiayi. <sup>30</sup> Jesussha churuínian najekaa “ashí túrunatniua nu mash uminkiai” tímiayi. Nuna ti, muuken nená jakamiayi.

### **Suntar Jesusan paenam nan kijai ijumiania nu**

<sup>31</sup> Nu tsawantai, kashinkia paskua námper uunt tsawantri asamtai tura ayampratin tsawant aa asamtai, Israer-shuar jaka ayashí nui paant ain

tusa nakitrarmiyai. Nu asamtai Piratun seainiak “Krúsnum ajintrurma ainia nuna kan̄kajin suntar kupirkarti. Nuyá wari jákarmatai krúsnumiá júkiarti” tiarmiyai. <sup>32</sup>Nuyá suntarsha weriar emka krúsnum amia nuna kan̄kajin kupirkarmiyai. Nuyá chikichnasha Jesusjái atsankiar ajintrurma nuna kan̄kajincha kupirkarmiyai. <sup>33</sup>Tura Jesusan weantuk yaunchu jákaiiti tusa kan̄kajin kupirtsuk <sup>34</sup>suntar aya paenam ijiumiayi. Ijiuntaisha nu chichamtaik numpa yumijjái puarmiyai. <sup>35</sup>Wi, Juan, nuna wainkia asan nekas tajai. Atumsha Yus enentáimtustarum tusan tí nekas tajai. Wi áarajna nu nekasaiti nékajai. <sup>36</sup>Yaunchu Yus-Chichamnum aarma uminkiaiti tusa túrunaiti:

“Ni ukunchin kupirkachartatui” tu áarmaiti.

<sup>37</sup>Tura chikichcha:

“Ijiuarmiania nuna wáinkartatui” tu áarmaiti.

**Jesus iwiarsamu amiania nu**

*(Mateu 27.57-61; Márkus 15.42-47; Rúkas 23.50-56)*

<sup>38</sup>Nuyá Arimatéanmaya Jusé Jesusa ayashin̄ jukitiaj tusa Piratun seamiayi. Nu Jusé Jesusan enentáimtaiat Israer-shuara úuntrin̄ ashamak paant nemarsachmiayi. Niisha seamtai Piratu “Jukitia” tímiayi. Tutai Jusé Jesusa ayashin̄ jukimiayi. <sup>39</sup>Nikiutémusha Jesusjái chichastaj tusa kashi tarimia nu jimiara kunkuin̄ pachimpramun ti nukap sumak itiamiayi. Mira kunkuin̄niasha aruí kunkuin̄niasha sumakmiayi. <sup>40</sup>Nuyá Jusé Nikiutémujái Jesusa ayashin̄ júkiar kunkuinian kuérar jaanch esarmajái penuararmiyai. Israer-shuar tuke nunisar ikiúu ármiyai. <sup>41</sup>Jesus krúsnum maamua nuí aja tíjiuch ámiayi. Nu ajanmasha waa náinnium paka taurma ámiayi. Nusha yama taurma

asamtai jaka nuí ikiuschamuyayi. <sup>42</sup>Nu waasha tíjiuch asamtai tura Israer-shuara ayampratin tsawantri jeatemamtai Jesusa ayashin̄ nuí iwiarsarmiyai.

**Jesus nantakmiania nu**

*(Mateu 28.1-10; Márkus 16.1-8; Rúkas 24.1-12)*

**20** Tumintincha káshik kirit ain Máktaranmaya Marí Jesus iwiarsamunam ístajtsa wémiayi. Jesusan iwiarsar kaya uuntjái waan atutkarmiyai. Tura Marí nuí jeá nu kaya uraimiun wáinkiamiayi. <sup>2</sup>Nuna wáiniak Semun̄ Pítiur pujamunam tsékenki wémiayi. Chíkich unuiniamurí Jesus ti anemia nusha nuísha pujumiayi. Tura Marí tímiayi “Iwiarsamunmaya ii Úuntrin̄ júkiarai. Tura ¿tuínsuk ikiusara?” <sup>3</sup>Pítrusha chíkich unuiniamuríjjái jíinkiar iwiarsamunam iyuwarmiyai. <sup>4</sup>Mai métek tsékenkiar Pítiur jeatsain̄ chíkich unuiniamurí iwiarsamunam emka jeamiayi. <sup>5</sup>Niisha wayatsuk tsuntsumá iis penuarmarin̄kia nuí tepan wáinkiamiayi. <sup>6</sup>Nuyá Semun̄ Pítiur ukunam jeá iwiarsamunam wayá penuarmarí nuí tepan wáinkiamiayi. <sup>7</sup>Chíkich jaanchcha Jesusa muuken̄ penuarma nusha nanerma niisháa tepan wáinkiamiayi. <sup>8</sup>Nuyá chíkich unuiniamurí emka tamia nusha iwiarsamunam wayamiayi. Niisha túruna wáiniak “Jesus nekas nantakni” tu enentáimpramiayi. <sup>9</sup>Nuna wáintsuk Yus-Chichamnum “Jesus jakamunmaya nantaktiniaiti” áarman áujariat nekaacharmiyai. <sup>10</sup>Nuyá mai ni jeen waketkiarmiyai.

**Máktaranmaya Marincha  
Jesus wantintiukmiania nu**

*(Márkus 16.9-11)*

<sup>11</sup>Tura Marikia iwiarsamunam juak úutu pujumiayi. Niisha úutiatan̄ tsuntsumá iwiarsamunam ímsamiayi.



<sup>12</sup>Tura Jesusa ayashí nuik tepesmanum nayaimpinmaya suntar puju entsaru jímiar pujan wáinkiamiyi. Chikichik múuknumaani tura chíkichka nawenmaani pujumiayi. <sup>13</sup>Nayaimpinmaya suntarsha “¿Urukamtai úutam?” tiarmiayi.

Marísha tímiayi “Winia Úuntrun jurutkiarai tura ¿tuintsuk ikiusara?”

<sup>14</sup>Nuna t̄i ayanmar Jesusan wáiniak Nin nekaachmiayi.

<sup>15</sup>Jesus aniak “¿Urukamtai úutam. Ya eeam?” tímiayi.

Marisha ajan wáinnia nuiti tusa tímiayi “Uunta, ame ni ayashí jukimkia, tui ikiusmam ujatkata wi jurumkitiaj” tímiayi.

<sup>16</sup>Nuyá Jesus “Mariya” tímiayi.

Tutai niisha ayanmar “Rapuni” tímiayi. Nusha Israer-chichamnum “Uuntá” tawai.

<sup>17</sup>Jesusha tímiayi “Emetruawaip. Winia Aparuḡ wáatsjai. Antsu weme Wíi shuar titiá “Winia Aparuḡ nayaimpiniam wéajai. Niisha atumí Aparínti. Winia Yúsruiti tura atumí Yúsrinti” tawai titiá” tímiayi.

<sup>18</sup>Nuyá Máktaranmaya Marisha Jesusa unuiniamurḡn wáiniak “Wi Úuntan wáinkiajai, tímiayi. Niisha juna mash túrutui” tu ujakarmiayi.

### **Jesus ni unuiniamurḡn wantintiuqmiania nu**

(Mateu 28.16-20; Márkus 16.14-18; Rúkas 24.36-49)

<sup>19</sup>Nu tsawantai, tumiḡntin, ni unuiniamurḡ Israer-shuara úuntrin ashamainiak kashi iruntrar waiti epeni pujuarmiayi. Túrasha Jesus áyatik wayamiayi. Tura ajapén wajas “shiiir pujustarum” tímiayi. <sup>20</sup>Nuna t̄i, nuyá ni uwejeḡ ajintruamuncha ni paen ijiumuncha iniakmasmiayi. Ni unuiniamurḡsha Úuntrin wáinkiar shiiir warasarmiayi. <sup>21</sup>Ataksha Jesus “Shiiir pujustarum, tímiayi.

Winia Apar akatar akuptukma núnisnak Wisha akatran akupeajrume” tímiayi. <sup>22</sup>Nuyá ni matsatmanumaani umpuḡ tímiayi “Yusa Shiir Wakanḡ atumí enentáin wayati. <sup>23</sup>Shuara tunaarḡnkia átum “asakárti” tákurminkia tsankurnartatui. Tura nu shuar “sumamati” tákurminkia tuke sumama pujawai” tímiayi Jesus.

### **Tumas Jesus nantakniun wáinkiamiania nu**

<sup>24</sup>Tura chikichik unuiniamu, Jími-ampramu Tumas, Jesus tamia nuḡ pujuarmiayi. <sup>25</sup>Tura ukunam chikich unuiniamurḡ ujainiak “Ii Uuntri wáinkiaji” tiarmiayi.

Tura Tumas tímiayi “Ajintruamurḡ wáinkian uwejrḡn awáintiatnuiḡtjai. Tura paenumsha awáintiatnuiḡtjai. Penké jaka asamtai aya nuḡjai iniantkimium enentáimtustatjai” tímiayi.

<sup>26</sup>Chíkich tumiḡntin ataksha Jesusa unuiniamurḡ iruntrarmiayi. Nuiḡnkia Tumassha niijjai pujuarmiayi. Tura waiti epenmianumanḡ Jesus wayá ajapén wajas “Shiiir pujustarum” tímiayi. <sup>27</sup>Nuyá Tumasán tímiayi “Winia uwejrḡ fisam ame uwejeḡ awáintiuata. Núnismek winia paeruḡ uwejeḡ awáintiuam íistá. Tura arantutsuk nekas enentáimtursata.”

<sup>28</sup>Nuyá Tumas “Winia Úuntrua, nekas winia Yúsruiteme” tímiayi.

<sup>29</sup>Jesusha tímiayi “Winia wáitkiam nuḡn enentáimtursame. Antsu Winia wáittsuk enentáimturaru nekas shiiir ániawai” tímiayi.

### **Shuar Yusa Uchirḡn enentáimtusarti tusa ju papí áarmaiti**

<sup>30</sup>Aentsti tujintiamuncha Jesus túramu ti untsurḡ ju papinium áarchamu ániawai. Tura ni unuiniamurḡ mash wáinkiarmai. <sup>31</sup>Antsu Jesuska Kristu asa Yusa Uchirḡnti tu enentáimtusarum tusan júnaka áarmajai. Tura

enentáimtakmin Jesus ni iwiaakmarin yamarma nuna amastatui.

**Entsá yantamnum Jesus siati (7)  
unuiniamurin wantintiukmiania nu**

**21** Tipirias antumianka káanmatkariin Jesus ni unuiniaturin wantintiukmiayi. Júnisan ámiayi. <sup>2</sup>Semuñ Pítrusha Jímiapramu Tumassha Kananmaya Natanaérsha Sepetéu uchirísha tura chíkich jímjar unuiniaturísha métek iruntrar pujuarmiayi. <sup>3</sup>Semuñ Pítrusha “Namakan nekajai nanakiattsan wéajai” tímiayi.

Chíkich mash “Iisha winittiaji” tiarmiayi.

Wéar uunt kanunam enkemprar nu kashi achitsuk tsawararmiayi. <sup>4</sup>Káshik aín Jesus entsá káanmatkarín wantinkiamiayi tura ni unuiniaturísha Jesusan nekaacharmiayi. <sup>5</sup>Jesussha tímiayi “Uchiru, ¿namak achikiurmek?”

Niisha “Atsá” tiarmiayi.

<sup>6</sup>Tutai Jesus tímiayi “Neka untsuurnu-maani ajunkatarum. Nui achiktatrome.”

Nii timia núnisan túrawar namakan ti achikiar nekan júsatniun tujinkiararmiayi. <sup>7</sup>Nújainkia Jesusa unuiniaturí Jesus ti aneemia nu Pítrun tímiayi “Ii Úntrinti.” Takui Pítrusha ámiaku asa ni pushirin entsar entsá inianmiayi yukuak jeataj tusa. <sup>8</sup>Chíkich unuiniaturísha jeachat pujuiniachuk nekan japiki kanujai káanmatkanam jeawarmiayi. <sup>9</sup>Káanmatkanam jeawar ji kajir ámanum namakan jiámun wáinkiararmiayi. Tantancha wáinkiararmiayi. <sup>10</sup>Jesussha “Átum achikiurmena nuyá jíatin itiatarum” tímiayi. <sup>11</sup>Tutai Semuñ Pítiur kanunam we nekan nekartiuk káanmataj japiki itiamiayi. Itiar namaknasha siantu senkuenta nuyá tres (153) nekapmararmiayi. Ti untsurí áyat

nekasha jáankachmiayi. <sup>12</sup>Nuyá Jesussha “Yurumátiarum” tímiayi. Ni unuiniaturísha “aya ii Uuntri áminiaiti” tusar inintrustinian natsantiarmiayi. <sup>13</sup>Nuyá Jesus wajaki tantan jukí súsarmiayi. Núnisan namaknasha súsarmiayi.

<sup>14</sup>Jesus jakamunmaya nantaki jujai menaintiu ni unuiniaturin wantintiukarmiayi.

**Jesus Semuñ Pítrujai  
chichasmiania nu**

<sup>15</sup>Nuyá yurumáwar Jesus Semuñ Pítrun aniasmiayi “Junasa uchirí Semunka, ¿ju shuar nankaamas anentmek?”

Pítrusha tímiayi “Ee, Uunta, wi wakerajam nu Ame nékame.”

Jesussha “Nuínkia winia murikiur ayuratniua áintsam Winia enentáimturainia nu yaintá” tímiayi. <sup>16</sup>Ataksha aniasmiayi “Junasa uchirí Semunka, ¿Winia anentmek?”

Pítrusha “Ee, Uunta, wi wakerajam nu Ame nékame” tímiayi.

Jesussha “Winia murikiur wáinkiatá” tímiayi. <sup>17</sup>Nú ataksha aniasmiayi “Junasa uchirí Semunka, ¿winia wakerutamek?”

Pítrusha menaintiu iníam kúntuts enentáimiar tímiayi “Uunta, ashí nékame. Wi wakerajam nu Ame nékame.”

Jesussha tímiayi “Winia murikiur ayurata. <sup>18</sup>Maa, nekas tájame. Natsa asamka iwiamampram ame wakeramunam wéuyame. Tura úuntach ajasmeka ame kunturam ayaparakmin chíkich aentstampattawai tura ame wétin nakitiam nui juramkiartatui.” <sup>19</sup>Jesus nújainkia Pítiur máatniun ujakmiayi. Tura núnisan jakamtai shuar Yúsan shiir awajsatniun ujakmiayi. Nuyá Pítrun “Nemartusta” tímiayi.

**Juan túrunatniun Pítur  
Jesusan aniasmiania nu**

<sup>20</sup> Pítrusha ayanmar chíkich unuini-amurín Jesus ti anea nuna némarun wáinkiamiyai. Kame nu unuiniamuka nuik Jesus jáatsain yurumáiniakui “Uunta, ¿ya surutmaktata?” timia núiti. <sup>21</sup> Nincha Pítur wáiniak Jesusan aniasmiaiyi “Uunta, ¿jusha warí urukatniuit?”

<sup>22</sup> Jesussha ayak “Wi wakeraknaka iwiaaku pujain tátatjai tímicaaitjai. Nuna tákuisha ¿warí itiurtama? Ámeka

nemartusta” tímiyai. <sup>23</sup> Nújainkia “Nu unuiniamurí jákashtatui’ tusa Yus-shuarnum áujmatiarmaiya. Túrasha Jesus “jákashtatui’ tíchamiyai antsu áyatik “Wi wakeraknaka iwiaaku pujain tátatjai takuisha ¿warí itiurtama?” tímiyai. <sup>24</sup> Wikia nú unuiniamuríntjai. Jü papincha aaru asan “mash nekasaiti’ tajai. Ashí shuarsha núnisaran tuíniawai.

<sup>25</sup> Nu arantcha jüí áarchamusha ti awai. Kame ashí áamka ti untsurí papí asa ashí nunkanam ikuschamnia ainti. Nuke atí.

*Jesusa Akatramurí Yusa Wakaníjjai*

## TÚRAMU

### Yusa Wakanín nákasarmiania nu

**1** Amikiur Tiúpiru:  
Nuik akupkamiaj nú papinium ashí Jesus túramia nuna áatramiajme. Tura unuitiampramij nunasha áatramiajme. Yámankamtaiknumia,<sup>2</sup> nayaimpiniam wétsuk, ashí Nii túramia nuna tímiajme. Jesuska, nayaimpiniam waketsuk Yusa Wakaní kakarmarijjai túratniua nuna ni akatramurín jintintiawarmiyai.<sup>3</sup> Tura jaka nantaki, Jesus tímiajalk wantintiukmiyai ni akatramurín. Tura kuarenta (40) tsawant nin wantintiukarmiyai. Nuna tura nekas iwiakjai tusa iniakmasmiyai, nekaawarat tusa. Tura Yusa akupeamurí urukukit nuna mash ujakmiyai.

<sup>4</sup> Jesuska ni akatramuríjjai tuke pujus, nin chicharuk “Jerusarénumiá wéerap, tímiyai. Winia Apar “amastatjai” tímia nuna, paant ujakchamkajrum. Nu túrunat tusarum Jerusarénum nákastarum, tímiyai.<sup>5</sup> Tuke enentáimsatarum. Juan entsajai atumí ayashín imiatmimiarme. Túrasha wárik Yusa Wakanísha atumniasha tarutmar, atumí enentáin enkemprutmattarme. Nusha enentái imiantin áintsankete” tímiyai.

### Jesus nayaimpiniam wakamiania nu

<sup>6</sup> Tura Jesusjai irunar matsamas anintriarmiyai “Unta, Israer-shuar ájinia nu, ankant ajasakrin iiniuk Akupin atak naamkatin yamaí jeyash” tiarmiyai.<sup>7</sup> Jesus áimiuk tímiyai “Winia Apar túrattana nu warí tsawantinik túrunatí nu nekaatniusha atumniachuiti. Apar

Nin*ki* neka asa ni kakarmarijjain túrattawai.<sup>8</sup> Tura atumsha Yusa Wakaní kakarmarín sunastatrume. Nii taa enkemprutmamtaí kakaram ajasrum, Wíi túramu etserkattarme. Emka jui Jerusaré*n* péprunam etserkattarme. Nuyá ashí Jutía núnkanam, tura arant Samaria nunkanmasha, tura nú arant ashí núnkanam werum, Wíi túramu etserkattarme” tímiyai Jesus.

<sup>9</sup> Nuyá chichas amir, ashí ni akatramurí ii wajainiai, Jesus nayaimpinmaani junakmiyai. Wéa-wéakui yurankim mash Nin amuámiyai. Tuma asamtaí ni akatramurí Nin wáinkiacharmiyai.<sup>10</sup> Tura Jesus waakkui ni akatramurísha yakí ii wajainiai, jimiará áishman puju entsaru nuí wantintiukarmiyai. Tura ayamach wajattsarmiyai.<sup>11</sup> Nu áishmansha Jesusa akatramurín tiarmiyai “Kariréanmayá áishmanka, çurukamtaí nayaimpinmaani imiá íimprum? Ju Jesusak atumíyá nayaimpiniam wea wáinkiarumna núnisan ataksha winittiawai” tiarmiyai.

### Matíasan anaikiarmiania nu

<sup>12</sup> Tuasua amikmataí Jesusa akatramurí Uriwiu náinniumiá akaikiar Jerusarénum wakеткиarmiyai. Uriwiu naincha Jerusarénumsha tíjiuchiiti, chikichík kirumitrua núnisan.<sup>13</sup> Tura Jerusarénum jeawarmiyai. Nuí jeawar, jeá wayawar yakí wákararmiyai. Nuí Pítrusha, Jakupusha, Juansha, Antressha, Jiripisha, Tumassha, Parturumísha, Mateusha, tura Arpeu uchirí Jakupusha, nuyá ásump Semunsha, Jakupu yachi Jútassha, tímian wayawarmiyai.<sup>14</sup> Jusha mash tuke iruniarmiyai Jesusa yachijjai. Tura Jesusa nukurí Marijjai, nuyá chikich nuwajajsha tuke iruniarmiyai, Yus áujсатаí tusar.<sup>15</sup> Nuí siántu painti (120)

aents iruntrarmia nuĭ Pítiur chichastaj tusa wajakmiayi.

<sup>16</sup> Pítiur juna tímiayi “Yatsurtírmesha, umarutírmesha antuktarum. Yuska yaunchu ni Papiriin Jutasnan áamtikramiayi. Jútas akiintsain Tawitkia, Yusa Wakanĭ jintintiam Jutasnan áarmiayi. Jesusan achik surukarmia nú shuaran nekapruamia núiti. Kame Tawitia áarmari Yus-Chicham asa tímianak uminkiatniuyi. <sup>17</sup> Nú Jutaska ii frutramuitiat, ii takaamurĭn páchtikiaitiat, <sup>18</sup> tunáa tura nuĭai kuítian achik nunĭkan sumakmiayi. Tura piniakum iniaaĭ tantane páttimiayi.

<sup>19</sup> Tuma asamtai ashí Jerusaréĭnum pujuarmia nu, nuna nekaawar nú nunĭkan “Numpa Nunĭka” anaikiarmiayi. <sup>20</sup> Kame Sarmu papinium Tawitkia juna áarchamkia:

“Ni jeesha itiarak atí.

Nu jeanmanĭka penĭké pujuschartí.” Tura “Ni takatriĭ chíkich atankiti.”

Tu aarmaiti’ tímiayi.

<sup>21</sup> “Tuma asamtai yamaikia chíkich anaikiatniuitji. Tura nánkamas achikchatniuitji. Antsu ii nemartamkau atí. Uunt Jesus iijĭai pujumia nuĭ tuke Nin nemarsamia nu atí. <sup>22</sup> Juan Jesusan imiaimiania nú tsawantnumĭa jukí, Jesus nayaimpiniam wémiania nú tsawantan tímianu ejé tuke Niiĭĭai wekaimia nu atí. Nu shuar enentámtusar, chikichik achiktai. Iisha iruntrar Jesusa nantakmiariĭ etserkamí tusar túramí” tímiayi Pítiur.

<sup>23</sup> Tura nuyá jimiará shuaran anaikiarmiayi. Matíasan anaikiarmiayi. Tura chikichnasha Jusen, ni chíkich naariĭ Parsapas, tura apach náarinĭkia Justu, nunasha anaikiarmiayi.

<sup>24-25</sup> Tura nuyá Yus-shuar Yúsan áujainiak juna tiarmiayi “Ii Uuntriĭ, Amesha ashí shuara enentái nékame. Juĭi awai jimiará áishman. Jútas tunáa túrak jákatniunam wéak akatramu

takatan ikiukmiayi. Yamaikia Jútas takatriĭ achikiat tusam, ¿tuá achikium, Uunta? Paant iniakmasta.” Tu aujsarmiayi.

<sup>26</sup> Tura Israer-shuara túrutariĭ núnisan, wats yaki nupetmakat tusar túrawarmiayi. Tura Matías nupetmakmiayi. Túrunamtai Matíasnak pachikiarmiayi.

### Yusa Wakanĭ taramiania nu

**2** Pintikiustís náartin jisat jeamtai, chíkichĭk jeanman nuiĭn Yus-shuar tuakarmiayi. <sup>2</sup> Tumaiĭ aya aneachma nayaimpinmaya nasea áintsan téter ajaki winian antukarmiayi. Ashí mash jeá pujuarmia nuka antukarmiayi. <sup>3</sup> Tura nuĭ pujuiniĭai ji wajai kea áaniun wáinkarmiayi. Túruna anĭkant anĭkant puunak tarurarmiayi. <sup>4</sup> Tuma asamtai Yusa Wakanĭ ashí ni enentáin pimiutkarmiayi. Túram chichasarat tusa Yusa Wakanĭ ni nekatairiĭ súsarmiayi. Tuma asamtai nuĭai niisha chíkich chichaman chichasarmiayi.

<sup>5</sup> Nuĭ Jerusaréĭnum Yus táman umirin Israer-aents áarmiayi. Ashí nunĭkanmaya Jerusaréĭnum taar matsarmarmiayi. <sup>6</sup> Tura túrunamia nuna antukar káunkarmiayi. Tura ashí shuar ni chichameĭĭaiĭ chichaamun antukarmiayi. Tuma ásar, warinkit, tu enentáimsarmiayi. <sup>7</sup> Nekaachar ashamkarmiayi. “Warĭnkit, tunaim ajarmiayi. Juĭ aents chíkich chíkich chichaman chichainia nu, ashí Kariréanmayanchukait, tiarmiayi. <sup>8</sup> Tura iisha anĭkant anĭkant ii chichamenĭka ántatsjik. Ausha urukainiakua, nunak chichainiawa, tiarmiayi. <sup>9</sup> Juĭi ashí nunĭkanmaya aents pujuiniatsjik. Partianmaya, Eramnumiasha, Misiuputámianmayasha, Puntanmayasha, tura Asia nunĭkanmayasha, <sup>10</sup> Prĭĭĭianmayasha, Pampirianmayasha, Eĭiptunmaya

tura Áprikiánmaya Serinia nú nankaamasnumiasha pujuiniatsjik, tiarmiayi. Nuyasha ii shuarsha Ruma péprunmaya yaunchu taar juí matsatainiawai. Chikichcha tuke Israer-shuar ániawai. Tura chikichcha Israer-shuar ajastaj tusa Israer túrutairín mash túruiniawai. <sup>11</sup> Kriatianmayasha Arapiánmaya pujuiniaji. Tura ashí mash ii chichamejaisha Yusa péñker túramurí ántaji” tiarmiayi.

<sup>12</sup> Ashí aents nuna nékachu ásar ashankarmiayi. Tura nuámtak aniniaisarmiayi “¿Warinminiait ju?”

<sup>13</sup> Tura chikichcha wishikiarmiayi. “Nampeku ániatsush” tiarmiayi.

### Pítiur ujakmia nu

<sup>14</sup> Nuiñkia Pítiur, chíkich áuntse Jesusa akatramurijijai wajaki, kakantar chichasmiayi. Chichaak tímiayi “Jutíánmaya shuartiram, Jerusarénumiá tirmesha antuktatum. Wi títiatjana nu antukrum péñker enentáimpratarum. <sup>15</sup> Ju áishman, nampekarai, tárumna nu, nampecharai. Warí, nantu imiá ishichik takuni. ¿Aisha itiurak? <sup>16</sup> Antsu Yúsnan etserin, ni naari Juér, yaunchu áarmia nu, yamá túrunayi, tímiayi.

<sup>17</sup> Juna áarmiayi: “Yus tawai “Jú nunka amuukatin jeatemantai, winia Wakantrun ashí áentsnum akupkattajai, yumi yaraanua áintsan. Atumí uchiri, atumí nawantrisha Yusa chichamen áujmariatatui. Tura nátsaka íimiarartatui. Tura uuntka mesekramariatatui. <sup>18</sup> Tura áishmansha nuwasha winia takartin ainia núnaka winia Wakantrun akuptukartatjai. Túram niisha Wíi túramun áujmariatatui.

<sup>19</sup> Yakí nayaimpiniam, aents túrachminian iniakmestatjai. Tura nunkanmasha winia kakarmarun iniakmestaj tusan numpancha,

jiniasha, mukuintiuncha yuranmia áintsan akupkattajai. <sup>20</sup> Tura tsawái nantusha kajinkiattawai. Tura nantusha mushatmar numpa núniktatui. Uunt tsawant achikmiajna nu jeatsain, túrunattawai. Nú tsawantcha imiá nekas uunt átatui. <sup>21</sup> Nuiñkia ashí shuar nekas winia kakarmarun seana nuka uwemprartatui” tímiayi Yus.”

Núnis Juér áarmiayi’ tímiayi Pítiur.

<sup>22</sup> Tuke chichaak: ‘Israenumiá shuartiram, wi títiatjana nu antuktatum. Nasarénumiá Jesusnan tajai. Nú Jesusan Yus shiir enentáimtawai. Yuska, átum ti enentáimpratum ni kakarmarun paant nekaatarum tusa, nú Jesusan ti ikiakármiai. Tura Jesusjai aentsti túrachminian Yuska túramiayi, átum íimmianum. Nuka ti paant nékarme, tímiayi. <sup>23</sup> Tura Jesus surunkamia nuna Yuska yaunchu, túruntsain, paant nekaamiayi. Túrusha Yus enentáimmiá nujai métek túrawarmiayi. Tura atumek emetatum Jesus jukimiarme. Nú arant, krúsnum máatarum, tunáa shuar tímiarme. <sup>24</sup> Túramunak Yus Jesusan jákatniun nupetmamtik iniantkimiayi, tuke jákachmin asantai. <sup>25</sup> Iimiata, ii uuntri Tawit Jesusnan kantamprua juna áarmiayi:

Úuntan tuke pujurtan wáinmiajai. Winia pujurtakuí awajkamú áhattajai.

<sup>26</sup> Tuma asantai winia enentáirjaisha Nin shiir enentáimtusmiajai. Tura wenurjaisha shiir chichaman chichamiajai. Jáaknasha shiir enentáimsan jakattajai, aneantiniapitjia tusan.

<sup>27</sup> Winia wakaniur, Yusru, jákatniunam ikiurtuschattame. Wi ame Uchirmetjai, Tunaaríncha. Túmaitkui anentu asam ayashur káurtin tsankatrukhattame.

<sup>28</sup>Tura iwiaaku átin jintia jintintrutamame. Tura tuke pujurtakum waramtikrustatme.

Tu áarmiayi Tawit' tímiayi.

<sup>29</sup>Pítiur tuke chichaak: 'Páantchakait. Ii uuntri Tawit yaunchu jákai. Tura iwiansamuiti. Ni iwiansamuri iini pujatsuk. <sup>30</sup>Túrasha Tawitkia Yúsnan etserniuyayi. Tuma asa Yus tímia nuna nekaamiayi. Yus Tawitian chicharuk tímiayi "Ame akupniuitme. Nekas tájame, ukunam ame iniapnamurminian Kristu akiiniattawai. Niisha Akupin anainiaktatui, amea áintsan." Nuna Yus táman Tawit nekaamiayi. <sup>31</sup>Neka asa, túruntsain Tawit, wainkia nútiksan, Kristu nantaktintri áarmiayi. Kristu túrunatniuri chicharuk tímiayi "ni wakanincha jákatniunam ikiukchatniuyi. Ayashincha káurtinian tsankatkashtiniuyi." <sup>32</sup>Au Kristun tímia nu Jesusaiti. Nu Jesusnak Yus iniantkimiayi. Nuka iisha neka asar étsereaji. <sup>33</sup>Yuska, Jesus nankaamantuiti tusa ni untsuuriñi apujisaiti. Tura ni Wakanin Jesusan súisaiti, Nii yaunchu tímia nútiksan. Tuma asamtai jusha átum antukurmena nuna, tura ísurmena nunasha Yus suramsaiti. <sup>34</sup>Tawitkia ayashtiuk nayaimpiniam wákachmiayi. Tura nú Tawitiak juna áarmiayi:

"Uunt Yus winia Úntrun tímiayi "akupin pujutainium, winia untsuuruñi pujustá.

<sup>35</sup>Ame nemasrumin nupetkattajai. Nu túruntsain jui pujustá' tímiayi."

Nuní áarmaiti Jesusnan, tímiayi. <sup>36</sup>Tura ii, Israer áentsti, Jesus krúsnum maaitji, tímiayi. Jú Jesus máamjinia nuna Yuska Uunt Akupin anaikiamiayi. Túrasha Jesussha in uwemtikiartin Kristuiti. Ashí áentstíram nu penker nekaatarum" tímiayi Pítiur.

<sup>37</sup>Nuna antukar wake mesekarmiayi. Tura Pitruncha chíkich akatramuncha

aniasarmiayi "Yatsuru, ¿nuinkia itiurkatjik?" tiarmiayi. <sup>38</sup>Tutai Pítrusha chichaak "Atumí tunaari ikiuktiaj tusarum Yus nekas enentáimtustarum. Tura ashí shuartiram Jesukrístu naari pachisrum imiantiarum. Nuinkia atumí tunaarin Yus tsankurtamprattarme. Túrunawakrumin Yuska ni Wakanin suramsattarme, tímiayi. <sup>39</sup>Yus tímia nuka atumin túramprume. Atumí uchiríncha tura ashí arant matsatainia nunasha tawai. Kame ii Yusri áentsun untsuktaj tusa wakerana nuna tawai" tímiayi.

<sup>40</sup>Nú chichamjai tura nuyasha Pítiur tuke jintintiuk tímiayi "Yajauch shuara asutiátniuri átatna nuyá uwempratarum" tímiayi. <sup>41</sup>Tuma asamtai nuna antukarmia nuka imianiarmiayi. Nú tsawantaj menaintiú mir (3000) aents Yus-shuar ajasarmiayi. <sup>42</sup>Ashí nu shuar Jesusa akatramuri jintintiaromia nuna tímiatrusan antukarmiayi. Tura irunar shiir enentáimtunaisar yurumin áarmiayi. Túrawar, Kristu enentáimtustin namperin najanin áarmiayi. Túrawar Yúsan áujiarmiayi.

### Yus-shuar pamparamiania nu

<sup>43</sup>Tura Yuska aentsti túrachminian Jesusa akatramurijjai túramiayi ni kakarmarin iniakmastaj tusa. Tuma asamtai ashí aents nuna wáinkiar ashankarmiayi. <sup>44</sup>Yúsan umirkaruka ashí métekrak pujuarmiayi. Tura ashí niiniu armia nuna sunaisarmiayi. <sup>45</sup>Ni nunken surukar, ni takakmarincha surukar, atsumainia nuna súarmiayi. <sup>46</sup>Tuke tsawantak Yusa Uunt Jeen káuniarmiayi. Tura ni jeencha iruntrar warainiak Kristu enentáimtustin námper najanin áarmiayi. Tura nankaamantu enentáimtumatsuk, yurumkan ajamnainiarmiayi. <sup>47</sup>Túrawar, Yuska ti úntaiti, tu

wearmiayi. Tura ashí aents nin shiir enentáimtiarmiayi. Tura Uunt Yus tuke tsawant shuaran uwemtikiar Yus-shuar írunmanum íkiaun̄ki wémiayi.

### Wekaicha wekasamiania nu

**3** Chíkich tsawantaj, nantu nun̄kaach ajasmatai, Pítíur Juan̄jaj, Yusa Uunt Jeen Yus áuj̄satai tusar wearmiayi, Israer-shuar tuke turin armia nútik-saran. <sup>2</sup>Tura áishman̄, ni akiiniamuri-nī wekaicha amia nu, nūi aa wáitiniam tuke tsawant pujumiayi. Nu áishman̄nasha ni shuarī entsakí júkiar nú wáitiniam apujin ármiai, nūi shuar wayan kuítian seat tusar. Nú wáitisha, Shiir Waiti, tutaiyayi. <sup>3</sup>Tura nú shutuapsha Pitrun Juan̄jaj wayan wáinkiamiayi. Wáiniak kuítian seamiai. <sup>4</sup>Tura Pítíur Juan̄jaj apajas ísarmiayi. Tura nú áishman̄nasha chicharuk “Íirsata” tímiayi. <sup>5</sup>Aishman̄sha, surustatuapi, tu enentáimias, íimsamiayi. <sup>6</sup>Nuyá Pítíur chichaak “Kuítusha atsawai, tímiayi. Kurisha atsawai. Antsu kuítjaj nan̄kaamas takakjana nuna amastajai. Wats, Nasarénumī Jesukristu kakarmarij̄jaj wajakim wekasata” tímiayi.

<sup>7</sup>Tinia iniais, Pítíur ni untsuurīni achik awajkimiai. Túram ni nawesha, wanusesha kakaram ajasmiai. <sup>8</sup>Tura niisha wajaki nantent ajakmiayi. Nuyasha wekasamiayi. Tura Pítíurjajsha Juán̄jajsha Yusa Uunt Jeen wayawarmiayi. Nuik shutuapka wayá nantent nantent ajak Yusa náarin shiir pachimiayi. <sup>9</sup>Ashí aents pujuarmia nu, nin wekaan wáinkiarimiayi. Tura ni chichamen anturkarmiayi. <sup>10</sup>Tura chichainiak “Nuik Yusa Uunt Jeen wáitir̄in, Shiir Waiti tutainium, nu áishman̄ tuke pujuuya núchakait” tiarmiayi. Tura ni túrunamurīn nekaawar, ti ashamkar nusháa enentáimsarmiayi.

### Pítíur ujakmiania nu

<sup>11</sup>Shutuapka pen̄ker ajasu asa Pítíurjaj Juán̄jajsha pen̄ké tsurachmiayi. Tura aents nūi pujuarmia nu, warinkit tusar, jeáshkirī tsékenki wearmiayi. Nuka Sarumún̄na tiniu ármiai. <sup>12</sup>Aents káunkarun Pítíur wáiniak, chicharuk “Israer-shuartiram, ¿urukamtai winiasha imiá írum? tiarmiayi. ¿Isha pen̄ker asarik' tsuarmaj'? ¿I kakarmarij̄jainkik' ewekamsamaj'? <sup>13</sup>Atsá. Antsu Yuska ni Uchir̄in Jesusan ashí nan̄kaamantu awajsaiti. Ii uuntri Apraamsha, Isaksha tura Jakupsha enentáimtin armia nú Yusan tajai. Átumka Jesus nakitrarum kapitián Piratúí surukmarme. Tura Piratu akupkataj tau atumsha suritkiarmarme. <sup>14</sup>Jesus pen̄ker nákak enentáimniuyana nu “akupnakchati” tímiarme. Antsu shuáran main akupnakat tusarum wakerimiarme. <sup>15</sup>Túrarum iwiaaku átinian Amaana nu maarmarme. Tuma ain̄ Yuska Nin jakamunmaȳ iniantkimiayi. Nuka iisha neka asar étsereaji. <sup>16</sup>Tura jū aishman̄ jūi wajaana jū tura nékarmena jū, Yusa Uchir̄i naarī enentáimta asa kakaram ajasuiti. Jesus enentáimtususu asa nekas pen̄ker ajasuiti. Nusha wáinniu asarum nékarme' tímiayi.

<sup>17</sup>“Wats, yatsurtiram, wi nékajai. Atumsha atumí ún̄trij̄jaj Jesusan túramarmena nu nékatsuk túramarme. <sup>18</sup>Tura nu túramurmij̄jaj Yus yaunchu tímia nu tímianak umikiurme. Ni Krístur̄i wáitsatniuya nuna Yuska ashí ni etserniur̄in áamtikramiai. <sup>19-20</sup>Wats, yamaikia tunaaruminī kanaktiarum. Túrarum Yúsnumaanī ayantárarum, tunaarun asakárat tusarum. Túrunawakrumn̄kia, atumin uwentikramprarat tusa Yus yaunchu anaikiamia nuna akupturmaktatrome. Nusha Jesukristuiti. Tura Niij̄jaj



enentáimin ayampratin átatui. <sup>21</sup>Tura yamaikia Jesukrístu nayaimpiniam pujustiniaiti, ashí iwiarnatsain. Yuska ukunam ataksha nunkan shiir awajsattawai. Nuna ni etserniurín tsáapin enentái takaku armia nuna yaunchu áamtikramiayi. <sup>22</sup>Tuma asa Muisais ii aparín tímiayi:

“Atumi Uunt Yusrí ukunam etserniun akupturmaktatrome, winia akuptukmia núnisan. Nuámtaktirminiá achik akupturmaktatrome. Tura nii títiatna nu umirkatarum” tímiayi. <sup>23</sup>Nánkamas aents nu etserniun chichamen umíachkunka emesnartatui. Tura Israer-shuarnum páchitkia áchattawai.

Núnisan áarmiayi Muisaissha’ tímiayi.

<sup>24</sup>Pítiur tuke chichaak ‘Iimiata, Yús-nan etserin Samuer ju tsawantin túratniurí etserkamiayi. Nuyá ashí Yús-nan etserniusha tuke nuna etseriarmiayi. <sup>25</sup>Etseriarmia nuka atumin túramprume. Tuma asa átum péñker pujustinian Yuska ii uuntri Apráaman ju chichaman susamiayi. “Nekas tájame, ame shuarum akiiniattana nujai ashí áentsnasha shiir awajsattajai’ tímiayi. Tura ii úntrin tímia núnaka incha túramji, tímiayi. <sup>26</sup>Iimiata, Yus ni Uchirín iniantkimia nuí, atumin emka akupturmakmiarme. Atumsha, atumí tunaariya kanaktiarum tusa, tura atumin shiir awajtamsatniun wakerak túramiayi.” Nunak tímiayi Pítiur.

### **Pitruncha Juánnasha kajerkarmiania nu**

**4**<sup>1-2</sup>Pítrusha Juanjai Yusa chichamen áentsun jintintiainiak pujuarmiayi. Jesus nantakin asamtai aencha nantaktin áiniawai, tiarmiayi. Tura chichaak pujuiniá Israer-patri táarmiayi. Tura Yusa Uunt Jēen wainniu úntrisha Satuséu aentcha táarmiayi. Taar Pitruncha Juánnasha kajerkarmiayi,

niisha Jesusa nantakmiari chichaman jintintinia asamtai. <sup>3</sup>Yamaikia kíawai, kashin iismí tusar achik sepunam enkea iniaisarmiayi. <sup>4</sup>Tura Pitrun nuik anturkarmia nú aents untsurí Yus-shuar ajasarmiayi. Nuik Yus-shuaraim tura yamaiyaim iruram ti untsurí ajasarmiayi. Aya áishmankak, senku mir (5000) aents áirmiayi.

<sup>5</sup>Kashin tsawarmatai Israer-shuara akupniurí, ni úntrisha, tura ni jintinniurisha Jerusarēnum iruntrarmiayi. <sup>6</sup>Nuisha Anassha, Israer-patri uuntri anaikiamu amia nu, tura Kaipiassha, Juansha, Arejantrusha, tura Israer-patri kapitiantri shuarisha tímian iruntrarmiayi. <sup>7</sup>Iruntrar Pitruncha Juánnasha utitiarum tusar akupkarmiayi. Tura itiar matai, ajapén awajsarmiayi. Tura aniasarmiayi “Kame ¿yana kakarmarijiai, yana chichamejai túrarum?” tiarmiayi. <sup>8</sup>Tutai nuyá Pítiur, ni enentáin Yusa Wakaní pimiutkamu asa tímiayi “Akupniutiram, tura úntirmesha antuktaram. <sup>9</sup>Ju áishman nuik shutuap amia nu péñker ajasmari anintrarme. Kame itiurak péñker ajasuit tátsurmek. <sup>10</sup>Urukamtia úuktataj. Anintrakrumin iisha paant títiatji, Israernumia shuar ashí nekaawarat tusar. Ju áishman Jesukrístu kakarmarijiai péñker ajasuiti. Nasarénumia Jesukristun, átum máamurmena nuna, tura Yus jakamunmaya iniantkimiania nuna tajai, tímiayi. <sup>11</sup>Nú Jesuska kayaa áintsankete. Atumsha jeamniutiram, nú kaya yajauchiiti, tímiarme Jesusna. Túrusha túramaitatan Niisha jeanam emka apujsamua núnisan ajasuiti, tímiayi. <sup>12</sup>Tura chikichjai uwempratin penké atsawai. Ju nunkanam ii chikicha naari pachisar uwempratin atsaji. Jesuskete ii uwentikrampratniun Yus suramsamij nu” tímiayi Pítiur.

<sup>13</sup> Pítrusha Juansha nánkamas shuara áintsan ármiai. Núkap unuimiarcharu ármiai. Tura unuimiarchaitat, arantutsuk etseriarmiayi. Aentsu uuntri núnaka nekaawar “Nékachuitat, itiura sapijmiatskesha chichainia” tiarmiayi. Tura, júsha Jesusa nemarkin ármia núiti tiar nekaawarmiayi. <sup>14</sup> Nuyasha áishman pénker ajasmia nu níijíai nuí wajamiayi. Tuma asamtai, níisha aí wajakui, Israer-shuara úuntriníia, pénker ajaschaiti tíitai tukamá tujinkarmiayi. <sup>15</sup> Tuma ásar, iik nuamtak áujmatsatai tusar, Pítrusha Juansha shutuapsha aá awemartai, tiarmiayi. <sup>16</sup> Tura áujmatainiak tiarmiayi “Jú Pítrusha jú Juansha ititurkatjik. Jú uunt túrunamun Jerusarénnum matsatainia nu ashí nékainiatsuk. Wáitiatit titin tujintiaji, tiarmiayi. <sup>17</sup> Tura, ashí aents nekaawarain tusar yamaik jiaktai. “Jú Jesusa naari pachisrum penké jintintiarairap,” titiai” tiarmiayi.

<sup>18</sup> Tura árusan Pitruncha Juánnasha shutuapnasha ataksha untsukarmiayi. Tura chicharkarmiayi. “Jesusa naari penké áujmatsairap. Tura Jesusa túramuri penké jintintiarairap” tiarmiayi. <sup>19</sup> Tutai Pítiur Juanjai áimkiarmiayi “Enentáimpratarum. ¿Yus warinia wakera? ¿Iikia Yus umirtsuk atumí chichamen umirkatniukaitiaji?” tiarmiayi. <sup>20</sup> Nekaatarum. Iisha íisjinia nu, tura antukjinia nusha ii etsertsuk pujustin tujintiaji.” Tu áimkiarmiayi.

<sup>21-22</sup> Shutuáp pénker ajasmia nu kuarenta (40) uwí nankaamas takakuyayi. Ni pénker ajasmarin aents nekaawar, “júka aentsti túrachminiatji” tusar Yusa naarin uunt awajarmiayi. Tuma asamtai aentsu uuntri Pitruncha, Juannasha asutiátai tukamá aentsun ashamainiak áyatik chicharkar iniaisarmiayi.

### Yus-shuar Yusa kakarmarin seawarmiania nu

<sup>23</sup> Pítiur Juanjai ankant ajasar ni írutramurijn wakеткиarmiayi. Tura jeawar Israer-patri uuntri tura aentsu úuntrisha nin tiarmia nuna mash etserkarmiayi. <sup>24</sup> Nu ujakam antukar métekrak Yúsan áujuk tiarmiayi “Winia Uunt Yusu, Amesha nayaimpisha nunkasha najanaitme. Nayaantsasha tura júi írunna nusha najanamiam, tiarmiayi. <sup>25</sup> Tura Tawit ámin umirtamin amia nu jú áamtikramiam: “¿Urukamtai ashí nunkanmaya aents charaatum ajainia? ¿Tura Israer-shuarsha urukamtai ántar chichaman enentáimainia?”

<sup>26</sup> Uunt kapitían ármia nuka chichaman jurusarmiayi Uunt Yúsan.

Tura pepru úuntrisha iruntrar Uunt Yúsan kakerkarmiayi. Ni anaikiamurin Krístun nútiksán kakerkarmiayi.”

<sup>27</sup> Tu áarmaiti, Uunta, tura nekasaiti. Erutis apachi kapitíantri Punsiu Piratujai jú péprunam iruntrararmiayi. Niisha yajaya shuarjai tura Israernumia shuaraim nuim iruntrararmiayi. Ame Uchirmin Jesusan tunaarinchán kakerkarmiayi. Jesuska Ame anaikiamiam, winia takatrun túrat tusam. <sup>28</sup> Tura ame enentáimjai iwíaramamna nu uminkiatniuiti. Tura apachcha Jesusan kajerainia ásar, Ame iwíaramamna tímianak umikiarmiayi. <sup>29</sup> Uunta, iisia kajertamainiaj nu. Jes, Áminiu asakrin áujmatramtsujik. Túmaitkuisha ame chichamen ii ashamsuk etserkatin ame kakarmaram amasta. <sup>30</sup> Tura ame kakarmarmijai jaasha tsuártin amasta. Ame Uchiram Jesus tunaarinchá nujai ii aentsti túrachmin túratniusha amasta. Aents Yusa kakarmarin nekaawarat tusam túrata” tiarmiayi.

<sup>31</sup>Tura Yúsan tú áujas umikmatai nuin irunar pujuiniain úurkamiayi. Túrunam-tai ashí shuara enentáin Yusa Wakaní pimiutkarmiayi. Túmaitkiui ashamsuk Yusa chichamen etserkarmiayi.

### Wíniakete, tícharmiania nu

<sup>32</sup>Yus-shuar ajasarmia nu, ti untsuri-tiat, ashí chikichík enentainiak enentáimainiak, ni takaku armia nuna, aya wíniakete tútsuk, júsha ashí iiniu ainiawai, tiarmiayi.

<sup>33</sup>Tura Jesusa akatramurísha, Yus ti yayamu ásar, Yusa kakarmaríjiai Uunt Jesusa nantakmiarín tuke etseras pujuarmiayi. <sup>34</sup>Tura ashí Yus-shuarka nunkan takakusha jean takaku armia nusha, núnaka surukar kuítian itiararmiayi. <sup>35</sup>Tura itiaar Jesusa akatramurín súarmiayi. Akatramusha susam, niisha atsumainia nuna súarmiayi. Tuma asamtai shuar atsumaka penké atsuarmiayi. <sup>36</sup>Chikichík shuar, ni naari Jusé, nunkan takakuyayi. Jesusa akatramurísha Jusén chíkich náarín apujtusarmiayi, Pirnapín. Nu náarísha, shiir enentáimtikkiartin tawai. Tura Pirnapísha Riwí áentsuyayi. Tura ni akiiniamurí núnkenka Chípriiyayi. <sup>37</sup>Niisha ni nunken surukmiayi. Tura nu kuítian itiaá Jesusa akatramurín súarmiayi.

### Ananíasa tunaarij

**5** Tura chíkich áishman, ni naari Ananías, ni nuwe Sapirjai ni nunken surukarmiayi. <sup>2</sup>Niisha nunkan suruk kuítian emeenak akanak jukí Jesusa akatramurín werí takamtsukea nútikias susamiayi. Ni nuwésha, Sapir, nuna túran nekaamiayi. <sup>3</sup>Túramtai Pítiur chichaak “Ananías, ¿urukamtai uunt iwianch enentáimin enkemturmatai, Yusa Wakanín anankataj tusam nunka surukam kuit achikiumna nu akankam

ikiurmasam? tímiayi. <sup>4</sup>Entá, nuinkia nunka áminiuchukait. Surukumna nu kuitcha áminiuchukait. Nusha, ¿urukataj tusamea tu enentaímpram? Amesha aya áentsnum wáitruachume. Antsu Yusnumsha wáitruame” tímiayi Pítiur. <sup>5</sup>Tutai Ananías nuna antuk nú chichamaik jakamiayi. Tura ashí shuar nuna antuk nekaawar ti ashamkarmiayi. <sup>6</sup>Nú turunamtai áishman tariar Ananías jakan penuararmiayi. Túrawar iwarsatai tusar júkiarmiayi.

<sup>7</sup>Tura Ananías nuwe arur, menaintiú ura nankaamasaj támiayi. Túrasha ni áishri jakanka nekaachmiayi. <sup>8</sup>Támatai Pítiur nuwan tímiayi “Turuttia. Átum nunka surukurmena nuí, ¿kuit itiarumna núnikik surukuram?” tímiayi. Tutai nuwa tímiayi “Ee, núnik surukji.” <sup>9</sup>Tutai Pítiur tímiayi “¿Urukamtai atumsha Uunt Yusa Wakaní nekapkamsatai tusarum imiá enentaímprarum? Pai, iisiá. Ame áishrumin iwarsatai tusar júkiaria nu wininiawai. Tura yamaikia amincha juramkiartatui” tímiayi. <sup>10</sup>Tutai nu chichamaik niisha imia Pitru wajamunam jaka iniaantmiayi. Aishman wayaj tukamá jaka tepan wáinkarmiayi. Túramtai júkiar ni áishrinín ayamach iwarsarmiayi. <sup>11</sup>Tura ashí Yus-shuar armia nu tura ashí aencha nuna antukarmia nu ti ashamkarmiayi.

### Yusa kakarmaríjiai túrawarmiania nu

<sup>12-14</sup>Tura ashí Yus-shuar Yusa Uunt Jeen shikiriin irunin ármiayi. Nu shikirísha, Sarumúnna, tu anaikiamuiti. Tura chíkichmamtinkia nuim iruntratniun ashamiarmiayi. Túmainiyatan, ti pénger áiniawai, tu wearmiayi. Tura Yus-shuar Yusa kakarmarín iniakmasarmiayi. Túra asamtai imiá untsurí aents Yus-shuar ajasarmiayi. <sup>15</sup>Tura chíkich aents ni shuarij jainia

nuna jintiá amamtikiarmiayi. Peakjai júkiar, tampunmasha enkeawar júkiar jintiá ayamach áepsarmiayi. Pítiur nankaamak ni wakanínsha enkemprutmwawainti tusar nu shuar túrawarmiayi. <sup>16</sup>Núnisan arantiá shuarsha ti untsurí ni shuarí jáinian tura iwianchrukuncha nuí Jerusarénum itiarimiayi. Tura ashí nuí táaruka tsuámararmiayi.

<sup>17</sup>Israer-patri uuntri, tura Satuséu aencha niijjai pujuarmia nu suuir iiniak <sup>18</sup>Jesusa akatramurín achikiar enkeawarmiayi. <sup>19</sup>Túrasha kashi Uunt Yusa suntari nayaimpinmaya tara sepú wáitirín uraimiayi. Tura Jesusa akatramurín aa jíikiarmiayi. <sup>20</sup>Tura tímiayi “Wetarum. Tura Yusa Uunt Jeen wajasrum Yusjai tuke iwiaaku átinia nu etserkatarum” tímiayi.

<sup>21</sup>Nuna antukar kashin tsawar káshik Yusa Uunt Jeen wayawar jintintiawarmiayi.

Nu túmainiai Israer-patri uuntri, tura niijjai pujuarmia nusha iruntrarmiayi. Tura Israer-shuara uuntri, naamka armia nuna iruntrami tusa untsukarmiayi. Ashí iruntrar akatar akupkarmiayi, Jesusa akatramurí sepunmaya itiatarum tusar.

<sup>22</sup>Tura suntarsha sepunam jeariar Jesusa akatramurín wáinkiacharmiayi. Atsawai tukam táarmiayi. <sup>23</sup>Taar chichainiak “Sepú waiti asakamua tímianisan aa wáinkiaji, tiarmiayi. Tura suntar wáitin iimpru wajainia wáinkiaji. Tura waiti urair wayaj<sup>i</sup> tukamar atsá wáinkiaji” tiarmiayi.

<sup>24</sup>Israer-patri uuntri, tura Yusa Uunt Jeen wainniu úuntri, nu chichaman antukar, “tsej ausha ¿urutiak nunasha iniaisarar?” tiarmiayi. <sup>25</sup>Nu chichamaik áishman taa tímiayi “Aishman átum sepunam enkeamarmena nu, Yusa Uunt Jeen wajasar áentsun jintintiuk pujuiniawai” tímiayi.

<sup>26</sup>Túrunamtai Yusa Uunt Jeen wainniu uuntri ni suntariijai wear achik itiarimiayi. Túrasha penké aents kayajai tukurmarajj tusar, yajauch awajtsuk itiarimiayi. <sup>27</sup>Tura achik itiaar Israer-shuar naamka pujamunam naka awajsarmiayi. <sup>28</sup>Tura Israer-patri uuntri tímiayi “Iisha atumin chicháa chicharu awajtsar, Jesusa naari pachisrum etserkairap tusar akupkachmakajrum. Túrasha, ¿antukurmek? Atsá. Mash Jerusarénum átum etserkamu pampankai. Jes, átum, Jesusan máawarai, in tátsurmek. Nusha in makuutai tusarum tárume” tiarmiayi.

<sup>29</sup>Nuyá tutai Pítiur chíkich Jesusa akatramurijjai chichainiak “Iikia aents-jainkia iniankasar Yus emka umirkat-niuitji, tiarmiayi. <sup>30</sup>Jesus atumek krús-num máamurmene nuna ii iwiaaku Yusrí Nin iniantkimiayi. <sup>31</sup>Yus ni kakarmarjijai Nin nankaamantu awajsamiayi. Tura nekas Akupniuiti tusa ni untsuurini apujsamiai. Tura áentsun Uwentikniuiti. Israer-shuar enentái yapajjáwar tunaariniá uwemprarat tusa Yus túraiti. <sup>32</sup>Nu tuma asantai iisha nu nekaar étsereaji. Tura Yusa Wakanínsha nuna étsereawai. Túrasha aya Yusa umirkarua nunak ni Wakanín súsaruiti” tímiayi Pítiur.

<sup>33</sup>Tutai nuna antukar ti kakerkarmiayi. Túrawar, maatai tusar wakermarmiayi. <sup>34</sup>Tura nuí Israer-shuara uuntri pujumiayi, ni naari Kamarír. Niisha Pariséunam páchitkiauyayi. Tura akupeamun jintinniuriyayi. Túmakui ashí aents nin shiir enentáimtin ármiai. Tura niisha wajakí tímiayi “Ju áishman aa ishichik wajasarti” tímiayi. <sup>35</sup>Nuyásha irunar matsamarmia nuna chicharuk “Israer shuartiram, ju áishman tú túratai tu enentáimsarumna nu aneartarum. <sup>36</sup>Enentáimsatarum. Nuik áishman Tiútas wantinkiachmakia. Niisha kapitániitjai takui, kuaru

siántu (400) shuar nemarkarmiayi. Tura ukunam nin maawarmatai, ni némarkamuriṣha pisararmiayi. Túrunawar nuní amuukamiayi. <sup>37</sup>Ukunmasha, iruntrar nekapmartin tsawantinha Kariréanmaya Jútas wantinkiachmaka. Tura nincha nútiksan ti untsurí nemarkarmiayi. Túman máawarmiayi. Nu túrunamtai nútiksan ni némarkamuriṣha pisararmiayi. <sup>38</sup>Jes, tuma asamtai nu áishman aa wajainia nu iniaisatarum. Auka pachisairap. Au tumainia nu aya áentsnaketkuinkia amuukattawai. <sup>39</sup>Tura antsu Yúsnaikkuinkia atumsha amuktai tukamarum tujinkiattarme. Aneartarum. Iniaiyachkurmeka nu tumá pujusrum Yusjai máanikchattarmeash” tímiayi Kamarír.

<sup>40</sup>Tú tutai tímianak umikiarmiayi. Túrashá Jesusa akatramurín untsukar asutiáwarmiayi. Tura chicharuk “Jesusa naari pachisrum penké ishichkisha etserkairap” tiarmiayi. Tú tiar akupkarmiayi. <sup>41</sup>Jesusa akatramuriṣha Israer-shuara uuntri pujamunmaya jíinkarmiayi. Tura wáitsamniaitrumé tusa Yuska Jesusa naari pachia asakrin ii natsantin wáitsatniun tsankatramkaitji tusar ti shiir enentáimsar wearmiayi. <sup>42</sup>Tura Jesukrístunun áujmatsatniun penké iniaisacharmiayi. Antsu tuke tsawant Yusa Uunt Jeencha tura chíkich jeanmasha páchitsuk etseriarmiayi.

### **Yus-shuaran yainian siati anaikiarmiania nu**

**6** Nú tsawantin Yusan umirkaru ti kawenkar ármiai. Tura tuke tsawant yurumak súsatin ámiayi. Túmakui Yus-shuar Kriaku chichaman chicharmia nu, Israer-shuaran kajeriarmiayi. “Tuke tsawantin yurumak súarmena nuí atumí waje ti nukap súarme. Tura íniuka ishichik súarme” tiarmiayi. <sup>2</sup>Túruinia Jesusa

tuse akatramurí ashí Yus-shuaran irurar tiarmiayi “Iisha Yus-Chicham etserkatin iniaisar yurumak súsachminiaitji. <sup>3</sup>Tuma asamtai yatsurtiram, atumínia siati áishman eáktárum yurumkan súsarat tusarum. Pénker wekainia nu, tura neka shuar, Yusa Wakaní pimiutkamuyayi. <sup>4</sup>Iikia antsu Yus áujkir unuiniakratkir Yusa chichame etserkir wétatji” tiarmiayi. <sup>5</sup>Akatramu tiarmia nuna ashí aents enentáimsar pujuarmiayi. Túmainiak Estepañkan anaikiarmiayi. Estepañsha Yúsán tuke enentáimtiniuyayi. Tura Yusa Wakanísha pimiutkamuyayi. Chíkich áishman kan anaikiarmiayi, niisha Jiripi, tura nuyá Purukuru, Nikianúrsha, nuyá Temun, Parmenassha, Nikiurássha. Nikiurássha Antiukía nunkanmayaitiat Israernancha ashí umirniuyayi.

<sup>6</sup>Tura nu siati áishman kan Jesusa akatramurín itiararmiayi. Táarmatai, akatramusha, Yus áujtusar, anaikiaji tusar múuknumsha ni uwejen awantsarmiayi. <sup>7</sup>Túrashá Yusa chichamenka tuke pampanki wémiayi. Nuí Jerusarénnumsha Yus-shuar ti kawenkararmiayi. Tura imia Israer-patrisha untsurí Yus-Chichaman umiriarmiayi.

### **Estepañkan Israer-shuara uuntriin júkiarmiania nu**

<sup>8</sup>Estepañsha Yusa waitnenkartutairi pimiutkamuyayi. Tura Yusa kakarmariṣha pimiutkamuyayi. Tuma asa aentsti túrachminian shuar írunmanum túramiayi. Nu shuar Yusa kakarmarín nekaawarat tusa túramiayi. <sup>9</sup>Israer-shuar iruntai jea, ni naari Ankantín, ámiayi. Nuyá áishman sha tura Serini nunkanmaya áishman sha, tura chíkich nunka Arijiantrianmayasha, Serisianmayasha, Ásianmayasha, tímian Estepañjai áujmatsatai tusar káutkarmiayi.

<sup>10</sup> Estepañ Yusa Wakaní nekatairijiai tímianak chicháa asamtai, nu áishman Estepañjai inkiunaikiar nupetkataj tukamá tujinkiarmiayi. <sup>11</sup> Tuma asamtai suiir enentáimtuiniak chíkich áentsun Estepañkan tsanumprurarat tusar eákararmiayi. Estepañ Muisaisnasha Yúsnasha yajauch áujmatui, titiarum tusar akikiarmiayi. <sup>12</sup> Penké áentsun, tura uunt ainia nunasha, jintintin ármia uunt nujáisha chichaman júsar yajauch enentáimtikrarmiayi. Tura Estepañkan jintiá akirtuawar achikiarmiayi. Túrawar Israer-shuar naamka matsamarmia nu júkiarmiayi. <sup>13</sup> Tura wait chichamtinian itiararmiayi. Niisha taar chicharainiak “Yusa Uunt Jeen ti péñker ana nu, tura Yusa akupkamuríncha ju Estepañ tuke yajauch chicharui, tiarmiayi. <sup>14</sup> Nú arantcha ju Estepañ tímia nu antukji, tiarmiayi. Estepañ chichaak “Nasarénumiá Jesuska Yusa Uunt Jeen sáaktiatui, tura nuyá Muisais in ikiurtamkimiay nunasha yapajíattawai” tímiai. Nusha Estepañ tímia nu antukji” tiarmiayi. Tura nunasha penké ántar tsanumprurarmiayi.

<sup>15</sup> Nuyasha ashí Israer-shuar naamka iruntramunam pujuarmia nu Estepañkan iyaj tukamá ni yapin nayaimpinmayá suntara yapiya nuní fíran wáinkiararmiayi.

### Estepañ etserkamiania nu

**7** Tuma wániak Israer-patri uuntri Estepañkan aniasmiayi “¿Ju tuinia nu nekaskait?” tímiai. <sup>2</sup> Tutai niisha áimkiamiayi “Winia únuntrutirmesha, yatsurtirmesha anturtuktarum. Ii Waantu Yusri ii únuntrin Apráaman wantintiukmiayi. Apráamka Misiuputámia-Kartea nunkanam pujai, Aran nunkanam wéatsain, nu wantintiukmiayi. <sup>3</sup> Tura wantintiuk tímiai “Ame nunkemsha áminiurmesha

ikiukim nunka Wi iniaktustatjamena nu wetá” tímiai Yus. <sup>4</sup> Tutai Apráam Misiuputámia-Kartea nunkan ikiuki Aran nunkanam pujustaj tusa wémiayi. Nuyá ni aparí jakamtai “Arant wetá” tímiai Yus. Nuna taku ju nunkan ii pujajnia ju pujsamiayi. <sup>5</sup> Túrayat nunkan ishichkisha súsachmiayi ju nunkanam. Antsu “Ukunam amastatjai. Ame jakakmin ame uchirmin susattajai” tímiai. Tura Apraama uchirí penké atsan nuní tímiai Yus. <sup>6</sup> Nuyasha Yus tímiai “Ame uchirmesha írara núnisarañ chíkich nunkanam pujusartatui. Nuisha emetamu itit awajtai pujuartatui. Kuaru siántu (400) uwí, tímianu uwí wáitsartatui, tímiai. <sup>7</sup> Túrasa, Wi asutiáttajai ame shuárumin wáitkia núnaka, tímiai. Túram nuyá nú nunkanmayá shiákartatui. Tura Winia enentáimtursartatui jú nunkanam’ tímiai. <sup>8</sup> Yus tuke Apráamnasha chicharuk ‘Yamaikia Wíi-shuar asarum tsupirnaktiniaitume. Tuma asam amesha uchiram áishmankach akiiniamtai, Wi tímiajna núnismek, sirkunsisiún tutai, shunichirí nuape tsupirkata, tímiai. Tura chícham Wi yamaikia ámijiai najanaj nu nekas uminkatniuiti tusam nusha túrata” tímiai Yus. Tuma asamtai ni uchirí Isak akiiniamtai, uchu tsawant nankaasmatai, Apráam nin tsupirkamiayi. Tura Isaksha ukunam ni tuse (12) uchirin ii uuntri armia nunasha nútiksañ túramiayi. <sup>9</sup> Tura niisha ni yachin Jusen suiir íyarmiayi. Túmainiak Ejiptu nunkanam júkiarat tusar surukarmiayi. Túrasa Yus némarkauyayi. <sup>10</sup> Tuma asa, ashí ni itiurchatrijina uwemtikramiayi. Tura waitnenkartutairíncha nekatairíncha susamiayi. Tuma asamtai Ejiptunam uunt akupin Paraún Ejiptu nunkaa

akupniurí ajasat tura ni jēen wáinniurí ajasat tusa anaikiamiayi.”

<sup>11</sup>“Tímiatam tsuka tura itiurchatcha ámiayi Ejiptu núŋkanam. Tura jui Kanaan nuŋkanmasha núnisan ámiayi. Tuma asamtai ii uuntri yurumkan penké wáincharmiayi. <sup>12</sup>Tura Jakup, Ejiptunam yurumak ikiusma awai taman antuk ni uchirín akupkarmiayi. Túrasha wekaicha wearmiyai. Wats, ii úuntriñiun ujaajrume. <sup>13</sup>Tura ii uuntri atak Ejiptunam wéenak Jusesha, wíitjai takui ni yachi Jusen nekaawarmiyai. Tura Jusé “Yatsur ániawai” takui Paraun, antuk “au shuarapitia” tímiayi. <sup>14</sup>Nuyanka Jusé ni yachin chicharuk “Apar itiatarum uchirtuk” tímiayi. Nu shuarsha untsurí, setenta senku (75) matsarmiyai. <sup>15</sup>Nuní tutai Jakupsha ni shuarijijai Ejiptunam pujustai tusar wearmiyai. Tura ukunam nú nuŋkanman jakamiayi. Tura ni uchirísha ii uuntri ainia nu, núnisanan nú nuŋkanman jákarmiayi. <sup>16</sup>Tura atak ukunam ni shuari Sikiam nuŋkanam ni ukunchin júkiar iwiarsarmiyai. Kame Sikiam nuŋkanam Apraámka yaunchu játsuk Amura uchirí nuŋken sumakmiayi. Túramtai nu iwiarsarmiyai’ tímiayi.

<sup>17</sup>‘Yus, Apraáman chicharuk “Nekas wi susattajme” tímiania nú tsawant jeatemamtai, Ejiptu nuŋkanam Israeraents pampanki ti kawenkar miayi. <sup>18</sup>Nu tsawantincha Ejiptunam chíkich akupin naamka ámiayi, tura Jusen nekaachmiayi nii. <sup>19</sup>Nu akupin ii yaunchu úntrin anankawar yajauch awajarmiyai. “Atumí uchirí kuírchich ana nu ajapa ikiuktiarum” tu wémiayi. Pampankarain tusa tímiayi. <sup>20</sup>Tiri iniaisamunam Muisais akiiniamiayi. Muisaisnaka Yus shiir enentáimtimiai. Tura ni nukurí menaintiu nantu takusmiayi. <sup>21</sup>Tura nuyá ajapa ikiuktin jeamtai entsá apujamiayi. Uunt Paraunka nawantri Muisaisan

wainiak jukimiayi. Achik, ni uchirínia tímiatrusan jukí tsakatmarmiyai. <sup>22</sup>Tuma asa Muisais unuimiátrauyayi ashí Ejiptu aents nékarmia nuna. Túraturísha chichamesha kakarmauyayi.’

<sup>23</sup>Estepan tuke étseruk juna tímiayi: ‘Nuyá Muisais kuarenta (40) uwí takaku asa Israeraentsun iyutaj tusa wakerimiayi, ni shuari asamtai. <sup>24</sup>Nuyá we Ejiptunmaya áishman ni shuarin máatasa pujurun wáinkiamiayi. Tura Muisais ni shuarin ayamprak Ejiptunmaya áishman kan máamiayi. <sup>25</sup>Wíi turamujai Yuska Israeraentsun uwentikrattawai, tu nekaamiayi Muisais, Yus timia asamtai. Tura Israeraencha áintsaran nékainiawai tu enentáimsamiayi. Túrasha ninikia nekaacharmiyai. <sup>26</sup>Kashin tsawar Muisais ni shuari jímjar maani pujuinian wáinkiamiayi. Tura nawamnaikiarat tusa “¿Urukamtai nuamtak yatsumjaisha yajauch awajniarum?” tímiayi. <sup>27</sup>Tutai emka nankaama nu Muisaisan kárut shitiá “¿Ya amincha ii akuptamin tura ii chichartamin anaitiamkamam? <sup>28</sup>¿Winiasha maantuátaj tusam wakeramek, ya Ejiptunmaya áishman máamamna nútiksamkea?” tímiayi. <sup>29</sup>Nuna antuk Muisaiska Matian nuŋkanam pisar, nú nuŋkanam kuarenta (40) uwí yajaya áintsan pujumiayi. Nú nuŋkanam pujus, nuatak, jimijará uchin yajutmarmiyai.’

<sup>30</sup>‘Kuarenta uwí nankaamas, nu atsamu nuŋkanam Senai náinnium tíjjuuch Yusa suntari nayaimpinmaya taa Muisaisan wantintiukmiayi. Numi uchich ukat-ukatin keamunam wantinkiamiayi. <sup>31</sup>Muisais, nuna kean wainiak ashamkamiayi. Tura weantuk iistaj tukamá Uunt Yusa chichamen antukmiayi. <sup>32</sup>Yus tímiayi “Wiitjai Yus. Ame úntrumí Apraáma Isaka, Jakupa Yúsríntjai” tímiayi. Tutai antuk

Muisaiska ti kuraimiayi sapijin. Tura íistinian tujinmiayi. <sup>33</sup>Nuyá Uunt Yus tímiayi “Úuntrun shiir awajsataj tusam, ame sapatrum ukuĩnkiam ikiuktia, wajamna nuĩ Wi pujakui. <sup>34</sup>Nuyá nekaata, tímiayi. Wíi-aents Ejiptunam wáitias pujuinia nuna wáinkiajai. Tura útainia nunasha antukjai. Tuma asamtai uwemtikrataj tusan tarajai. Wats, akupkatjame ámin. Ejiptunam waketkitia” Yus tímiayi Muisaisan.’

<sup>35</sup>Estepan tuke étseruk: ‘Jú Muisaisan ni shuari “¿Ya amincha ii akuptamin tura ii chichartamin átinniaasha anaitiamkamam?” tiarmia nuna Yuska akupniun anak uwemtikrarat tusa awainki akupkamiayi. Numiniam ni suntari wantintiukmia nuna chichamejai Yuska Muisaisan akupkamiayi, tímiayi. <sup>36</sup>Muisaisaiti Israer-aentsun Ejiptunmayan uwemtikramia nu. Yusa kakarmarin nekaawarat tusa, aentsti túrachminian untsurín túramiayi Ejiptu nunkanam. Nuyá Kapaantin Nayaantsanmasha, tura nuyá kuarenta (40) uwitin atsamunam pujuiniaisha ti kakarman iniaktusmiayi. <sup>37</sup>Jú Muisaisak Israer-shuaran chicharuk “Atumíniñanak etserniun Yus ukunam anaikiattawai, winia anaitiukma áintsan. Tuma asamtai nu shuarsha umirkamniuram” tímiayi. <sup>38</sup>Jú Muisais Israer-aentsjai atsamunam pujumiayi. Senái nainniun Yusa suntari níjjaisha pujumiayi. Tura Muisaiska ii úuntrijjai pujumiayi. Níiyaiti iwiaaku pujustin chichaman sunasmia nu. In ujatmaktinian sunasmiaiy.’

<sup>39</sup>Túrasha ii yaunchu uuntri Muisaisan umirkatniun nakitiarmiayi. Áaniuk imiá umirtaint tusar Ejiptunam waketkitniun wakeriarmiayi. <sup>40</sup>Túmainiak Muisais Yusjai chichastajtsa murá wématai nu shuar Muisaisa yachin Arunkan tiarmiayi “Ii yusri najanatá, ii nemarsatin.

Áaniusha Muisaissha Ejiptunmayá in juramkiyatcha tútsuk weruma” tiarmiayi. <sup>41</sup>Nuyá wáakachia áaniun najanawarmiayi. Túrawar, júiti ii yusri tusar, kuntinian maantuawarmiayi, nu susatai tusar. Tura ni uwejejai najanamun ísar ti wararsarmiayi. <sup>42</sup>Nuna túruinian wáiniak Yus, iniaisajai taku, niyá kanakmiayi. Nii wakerak yaan tikishmatrarti, tímiayi. Tuma asamtai, yaunchu Yusa etserniuri juní áarmiayi:

“Israer-aentsu, kuarenta (40) uwitin atsamunam wekaimiarmena nuĩ, ¿Winiak kuntin maanturtuamarum? Winia surustai tusarum penké túrachurme, tímiayi Yus. <sup>43</sup>Antsu, Muruk naartin ántar-yusa pujamurin jukimiarme. Tura chíkich ántar-yussha, ni naari Rempan, yaa áanin najanarum nusha jukimiarme. Júkin asakrumin atumí nunkeya jukin, tímiayi Papirúnia nunkan nankaiki akupkatjarne” tímiayi Yus.”

Nuní áarmaiti’ tímiayi.

<sup>44</sup>Estepan tuke étseruk: ‘Yus Muisaisan tímiayi “Wi akupeamu chicham ikiunsatin jeá áaniun Wi iniaktusjamna tímiatrusmek atsamunam najánatá” tímiayi. Tutai Muisais Yus tímianak umikmiayi. Nu jean ii uuntri yaunchu takaku ármiai. <sup>45</sup>Nu jean ni uchiri akintkiar akintkiar wearmiayi. Ukunam, jú nunka achiktin jeamtai, Yuska kapitían Jusuejai jú nunkanmayá aentsun jiki akupkarmiayi. Tura ii uuntri kapitían Jusuejai winiarmia nu, nu jeancha jú nunkanam itiararmiayi. Tura Tawit uunt akupin náamtsain, ii úuntrisha nu jean takaku ármiai. <sup>46</sup>Kame Yus Tawitian yájau enentáimtichmiayi. Tuma asamtai Tawit Yus shiir pujustinian jean jeamtinian seamiai. <sup>47</sup>Túrasha antsu Tawitia uchiri



Sarumún Yusa jēen jeammiayi.  
<sup>48</sup>Túrasha aents jeammanuman Uunt  
 Yus pujuschamniati. Jes, yaunchu Yusa  
 etserniurī Yus tímia nuna áarchamkia.  
<sup>49</sup>Juna áarmiayi:

“Nayaimpikia winia pujutairuiti.  
 Nunkanmasha nawer tarimiui.  
 ¿Warī jeā najatruatai tusarnea tarum?  
 tímiayi Uunt Yus.

Tura Wi ayampratniusha, ¿tui aa?

<sup>50</sup>Wiki winia uwejruijain ashí najanach-  
 makiaj” tímiayi.’

<sup>51</sup>Estepan tuke éteruk: “Tura átumka  
 Israer-shuartirmeka atumí enentáijjiai  
 tuke umichuitrume. Atumí kuishisha  
 weaktsui tura Yus nékachua núnini-  
 aitrume. Yusa Wakanjiaisha tuke ne-  
 masnaikiaitrume. Tura atumí yaunchu  
 úuntrijjiai métek túrarme’ tímiayi.

<sup>52</sup>‘Iisia, atumí úuntrisha Yusa  
 etserniurīn tuke kajerin árimiayi,  
 tímiayi. Tura nú arant atumí  
 úuntrisha Tunaarincha tátatui tu  
 etseru wekaan, máacharmakia. Jes,  
 nútiksarmek yamaisha, Tunaarincha  
 támania nusha atumek ananjarum  
 máachmakuram, tímiayi. <sup>53</sup>Tura  
 Yusa suntari nayaimpinmaya Yusa  
 chichamen susamuitiatrum atumsha  
 penké umikchamarme” tímiayi Estepan.

### Estepan̄ka jakamurī

<sup>54</sup>Israer-aencha Estepan̄ tu chichaamu  
 antukar imiá kajerkar nain kátetete  
 awajiarimiayi. <sup>55</sup>Tura Estepan̄sha imiá  
 Yusa Wakan̄ pimiutkamuyayi. Tuma asa  
 nayaimpinmaani ímias, Yusa winchar-  
 in, tura Yusa untsuurin̄ini Jesusan wajan  
 wáinkiamiayi. <sup>56</sup>Tumá wáiniak Israer-  
 áentsun tímiayi “Núá ískua, nayaimp  
 uranniun wáinjai. Tura Jesusan, Aents  
 Ajasu tutaiya nuna Yusa untsuurin̄ini  
 wajan wáinjai” tímiayi. <sup>57</sup>Támaitiat ni-  
 isha kuishin̄ akiriarmiayi, tura achiktai  
 tusar charáa tiar ashí wajatkiarmiayi.  
<sup>58</sup>Túrawar, péprunmaya arant júkiarmi-

ayi. Tura antuk etserkarmia nu pushirīn  
 áikiar, natsa Sauru wajamunam au iisti  
 tusar áeprusarmiayi. Tura máawartai  
 tusar kayajai tukurarmiayi Estepan̄kan.

<sup>59</sup>Tura Estepan̄ka tukamaitiat Yúsan  
 áujsamiayi. Tura áujuk “Uuntrū Jesúsá,  
 winia wakantrusha jurutkitia” tímiayi.  
<sup>60</sup>Tura tikishmar áujuk “Uunta, ju winia  
 túrutainiana ju makuip” tímiayi. Tura  
 nuna ti iniais, jakamiayi.

### Sauru Yus-shuaran kajerkarmiania nu

**8**<sup>1-2</sup>Estepan̄kan máawarmatai Sauru,  
 pénkeraiti, tímiayi. Tura áishman̄  
 Yúsan pénker enentáimta armiania nu,  
 Estepan̄ka ayashincha iwarsarmiayi,  
 tura aneenak ti uutiarmiayi. Tura nú  
 tsawantai Yus-shuaran Jerusarénnum  
 pujuarmia nuna ti kajerkatin  
 nan̄kamnamiayi. <sup>3</sup>Sáuruka Yus-shuaran  
 kajerak ti pataat wémiayi. Túmak nui  
 jeá wayá, nui wayá áishmannasha  
 nuwancha wáinkian̄ka japiki júki  
 sepunam en̄keataj tusa túrimiai.  
 Tumakui Yus-shuar Jerusarénnumiá  
 pisarar Jutiá nun̄kanam, tura Samaria  
 nun̄kanmasha jeawarmiayi. Jesusa  
 akatramur̄inkia antsu Jerusarénnuman̄  
 juakarmiayi.

### Samaria nun̄kanam etserkarmiania nu

<sup>4</sup>Túrasha Jerusarénnumiá aents  
 pisararmia nu, arant wénaksha tuke  
 Yusa chichamen etserkini yujarmiayi.  
<sup>5</sup>Tura Jiripi Jerusarénnumiá we  
 tura chíkich péprunam Samaria  
 núnkanam ámiania nui jeá, chichaak  
 “Yus anaikiamu ana nu Jesusaiti” tu  
 etsermiayi. <sup>6</sup>Túrukui aents iruntrar  
 chikichík enentáijjiai Jiripi étseraumun  
 titiú pujusar antukarmiayi. Yusa  
 kakarmar̄in nekaawarat tusa aentsti  
 túrachminian túrimia nunasha  
 wáiniarmiayi. <sup>7</sup>Ti untsurī aents

iwianchruku ármia nuna Jiripi nu iwianchin jjiirki akuptiarmiayi. Tura íwianch jíiniainiak kakantar charáa tiar jíiniarmiayi. Tura ti untsurí emearusha shutuapsha péñker ajasarmiayi. <sup>8</sup>Tuma asamtai nú péprunmayan̄ka ashí shuar ti warasar pujuarmiayi.

<sup>9</sup>Tura nú nun̄kanam uwishin Semuñ pujumiayi. Nuikkia wi ímianaitjai tusa Samarianmaya aentsun ananniuayai. <sup>10</sup>Tuma asamtai ashí aents úmamkesar uchichisha, uuntcha, nin anturiarmiayi. Tura tiarmiayi “Ju Semuñsha Yusa kakarmarijiai áitkiawai.”

<sup>11</sup>Tura ti untsurí uwí wawekratmar-ijiai anan̄karta asamtai, umirkarmiayi nu aents. <sup>12</sup>Túrasha Jiripi Yusa akupeamur̄in, tura Jesukrístununcha shiir chichaman etserkamiayi. Tura, nuna antukar nuwasha áishman̄sha umikiar imian wearmiayi. <sup>13</sup>Semuñsha imia uwishniuiat Yus-Chichaman enentáimtus imianmiayi. Tura Jiripijiai tsaniñ wekaimiayi. Yusa kakarmar̄in shuar nekaawarat tusa Jiripikia aentsti túrachminian túrimiayi. Nuna wáiniak Semuñ ti enentáimsamiayi.

<sup>14</sup>Tura Jesusa akatramur̄isha Jerusarénnum pujuarmia nuí Samarianmaya aents Yusa chichamen umirainiawai taman nekaawarmiayi. Tuma asamtai Pitruncha Juánnasha nekáa ikiuutarum tusa akupkarmiayi. <sup>15-16</sup>Tura Samarianmaya Yus-shuarsha aya Uunt Jesusa náariñ imianiarmiayi. Yusa Wakaníñkia tárachmiayi. Tuma asamtai Pítrusha Juanjai nuí jeawar Samarianmaya Yus-shuara enentáin Yusa Wakaní pimiutkarat tusan Yusan áujtusarmiayi. <sup>17</sup>Tura áujtua umikiar Pítiur Juanjai ni uwején nú Yus-shuaran awantsarmiayi. Nuñkia Yusa Wakaní taramiayi.

<sup>18</sup>Jesusa akatramur̄i uweje awasmanum Yusa Wakaní taramtai, Semuñsha nuna wáiniak, kuitjai

nu kakarman sumaktaj, tímiayi. <sup>19</sup>Tura Jesusa akatramur̄in chicharuk tímiayi “Winiasha kuitjai surustarum nu kakaram. Wisha nútiksanak nan̄kamas aentsnum winia uwejur awantsam Yusa Wakaní tarurat tusan tajai” tímiayi. <sup>20</sup>Tutai Pítiur tímiayi Semuñkan “Ámeke kuítrumjai métek men̄kakatniuitme. Warí, Yus amaana nu ¿kuitjai sumaktinkiait? <sup>21</sup>Yus esetram enentáimtachu asam nu túramu pachistincha pen̄ké tujinkiamé, tímiayi. <sup>22</sup>Enentáimprata. Túram Yus seata. Enentáimtamna nuna Yus tsan̄kurtamprashtimpiash. <sup>23</sup>Nékajme, tsaan̄kea áintsan yapá enentáimin pimiutramkaiti. Tura tunaarmiñ jinkiámua núniniaitme” tímiayi.

<sup>24</sup>Tutai Semuñ áimkiamiayi “Uunt Yus aujtursatarum. Túrutrumna nuna túrunawaij tusan tajai” tímiayi. <sup>25</sup>Nuyasha Jesusa akatramur̄i Jesusa túramur̄in nú áentsun ujakarmiayi. Tura wésar Samaria nun̄kanam pepru ámunman̄ka Yus-Chichaman nuí etserkiar, nuí etserkiar Jerusarénnum waketkiarmiayi.

### Jiripi Yus-Chichaman etserkamiania nu

<sup>26</sup>Tura Yus ni suntar̄in nayaimpin-mayan̄ Jiripincha akuptukmiayi. Ni-isha chicharuk tímiayi “Wátskea. Juyá jiinkim Jerusarénnumia jintia En̄kasa péprunam wea nuní weme, anaraani wetá. Nú jintiaka atsamu nun̄kanam nan̄kaamawai’ tímiayi. <sup>27</sup>Tutai Jirip-isha wémiayi. Jintiá wesa Itiupian-maya áishman̄kan wáinkiamiayi. Nú áishman̄sha Itiupia nuñka akupniur̄in, ni naari Kantasen takarniuayai. Kantaseka núwauyayi. Tura nu áishman̄ ti neka asa nuna kuítr̄in íirniuyayi. Nú áishman̄sha Yúsan áujсатаj tusa Jerusarénnum wéu wáketmiayi. <sup>28</sup>Kare-tanam en̄kemar wesa, Yusa etserni-

uri Isayas aarmia nuna aujki wémiayi. <sup>29</sup>Wats, Jiripi nú jintianam wéakui, Yusa Wakaní nin tímiayi “Nú kareta amayánta.” <sup>30</sup>Tura Jiripisha amayán, Yusa etserniuri Isayasa áarmarin áujun antuk, chicharuk “¿Aujeamna nu nékamek?” tímiayi.

<sup>31</sup>Tutai nú áishman tímiayi “¿Itiurak nekaataj? ¿Yaki jintintruat?” tímiayi. Tura antsu iijiai wetái tusa, Jiripincha enker jukimiayi kretanam.

<sup>32</sup>Nu papí áarman áujmia nu júuyayi: “Murikiua áitkiasan jákatniunam júkiarmiayi. Tura uchich murik, ure tsúpiram chichaatsna núnisan niisha chichakchamiayi. <sup>33</sup>Nincha iniatsáarmiayi. Túrasha penké chichamnaka tútsuk tsankamakmiayi. Niisha nunkanam iwiaaku pujá maamu asamtai, ¿yaki nuna áujmatkat?” Nuní aarma ámiayi.

<sup>34</sup>Kantase takarniuri Jiripin aniasmiayi “Waitneasam turuttia, tu aarma nusha, ¿yana ta? ¿Yusa etserniuri nínikik túmama? ¿Chikichnash ta?” tímiayi. <sup>35</sup>Nuyá Jiripi nu aarman áujtus “Juka Jesusnan tawai” tímiayi. Tura nú arantcha Yus-Chichaman ujakmiayi.

<sup>36</sup>Nuyá entsa ámanum nankaamak áishman Jiripin chicharuk “Juí entsá jeaji. Wikia juí imianchamniakaitiaj” tímiayi.

<sup>37</sup>Tutai Jiripisha tímiayi “Tuke enentáimjai Jesus nekas enentáimtakminkia túramniaitjame.”

Tutai áishman chichaak “Ee nekasaiti, Jesukrístuka Yusa Uchirínti tajai” tímiayi. <sup>38</sup>Tura, kareta awajas mai jíinkiar entsá wearmiayi. Nuí Jiripikia Kantase takarniurin imiaimiayi.

<sup>39</sup>Tura kukar jíinkiar matai Uunt Yusa Wakaní Jiripinkia jukimiayi. Tuma asamtai Kantase takarniurisha Jiripin wáinkiachmiayi. Túrasha nínkia waras wémiayi. <sup>40</sup>Jiripisha jeachat Asutu

péprunam wantinkiamiayi. Tura nuyá jíinki péprunam nuí wayá, nuí wayá Yus-Chichaman etserki we, Sesaria péprunam jeamiayi.

### Sauru Jesusan umirkamiayi

(Túramuri 22.6-16; 26.12-18)

**9** Nuna tumaj, Jerusarénum Uunt Jesusan umirkarmia nuna máataj tusa áujmattan Sáuruka penké iniachiamiayi. Tuma asa Israer-patri uunturi iyutaj tusa werimiayi. <sup>2</sup>Tura jeari tímiayi “Papí ame naarmijiai áaram surusta. Wi nuna papí jukin timiai Tamasku péprunam jean, Israer-shuar iruntainiam wayattajai. Túran nú papijiai Jesusan umirkaru ainia nuna, nánkamsan achikiartatjai. Túran áishmannasha nuwancha achikian jinkian, juí Jerusarénum enkeataj tusan iki-aankattajai” tímiayi. <sup>3</sup>Tura papí susam Sauru jintiá wéai, Tamasku péprunam nuntumsai nuí aya aneachma nayaimpinmaya tsáapin jíitsumir téntakmiayi nin. <sup>4</sup>Túrunamtai Sauru nunká iniaarmiayi. Tura nayaimpinmaya chichaamun antukmiayi. “Sauru, Sauru, ¿Urukamtai yajauch awajtustaj tusam imiá pataaturam?” tímiayi.

<sup>5</sup>Táman antuk “¿Amesha, yáitiam, uunta?” tímiayi Sauru. Tutai ataksha áimkiamiayi “Wikia Jesusaitjai. Ame pataaturmena níitjai, tímiayi. Wíi aents pataatamna nuí, amek enentáimin yajauch awajmamsame, waaka sankanmiak numin ijiuma núnismek” tímiayi.

<sup>6</sup>Nuyanka Sauru sapijin kuranki tímiayi “Nuinkia Uunta, ¿wi warinia ititurkat tusamea wakeram?” tímiayi.

Tutai Uunt chichaak “Wajakim weme péprunam wayatá, tímiayi. Nuí jeawakmin ame túratamna nuna turamiartatui” tímiayi.

<sup>7</sup>Tura Sáurujai irunar wearmia nu, chichaamun antukarmiayi. Tura áentsnaka penké wáinkiacharmiayi.

Tuma ásar ti ashamkarmiyai. <sup>8</sup>Nuyá Sauru nunká tepá nantakmiyai. Tura wáinmaktaj tukamá wáinmakchamiyai. Tuma asamtai chíkich shuar uwejnnum enkekiar júkiarmiyai Tamaskunam. <sup>9</sup>Nuj jeá menaintiu tsawant ímstsuk tura yurumtsuk penké úmutsuk pujumiyai.

<sup>10</sup>Nuj Tamaskunam Yus-shuar Ananías ámiyai. Nin mesekranam Uunt Jesus tímiyai “Ananíasa.”

Tutai “¿Warí wakeram, Uunta?” tímiyai.

<sup>11</sup>Nuyá Uunt Jesus tímiyai “Wajakim jintia, Naka tutaiya nuj wetá. Nujsha Jutasa jeen jeam, Társummaya Sáurun eaktaj tusan winijiai, titiá, tímiyai. Ni-isha Yúsán áujuk pujawai. <sup>12</sup>Tura juna mesekranam ipiatkamjai Sáurun. Aishman wayá ni uwejéjají ántiawai, ataksha íimit tusa. Nú áishmanka ámetme, Ananíasa” tímiyai Jesus.

<sup>13</sup>Táman antuk Ananías chichaak “Túrasha Uunta, ju áishman ame áentsrumin Jerusarénnnum ti yajauch awajchakait. Ni yajauch túramurín ti untsurí aents ujatainiawai, tímiyai. <sup>14</sup>Tura yamaisha Israer-patri chicharniun papirín takakui. Tura nujají ame náarmin páchiaj nuna achik jukitiaj tusa tímiajaisha tarutramji” tímiyai Ananías.

<sup>15</sup>Tutai Uunt Jesus tímiyai “Áankisha wetá. Ju áishmankan winia etserniur atí tusan achikjai Wi. Niisha Israer-shuarchancha tura kapitínniasha tura Israer-shuarnasha wínian etserin áta-tui, tímiyai. <sup>16</sup>Tura Sauru winia náarun páchia asa ti wáitsattana núnaka nin inia-aktustatjai” tímiyai Jesus.

<sup>17</sup>Tura Jesus táman umirak Ananías Sauru pujamunam wémiyai. Tura jeari wayá uwején awantas tímiyai “Yatsuru Sauru, Uunt Jesus jintiá wantintiurmakmamna nusha ame ataksha íimiat tusa, tura Yusa Wakanísha enentáimin pimiutramkat tusa winia akuptukai” tímiyai.

<sup>18</sup>Nu chichamaik ni jiiya namaká saepeya áanin iniaarmiyai. Túrunam-tai ataksha íimmiyai. Túruna wajaki we imianmiyai. <sup>19</sup>Nuyasha yurumámiyai. Tura yurumásha kakaram ajasmiyai. Tura Yus-shuarjají Tamaskunam wárum-chik tsawant pujusmiyai.

### **Sáuruka Tamasku péprunam Yus-Chichaman etserkamiania nu**

<sup>20</sup>Nuyanka Sauru Israer-shuara irun-tairín wayá Jesusa túramurín etserkamiyai. Etseruk tímiyai “Nekasaiti, ju Jesus Yusa Uchirínti” tímiyai.

<sup>21</sup>Nuna ashí anturú pujuiniaka “¿Ausha urukakua aania? tiarmiyai. Entá ju áishmansha Jerusarénnnum Jesusan enentáimtuinian ti pataatimia núchakait. Tura tímiajaisha nuna achik Israer-patri akupniurín jukitiaj tusa tamia núchakait” tiarmiyai.

<sup>22</sup>Tura Sáurusha sapijmiatsuk etsermiyai. “Ju Jesus nekas áentsun Uwentikniuiti” tu etsermiyai. Tura ti paant étserkui, Tamaskunmaya Israer-aents, nekaschaiti titiaj tukamá tujinkiarmiyai.

<sup>23</sup>Tura ukunam, Israer-aents Sáurun maatai tusar chichaman jurusarmiyai. <sup>24</sup>Tura Sáurusha nu chicham jurusman nekamamiyai. Israer-aents pepru jínmanum tuke tsawaisha, káshisha achikiar maatai tusar jintian akirtiarmiyai. <sup>25</sup>Nuna antukar Yus-shuar Sáurun chiikniun kashi enkeawar itiararmiyai. Pepru tanishnum itiarar awemarmiyai.

### **Sáuruka Tamaskunmaya Jerusarénnnum wémiania nu**

<sup>26</sup>Tura Sauru Jerusarénnnum jeá Yus-shuarjají iruntrattsá wakerimiyai túrasha niníka ashamiarmiyai. Sáurusha nekas Yus-shuar ajaschaiti tusar ashamiarmiyai. <sup>27</sup>Túmainiaín Pirnapí Jesusa akatramurí matsatmanum jukimiyai Sáurun. Tura nuj ejé tímiyai

“Ju Sauru jintiá wesa Uunt Jesusan wáinkiaiti. Tura Yus chicharkaiti. Tuma asa Sauru Tamaskunam sapijmiatsuk Jesusa náarin etserkaiti” tímiayi. <sup>28</sup>Tura Sauru Jerusarénnum juákmiayi. Tura Yus-shuarjai irunar pujumiayi. <sup>29</sup>Nuyasha Yus, etserkata tutai, sapijmiatsuk Jesusa túramurin etsermiayi. Tura Israer-shuar Kriaku chichaman chichau ármia nu, nujuarmiayi. Sáurusha nu shuarjai áujmatsarmiayi. Túrasha nu shuar Sáurun itiur máatjik tusar chichaman juriarmiayi. <sup>30</sup>Tura Yusaj yachi ármia nu, chicham jurusman nekaawarmiayi. Neka ásar Sáurun Sesaria peprunam júkiarmiayi. Tura nuyasha Tarsu péprunam akupkarmiayi.

<sup>31</sup>Tura Jutíanmaya, Kariréan-mayasha, Samarianmayasha Yus-shuar shiir tímiajnisan ajasar kakaram ajasarmiayi. Yúsan ashamainia ásar, tura Yusa Wakaní yayamu ásar kawenki kawenki wearmiayi.

### Pítiur Eneasan yáinmiania nu

<sup>32</sup>Tura Pítiur Yusaj yachi armiania nu iráa wekaimiayi. Wekaak Yus-shuar Rítianam matsamarmia nuisha iraumiayi. <sup>33</sup>Nuisha Rítianam jeá áishmankan Eneas náartinian wáinkiamiayi. Niisha emearu asa wekaicha uchu uwí aya tépenuyayi. <sup>34</sup>Tura Pítiur chicharuk “Eneasa, Jesukrístu tsuármawai. Nantaktia. Tura esekmatairam iwiarata” tímiayi. Tutai Eneas nu chichamaik nantakmiayi. <sup>35</sup>Nuna túman wáinkiar Rítianmaya aents tura Sarunmaya aencha enentáimprar Uunt Yusan nemarsarmiayi.

### Nuwa Túrkas nantakmiania nu

<sup>36</sup>Túrasha Jupe péprunam nuwa Yus-shuar pujuyayi, ni naari Tapitia. Tura nusha Kriaku chichamjainkia Túrkas tu-

iniawai. Nu nuwasha nujujus tuke pénker túriniuyayi. Tura niisha nútiksanyai wémiayi. <sup>37</sup>Nu tsawantinik Túrkas sunkuran jateemak jakamiayi. Túrunam-tai ayashin nijiarar yakí tesaamunam áepsarmiayi. <sup>38</sup>Jupe péprusha Rítianmaya tíjiuch ámiayi. Júpenmaya Yus-shuar Rítianam Pítiur pujan nekaawar jimiara áishmankan akatrar akupkarmiayi, Júpenam wari winití tusar. <sup>39</sup>Nu tutai Pítiur niijai wémiayi. Tura támatai jaka tepemia nu awayawarmiayi. Nu wayamtaí waje pujuarmia nu útkiar Pítrun téntakarmiayi. Túrawar pushirin, Túrkas iwiaaku jujus najankamia nuna iniaktusarmiayi.

<sup>40</sup>Nuyanka Pítiur aa akupkarmiayi ashí. Tura niisha ninki tikishmar Yúsan áujsamiai. Nuyasha nuwan jaka tepaan iis tímiayi “Tapitia nantaktia.” Tutai niisha íimi Pítiur wajaan wániak nantaki jujusmiayi. <sup>41</sup>Tura Pítrusha nuwan uwejnum achik awajkimiai. Tura ini-ais Yus-shuar ármia nuna tura wajencha untsukar Túrkas iwiaaku ajasun iniaktusarmiayi. <sup>42</sup>Nu túrunamun ashí aents Jupe péprunmaya nekaawarmiayi. Túrawar untsurí aents Uunt Jesusan umirkarmiayi. <sup>43</sup>Tura Pítruka Jupe péprunam untsurí tsawant nuapen-iwiarin Semunka jeen pujusmiayi.

### Pítiur Kurniriujai

**10** Sesaria péprunam Kurniriu naartin suntara kapitiantri pujumiayi. Ni suntari Itiaria nunkanmaya ármiai. <sup>2</sup>Nu kapitian Kurniriu ni shuarijjai, Yuska nankaamantuiti, tu enentáimtiarmiayi. Tuma ásar Yúsan enentáimtin ármiai. Tura nútiksanyai kuítniasha takakchan yáintaj tusa Israer-shuaran súuyayi. Tura tuke tsawant Yúsan áujtiniuyayi. <sup>3</sup>Chíkich tsawantaj, nantu aanuku ajasaj Kurniriu íimiarmiayi. Yusa suntari

Yus nayaimpinmaya akupkamu, ni pujamunam utuá “Kurniriuá” tímiayi.

<sup>4</sup>Kurniriuá tutai, Yusa suntarín ashamak íimia pujumiayi. Tura “¿Warimpiait, Uunta?” tímiayi.

Tutai Yusa suntarí tímiayi “Ame seamun Yus anturtamkai. Tura atsumainia nu yayakmin Yus shiir enentáimtur-mawai’ tímiayi. <sup>5</sup>Tura Yusa suntarí Kurniriuu tuke chicharuk “Wats, áminuram Júpenam akupkata. Semun, chíkich naari Pítiur, tatí tusam akuptukta, tímiayi. <sup>6</sup>Nu Semunsha chíkich Semunjai pujawai. Nuka nuapeniwiarin Semunkaiti. Tura ni jeesha nayaantsanam ayaamach pujawai, tímiayi. Nui jeawakmin, ame túratamna nuna Semun Pítiur turamtatui” tinia ikiukmiayi. <sup>7</sup>Tura Yusa suntarí waketkimtai, Kurniriuka ni takarniurín jímíaran itiamiayi. Tura suntaran chikichkiniak nemarsat tusa itiamiayi. Nu suntar ni írutramuriyayi. Tura Yúsan enentáim-tiniuyayi. <sup>8</sup>Kurniriuasha ni túrunamurín ashí ujáa-já awajas Jupe péprunam akupkarmiayi.

<sup>9</sup>Kashin tsawantai Kurniriu suntarí Júpenam nuntumsarai, tutupin ai Pítiur jea yakí wáakunam Yúsan áujstajtsa wakamiayi. <sup>10</sup>Pítrusha ti tsukamak yurumátaj tusa wakerimiayi. Túrasha yurumkan iniarainiai Pítiur fkiajtiusmak, <sup>11</sup>nayaimp uranmianum wanakaram tarachia áanin tura nuna tsakarín jinikiakman tárún wáinkiamiayi. <sup>12</sup>Nu tarachnium yajasma irunmiayi. Wekainiusha, nanamtincha, tura napisha enkemiarmiayi. <sup>13</sup>Tumai Yus Pitrun chicharuk “Pitru, wajakim maam yuata” tímiayi.

<sup>14</sup>Tutai Pítiur tímiayi “Atsá Uunta. Ii Israer-shuartikia yajauch yajasma áinia nu tura yúatin surimkiamu ana nuka penké yúchaitji. Tuma asamtai júnaka wikia yuashtatjai” tímiayi.

<sup>15</sup>Túrasha Pitrun atak Yus chicharuk “Wi, pénkeraiti, tájana nu, yajauchiiti, tiip” tímiayi.

<sup>16</sup>Nuka menaintiú túrunamiayi. Tura nuyasha tarach ataksha nayaimpiniam wakamiayi. <sup>17</sup>Nuna túrunan wáiniak Pítiur wariniak áaniuncha wáinkiaj tusa enentáimia pujai kapitían Kurniriu ayakma armia nu, anintruniak jeawariayi. <sup>18</sup>Tura jeawar kakantar untsummiar “¿Semun, Pítiur, jin pujá?” tiarmiayi.

<sup>19</sup>Tura Pítruka íimiarmarin tuke enentáimia pujai Yusa Wakaní chichaak “Menaintiu áishman untsurmainiawai, tímiayi. <sup>20</sup>Wajakim akaikim arantutsuk au nemariarta, Wi akupkamu asamtai” tímiayi.

<sup>21</sup>Nuna antuk Pítiur taramiayi. Tura áishmankan Kurniriu akupkamia nuna wajainian wáiniak “Wiitjai Pítiur. Átum eattrumna nútjai. ¿Warí tarintrum?” tímiayi.

<sup>22</sup>Tutai niisha tiarmiayi “Iisha kapitían Kurniriu akupkamu taji. Kurniriuka áishman pénkeraiti. Yúsan enentáimtini-aiti. Tura Israer-aencha nin shiir enentáimtuiniawai. Níiya winiaji, tiarmiayi. Kame nuik, Yusa suntarí, nayaimpinmaya akupkamu, ii kapitíantrín tímiayi “Pitrun untsukát akupkata. Nii tatí. Tura nii títiatna nu pénker anturkata” tímiayi. Nuna ii kapitíantrín takui iisha winiji” tiarmiayi.

<sup>23</sup>Tutai Pítiur jeá awayamiayi. Tura nu kashi nu kanararmiayi.

Kashin tsawarar Pítiur niijiai wearmiayi. Túrasha Júpenmaya Yus-shuarsha nin nemariarmiayi. <sup>24</sup>Nuyá tsawarar Sesaria péprunam, Kurniriu nákamun jeariarmiayi. Kurniriuka ni shuarín tura ni nekas amikrín, nekaatarum tusa untsuk ikiaankamiayi. <sup>25</sup>Tura Pítrusha jeamtai Kurniriu aa jiintiuki Pitrun tikishmatramiayi. <sup>26</sup>Túrasha Pítiur

awajki tímiayi “Wajaktia. Wisha aya áentsketjai. Ámea núnisketjai” tímiayi. <sup>27</sup>Tura chichasar jeá wayawarmiayi. Tura wayá, untsurí aents matsatun wáinkiamiayi. <sup>28</sup>Nuyá Pítiur chichaak tímiayi “Amikrua, atumsha nékarme. In Israer áentstinkia, chíkich áentsjai pachinriarchatniuitrume, tura ni jeencha wayashintinaitrume in jintintramin turamainiaji, tímiayi. Túrasha Yuska ni enentáimsamurín wíniaka paant iniaktursayi. Túmaitkiui wikia nánkamas áentsun yajauchiiti, tura auka wapikiaiti, tíchamniaitjai, tímiayi. <sup>29</sup>Tuma asamtai, untsurkurmin, páchitsuk winimjai. Túmaitkiui nekaataj tusan wakerajai. ¿Urukamta untsurkamarum?” tímiayi.

<sup>30</sup>Tutai Kurniriu tímiayi “Kuatru tsawant nankaamasaj tura nantusha juni ai, wikia yurumsuk Yúsán áujsamjai, kiaraj áujsatin ana nuna. Túran chichaj, áishman, ni entsatairi wincharpatniun, naka wajatran wáinkiamjai, tímiayi. <sup>31</sup>Niisha chichartak turutmiaiyi “Kurniriu, Yus ame áujman anturtamkayí. Tura shuar atsumainia yáinmamna nunasha nekarmayi, turutmiai, tímiayi. <sup>32</sup>Tuma asamtai, Jupe péprunam akatramuram akupkata. Semun Pítrun itiatí. Nu Semun Pítrusha, chíkich Semunjai pujawai. Nuapen-iwiarin Semunkaiti nuka. Tura ni jeesha nayaantsanam ayamach pujawai. Niisha taa ámin chichartamkattawai” turutmiai, tímiayi. <sup>33</sup>Túrutkui, wi umikian áentsun wárikmasan ámin akuptukjame utitia tusan. Tura nékasen taume. Tuma asamtai iisha juí Yus íimmianum pujuiniaji. Tuma asamtai, ashí Uunt Yus ámin au ujakarta túramna nu, iisha antuktai tusar pujaji” tímiayi Kurniriu.

### Kurniriu jeen Pítiur etserkamia nu

<sup>34</sup>Nuyá Pítiur chichaak “Ayu. Yus íimmianum ashí aents métekrak ániawai nekas nékajai, tímiayi. <sup>35</sup>Antsu ashí nunkanam nánkamas aents Yúsán umirak péñker tura nuna, Yus nú aentsun shiir enentáimtawai, tímiayi. <sup>36</sup>Yuska shiir chichaman Israer-aentsun akuptukmiayi. Nui chichaak “shuar Jesukrístu naarín páchiakka, Yusjai nawamnaikiatin átiniaiti, tímiayi. Nú Jesukrístu ashí shuara Úuntrinti’ tímiayi Yus. <sup>37</sup>Túrasha Kariréa nunkanam nankamak ashí Israer nunkanam túrunamia nu paant nékarme. Imiakratin Juan imiaak etserak amukmia nú tsawantin nankamamiayi. <sup>38</sup>Tura jusha nékatsrumek, tímiayi. Nasarénumia Jesus, Yus Anaikiamu asa, Yusa Wakaní kakarmarijjai péñker túriniuyayi. Iwianchruku wáitias pujuarmia nuna péñker awajsamiayi. Yus Niin pujurma asa ashí nuna túriniuyayi. <sup>39</sup>Tura Israer-aents matsatkamunam tura imia Jerusaréñ péprunmasha Jesus túramia nu, iisu asar, iisha étsereaji. Tura ayu, Nin achikiar krúsnum máacharmakia, tímiayi. <sup>40</sup>Tura menainti tsawant jeamtai Yus Nin iniantkimiayi. Tura ataksha iwiaintiurtamkachmakaj’, tímiayi. <sup>41</sup>Ashí áentsnumka wantinkiachmiayi. Antsu íniak nuik, etserin atarum tusa Yus achirmakmij nú áentstiniak wantinturmakmij, tímiayi. Au nekas jakamunmaya nantakmiatai iisha Niijjai tsaninkiar yurumámji, tímiayi. <sup>42</sup>Tura Jesussha in akuptamkaitji. Jesuska “Wiitjai Yus Anaikiamun, tímiayi. Ashí áentsun, júka makuumawai, túrasha júka makuumatsui, Wiki títiniaitjai. Kame ashí áentsun, jaka áinia nuna tura iwiaaku áinia nunasha, Wíkiitjai nuna títinian” tímiayi Jesus. Nusha átum

werum ujatruktarum, Jesus turammaji, tímiayi. <sup>43</sup>Ya shuarak Jesusa náarin pachia nú shuarnaka tunaarin tsankurattawai, nuna ashí Yúsnan etserniusha yaunchu etseriarmiayi” tímiayi.

### Israer-shuarchan Yusa Wakaní tarurarmiania nu

<sup>44</sup>Tura Pítiur tuke chichaak pujai, tura chikichcha antúu pujuiniái Yusa Wakaní tarurarmiayi. <sup>45-46</sup>Tuma ásar ankant ankant chíkich chichamjai chichasarmiayi. Túmainiak, Yus ti péñkeraiti, tiarmiayi. Tura Israer-shuar, Yus-shuar armia nuka Pítrujai táarmia nu, nuna antukar ti enentáimsarmiayi. Maa, Yusa Wakanísha Israer-shuarcha ainia nunasha tarurcharaik, tu enentáimsarmiayi <sup>47</sup>Túmakui Pítiur chichaak “¿Yaki surimkiat ju aents imiantinian? Warí nincha ínia áintsan Yusa Wakaní tarurcharaik” tímiayi. <sup>48</sup>Nuyá Pítiur, Jesukrístu náariin imiantiarum tusa akupkarmiayi. Tura nuyasha Pitrunka, niijjai ishichik tsawant pujustinian seawarmiayi.

### Ni túrunamurin Pítiur ujakmiania nu

**11** Israer-shuarchasha Yusa chichamen umirkarai táman Jesusa akatramurisha tura Jutíanmaya Yus-shuarsha antukarmiayi. <sup>2</sup>Túmainiak Pítiur Jerusarénum jeamtai, Israer-shuar Yus-shuar ármia nu chichainiak <sup>3</sup>“¿Urukamtia Israer-aents áiniachusha iyumam? ¿Tura aujai tsaninkiam urukamtai yurumámum?” tiarmiayi.

<sup>4</sup>Tutai Pítiur ashí yámankamtaiknumiá túrunamun ujakmiayi. <sup>5</sup>Chichaak tímiayi “Wikia Jupe péprunam pujumjai. Tura nuí Yusan auju pujusan ímiarmajai. Tura wanáaram tarachia áanin kuatru tsakarín jiníkiakma, nayaimpinmaya táarun wáinkiamjai.

Tura wi pujamunam jeartimiai, tímiayi. <sup>6</sup>Tura nuí iiyaj tukaman init yajasman, napincha, nanamtinniasha enketainian wáinkiamjai, tímiayi. <sup>7</sup>Tura chichaman antukmajai “Pítru wajakim maam yuata” túrutun antukmajai, tímiayi. <sup>8</sup>Túrutkui “Atsá, Uunta, áanin wapiknaka, Israer-aents yuatin surimkiamu ana núnaka tuke yúchaitjai” tímiayi, tímiayi. <sup>9</sup>Atak nuyá túrutuk “Wi, péñkeraiti, tájana nu, ámeke, yajauchiiti, tiip” turutmiiai, tímiayi. <sup>10</sup>Nunasha menaintiú túrunan wáinkiamjai. Túruna nayaimpiniam mash waketkimiai, tímiayi. <sup>11</sup>Nuí túruna pujai menaintiú áishman Sesarianmaya akupkamu, winia eatainiak wi pujamunam tarutiarmiai, tímiayi. <sup>12</sup>Tura nuí Yusa Wakaní chichartak “Arantutsuk aujai wetá” túrutkui, wémajai. Tura ju sais Yus-shuarjai wi wémajai. Túrunar ashinkiar Kurniriu jeen wayamji, tímiayi. <sup>13</sup>Niisha chichaak “Jearui Yusa suntari nayaimpinmaya taa wajan wáinkiamjai, tímiayi. Tura niisha chichartak “Jupe péprunam Semun Pítiur tatí tusam áishman akatram akupkata. <sup>14</sup>Pítrusha taa, itiura amesha tura áminiuurmesha tunaarminia uwemprattam nuna turamtatui.” Yusa suntari nuní turutmiayi” tu ujatkamiai Kurniriu’ tímiayi.

<sup>15</sup>“Wi chichastasan júarai, Yusa Wakaní tarurarmiayi, yámankamtaik in tarutrampramij nútiksán, tímiayi. <sup>16</sup>Nuinkia Uunt Jesus timian enentáimpramjai. Niisha tíchamka “Juan entsajain imiakratmiayi. Tura antsu Yusa Wakanínkia imiantinia áintsan atumí enentáin enkemprutmattarme.” Nu timian enentáimpramjai, tímiayi. <sup>17</sup>Atumsha enentáimpratarum. Uunt Jesukrístu umirkamij nuí, incha Yuska ni Wakanín suramsamijai. Tura in suramsamij núnisan Yus nincha



ni Wakanín súsarmiayi. Nuna tura asamtai, wikia, túrashtiniaiti, Yúsan títinkiaitaij” tímiayi Pítiur.

<sup>18</sup>Tura Pítiur taman antukar mitiat wáinkiar “Nekasaiti, Israer-shuarchancha ni enentáin yapajíawarmatai tuke iwiaaku átinian Yuska nin súsaruiti” tiarmiayi. Tusar Yusa náarín ti shiir awajsarmiayi.

### **Yus-Shuar Antiukía péprunam wearmiania nu**

<sup>19</sup>Estepañkan máawarmia nu, chíkich Yus-shuarnasha maatai tusar pataatiarmiayi. Túram chíkichkia pisarar Pinisia nunkanam, Chipri nunkanmasha, tura Antiukía péprunmasha wearmiayi. Tura nu jeawar Yus-Chichaman chikichnaka ujatsuk aya Israer-aentsnak ujakarmiayi. <sup>20</sup>Tura niijíai Chipri nunkanmayá pisararmia nu Serini nunkanmayásha Yus-shuar ármiai. Nuka Antiukíanam jeawar Israer-shuarchan Uunt Jesusa túramurín ujakarmiayi. <sup>21</sup>Tura Uunt Jesus ikiakárma ásar, nú nunkanmayá aents ti untsurí yaunchu túrutairín iniaisar Jesusan enentáimtuiniak Yus-shuar ajasarmiayi.

<sup>22</sup>Tura nu chichaman antukar, Jerusarénumiá Yus-shuar, ame iyutá tusar, Pirnapín Antiukíanam akupkarmiayi. <sup>23-24</sup>Pirnapísha jeá, Yus nú shuaran uwemtikrarma nuna wániak warasmiai. Pirnapísha péñker áishmankauyayi. Yusa Wakanísha pimiutkamuyayi. Tura Yúsan nekas umirkauyayi. Tuma asamtai nu shuaran mash jintintiainiak chicharuk “Tuke enentáimjai umirkarum Yus nemarsatarum.” Tu chicharak ikiukmiayi. Tura nuísha nú arant untsurí aents Yusai kawenkarumiayi.

<sup>25</sup>Nuna turasua amik Pirnapí Tarsu péprunam wémiayi Sáurun wáinkiataj tusa. Tura wániak Antiukía

péprunam jukimiayi. <sup>26</sup>Tura nu jeawar, nú péprunmayá Yus-shuarjai iruntrar chikichík uwí pujusarmiayi. Yus-Chichaman untsurí shuáran ujaak pujuarmiayi. Tura nu Antiukía péprunmanka Yus-shuaran émkaka, Kristu shuari, tiarmiayi. <sup>27</sup>Nuyá Yusnan etserin Jerusarénumiá táarmiayi Antiukíanam. <sup>28-30</sup>Túmainiai chíkichík etserin, ni naarí Akaapu, Yus-shuar matsatmanum ajapén wajaki chichasmiai. Tura Yusa Wakaní nekatairíjiai chichaak “Ti tsuka ashí núñkanam átatui” tímiayi. Tuma asamtai Antiukíanmayá Yus-shuar chichainiak “Jutía nunkanmayá Yus-shuar ainia nu yáintai” tiarmiayi. Ankant ankant ni wakeriarmia núnik súsarmiayi. Tura nú kuítniasha Jutíanmayá Yus-shuara úuntrin akuptukarmiayi. Pirnapísha Sáurusha nú kuítian júkiarmiayi. Tura Akaapu tímia núnisan túrunamiayi, akupin Krautiu pujai.

### **Pitrun sepunam enkeawarmiania nu**

**12** Nu tsawantai akupin Erutis Yus-shuaran máataj tusa chichaman jurus áentsrín ishiakmiayi. <sup>2</sup>Tura Juanka yachín Jakupun suen tsupirkar máawarmiai. <sup>3</sup>Nuna tura máawarmatai Israer-aents wáinkiar “júka péñkeraiti” tiarmiayi. Erutissha nuna antuk, Pítrusha achikrum itiatarum tusa akupkarmiayi. Núnaka wakapruachu tanta yuatin nampertin túrawarmiai. <sup>4</sup>Pítruncha achik itiarmatai, Erutis sepunam enkeata tusa akupkamiayi. Tura sepunam suntarsha ankant ankant, kuaru kuaru, ashikia tiasisáis (16) irunar Pitrun téntakarmiayi. Tura, ju jisat nankaasmatai, mantamnatí tusan jikíktiatjai aents iruntramunam, tu enentáimsamiayi Erutis. <sup>5</sup>Túramu asa Pítruka sepunam pujumiayi. Tura

suntarsha mijiatrutsuk iiyarmiayi. Túramunak Yus-shuarka, Pitrun yáinkiat tusar iniaitsuk Yúsan ti áujiarmiayi.

### Yusa suntarij Pitrun uwentikramiania nu

<sup>6</sup>Wats, Erutis, kashin jíiktiajai takui, nú kashi Pítruka jimiará suntar wajamunam etema tepes kanarmiayi. Tura jimiará jirujai jinkiamuyayi. Tura chíkich suntarka jínmanum ii wajarmiayi. <sup>7</sup>Tumai aya aneachma Yusa suntarij nayaimpinmaya taa ajapén wajasmiai. Túrunamtai jeanmanka tsáapin ajasmiai. Tura Yusa suntarisha Pitrun páenum antiñ ishintiarmiayi. Tura jirusha Pitru uweyéya sayat atiniarmiayi. <sup>8</sup>Tura Yusa suntarij tímiayi “Kaki emenmamata. Túram sapatrumsha aweekata” tímiayi. Tutai Pítiur túramiayi. Nuyá chichaak “Pushiram entsarta. Túram nemartusta” tímiayi. <sup>9</sup>Tutai Pítiur nemarsamiayi. Túrasha Pítruka, mesekranmaapi júniaya, tu enentáimsamiayi. <sup>10</sup>Túrasha emka suntar ímia wajan nankaikiarmiayi. Tura nuyasha chíkich suntar ímia wajan nunasha nankaikiarmiayi. Tura nuyasha jíintiainium jiru waiti ámanum jeawarmatai, nú wáitisha ímia-nin̄ki kuat uranmiayi. Túrunamtai jíinkarmiayi. Tura jintiá ishichik wésan, Yusa suntarij Pitrun níniak ikiukmiayi.

<sup>11</sup>Túram Pítiur enentáimiar tímiayi “Yamaikia nékajai. Mesekranmachuiti. Antsu Uunt Yus ni suntariñ nekas akupturkayi. Erutis mantuataj tusan pujurtana nuyá Yusa suntarij winia uwentikrurai. Tura Israer-aents túrutatajtsa wakeriarmia nuyasha uwentikrurai” tímiayi. <sup>12</sup>Nuna tu enentáimias nekáa, Marí jeen wémiayi. Nú Marisha Juan Márkusan nukuríyayi.

Nú jeanam untsurí aents irunar Yúsan auju matsatainiái Pítiur jeamiayi. <sup>13</sup>Tura jeá aa wáitin tuntuimiayi, wayataj tusa. Túmakui nuwa uchich, ni naari Ruti, yákit tusa iyumiayi. <sup>14</sup>Tura jeari, Pitru chichamen anturak ti shiir enentáimsamiayi. Túmak wáitin urattsuk ikiuki, inít matsatainian werí “Pítiur taa wáitiniam wajaawai” tímiayi.

<sup>15</sup>Tutai “Wáurtsmek” tiarmiayi. Tútaisha núwaka “Atsá nekasaiti” tímiayi.

Tútaisha nú arant “Níchuiti. Antsu ni wakaní túratsuash” tiarmiayi.

<sup>16</sup>Tu chichainiain Pítruka tuke tuntuí wajamiayi. Tura wáitin uraj tukamá Pitrun wáinkiar ashamkarmiayi. <sup>17</sup>Ashamak chichainiakui Pítiur, uweje takuí itiatmamtikiarmiayi. Tura nuyá Uunt Yus sepunmayan uwentikramun ujakmiayi. Tura “Ju chicham Jakupu tura chíkich Yus-shuarsha ujaktarum” tímiayi. Nuna ti iniais jiinki arant wémiayi.

<sup>18</sup>Kashin tsawar suntarsha Pitrun atsá wáinkiar “Chuwa urukakua menkaka. Áyawa urukattajia” tiarmiayi. Pítiur túrunamun nékachu ásar nuna tiarmiayi. <sup>19-20</sup>Túrunamtai Erutis chichaak Pítiur eaktarum tusa akupkarmiayi, túrasha wáinkiacharmiayi. Túrunamtai Erutis suntaran untsukar, Pítrun ísarmia nuna aniasarmiayi “¿Pítiur itiura menkakama?” tímiayi. Niisha áimiainiachkui, nu suntaran mantámnatí tusa akupkamiai.

### Erutis jakamiania nu

Erutissha Tirunmaya tura Setúnmaya áentsjai sha nemasnaikiarmiayi. Túmayatan Jutía nunkan ikiuki Sesaria péprunam pujustaj tusa Erutis wémiayi. Sesaria péprusha Tiru péprunam tíjiuchiiti. Setúnmaya aents Tirunmaya áentsjai Erutisa nunkeyan

yurumkan súmeria ásar, Erutisjaj nawamnaikiatniun wakeriarmiayi. Tuma asamtai métekrak enentáimsar, Erutisa takarniurj penkeri, ni naari Parastu, niijijaj emka amikmawar nuyá Erutisan weriar shiir matsamsatniun seawarmiayi. <sup>21</sup>Tuma asamtai tsawant jeamtai Erutissha akupin entsatai pushin entsarmiayi. Tura akupin pujutainium pujus áentsun ikiaanank áujmatmiayi. <sup>22</sup>Nuj pujus chichaakui aents untsumainiak tiarmiayi “Ju chichaa pujana júka áenchaiti. Antsu nekaska yúsaiti” tiarmiayi. <sup>23</sup>Tumaj nuyajk Yusa suntarij nayaimpinmaya tarj Erutisan jaa awajsamiai. Tuma asamtai nusha aka yuam jakamiayi. Erutissha Yusan waantu awajtsuk ninjki waantu enentáimtuma asa túruna jakamiayi. <sup>24</sup>Túrunamtaisha Yusa chichamenka nú arant pampanki wémiayi. Túmakj ashí núnkanam anturamiayi.

<sup>25</sup>Tura Pirnapísha Sáurusha ni takatrin amukar Jerusarénnumia Antiukíanam waketainiak Juan Márkusanj júkiarmiayi.

### **Yus-Shuar Pirnapíncha Sáuruncha Yus-Chichaman etserkarat tusar akupkarmiania nu**

**13** Antiukíanmaya Yus-shuar num Yusnan eterin páchitra ármiai. Nútiksant Yus-Chichaman jintinniurisha ármiai. Pirnapísha tura Mukusa Semunsha, nuyá chíkich, Serinianmaya Rúsiusha tura akupin Erutisa tsakatkesha, ni naari Manaen, Sáurusha tímianu ármiai. <sup>2</sup>Tura chíkich tsawantaj niisha yurumtsuk Yúsant áujeak pujuinijaj Yusa Wakanj tímiai “Pirnapísha, Sáurusha akanturkitiarum, tímiai. Wi takatan súsaitjiana nuna takasarat tusarum túratarum” tímiai. <sup>3</sup>Tutaj ijarma Yusan aujsua amikiar, shiir wetarum tusar ni uwejen Sáurun

Pirnapíncha awantkarmiayi. Túrawar Antiukíanmaya akupkarmiayi.

### **Chipri nunkanam jeawarmiayi**

<sup>4</sup>Tura nuyanka Yusa Wakanj akupkam Pirnapísha Sáurusha jinkiar Serusia péprunam jeawarmiayi. Tura nuyá uunt kanunam enkemprar Chipri nunkanam jeawarmiayi. <sup>5</sup>Juansha yáintaj tusa némarkauyayi. Nuj Saraminia péprunam jeawar Israer-shuar iruntai jeanam wayawar Yus-Chichaman etseriarmiayi. <sup>6</sup>Tura Chipri nunkanam pepru ainia nuj wáirkutak Papus péprunam jeawarmiayi. Nuj jeawar Israer-aents uwishin ni naari Parjesusan wáinkiar miayi. Ni chíkich náarinkia Erimiasauyayi. Niisha uwishniuitiat, Yúsant étsereajaj, tímuyayi. <sup>7</sup>Akupin Serjiu Páurujaj pujuyayi. Nu akupniusha ti penker enentáimniuyayi. Tura Pirnapín Sáuruncha chichaman akuptukmiayi, taarti tusa. Kame Yus-Chichaman antuktaj tusa wakerak untsukmiayi. <sup>8</sup>Tura uwishin Erimias nuna nakitiak “Auka penkerchaiti” tímiai. Akupniusha Yúsant umirkainj tusa nuna tímiai. <sup>9</sup>Nuyanka Sauru, ni chíkich naari Papru, Yusa Wakanj pimiutkamu asa, nu uwishniun úmamkemas iis tímiai <sup>10</sup>“Ámeke wáitiatme. Anankartiniatme. Yajauchiitme. Maaj, iwianchiitme. Tura ashí penker ana nuka imiá nakitniuitme. Tsej, ¿urukamtai Yusa jinti naka ana nu emeskim weam? <sup>11</sup>Pajj, yamaikia Uunt Yus asutiámattawai. Yamaikia amesha jiji kusurmatai untsurj tsawant tsáapnin penké íschattame” tímiai. Tura nú chichamaik jiji kusurmatai kirit ímiuk chikichan emiayi enkeki jurukit tusa. <sup>12</sup>Nu túrunamtai akupin nuna wáinak, ti enentáimpramiayi. Túruna Uunt Yusa chichamen enentáimtur umikmiayi.

### Chíkich Antiukíanam etserkarmiania nu

<sup>13</sup>Nuyá Juan waketki Jerusarénnum wémiayi. Tura antsu Pápruka ni tsaniakmarijíai kanunam enkemprar Pápus péprunka ikiukiari Pirji péprunam jeawarmiyai. Nusha amaini Pampiria nunkanam pujawai. <sup>14</sup>Nuyá Pirji péprun nankaikiari Antiukía péprunam jeawarmiyai. Nú Antiukíasha Pisitia nunkanam pujawai. Nuí jeawar Israer-shuar ayampratin tsawantin, nuka sáwartin, Israer-shuar iruntai jeanam wayawar pujusarmiyai. <sup>15</sup>Tura nuí Yus-Papinium yaunchu áarman áujas aminkiamtai, Israer-shuar iruntai jeanam fírniuri Páprun tiarmiyai “Yatsuru, jintíatin chicham takakkurmeka yamaik titiarum. Antukarmi” tiarmiyai.

<sup>16</sup>Tutai Papru wajaki uweje takuimiayi. Tura chichaak “Israer-shuartiram, tura Yúsán umirkataj tusa wakerarmena nu antuktaram, tímiayi. <sup>17</sup>Ii Yusri ii yaunchu uuntrin Israer-shuartin achikmiayi. Tura niisha írara núnik Ejiptunam matsatainaij Yuska nin páchiniak uunt awajsarmiyai. Yus ni kakarmarijijai nú nunkanmaya ii yaunchu uuntrin uwemtikrarmiyai. <sup>18</sup>Túrasha atsamu nunkanam ii uuntrin kuarenta (40) uwitin Yuska aya kátsuntramiayi. <sup>19</sup>Tura nuyanka siati áentsun mátsatkainian, Kanaan nunkanam matsamarmia nuna amukarmiyai. Nú nunkan ii yaunchu úuntrin susataj tusa Yus túramiyai. <sup>20</sup>Nuyanka ii uuntri akupniurin, juís tútain, anaikiamiayi. Tura chikichan ukunam anaiki anaiki wémiayi. Nuna tura túraakua kuaru siántu senkuenta (450) uwí ejemiayi. Samuersha Yúsnan etserin náamtsáin nuna túrimiyai Yus. <sup>21</sup>Tura nuyanka áencha juísan nakitiainiak, uunt akupin

náamkat tusar Yúsán seawarmiyai. Tuíniakui Yuska Sesa uchirín Saúran anaikiamiayi. Nú Saúra úuntriníka Pinjamínkiayuyai. Tura Saúrsha kuarenta (40) uwí nú áentsun akupkat tusa Yus tsankatkamiayi. <sup>22</sup>Tura Saúr náamkan ataksha Yus awainkimiayi. Tura nuyá iiksan nú nunkanam uunt akupin atí tusa Tawitian anaikiamiayi. Tura Yuska júna Tawitian tímiayi “Isaí uchirín Tawitian winia enentáir jeamtaí achirmakjai. Tura Winia umirtin átatuí” tímiayi. <sup>23</sup>Wats, Tawit weeanmaya Jesusaiti. Tura Yuska Israer-aentsun Uwemtikrartinian Jesusan anaitiukmiayi, yaunchu timiarín uminkiat tusa. <sup>24</sup>Jesuska táatsáin Juan ashí Israer-shuaran tunaariniá enentáimtumar imiantinian ujakmiayi. <sup>25</sup>Tura Juansha ni jákatniuri jeatemamtaí, chichaak “Átum enentáimtarmana núchaitjai. Wikia Yusa anaikiamuri, Kristu tutai, nákarmana núchaitjai. Antsu Nínkia winia ukunmaruú winittiwai. Tura Niisha wíjjainkia ti nankaamantu asamtaí wikia sapatrincha atitratáí tíchamniaitjai” tímiayi.’

<sup>26</sup>‘Pai, yatsurtiram, Apraám weeatiram, tura ashí Yus ashamkarum umirkaitrumna nu, antuktaram. Ju uwempratin chichamka finiuiti, tímiayi. <sup>27</sup>Iis, Jesusa túrunatniurin Yuska yaunchu ni etserniurin áamtikrachmakia. Tura ukunam Jerusarénnumia shuar ni akupniurijijai tuke sáwartin nuna áujeatskesha penké nekaacharmiyai. Tuma ásar Jesuska Yusa Uchirinti tícharmiyai. Tura, jakatí, tiarmia nuí, Jesusa túrunatniurin, Yus yaunchu chichakmia nuna, tímiatrusaran umikiarmiyai, tímiayi. <sup>28</sup>Jesuska penké tunaamkachunak yamaikia mantamnatí tusar Piratun seawarmiyai, tímiayi. <sup>29</sup>Tura Yusa Papirijn ashí Jesusnan tímia nuna

tímiannak umikiarmiayi. Tura nuyá krúsnumiá itiarar iwiarsarmiayi. <sup>30</sup>Túramunak Yus jakamunmayan iniantkimiayi. <sup>31</sup>Jesuka jakamunmaya nantaki, yaunchu Kariréanmaya Jerusarénnum Niijíai irutka wéarmia nuna núkap tsawantin pujus wantintiukmiayi. Nú shuaraiti yamaikia Jesusa túrunamurín etserainia nu' tímiayi.

<sup>32</sup>Iisha núnisrik shiir chichaman Yus yaunchu ii apachrín tiarmia nu étsereaji.

<sup>33</sup>Iisha Israer-weeá asakrin, Yuska Jesusan iniantkimia nujai ii apachrín anajmatramia nuna yamá uminkiaiti. Kame Sarmu Jímiar papinium ju áarmaiti:

“Ámeke winia Uchiruitme.

Túmaitkiui yamaikia winia iwiaakmar susamuitme.”

<sup>34</sup>Tura Yuska Jesusa nantakmiarín jintintiak, tura ni ayashí káurchatniun jintintiak, chíkich Sarmu papinium juna áamtikramiayi:

“Nekas péñkeran Tawitian anajmatramaj nuna atumin amastatjai.”

<sup>35</sup>Tura nú arant, nú paant atí tusa, chíkich Sarmu papinium ju aarma awai:

“Yusa, ame Uchiram aneamna nuna ayashí káurtincha tsankatkashtatme.”

<sup>36</sup>Nekaatarum, yatsurtiram, Yuska Tawitia ayashín tíchamiayi nuna. Tawitkia Yus tímian amuk jakamiayi. Túrasha ni ayashínkia káurmiayi. <sup>37</sup>Tura antsu Yus iniantkimia nuna ayashínkia penké káurchamiayi. <sup>38</sup>Tuma asamtai, yatsurtiram nekaatarum. Jesusjainkete tunáa asakártin. <sup>39</sup>Tura Muisais yaunchu akupkamia nujai tunáa tsankurnarchamnia nu, yamaikia Jesusjai tsankurnartiniaiti. <sup>40-41</sup>Yúsnan etserin juna áarmiayi:

“Enentáimpratarum wishikkiartintiram. Ashamkatarum. Túrarum menkatumpratarum. Wi Yus asan, átum

pujarmena nuí, aents túrachminian túratajna nusha penkesh nekaash-tatrume, chíkich ujatmainiakuisha.”

Tu áarmaiti.

Tuma asamtai yatsurtiram, aneartarum atumin nuna túrutmawáirum, Yusnan etserin aarma tana nútiksán.” Nuna chichaak amukmiayi Papru.

<sup>42</sup>Tura nuyá Papru Pirnapíjiai jiinki wéenakuí aents chichainiak “Chíkich sáwartincha jútiksarmek etserkatarum” tiarmiayi. <sup>43</sup>Tura nuyá iruntsua tsenkeenak Israer-shuarsha, tura chíkichkia Israer ajasarusha, Yúsan umirkatajtsa wakeriarmia nuka, Páprun Pirnapíncha nemarsarmiayi. Niisha nu áentsun chicharuk “Yusa anenkrattairí enentáimtusrum kakartarum” tiarmiayi.

<sup>44</sup>Tura chíkich sáwartinchia nu péprunmaya ti untsurí aents Yus-Chicham antuktai tusar tuakarmiayi.

<sup>45</sup>Tura Israer-shuarsha ti untsurí áentsun tuakarun wáinkiar, suir iiniak, ti kakerkarmiayi. Tuma asamtai Páprun katsekkar “Ju chichaana júka ántar tawai” tiarmiayi. <sup>46</sup>Támaitiat Pápruka Pirnapíjiai arantutsuk chichainiak tiarmiayi “Israer-aentstirmin, atumin emka Yus-Chicham ujaktiniuji. Túrasha átum támaitiatrum nakitramarme. Tura atumsha nakitia asarum, Yúsnun tuke iwiaaku pujuschamnia ajasurme, tímiayi. Tuma asamtai iikia yamaikia Israer-aencha ujaktai tusar weraji, tiarmiayi. <sup>47</sup>Nu túratarum tusa, Uunt Yus akuptamtsujik. Jes, ni Papiriin juna tawai:

“Israer-shuarcha Winia nekarawarat tusan anaitiukjame. Tura ashí nunkanmaya aents uwemprarat tusan akuptajme.”

Tu áarmaiti” tímiayi. <sup>48</sup>Nú chichaman antukar Israer-shuarcha ti wararsar “Uunt Yus tana nuka imiá péñkeraiti” tiarmiayi. Tura, tuke iwiaaku pujusmin armia nu Yus-shuar ajasarmiayi. <sup>49</sup>Tú

tumakí Yus-Chicham nú nunkanam ashí jamarmiyai. <sup>50</sup>Túrasha nuwan, Yúsan péñker enentáimtuinian tura péñker wekainian, Israer-shuarka yajauch enentáimtikrarmiyai. Áishman penkerí ármia nunasha, yajauch enentáimtikrarmiyai. Túram Páprun Pirnapíncha katsekkar, chichaman iruntur najatawarmiyai. Tú-turukiar ní nunkeya jiki awemarmiyai. <sup>51</sup>Túram Papru Pirnapíjiai, ju aentska yajauchiiti tusar, weenak naweyan nunkan akakekiar ikiukiarmiyai. Túrawar Ikiuniu péprunam wearmiyai. <sup>52</sup>Yusa Wakanísha pimiútkamu ásar Yus-shuarka ti warasarmiyai.

#### Ikiuniu Péprunam túrunamia nu

**14** Ikiuniu péprunam Papru Pirnapíjiai jeawar Israer-shuar iruntai jeanam wayawarmiyai. Túrunawar Yus-Chichaman etserkarmiyai. Túram ti untsurí Israer-shuar ármia nu, Israer-shuarcha ármia nusha Yúsan umirkarmiyai. <sup>2</sup>Tura chíkich Israer-shuar, Yúsan umirkacharu ármia nu, Yus-shuaran kajerkarat tusar Israer-shuarchan yajauch enentáimtikrarmiyai. <sup>3</sup>Tuma asamtai Papru Pirnapíjiai nú núnkanam ti nukap tsawant pujusarmiyai. Tura Uunt Yúsan enentáimtuinia ásar, arantutsuk Yusa waitnenkratairín etserkarmiyai. Tura, etserinia nu winia kakarmarjainti tusa, Yuska aents túrachminian najanmamtekiawarmiyai. <sup>4</sup>Tura Ikiuniumaya aentska jímiar kanakarmiyai. Chíkichkia Israer-shuar tuinia nu nekasaiti, tiarmiyai tura chíkichkia Jesusa akatramurí tuinia nu nekasaiti, tiarmiyai. <sup>5</sup>Tura nuyá Israer-shuarchajai Israer-shuarka chichasar pepru uuntrijiai chichasarmiyai. Tura Papru Pirnapíjiai katsekkar tura kayajai tukurar, yajauch awajsatniun nankamawarmiyai. <sup>6</sup>Túrasha Papru

Pirnapíjiai nuna anturmamkar, Ristra péprunam wearmiyai. Nuyasha Tirpi péprunam wearmiyai. Nu péprusha mai Rikiaunia nunkanam pujuiniawai. <sup>7</sup>Tura Yus-Chichaman etserkarmiyai.

#### Ristra péprunam Páprun kayajai tukurarmiania nu

<sup>8</sup>Ristra péprunam tunamaru áishman pujumiyai. Ni akiiniamuriya tuke wekaichauyayi. <sup>9</sup>Nú áishman Papru chichaamun antúu pujumiyai. Túman Papru úmamkemas nin ísmiyai. Ni-isha, Yusa kakarmarijiai tsuamartatjai, tu enentáimiun Papru nekaamiyai. <sup>10</sup>Tura Pápruka kakantar chicharuk “Wajakim wewe ajasam wajasta” tímiyai. Tutai áishman wiut kutsuar wajakí wekaimiyai. <sup>11</sup>Papru túramia nuna aents wáinkiar Rikiaunia chichamjai unsumainiak “Yuska áishmanka ánin ajasaru in tarutramarji” tiarmiyai.

<sup>12</sup>Pirnapínkia, Júpitir náartin yúsaiti, tiarmiyai. Tura Páprunka, Mirkiuriu náartin yúsaiti, tiarmiyai. Pápruka chichau asamtai tu anaikiarmiyai. <sup>13</sup>Nú pepru jeamunam Júpitir náartin yusa jeen pujumiyai. Tura Júpitir náartin yusa pátrirí kukujín iwiarkamun, wáakajai itiamiyai. Tura niisha ní áentsrijiai wáakan maatai tusar pujuarmiyai. Tura tikishmatrar ajamsatai, tiarmiyai. <sup>14</sup>Tura Jesusa akatramurí Pirnapísha Páprusha nuna nekaawar, auka nakitijai tusar, ní pushirín jaararmiyai. Túrawar aents írunmanum pachiniawarmiyai. <sup>15</sup>Tura tiarmiyai “Shuara, ¿urukamtai áitkiarum? Iisha yúschaitji. Atumea áankiitji, tiarmiyai. Penké ántrarum túrarmena nu ikiukrum, nekas Yus nemarsatarum tusar iisha taji. Nekas Yuska nayaimpincha, nunkancha, nayaantsanacha, tura ashí nú írunna nunasha najanaiti, tiarmiyai. <sup>16</sup>Jes, aents ní enentáimmarijiai

wekasarat tusa Yuska yaunchu tsan̄katkamiayi. <sup>17</sup>Tuma ain̄ shuaran péñker awajsamujaī Wiitjaī Nekas Yus tusa paant awajmamsamiayi. Kame yumi yutuktinian̄ nayaimpinmayā akupturmaji. Tura ejemamar warasarmī tusa yurumak nerektinniasha súrarn̄ji” tímiayi.

<sup>18</sup>Túrasha Pápruka tímiyanu támaitiat, nuna anturtsuk wáakan maawar nin tikishmatrar ajamsataitsa wakeriarma nuna suritkiachminiak suritkiarmiayi nu áentsun.

<sup>19</sup>Tura nuyá Antiukíanmayā Ikiuniunmayasha Israer-shuar táarmiayi. Taar nuyá áentsun Páprun yajauch awajsatniun enentáimtikrarmiayi. Tú tutai Páprun kayajaī tukurarmiayi. Tura jakayi tiar péprunmayā japiki júkiar arant áepsarmiayi. <sup>20</sup>Túrasha Yus-shuar Páprun tariar téntakarmiayi. Túram nuñkia Papru wajaki wé ataksha péprunam wayamiayi. Tura kashin tsawarar Papru Pirnapíjiaī Tirpi péprunam wearmiayi.

<sup>21</sup>Tírpinium pujusar uwempratin chichaman etserkarmatai untsurí shuar Yúsan umirkarmiayi. Nú shuaran Yus-Chichaman jintintia amuukar Rístranam, Ikiuniunam, Antiukíanmasha wakеткиarmiayi. <sup>22</sup>Waketainiak “ashí Yus tana nu tímiatrusrumek tuke umirkatarum” tuñiak Yus-shuaran ikiakárarmiayi. Tura nin tiarmiayi, “Yusa akupeamurj̄in pachiinkiat̄aj tákurkia ti wáitsatniuit̄ji.” <sup>23</sup>Tura Yus-shuar írunmanum Yus-shuaran wáinniun anaikiarmiayi. Yurumtsuk Yúsan áusjar chicharainiak, “umirkarumna nú Yus iirmasarti” tiar ikiukiarmiayi.

### Yaunchu jíinkiarmla nú Antiukíanam wakеткиarmiayi

<sup>24</sup>Nuyá Pisitia nun̄kanam nan̄kaamakiar Pampiria nun̄kanam

jeawarmiayi. <sup>25</sup>Nuī jeawar Pirji péprunam Yus-Chichaman etserkar nuyá Ataria péprunam wearmiayi. <sup>26</sup>Nuī kanunam enkemprar, yaunchu jíinkiarmla nú Antiukía péprunam wakеткиarmiayi. Páprusha Pirnapísha tuke jíintsain̄ nú Antiukíanmayā Yus-shuar chichainiak, Yusa takatrī túrattarmena nuna Yus waitnentrakam yáinmakarti, tiar akupkarmiayi nuik<sup>1</sup>. <sup>27</sup>Nú Antiukíanam jeawar, Yus-shuaran irurar, ashí Yus nin yáin̄kiarmla nuna ujakarmiayi. Tura nútiks̄an̄ Israer-shuarman Uunt Yus uwemtikrataj tusa untsukmla nunasha ujakarmiayi. <sup>28</sup>Tura nuyá Yus-shuarjaī Papru Pirnapíjiaī núkap tsawant pujusarmiayi.

### Jerusaréñnum Yus-shuara úuntrijjaī iruntrarmiania nu

**15** Nu tsawantin áishman̄ Israer nun̄kanmayā wear, Antiukíanam jeawar Yus-shuaran jintintiainiak “Muisais tímia nútiksarmek tsupirnaktin ana nu túrachkurmek uwemprashtatrumé” tiarmiayi. <sup>2</sup>Tuma asamtai Papru Pirnapíjiaī, núchaiti tusar, nú áishman̄jaī ti kakaram chicharnaikiarmiayi. Túrasha nuu enentáiniak enentáimsatniun tujinkiarmla. Tuma asamtai Antiukíanmayā Yus-shuar Páprun Pirnapíncha, atumsha ch̄k̄kich áentsjaī Jerusaréñnum wétarum tusar akupkarmiayi. “Tura nuí Jesusa akatramurj̄isha Yus-shuaran wáinniusha iniasrum itiumainkit tusarum péñker nekaatarum” tiarmiayi. <sup>3</sup>Papru Pirnapísha akupkamu ásar wéenak Pinisia nun̄kanam, Samaria nun̄kanmasha nan̄kaamainiak Israer-shuarman Yus-shuar ajasman Yus-shuaran ujakarmiayi. Tura Yus-shuarsha nuna antukar ti warasarmiayi.

<sup>4</sup>Tura Páprusha Pirnapísha Jerusarénnum jeawarmatai Jesusa akatramurísha Yus-shuara wánniurísha tura penké Yus-shuarsha itiwarmiayi. Tura niisha túrunamia nuna mash etserkarmiayi. <sup>5</sup>Túrasha Pariséu aencha, Yus-shuar ajasarmiania nu, wajakiar chichainiak “Muisais tsupirnaktinian akupkamia nuna tura nú arant ashí Muisais tímia nunasha Israer-shuarchasha umirkatin ániawai” tiarmiayi. <sup>6</sup>Nuyasha Jesusa akatramurísha Yus-shuaran wánniusha nu chichaman nekaatai tusar iruntrarmiayi. <sup>7</sup>Chichasua umikiarmatai Pítiur wajaki tímiai, “Yatsurtiram, Yus nuik winia chichartak “Israer-shuarchasha winia chichamprun antukar umikiarat ujakarta” tu anaitiukmia nu nékarme. <sup>8</sup>Tura Yus Niŋki ashí aentsu enentáin neka asa, Wíi shuar ajasmin ániawai tusa, ni Wakanin Israer-shuarchanacha susamiayi, in suramsamijá nútiksán. <sup>9</sup>Yus incha aushatka awajtamsachmaji, tímiai. Antsu métekraketji. Tuma asamtai niisha Yúsán enentáimtuiniakui, Yuska enentáiyán ni tunaarín japirarmái, tímiai. <sup>10-11</sup>Tura iikia nékaji niya áantsarik Jesukrístu waitnenkartutairíjiai uwempraitji. Nuínkia çurukamtia Yus uwempraru ániawai taísha, átum Muisais yaunchu akupkamia nu umikiarat tusarum wakerarum? Nu túrakrumka Yus túrana nu jeatsui tarume. Tura nuka kaarka áintsanchakait. Warí, ii úuntrísha tura iisha ashí Muisais tímia nu umiktin tujinkiamji. Tuma asamtai, çurukamtai nú káarkasha Israer-shuarchasha áentskatin wakerarum?” tímiai Pítiur.

<sup>12</sup>Pítiur nuna tutai Pirnapísha Páprusha chichainiak, “Israer-shuarchasha ni kakarmarín nekaawarat tusa aentsti túrachminian túratniun Yuska ti yáinmakmaji” tú ujuam

mitiat wáinkiar antúu pujuarmiayi. <sup>13</sup>Nuna ujasua amikmatai, Jakupusha tímiai “Yatsurú, antuktarum. <sup>14</sup>Nuik túrachman Yus túramia nuna ii yachi Semuñ Pítiur ujatmakji. Júiti: Yuska Israer-shuarcha waitnentak Winia ajasarat tusa chikishtarchiniak achikiuiti” tímiai. <sup>15</sup>Júsha Yúsán etserin yaunchu áarmia nu tímiatrusán túrunayi. Júiti aarma:

<sup>16</sup>“Israer-aents meserar, jea sáanakniua áintsán ániawai. Tura ukunam ataksha tana, Tawitia jeen sáanaki ana nuna, ataksha najanattajai. Juakai nuna achikian ataksha awajrattajai. <sup>17</sup>Ashí nunkanmayá aents, Israer-shuarcha ainia nu, winia náarun pachinia nu, Winia eatarat tusan túrattajai. <sup>18</sup>Uunt Yus nuna yaunchu ujakmiayi.”

Tu áarmaiti’ tímiai.

<sup>19</sup>“Tuma asamtai, yatsurtiram, wi tájarme: Israer-shuarcha Yus-shuar ajasaru áiniana nu, imiatik awajtsachmi. <sup>20-21</sup>Iimiatarum, ashí péprunam Israer-shuar iruntainiam yáunchuyán tuke sáwartin Muisaisa áarmarín jintintiainiatsuk. Tuma asamtai, áyatik áatratai ju “Ántar-yus susamu ana nu iniaisatarum. Ántar-yusan susamu asamtai yajauchiiti. Tura tsanirmawairap. Tura kajemtikramua nu yuawairap. Tura numpasha umairap.” Tu áatratai’ tímiai Jakupu.

<sup>22</sup>Nuyá Jesusa akatramurísha Yus-shuaran wánniusha nuyá ashí Yus-shuaraim enentáimsarmiayi. “Papru Pirnapíjiai wéakui, shuar niijiai nenakar Antiukíanam akupkatai” tiarmiayi. Tuma ásar Jútas Parsapasan, Sérasnasha anaikiarmiayi. Niisha mai uunt Yus-shuar ármiai. <sup>23</sup>Tura niijiai ju papin áarman akupkarmiayi:

“Iisha Jesusa akatramurí tura Yus-shuara wánniurí tura ashí



Yus-shuaraitjinia nu, atumin Israer-shuarcha árumna nu, Antiukíanam, Sírianam, tura Sirisianmasha, ju papí akupeaji. <sup>24</sup>Juyá aents ii chichamejainchu atumijn jeartamarai. Túrawar, tsupirnaktin ana nu, tura ashí Muisais akupkamia nu túratarum, turammiarne. Nunasha ni chichamejain turamarmayi. Nu chicham atumsha antukrum nushá enentáimprarum “entá nuyanka itiurkatjik” tárume. <sup>25</sup>Tuma asamtai nu nekaar, iisha métekrak enentáimsar, jimiará áishman akupkatin anaikiamji. Ju áishman ii aneamu yachi Páprujai Pirnapíjiaisha atumin írmasarat tusar akupeaji. <sup>26</sup>Papru tura Pirnapísha ii Uuntri Jesukrístunam surumakarmiayi, ni takatrishsha tsumai ain túrami tusar. <sup>27</sup>Niijjai Jútassha tura Sérassha akupeaji. Ii chichaajnia nuna niisha ni wenejai atumin ujatmakartatui. <sup>28-29</sup>Kame túratin asamtai iisha Yusa Wakaníjiai ju áartin enentáimsaji. Namañ ántar-yus susamu ana nu yuawairap. Tura numpasha umarairap. Kajentikramu ana nusha yuawairap. Tura penké tsanirmawairap. Nuyasha chíkíchkia nú nankaamas tíchattaji. Tura antsu nu iniaisarmeka, péñker átatrume. Ayu, Yus wáitmakarti.” Tu áarman akupkarmiayi.

<sup>30</sup>Tura Antiukíanam akupkam wearmiayi. Nuí jeawar Yus-shuaran irurar, papin súsarmiayi. <sup>31</sup>Tura Antiukíanmayá Yus-shuarsha nu papin áujсар, péñker jintíamu chichaman áarman wáinkiar, ti shiir enentáim-sarmiayi. <sup>32</sup>Tura Jútassha, Sérassha, ímia niisha Yus-Chichaman etserin ásar, Yus-Chichaman núkap jintintiawar, Yus-shuaran ikiakármarmiayi. <sup>33</sup>Tura

nuí ishichik tsawant pujusarmatai, Yus-shuarka, péñker waketkitiarum, tiar akupkarmiayi. <sup>34</sup>Tura Séras juáktinian wakerukmiayi. <sup>35</sup>Páprusha Pirnapíjiai juakarmiayi Antiukíanam. Niisha chíkích aentsjai Yus-Chichaman étseruk pujuarmiayi.

### **Papru atak Yus-Chichaman ipiampártasa wémiania nu**

<sup>36</sup>Nuyá ukunam Papru tímiayi Pirnapín “Ashí péprunam iisha Yus-Chicham etserkamaj nuí Yusai ii yachi ainia nusha urukák pujuinia iyutai” tímiayi.

<sup>37</sup>Pirnapíkia Juan Márkusan iijjai winiti tusa wakerimiayi. <sup>38</sup>Tura Pampiria nunkanam Juan Márkussha niisháa weu asamtai tura Yusa takatrin iniaisa asamtai, Pápruka ayatniun nakitramiayi. <sup>39</sup>Papru Pirnapíjiai ti kakannairar kanakarmiayi. Tura Pirnapíkia Márkusan ayaki Chípriniam wémiayi. <sup>40</sup>Pápruka Sérasan ayaki wéakui Yús-shuar Yus yáinmakarti tinia akupkarmiayi. <sup>41</sup>Tura Siria nunkanmaani wekaráktak, Yus-shuaran ikiakárkutak Sirisianam jeamiayi.

### **Páprusha Sérasjai Timiutéun júkiarmiania nu**

**16** Papru Sérasjai Tirpi pepu írkitak Rístra péprunam jeawarmiayi. Tura nuí Rístranam Yus-shuaran wáinkarmiayi, ni naari Timiutéu. Ni nukurínkia Israer-shuar Yus-shuarauyayi. Tura ni aparínkia Kriaku áentsuyayi. <sup>2</sup>Tura Rístra péprunmayá Ikiuniu péprunmayasha Yus-shuar ármia nu, Timiutéu péñker wekaawai, tiarmiayi. <sup>3</sup>Kame Pápruka Timiutéun uyuuntusat tusa wakera asa, Timiutéu aparí Kriaku-apachin nekaawarmatai Israer-shuar nuí pujuarmia nu yajauch enentáimprarain tusa tsupirmantikiamiayi. <sup>4</sup>Tura nuyá

Papru Timiutéujai ashí péprunam nuí sétur nuí sétur wéenak Jesusa akatramurisha Yus-shuaran wáinniusa Jerusarénnum nuik jintintian umiktarum tusa ujarkutak wearmiayi. <sup>5</sup>Tu ujamu ásar Yus-shuar nú arant Yúsán enentáimturar kakararmiyai. Tura ashí tsawant kawenki wearmiayi.

### Papru iimiarmia nu

<sup>6</sup>Tura Yusa Wakaníkia Páprun Yus-Chichaman Asia nunkanam ujaktinian tsankatkachmiayi. Tuma asamtai Pirijia nunkanam tura Karasea nunkanam ajrkutak, <sup>7</sup>Misia nunka jeatniunam jeawarmiyai. Túrunawar “Pitinia nunkanam wetai” tiarmiayi. Túrasha Yusa Wakaní nuisha wétinian suritkiarmiayi. <sup>8</sup>Tuma asamtai Misia nunkanam menantki Truas péprunam pachiniawarmiyai. <sup>9</sup>Nuí jeawar Papru kashi iimiarmiyai. Masetúnia nunkanmaya áishmankan wajan wáinmiayi. Nu áishman Páprun chicharuk “Winitritia. Yáintkiamnium” tímiayi. <sup>10</sup>Nuyanka tu iimiarmatai, wisha Páprujai wetai tusar iwiarnarmiyai. Tura Yus incha nú nunkanam ni chichame etserkat tusa ti nekas untsurmakrin wéaji, tímiayi.

### Jiripius Péprunam túrunamia nu

<sup>11</sup>Tura nuyanka kanunam enkemprar Truas péprunmaya jíinkir Samutrásia nunkanam jeamiayi. Tura kashin tsawar nuyanka katjarar Niápuris péprunam jeamiayi. <sup>12</sup>Tura Niápurisnumia náwek Jiripiusnum jeamiayi. Nuí Jiripius péprunmanka Rúmanmaya aents matsamsa ármiayi. Tura nú péprusha Masetúnia nunkanam nekas uunt pepruyayi. Tura nuisha seturmaji. <sup>13</sup>Nuyá sáwartin tsawarmatai pepru ikiukir entsá supichik wémiayi. Yus áujsatniun iruntrarmia nuí pujusar, nuwá iruntrarmia nu Yus-Chicham

ujakarmiyai. <sup>14</sup>Nuí Tiatira péprunmaya nuwá, ni naarí Ritia wáinkiamiyai. Niisha tarach yamakain pénkeran súriniuyayi. Yúsnasha shiir awajniuyayi. Yus-Chichaman Papru etserkamia nuna niisha pénker anturkamiayi. Túman, Uunt Yus Papru chichaamun umirkat tusa ni enentáin takamiayi. <sup>15</sup>Túruna nú nuwá níniurijjai imianmiayi. Tura nuyasha chichaak “Yus-shuar nekas ajasai túrutkurmeke winia jearuí winitiarum” tímiayi. Tura nuí jeawakrin setumtikrampramiayi.

<sup>16</sup>Tura nuyá ukunam Yus aujsatai tusar wekaamar nuwach nekaamin-iwianch enkemtuamu inkunmakmiayi. Nu nuwachikia misatkauyayi. Niisha nékamkui nérenniurisha ti kuitriniawarmiyai. <sup>17</sup>Tura nú nuwach incha Pápruncha pataaturmamiayi. Tura kakantar untsumuk “Ju áishmansha nekas Uunt Yúsán umirkaru áiniawai. Tuma asa niisha atumin uwempratin chichaman ujatmarme” tímiayi. <sup>18</sup>Tura nú nuwachisha ti nukap tsawant tu wekaimiyai. Titmakui, Papru ayanmar iwianchin chicharuk “Jesukristu naarijjai tájame: jíinkitiá ni enentáiya” tímiayi. Tutai íwianchkia nú chichamaik jíinkimiyai.

<sup>19</sup>Tura nuwachi nérenniurisha, íwianch jíiki awematniun nekaawar, Páprun Sérasnasha kajerak achikiar pepru uuntri ísarat tusar ajapén júkiarmiayi. <sup>20</sup>Tura pepru únuntriin ejeniar tiarmiayi “Ju áishman Israer-shuar áiniawai. Tura in páchim enentáimtikramainiayi. <sup>21</sup>Tura iisha Rúmanmaya aents árin, ii túrachminian, iikia asumprachman jintintramainiayi” tiarmiayi. <sup>22</sup>Tura nuyanka ashí aents Páprun Sérasnasha kajerkarmiyai. Túramtai pepru uuntri chichainiak “Pushiri áitkiarum numijjai asutiatarum” tiarmiayi. <sup>23</sup>Tura nuyá ti asutsua amikiar sepunam

enkeawarmiayi. Tura sepú-iinian chicharuk “Ti pé<sup>n</sup>ker iistá pisararain” tiarmiayi. <sup>24</sup>Nu chichaman antuk, sepú-iin ti init awayámiayi, tura nawen numi najanamujai tee chanuntamiayi. Tú tura ikiukmiayi. <sup>25</sup>Tura kashi ajapén Papru Sérasjai Yusan áujainiak kantampriarmiayi. Tura chíkich enkeamusha nuna antúu pujuarmiayi. <sup>26</sup>Tu pujuinijai aya aneachma ti kakantar uurkamiayi. Tura sepusha muchitramiayi. Túrunamtai sepú wáitirisha ashí urantrarmiayi. Tura aents jirujai enkekar jinkiamusha mash atiniakarmiayi. <sup>27</sup>Túrunamtai sepú-iin shintiarimiayi. Tura wáitisha mash uranar aan wáiniak, enkeamusha jiniar shiákchariash tusa ni puniariniak ukuiniak máamattsa pujumiayi. <sup>28</sup>Tura Papru untsuak “Amek yajauch awajmamsaip. Ashí pujuinijai” tímiayi.

<sup>29</sup>Tutai sepú-iincha jinia ekeemak tsékenki wayamiayi. Tura Papru Sérasjai pujamunam kuranki jearmiayi. <sup>30</sup>Tura aa jilki aniasmiayi “Uunta, ¿warí itiurkattaj uwemprataj tusana?” tímiayi. <sup>31</sup>Tutai niisha tiarmiayi “Uunt Jesukrístu nekas enentáimtustá. Túrakmeka amesha, tura áminiurmesha uwemprattarme” tiarmiayi. <sup>32</sup>Tura nuyá ashí ni jeen pujuarmia nunasha Yus-Chichaman ujakarmiayi. <sup>33</sup>Tura tsawant irankajai sepú-iincha Páprun Sérasjai numpamnamurin nijiararmiayi. Túramtai nuyasha sepú-iincha nuarrijijai uchirijijai imianiarimiayi. <sup>34</sup>Túramtai nuyasha ni jeen júkiarmiayi. Tura nuisha ayurawarmiayi. Tura sepú-iincha niiniurijijai Yus-shuar ajasu ásar ti shiir warasarmiayi.

<sup>35</sup>Kashin tsawar pepru uuntri, Páprun Sérasjai akupkata tusar suntaran sepú-iinian akuptukarmiayi. <sup>36</sup>Tura nuyanka sepú-iin Páprun tímiayi “Yamaikia pepru uuntri chichaman akupturmakai, átum wétinian.

Tuma asamtai yamaikia pé<sup>n</sup>kerak jíinkitiarum” tímiayi. <sup>37</sup>Túrasha Papru suntaran chicharuk tímiayi “Warí, iisha Ruma aents árinin, niisha chichaman iwiartsuk ashí shuar íimiainiain asutiámamji. Túrawar sepunam enketmamji. Tura ¿urukamtai yamaikia uu<sup>k</sup> akuptamkataj tusa wakeruinia? Atsá. Antsu uuntcha nin<sup>k</sup>i taar jíirmaktiai” tímiayi.

<sup>38</sup>Tutai suntarsha wakеткиar nuna ujakarmiayi pepru úntrin. Tutai niisha ti ashamkarmiayi Ruma aentsun nekaawar. <sup>39</sup>Túmak ashamainiak Páprun Sérasan weriarimiayi tsankurturtarum titiai tusar. Nuyasha sepunmaya jíikiar “Yamaikia wáitneasrum wetarum” tiarmiayi. <sup>40</sup>Papru Sérasjai nuyá jíinkiar Ritia jeen wearmiayi. Tura Yus-shuaran ikiakárar ikiukiarmiayi.

### Tisarúnikianam charaatum ajarmia nu

**17** Papru Sérassha wéenak Ampipuris péprunam Apurunia péprunmasha nan<sup>k</sup>aamakutak Tisarúnikia péprunam jeawarmiayi. Nuí Israer-shuara iruntai jee ámiayi. <sup>2</sup>Tura Pápruka nuna tuke túrin asa nu jeanam wémiayi. Tura nuisha menaintiu sáwartin Yus-Chichaman paant etsermiayi. <sup>3</sup>Tura Páprusha Yus-Chicham tana tímiatrusan jintintiarimiayi. Tura Krístusha wáitias jákatniuyi, tura nuyasha jakayat nantaktiniuyi, tímiayi. Tura nuyasha chicharuk “Wi Jesusnan atumin ujaajrumna nusha Yusa anaikiamurin Kristu tútain tájarne” tímiayi Papru.

<sup>4</sup>Nuna takui Israer-aents chikishtarchik umikiarmiayi. Túrawar Paprujai Sérasjaisha tsaninkiarimiayi. Tura Kriaku aencha ti untsurí Yúsan umirkarmiayi. Tura nuwa penkeri armia nusha nútksaran umikiarmiayi.

<sup>5</sup>Tura Israer-shuarka Yus-shuar ajascharmia nu, Páprun Sérasnasha suiir ísarmiayi. Túrawar chíkich yajauch áishman naki yujáu armia nujai chichasar nu peprunam charáa charáa ajarmiayi. Tura Páprun Sérasnasha achikiar aentsu úuntrin suruktai tusar Jasunka jeen árenkarmiayi. <sup>6</sup>Túrasha Páprun Sérasnasha awetrar, Jasunkan tura chíkich Yus-shuarnasha achikiar japirkutak júkiarmiayi. Tura pepru úuntriin juńiak tiarmiayi “Ju áishmansha ashí nunkanam charaatum ajá wekarmia nu yamaikia tímiajai tarutramarji. <sup>7</sup>Tura ju Jasun ni jeen itiaarmiayi. Tura niisha ashí mash Rúmanmaya uunt akupniu chichamen nakitiainiawai, tiarmiayi. Tura jes, chíkich akupin awai, tuiniawai. Niisha Jesusaiti, turamainiaji” tiarmiayi. <sup>8</sup>Nu chichaman antukar, aents nujuarmia nu, úuntriimiak charaatum ajarmiayi. <sup>9</sup>Tura Jasun chíkich Yus-shuarjai Papru nekas awemattaji tusar, pajj, kuit ikiuaji, tiarmiayi. Nuna takui pepru uuntri nin akupkarmiayi.

### Piríanam

<sup>10</sup>Nuńkia nú kashi Yus-shuar Páprun Sérasnasha Piría péprunam akupkarmiayi. Tura nuji jeawar Israer-shuar iruntai jeanam wearmiayi. <sup>11</sup>Piríanmaya aentska Tisarúnikianmaya áentsjainkia nankaamas penker enentáinkia ármiai. Tuke enentáijiai Yus-Chichaman ántiarmiayi. Túrawar tuke tsawant imia nińkisha Papru tana nuna nekasashit tusar Yusa papirin ii wearmiayi. <sup>12</sup>Tuma ásar untsurí shuar Yus-shuar ajasarmiayi. Tura Kriaku aents nuwa penkeri armia nusha áishmansha umikiarmiayi. <sup>13</sup>Túrasha Tisarúnikianmaya Israer-shuarka Papru Yus-Chichaman Piría péprunam étserun antukar nuji weriar charaatum awajarmiayi. <sup>14</sup>Túmainiakui Yus-shuar

Páprun áruitsuk nayaantsanam akupkarmiayi. Tura Séraska Timiutéujai nuin Piríanam juakarmiayi. <sup>15</sup>Tura Páprun nemariarmia nu Atenas péprunam nin ejeyarmiayi. Tura niisha waketainiakui, Papru chichaman akatar akupkamiayi, Sérassha Timiutéusha wárik winiartí tusa.

### Atenasnum

<sup>16</sup>Tura Papru Atenas péprunam pujus Sérasnasha Timiutéuncha nákamiayi. Nuji nú péprunam ántar-yus ti írunkui Páprusha kúntuts enentáimmiayi. <sup>17</sup>Tuma asa Israer-shuar iruntai jeanam Israer-shuarjai tura chíkich aents Yúsan enentáimtiarmia nujai chichasmiayi. Tura tuke tsawant pepru ajapén aentsjai inkiunaikiar chichasarmiayi. <sup>18</sup>Nuyá chichaman jintin chíkich naari, ipikiuriu, armia nu, tura chikichcha, ni naari, estuikiu, armia nusha Páprun áujmatsarmiayi. Chikichcha tiarmiayi “Imiá chichamtincha jusha waritram-tajik.” Tura chikichcha tiarmiayi “Yajaya yusnan etserniuchuashit.” Páprusha Jesusa túrunamurin tura aents jakamunmaya nantaktinian étserkui nuna tiarmiayi. <sup>19</sup>Nuyanka aents iruntainiam, naari Ariupaku támanum Páprun júkiarmiayi. Nuisha tuke irunin ármiai. Nuji Páprun aniasarmiayi “Iisha ame yamaram támena nu nekaatai tusar wakeraji, tiarmiayi. <sup>20</sup>Amesha nusháa chicham jintiniaitme. Túmaitkiui ju chichamsha warintiuak tusar nekaatai tusar wakeraji” tiarmiayi. <sup>21</sup>(Atenasnumia aencha tura chíkich nunkanmaya shuar nuji pujuarmia nusha aya yamaram chicham amia nunak ántiarmiayi. Tura aya nunak áujmatiarmiayi.) <sup>22</sup>Nuyanka Papru Ariupakunam ajapén wajaki tímiayi “Atenasnumia áishmantiram, wi nékajai, atumsha atumi yusri ainia nuyá tsurakchamniaitruma, tímiayi. <sup>23</sup>Kame

wi nuik atumí yusrí enentáimututainiam íistaj tukaman nuí jeachin iwíaramun, JU NEKAACHMA YUSNAITI, tu áarman wáinkiamjai. Wátsek, ju Yus átum nékachiatrum tikishmatrumna nuna ujjaktajrume' tímiyai.

<sup>24</sup>Nekaatarum, nu Uunt Yuska ashí nunkan tura nuí írunna nuna najanaiti. Tura Niisha nayaimpin nunkancha nérenniurinti. Tura aents najanamu jeanam nú Yuska pujuchuiti. <sup>25</sup>Niisha aents yáinkiat tusa atsumatsui. Warí, imia-nin̄ki Niisha ii iwiaakmarin, ii mayattairincha tura ashí írunna nunasha súramtsujik, tímiyai.

<sup>26</sup>Nekaatarum. Nuu numpanmayanak ashí áentsun najanamiyai ashí nunkanam matsamsarat tusa. Tura Yuska ii tsawantrin nekapmaiti; ii pujustinniasha nútiksān nakakmiyai.

<sup>27</sup>Winia eátkar wáitkiarat tusa Yus nuna túrayi. Túrasha Yus jeashtaka pujurtamtsuji, tímiyai. <sup>28</sup>Jes, iisha Yusjai iwiaakji. Yusjai muchitiaji. Tura Yusjai ii kakarmari takakji. Nútiksān atumí papí-aintri tíchamka “Ashí incha Yus najatmaitji.” <sup>29</sup>Tura iisha Yus najatma asakrin kuri najanamusha, yúsaiti, tu enentáimsashtinaijti, tímiyai. Tura kuit-yussha, kaya-yussha aents enentáimsar najanamuka, yúsaiti tu enentáimsashtinaijti, tímiyai. <sup>30</sup>Aents Yúsan nékainiachuk túrawarmiania nuna Yuska yáunchuka pachischamiyai. Túrasha yamaikia Yus ashí aentsun chicharuk “Tunaaruminiā enentáimpratarum” túramji, tímiyai.

<sup>31</sup>Yuska áishmankan anaikiaiiti. Nú áishman ashí aentsti, yáki péñkeran túriniait, yáki yajauchin túriniait núnaka nekarmattaji. Nú áishman Yus akupkamun tuke enentáimtakui Yus nin anaikiaiiti. Tura tsawant nú túrunatin átatna nuna Yus Nin̄ki achikiuiti. Túrasha nekas anaikiajai tusa, tura ashí áentstiram nekaatarum

tusa nú áishmankan jakamunmaya iniantkimiyai” tímiyai Papru.

<sup>32</sup>Tura nuna jakamunmaya nantaktinian áujmatun antukar chikichcha wishikiarmiiai. Tura chíkich “Yamaikia máakete. Antsu chíkich tsawantin antukmí” tiarmiiai. <sup>33</sup>Tutai Papru ini-aisamiyai. <sup>34</sup>Tura chíkich aentska Papru táman umikiar nin nemarsarmi-ayi. Nuísha Tiuníseu páchitkiauyayi. Ni-isha Ariupaku áentsuyayi. Tura nuyasha nuwa, ni naari Támaris, tura chíkich aencha nútiksaran nemariarmiiai Páprun.

### Kurintiu péprunam

**18** Nuyanka Papru Atenas péprun ikiuki Kurintiu péprunam wémiyai. <sup>2</sup>Tura nuí Israer-shuaran ni naari Akiran wáinkiamiyai. Akiraka Puntu nunkanam akiiniauyayi. Tura ukunam Itiaria nunkanam pujai uunt akupin Krautiu ashí Israer-shuaran Ruma péprunmaya awemarmiiai. Rúmaka Itiaria nunkanmaiti. Nuí awemamu ásar Akira Kurintiumam nuik támiyai nuwe Pirisirajai. Tura Pápruka Akiran chichastaj tusa werimiyai. <sup>3</sup>Akirasha Páprusha mai juna takau ármiai, tarach ti núparman jea najantain najanin ármiai. Tuma asamtai Papru Akirai seturmiyai nu takat túrawartai tusa. <sup>4</sup>Tura tuke sáwartin Papru Israer-shuar iruntai jean wéuyayi. Nuísha Israer-aentsun Kriaku-aentsnasha nútiksaran Yus-Chichaman ujjakar enentáimtikrarmiiai.

<sup>5</sup>Tura nuyá Séras Timiutéujai Masetúnianmaya táarmatai Pápruka mijiatrutsuk Yus-Chichaman étserek “Yusa anaikiamuri Kristu, atum nákarmana nu Jesusaiti” tímiyai. <sup>6</sup>Tura támaitiat nú chichaman nakitiarmiiai. Túmainiak Páprun katsekkarmiiai. Tuma asamtai Papru,

nuñkia ikuijume tusa, ni pushirin pear tímiayi “Atumek makuumarme. Tura wikia Yusaj makuumatsjai. Yamaikia Israer-shuarcha ainia nuna Yus-Chichaman ujakartaj tusan werajai” tímiayi.

<sup>7</sup>Tura nuyanka Israer-shuar iruntai jeanmaya jiiñki, Yúsan enentáimtin áishman Justu jeen wémiayi. Ni jeenka Israer-shuara iruntai jeen ayamach pujumiayi. <sup>8</sup>Israer-shuar iruntai jea chicharniuri, Krispu, Uunt Jesusan nekas enentáimturmiayi. Túruna nuarijjai uchirijjaisha Yúsan umirkamiayi. Tura chíkich aencha Kurintiunmaya armia nu nútiksaran Yus-Chichaman antukar, Jesusan enentáimtusar imianiarmiayi.

<sup>9-10</sup>Nuyá Uunt Yus Páprun mesekran ipiatkamiayi. Chicharuk “Penké ímiatik awajtamsachartatui Wi ámijjai pujakui. Ju péprunmasha untsurí aents Winia ajasartin írunui. Tuma asamtai ashamt-suk winia chichamur tuke etserkata” tímiayi Yus.

<sup>11</sup>Tura nuñ Kurintiu peprunam jimiara uwí ejesattuk Yus-Chichaman étseruk pujumiayi. <sup>12</sup>Tura Kariun, Akaya nunka akupniuri anaikiamu aj, Israer-aents Páprun kajerkarmiayi. Tura kajerainiak akupniunam irunturarmiayi. Túravar Páprun júkiar ejeniarmiayi. <sup>13</sup>Tu túravar akupniun chicharainiak “Ju áishman Yúsan umirkatniun Muisais akupkamia núnaka íkias ausháa jintiawai” tiarmiayi. <sup>14</sup>Tura Páprusha chichastaj táunak, Kariunka Israer-shuaran tímiayi “Jusha nekas tunáa túrakuñkia, tura akupniun umirchakuñkia, tárumna nuna anturkaintjarme. <sup>15</sup>Túrasha aya chichamnak tura aya náariniak atumí uuntri akupkamia nunak tau asamtai, atumek nuámtak íistarum tájarme. Wikia nu chichamnum pachinkiatniun nakitiajai” tímiayi. <sup>16</sup>Taku aa

jíikmiayi. <sup>17</sup>Tura nuyanka Kriaku aents Israer-shuar iruntai jea úuntrin Sústinisian achikiar awatiarmiayi akupniusha íimmianuman. Túrasha akupin Kariunka túranak penké pachischamiayi.

**Papru Antiukíanam waketki,  
nuyá atak Yus-Chichaman  
ipiampartasa wémiania nu**

<sup>18</sup>Tura ni jeen wakеткиarmatai, Papru nu péprunam untsurí tsawant pujusmi-ayi. Tura nuyasha ukunam Yusaj yachi ármiania nuna áujas ikuiak Piriśirajai ni aishri Akirajai Senkrea péprunam wearmiayi. Nuñ Israer-shuar túrutain umiák Papru ni intiashin awamprami-ayi, nuik Yúsan tímiay nuna yamá umiájai tusa. Nuñkia kanunam enkem-prarmiayi Siria nunkanam wakеткиtai tusar. <sup>19</sup>Tura nuyá Ipiśiu péprunam jeawar Pápruka Piriśiran tura Akiran ikiukmiayi. Tura Israer-shuar iruntai jeanam wayá Israer-shuar irunar pujuarmia nujai chichasmiayi. <sup>20</sup>Tura ni-isha Páprun juñ pujustá tusar seawarmiayi. Túrasha támaitiat, tujintiajai, tímiayi. <sup>21</sup>Nuyanka áujas ikuiak “Wisha Jerusarénum námper átatna nuna pachintiuktiniaitjai. Tura Yus akuptakuñkia atak tatajai atumin íistaj tusan” tímiayi. Tura kanunam enkemar Ipiśiunmaya jiiñkimiayi.

<sup>22</sup>Nuyá Pápruka Sesaria péprunam jeá, nuyanka Jerusarénum wémiayi, Yus-shuaran nuñ áujasataj tusa. Tura nuyá Antiukíanam wémiayi. <sup>23</sup>Tura Antiukíanam ishichik pujus ataksha weak Karasea nunkanam tura Piriśia nunkanmaani wekaráktak wémiayi. Tura weak Yus-shuar matsamarmia nuna chicharak ikiakármarmiayi.

<sup>24</sup>Tumáa pujai Arijiántria péprunmaya Israer-aents Apurus Ipiśiu péprunam jeamiayi. Niisha Yusa yaunchu papirin ti penker nekaamiayi.

Etserkatniuncha ti nékauyayi. <sup>25</sup>Uunt Yus tímia nunasha unuimiátrauyayi. Tura tuke enentáijjaj chichasmiayi. Jesusa túramurj̄n pēnker jintinniuyayi. Túrasha aya Juan̄ imiakratmanak nekaamiayi. <sup>26</sup>Jū Apurus arantutsuk Israer-shuar iruntai jeanam chichamiayi. Tura Pirisífra Akirajaj̄ ni étserman anturkar, nincha akanki júkiar Yusa chichamen̄ ni nekaachmia nuna núkap jintintrarmiayi.

<sup>27</sup>Nuyá ukunam Apurus, Akaya nunkanam wétaj takui, Ipiasiunmaya Yus-shuar yáin̄kiar papí árar atakas akupkarmiayi. Nú áentsnum pēnkerak jeat tusar túrawarmiayi. Tura Akayanam jeá, nú áentsun Yusa waitnenkratairijjaj̄ uwempraru ármia nuna ti yáin̄karmiayi. <sup>28</sup>Tura Apurus Israer-aentsjaj̄ paant chichasmiayi. Túrasha Yusa Papirijjaj̄, Jesussha nekas Yusa anaikiamur̄inti tusa paant jintiák nincha nupetkamiayi.

### Papru Ipiasiunam jeamiayi

**19** Tura Apuraska Kurintiumam pujaj̄ Pápruka náinniumaani wekaráktak, Ipiasiunam jeamiayi. Tura nuisha Yus-shuaran wáinkiamiayi. <sup>2</sup>Tura aniasmiayi “Atumsha Yus-shuar ajasmarmena nū, ¿Yusa Wakaní atumí enentáin̄ en̄kemturmakaitrum?”

Tutai niisha tiarmiayi “Átsá. Iikia nuka pēnke áyatkisha ántichuitji Yusa Wakaní awai támaka” tiarmiayi.

<sup>3</sup>Tutai Papru aniasmiayi “Entá, ¿nuikia atumsha warí enentáimsarmeá imianmiarum?” tímiayi.

Tutai niisha tiarmiayi “Juan̄ jintintra-mamaj̄ nu iisha enentáimsar imianmij̄” tiarmiayi.

<sup>4</sup>Tutai Papru tímiayi “Juan̄sha, tunaarminiá enentáimprarum imiantiarum, tíchamka. Nuyá tíchamka, winia ukurūj̄ winittiana nu nekas enentáimtustarum. Niisha Jesus Yusa

anaikiamur̄inti, tu ujatmakchamka” tímiayi Papru.

<sup>5</sup>Nuna antukar niisha Uunt Jesusa náarin̄ enentáimtusar ataksháa imianriarmiayi. <sup>6</sup>Tura Papru ni uwejejaj̄ nin antiñmatai Yusa Wakaní tarurarmiayi. Túram chíkich chichamjaj̄ chichasarmiayi. Túrunawar Yus-Chichaman etseriarmiayi. <sup>7</sup>Nusha tuse (12) áishman̄ ármiai.

<sup>8</sup>Tura nuisha menaintiu nantutin Papru Israer-shuar iruntai jeanam werí Yusa akupeamur̄in pachis arantutsuk etsermiayi. Túrak nú áentsun ujaak Yúsnan nekasaiti tu enentáimtikrarmiayi. <sup>9</sup>Tura chíkichka ni enentáin̄ ti ikiatsuáarmiayi. Túrunawar umiktinian pēnké nakitiainia ásar aents ántamunam Yusa jintin̄ pēnké yajauch chicharkarmiayi. Tuma asamtai Papru Yus-shuarnaka akanki yaruak Tiranu iskuirariin̄ tuke tsawant Yus-Chichaman ujaarmiayi. <sup>10</sup>Nuna túruki jimiará uwí etserkamiayi. Túramu asamtai ashí Asia nunkanmaya aents Israer-shuar tura Israer-shuarcha Uunt Jesusa túramur̄in antukarmiayi. <sup>11</sup>Tura aentsti túrachminian túrat tusa Yuska ni kakarmarin̄ Páprun susamiayi. <sup>12</sup>Jáanchniasha pushincha Papru antiñman júkiar, nānkamas jaa shuaran ejetim, nú jaa shuarsha nuna antiñkiar pēnker ajaarmiayi. Iwianchrुकusha nuna antiñkiar, íwianch jíinkimtai an̄kant ajaarmiayi.

<sup>13</sup>Tura chíkich Israer-aents uwishin ármiai. Tura niisha chíkich chíkich péprunam wear iwianchrुकun iwianchrin̄ j̄irki akuptin ármiai. Tuma asa niisha Jesusa náarijaj̄ iwianchin̄ j̄iiktiai tusar, iwianchin̄ chichartuiniak “Nu Jesus Papru ujaana nuna náarijaj̄ jíinkitiarum tájarne” tiarmiayi. <sup>14</sup>Tura Israer Patri uuntri Esewia náartin̄, siati uchir̄i ármia nu, nuna túriarmiayi. <sup>15</sup>Túrasha Jesusa

náarijiaí jíinkitia, tuiniakui, iwianchcha tímiayi “Jesusnaka nékajai. Tura Pápruncha nékajai. Tura atumsha, ¿yátsukaitrum?” tímiayi. <sup>16</sup>Nuna tinia iwianchruku áishman tsékenki nú áishman kan kakaram katsumak nupetkarmiayi. Túram ti katsumam niisha misú tura numpam nawar jíinkiar pisarmiayi. <sup>17</sup>Nusha Ipi siu péprunam túrunamiayi. Túrunam tai Ipi siu péprunmaya Israer-shuarsha tura Israer-shuar chasha nuna túrunamun nekaawar ti ashankarmiayi. Tura Uunt Jesusa náarin shiir awajsarmiayi.

<sup>18</sup>Túmainiai untsurí shuar Yús an umirkaru Yus-shuar ajatsuk tunáa túrawarmia nuna paant ujakarmiayi. <sup>19</sup>Tura untsurí uwishni umawarmia nu, wawe kratai papí ármia nuna itiar miayi. Itiar, júka iniaiyaji tusar, ashí íimiainia in áesawarmia. Nú papí áesawarmia nuna kuítrisha senkuenta mir (50.000) nan kaamasauyayi. <sup>20</sup>Tu túrunam tai Uunt Yusa chichame pampanki tura nupetmaki wémiayi.

<sup>21</sup>Tuma asam tai nuyasha Pápruka Masetúnia nun kanam Akaya nun kanmasha irautjai tu enentáim samiaiyi. Tura nuyasha Jerusarénum waketkitjai, tímiayi. Tura nuyá ukunam Ruma péprunmasha wetajai, tu enentáim samiaiyi. <sup>22</sup>Masetúnia wétin asa Papru ni tsaniakmarin Masetúnia nun kanam emka akupkamiayi. Timiutéun Erastujai akupkarmiayi. Tura ninkia Asia nun kanam setur miayi.

### **Ipi siunam ti charaatum ámiania nu**

<sup>23</sup>Pápruka tuke Ipi siunam pujái, nuyá aents Yus-Chichaman nakitia iniaik charaatum ajarmiayi. <sup>24</sup>Iis, nu i Ipi siunam kaya-yusa jee ámiayi. Nu yus núwayuyayi, Tiana naartin. Tura áishman, Timitriu naartin, nú jean nakumak uchichin najanniuuyayi kuitjai. Tura niisha nú takatjai ti kuítrintin

ajasmiaiyi. Tura chíkich áishman nú takatan takarmia nunasha ti kuítrintin awajsarmiayi. <sup>25</sup>Timitriusha niijiai takarmia nuna ikiaanak, chíkichnasha niijiai métek-taku takarmia nunasha ikiaanak niijiai charaatum ajarmiayi. Timitriusha tímiayi “Winia írutramutiram antuktarum. Iisha ju takat takaajnia jujai ti kuit achíatsjik. <sup>26</sup>Tura atumsha ju Papru wáintrumna nu tura ántarmena nu chíchaak “Ashí aents najanam uyska ántar ániawai” tatsuk. Nuna tau asa, ju i Ipi siunam, tura arant ashí Asia nun kanam, ni yúsrin iniaisarat tusa enentáim tikrarai. Tuma asam tai untsurí aents, ii yusrí Tiánan ikiuiniak, Papru tana nuna umirainiatsuk. <sup>27</sup>Papru tu étserkui, iisha itiu rchat pujuschattajik. Kuit ii achiaj nuka menkakashatuak. Tura nú arantcha ii yusrí Tiana jee shuar iniaisachartatuak. Tura nuyá Asia nun kanmayasha tura ashí nun kanmaya aencha, ii yusrí Tiana shiir awajainia nuna yapajíawar aun nakitrachartatuak” tímiayi Timitriu.

<sup>28</sup>Nuna antukar aencha ti kajekar charaatum ajarmiayi. Túmainiak “Ipi siu shuartikia, aya Tianak wakeraji” tu untsummiarmiayi.

<sup>29</sup>Nuinkia aents páchim enentáim prarmiayi. Túmainiak Masetúniamaya Kayuncha Aristárkuncha Páprun nemanin ármia nuna achikiar japirkutak iruntai jeanam júkiarmiayi. <sup>30</sup>Tura Pápruka iruntai jeanam wayá chíchastaj taun, nuyá Yus-shuar ármia nu, nuna suritkiarmiayi. <sup>31</sup>Tura Asia nun kanmaya uuntri, Páprun amikri ásar, ain kía wayawain tusar chíchaman akuptukarmiayi. <sup>32</sup>Túrusha irunar pujuarmia nu, páchim enentáim prar, chíkichka nusháa untsummiarmiayi. Tura chíkichcha nútiksaran ausháa untsummiarmiayi. Tura chíkichka ti untsurí, nekaachar “wariniak



irunturara” tiarmiayi. <sup>33</sup>Chíkich nuí wajarmia nu charaatum amia nuna Israer-shuaran Arejántrun jintintrar eem shitiawarmiayi. Arejántrusha Kayun tura Aristárkuncha ayampruktinian wakerak takamatsatarum tusa uwején takuimiayi. <sup>34</sup>Túrasha aents iruntrarmia nu, júka Israer-shuaraiti tusa nekaawar, nú arant charaatum ajainiak “Ipiisu shuartikia aya Tianak wakeraji” ímia-imiatainiakua tí nukap pujursarmiayi.

<sup>35</sup>Ipiisu pepru papí-aintri<sup>sha</sup> áentsun itiatmantik tímiayi “Ipiisu shuártiram antuktaram. Ii uunt yusri Tiana jee íistinia íchukaitiaj<sup>i</sup>. Tura ni nakumkamuri<sup>sha</sup> nayaimpinmaya iniarmiania nusha íschatniukaitiaj<sup>i</sup>. Tura nunasha ashí aents paant nékainiatsuk, tímiayi. <sup>36</sup>Warí, núnaka ashí aents nékainia asamtai atumsha itiatkatarum. Túrarum enentáimtsuk yajauch túrawairap, tímiayi. <sup>37</sup>Íimiatarum. Jú áishman átum itiarumna nu, ii yúsri<sup>n</sup> yajauch chicharkacharai. Tura ni jee<sup>n</sup> yajauch awajsacharai. <sup>38</sup>Wats, Timitriu tura níjjai<sup>i</sup> takainiana nu tunáa túramun ujaktai tusar wakeruiniakka pepru penker<sup>i</sup>n werishtinkiait. Nuínkia máimtek iwaiiniakartí. <sup>39</sup>Tura chíkich chicham ákuínkia penker iruntrarum iwaratarum. <sup>40</sup>Kame jú yamáí túrunamun nekaawar Rúmanmaya kapitíán “Ii uunt kapitíántri<sup>i</sup> yajauch awajsatai tusarum túrachurmeash” turamchatj<sup>i</sup>ash. Warí, niisha “¿Urukantai charaatum ajarum?” takuisha, áimkiatin penké tujinkiat<sup>t</sup>aji” tímiayi. <sup>41</sup>Tura papí-aint nuna tuasua amik “Áukete. Wétarum” tímiayi.

### **Papru Masetúnia nunkanam Krisia nunkanmasha wémiania nu**

**20** Charaatum ajasua amikiarmatai Papru Yus-shuaran untuk

Yusnan jintintrataj tusa ikiaankarmiayi. Tura áujas ikiuki Masetúnianam wémiayi. <sup>2</sup>Nú nunkanam wekaráktak, Yus-shuaran jintintrar ikiakáarmiayi. Tura nuyasha Krisia nunkanam jeamiayi. <sup>3</sup>Nuí menaintiu nántuk pujusmiayi. Tura nuyanka kanujai Siria nunkanam wétasa pujus Israer-shuar chícham jurusman anturmamak “antsu nunkan Masetúnianmaan<sup>i</sup> wetajai” tímiayi. <sup>4</sup>Tura Piríanmaya áishman Súpater naartin Páprun atamprimiayi. Tura Tisarúnikianmaya Aristárkusha Sekuntusha Tírpimaya Kayusha Timiutéusha Asianmaya Tíkikiusha, Trújimiusha ashí nu shuar Jiripius peprunam Páprun atampriarmiayi. <sup>5</sup>Túrawar niisha emki wear Trúas péprunam jeawarmiayi. <sup>6</sup>Tura iisha wakapruachu tanta yutai jisat amuukantai, iisha Jiripius péprunmaya jíinkir, kanunam enkemprar Masetúnia nunkanmaya jíinkimji. Tura senku tsawant nankaamasmanum emki wearmia nu amaiyan<sup>k</sup>armiaji Trúasnum. Tura nuísha siati tsawant pujusarmiayi.

### **Trúas péprunam túrunamia nu**

<sup>7</sup>Tura tumi<sup>n</sup>tin kíarai Jesukrístu enentáimtusar yurumátaí tusar iruntrarmiaji. Tura Papru Yus-shuaran jintintramiayi. Kame Pápruka kashinkia wétin asa chichaa-chichaakua kashi ajapén<sup>n</sup> ejemiayi. <sup>8</sup>Tura yakí menaintiu pátaranam, tesaamu ámia nuí iruntrarmiaji. Nuísha ji ekemarma untsurí irunmiayi. <sup>9</sup>Tura nuísha natsa Eutikiu, áan<sup>k</sup>amunam ayamas pujusmiayi. Tura Papru ti esaram chichaakui nu nátsasha kari pujumiayi. Tumáa pujus kanaki yakí pátanmaya akaiki iniaamiayi. Tura penké jakan júsarmiayi. <sup>10</sup>Tura Papru akaatuki tsuntsumpurua miniakkamiayi. Tura Yus-shuaran

chicharainiak “Ashamkairap. Ataksha iwiaakui” tímiayi. <sup>11</sup>Nuyá ataksha Papru wakamiayi. Tura tantan puukar yurumáwarmatai, tuke chichaa-chichaakua tsawantmarmiayi Papru. <sup>12</sup>Eutikiuncha iwiaakun ni jeen júkiarmiayi. Tura ashí aents shiir enentáimsarmiayi.

### Miritiunam wearmiayi

<sup>13</sup>Wats, Papru Asun péprunam nunkan we jeatajtsa wakerimiayi. Tura incha, átumka kanunam wétarum, turamkurin, iikia emkir wémaji Asunnum. <sup>14</sup>Nui Asunnum inkiunaikiar, Páprusha kanunam enkemprantai, Mitiríniniam jeamji. <sup>15</sup>Tura nuyá jíinkir, kashin tsawarar Sámus péprunam jeamji. Tura nuyanka Trujiriunam jear ayampramji. Nuyasha kashin tsawarar Miritiunam jeamji. <sup>16</sup>Pápruka Jerusarénnum wari wétajtsa wakerimiayi, pintikiustís naartin jístatin pachiinkiataj tusa. Tuma asamtai, Asia nunkanam ti núkap pujustinian nakitiak “Ipsiunam wéhattajai” tímiayi.

### Papru Ipsiunmaya úuntrin áujsamiania nu

<sup>17</sup>Túrasha Papru tuke Miritiunam pujus, Ipsiunmaya Yus-shuara úuntrin winitiarum tusa untsukarmiayi. <sup>18</sup>Ni taarmatai Papru tímiayi “Atumsha wi Asia nunkanam pujusan itiura túraj nu nékarme. <sup>19</sup>Atumjai tuke tsawant pujumaj nui, nankaamantuchu enentáimtumasana, úutchim winia Úuntrun takatrin takasmiajai. Tura Israer-shuar yajauch awajtustinian wakerutainiajn tuke takasmiajai. <sup>20</sup>Ashí pénger ana nu nekaatarum tusan mijiatrutsuk jintintiamjarme. Iruntramarmena nui tura ankant ankant atumí jeen pujumarmena nuisha Yus-Chichaman ujakmajrume, tímiayi. <sup>21</sup>Tura Israer-shuarnasha

Israer-shuarchancha nútiksanak, enentai yapajiarum Uunt Jesukrístu umirkatarum, tímiajrume. <sup>22</sup>Tura yamá Jerusarénnum wéajai, Yusa Wakaní túrutkui. Nuisha túrunatana nunasha nekamatsuk wéajai. <sup>23</sup>Tura Yusa Wakaní iniakturkui juna nékajai, ashí pepru wi jeattajna nui enketátai tusar nákarainiawai. Tura ti wáitsatniun nekapsattajai. <sup>24</sup>Kame wikia jákashtajash. Túrasha warí winia itiurtawa. Wikia Yusa jintiin warasan wekasataj tusan wakerajai. Yusaj wea-wéakuan jáakun iniaisataj tajai. Tura nuyá takatan Uunt Jesus surusmia nuna pénger amuktaj tusan wakerajai. Jes, Jesus chichartak “Yus wáitnenkartana nú chicham etserkata” turutchamka’ tímiayi.

<sup>25</sup>“Tura, yatsurtiram, ashí Yúsna atumin paant ujakjarme. Yamaikia wíniaka atakka wáitkiashtatrome. <sup>26-27</sup>Nekaatarum, ashí Yusa wakeramurin wisha penké úurtsuk ujakjarme. Tuma asamtai atumin títiajtsan wakerajrume, chikichík shuara wakaní jinium wéakuisha wikia penké makuumashtatjai. <sup>28</sup>Tuma asamtai emka atumek ímiastarum. Túrurum nuyá chíkich Yus-shuar íistarum. Yus-shuaran wáinin ajastarum tusa, Yusa Wakaní achirmakurme. Yus-shuar ainia núnaka ni numpejain Uunt Jesus sumakchakait. <sup>29</sup>Kame wi wématai, chíkich táartatui. Núnaka nékajai. Tura niisha, Yus-shuaran amukartajtsa wakeriartatui, uunt yawasha murikiun amuinia áintsan. <sup>30</sup>Túrasha nemartusarat tusar wakeru- iniak atumijinajn wait chichaman unuikiartin wantinkartatui. <sup>31</sup>Tuma asamtai yatsurtiram, aneartarum. Wisha menaintiú uwitin tsawajsha káshisha úutchim ankant ankant unuiniamajrumna nu kajinmatkiirap’ tímiayi.

<sup>32</sup>‘Pai, yamaikia, yatsuru, Yus yáinmakarti. Yusa anenkrattairi nékaitrumna nú chichamsha kakarmaiti. Nú chicham átum katsuarar kakaram wekasatniun yainmakarti. Kame nú chicham atumi enentáin pujakui, Yus ni shuarin matsamsatniun anajmatramia nuí pachiinkiatarme. <sup>33</sup>Wats, wisha chikichkí shuara kuítrín wariríncha wakerutkachuitjai. <sup>34</sup>Antsu winia uwejruijai takasan wi atsummiaj nuna sumarmakmajai. Tura winia írútkamuru atsumamuríncha wiki sumakmiajai. Nuka paant nékarme. <sup>35</sup>Kame átum takasrum, atsumainia nusha yáin tarum tusan jintintiajrume. Wats, Uunt Jesusa chichame enentáinsami. “Achiana nujáinkia nankaamas, súana nuka shiir waraawai” tíchamka” tímiayi.

<sup>36</sup>Nuna tuasua amik Papru tikish-marmiyai. Tura ashí niijíjai iruntrarmia nú shuar Yúsan áujarmiyai. <sup>37-38</sup>Tura Papru nuik chichaak “Atakka wáitkiash-tatrume” tiniu asamtai, ti kúntuts pujuiniak, úutchim Páprun miniaksarmiyai. Túrawar kanunam ejeniarmiyai.

### Papru Jerusarénnun wémiania nu

**21** Tura nuyá Yus-shuar aujsa ikiukir kanunam enkempramji. Tura ínkiuasmak Kus péprunam jeamji. Tura kashin tsawarar Rútas péprunam jeamji. Tura nuyánka Patara péprunam jeamji. <sup>2</sup>Tura nuí Pataranam pujusar, chíkich kanu Pinisia péprunam wea wáinkiamji. Túmakui nuí enkemprar wémaji. <sup>3</sup>Nuí wésar Chipri nunakaka wáinkiamji. Chíprikia menanmaani aa ikiuakur Sírianam jeamji. Kánuka Tíru péprunam jeá pujustiniuyi, káarak núkap ikiuktin akui. Tuma asamtai iisha Tírunam jear kanunmaya jíinkir péprunam wayamji. <sup>4</sup>Nuí Yus-shuar wáinkiar nuin siati tsawant pujusamji. Tura Yus-shuaran Yusa Wakaní ujakam Páprun chicharainiak “Jerusarénnunka

wéchatniuitme” tiarmiayi. <sup>5</sup>Tura siati tsawant nankaamasmatai jíinkimji. Ashí Yus-shuar ármia nu núwentuk uchirtiuk nemartamkamji, péprunam iniankatmaktiai tusar. Káanmatkanam jear tikishmarar Yus áujsamji. <sup>6</sup>Tura nu amikiar nuinkia áujnaisar ikiukiarmaji. Tura iikia kanunam enkemprakin ninkia ni jeen waketkiarmiyai.

<sup>7</sup>Iisha Tirunmaya entsak wea-wéakuar Turumáitianam nuin jíinframji. Tura nuí jearsha Yusá yachí ármia nu chichasar nuin chikichkí tsawant pujusamji. <sup>8</sup>Kashin tsawarar nuyá jíinkir nunkan weri Sesaria péprunam jeamji. Nuí Jiripi jeen jear pujusamji. Jiripikia Yus-Chichaman etserniuyayi. Nuik Jerusarénnun siati áishmankan Yusa takatrin wáinkiarat tusar anaikiarmia nú Jiripiiti. <sup>9</sup>Jiripisha kuaru nawantrin yarumkauyayi nuatnakchan. Niisha Yusa chichamen etserin ármiyai. <sup>10</sup>Tura iisha Jiripi jeen wárum tsawantak pujarin Jutía nunkanmaya aents Yusa etserniuri, Akapu náartin támiayi. <sup>11</sup>Niisha taa Papru emenmamkarin achikmiayi. Tura achik ninki ni nawen tura uwejéncha jinikiamamiayi. Nuna tura tímiayi “Yusa Wakaní tawai, juna emenmamka nérenniurin Israer-aents jútikia jinikiáwar Israer-shuarchanum surukartatui, tawai” tímiayi. <sup>12</sup>Iisha nu antukar Papru tímiayi “Jerusarénnunka weep.” Sesarianmaya Yus-shuarsha núnisan Páprun tiarmiayi. <sup>13</sup>Tutai Papru tímiayi “¿Urukamtai útkuram winia enentáiruí kúntuts awajtarum? tímiayi. Wi Jesusna asamtai Jerusarénnun jinikiataniakuisha mántuiniakuisha ashamatsjai” tímiayi. <sup>14</sup>Tura iisha Papru emetatai tukamar tujinkiar “wats, nuinkia Uunt Yus wakera nu tímianak atí” tiarmaji.

<sup>15</sup>Nu tiri iniisar iwiarnarar Jerusarénnun wémaji. <sup>16</sup>Chíprinmaya

yaunchu Yus-shuar Manasun ni jeen Jerusarenum takakuya nuna ikiatmastinian wakerimiayi. Tuma asantai Sesarianmaya ishichik Yus-shuar nemartamainiak Manasun nasha júkiarmiayi.

### **Papru Jakupu jeen irastajtsa wémiania nu**

<sup>17</sup>Tura iisha Jerusarenum jeawakrin, nu warasar Yus-shuar ti shiir áujtamsarmiayi. <sup>18</sup>Tura kashin tsawar Papru ímiak Jakupu jeen wémiaji. Nuisha Yus-shuara uuntri matsamarmiayi. <sup>19</sup>Páprusha áujas amik, Israer-shuarchanum ni étsermajai Yus túramia nuna yámankamtaikniumia júki chikichkimas ujakar ujakar awajsamiaji. <sup>20</sup>Papru taman antukar “Yus ti péñkerchakait” tiarmiayi. Tura Páprun ju chichaman tiarmiayi “Támena nu péñkeraiti, yatsurú, túrasha Israer-shuar timiá untsurí Yus-shuar ajasu áiniayat, “ashí Muisais akupkama nu umiktiniatji” tuiniawai. <sup>21</sup>Nú arant yajaya aents taar, chichar-tamainiak “Pápruka nusháa jintintui, turamainiawai. Israer-shuar chikich nunkanam pujuinia nuna Muisaisa akupkamurí umirkashtin Pápruka jintintui, turamainiawai. Israer-shuarti tsupirnaktin ana nu túrashtinian tura ashí Israer-shuar túrutai iniaisatniun Papru imia Israer-shuaran jintintui, turamainiawai.” <sup>22</sup>Wátek, yatsuru, nuñkia itiumainkit. Ame tátintrumin aents nekaawarka juí kajertamainiak káutramkachartatuak. <sup>23</sup>Wats, antsu nuñkia, ju túrata yatsuru. Juí kuaru áishman Yúsan yaunchu tiarmia nuna umiktasa pujuiniawai. <sup>24</sup>Nii júkiarta. Túram niisha Muisais akupkama nuna umikar nijiaamainiakui, amesha nijiaamarta. Núnismek kuftniasha ni susatin ana nu amesha akikmatkarta. Niisha ashí umikiarmatai, ni intiashin

awampratin áchattawak. Nu áishmanka intiashin awampran Israer-aents wáinkiar, anturtamkarainia nu, nekaschaiti, turamartatui. Antsu, Pápruka Muisais akupkama tímianak túrawai, turamartatui. <sup>25</sup>Túrasha yatsuru, nekaata, Israer-shuarcha Yus-shuarka papí yaunchu akuptukmiaji. Israer-shuarti túratin ana nu ashí mash túrataram tátsuji, tu áatramji. Tura antsu namanen máawar ántar-yusan susamu yúashtiniaitrueme, tímiaji. Tura numpasha umarchatniuitrueme, kajemtikramusha yúashtiniaitrueme. Tura tsanirmashtiniaitrueme. Tu áatramji” tiarmiayi.

### **Páprun achikiarmiania nu**

<sup>26</sup>Nuyá tiniu asantai Papru nú kuaru áishmankan júkiarmiayi. Tura kashin tsawarar nímiak nijiaamararmiayi, Muisais timia nútiksaran. Tura Yúsan tiarmia nuna wárik umiktinian tura Muisais timia nuna Yus súsatniun ujaktajtsa Papru Yusa Uunt Jeen wayamiayi. <sup>27</sup>Túrasha nu siati tsawant amusattuk ajatemsaj, Ásianmaya Israer-aents Paprun Yusa Uunt Jeen pujan wáinkiararmiayi. Túrawar charaatum ajakiar Páprun achikiarmiayi. <sup>28</sup>Achikiar unsumainiak “Israer-shuártiram in yáinmaktarum. Ashí nunkanam Muisais akupkamuríncha Israer-shuarti túrutairíncha, ju Yusa Uunt Jeencha yajauch chicharea nu achikji, tiarmiayi. Warí, Kriaku áentsun awayashtinia nuna awayá nujai yamá ju Jeencha yajauch awajturmají” tiarmiayi.

<sup>29</sup>Jes, nuik Ipisiunmaya Trúpimiu Páprujai péprunam wekaan wáinkiaruyi. Wáinkiaru ásar, Yusa Uunt Jeen wayayi, tu enentáimsar tiarmiayi. <sup>30</sup>Tuiniakui aents ashí mash charaatum ajakiar tseke táarmiayi. Túrawar Páprun achikiar japirkutak Yusa Uunt

Jeeya jíikiarmiayi. Túrawar wáitíncha nú chichamaik epentrarmiayi. <sup>31</sup>Tura maatai tusar matsamtuiniái suntara kapitíántri Jerusarénnumiá aents ashí charaatum ajainian antukmiayi. <sup>32</sup>Kapitíáncha ní suntarín tura sarjentuncha irur tseke weriarmiayi aents pujuarmia nuí. Aencha suntaran tura kapitíánin wáinkiar, Páprun asutíniayat iniaisarmiayi. <sup>33</sup>Kapitíánka Páprun jeari achikmiayi. Tura jimiará jirujái jiníkiarmiayi. Nuyasha aniasmiayi “¿Niisha yait? ¿Warinia túrait?” tímiayi. <sup>34</sup>Túrasha aencha untsurí chichaman untsummiarmiayi. Túmainiakui kapitíáncha penké nekaachmiayi. Tuma asamtai Páprunka suntar pujamunam júkiarmiayi. <sup>35</sup>Tura suntar pujamunam wáitíniám jeawar Páprun entsaki júkiarmiayi aents imiá kajerainia asamtai. <sup>36</sup>Tura aencha ukunmaani pataakar, mantamnatí, tu untsummiarmiayi.

### Papru chichastinian seamiania nu

<sup>37</sup>Tura Papru suntarnum awayám, Páprusha kapitíánin Kriaku chichamjai chichaak “Wi ishichik chichasaintjame” tímiayi.

Tutai kapitíán chichaak “Warí, ¿amesha Kriaku chicham chichastin nékamek? tímiayi. <sup>38</sup>Nuiníka amesha ¿Ejiptunmaya shuárchakaitiam? ¿Nuik kuaru mir (4000) aents, mankartin tutai atsamunam yaruakchamkam? ¿Kapitíánjai meset najanataj tusa túrachmakum?” tímiayi.

<sup>39</sup>Tutai Papru tímiayi “Núchaitjai. Antsu wikia Israer áentsuitjai. Sirisia nuńkanam uunt pepru Tarsu náartin ana nuí akiiniaitjai. Tura waitneasam ju aents chichastin tsankatrukta” tímiayi.

<sup>40</sup>Tura kapitíán, ayu, tutai, Papru watainium wajas, mitiat pujastarum tusa uwejen takuimiayi. Tura aents

itiatkarmatai  
chichasmiayi.

Israer-chichamjai

### Papru áentsun timia nu

**22** Papru chichaak júna tímiayi: “Yatsurtiram, tura úuntur árumna nu antuktaram. Wikia Pápruitjai. Kíishtumaktaj tusan títiatjana nu waitneasrum anturtuktaram” tímiayi. <sup>2</sup>Tura Papru Israer chichaman chichaakui, aents nuna antukar nú nankaamas itiatkarmiayi. <sup>3</sup>Nuí Papru chichaak “Wikia Israer-shuaraitjai. Tarsu pepru Sirisia nuńkanam ana nuí akiiniaitjai. Túmaitiatnak juí Jerusarénnum tsakaruitjai. Tura unuikiartin Kamaríran chichamen unuimiaruitjai. Tuma asan ii uuntri akupkarmia nuna ashí umirkaitjai. Tura átum yamá túrarmena nuna wisha nútiksanak Yusna ana nuna tuke enentáijjai wakerukuitjai. <sup>4</sup>Tura Jesusan umirkaru ármia nuna máataj tusan pataatukni wekaimiajai. Túran áishman kan nuwancha achikian sepunam enkeataj tusan túrimiajai. <sup>5</sup>Israer-patri uuntrisha Israer-shuara uuntrisha Tamaskunam í-shuar susatá tusar papin ataktusar akuptukarmia nuna niníka nékainiawai. Jesusan umirkarun achikia ikiaankan juí Jerusarénnum asutniáwarat tusan werimjai” tímiayi.

(Túramurí 9.1-19; 26.12-18)

<sup>6</sup>Tura wi jintiá wéaj Tamaskunam jeastatuk ajasaj nantu tutupin ají aya aneachma nayaimpinmaya newaait wajantruntmiayi. <sup>7</sup>Túrunamtai wisha nuńká iniaarmajai. Nuyanka chichaamun antukmajai. Chichartak “Sauru, Sauru, ¿urukamtia imiá pataaturam?” turutmiayi.

<sup>8</sup>Takui wi aniasmajai “¿Amesha yáitiam, Uunta?”

Tutai “Wikia Nasarénumia Jesusaitjai. Ame pataaturmena núitjai” turutmiai.

<sup>9</sup>Wijiai pujuarmia nu, newaat wajantun wáinkiar ti ashamkarmai. Túrasha nínkia túrutun antukcharmai. <sup>10</sup>Tura wi tímiajai “¿Nuínkia, Uunta, warí ituirkat-taj?” tímiajai.

Tutai Uunt chichartak “Wajakim Tamaskunam wetá. Nuisha ame túrattamna nuna ujatmakartatui” turutmiai, tímiayi. <sup>11</sup>Kame wikia nú newaat ajakun ísan jiru kusurmai. Tuma asamtai winia tsaniakmar enkeki jurukiar Tamaskunam ejetiarmai’ tímiayi.

<sup>12</sup>Papru tuke aujmatki wéawai. “Tura nuí Tamaskunam áishman Ananías pujumai. Niisha Yúsán aneak, Muisais akupkama nuna umirkaui. Tura nú péprunmaya Israer-shuar ármia nu nin péñker enentáimtiarmiai. <sup>13</sup>Nú Ananías winia írsataj tusa támai. Taa turutmai “Yatsuru Sauru, péñker iimtia.” Túrutkui nú chichamaik péñker ímmi-ajai. Túrunan Ananíasnasha wáinkiam-jai. <sup>14</sup>Tura Ananías chichaak “Iwiaaku Yus, winia wakeramurun nekartuat tusa winia Uchirnasha, tunaarinchaa nuna, ísat tusa, winia chichampruncha antukat tusa ámin yaunchu Yus anaiti-amkaiti. <sup>15</sup>Amesha Papru, Yusna ana nu ísumna nusha antukumna nusha ashí aents ujakartatme. <sup>16</sup>Tuma asamtai yamaisha ¿warí nákam? Tunaarun asakátrurat tusam Uunt Jesus enentáim-tusam weme ni náari pachisam imiantia” turutmai.’

<sup>17</sup>“Tura Jerusarénum waketkin Yusa Uunt Jeen wémajai Yúsán áujsetaj tusan. Nuí ímiarmajai. <sup>18</sup>Nuí Jesus chichartak “Juí Jesusarénum Wíi túramur et-serkattamna nuna antukchartatui. Tuma asamtai wari jíinkim wetá” turutmiai.’

<sup>19</sup>“Túrutkui wi tímiajai “Túrasha Uunta, juyá aents wi Israer-shuara

iruntai jeen wayan Ámin umir-tamkarmia nuna nuí matsatun achikian awatin sepunam enkeawarmia nuna nékainiawai. <sup>20</sup>Tura nuyá Áminiu etserniun Estepankan máiniakuisha wisha wajamjai. Túruiniakui, “péñkeraiti” tímiajai. Nú arantcha ni pushirín írsamjai” tímiajai.’

<sup>21</sup>“Túrasha Uunt Jesus winia turutmai “Wetá. Israer-shuarcha matsatania nuí akupkatjame” turutmai” tímiayi Papru.

### Suntara kapitíánriin túrunamia nu

<sup>22</sup>Nuí matsamarmia nu, núnaka antukarka untsumtan juáriarmiayi. “Juka mantamnatí. ¿Urukamtaik iwiaakusha pujusat?” tiarmiayi. <sup>23</sup>Tura aentska Paprun kajerainiak, ti untsumainiak pushirín tujaat ajapawar nunkancha nan kimkiamaikia ajarmiayi. <sup>24</sup>Tura kapitíán nuna wáiniak Páprun suntar pujamunam awayámiayi. Tura suntaran chicharuk “Átum asutiárum áimtikiatarum. ¿Urukamtaik aents nin kajerainiak imiá untsumainia? Nekaatarum” tímiayi. <sup>25</sup>Tura Páprun asutiátai tusar jíinkíarar awajsam Pápruka kapitíánin chicharuk “¿Rúmanmaya aents áyatik asutiámniakait, ni túramurí nekartsuk?” tímiayi.

<sup>26</sup>Nuna táman antuk kapitíáncha uunt kapitíánin ujaktaj tusa werí chichaak “Maaj, túrataj tamena nu anearta. Ju áishman Rúmanam pachitkaiti” tímiayi.

<sup>27</sup>Nuna antuk uunt kapitíán Páprun werí aniasmiayi “¿Amesha nekasmek Rumanam pachitkaitiam?” tímiayi. Tutai Papru “Ee” tímiayi.

<sup>28</sup>Tutai “Wikia ti kuítian akikmak-miajai Rúmanam pachiinkiatniun” uunt kapitíán tímiayi.

Tutai Papru tímiayi “Túrasha winia aparka Rúmanam pachitkia asamtai, wisha Rúmanam pachiinkian akiiniait-jai” tímiayi.

<sup>29</sup>Nuna takui Páprun asutiátaj tiarmia nuna wárik iniaisar jíiniar wearmiayi. Tura imia uunt kapitíancha Rúmanam pachitkian jin\_kiá asa ashankamiayi.

<sup>30</sup>Tuma asa kashin tsawar uunt kapitíán, urukamtaik Páprun imiá kajerainia, nekaataj tusa wakerak Paprun werí jin\_kiámun atirmiayi. Tura Israer-patrí uuntrin ch\_kich naamka armia nújajsha ikiaankamiayi. Tura nuin\_kia ni matsatmanum Páprun itiar ajapén awajsamiayi.

### Israer-aentsu Úuntrin Papru tímiania nu

**23** Papru Israer-patrí naamkarin úmamkes iis “Wíi shuartiram antuktarum. Úchichik tuke yamaisha Yus íimmianum pé\_nker wekainuitjai” tímiayi.

<sup>2</sup>Papru nuna takui Israer-patri uuntrin Ananías, ni suntarin Papruí ayamas pujuarmia nuna “Wenunam awatiarum” tímiayi.

<sup>3</sup>Tutai Papru tímiayi “Tsej, jimiará chichamtinia íimiatá, Yus amincha asutiámattawai. Muisais akupeana nuna umiatsui tusam yajauch turutattsam pujame. Entá, ¿nuin\_kia urukamtia Muisais tímia nuka iniaisam ame suntarum winia asutiátarum tame?” tímiayi.

<sup>4</sup>Tura nuna takui nuí wajarmia nu Páprun tiarmiayi “¿Maaj, amesha Patri uuntrin imiá yajauchisha chichaream?”

<sup>5</sup>Tutai Papru tímiayi “Yatsuru, wisha Patri uuntrin áutskaitia tíchamjai. Nékaitiunka núnaka tíchajjai. Kame wisha nékajai, Yus-Chichamnum tawai “Atumí uuntrin yajauch chicharkairap” tawai” tímiayi.

<sup>6-8</sup>Israer-aentsu úuntriya jimiará írutka ármiai. Satuséu aents tura nuyá Pariséu aents nusháa írutkan Pápruka nekaamiayi. Kame Satuséu aentska, jakamunmaya nantaktincha Yusa suntarisha aentsu wakanisha tura

iwianchcha atsawai, tiniu ármiai. Antsu Pariséu aentska, nuka ashí awai, tiniu ármiai. Nuna nekáa Papru kakantar chichaak “Wikia Pariséu áentsuitjai. Wíi shuarsha Pariséu áiniawai. Wikia ashí shuar jakamunmaya ukunam nantaktin átatui tu jintiamun, nekaatai tusar itiararmiayi” tímiayi. Tura Papru nuna takui Pariséu aents tura Satuséu aencha nuámak kajernaikiarmiayi. Túrunawar kánasaran nusháa nusháa enentáimprarmiayi. <sup>9</sup>Nuin\_kia ashí aents charaatum ajarmiayi. Tura Israer-shuara jintinniuri Pariséunam írutka armia nu wajakiar tiarmiayi “Ju áishman tunaan penké túrichuiti. Yusa suntari ch\_kich wakancha nin nekas chichaschamashi. ¿Ya neka?” tiarmiayi. <sup>10</sup>Ti charaatum ajainiakui suntara kapitíantri Páprun achiarchartimpiash tusa suntaran untsuk, “Jiiktiarum, túrarum suntar pujamunam awayátarum” tímiayi. <sup>11</sup>Nuyá kashi Papru Uuntrin mesekra ipiatuk “Kakaram ajasta, Papru. Juí Jerusarénnun winia ujakarumna núnismek Rúmanmasha ujaktatme” tímiayi.

### Páprun máatniun wakeriarmiania nu

<sup>12</sup>Nuyá kashin tsawarmatai Israer-aents Páprun maatai tusar chichaman jurusarmiayi. “Papru máachkurkia yurumtsuk tura penké úmutsuk matsamsattaji. Máachrikia yajauchiniam yuminkramu atai” tiarmiayi. <sup>13</sup>Nuna tiarmia nuka kuarenta (40) nankaamas ármiai. <sup>14</sup>Tura Israer-patri úuntrin tura Israer-aentsu úuntrincha weriar “Papru máachkurkia penké yurumtsuk pujustatji. Máachrikia yajauchiniam yuminkramu atai” taji. <sup>15</sup>Tuma asamtai ashí Israer-patrí naamkarijajai suntara kapitíantri seatarum, Papru tatí

tusarum. “Kashin Papru itiata, titiarum. Papru tana nu iisha nekas nekaatai tusar wakeraji” titiarum. Túrawakrumin iisha maatai tusar ninkia táatsain náakaktatji” tiarmiayi.

<sup>16</sup>Tura Papru awé nú chichaman antuk suntar pujamunam taa Páprun ujakmiayi. <sup>17</sup>Tuma asamtai Pápruka sun-tara kapitíántrín untuk “Jú uchi uunt kapitíánnum jukitia. Niisha chichaman takakui” tímiayi.

<sup>18</sup>Kapitiáncha uchin uunt kapitíánnum ejé tímiayi “Papru enkeamu pujana nu winia untsurak “Jú uchi uunt kapitíánnum jukitia. Chichaman takakui” túrutui” tímiayi.

<sup>19</sup>Uunt kapitíáncha nú uchin enkeki arantach jukí chicharuk “¿Warí turuttiaj tame?” tímiayi.

<sup>20</sup>Tutai uchi tímiayi “Israer-aents Páprun chichaman jurusarai. “Papru túramurí ti paant nekaatai tusar kashin Israer-shuara uuntriin ejetarum” turamartatui. <sup>21</sup>Tura amesha nuna takui anturkaip. Kuarenta (40) nankaamas jintiá akirtua pujurainiawai. Tura “Papru máachkurkia yurumsuk tura úmutsuk matsamsattaji” tuiniawai. Tuma asamtai yamaisha ámin tití tusa nákarmainiawai” tímiayi uchi.

<sup>22</sup>Tura uunt kapitíáncha uchin chicharuk “Ame túrutmena nu chíkich aents penké ujakarai’ tímiayi. Nuna tí, uchin akupkamiayi.

### **Akupin Piriksai ejetiarmiania nu**

<sup>23</sup>Nuyanka uunt kapitíáncha chíkich kapitíánin jímiarán itiá chichaak “Urum, kashi ajapén ajastatuk ai, untsurí suntar ikiaankarta. Jimiará sián (200) aya náwek, setenta (70) kawainium eketka, nuyá chíkich jimiará sián (200) nánkijjain Sesaría nunkanam wétin iwiarata. <sup>24</sup>Páprusha kawainium ekemkatin iwiarturta.

Túrarum péñkerak ejetarum akupin Piriksai” tímiayi. <sup>25</sup>Tura niijjai jú chichaman áatrar akuptukmiayi:

<sup>26</sup>“Ti péñker akupin Píríks, wikia Krautiu Rísias jú papin áatjame. <sup>27</sup>Israer-aents jú áishmankan maatai tusar wakeruiniak achikiarmiayi. Tura niisha Rúmanmaya áentsuitkui wikia nuna nekaan suntarjai werin jukimjai. <sup>28</sup>Wikia ¿urukamtaik achikiaruit? tusan Israer-patri naamkarin jukimjai nin. <sup>29</sup>Páprunka ii uuntri akupkamurin umiatsui tusar nin kajeriarmiayi. Pápruka yajauch túrachu asa mantamnachminiuyayi. Sepunmasha enkemachminiuyayi. <sup>30</sup>Tura wisha Israer-aents nin máatniun chichaman jurusman nekaan amiin akuptajme. Nuyasha nin kajerainia nunasha tajai “Atumsha Piriksai werum átum warinma kajerarum nu títiarum” tajai. Ayu. Júchiniak tájame.” Nuna tu áatar akuptukmiayi.

<sup>31</sup>Tura suntarsha ni uunt kapitíántri tímia nútiksaran Páprun kashi júkiarmiayi Antipatris péprunam.

<sup>32</sup>Kashin tsawrar suntar aya náwek wearmia nuka waketrarmiayi. Tura kawainium eketrainiaka Páprujai wearmiayi. <sup>33</sup>Sesaría péprunam jeawar papin Piriksai súsararmiayi. Tura Pápruncha nuí ejeniarmiayi.

<sup>34</sup>Akupniusha papí aujsua amik Páprun aniasmiayi “Amesha, ¿tuí akiiniatiam?”

Tutai “Sirisia nunkanmayaitjai” tímiayi.

<sup>35</sup>Nuna takui akupin tímiayi “Wátskea kajertamainia nu taar turamainiakui anturkatjame” tímiayi. Tura nuyanka uunt akupin Erutisa jeen awayá apujsamiai, suntar íisarát tusa.



### Papru Píríksjaj áujmatsamiania nu

**24** Tura senku tsawant nankaamasaj Israer-patri uuntri, ni naari Ananías, Sesarianam támiayi. Tura Israer-aentsu uuntri tura ti unuimiaru chichamtincha, ni naari Térturu nujaj táarmiayi. Ju aents Páprun kajerainia ásar akupniunam wearmiayi. <sup>2</sup>Nui Páprun itiarmatai Térturu chichatan juármiai. “Uunt akupin Píríks, amesha yaimiu asakmin iisha shiir matsatainijai. Tura imiá neka asakmin ashí aents tímiatrusrik matsatainijai. <sup>3</sup>Tuma asakmin iisha ashí matsatmanum tuke tsawant ti shiir yuminsamajme, uunta. <sup>4</sup>Tura amesha ti núkap chicham antuktin nakitiatspash. Tuma asamtai antsu ishichik waitneasam anturtukta, tímiayi. <sup>5</sup>Ju áishman Papru, sunkura utsukratniua núniniaiti. Niisha ashí nunkanam mesetan najanatniun Israer áentsun ikiakáiniaiti. Tura Jesusa aentsri, Nasarénu tuinia nuna úuntriinti. <sup>6</sup>Nú arantcha Yusa Uunt Jeen yajauch awajsataj tusa pujuru wáinkiar achikmaji. Ii uuntri tana nujaj métek asutiátai tusar wakerimji. <sup>7</sup>Túrarin nuyanka kapitián Rísias taa tapit achik jurutramkimijai. <sup>8</sup>Tura atumek akupin Píríksaj werum nui aujmatkatarum, turamaji, tímiayi. Tuma asamtai amesha Píríks, Papru aniasta. Nuinkia ii tájinia nu nekasaiti, nu nekaattame” tímiayi Térturu.

<sup>9</sup>Tura Israer-aents pujuarmia nu “Nekasaiti ashí ni tana nu” tiarmiayi.

<sup>10</sup>Nuyá Píríks, uwejejaj, Papru chichasat tusa iniaktusmiayi. Túram Papru tímiayi “Amesha uunta, ju aentsu akupniuri ti untsurí uwitin pujusuitme. Tuma asamtai nuikia shiir enentáimsan páchitsuk chichastatjai. <sup>11</sup>Wats, wi túramur nekartuata. Yúsan áujmataj tusan Jerusarénnum wi wémajna nu tuse (12) tsawant nankaamasai.

<sup>12</sup>Nuisha yajauch áujmatki weaj wáitkiacharmai. Yusa Uunt Jeencha tura Israer-shuara aujtai jeencha tura pepru jintianmasha áentsnum charáa charáa ajá wekaaj penké wáitkiacharmai, tímiayi. <sup>13</sup>Ju aents juí matsatainia nu wíniaka penké turutchamnia áiniawai. <sup>14</sup>Túrasha juna paant ujaajme. Jesus yamarman jintiána nuna umfajaj. Kame Israer-aentska wáitaiiti tuinia nuna wikia umfajaj. Túrasha nuna túran ii uuntri Yusri akupkama nunak umiktasan pujajaj. Jes, ashí Muisais aar akupkama nuna tura ashí Yúsnan yaunchu etserin aar akupkarmia nunasha uminiatjai. <sup>15</sup>Tura jakaasha nantaktin átatui, tajaj. Warí, pénger aents nútiksan yajauch aencha nantakiartatui imia Israer-shuar tuiniatsuk. Tura wisha nútiksanak túrunatniuiti tajaj. <sup>16</sup>Tura wisha tiniu asan, wikia winia enentáiruí Yus íimmianum makuumatsuk wekasataj tajaj. Tura áentsnumsha nútiksanak penké makuumatsuk wekaajaj’ tímiayi.

<sup>17</sup>“Tura, uunta, untsurí uwitin chíkich chíkich nunkanam wekaasuan amikian winia shuaruúj támajaj. Kuítrinchan kuítian susataj tusan tura Yusa kuítrincha nin susataj tusan támajaj. <sup>18</sup>Túran wisha, Muisais jintinmia nútiksanak nijiaamaran, Yusa Uunt Jeen pujumiajai. Untsurí aents charaatum ajainiasha atsumiayi. Nui wiki pujaj Ásianmaya Israer-aents wáitkiarmiayi. <sup>19</sup>Tura wi yajauch túraitkuinkia winia wáitkiarainia nu táchatniukait ámin ujatmaktasa. <sup>20</sup>Túrachkuinkia juí pujuinia nu, Israer-patri naamkarí matsatmanum wi pujumajna nui yajauch túramun nékainiakka turutiarti. <sup>21</sup>Kame, ““jakamunmaya nantakminiaiti” tau asamtai makuurtiajtsarum pujarme” matsatmanum tímiaj nujaj turutchartimpiash. Nú arantka yajauch

túramun penké nekartuacharmai” tímiayi Papru.

<sup>22</sup>Táman antuk Píriks, Kristu shuari túramun paant nekáa, áanik iniaisamiayi. “Antsu kapitíán Risias támatai nuinkía nu chichaman nekaatjai” tímiayi. <sup>23</sup>Tura nuyá suntara kapitíántrín chichaak “Jú Pápruka tuke emetnati. Tura ishichikikia ankant apujsatarum. Tura nuyá ni amikri taa yáintaj takui suritkiairap” tímiayi.

<sup>24</sup>Tura nuyá chíkich tsawantai ataksha Píriks ni nuwejai Tursirajai támiayi. Núwenka Israer-shuarauyayi. Pírikska “Papru itiatarum’ tímiayi. Papru Jesukrístunum étserkui antimiyayi.

<sup>25</sup>Tura Pápruka yajauchiniam wekasashtincha naka wekasatniuncha, tura ukunam Yus tunáa áentsnaka asutiátniuiti takui Pírikska ashamak tímiayi “Antsu yamaikia máakete. Tura ataksha wi ankant pujakun untsukmijiam” tímiayi. <sup>26</sup>Tura, ankant ajastaj tusa Papru kuítian akirkashtimpiash, tu enentáimias, Píriks tuke untsúu wémiayi, chichastai tusa. <sup>27</sup>Tura nuyanka jimiara uwi nankaamasmatai Píriks akupin náamkamu ajapnamiayi. Tura chíkich aents, ni naari Pursiu Jistu akupin náamkamiayi. Tura Pírikska, Israer-aents pénger enentáimtursarat tusa wakerak, Páprun sepunam tuke ikiukmiayi.

### Papru Jístujai áujmatsamiania nu

**25** Jístusha akupkatin takatan nankaamataj tusa Sesaria péprunam támiayi. Tura menaintiú tsawant nankaamasmatai nuyá we Jerusarénnum jeamiayi. <sup>2</sup>Nuisha Israer-patri uuntri tura Israer-aentsu penkerisha Páprun tsanumprurtai tusar Jístun weriarmiayi. <sup>3</sup>Tura tiarmiayi “Waitneasam Páprusha Jerusarénnum

akupkata” tiarmiayi. Jintiá maatai tusar wakeruiniak nuna tiarmiayi.

<sup>4</sup>Tutai Jistu tímiayi “Atsá. Páprusha Sesaria péprunam sepunam enkeamu pujawai. Tura wikia nuí wárik waketkittiajai” tímiayi. <sup>5</sup>Nuyá nin tímiayi “Atumsha penkeri árumna nu, wijiái Sesarianam wétiniaitruma. Tura nú áishmanka tunaari ákuinkia nuisha títiniaitruma” tímiayi.

<sup>6</sup>Jístuka Jerusarénnum ishichik tsawant pujusmiayi. Kame uchu tsawant tura tias tsawantcha pujuschiawash. Nuyá ataksha Sesarianam waketkimiayi. Tura nuí jeá kashin tsawar, akupin pujutainium pujus “Papru itiatarum” tímiayi. <sup>7</sup>Tura Papru wayamtai, Israer-aents Jerusarénnumiá taarmia nu káunkarmiayi. Túrawar ti nukap chichainiak “Tunáa túraití Pápruka” tu tiarmiayi. Túrusha penké uyumamtikiacharmiayi.

<sup>8</sup>Pápruka chichamprumak tímiayi “Wisha tunaan penké túrachuitjai. Israera uuntri áarmarincha umirkaruitjai. Tura Yusa Uunt Jeencha yajauch awajsachuitjai. Tura uunt kapitíánniasha yajauch penké chicharkachuitjai” tímiayi.

<sup>9</sup>Jístuka Israer-aents pénger enentáimtursarat tusa wakerak, Páprun tímiayi “Wakerakminkia Jerusarénnum wemí. Wisha nuí ame túramurmin nekaatjai” tímiayi.

<sup>10</sup>Tutai Papru tímiayi “Amesha paant nékame, Israer-áentsnum tunaan penké túrachjai. Tuma asamtai Rúmanmaya uunt akupniun wisha winia túramurun ujaktiniaitjai, nekartuati tusan. <sup>11</sup>Wisha jakamnia tímianu tunáa túranka, jákatniuncha ashamatsjai. Tura antsu turutainia nu nekaschaitkiuinkia wíniaka Israer-shuarum surunkachminiaitjai taji. Tuma asamtai seajme, wí túramun uunt akupin Sésar nekartuati” tímiayi.

<sup>12</sup>Tutai, nuyá ni írutramurijjaj chicha-sua amik, Jistu Páprun tímiayi “Uunt akupniui wétaj tusam seame. Tuma asantai nuí wétatme” tímiayi.

### **Papru uunt akupniujaj áujmatsamiania nu**

<sup>13</sup>Tura ishichik tsawant nankaa-masmatai akupin Akripia ni nuwejjaj Pirinísejjaj Jístun áujсатаj tusa Sesarianam wearmiayi. <sup>14</sup>Tura untsurí tsawant pujusarmiayi. Tura nuí pujuiniaj Jístuka Papru túrunamun akupniun ujaak tímiayi “Juí áishman pujawai. Píriks nin achik enkea ikiukmiayi, tímiayi. <sup>15</sup>Kame wikia Jerusarénum pujaj Israer-patri uuntri tura Israer-aentsu úuntrisha, Papru yajauchin túraití tusar káutrukarmiayi, tímiayi. Mantamnati tusam akupkata, tu seattiarimiayi. <sup>16</sup>Takui wi tímiajai “Iisha Rúmanmaja áentstikia chícham nékatsuk, mantamnati tusar akupeatsji. Tsanumpruinia nu, emka táartin áiniawai. Tura nuyá chichamprumatsajin mantamnati tusar akupeatsji iisha” tímiajai. <sup>17</sup>Tiniu asan, táarmatai, wikia nákatsuk kashin tsawaran akupin pujutainium pujusan, Papru itiatarum tusan akupkamjai. <sup>18</sup>Tura Páprun tsanumprurtai tusar taar chichainiaksha, wi enentáimmiajna núnaka tícharmiayi. <sup>19</sup>Antsu áyatik Yus umirkar túmatairín Papru nuna túrachai, tiarmiayi. Tura nuyasha áishman Jesus naartin nantaki iwiaakui tawai Pápruka, tiarmiayi. Nunak tiarmiayi. <sup>20</sup>Tura wikia nú chichaman túratniun nékachu asan, Páprun aniasmajaj “¿Amesha Jerusarénum wétaj tusam wakeramek? Nuí nu chichaman nekartamawarti” tímiajai. <sup>21</sup>Túrasha “Atsá. Juin pujustajaj. Rúmanmaja uunt akupin Akustu Sésar nekartuati” tímiayi Papru. Takui, “nuinkia tuke sepunam pujustá.

Tura wi ukunam uunt akupniun akuptuktatjame” tímiajai” tímiayi Jistu.

<sup>22</sup>Nuyá Akripia chichaak “Wisha itiursanak nu áishman chichaamun anturkaj” tímiayi. Tutai Jistu tímiayi “Amesha kashinkia anturkattame”. <sup>23</sup>Tura kashin tsawar Akripia Pirinísejjaj taar, iwiaa-iwiarmamu ajas wayawarmiayi. Suntara úuntrijjaj tura nú péprunmaja úuntrijjaj wayawarmiayi. Tura nuí Jistu, “Papru itiatarum” tímiayi. <sup>24</sup>Tura Papru támatai Jistu tímiayi “Uunt Akripia, tura ashí áentstiram matsatrumna nu, pai, ju áishman ístarum. Ti untsurí Israer-aents Jerusarénumsha tura juí Sesarianmasha ju áishman kan Páprun kajerainiak yajauch chichartuiniawai. Tura tuke iniaitsuk, mantamnatiuuti, turutainiawai. <sup>25</sup>Túrasha wíjjainkia tunáa jakamnianka túrachuuti. Kame niisha “uunt akupin Akustu Sésar nekartuati” takui, wisha nin akupkataj tusan wakerajaj. <sup>26</sup>Tura wariniak uunt akupniun áatrataj nuna nékachu asan, Páprun atumin itiarjarme. Tura nekaska, Akripia, ame iniasta tusan itiarjame. Túrawakmin wi wariniak áartaj nuna nekaatjai. <sup>27</sup>Warí wisha, ni yajauch túramurín áattsuk, uunt akupniunam akupkashiniaitjai” tímiayi.

### **Papru Akripiaj chichamprumakmiania nu**

**26** Jistu nuna tutai Akripia Páprun tímiayi “Wats, amesha tu timi chichamprumakta” tímiayi. Tutai Papru uweje takui chichatan juarmiayi. <sup>2-3</sup>Chichaak tímiayi “Uunt Akripia, ii Israer-shuarti túrutai ainia nu amesha nékame. Tura ashí ii chicharnaiyajnia nusha nékame. Tuma asantai yamái wisha ámin chichamprumaktaj tau asan shiir enentáimjai. Israer-aents turutainia

nuna mash ujaktatjame. Waitneasam péñker anturtukta' tímiayi.

**Papru ni yaunchu  
túrutarin ujakmiania nu**

<sup>4</sup>Wi úchichik winia nunkarui tura Jerusarénumsha pujusan wi túramajna nuna ashí wíi aents Israer ainia nu nékainiawai. <sup>5</sup>Pariséu ajasan, ni akupeamurin itiurchat ain ashí takamtsuk tuke umirniuitjai. Nunasha nékainiawai tura wakeruiniakka etserkamnia aintui. <sup>6</sup>Túrasha wikia, jakamunmaya nantaktin átatui, tiniu asamtai wíniaka emetruawar itiararmiayi. Túrasha núnaka Yuska ii úuntrin yaunchu tímiayi. Yus tímia nuna túrunattawai wisha tiniu asamtai itiararmiayi, tímiayi. <sup>7</sup>Tura ashí mash Israer-shuarti, tuse (12) aents matsatka ájinia nu, ju nantaktin chichaman Yus tímia nuna túrunati tusar nákainiaji. Tuma asar Yus áujkur<sup>i</sup>, tsawajsha káshisha nú enentáimtuiniaji. Tura wisha nú chichamnak enentáimta asamtai wíniaka kajertuiniawai, uunt Akripia. <sup>8</sup>Warí, atumsha “Yus jakancha iniantkímniaiti” tátsurmek' tímiayi.

<sup>9</sup>Tura wisha yáunchuka Nasarénumiá Jesusnan umirkaruka kajerkatniuiti, tu enentáimniuyajai. <sup>10</sup>Tura Jerusarénum Yus-shuar ármia nuna kajerkarmiajai. Israer-patri uuntri chichamejai untsurí áentsun Jesusnan umirkarmia nuna sepunam enkeamiajai. Tura nú shuaran máiniakuisha wikia péñkeraiti tu wémiajai. <sup>11</sup>Tura Israer-shuara iruntai jeen wayan ti asutiármiajai, Jesusnan umirkatniun iniaisarat tusan. Tura imiá kajerkaran chíkich nunkanmasha pataatu wearmiajai achiktaj tusan' tímiayi.

**Tamasku jintianam  
túrunamun ujakmiania nu**

(Túramuri 9.1-19; 22.6-16)

<sup>12</sup>Tura Israer-patri uuntri tsankatrukmatái, papin ni surusarmia nujai, Tamasku péprunam wétaj tusan jíinkimijai. <sup>13</sup>Tura, uunta, nantu tutupin ai, jintiá wéai newaat ajaki ti tsáapin, tsawái nantujai nankaamas etsantruramiayi. Tura wijiai wearmia nunasha núnisaran etsantrurarmiayi. <sup>14</sup>Tura túrunamtai ashí nunká tepetar wáinkiarimiaji. Wiki Israer-chichamjai túrutun antukmajai “Sauru, Sauru, ¿urukamtai imiá pataaturam? Amek enentáimin yajauch awajmamsame, wáaka sankanmiak numin ijiuma núnismek. Wíi aents kajera asam túruname” turutmai.’

<sup>15</sup>“Túrutkui wisha “¿Amesha yáitiam, Uunta?” tímiajai.

Tutai Uunt turutmai “Wisha Jesusaitjai, ame pataatamna núitjai. <sup>16</sup>Tura nantakim wajaktia. Winia takartusminiam tusan wantintiukjame. Tura ame wáinkiamna nusha etserkat-tame. Tura ukunam wantintiuktatjame. Wáinkiatamna nusha etserkamnium, turutmai. <sup>17</sup>Tura nuyasha turutmai, Wats yamaisha Israer-shuarchanum akupkatjame. Tura Israer-shuar kajertamainiakuisha, tura chíkich aents kajertamainiakuisha ayampruktatjame, turutmai. <sup>18</sup>Péñker jintintiatá tusan akupeajme. Kame aencha kiritnumiá jíinkiar tsáapninium wekasarat tusan, tura iwianchin umirtsuk Yúsán umirkarat tusan akupeajme. Tura Winia enentáimtursarmatai Wisha ni tunaarin tsankurattajai. Nuna túran Yusna ajasaru ániana nujai apujstatajai.” Nuna Jesus turutmai' tímiayi.

### Papru mesekrampra umikman ujakmiania nu

<sup>19</sup>“Tuma asamtai, uunt Akripia, Uunt Jesus nayaimpinmaya wantintiurak turutmia nuna umirkataj tusan pujajai. <sup>20</sup>Enentai yapajíawar Yus-shuar ajastinian, emka Tamaskunam pujuarmia nuna ujakarmiajai. Tura nuyasha Jerusarénnumian, Jutía nunkanmayancha tura nútiksanak Israer-shuarchancha nuna ujakarmiajai. Tura ujainiakun “Yus-shuar ajasmarm paant ajasat tusarum, péñker túratarum” tímiajai ashí shuaran. <sup>21</sup>Tura wi Yusa Uunt Jeen pujái, Israer-shuar achirkar emetruawar mántuatai tukamá tujintrukarmiyai, Yus winia yaintiu asamtai. <sup>22</sup>Yus winia yaintiu asamtai, iniaitsuk tuke Yus-Chichaman ujainiajai. Uunt ainia nunasha, tura péejchach ainia nunasha ujainiajai. Tura Muisaisha, Yúsnan etserniusha tiarmia nunak étsereajai. Nú arantka tátsujai. <sup>23</sup>Krístuka wáitsatniuyayi, tura jakasha émak nantaktiniuyayi, ii uuntri tiniu ármiyai. Tura Krístuka nantaki Yusa chichamen íi áentsun tura Israer-shuarchancha nútiksan ujaktiniuyayi. Nuna tu tiarmiyai. Tura núnaka wisha tu ujainiajai” tímiyai Papru.

### Papru Akripian Yus-shuar awajsataj tusa wakerimiania nu

<sup>24</sup>Tura nuna takui Jistu kakantar tímiyai “Maaj, Papru, wáurme. Imiá unuimiatu asam wáurkame” tímiyai.

<sup>25</sup>Tutai Papru tímiyai “Atsá uunt Jistu, wáurtsujai. Antsu wi tájana nuka ti nekasaiti. <sup>26</sup>Wi tájana nuna, uunt Akripia juí pujana nuka nékawai. Tuma asamtai arantutsuk nin chichareajai. Kame ju túrunamu ti paant asamtai ni-isha nékawai, tajai” tímiyai.

<sup>27</sup>Nuyá Akripian chicharuk “Yaunchu Yúsnan etserin áarmari, nekasapitia tátsumek, uunt Akripia. Wikia nékajme. Nekasaiti, tame” tímiyai.

<sup>28</sup>Takui Akripia chichaak “Maaj, ishichik awajtame Papru, Yus-shuar ajastin” tímiyai.

<sup>29</sup>Tutai Papru tímiyai “Tura ishichík chichamjaisha untsurí chichamjaisha, amesha uunt Akripia, tura ashí winia anturtukurmena nu, wijai métek ajasúk tusan wakerajai. Tura antsu wia núnisan jiníkiámua núnaka wakeratsjai” tímiyai.

<sup>30</sup>Papru nuna tuasua amikmatai akupniusha, uunt kapitíancha, Pirinísesha, tura nuí ashí pujuarmia nu wajakiarmiyai. <sup>31</sup>Tura arant wear, túrunamun chichasarmiyai. Tura tiarmiyai “Ju áishman mantamnamnian tunaamkachuiti tura penkesha sepunmasha enkeachminiaiti” tiarmiyai.

<sup>32</sup>Tura Akripia Jístun tímiyai “Ju áishman “uunt akupin nekarati” tíchaitkuinkia akupmai makuitji” tímiyai.

### Páprun Rúmanam akupkarmiania nu

**27** Tura Páprun Ruma péprunam akupkatniun enentáimsarmiyai. Rúmaka tímiai, Itiaria nunkanam pujawai. Wisha Páprujai wémiajai. Pápruncha tura chikichnasha achikma ármiia nunasha Akustunu tutai suntara kapitíántrijiai nenakar akupkarmiyai. Nú kapitíani naari Júriuiti. <sup>2</sup>Tura Atramitiumaya kanu Asia nunkanam pepru ármiia nuí wétasa pujumia nu enkemprarmiajai. Tura Tisarúnikianmaya áishman, ni naari Aristárku, in páchitkiauyayi. Tisarúnikiasha Masetúnia nunkanmaiti. <sup>3</sup>Nuí enkemprar kashin tsawarar Sitiun péprunam jeamiajai. Nuí jeawakrin kapitían Juriu, Páprun waitnentak tímiyai “Ame amikrumiín wetá. Au írmasarti” tímiyai. <sup>4</sup>Tura

Sitiunnumiã jíinkir, kanujai wesar nase tukumpramprakrin Chipri núnkaka menanmaani aa ikiukmiaji. <sup>5</sup>Tura nayaantsanam wesar Sirisia tura Pampiria nunkanam ayamchik nankamakir Mira péprunam jeamiaji. Nuka Risia nunkanmaiti. <sup>6</sup>Nui jear nú kanu ikiukmiaji tura chíkich kanu Arijiántrianmaya taa Itiaria nunkanam wétasa pujumiayi. Nú kanunam suntara kapitíántri, enkempratarum, turammiaji. <sup>7</sup>Tura untsurí tsawant yáitmataik we-wémiaji tura ti wiántkar Nítiumam jeastatuk ajasmiaji. Tura nuísha nase tuke tukumkarta asamtai Sarmun nunkanam ayamchik nankaamakir, Kritia nunkanam ááwinini ayamchik wémiaji. <sup>8</sup>Tura Kritia nunkanam ayamchik wesar itiurchat akui wáitsar wea-wéakuar “Shiir Pujutai” tutainium jeamiaji. Nusha Rasea péprunam tíjiuchiiti. <sup>9</sup>Yáitmataik wea asar ti táasmaji. Tura yumi yututai jeatema asa ti tsúumainiuyayi nayaantsanam wétin. <sup>10</sup>Tura Papru chicharuk “Amikru antukturum. Wi nékajai, yamá wéakrikia ti tsúumainti. Kanusha tura káarak kanunam enketainia nusha menkarattawai. Tura iisha núnisrik kajinchatjash” tímiayi. <sup>11</sup>Suntara kapitíántrinã Páprunka anturtsuk, kanú wianniurín kapitíántrinã tura kanú kapitíántrinã chichamen anturkarmiaji. <sup>12</sup>Tura nuí Shiir Pujutai tutainium yumitin pujustin pénerchaitkui “Nuínã juyanka wéartai. Pinise péprunam jeamainchuashit” ashí tiarmiayi. Nú péprusha Kritia nunkanam nayaants ayamach pujawai. Nú péprunam yumitin pujustinian wakeriarmiayi, arakia nunkaani kakaram nase nú péprunam jeachu asamtai.

### Tsúumainium wekasarmiania nu

<sup>13</sup>Tuma asamtai ukunam nase nunkaaniã tápiriri ajakui, ii wétin yamaikia péneraiti, tu enentáimsarmiayi. Túmakui kanu emetai jiru júusar jíinkir Krítianam ayamchik wearmiaji. <sup>14</sup>Túrasha árusan arakiã kakaram nase, Nuristi tuinia nu tukupramiaji. <sup>15</sup>Nase kanun tukumpra asamtai iisha atsantratin penké tujinkiamiaji. Túmakui, áankisha juramkitiai tusar iniaisamiaji. <sup>16</sup>Tura Kritia nunkanam ááwinini nankaamakur nuínã nase ishichik mijiantmatai, uchich kanu japikir wémiaj nu ti takasar uunt kanunam enkermiaji. <sup>17</sup>Tura enkerar chapikjai uunt kanun jinãiararmiayi wewe najanatai tusar. Tura náikim mukutniunam, Serti tutainium nase juramkishtajash tusar, kanunam yakí tarach aan itiararmiayi. Nu tarach nase úsuktin tusar nenarma ármiaji. Túrawar áyatik nase juramkitiai, tiarmiayi. <sup>18</sup>Tura kashin tsawarmatai nasesha chíchimisha tímiatrusan kakaram aa asamtai kanunmayan káarak irunmia nuna nayaantsanam ajapawarmiayi. <sup>19</sup>Menaintiú tsawant nankaasmatai iisha ii uwejéjain kanunam káarak iruniarmia nusha entsá utsanãkarmiaji. <sup>20</sup>Tura untsurí tsawant tsawajsha etsantrachmiayi tura káshisha yaasha tsaparcharmiaji. Tura nasesha ti kakantar tukumpramkurin “Yamaikia uwempratin atsawai” tiarmiayi. <sup>21</sup>Tura iisha ti untsurí tsawant yurumtsuk matsatu asakrin, Papru ajapén wajaki tímiayi “Amikru winia nuik Krítianmayanã jíintsuk anturtukuitkiurminã yamá ju itiurchatnum pujutsuk tura emenkatmatsuk pujuajai’ tímiayi.’

<sup>22-24</sup>‘Yamá kashi winia Yusru suntari nayaimpinmaya wantintiurkayi. Nú Yúsan umirkaitjiana nu akupturkayi.

Tura nu taruti “Ashamkaipia Papru, turutui. Amesha Ruma péprunam uunt akupniunam jeattame. Tura chikichnasha ámijijai kanunam enketainia ásarmatai uwempratniun Yus tsankatkarai” turutui. Tuma asamtai, amikru, shiir enentáimsatarum. Atumsha mash uwemprattarme. Túrasha kánuka mesertatui. <sup>25</sup>Wisha winia Yúsrún nekas enentáimtajai. Yusa suntari turutainia nuna nekas tu túrunattawai, tajai. Tuma asamtai kakartarum. <sup>26</sup>Tura chíchimisha nunka uchich pújakmanum nu patatmittijai” tímiayi.

<sup>27</sup>Ayu, katurse (14) tsawant nankaamasmatai nú kashi Atria nayaantsanam jeamiayi. Nu nase nánkamas juram wémiai. Nuyanka kashi ajapén wiantin armia nu nunka ámunam jeateman nekaawarmiayi. <sup>28</sup>Tura urutmá kúnakit tusa nekapmamiayi. Túram tráinta sais (36) mítruuyayi. Nuyasha ékemsan ataksha nekapmamiayi. Nuinkia painti siati (27) mítru nekapmamiayi. Tuma asa nunka anumsatuk ajasun nekaawarmiayi. <sup>29</sup>Tura kayanam ijiukajai tusar ashamainiak kuaru jirun kijinian chapikjajai kanú senkarin jinkíáwar entsá ajunkarmiayi. Kijin asamtai, inít tepeámtai nase juramkíchmi tusar túrawarmiayi. Tura wake mesekar, tsawarti tusar matsamarmiayi.

<sup>30</sup>Tura matsatainai wiantin armia nu, iikia uchich kanunam enkemprar pisarchatjash tu enentáimsarmiayi. Túmainiak kanú nujinia chíkich jirun ajuntai tawa nútiksaran uchich kanun ajuntai tusar pujuarmiayi. <sup>31</sup>Tura tuma wáiniak Papru suntara kapitíántrín tura ni suntaríncha ujakmiayi. “Ausha uunt kanunman enketainiachkuinkia atumsha uwemprashtatrume” tímiayi. <sup>32</sup>Tutai suntarsha uchich kanú chapikrín tsupirkar entsá ajunkarmiayi.

<sup>33</sup>Tura kashin káshik Papru ikiakár-tasa wakerak tímiayi “Ishichkisha yurumátarum. Atumsha katurse (14) tsawant kánutsuk yurumtsuk pujarme. <sup>34</sup>Seajrume, ishichkisha yurumárum kakaram ajastarum, uwemprataj tusarum. Iimiata, nekaatarum, imiatkisha túmatsuk péemkattarme” tímiayi.

<sup>35</sup>Nuna tuasua amik Papru apatkun achik Yúsan yuminsamiayi ashí ímmi-anuman. Tura puuk yuamiayi. <sup>36</sup>Tura apatkun yuan wáinkiar, ashí aents shiir enentáimsar yurumáwarmiayi. <sup>37</sup>Nusha ashí aents irurmaka jimiará sián nuyá ataksha setenta sais (276) ármiai. <sup>38</sup>Yurumáwar ejemakar, yurumkanka entsá utsankarmiayi, uunt kanu wampú ajasat tusar.

#### Kanu penké mesermiania nu

<sup>39</sup>Tura tsawarmatai wiantin armia nu, nunkan nekaacharmiayi. Túrasha énkentamunam kánmatak aan wáinkiar “Aj kanu anuntai” tiarmiayi. <sup>40</sup>Nuyá jiru entsá ajunman chapikrín tsupirkar entsá ikiukiarmiayi. Tura kanait jinkíárma ármia nuna chapikrín tsupirkarmiayi. Tura tarach kanú nujiin amia nuna nenakarmiayi. Túram kanu kánmatkanam anumsatuk ajasmiayi. <sup>41</sup>Tura wainchi jimiar ámunam jeá kanu entsá wayá tepeamiayi. Tura kanú senkarinkia chíchimi yakí takuir ajíamu asa kupintramiayi. <sup>42</sup>Suntarsha, achik júamu armia nú shuaran máataj tusa wakeriarmiayi, yukuak pisararain tusar. <sup>43</sup>Tura kapitíáncha Páprun uwentikrataj tau asa nuna túratniun tsankatkachmiayi. Antsu chichaak “Emka yukuaktin nékarmena nu yukuakrum péemkatarum, tímiayi. <sup>44</sup>Nuyá chíkichkia kanunmayá numi, kame nánkamas numi achikrum awamkarum péemkatarum” tímiayi. Tu túrawar ashí iwiaakuk jíintrarmiayi.

### Marta nunkanam túrunamia nu

**28** Tura ashí iwiaakuk jíintrar, nu nunka Marta naartin nekaamiaji. <sup>2</sup>Tura nuí matsamin armia nu, shiir awajtamsarmiaji. Tuma asamtai iisha tsetsema asakrin, tura yamisha yútakui, uunt jinia ikiapárrarmiaji. Tura “anamaitiarum” turammaji. <sup>3</sup>Pápruka jinia kukarun ikiaanank jinium pataamiaji. Túmawaj napi tsuéran ashamak jiinki, Papru uwején nemaramiaji. <sup>4</sup>Tura nú nunkanmaya aents, Papru uwején napi nemaran wáinkiar “Ju áishmansha shuáran majchuashit, tiarmiaji. Nayaantsanmaya uwempraitatan ni yusrí iwiaaku átinian suritiawai” tiarmiaji. <sup>5</sup>Páprusha ni uwején pear napin jinium awanmiaji. Tura penkesha yajauch ajaschamiaji. <sup>6</sup>Tura niisha eárchatpiash tusar ii pujuarmiaji. “Túmatskesha jaka inianchatpiash” tiarmiaji. Túrusha ti núkap pujussha penké najaweachmiaji. Túrunamtai, nuinkia nusháa enentáimprar “Pápruka yúschashit” tiarmiaji.

<sup>7</sup>Nú nunkanam aentsu penkeri ámiayi ni naari Pupriu. Nú Pupriu ni jeen in itiaarmamiaji. Tura menaintiú tsawant yurumkancha suramsarmiaji. <sup>8</sup>Tura nuí pujarin Pupriu aparí tsuer, numpajají ijiarki jáamiaji. Túmakui Papru werí iyumiayi. Tura Yúsan áujtus amik uwején nin awantkamiayi. Túram penker ajasmiayi. <sup>9</sup>Nu túramun nekaawar, nú nunkanmaya aents jaa armia nu tariar, niisha penker ajasarmiaji. <sup>10</sup>Túram incha ti shiir enentáimturmasar núkap ajampramsamiaji. Túram ukunam ii wétin jeamtai ashí ii atsumamun suramsarmiaji.

### Rúmanam jeawarmiania nu

<sup>11</sup>Ii wétsuk nú nunkanam menaintiú nantu pujusmiaji. Tura nuyá chíkich

kanunam enkempramiaji. Nu kanusha Arijiántrianmaya yaunchu tau menaintiú nantu yumi yútakui nuí pujumiayi. Nú kanu nujiin numi-yus najankamu jímiar ekemiarmiaji, ni náarinkia Kástur tura Púruks. <sup>12</sup>Iisha nuí enkemprar weri Serakúsa péprunam jeamiaji. Nuí menaintiú tsawant pujusarmiaji. <sup>13</sup>Tura jíinkir nuyanka nayaantsa ayamach weri Rijiu péprunam jeamiaji. Nuí kanarmiaji. Tura kashin anaria nase suut umpuunti támiayi. Tuma asamtai nú kashinkia Putiuri péprunam jeamiaji. <sup>14</sup>Nuí jeawakrin Yus-shuar pujuarmia nu, ni jeen juramkimiaji. Tuma asamtai nuin chikichkí tumin pujusmiaji. Tura nuyanka nunkan Rúmanmaani wémiaji. <sup>15</sup>Tura Rúmanmaya Yus-shuar, ii jeatniurin neka ásar jintiá inkiunmaktai tusar winiarmiaji. Chíkichkia Apiu pepru támanum táarmiaji, tura chíkichkia, Menaintiu Jeá tutainium táarmiaji. Nuna káuncan wáiniak Papru shiir enentáimias Yúsan yuminsamiaji.

<sup>16</sup>Tura ii Rúmanam jeawakrin kapitían Juriu achikia yarumman Rúmanmaya uunt kapitíanin etetimiaji. Túrusha, Pápruka jeá ikiamas niisháa pujustí, tiarmiaji. Tura Páprun ísat tusa chikichkík suntarnak ni jeen apujtusarmiaji.

### Rúmanam Papru Yus-Chichaman etserkamiania nu

<sup>17</sup>Nuyá menaintiú tsawant nankaasmatai Pápruka Rúmanmaya Israer-aentsu penkerin untsuk ikiaanank “Yatsurtiram antuktarum. Wisha Israer-áentsun yajauchin penké túrachmiajai. Tura ii uuntri akupkarmia nunasha yajauch chicharkachmiajai. Tuma ain Jerusarénum winia achirkar Rúmanmaya áentsnum surutkarmiaji. <sup>18</sup>Tura nu aencha winia anintsar, akupkatai, turutiarmiaji, wisha penké yajauchin, mantamnamnia



tímianu túrachu asamtai. <sup>19</sup>Túrasha Israer-shuarka “Atsá, akupkairap” turutiarmiayi. Nu tuma asamtai, “antsu uunt akupin nekarati” tímiyajai. Wikia wíi shuara tunaarín kapitíánin ujaktinian táchaitjai. <sup>20</sup>Tuma asamtai, yatsurtirmin, atumin untsukjarme chichastaj tusan. Yusa anaikiamuri, Israer-shuarti nákaunia nu táwiti wi tu étserkui, juí achikiar jínkiámu pujajai” tímiayi Papru.

<sup>21</sup>Tutai niisha tiarmiayi “Iisha Jutía nunkanmaya aentsti, ame yajauch túramu papí penké wáinkiachuitji. Tura ii shuar nuyá táarainia nusha “au yajauch túraiti” tu ujatmakcharmaji. <sup>22</sup>Túrasha ashí nunkanam yamaram chichaman jintinian yajauch chicharainiawai tama antukji. Tuma asamtai amesha nu warintia enentáimtam nekaatai tusar wakeraji” tiarmiayi.

<sup>23</sup>Nú tsawantaj iruntrami tiarmia nú tsawant jeamtai, ti untsurí aents Papru pujamunam iruntrararmiayi. Papru jintintiniak Muisais yaunchu aar akupkamia nujaj tura chíkich Yúsnan etserniu aarmarijiaisha, Jesus nekas Yusa Anaiki-amurínti tusa paant jintintiawarmiayi. Nuna tura káshik nankaama Yus akupeamunam pachiinkiatniun étse-étserkua kjaraj iniaisamiayi. <sup>24</sup>Tura Papru táman antukarmia nu, chíkichkia, nekasaiti tusar umikiarmiayi. Tura antsu chíkichkia, nekaschaiti tusar umikcharmi-

ayi. <sup>25</sup>Chikichkí enentaik<sup>i</sup> enentáim-satin atsá asamtai, jiinki weartasa pujuarmiayi. Túmainiakui Papru chichaak “Nékasen Yusa Wakaní yaunchu Yús-nan etserniu, Isayas naartin áarmarijiaí ii úuntrín chicharuk juna tímiayi:

<sup>26</sup>“Ame weme au aents ju titia:

“Ántutka ántakrumsha nekaashtatrumé, íitkia iyakrumsha wáinkiashtatrumé.

<sup>27</sup>Warí, au shuara enentáí katsuarai; Kuishijiaí ántaksha ántichua núnin ániawai,

Jiisha epetkamua áanin ániawai, Iyaksha wáinkiaín tusa, ántaksha antukain tusa

Enentáimkiusha nekaawain tusa,

Winí uwemprain tusa, tura Winí tsuamaraín tusa túrunayi”.

Nuní áarmaiti. <sup>28</sup>Tuma asamtai, nekaatarum. Yamaikia Yusaj uwempratín ana nuna Israer-shuarsha susamuiti. Tura ninkia nekas umikiartatui” tímiayi. <sup>29</sup>Tura Papru nuna tí iniaisamtai Israer-shuar nuamtak núkap chicharnaiyasua wearmiayi.

<sup>30</sup>Tura Pápruka nuín jea ikiamsamunam jimiará uwí pujusmiayi. Tura ashí aents nin iyutaj tusa wearmia nuna ni jjeen itiaamiayi. <sup>31</sup>Tuma asamtai Papru arantutsuk urukuk Yus akupeamunam ati, Uunt Jesukrístu túramuríncha ashí etserkamiayi. Nútiksān etserkatniuncha Páprun penké suritkiacharmiayi.

*Papru***RÚMANMAYA SHUARAN***papí akuptukma***Papru Rúmanmaya****Yus-shuaran áatramania nu**

**1** Wi Papru Jesukrístu takarniuitjai. Núnisan Yus achirak ni Shiir Chichamen etserkat tusa akatar akuptukmiayi.

<sup>2</sup>Nu Chichamun Yus yaunchu “akupkattajai” tímiayi. Núnaka Yúsnan etserin Yus-Papinium paant ujakarmiayi. <sup>3</sup>Nu Chichamnum Yus ni Uchirín áujmatui. Ayashijiaínkia Tawit weeanum akiiniamiayi. <sup>4</sup>Tura ni tishiir wakaníjiaínkia Yusa Uchirínti. Tura ti kakarmaiti. Jakamunmaya nantakmiajai nekas Yusa Uchiríja nu, paant nekanamiayi. Ni-isha ii Uuntri Jesukrístuiti. <sup>5</sup>Ni túramujai Yus shiir enentáimturuk nu Shiir Chichaman etserkat tusa akuptukmiayi. Núnisan ashí nunkanmaya shuar nu chichaman umirkar Jesusa náarín shiir awajsarat tusa akuptukmiayi. <sup>6</sup>Atumsha nuyá shuaraitrume. Tura Jesukrístunu ajasarat tusa Yus achirmakuitrume.

<sup>7</sup>Ashí Yus aneamutirmincha Rúmanam matsatrum nuna ju papin áateajrume. Yus ti péñker awajtamsatniun wakerutmarme. Ii Aparí Yussa ii Uuntri Jesukrístusha waitnentrainia ásar imiatkinchanum ti shiir pujustinian yainmakarti.

**Papru Ruma péprunam****irautinian wakerimiania nu**

<sup>8</sup>Émkasha, átum Yus nekas enentáimtamun ashí nunkanam áujmate-nan nekaan Jesukrístun pachisan Yúsan ti shiir yumínsajai. <sup>9</sup>Tuke enentáirjai Yusa Uchirín ashí shuarum etsertajai. Túrakui wi atumin ti Yus aneamutirmin-

cha Rúmanam matsatrum nuna ju papin áateajuke áujtamun Yus nékarui. <sup>10</sup>Ashí tsawant ni wakerutakuínkia fítjarum tusan Yúsan seajai. <sup>11</sup>Nekas ítniun wakerajrume. Nui jean wakanmin yainkian Yusjai kanakchamin ajasúk tusan wakerajrume. <sup>12</sup>Kame atumsha tura wisha Yus nekas enentáimtuinia asar mai ikiakánai ajatai tusan wakerajai.

<sup>13</sup>Yatsurú, tuke fítjarum tusan wakerimjiarme. Túrasha iyatsjarme. Kame Yus-Chichaman ujaakun chíkich shuarnuma áintsan atumíncha Yus kakaram takasman wáinkiatniun wakerajai. <sup>14</sup>Wikia Yus akuptuku asamtai ashí shuaran ujákartiniaitjai. Unuimiaruncha tura unuimiarchancha, ti nékainia nunasha tura nékachuncha, métekrak ujakartiniaitjai. <sup>15</sup>Tuma asan atumniasha Rúmanam pujarmena nunasha Uwempratin Chichaman ujitjarum tusan pujajai.

**Uwempratin Chicham kakarmaiti**

<sup>16</sup>Nu Shiir Chicham Yusa kakarmaríjiai ti kakaram asa ashí shuaran uwentikramniaiti. Tuma asamtai natsantatsjai. Nekas Israer-shuarnasha tura chíkich shuarnasha núnisan uwentikramniaiti. <sup>17</sup>Nu chichamnum Yus enentáimsamia nu páantaiti. Júiti: Áyatik Yúsan nekas enentáimtuiniakui Yuska “pénkeraitme” tíminiaiti. Yus-Papiniumsha núnisan tawai: “Yúsan nekas enentáimta nuna Yus “pénkeraitme” tutai tuke Yusjai shiir wekasattawai.” Tu áarmaiti.

**Aentsu tunaari**

<sup>18</sup>Shuar nekas chichaman nakitrar yajauchin túrataj tusar suriimiainiawai. Túrawar tuke tunaarintin ániawai. Nu shuaran Yus ti kajerkar ti asutiátniun nayaimpinmaya paant awajsaiti. <sup>19</sup>Tura nu shuarka ashí Yusna nekaamnia nuna Yus paant

awajsa asamtai pēnker nékainiawai. <sup>20</sup>Kame yámankamtaikniumiā Yus wáinchataitiat ni najanamurijjái júka paant nekaamniati: Nekas Yus asa tuke kakarmaiti. Nusha ti paant asamtai nu shuar tsānkurnarchartatui. <sup>21</sup>Yúsan nékainiayat shiir awajsacharmiayi tura yuminsacharmiayi. Tuma ásar aya ántira nunak enentáimtuiniak ni enentái tunaajái piakai. <sup>22</sup>Tura ti nekajái túniayát enentáimcha núnin ájararai. <sup>23</sup>Túmainiak jákachmin Yus imiá shiira nuna iniaisar shuar jakamnia nakumkamun shiir awajenawai. Tura nu arant nanamtinnisha napincha kuntinnisha yajasmáncha nakumkar nuna shiir awajenawai.

<sup>24</sup>Nu asamtai imiá yajauch enentáimiainiakui “áanik asati” tmiayi Yus. Túramtai ti natsanmainian túrunainiawai. <sup>25</sup>Yusna imiá nekasa nuna nakitrar antsu wait-chichaman anturkar nuna túrin ániawai. Tuke Yúsak shiir awajsatniun iniaisar antsu ni najanamun tikishmatainiak shiir awajenawai. “Antsu tuke Yúsak shiir awajnasí” tajai.

<sup>26</sup>Nuna túrin ásarmatai Yus natsanmainia nuna wakeruktinian tsānkatkarmiayi. Túramtai nuwasha áishmanjái tsanin̄tinian nakitrar nuamtak yajauch awajnainiawai. <sup>27</sup>Núnisan áishman̄sha nuwajái tsanin̄tinian iniaisar nuamtak áishman̄kak tsanirmanainiawai. Ti wakerunainiak ti natsanmainia nuna yajauch túrunainiawai. Tura yajauch túruiniak ni ayashí wáitsatniunak sumamawarmiayi.

<sup>28</sup>Tura tuke Yúsan nakitiainia asamtai ti yajauch enentáimiainiak pen̄ké túrachminia nuna túrawarti tusa Yus tsānkatkarmiayi. <sup>29</sup>Nu shuar ti tunaajái piaku ániawai. Tsanirmausha aya kuítniak wakerincha tura yajauch awajin ániawai. Nu arantcha

awakmakun kajerniusha man̄kartincha tuke máanaincha anan̄kartincha pen̄kercha awajkartincha, tsanumniusha ániawai. <sup>30</sup>Nu arantcha chikichnasha yajauch áujmatin ániawai. Yúsnasha nakitiainiawai. Áimniusha ániawai. Tura “pen̄keraitjai” tiar nan̄kaamantu enentáimtumainiawai. Tunáa túratniun eāniawai. Aparin̄cha nukurin̄cha umirainiatsui. <sup>31</sup>Enentáincha ániawai. Tana nuna umichu ániawai. Anen̄kartichu ásar waitnen̄kartichu ániawai. Tsānkurcha ániawai. <sup>32</sup>Yuska “Shuar nuna túrinkia jákatniuiti” taman nékainiayat tuke túrukin wénawai. Tura nu arantcha chikich yajauch túramtai ti shiir wararenawai.

### Shuar tunáa túramun Yus paant nékawai

**2** Amesha enentáimtumastá. “Shuar nu yajauchin túrana nu imiá tunáa shuaraiti” tákumka amesha métek túrakum imiá nekas sumamame. <sup>2</sup>Yuska nu tunaan túrin ainia nuna súmamtikiashtinkiait. <sup>3</sup>Amesha nuna túrin “imiá yajauchiiti” táyatam amesha métek túrakminkia Yus sumamtikiat-tana nuyá ¿itiurak uwemprattam? <sup>4</sup>Yus ti waitnentrama asa nu tunáa ikiukim Nin enentáimtustinian katsuntramuk nákmawai. Tura pen̄ker asa wárik asutiámchakui sumamashtiniaitjai ¿tu enentáimtumamek? Tu enentáimkiun ni waitnentramarj ántar awajsaitme. <sup>5</sup>Tura tunaarum enentáimtusuk tuke túrakmeka súmamtikiatin tsawantaj ti tunáa irutmampramujaj ti asutniáttame. <sup>6</sup>Nu tsawantaj ni túramujaj métek Yus ashí shuaran akirartatui. <sup>7</sup>Shuar tuke pen̄ker túrak ashí shiira nunasha tura tuke amuukachmin ainia nunasha wakeruiniana nuna Yus tuke iwiaaku Niijjái shiir pujustinian sústartatui. <sup>8</sup>Antsu pen̄kera nuna wakerutsuk antsu aya yajauchin wakeruiniak

Yúsan nakitiainia nuna Yus ti kajerak asutiáwartatui. <sup>9</sup>Nekas Israer-shuarsha tura núnisan Israer-shuarchasha tunaan túrin ániakka ti wáitsartatui. <sup>10</sup>Antsu nekas Israer-shuarnasha tura núnisan Israer-shuarchancha péñker túrin áinia núnaka Yus ti shiir imiatkinchanum apuj Sartatui. <sup>11</sup>Yus ashí shuaran akantsuk mai metek iyawai. <sup>12</sup>Shuar Muisais akupkamun nékatsuk tunaan túraka aya júnisan sumamawartatui. Tura shuar Muisais akupkamun nékayat tunaan túranka nu akupkamujai sumamawartatui. <sup>13</sup>Akupkamun aya antukarua nuka Yusai péñker ániatsui antsu antukar umirainia nuna Yuska “péñkeraiti” tawai. <sup>14</sup>Israer-shuarchaka Muisais akupkamun takakainiachkusha aya ni enentájjiai nu akupkamun umirainiak <sup>15</sup>nu umireamujai Yus nu akupkamun ni enentájn ikiursarua nuka paant nekaamniaiti. Nujai métek túruiniak shiir enentáimiainiawai. Tura métek túruiniachkunka péñkercha enentáimiainiawai. <sup>16</sup>Wi Uwempratin Chichaman étsereaj nu ashí shuar uukrishá túramun ashí paant awaj Sartatui. Tura nuna etserkatniun Jesukristun anaitiukmiayi. Nu tsawantai tunaan túrin sumamawartatui.

### Israer-shuarsha Muisais akupkamun umircha ániawai

<sup>17</sup>Ámeke “Tura Israer-shuaraitjai. Muisais akupkamun takakkui winia Yúsruka ti shiir enentáimturui, tátsumeash. <sup>18</sup>Yus wakeramuncha nékajai. Tura akupkamun nekaan péñkera nuna wakerajai, tátsumeash. <sup>19</sup>Wakannium kusuraru áinia nunasha jintintiamniaitjai. Tura tsáapnianian nekamtikiawarminiaitjai, tátsumeash. <sup>20</sup>Akupkamu ti péñker neka asan nekasa nuna unuimiaruitjai. Tuma asan nékachuncha ántuiniachuncha jintintiamniaitjai” tátsumeash.

<sup>21</sup>Pai, chíkichka unuiniaiatmesha ¿urukamtai imia ámeke unuimiatsum? “Kasamkashtiniaiti” tu étsereatsmek. Táyatmesha ¿urukamtai ámeke kasamam? <sup>22</sup>“Tsanirmashtiniaiti” tátsumek. Enta, ¿urukamtai ámeke tsanirmam? “Ántar-yusan nakitiajai” tátsumek. ¿Urukamtai ámeke nu yusa jeenia kasamam? <sup>23</sup>Akupkamun takakajai tusam shiir enentáimtumayatam nu akupkamu umireachkum Yus yajauch awajeatsmek. <sup>24</sup>Yus-Papiniumsha núnis áarmaiti: “Átum péñker umirchamujai Israer-shuarcha Yúsan yajauch chicharainiawai.”

<sup>25</sup>Muisais akupkamia nu ashí umireakmeke nii timia núnismek tsupirnaktin péñkeraiti. Tura takamtsuk umireachkumka tsupirnakcha núnisketme. <sup>26</sup>Chíkich shuarsha tsupirnakchaitiat Muisais akupkamun umireakka tsupirnakshesha tsupirnakua áintsankete. <sup>27</sup>Nu shuar tsupirnakchaitiat akupkamun ashí umireak atumin tsupirnakutirmin akupkamu takakuitiatrum umircha asakrumin súmantikramawartatui. <sup>28-29</sup>Kame nekas Israer-shuarka aya pátatkechu antsu tuke enentájjiai Yúsnan wakera núiti. Núnisan nekas tsupirnaktkia aya ayashjjiainchuiti antsu enentáiniam shiir átinia núiti. Nekas akupkamu aya áarchamuiti antsu nekas enentájjiai umirkamua núiti. Nekas tú tura núnaka aents shiir enentáimtuiniachkuisha Yus shiir enentáimtawai.

**3** Núnis aisha Israer-shuar ainia nu ¿warí péñkernak takakainia? Tura tsupirnaktkincha ¿wariniak yayá? <sup>2</sup>Ti péñkeraiti. Warí, émkaka, Yus ni chichamen Israer-shuaran súsacharmakia. <sup>3</sup>Kame chíkich chíkich umichu ániakui Yus tsanatkamkia nuna nú shuaran súsachmatainkia nuikia “Yus umichuiti” ¿títinkiait? <sup>4</sup>Péñkea. Antsu Yuska nekas túratniua

nujaj métek ashí túriniaiti. Shuar umichu ániakuisha ni támarin mash umiktatui. Ni tamajaj shuáran wáittrin awajeakka nusha péñkeraiti. Núnisan atí. Yus-Papisha métek tawai:

“Támena nuna “imiá nekasaiti” tiartatui, tura súmamtikramataj tuñiakuisha nupetmaktatme” tawai.

<sup>5</sup> Nu arantcha, “Wi tunaan túramujaj Yus imiá péñkera nuna paant awajeakka ¿urukamtai winia asutiu? ¿Nuka péñkerkait?” tíchatapash. (Kame aents chichainia núnisnak tajai.) <sup>6</sup> Warí, Yus péñkerchaitkiunka ¿itiurak ashí shuara tunaarin súmamtikiawarat? Kame imiá péñkeraiti.

<sup>7</sup> Núnisan, “Wi umirkachmajaj Yus tuke umiiniana nuna paant awajeaknaka nuikia nujaj in shiir awajsamta ¿urukamta “tunaitme” túruta?” tíchatapash. <sup>8</sup> Warí, “tunáa túramujaj Yúsán péñker awajeajai,” tú nekas enentáimpramniatkiuinikia shuar nuikia “Wats, ashí péñker áti tusar tunáa túratai” tímín ainti. Kame chíkich shuar in kajertamainiak “nuna jintintiniawai” túramji. Nu shuar sumamawartin ániawai.

### Ashí shuar tunáa túraitji

<sup>9</sup> Nuikia Israer-shuartikia chikichjaj nankaamas ¿péñkerkaitiaj? Penksha. Warí, Israer-shuartisha Israer-shuarchajajisha ashí métekrak tunaan túrin ániawai. Núnaka jú áarmajaj paant awajsaitjai.

<sup>10</sup> Yus-Papisha núnisan tawai:

“Péñkeran túrin chikichkisha atsawai.

<sup>11</sup> Yúsán nekaatniun nakitiainiawai. Yushasha eñiniatsui.

<sup>12</sup> Yusnumiá kanakiar menkakatniunam wénawai. Chikichkisha péñkeran túrin penké atsawai.

<sup>13</sup> Ashí yajauch chichainiak iwiarsamu yama urainiua núnisan ániawai. Ni chichamejaj tuke anankartin áni-

awai. Chichame napía áintsan najamin ániawai.

<sup>14</sup> Aya yajauchin kakaram áujmatin ániawai.

<sup>15</sup> Máataj tusa wárik yujarin ániawai.

<sup>16</sup> Aya ti itiurchat ti yajauch awajin ániawai.

<sup>17</sup> Shiir pujustinian nékainiatsui.

<sup>18</sup> Ishichkisha Yúsán ashamenatsui.”

<sup>19</sup> Yaunchu akupkamun umirkatin ainia nú shuar aya tákamtak umirkatin ániawai. Tuma asamtai ashí shuar umirkachu ásamatai Yus nujaj súmamtikiawartatui. Túrakui niisha pachischamin ániawai. <sup>20</sup> Akupkamuka aya ii tunaarin paant awajturmajaj. Tuma asamtai akupkamu péñker umirkatniujaj Yus “péñkeraitme” turamchamniatjai.

### Aya Yus shiir enentáimtusar uwempramniatjai

<sup>21</sup> Yus-Chicham yaunchu áarmanum itiura Yus in “péñkeraitme” túrammini-aitiaj nuna paant tawai. Kame akupkamujajinchuiti. <sup>22</sup> Antsu iisha ashí shuasha núnisan aya Jesukrístu shiir enentáimtakrin Yus “péñkeraitme” túraminiatjai. <sup>23</sup> Kame ashí shuarti tunáa túraitjai. Tuma asar Yusjaj métek péñker ajastin penké jeatsji. <sup>24</sup> Tura Yus in waitnentraama asa kuítchajaj “péñkeraitme” túramji. Jesukrístujaj uwemtikrampra asa túramji. <sup>25</sup> Tura Krístun akupkamiayi ni jakamujaj ashí tunaan asakátratniun. Túramtai shuar Nin nekas enentáimtuiniakui Yus tsankuramniatjai. Yaunchu tunáa túramun katsunteak enentáimtuschiayi. Yamái tsankuramnia nuna yaunchu nekáa, nuna túramniuyayi. <sup>26</sup> Tura yamaiya tunaancha tsankureak ashí shuar Jesusan nekas enentáimtuinia nuna “péñkeraitme” tuke tímíniaiti. Krístu jakamujaj nuka paant ajasai.

<sup>27</sup> Nújainkia ii péñker ajasjinia nu “winia kakarmarjaj túrunajaj” tícham-

nia asar ¿nankaamantu enentáimtu-marminkaitiaji? Penksha. Warí, akupkamu umitsuk aya Kristu nekas enentáimtakrin Yus “pénkeraitme” túramji. <sup>28</sup>Nujai páantaiti. Akupkamu umirtsuk aya Jesukrístu shiir enentáimtakrin Yus “pénkeraitme” túramminiaitji. <sup>29</sup>Warí, Yuska Israer-shuarnasha tura núnisan Israer-shuarchancha mai ni Yúsrinchukait. <sup>30</sup>Kame aya chikichik Yúschakait. Tura tsupirnakuncha tsupirnakchancha mai metek aya Jesukrístun nekas enentáimtuiniakui “pénkeraitme” tímíniatí. <sup>31</sup>Shuar Yúsan shiir enentáimtamujai pénker ajastin ániakui nujai ¿akupkamu ántar awajsamukait? Atsá. Antsu nuna nankaamas umirkatin awajsamuiti.

**Apraámsha Yúsan shiir  
enentáimtamujai  
pénker ajasmiania nu**

**4** Ashí Israer-shuara uuntri Apraám enentáimtustai. Niisha ¿itiurak Yusjai pénker ajasma? <sup>2-3</sup>Ni pénker takasmajai Yusjai pénker ajasuitkiunka nankaamantu enentáimtumarainti. Antsu Yus-Papí tawai: “Apraám Yúsan shiir enentáimtakui Yus “pénkeraitme” tímíayi” tawai. Nu túramu asa Apraámsha Yus ímmianum nankaamantu enentáimprachminiaití. <sup>4</sup>Shuar íniamna nu takasmatai ¿aya tsanka asam akiktatmek? Warí, ni takasmanum páchtsuk akikchatniukait. <sup>5</sup>Antsu shuar ni pénker turamuri enentaimtsuk áyatik “Yus tunáa shuaran pénker awajniuiti” tu enentáimtakui Yuska tsanka asa “pénkeraitme” tawai. <sup>6</sup>Tura pénker túrachunak Yus “pénkeraitme” takui nu shuar shiir warasminiaití. Núnisan tawai uunt akupin Tawit: <sup>7</sup>“Shuar ashí ni tunaarin Yus asaká-tar tsankuramu ana nuka shiir enentáimpramniaití.

<sup>8</sup>Uunt Yus ni tunaarin enentáimtachma asa ti warasminiaití.” Tu tímíayi Tawit.

<sup>9</sup>¿Aya tsupirnakukeash warasminiait? Tura tsupirnakchasha waraschamniakait. Warí, Apraám Yúsan shiir enentáimtakui Yus “pénkeraitme” tímíayi. <sup>10</sup>Tura Apraám tuke tsupirnatshai Yus nuna tímíayi. Emka Yus “pénkeraitme” timia nú ukunam Apraám tsupirnakmiayi. <sup>11</sup>Apraám tsupirnatshai Yus shiir enentáimtusmatai Yus “pénkeraitme” tusa “tsupirnakshai” tímíayi. Nú-jainkia ashí Yúsan shiir enentáimtuinia nú shuar tsupirnatshasha Apraám weeá ániawai. Tura nu shuaran Yus “pénkeraitme” tawai. <sup>12</sup>Tsupirnakusha aya tsupirnakui asa Apraám weeá ániatsui antsu nu arant Apraámjai métek Yúsan shiir enentáimtuinia nuka Apraám weeá ániawai. Kame Apraám tuke tsupirnatshai Yus shiir enentáimtusmiayi.

**Yus shiir enentáimtamujai  
Nii timia nu uminkiattawai**

<sup>13</sup>Yaunchu Apraáman Yus chicharuk “Amincha amée weeá shuarnasha jú nunkan susattajai” tímíayi. Nunasha Apraám Yus akupkamun umireakui tíchamiayi. Antsu Apraám Yúsan nekas enentáimtakui Yus “pénkeraitme” taku nuna tsankatkamiayi. <sup>14</sup>Kame aya akupkamun umirniun súsatniuitkiunkia nuikia Yus enentáimtustin ántraití. Tura Yus Apraáman timia nusha ántraití. <sup>15</sup>Akupkamu akui shuar umirkachka ti asutniáshatuak. Tura atsakuinikia ¿asutniáshatniukait? ¿Itiurak umirtsuk ikiuktin?

<sup>16</sup>Tuma asamtai Yus ti anenkartin asa Nin nekas enentáimtuinian ashí tsankatkaití. Nújainkia Apraám weeasha Yus Apraáman timia nuna páchtsuk wáinkíartatui. Iisha Apraámjai métek Yus nekas enentáimtakur ní weeitji. Tuma asamtai Muisais akupkamun

umirniuncha tura umirniuchuncha mai metek ashí in Yus ashí Aprááman timia nuna tsan̄katramkattaji. <sup>17</sup>Kame Yus-Papinium Apráám áatramuiti: “Untsurí shuarsha amée weeá ajasartatui.” Nu asamtai iisha Apráámjají métek Yus shiir enentáimtakrinkia Yus incha Apráám weeá áintsan̄ fírmaji. Nú Yuska ti kakaram asa jakancha iwiaaku awajniuiti; tura atsana nunasha ana nútiksān̄ nájānuí.

<sup>18</sup>Yus “ti pampantatme” takui Apráám ti uuntach áyat Yus timian enentáimtak yajutmartinian nákasmiayi. Nujají untsurí shuar ní weeá ajasarmiayi, Yus timia áintsān̄. <sup>19–20</sup>Apráámsha sian̄ (100) uwí takakuiat tura ni nuwé Sarasha júretsuk uunt ajasmataisha tuke iniaitsuk Yus tímia nuna nekas enentáimtusmiayi. “Yus nekasash ta” tút-suk shiir awajsamiayi. Nujajísha nuna nan̄kaamas kakaram ajasmiayi. <sup>21</sup>Tuma asa “nekas Yus tana nuna páchitsuk umiktatui” tu enentáimpramiayi. <sup>22</sup>Nu asamtai Yus “pén̄keraitme” tímiayi.

<sup>23</sup>Tura Yus nekas enentáimtamunam Yus “pén̄keraitme” tana nu aya Apráámnak áatrachmaiti. <sup>24–25</sup>Antsu incha túramji. Iisha núnisrik ii Uuntrí Jesus nekas enentáimtakrinkia Yus incha “pén̄keraitme” turamatjají. Jesuska ii tunaarín jarutramkatniun surunkamiayi. Tura nujají Yus in “pén̄keraitrume” taku Jesusan ataksha iniantkimiayi.

### Yus “pén̄keraitme” túramkurin shíuraiti

**5** Tuma asamtai Yus nekas enentáimtakrin Yus “pén̄keraitme” túramji. Nujají iisha Yusjají shiir nawamnaikiar pujají. Núnaka ii Uuntrí Jesukrístu ni jakamujají sumartamkamiayi. <sup>2</sup>Tura Nii shiir enentáimtakur Yusají weankaitjají. Tura Kristu jarutramkakrin Yus ti anenmaji. Tura tuke anenma asakrin Nijijají

métek shiir ajastin nákakur waraaji. <sup>3</sup>Nu arantcha yamáí itiurchat pujayatrik nu itiurchatjají unuimiartatjají tusar waraaji. Katsuntratniuncha unuitiamji. <sup>4</sup>Tura nu unuimiarar ii katsuntram paant átatui. Tura nuyá Yus ti shiir awajtamsattajnia nuka shiir enentáijijají nákastatjají. <sup>5</sup>Nu ti shiir enentáimsar nákamujají ananmamtsují. Yuska ni Shiir Wakanín ii enentáin pujurtamuk ni anenkartutairín ti paant awajturmají. Tuma asamtai Yus túratin nákaajnia nu imiá nekas wainkiattajají.

<sup>6</sup>Iikkia pen̄ké uwemprachmin asakrin tsawant jeamtai Kristu ashí shuara tunaarín jarukmiayi. <sup>7</sup>Shuar ch̄kích shuaran uwemtikratniun ¿jaruktatuak? Pén̄ker shuar ain̄ jarukchattawai. Kame ti pen̄keraitkiuinkia jarukchaintiash. <sup>8</sup>Antsu ii tuke tunáa árinín Kristu jarutramkamiayi. Nujají in ti anenmajnia nuna ti paant iniakturmají. <sup>9</sup>Tura ni numpejají tunaaríncha awajsamu asar imiá nekas Yus asutiámatniua nuyá uwempraitjají. <sup>10</sup>Yusa nemasrj áyatar Yusa Uchirí jakamujají yamaikia Yusjají shiir nawamnaikiar pujají. Nu arant nuikia Kristu tuke iwiaaku asa iijijají tsanin̄kiu asa ashí yajauchinmaya uwemtikramar tuke shiir awajtamsattajají. <sup>11</sup>Ii Uuntrí Jesukrístu jakamujají Yusjají shiir nawamnaikia asar ti waraaji.

### Atañsha tura Krístusha túrawarma

<sup>12</sup>Ayu. Yámankamtaik emka áishman̄ Atañ nínki tunaan túramtai nú tunaajají ashí shuar tunaarintin ajasarmiayi. Tura ashí tunaarintin ajasar mash jákatin áiniawai. <sup>13</sup>Akupkamu atsakuinkia umirkachma nekaachminiaiti. Tuma ain̄ Muisais akupkamu atsaisha tuke tunaan túrin árimiayi. <sup>14</sup>Atañ pujumia nuyá Muisais tuke akupeatsain̄ shuara tunaarín paantcha ain̄ ashí shuar tunaan túrawar jákarmiayi. Kame ni tunaarín Atañna áintsachauyayi. Atanka Yus akupkamu

paant ujakman umirkachmiayi. Antsu nu shuar Yus akupkamu paant nékainiachiatan tunaan túrin ániak jákarmiayi. Tura Atanka Krístujai apatkar enentáimpratai.

<sup>15</sup> Atan tunáa túramia nujai apatka iisam, Yus in tsankatramaj nuka nankaamas péñkeraiti. Kame Atan niñki tunaan túramujai ashí aents untsurí armia nu, tunaarintin ániak, jákarmiayi. Tura Yus in ti anenma asa chikichik áishmanjai nuna nankaamas tí shiiran tsankatramaji. Jesukrístujainkia untsurí shuaran uwemtikrar ti shiiran tsankateawai. <sup>16</sup> Atanka tunaari imiá yajauch ain nuna nankaamas péñkeran Yus tsankatramkaitji. Iis, aya chikichik tunaan túramujai aents sumamawarmiayi. Antsu Yus uwempratniun tsankatramaj nújainkia ti untsurí tunaan asakáruiti, tura “péñkeraitme” túramji. <sup>17</sup> Chikichik áishman tunaan túramujai aents jákatin ániawai. Tura nuna nankaamas chikichik áishman Jesukrístu túramujai ti shiir pujustatji. Kame Yus ti anenma asa ii péñker túratsrinin “péñkeraitrume” túramji. Nu asamtai yamaram iwiaakmanum kakaram ajaji.

<sup>18</sup> Atan tunaan túramujai ashí tunaarintin ajasar jákarmiayi. Núnisan Jesukrístu péñker túramujai ashí shuar Yus “péñkeraitme” timia nuka yamaram iwiaakmajai tuke pujusartatui. <sup>19</sup> Núnisan chikichik áishman umirkachmajai untsurí tunaarintin ajasarmiayi. Tura chikichik áishman umirkamujai untsurí shuar péñker awajnasarmiayi.

<sup>20</sup> Wats, tunáa ti paant atí tusa Yus ni akupkamurin susamiayi. Túrasa ti tunáa pampaakui Yus nuna nankaamas waitnentramak nu tunaan asakátramji. <sup>21</sup> Shuar tunaan túrin ásar jákatin árimiayi. Tura núnisan ii Uuntrí Jesukrístu túramujai Yus in

“péñkeraitrume” túramkurin iisha tuke iwiaaku pujustiniatji.

**Krístujai jaka asar tunáa  
túrachminiatji tura Krístujai  
tsanin̄kiu asar iwiaakuitji**

**6** Núnisaitkiuin̄kia Yus nankaamas waitnentrampratai tusar ¿tunáa túratatjik? <sup>2</sup> Péñkea. Warí, iikia tunáa túrashtin jákaitji. Jáka ¿itiurak tunaan túramniat? <sup>3</sup> Imianniutikia Krístujai tsanin̄kiu asar imianir Nijijai métek jaka áintsar aji. <sup>4</sup> Tura imianir Krístujai jaka áintsar métek iwiarasuitji. Tura Yus ti kakaram asa Krístun jakan iniantkimia núnisan incha nu kakarmajai yamaram enentáijjai péñker wekasatniun iniantamkimiaji.

<sup>5</sup> Krístujai tsanin̄kiu asar Nijijai métek jaka áintsan̄ketji. Tura núnisan Nijijai métek nantaktiniatji. <sup>6</sup> Yaunchu enentáim̄t̄ain̄kia Krístujai métek jaka asamtai ii yajauch wakerutain emen̄kátrutmakuitji. Tuma asamtai yamaikia pen̄ké umirkashtiniatji. <sup>7</sup> Kame ¿jáka itiu-rak tunaan túrat? Yamaikia an̄kant ajasuitji. <sup>8</sup> Iisha nekas Krístujai jákaitkiurkia Nijijai métek tuke iwiaaku pujustin enentáim̄ji. <sup>9</sup> Kame Krístuka chikichkí jaka nantakin asa atakka jákash-tatui. Túmaitkiui atakka ajakrachmini-aiti. <sup>10</sup> Krístu chikichkí jaka asa ashí tunaajai itit awajsachmin ajasuíti. Tura yamaikia iwiaaku pujá asa Yúsan shiir awajsatniun pujawai. <sup>11</sup> Atumsha núnis-rumek jaka áintsarum tunáa túrachmin enentáimtumastarum. Antsu ii Uuntrí Jesukrístujai tsanin̄kiu asarum iwiaaku pujakrum Yus shiir awajsataram.

<sup>12</sup> Nu asamtai tunaaka ayashmiin̄ akuptamkashtiniat̄rume. Ayashí wakeramuri umirkashtiniat̄rume. An̄kantaitrume. <sup>13</sup> Atumi ayashí tunaan túrat tusarum ikiasairap. Antsu jakamunmaya nantakin asarum Yus wakeramu túratin surumaktarum.



Tura ayashmisha aya pênkernak túratí tusarum Yus íktustarum. <sup>14</sup> Akupkamu umirkatniujai iwiaaku pujatsrume. Antsu atumin Yus ti anenma asa yamaram iwiaakman suramsaitrume. Tuma asamtai yamaikia tunaaka nupettamkachminiaiti.

### Tuke umireajnia nuna takarniurintji

<sup>15</sup> Nuikia akupkamu umirtsuk antsu Yus ti anenma asakrin iwiaaku pujakur ¿“Páchitsuk tunaan túramniaitjai” títiatjik? Pénkea. <sup>16</sup> Tuke umireajnia nuna takarniurintji. Nuka nékatsrumek. Tura ni takarin ajasam umirkatniuitme. Tuma asamtai tunáa umirkurkia ni takarniurintji tura umirkar jakattaji. Tura Yus umirkurkia pênker wekasattaji. <sup>17</sup> Atumsha yáunchuka tunáa umirniuitiatrum ikiukrum yamaikia nekas chicham antukurmena nu nekas atumí enentájjiai umirkaitrume. Tuma asamtai Yus ti yuminsatniuiti. <sup>18</sup> Yamaikia tunaanumiá ankant ajasu asarum ti pênker wekasatniunam pachiinkiaitume. <sup>19</sup> Paant nekaak tusan takarniun pachisan tájarme. Wats, yaunchu atumí ayashí muǰjmiainian tura ashí yajauchin túrat tusarum tsanƙamakmarme. Núnisrumek yamaikia atumí ayashí pênkeran túrat tusarum tura tuke Yusjai shiir wekasat tusarum tsanƙamaktarum. <sup>20</sup> Atumsha tunáa umirniuyarme nuikia pênker wekaichauyarme. <sup>21</sup> Tura nújaisha ¿warí pênkerna yáinmakmarum? Iista, yamáí natsanmainchakait. Nusha jákatniunam júawai. <sup>22</sup> Antsu yamaikia, tunaanumiá uwempra asarum Yus umirniuitrume. Antsu júka Yusjai shiir wekasatniunam júawai tura nuyá tuke iwiaaku pujustatrume. <sup>23</sup> Tunáa takarkumka tuke jákatniun akirmaktatui. Antsu Yuska iikia takaatsriniñ penké ántar tuke iwiaaku pujustinian suramsattaji. Ii Uuntri

Jesukrístujai tsanínkia pujá asakrin nuna túrutmattaji.

### Akupkamujai ankantaitji

**7** Enentáimpratarum yatsuru. Jáka akupkachminiaiti. Aya iwiaakna nu akupkamniaiti. Nu paant nékatsrumek. <sup>2</sup> Wats, nuwá nuátkamu ni aishri iwiaakkui niijiai tsanin pujustiniaiti. Tura aishri jakamtai ankant ajawai. <sup>3</sup> Tuma asamtai aishri iwiaakañ chíkich áishmanjai tsaníakka tsanirmawai. Tura ni aishri jakamtai chíkich áishmanjai páchitsuk nuatnakminiaiti tura nuikia tsanirmatsui.

<sup>4</sup> Núnisrumek atumsha, yatsuru, Kristu ayashí muchitmarí ajasu asarum akupkamu emettachmin jaka áintsarum ajasuitrume. Túrakrum Krístujai nuatnaikiatin áintsarum ankantaitrume. Niisha jakamunmayá nantakniuiti. Yamaikia Krístunu ajasu asar Niijiai tsanínkiar Yus wakeramu pênker túratniuitji. <sup>5</sup> Yaunchu wakerutai umirniuyaj nuí akupkamu enentáimtusar nuna nanƙaamas yajauchia nu wakerimji tura jákatniunam juramkimji. <sup>6</sup> Antsu yamaikia akupkamu emettachmin jaka asar ankant ajasuitji. Túrunar akupkamu yaunchu áarma nu iniaisar yamaikia Yusa Wakanjjiai tsaníakur yamaram iwiaakmajai pênker wekasamniaitji.

### Winia enentáiruñ tunáa ana nu

<sup>7</sup> Núnisaitkiuínkia “Akupkamu yajauchiiti” ¿títiajiash? Atsá. Warí, akupkamuka tunaan ti paant awajeawai. Akupkamu “Chikichna wakerukaip” táchakuínkia wakerukchajjai. <sup>8</sup> Tura nu akupkamun enentáimtakui winia enentáiruñ tunáa ana nu ashí yajauchin ti wakerumtikrimiyai. Kame akupkamu atsakui tunaan ti enentáimtichaintjai. <sup>9</sup> Yaunchu akupkamun nékachkun

nánkamsanak enentáimniuyajai. Tura akupkamun nekaan tunaan nekaamjai tura jaka áintsanak ajasjai. <sup>10</sup>Tuma asamtai akupkamujai péñker wekasatniuitiatan umirkatniun tujintiakuí aya jákatniunam jurukni. <sup>11</sup>Kame tunáa wakerutainkia nu akupkamujai anankrua péñker iwiaaku pujustinian surutsuk nu akupkamujai jákatniunam jurukmiayi.

<sup>12</sup>Tuma asamtai akupkamuka Yusna asa ti penkeraiti. Yajauchihuiti. <sup>13</sup>Nuikia ¿pénkera nu jákatniunam júrawak? Atsá. Antsu tunáa wakeruktin jákatniunam jurukmiayi. Nuna tura asa tunáa imiá yajauchia nu nekaamniaiti. Tura tunáa wakerutai péñker akupkamujai jákatniunam jurukmiatai, nujai Yus “tunáa wakerutai imiá yajauchiiti” tusa paant awajamiayi. <sup>14</sup>Akupkamuka Yúsnaiti. Nu paant nékaji. Antsu wikia ayashna nuna wakerakun tunaan umireajai. <sup>15</sup>Kame túrajna nuna itiurchat enentáimtajai. Péñker túratniun wakeraj nuna túratsjai. Antsu nakitiaj nuna nekaska túriniaitjai. <sup>16</sup>Akupkamu péñkeran nekaan umirkatniun wakerajai. Túrayatnak umirchaitjai. <sup>17</sup>Tuma asamtai wíchaitjai tunaan wakerakun túrajna nuka. Antsu winia enentáiruí tunáa wakerutai pujá asa nu túrumtikriniaiti. <sup>18</sup>Yaunchu enentáimtai winia enentáiruí pujana nu penké yajauchiiti. Nuna ti paant nékaji. Tuma asamtai péñker túratniun wakerayatnak penké tujintiajai. <sup>19</sup>Péñker túratniun wakerayatnak túratsjai. Antsu tunaan nakitiaj nuna túrajai. <sup>20</sup>Nu asamtai nakitiaj nuna túrakun wíchaitjai antsu winia enentáiruí tunáa wakerutai pujana nu túriniaiti. <sup>21</sup>Júnisaiti. Péñker túratniun wakerakun aya tunaan ínkiuajai. <sup>22</sup>Nekas enentáijjai Yusa akupkamurín wakera-

jai. <sup>23</sup>Tumai yaunchu enentáimtai winia enentáiruí pujurtak nupettawai tura nekas wakeraj nuna akirturui.

<sup>24</sup>Maa, ti waitiajai. Jú ayash wakera-mujai jákatniunmaya ¿yaki uwentikru-rat? <sup>25</sup>Yuska ii Uuntri Jesukristujai túrutmamniaitjai. Tuma asamtai Yúsan ti yumínkiajai. Ayu. Winia enentáirjai Yus akupkamun umirniuitjai. Antsu winia ayashrujai tunaan umireajai.

### Yusa Wakaníjiai péñker wekasatin

**8** Jesukristujai tsanínkiarun Yuska “tunaan túrawar jákatniunam wémin ániawai” tatsui. Nu shuar ni ayashí wakerana nuna umirtsuk Yusa Wakaní wakerana nuna umirainiawai. <sup>2</sup>Jesukristujai tsanínkiu asakrin Yusa Wakaní nekas iwiaaku awajtamsaitjai. Tuma asamtai tunáa túratniunmaya tura jákatniunmayasha ankant ajasuitjai. <sup>3</sup>Ayash wakerutainkia, wi akupkamun enentáimtakui, nuna nankaamas tunaan wakerumtikrimiayi. Tuma asamtai akupkamuka yáinkiachminiuyi. Antsu akupkamu tujinkiamia nuna Yus túrait. Ni Uchirín ayashtin awajas tunaan jarukat tusa akupkamiayi. Tura nujai ayash tunáa wakeramun nupetkamiayi. <sup>4</sup>Túramtai ii yamaikia ayash wakerana nu umirtsuk tura Yusa Wakaní wakeramu túrar akupkamu tana nu umirniuitjai. <sup>5</sup>Ayash wakeramun umirainia nu, ayashnia nunak enentáimtuiniawai. Antsu Yusa Wakaní wakeramun páchinia nuka Yúsnan enentáimtuiniawai. <sup>6</sup>Ayashnia nuna enentáimtuinia nú shuar jákatniunam wénawai. Antsu Yúsnan enentáimtuinia nuka Yusjai shiir nawamnaikiar tuke pujusartatui. <sup>7</sup>Aya ayash wakeramun enentáimtuinia nú shuar Yusa nemasri ániawai. Yus akupeamun nakitiainia ásar ni taman umirkatniun penké jeainiatsui. <sup>8</sup>Tuma asamtai shuar ni

ayashí wakeramurí warareakka Yúsan shiir awajsachminiaiti.

<sup>9</sup>Tura átumka ayash wakeramu umirtsuk tura Yusa Wakaní pujurtamkurmin ni wakeramu enentáimtiniaitrume. Ashí shuar Krísturtin ainia nu ni Wakanin takau áiniawai. Takachaitkiunka nuikia Krístunuchuiti. <sup>10</sup>Tura Krístu atumin pujurtamkurminkia atumí ayashí tunaajai jakamnia ain Yús “pénkeraitme” túramu asamtai atumí wakanínkia nekas tuke iwiaakuiti.

<sup>11</sup>Yus Jesukrístun jakan iniantkimiayi. Tuma asamtai ni Wakaní atumí enentáin pujurtamkurminkia Jesusan iniantkimia núnisan nu Wakanjai yamaram iwiaakmajai iniantamkittiarne.

<sup>12</sup>Tuma asamtai, yatsuru, ayash wakeramu penké umirkashtiniaitji.

<sup>13</sup>Ayash wakeramu umirniuitkiurmeka jakattarme. Antsu Yusa Wakaní pujurtamkurmin ayash wakeramu nupetkarmeka pénker wekasarum nekas iwiaaku átatrume.

<sup>14</sup>Ashí shuar Yusa Wakaní timiajai métek wekainia nu, nu shuar nekas Yusa uchirínti. <sup>15</sup>Yusa Wakaní in pujurtamkurin Yusa uchirí ajasar sapijmiatsuk Yusaí weamkar “Aparú” tímimniaitji. <sup>16</sup>Nu Wakan “nekas Yusa uchirínme” ii enentáin túramji. <sup>17</sup>Tura ni uchirí ajasu asakrin Yus tímia núnisan ashí Níiniun suramsattaji. Krístun ashí susatana núnisan incha suramsattaji. Yamái Krístunu takaakur wáitiakrikia ukunam Krístujai métek ti shiir awajnatstaji.

<sup>18</sup>Maa, yamá ti wáitiakrishana ukunmanka nayaimpiniam ti shiir pujakur nu wáitsamu kajinmatkittiaji.

<sup>19</sup>Tsawant jeamtai Yus ashí ni shuarin Nijijai métek ti shiir awajnatstaji. Nuin nekas Yusa uchirí ainia nu ti paant nekanattawai. Nu tsawantan wáinkiatniun ashí Yus najanamu írunka nu ti nákiniawai. <sup>20</sup>Ashí

Yus najanamia nuna yámankamtaik ti pénker najanamiayi. Túrasana yajauch ajasmiayi. Nusha ní neaskeka túrunachmiayi. Antsu Yus ukunam ataksha iwiarnartin atí tusa tunáa wayamunam yajauch ajasat tusa tsankatkamiayi. Tuma asamtai iwiarnartin tsawantan nákwai.

<sup>21</sup>Nu tsawantai ashí Yus najanamu emesnantinniumia uwemprattatui. Tura ashí Yus najanamuka shuar Yusa uchirí ajasarua nujai métek shiir awajnasar ankant ajasartatui. <sup>22</sup>Yamaisha ashí Yus najanamu ainia nu, nuwá jatema wáitia nunis ti wáitiainiawai. <sup>23</sup>Yus najanamuka ashí wáitiainiawai. Iisha Yusa Wakaní takakiatar ti wáitiaji. Tura Yusa Wakaní takakkur ashí Yus suramsattajnia nu nékaji achiktin. Tuma asar nekas Yusa uchirí paant awajnatstai tsawant nákwai. Nuisha ii ayashísha ankant awajnatstui. <sup>24</sup>Nu tuke enentáimtuki wéakur takamtsuk uwemprattaji. Yamái nu wáinchiatar tuke nákwai. Warí, ¿wáinjania nu nákwajik? <sup>25</sup>Tuma asar tuke waincha asar katsuntrar nákwai.

<sup>26</sup>Nu arantcha ii kakarmachu nekapakrin Yusa Wakaní yáinmaji. Kame Yus áusatniusha nékachkurin in yáinmaji. ¿Warí seattaji tura itieur seatjik? Nu nékatsji. Tura itieurchat pujakur ti wáitiakrincha Yusa Wakaní in áujtur-maji. <sup>27</sup>Tura Yus ii enentáin enentáimtaj nuna nékaiti. Tuma asa ni shuarí asakrin ni Wakaní ni wakeramujai métek seatramkurin ántawai.

### Ti nupetmakuitji

<sup>28</sup>Yus anea asakrin ashí nankaatamjania nujai Yus pujurtamji. Tura nujai pénker awajtamji. Nu paant nékaji. Tura Ni wakerimia núnisan Ní shuar awajtamsaitji. <sup>29</sup>Yámankamtaiknumia in nekarmak ni Uchirí Jesukrístujai métek ajasat

tusa achirmakmiaji. Nujaj Yusa uchirí untsurí ajasji. Tura Kristu ii iwiairinti. <sup>30</sup>Tura Yus achikmia nuna Niini awajsamiayi. Tura nu shuaran “pénkeraitrume” tímiayi. Tura ti shiir awajsamiayi.

<sup>31</sup>Wats, nuikia Yus in yáinmakrin çyaki in nupettamkattaj? <sup>32</sup>Ni Uchiríncha suritramkachmiaji antsu in jarutramkat tusa akupturmakmiaji. Tura asa ni Uchiríjjaj métek ti shiira nuna ashí suramsashtatjik. <sup>33</sup>Yus achikmia nú shuaran çyaki sumamtikiat? Yus Ápaka “pénkeraitrume” tiniu asa penké túrashtatui. <sup>34</sup>Tura çyaki “jiniun apenáti” titi? Warí, Kristu penké túrashtatui. Antsu nu shuaran jarukmiayi. Tura nantaki Yusa untsuuriní ekemas in áujturmají. <sup>35</sup>Kristu ti anenma asakrin in akantamkitin atsawai. Wáitiakrishá, itirchat ínkiuakrishá, shuar áinframkurnishá, tsukamakrishá, entsatai atsakuishá, tsúumainjajishá, tura mantamnakrishá, nujaj “Kristu anentsui” tíchamnaitji. Nuka Kristu anenkrattairiya akantamkitin jeatsui. <sup>36</sup>Yus-Papniumsha júnis áarmaiti:

“Amée-shuar asar tuke mantamnatin pujaji. Murik máatniua áintsan enentáimturmají.”

Tu áarmaiti.

<sup>37</sup>Tuma aijn Kristu in anenma asakrin Ni-ijjaj ti nupetmakuitji. <sup>38</sup>Kristu anenkrattairiya akantamkitin penké atsawai. Nuna ti paant nékajai. Jákatniusha, iwiaakmasha, nayaimpinmaya suntarsha, ashí nayaimpinmasha tura nunkanmasha akupin ainia nusha, yamáí írunna nusha, ukunam átatna nusha, <sup>39</sup>yakí írunna nusha, nunká írunna nusha, kame ashí Yus najanmu írunna nusha Yusa anenkrattairiya penké akantamkíchminiatji. Yusa anenkrattajsha ii Uuntrí Jesukristu túrunamujaj paant wainji.

### Yus Israer-shuaran ni shuarí arti tusa achikiarmiania nu

**9** Yamái tájana nu Kristu shuarí asan imiá nekasan wáitrusuk tájai. Winia enentáirsha tura Yusa Wakanísha “nekas tawai” turutainiawai. <sup>2</sup>Israer-shuaran waitnentakun ti kuntuts enentáimjai. <sup>3</sup>Wíshuar áiniakui Krístonmaya kanakin yumínaraintjai nujaj wíshuaran yáinminiatkiunka. <sup>4</sup>Israer weeá shuar áiniawai. Tura ni uchiríja áinis Yus achikiaruiti. Yusa wincharísha niijjai pujumiayi. Yaunchu Chicham ni weatríjjaj iwíaramuncha tura Muisais akupkamuncha susamiayi. Tura Yusa Jeeñ Nin shiir awajsatniun jintintiamiayi. Tura ukunam shiir tsanekatattana nunasha ujakmiayi. <sup>5</sup>Ni weatrín Yúsán ti péñker enentáimtin irunmiayi. Krístusha aents ajas nú shuarnum akiiniamiayi. Krístuka Uunt Yus asa tura ashí akupin asa Niñki tuke shiir awájnastí. Núnisan atí.

<sup>6</sup>Kame Yus ashí Nii timia nuna Israer-shuaran súsachmataisha nujaj “Yus timia nu uminkiachuiti” tíchamnaiti. Antsu junis enentáimpratniuiti: ashí Israer weeá áiniayatan Yusjaj ísmaka ashí nekas Israer-shuar áiniatsui. <sup>7</sup>Núnisan Apraám weeá shuarsha ashí nekas ni shuar áiniatsui. Iis, Yus Apraáman tímiayi “Aya Isak pampanma amee shuarum ártatui.” <sup>8</sup>Nujaj páantaiti. Shuar aya Apraam weeá akiinia asa Yus timian wáinkiashtiniaiti. Antsu Yus timiajjaj métek akiinia nu nekas Apraám weeá shuar áiniak Yus timian wainkiattawai. <sup>9</sup>Kame Yus Apraáman tímia nu júiti: “Tsawant jeamtai jeartiatjame, tura ame nuwem Sara uchin takustatui.” Tu tímiayi.

<sup>10</sup>Nu arantcha, ii weatrí Isaka nuwe Ripikia jimiampramiayi. <sup>11-13</sup>Nu uchisha akiiniainiatsain péñkernasha tura yajauchincha túruiniatsain Yus

Ripikian tímiayi: “Iwiairia nu ni patain umirkattawai.” Ataksha núnisan Yus ni Papiriin chichak “Jakupan aneakun Esaun nakitramjai” tímiayi. Nujainkia páantaiti. Yus wakerak aya ni enentáijiaín shuaran achikminiaiti. Nu shuar túrunamu enentáimtutsuk túramniaiti.

<sup>14</sup>Túriniaitkiui “Yus péñkerchaiti” ¿títiajiash? Atsá. <sup>15</sup>Yus Muisaisan júnis tímiayi:

“Wi wakerajna nunak waitnentattajai.”

<sup>16</sup>Tuma asamtai shuar ti wakerakuisha tura kakaram takaakuisha aya nujai Yus waitnentatsui. Antsu aya ní enentáijiaín wakerak waitnentawai. <sup>17</sup>Ataksha Yus-Papininum tawai “Yus Ejiptu nunka akupniurín tímiayi

“Ámijiaí ashí nunkanam winia kakarmarun nekaawarat tusan uunt akupniun awajsamjame” tímiayi” tawai.

<sup>18</sup>Tuma asamtai Yus Nii wakera nuna waitnentawai. Túrasha Ejiptu akupniurín túramia núnisan Nii wakera nú shuaran enentáin kátsuram awajtawai.

<sup>19</sup>Tura “Núnisaitkiuinikia ¿urukamtai shuaran Yus súmamtikia? turutchatapash. Nii wakerakuinikia ¿itiurkattajik?” turutchatapash. <sup>20</sup>Warí, aents asam Yujai ¿tunaiminkiaitiam? Nuwá pininikian nájankui núweka “¿urukamtai júnis najatam?” tíminkiait. <sup>21</sup>Nuwá wakerakka nu nuwejai amamkuncha tura yukunnasha nusháa takakmastinian mai najanachminkait.

<sup>22</sup>Yajauch shuar ti asutiátin ániak emesnartinnium wétin ániawai. Yus nu shuaran asutiá ni kakarmarín iniaktustaj tayat ti katsuntramiayi. <sup>23</sup>Tura katsunteak ni anenkrattairín iniakmasmiayi. Nú arant nuikia in waitnentramak shíir enentaijiaí péñker awajtamkur ni anenkrattairí ti paantchakait. Nekas shíir enentaijiaí péñker ajasat tusa yaunchu iwiartampramajai.

<sup>24</sup>Tura incha, Israer-shuarnumiasha Israer-shuarchanumiasha, ni shuari ajasat tusa achirmakmiaji. <sup>25</sup>Núnisan yaunchu Yúsnan etserin Useas Yus-Papinium tawai:

“Wíishuarchan Wíishuar awajsattajai. Aneachmancha aneamu awajsattajai.

<sup>26</sup>Tura Yus “Wíishuarchaitrume” tímia nú shuaran “Nekas iwiaaku Yusa uchirínuiutrume” ukunam títiatui.”

Tu áarmaiti. <sup>27</sup>Antsu Isayas Israer-shuaran páchis tímiayi:

“Israer weeá ti nankaamas untsurí áni-ayat penké ishichik uwemprartatui. <sup>28</sup>Kame Yus yajauchin akupkataj timia nuna takamtsuk wárik umiktatui.”

<sup>29</sup>Núnisan Isayas ataksha tawai:

“Ashí akupeana nú Yus in waitnentramachkurninikia Sutuma péprusha Kumura péprusha takamtsuk jákarmia núnisan jákaaji.”

### Israer-shuar uwempratin chichamjai tujinkiarmania nu

<sup>30</sup>Wátsek, Israer-shuarcha, Yus iisam ni túramurijiaí “pénkeraitji” tu enentáimtumainiachunak, Yuska, Nii enentáimtusam, “pénkeraitrume” tímiayi. <sup>31</sup>Antsu Israer-shuarka péñker akupkamun umiktinian wakeruini-ayatan tujintiainiakui nujai péñker ajastinian tujinkiarmai. <sup>32</sup>¿Urukamtai tujinkiarma? Yúsán enentáimtutsuk aya ni péñker túramujai péñker ajastinian enentáimtuiniak tujinkiarmai. Krístun enentáimtustinian nakitiainiak shuar kan kapen awankemtuktinia núnisan iniararmai. <sup>33</sup>Tura kaya tukumkar iniarmaniakait. Nu asamtai Yus-Papinium Krístun pachis tímiayi:

“Seun péprunam kayan ikiaujai, tawai Yus. Nu kayanam Israer-shuar tukumkar iniarartatui. Antsu Nin shiir enentáimtuinia nú shuar

natsaarchartatui” tawai.” Tu áarmaiti.

**10** Yatsuru, Israer-shuar uwemprarat tusan ti wakerakun Yúsan áujtajai. <sup>2</sup>Maa, uwempratniun nékachiatañ Yúsan shiir awajsatniun ti wakeruiniawai. <sup>3</sup>Túmaitiat shuáran Yus péñker awajsatniun nékachu ásar aya ni péñker túramujaiñ péñker ajastinian wakeruiniawai. Tuma ásar Yus péñker enentáimtamujai péñker ajastinian jeacharai. <sup>4</sup>Aya Kristu enentáimtamujai péñker ajastin asamtai akupkamu umirkatniujai péñker ajastin ántrai.

<sup>5</sup>Akupkamujai péñker ajastinian pachis Muisais tímiayi: “Nuna takamtsuk umirniuka nujai péñker pujustatui.” Tu áarmaiti. <sup>6</sup>Antsu Kristun enentáimtus péñker pujustinian pachis shuar juna tíminiaiiti: “Ti itiurchata áinis “¿Yaki nayaimpiniam waka Kristun itiarat?” tiirap,” tawai. <sup>7</sup>Tura ¿Yaki jakamunam we Kristun iniantkit?” tiirap” tawai. <sup>8</sup>Tura junasha tawai: “Yus-Chicham yúpichuch umirkamniaiti. Aya enentáimjai enentáimtakum wenumjai ujaktiniaitme.” Nu Chicham “Yus enentáimtustiniaiti” tawai. Nu Chicham tuke étsereaj núiti. <sup>9</sup>Yus Jesusan jakan iniantkímia nu enentáimtakum tura wenumjai “Jesus winia Úntruiti” takum uwemprattame. <sup>10</sup>Kame Kristu enentáimtakmin Yus “pénkeraitme” turamatatui nuyá wenumjai “Jesuskristun enentáimtajai” takum uwemprattame.

<sup>11</sup>Ataksha Yus-Papinium tawai: “Nin shiir enentáimtuinia nú shuar natsaarchartatui.” <sup>12</sup>Tuma asamtai ashí shuar, Israertisha Israerchasha, mai metek Yúsan shiir enentáimtuinia nuna Yus ti aneak ashí péñkeran súawai. Tura ashí métek ni Úntrinti. <sup>13</sup>Nu arantcha “Ashí shuar Uuntan áujea nu uwemprattawai” yáunchu Kristunun tu áatramuiti. <sup>14</sup>Tura Kristun

enentáimtuiniachusha ¿itiurak Nin áujsarar? Tura Kristun nékainiachusha ¿itiurak Nin enentáimtusarar? Tura Yus-Chicham ujaachmasha ¿itiurak nekaawarar? Shuar Yus-Chichaman ujaktiniaiti. <sup>15</sup>Tura akupkachmasha ¿itiurak Yus-Chichaman ujakarar? Tura shuar Yus-Chichaman etserkataj tusa weana nuna Yus-Papinium tawai:

“Shuar Yusa Shiir Chichamen etserki weana nu ti shírchakait.”

<sup>16</sup>Tura ashí shuar uwempratin chichaman ántuiniayatañ umirainiatsui. Isayasha yaunchu aak tímiayi:

“Uuntá, ¿yaki ii étserman antukaruit?”

<sup>17</sup>Paantchakáit. Kristu túramu ujakam antuktiniaiti. Tura antukar Kristun shiir enentáimtustiniaiti.

<sup>18</sup>Tura ¿Israer-shuar Yus-Chichaman antukcharu ásarñ Yúsan enentáimtuscharma? Atsá. Warí, Yus-Papí tawai: “Ashí nunkanam ni chichame antunkaiti.”

<sup>19</sup>Tura “Israer-shuar nu chichaman antukariat ¿paant nekaawarmaashi?” inintrusminiaiiti. Tura nekas nekaawarmai. Tuma asamtai Muisais tawai:

“Israer-shuar chichaman nékachu ainiana nuna shiir awajeakun akajkattajrume.”

<sup>20</sup>Nuyá Isayas ashamsuk áarmiayi:

“Eatkacharua nu wáitkiarmiayi. Inintruiniatsaiñ wantintuikmiajai.”

<sup>21</sup>Tura Israer-shuaran áujmatuk tímiayi: “Tuke iniaitsuk Winin winiarti tusan nu shuaran untsúajai. Tura nakitrurar umirtuiniatsui.”

### Chíkich Israer-shuarsha uwemprartatui

**11** Tura Israer-shuar Yúsan umiiniachkui ¿Yus nin iniaisaashit? Péñkea. Warí, wi Israer-shuar chakaitiaj. Wi Aprámsha tura Pinjamiñ weeá akiiniachukaitiaj. <sup>2</sup>Yámankamtaikniumiá Yus

Israer-shuaran ni shuar arti tusa achikiu asa yamaikia iniaisashtatui.

Ti yaunchu Yúsnan etserin Erías Israer-shuaran pachis Yúsan áujtak tímiayi: <sup>3</sup>“Uuntrú, naman awasar Yus sútaincha mash saqkiarai. Áminiun etserniuncha mash máawarai. Tura wiki juakjai. Tura winiasha “mantuatai” turutainiawai.” Tu áujsamiai.

<sup>4</sup>Tura Yus ayak tímiayi “Siatí mir (7000) áishmankan Israer-shuarnumiá apujtumsaruitjai. Nu shuar ántar-yus Páaran tikishmatrachu ániawai” tímiayi Yus.

<sup>5</sup>Núnisan yamaisha Yus ti waitnentainia asa ashí Israer-shuarnumiá ni shuarin achikiuiti. <sup>6</sup>Yus ni enentáijain waitnentak túraití. Nú shuar péñker tura asamtai waitnentatsui. Yus aya péñkernak waitnentakka nuikia waitneñkratchainti.

<sup>7</sup>Ayu. Nuikia ashí Israer-shuar péñkeran eakarú aín aya Yus achikmia nú shuar wainkiarmiayi. Antsu ni achikchamuka nuna nankaamas nekaachmin ajaras kusurua núnin awajnasarmiayi. <sup>8</sup>Yus-Chichamsha núnisan tawai: “Yus enentáimchatai enentáin súsarmiayi. Wáinmashtai jiiñcha tura ántushtai kuíshniasha súsarmiayi. Yamaisha núniskete.”

<sup>9</sup>Tawitcha yaunchu aak tímiayi:

“Tuke tunáa túrin ásar namperan najanainiaksha achinkiar ti asutniáwarti.

<sup>10</sup>Ni enentáin kusurarti tura wainmakcharti. Itiurchat ana nusha, káarak kijinia áintsan, tuke áentskatá.” Tu áarmiayi.

### Israer-shuarsha uwempramin ániawai

<sup>11</sup>Watsek, Israer-shuar kayá tukumkar ¿tuke iniaararuk áinia? Atsá. Antsu Israer-shuar umirkachmajai Israer-shuarsha yamaikia uwempratin

jeainiawai. Nujai Israer-shuarsha nujai métek uwempratin enentáimsartatui. <sup>12</sup>Israer-shuar umirkachmajai ashí shuar, Israercha ainia nusha, uwempramnia ajasarmiayi. Nuna nankaamas Israer-shuar atak Yúsan enentáimtuiniachuwemprarmatai nujai ashí shuar ti péñker ajasartatui.

<sup>13</sup>Israer-shuarchatirnea, atumin uwempratin chichaman etserkatniun Yus akupkamu asan nu takatan ti takaajai. <sup>14</sup>Nuna túrakun átum uwemprarmena núnisan niisha, wíshuar ainia nu, nuna ísar uwemprarat tusan wakerajai. <sup>15</sup>Kame Israer-shuar iniaisamujai ashí shuar Yusjai shiir nawamnaikiarmatainkia nuikia atak nin achikmajai jakamunmayá nantaktinia áintsan ti shiir átatui. <sup>16</sup>Emka apatuk ana nu Yus súakur yuminsamuitkiunka nuikia ashí apatkunam Yus yuminsamuiti. Núnisan numí kankapé péñkeraitkiunka numi takamtsuk péñkeraiti.

<sup>17</sup>Yuska chíkich chíkich Israer-shuaran, numí kanawen tsupik ajapniua áinis, iniaisamiai. Tura nuyá atumin niisháa numinmayá árumniñ nu numiniam anujtamkamarme. Nujai péñker numijiai tsanínkrum nu kakarmajai iwiaakrume. <sup>18</sup>Tura kanawé tsupikmajai nankaamantu enentáimtumasaip. Warí, ame kakarmarimijai numi wajatsui antsu ni kakarmarimijai iwiaakme.

<sup>19</sup>“Túrasha wi anujnaktinian kanawen tsupikchamka” tíchainmeash. <sup>20</sup>Nekasaiti, túmaitiat niisha Yúsan enentáimtuiniachu ásar tsupinkiarimiayi. Atumsha aya Yus nekas enentáimta asam anujnakuitme. Tuma asamtai nankaamantu enentáimtumatsuk aya anearta. <sup>21</sup>Yus nekas kanawé péñkercha túrawarun tsupikkia páchitsuk amincha tsupirmakchamniakait. <sup>22</sup>Iista, Yus atumjai ti tsánkaiti tura Israer-shuar

umichua nuna ti wari asutiaiti. Tura pēnker wáinmamkata. Yus tuke nekas enentáimtachkurminkia atumniasha páchitsuk tsupirmaktatrumē.  
<sup>23</sup>Núnisan̄ Israer-shuar ataksha Yúsan enentáimtuiniakui páchitsuk ataksha anujkachminkait. Nekas túrattawai.  
<sup>24</sup>Túram Israer-shuarcha asam niisháa numinmayá tsupikiar pēnké numiniam anujnakuitrumē. Nuna tura asa nekas ni kanawē tsupikia ajapamun páchitsuk atak anujkamniati.

### Israer-shuarsha uwempratin áiniawai

<sup>25</sup>Yatsurú, nan̄kaamantu enentáimtu-maraj̄rum tusan yaunchu nekaachman ujaajrume. Júiti: Israer-shuarnumiānka ch̄kích ch̄kích Yúsan nekas enentáimtustinian nakitiainiawai. Tura aya Israer-shuarchasha Yus-shuar ajasarat tusa túrunamiayi. <sup>26</sup>Tura Israer-shuarchasha ti untsur̄l Yus-shuar ajasarmatai nuyá Israer-shuarsha ashí uwemprattatui. Tuma asamtai Yus-Papí tawai:

“Seún̄numiā Uwemtikkiartin tátatui. Is-raernumiā tunaan asakátrattawai.

<sup>27</sup>Jú Chichamnasha niij̄j̄ai najanattajai: ni tunaar̄in asakturtat̄jai.”

<sup>28</sup>Uwempratin chicham atumsha nekaatarum tusa Israer-shuaran Yus ni nemasr̄i awajsaruiti. Tura yaunchu ni weatr̄in achikiu asa nincha tuke anenawai. <sup>29</sup>Kame Yus amáa nuna ataksha ataatsui. Shuáran achiksha atak iniaiyatsui. <sup>30</sup>Átumka yaunchu Yus umirchayarme. Tura yamaikia Israer-shuar umirainiachkui Yus atumin waitnentrarmē. <sup>31</sup>Núnisan̄ nii yamaikia Yúsan umirainiatsui. Tura atumin waitnentrampumarum núnisan̄ nincha waitnentrattawai. <sup>32</sup>Nuj̄ai ashí métek sumamtiak métek waitnentrar uwemtikrattawai.

<sup>33</sup>Maa, Yus imiá shiirchakait. Tí nekachukait. Ni túramu pēnké nekaachminiat̄j̄i.

<sup>34</sup>“Uunt Yus enentáimmian̄ ¿yaki neka? Tura ¿ya Nin unuiniaruit. <sup>35</sup>Yaki Nin pēnkeran susa shiira nuj̄ai ya-pajniuit?” Tu áarmaiti.

<sup>36</sup>Ashí najanamu ainia nu Yus najanamu áiniak Niiniu áiniawai. Tura Nin shiir awajsatniun najanawarma áiniawai. Yus tuke iniaitsuk shiir awájnásti. Núnisan̄ atí.

### Yusaj̄ surumaktarum

**12** Atumsha Yus-shuar árumna nu, atumek Yusaj̄ surumaktarum. Yus ti anenma asakrumin nuna seajrume. Yaunchu Israer-shuar ni waakar̄in maa Yúsan suu árimiayi. Atumsha núnisrumek iwiaaku árumna nuj̄in Nii túrutataj̄ taku túrutati tusarum tuke enentáij̄j̄ai Yusaj̄ tsan̄kamaktarum. Yusaj̄ íisam ti shiir atí tusarum túratarum. Nu túrakrumka pátatkechu antsu ti nekas enentáimj̄ai Yus shiir awajin átatrumē.

<sup>2</sup>Ch̄kích shuar aya jú nun̄kanmayá ana nuna enentáimtusar wekainiawai. Tura átumka nu túrawairap. Antsu Yus winia enentáimmiarun yapajtiurat tusarum tsan̄katkatarum. Nu túrakrumka Yus wakera nu nekaattarme. Ni wakeramusha yajauchichuiti antsu imiá nekas pēnkeraiti.

<sup>3</sup>Yus winia waitnentrak akatar akuptuku asamtai j̄una tájarme. Atumek w̄kítiajtai tu enentáimtumatsuk jeamna nuj̄ai métek enentáimtumasta. Yus enentáimta asakmin takastinian suramsana nuj̄ai apatkam nekaamata. <sup>4</sup>Ii ayash̄i chikichkiitiat ii muchit-mar̄i untsur̄j̄inti. Tura métekrak muchitáiniatsui. <sup>5</sup>Núnisrik iisha, Yus-shuarti, ayash̄i muchitmar̄iya áintsarik untsur̄j̄itiatar chikichik



ayashtinia áintsar takaaji. Nusha Krístujai tsanĩkiu asar áitkiamuitji. Túramu asar nuamtak atsumnaiyaji.

<sup>6</sup>Ii túratniun Yus nusháa nusháa súramji Nii wakera nujai métek. Wats, Yus ámin suramsamna nu túratniuitme. Yus ni chichamen etserkatniun suramsaitkiuinkia Yus enentáimtakum unuimiarmam nujai métek etserkata. <sup>7</sup>Chíkich shuar yáĩntinian Yus suramsaitkiuinkia nekas enentáimjai yáĩntá. Unuiniartiniaitkiumka yawetsuk unuiniarta. <sup>8</sup>Chíkich shuar ikiakártiniaitkiumka nekas péñker ikiakárta. Súsatniuitkiumka shiir enentáijijai ementutsuk súsarta. Shuaran wáinin atf tusa Yus apujtamsaitkiuinkia ti enentáimsam túratá. Tura shuar itiurchat pujuinia nu yáĩntinian Yus suramsaitkiuinkia shiir enentáimsam túratá.

#### Yus-shuar túratniau nu

<sup>9</sup>Nekas enentáijijai mai anenai ajatarum. Yajauch nakitrarum péñkera nu túratarum. <sup>10</sup>Nuamtak yachi asarum núnisrum mai anenai ajatarum. Chíkich wijijai nankaamas úuntaiti tu enentáimtunaistarum.

<sup>11</sup>Nakittsuk kakaram ajasrum ashí enentáimjai ii Uuntri wakera nu túratarum.

<sup>12</sup>Ukunam Yus tsankatramkattajnia nu enentáimtusrum warastarum. Wáiti-akrumsha katsuntratarum. Tuke iniait-suk ashí túrunamujai Yus áujсарarum.

<sup>13</sup>Yus-shuar atsumainia nujai yáĩntarum. Írarsha péñker itiaatarum. <sup>14</sup>Yajauch awajtamainia nu shiir awajsatarum. Yus yajauch yumintsuk nu shuaran péñker túrawarat tusarum seattiarum.

<sup>15</sup>Warainia nujai warastarum. Kún-tuts pujuinia nujai sha úuttiarum.

<sup>16</sup>Chikichik enentáijijai métekrak shiir enentáimtunaitiarum. Nankaamantu

enentáimtumasairap. Antsu péjchach ajastarum. “Ti nekajai” tu enentáimtumasairap.

<sup>17</sup>Shuar ámin yajauch awajtamkuisha nincha yapajkiataj tu enentáimsáip. Aents físam péñker áminia nu amesha tuke túratá. <sup>18</sup>Ame jeamna nujai ashí shuarjai nawamnaikiam wekasata. <sup>19</sup>Yuska ni Papiriin juna áamtikramiayi: “Wíitjai tunaan asutiátniun. Wisha yapajkiattajai” tawai Uunt Yus. Tuma asamtai yatsuru, kajertamkuisha atumsha yapajkiairap. Antsu yajauch awajtamkana nuna Yus ístí. Yus asutiáti. <sup>20</sup>Tura nu arantcha tawai: “Ame nemasrum tsukamakuisha ayurata. Kitiamakuisha umartin susata. Nu túrakum péñker ajachua nu iniatsaartatme.” <sup>21</sup>Yajauch nupettamkain. Antsu péñker túrakum yajauchia nu nupetkata.

**13** Akupniuka ashí shuar umirkatniuiti. Akupniuka Yus apujsamuiti. Yus apuj-sachma akupin atsawai. <sup>2</sup>Tuma asamtai shuar akupniun umirtsuna nu, Yus apujsamun umireachu asa nekas asutniátniuiti. <sup>3</sup>Kame akupniuka péñker shuar sapijmiakarat tusar apuj-sachma áiniawai. Antsu yajauch shuar ashamkarat tusar apujsamu áiniawai. Nii ashamsuk pujustin wakerakmeka péñker túratá. Túrakminkia akupin shiir enentáimturmartatui. <sup>4</sup>Yainmakat tusa Yus apujsamuiti. Antsu yajauch túrakmeka akupin nekas ashamkatniuitme. Warí, Yus ántar apuj-sachmaiti. Tunáa shuaran asutiátniun Yus apuj-saiti. <sup>5</sup>Nu asamtai akupin tuke umirkatniuiti. Aya asutiúawain tusar umirkashtiniaitji. Antsu shiir enentáijijai wekasatin umirkatniuiti. <sup>6</sup>Tuma asamtai núnisan akupniun kuit súsatniau nu páchitsuk susatarum. Nu takatan pujursarat tusa Yus apujsaruiti.

<sup>7</sup>Ashí túratniau nu túratarum. Akiktiniaitkiumka páchitsuk akikta.

Akupniusha uuntcha ashí núnisan írúnna nusha shiir enentáimtikratarum. <sup>8</sup>Kuitjaj tumashrintin airap. Antsu mai anenai tuke ajatarum. Chíkich shuar aneakum nin péñker túrattame. Túram ashí akupkamu páchitsuk umirkattame. <sup>9</sup>Akupkamusha tawai: “Tsanirmawaip, mankartuawaip, kasamkaip, chíkich shuar tsanumpruraip, chikichna wakerutkaip” tawai. Tura nusha ashí chikichik chichamjain tminiati: “Ame ayashim aneam núnismek ashí shuar aneata.” <sup>10</sup>Shuar chíkich shuaran aneakka yajauch awajsashtatui. Tuma asa akupkamun ti shiir umirkattawai.

<sup>11</sup>Ii yámankamtaik Yus nekas enentáimtusmiaj nui “Ii ti shiir ajasar tuke uwempratin ukunam átatui” tu enentáimprachmashiaj<sup>i</sup>. Antsu yamaikia nu tsawant yuntumsamtaí ashí túrajnia nujaj shintiarar enentáimpratniuitji. <sup>12</sup>Tuke káshiitiat tsawaatemprai. Ii Uuntrj Kristu jú tunáa nunkanam tátin ishichik ajasai. Tuma asamtaí ii túrutairi kiritniua núnisan yajauch túrutai ana nuka túrutsuk tsáapninium péñker wekasatin kakaram ajastai. <sup>13</sup>Túratniua nujaj métek wekasatai. Tsawai wekaakur kiritniunam uumkar tunáa túrutai túrashtai. Nampetsuk, yajauch warartsuk, tsanirmatsuk, jianaitsuk, tura kajernaitsuk aya péñker túratai. <sup>14</sup>Ii Uuntrj Jesukristu túramia núnisrik túratai. Tura ii ayashí wakeramu umikiat tusar tsankatkashtiniati.

### Ame yatsum kakantraip

**14** Shuar Yúsan ishichik enentáimtana nu itiaatarum tura kakantraip. <sup>2</sup>Iis, chíkichka ashí yuamniaiti tuiniawai. Tura chikichcha, Yúsnan awajirar, naman yúashtiniati tuiniawai. <sup>3</sup>Tura ashí yúa nuka namanken yúatsna nuna wishkrashtiniati. Núnisan ashí yucha

nu ashí yuun kakantrashtiniati. Warí, núnaka Yus ni shuarin awajsachukait. <sup>4</sup>¿Ámeke timiataash péñkeraitiam chíkich shuar kakantina? Antsu ni úuntrj ni péñker túramuncha tura yajauch túramuncha íschatniukait. Enentáimpratá. Yus kakaram asa nin péñker awajsamniaiti.

<sup>5</sup>Chikichcha enentáimpratai. Chíkich shuar tsawantan achikiar “Jú tsawantai Yus nankaamas shiir awajsatniuiti” tuiniawai. Chikichcha ashí tsawantan métek enentáimtuiniawai. Ayu, tura ni enentáimtamun nekas paant nekaatniuiti. <sup>6</sup>Chikichik tsawantan enentáimtakka Yusan shiir awajsatniun túrawai. Tura ashí métekrak enentáimtakka Yúsan shiir awajsatat tusa túrawai. Yurumkajajsha ashí yúana nu Yúsan yuminkias shiir awajsatat tusa túrawai. Núnisan ashí yúatsna nusha Yúsan yuminkias shiir awajsatat tusa túrawai.

<sup>7</sup>Iikkia ii enentáijjain iwiaaktsuji. Tura jáakrishá ii enentáijjain jaatsji. <sup>8</sup>Kame iwiaaku pujakrishá ii Uuntrj Kristu shiir awajsatat tusar pujurji. Tura jáakrishá tuke Níiniuitji. Nu asamtaí iwiaaku pujakrishá tura jakarsha tuke Krístunuitji. <sup>9</sup>Kame jakancha iwiaakuncha ashí ni Uuntrj ajastat tusa Kristu jaka nantakmiayi.

<sup>10</sup>Tura zurukamtaí ame yatsum “yajauchiiti” tame. Urukamtaí nakitiam? Warí, ashí iikia ii túramu paant awajnasat tusar Kristui naka wajastatji. <sup>11</sup>Nu asamtaí Yus-Papinium tawai: “Wi nekas iwiaaku pujá asan ashí Winí tikishmatrurartatui. Tura ashí “Yus asa tuke péñker túriniati” túrutiaratui” tawai.” Tu áarmaiti.

<sup>12</sup>Tuma asamtaí iisha chikichik chikichik ashí ii túramu Yus paant ujakartatji.

### Ame yatsum tunaanum ajūaraip

<sup>13</sup>Nu asamtai “yajauch túriniaiti” tu áujmatnaisashtiniaitji. Antsu ii yachi tunaanum ajūarchatin ti enentáimturiniaitji. <sup>14</sup>Jesukrístu jintintiamu asan juna nékajai: Yus najanamuka péñkerchaka atsawai. Ashí túramniaitjai. Túrasha shuar chichaak “Nu túrushtainti” táyat nuna túrakka niijjái tunaiti. <sup>15</sup>Tuma asamtai shuar chichartamuk “Nu yúakminkia Yusjai péñkerchaiti” tai, ame yúakminkia nu shuar itiurchat enentáimsashtatuak. Tura niisha tunaanum iniaar menkakamniaiti. Nu shuar aneakum túratsme. Enentáimpratá. Aya ame yuamna nujain ame yatsum Kristu jarukmia nu emenkákaip. <sup>16</sup>Tura “yuamniaitjai” táyatam wi yúakui yajauch áujmatrusarain tusam iniaisata. <sup>17</sup>Kame Yus umirkatin yurumátniujajisha umartinjajisha enentáimtuschatniuiti. Antsu Yusa Wakanijjai shiir wekasar Yusjai tura shuarjai nawamnaikiar ti péñker wekasatniuitji. <sup>18</sup>Ashí shuar Krístun núnis umireakui Yussha tura chíkich shuarsha péñker enentáimtuiniawai.

<sup>19</sup>Nu asamtai tuke shiir pujusminia nu túrakur Yusjai kakaram ajastin yáiniaiktai. <sup>20</sup>Yus iisam ashí yuamniaitji. Antsu ame yuamna nujai chíkich shuar tunaanum ajūartin tunaiti. Tuma asamtai ame yuam nujai Yus nu shuara enentáin takarsamu emesraip. <sup>21</sup>Nu túrashtin nuikia naman yúashtincha karía umarchatniusha péñkeraiti. Warí, túrushtajjai ame yátsum itiurchat enentáimtikram tunaanum ajūarchatapash. Tura nu shuar Yúsan nekas enentáimtusshamnia ajastatui. Nuka atsutí. <sup>22</sup>Ame Yus nekas enentáimtakum ashí túramniaitkiunka Yúsak wararsata. Shuar Yus íimmianum shiir enentáijjai mash túramnia nu

nekas shíiraiti. <sup>23</sup>Tura araantushim yua nuka Yúsan shiir enentáimtutsuk yua asa sumamattawai. Kame ashí Yus shiir enentáimtutsuk túramu tunaiti.

### Chíkich shuar wakeramuk enentáimtustiniaiti

**15** Yusjai katsuaru ájinia nu iik enentáimtumatsuk kakarmachu ainia nu yáintiniaitji. <sup>2</sup>Chíkich shuar wakeramu enentáimtustiniaitji. Tura Yusjai nu nankaamas shiir wekasatniun yáinminiaitkiui túratniuitji. <sup>3</sup>Krístusha ni wakeramun túrachmiayi. Antsu Yus-Chicham tana núnisan chikichnan enentáimtusmiayi. Nu asamtai Yúsan umirin asa wáitiak timia nu áarmaiti: “Ámin katsekramainiak Winiaja katsekrukarmiayi.” <sup>4</sup>Núnisan ashí yaunchu Yus-Papinium aarma in jintinramatniun áararmiayi. Nujai atsantamkurin shiir wáinikiattajnia nuka katsuntrar nákastatji. <sup>5</sup>Yus atsantamar katsuntratniun jintinramji. Tuma asa Jesukrístu túramia áintsan atumniasha chikichik enentáijjai enentáimtusaisar pujustinian yáinmakartí. <sup>6</sup>Nujai ashí métekrak Yus shiir awajsattarme. Niisha ii Uuntrí Jesukrístuncha Aparínti.

### Israer-shuarchanmasha Uwempratin Chicham etserkamu

<sup>7</sup>Tuma asamtai chíkich shuarjajisha shiir awajnisatarum. Kristu núnisan Yúsan shiir awajsat tusa incha shiir awajtamsamajai. <sup>8</sup>Juna tajai. Kristu Israer-shuaran yáintaj tusa támiayi. Tura Yus ti yaunchu nuna weatrin “túrataj” timia nu uminkiat tusa támiayi. Nujai Yus timia nuna umikmia nu nekaamniaiti. <sup>9</sup>Tura nu arantcha Israer-shuarchasha Yus waitnentrartin ásarmatai nin shiir awajsarat tusa támiayi. Tura Yus-Papisha tawai: “Ámin kantamprakun ashí shuarnum shiir awajsattajme.”

<sup>10</sup>Tura nu arantcha tawai: “Ashí nunkanmaya shuartiram ashí Israer-shuar Yúsna ainia nujai warastarum.”

<sup>11</sup>Tura ataksha tawai: “Ashí aents ii Úuntr̄n shiir awajsarti. Tura ashí shuarsha Nin “Ti úuntaiti” tiartí” tawai.

<sup>12</sup>Isayassa áarmiayi: “Tawitia aparí Isai weatriya akupin akiinkiattawai. Niisha ashí nunkan akupeakui ashí shuar niiniak shiir enentámtusartatui.” Tu áarmaiti.

<sup>13</sup>Yus ashí shíiran suramsattakrin nu shiir nákaji. Tuma asamtai Nii nekas enentámtakrumin warasa shiir pujustinian yamá suramsati. Nuyá Yusa Wakaní kakarmarijiai ti shiir enentáijiai katsuñtrarum, nu nákastarum.

<sup>14</sup>Yatsurú, atumsha anenainiaitrum. Tura ashí Yusna nekaarum nuamtak chicharnaikiatin nékarme. <sup>15</sup>Tuma aijn kajinmatkijrum tusan ataksha ti paant áakun jú enentámtikeajrume. Yus winia waitnentrak ni Chichamen etserkat tusa akuptakui nuna áatjarme. <sup>16</sup>Kame Jesukristu Israer-shuarchanum Yusa shiir chichamen etserkat tusa akuptukuiti. Nuna túrakun Israer-shuarchan Yusa Wakaníjiai shiir awajsamu ásarmatai Yusaí juiniajai. Tura Yussha shiir enentáijiai itianiawai.

<sup>17</sup>Jesukristu yaintiu asamtai Yusna takarsamaj nuna wararsamniaitjai.

<sup>18</sup>Tura chíkich shuarjai Kristu túramun pachischattajai. Aya wi chichasmajaisha tura wi túramujaisha Israer-shuarchan Kristu umimtikiamia nunak áujmatsattajai. <sup>19</sup>Yusa Shiir Wakaní kakarmarijiai aents tujintiamun túran ashí shuaran Jerusarén péprunam nan̄kaman etserkin Iririkiu nunkanam ejekamjai. Kristu-chichaman ashí nu nunkanam etserkaitjai.

<sup>20</sup>Nuna túrakun chíkich shuar etserkachmanum Krístunun ántichu

ániamunam Uwempratin Chichaman etserkaitjai. Nujai chíkich takasmanum takarsachuitjai. <sup>21</sup>Yus-Papisha núnisan tawai:

“Chichaman penké antukcharuka nekaawartatui. Nin áujmatman anturkacharusha unuimiarartatui.”

### Papru Rúmanam wétaj tawai

<sup>22</sup>Nuna pujuru asan ítjarum táyatan íchmajrume. <sup>23</sup>Tura yamaikia juyá takatrun umikian tura yáunchusha tuke ítjarum tiniu asan <sup>24</sup>Ispania nukanam wéakun ístatjarme. Tura atumijn shiir irasan Ispanianam wéakui atumsha yaintkiarum shiir akuptukchattarpash. <sup>25</sup>Tura yamaikia kuitjai Jerusarénnumia

Yus-shuaran yaintaj tusan wéajai. <sup>26</sup>Masetúnianmaya shuarsha tura Akayanmaya shuarsha kuítian irurar Jerusarénnumia Yus-shuaran atsumainia nuna akuptuktai tuiniawai.

<sup>27</sup>Ti wakeruiniak túrawarmiyai. Nu nekas túrashtinkiait. Israer-shuarnumia Yus-Chichaman antukaru ásar yamaikia ni kuítrijiai páchitsuk yáinchatniukait.

<sup>28</sup>Tuma asamtai jú kuitian súsaran umiran nuikia Ispanianam wéakun íktiatjarme. <sup>29</sup>Tura nuí winiakun Kristu Shiir Chichamen nujai shiir yaintajrum tusan ejeetittajrume.

<sup>30</sup>Yatsurú, ii Uuntri Jesukristunu asarum tura ni Wakaní pujurtamkurmin anenia asarum Yus áujtursatarum.

Núnisrum wijiai métek Yusna takastin yaintkiattarme. <sup>31</sup>Jutia nunkanmaya Israer-shuarnumia uwentikrat tusarum Yus áujtursatarum. Tura jú kuitian júajna nunasha Jerusarénnumia Yus-shuar shiir achikiartí tusarum Yus áujtursatarum. <sup>32</sup>Nujai, Yus wakerakuinkia, péñker wampú enentáimsan warasan fittiajrume. <sup>33</sup>Yus ti shiir pujustinian súana nu atumjai

tsanin̄ pujurtamsati. Núnisan̄ atí.

### Amikmaamun akupramiania nu

**16** Ii umai Jépeka Senkrea péprunmaya Yus-shuaran yáiniaiti. Ti penker Yus-shuaraiti. <sup>2</sup>Kristu náarijn shiir wáinkiatarum. Nuamtak yachí wáinkiatniua núnisrum wáinkiatarum. Niisha chikichnasha tura winiasha ti penker wáitin asamtai atumsha ni atsumamusha yaintarum.

<sup>3</sup>Pirisirasha Akirasha wijjiai métek Jesukristunun takasaru wáinar amikmaatainajai. <sup>4</sup>Niisha winia uwentikrurtai tusar jániñkiarmiayi. Tuma asamtai yumíkinijai. Tura aya wíkichu antsu ashí Israer-shuarchanumiá Yus-shuar áinia nusha yumíkiniai. <sup>5</sup>Núnisan ashí Yus-shuar Pirisiran tura Akira jéen irunainia nusha amikmaatarum. Tura winia aneamu amikiur Epenetu amikmaatruatarum. Niisha Akaya nunkanam emka Krístun nekas enentáimtusmiayi. <sup>6</sup>Marisha, atumjai ti takasua nu amikmaatruatarum. <sup>7</sup>Tura wíi shuarsha Antrunikiusha Júniassha amikmaatruatarum. Niisha wijjiai sepunam pujusarmai. Wijjiai emka Krístun shiir enentáimtusar chíkich akatramujai nankaamas takasaru áiniawai.

<sup>8</sup>Ámpriassha Krístunam winia aneamu amikiur asamtai amikmaatruatarum. <sup>9</sup>Urpanujajisha Jesukristu takatrí tsaninniuitji. Niisha tura aneamu Estakisssha amikmaatruatarum. <sup>10</sup>Apirisssha amikmaatruatarum. Niisha Krístun ti shiir enentáimtamtu ti páantaiti. Núnisan Aristúpuru shuarsha amikmaatruatarum. <sup>11</sup>Wíishuar Erutiúnsha tura Narsisu shuarsha Kristu shuari ásarmatai amikmaatruawarta. <sup>12</sup>Tripiniasha tura Tripiusasha Yúsnan takainia ásarmatai amikmaatruatarum. Núnisan ii umai Pírsitia Yúsnan ti takasu asamtai amikmaatruatarum.

<sup>13</sup>Rúpusha, nusha ti penker Yus-shuar, tura nukurísha amikmaatruatarum. Niisha wijjiai nekas winia nukuraa núnisaiti. <sup>14</sup>Asinikritiusha, Pirikiuntisha, Érmassha, Patrupassha, Érmessha, tura ashí niijjiai Yús-shuar ainia nu amikmaatruatarum. <sup>15</sup>Núnisan Jirurukusha, Júriasha, Néreusha, ni umajjiaisha, Urimpiassha, tura ashí Yus-shuar niijjiai pujuinia nu amikmaatruatarum.

<sup>16</sup>Nuámtaksha shiir aujnaisatarum. Ashí juyá Kristu shuari amikmaatmainiawai. <sup>17</sup>Yatsurú, shuar nusháa enentáimtuiniak Yus-shuaran akanainiak itirchat awajenawai. Nu shuar wáinkiarum kanaktiarum. Ni yajauch túramu átum penker takastin unuimiarmena núnischahti. <sup>18</sup>Nu shuar ii Uuntri Jesukristunun takainiatsui. Antsu ni wakeramun uminiawai. Tura ti shiir chichasar nékachun anankenawai. <sup>19</sup>Átum umirma ashí shuar nékainiakur ti waraaji. Yajauch túrutsuk aya penker túratin enentáimsarum pujustarum. <sup>20</sup>Yus tuke shiir pujustinian amawa nu ti wárik uunt iwianchin nupetturmaktatui. Tura ii Uuntri Jesukristu shiir yainmakarti.

<sup>21</sup>Timiutéusha, wijjiai takau, amikmaatmarme. Núnisan Rúsiusha, Jasunsha, Susipatresha, mash wíshuar ainia nu amikmaatmarme. <sup>22</sup>Wi, Tersiu asan, Papru chichamen ju papinium áateakun Kristu náarijn amikmaajrume.

<sup>23</sup>Káyusha amikmaatmarme. Ni jéen pujaji tura juisha ashí Yus-shuar irunainiawai. Erastusha ju pepru kuítrín wáinniuiti. Niisha ii yachí Kuártujai amikmaatmarme.

<sup>24</sup>Ii Uuntri Jesukristu ti shiir yainmakarti. Núnisan atí.

### Yus shiir awajsatai

<sup>25</sup>Watsek, Yus shiir awajsatai. Ninkí nekas kakaram awajtamsamniaiti. Wi

Uwempratin Chichamnum Jesukrístu-  
 nun étse<sup>ra</sup>j nujai ikiantamprattawai.  
 Nu chicham yámankamtaiknumia  
 nekaachmanak Yus yamaikia paant  
 awajsaiti. <sup>26</sup>Yaunchu Yúsnan etserin ni  
 áarmanum nu chichaman etserkarmiayi.  
 Tura yamaikia Yus wakerak ashí

nuñkanmaya shuar Nii enentáimtusar  
 umirkarat tusa nu Chichaman yamaikia  
 paant awajsaiti. Yus amuutsuk tuke  
 pujuwiti.

<sup>27</sup>Yúsak Niñki ti neka asa tura Je-  
 sukrístu ti peñker tura asamtai Niñki  
 tuke shiir awájnástí. Nuke atí.

*Papru*

**KURINTIUNMAYA SHUARAN**

*Emka papin aar akuptukma*

**Kurintiunmaya Yus-shuaran  
Papru áatramiania nu**

**1** Wi Pápruitjai, Jesukrístu akatramu. Yus nuna wakerak, ni akatramuri atí tusa anaitiukmai. Wi, ii yachi Sús-tinisjai, ju papí akupeaji. <sup>2</sup>Ashí Yus-shuar Kurintiu péprunam iruntrumna nu ju papí akupeaji. Átumka Jesukrístujai tsanínkiu asarum Yusna árume. Atumsha tura ashí shuar Jesukrístun enentáimtuiniana nunasha Yus ti penker awajsatniun wakerawai. Nincha incha Jesukrístu mai metek Úuntrinti. <sup>3</sup>Yus ii Aparí tura ii Úuntrí Jesukrístusha wait-nentramainia ásar yainmakarti imiatkinchanum tuke shiir pujustinian.

**Ii Uuntrí Jesukrístujai  
tsanínkia pujustin**

<sup>4</sup>Yusan áujkun yuminsan atumin shiir enentáimtajrume. Jesukrístujai tsanínkia pujakrumin Yus shiir enentáimturmawai. <sup>5</sup>Jesukrístujai tsanínkia pujakrumin Yus atumin ti yáinmawai ashí penker ana nu enentáimtakrum tuke shiir chichastinian. <sup>6</sup>Kristu juna túramniaiti tíchamkají. Ashí yamaikia uminkiyai. <sup>7</sup>Tuma asantai ashí Yus súramna nu atsumatsrume. Nu túrakrum ii Uuntrí Jesukrístu tatin tuke nákarne. <sup>8</sup>Tura iniaitsuk tuke emettamattawai ii Uuntrí Jesukrístu támatai atumi tunaarín pachischatin. <sup>9</sup>Jesukrístu ii Uuntrinti. Nijijai tsanínkia pujusúk tusa Yus achirmakmarne. Tura Nii tana nuna tuke umiktatui.

**Yus-shuar akantramu**

<sup>10</sup>Yatsuru, ii Uuntrí Jesukrístu naari pachisan, seajrume métek enentáimpratarum tusan. Níisháa níisháa enentáimprairap antsu chikichik enentáijjai métek enentáimsa pujustarum. <sup>11</sup>Átum yajauch chicharnaisarum pujarme. Kruf shuari tu ujatkmatai tájarne. <sup>12</sup>Kame júnis awai: Chíkich “Wi Páprunuitjai” tuiniawai. Chíkich “Apurusnaitjai” tuiniawai. Chikichcha “Wi Pítrunuitjai” tuiniawai. Chikichcha “Wi Kristu-shuaritjai” tuiniawai. <sup>13</sup>¿Warí, nuínkia, Kristu akantramukait. Páprusha krúsnum jarutramkamaashi. Tura Papru naari pachisa imiaimiukaitrum? <sup>14</sup>Atumin untsurí imiaichu asan shiir enentáimjai. Aya Krispu Káyujai jímiarchiniak imiaimjai. <sup>15</sup>Nújainkia shuar “Papru náariin imiaimiuitjai” tíchamniaiti. <sup>16</sup>Maa, nekas, Estepanasa shuarincha imiaimjai tura chíkich wi imiaimiun nékatsjai. <sup>17</sup>Kristu imiakrattia tusa akuptukchamai antsu uwempratin chichaman etserkat tusa akuptukmai. Tura ti neka chichainia núnisan chichaatsjai shuar wi shiir chichaamun enentáimprarain tusan. Antsu yúpichuch chichajai Kristu krúsnum jakamuk paant atí tusan.

**Kristu Yusa kakarmaríncha ni  
nekatairíncha paant  
iniakmashiania nu**

<sup>18</sup>Kristu krúsnum jarutramkamu étsereaji. Antsu Yus-shuarchaka menkaakatniunam wéana nu, “ántraiti nu chicham” tu enentáimainiawai. Antsu Yus-shuarti, uwempratniunam wéakur, “nu chichamjai Yusa kakarmari takusminiaiti” tu enentáimji. <sup>19</sup>Núnisan tawai Yus-Chicham yaunchu aarma: “Ju nunkanmayan ti neka áiniana nuna

chichamen emesrattajai; ti unuimiararu áinianak ántar awajsattajai” tawai Yus ni chichamen. <sup>20</sup>Iis, ju nunkanam uwempratin chicham íruntsuk. Nu chichaman ashí mash Yus ántar awajsaiti. Ti neka ániana nusha, jintinkiertin ániana nusha, ashí ju nunkanmayan unuimiar ti chichastinian nékana nusha, nu shuar mash “wi tájana nujai péñker pujusam uwemprattame” tu enentáimiainiawai. Tura núnaka mash Yus penké ántar najanaiti. <sup>21</sup>Aya ni nékamujai aents Yúsan nekaacharmiayi. Núnisan atí tusa Yus túramiayi, timiá neka asa. Antsu ashí aentsun Yus ni chichamejai uwentikratniun wakerimiayi. Chíkich “ántrai” tuiniana nu chichamjaink<sup>i</sup> Yus Nin enentáimtuinia núnaka uwentikratniun wakerak túramiayi. <sup>22</sup>Israer-shuar “aentsti túrachminian iniakmasta, wi nekaataj” tuiniawai. Kriaku shuarsha “ti enentáimsam, mash péñker jíikim turuttia wisha métek enentáimprataj” tuiniawai. <sup>23</sup>Iikia antsu Kristu krúsnum jarutramkamuk étsereaji. Israer-shuarsha “ju chicham natsantaiti” tu enentáimiainiawai. Israer-shuarchasha “ju chicham ántrai” tu enentáimiainiawai. <sup>24</sup>Tura Yus achikiarma, Niiniu ajasarat tusa, Israer-shuarsha Israer-shuarchasha mai metek “Kristu krúsnum jarutramak Yusa kakarmaríncha ni nekatairíncha paant iniakmasmiayi” tu enentáimji. <sup>25</sup>“Yusa nekatairí ántrai” tuiniawai aents, túrasha imiá nekas péñkeraiti. “Yusa kakarmarísha jeatsui” tuiniawai aents, túrasha imiá nekas kakarmaiti. <sup>26</sup>Enentáimtumastarum yatsuru. Yus achirmakmarme Niiniu ajastinian, tura ju nunkanam ti neka ánia núnisan atumíin ti neka íruntsui. Ti akupniusha ti nankaamakusha atumíin íruntsui. <sup>27</sup>Antsu ju nunkanam nékachua núnis ana nuna Yus achikiuiti ti neka nuna

iniatsáartinian. Tura ju nunkanam kakarmachua núnis ana nunasha Yus achikiuiti kakarma nuna iniatsáartinian. <sup>28</sup>Péejchachincha, nakitsamuncha, ánrachincha, Yus achikiuiti ashí nankaamantu írunga nuna amuktinian. <sup>29</sup>Nújainkia chikichkisha Yusjai waantu enentáimprachminiaiti. <sup>30</sup>Tura Yus atumin Kristujai tsanin apujtamsaiti. Tura Kristu enentáimtusar Yus nekas nekatain<sup>h</sup>ka nekaataj. Kristu enentáimtakrin Yus shiir enentáimturmajai, péñker awajtamji, tura uwentikramji. <sup>31</sup>Yus-Papinium yaunchu aarma núniskete: “Shuar nankaamantu enentáimprataj tákunka ii Uuntrí Yus túramun wararsati.”

### Kristu krúsnum jakamu etserkamu

**2** Wisha, yatsuru, atumiin jeamaj nuí Yus-chichaman ti neka chichainia áintsan tura íwiasanak ujakchamajrume. <sup>2</sup>Tura atumjai pujakun aya chikichkiniak nekaatniun enentáimpramjai. Júiti: Jesukrístu, tura Jesukrístu krúsnum jakamu. <sup>3</sup>Nékayatan kakarmachu sapíjmiashím jearmiajrume. <sup>4</sup>Yus-Chichaman ujaakun ti neka chichainia áintsan nupetkataj tu enentáimturchamajrume. Antsu Yusa kakarmaríncha tura ni Wakaníncha paant iniakmasan Yus-Chichaman ujakmajrume. <sup>5</sup>Aentsu nekatairíjiai Yus enentáimtuschatniuiti antsu Yusa kakarmari paant nekaarum Yus enentáimtustiniaitrume. Nuní asamtai Yus-Chichaman tu ujakmajrume.

### Aya Yusa Wakaníjiai Yúsnan nekaamniaiti

<sup>6</sup>Túmaitiat Yusa nekatairí átsuk. Yúsnan unuimiararujai Yusa nekatairín áujmatji. Tura Yusa nekatairínkia aentsu nekatairí áintsachuiti. Ju nunkanam akupin ainia nuna nekatairínchuiti Yúsnaka. Ju nunkanam akupniuka ishichik



pujus amuukachartatuak. <sup>7</sup>Yaunchu ju nunka atsaj̄n Yus in uwentikrampratiun enentáimpramiayi ti shiir pujusarmi tusa. Ju Yusa enentáimmiari yaunchu nekanachmiayi, tura yamaikia nu nekaar áujmat̄ji. <sup>8</sup>Ju nunkanam akupniuka nuna penké nekaacharmiayi. Nékainiakka ii Uuntri timiá shiira nuna, krúsnun máacharu aayi. <sup>9</sup>Yaunchu Yus-Papinium áarchamukait: “Shuar Yúsana aneana nuna Yus ti shíran susattawai. Susattana nuka timiá péñker asamtai shuar wáinkiachman, antukchamuncha, enentáimtachmancha Yus susattawai” tu áarmaiti. <sup>10</sup>Tura Yusa Wakaní ii enentáin pujurtamuk Yus suramsattajnia nuna yamá paant jintinramji. Nu Wakancha imia Yus enentáimmiancha mash nékawai.

<sup>11</sup>Shuar enentáimna nuna chíkich shuar nekaamniakait. Antsu aya ní enentáij̄j̄in nékatsuk. Núnisan aya Yusa Wakaní Yúsna paant nékawai. <sup>12</sup>Ju nunkanmaya aents enentáimiainia nujaj̄ Yusna nekaachminiaiti. Antsu Yusa Wakanin in súrámaj nujaj̄ Yus shiir tsankatramajnia nu nekaamniat̄ji. <sup>13</sup>Yusa Wakaní jintinramji Yúsna chichastinian Nii wakera áintsan. Ni chichamen súrámaj. Túramtai ii nékamujaj̄ Yúsna étsertsuji. Tuma asamtai imia Yusna nuka Yusjaj̄ péñker wekainia nu jint̄faji.

<sup>14</sup>Yus-shuarcha Yusa Wakaniniun ántatsui ántraiti tusa. Aya Yusa Wakaní jintintiamniat̄kiui Yus-shuarcha nuna penké nekaachmin ániawai. <sup>15</sup>Antsu Yusa Wakanin takaku ashí mash iis, péñkera nuna nekaamniaiti. Nii túrana nunasha chíkich shuar súmamtikiachminiaiti. <sup>16</sup>Yus-Papinium yaunchu áarmaiti: “¿Yusa enentáimmiari ya neka. Tura Yúsna ya jintintiamniat̄?” tu áarmaiti. Tuma aj̄n iikia Yus-shuar ájinia nu, Kristu enentáimna núnisrik enentáimji.

### Páprusha Apurussha Yusa takatrin mai tsaniñkiar takainiawai

**3** Tura wikia, yatsuru, nuik aj̄ atumjai pujakun Yusa Wakanin umirniun chichastinia áintsanak atumjai chichastinian tujinkiamjai. Antsu ayash wakeramu umirin asakrumin Krístunam katsuarcharujaj̄ chichastinia áintsanak atumjai chichasmajai. <sup>2</sup>Uchi kuírach namañ ayurachminiaiti antsu aya umuntsatniuiti. Núnisan aya yúpichuchin ujakmajrume, itiurchat ana nu tujintiakrumin. Tura yamaisha itiurchat ana nu tuke tujintiarne. <sup>3</sup>Tuke ayash wakeramu umirniuitrume. Yajauch enentáim-tunaiyakrum tura katsumnaiyakrum akantramuuitrume. Nujaj̄ páantaiti átum ayash wakeramu umirniuitrume. Yúsna enentáimticharujaj̄ métek wekainiuitrume. <sup>4</sup>Atumíinkia shuar “wi Páprunuit̄jai” tuiniatsuk. Chikichcha “wi Apurusnait̄jai” tuiniatsuk. Tu chichaakrum ayash wakeramu umirniuitrume. <sup>5</sup>Wátsek. Wi Papru ti péñkeraashit̄aj. Apurussha ti péñkeraashit. Antsu iisha aya Yusa takarniurint̄ji. Yus-Chicham étserkurin ii Uuntri enentáimtushamkuram. Ii Uuntri takatan chíkich chíkich suramsamajnia nuke takasmaj̄. <sup>6</sup>Wi Yus-Chichaman étserkun arakan araktinia áinis takasmajai. Apurussha entsan ukatramai. Tura Yus nu arakan tsakatmarmai. <sup>7</sup>Arakan araana nusha, entsan ukatna nusha ántrachukait. Antsu Yusak arakan tsakatmaru asa ashí túrachukait. <sup>8</sup>Arakan araana nusha, entsan ukatna nusha métek ániawai. Túmaitkiusha takasmajaj̄ métek Yus akiktatui. Péñker takasmatañkia péñker akiktatui. <sup>9</sup>Wisha Apurussha Yusa takatrin mai tsaniñkiar takaaji. Tura Yus atumí enentáin takaaku atumsha Yusa núnkeña áintsaitrume.

Jeasha enentáimpramniaiti. Yus atumjái takaak jeá jeamtinia áintsan takaawai. <sup>10-11</sup> Jeá jeamainiak, emka uunt kaya nunká inít ikiursar kaki awajsatín áiniawai. Tura nuyanka nu kayanam ekeniar júkitniuiti jeá wewe atí tusa. Wikia jeá jeammin ti unuiniamiarua áintsanak uunt kaya nunká emka ikiustinian nekaan, núnisnak Jesukristunun emka ujakmajrume. Tura Jesukristu uunt kaya kaki ikusma áinis asa Nínkíti nuí jeá ekenkatin. Iis, ashí enentáimtustinia nankaamas Jesukristu enentáimtustiniaiti. Nu asamtai Jesukristunun emka ujakmajrume. Yus nuna etserkatniun tsankatrukuiti. Wi emka, uunt kaya ikiursatniua áintsan, Jesukristunun ujakmajrume. Tura nuyanka chíkich shuar ekeniar jeammin áiniawai. Tura anearti péñker jeamtinian. <sup>12</sup> Tura jeá jeamainiak nii wakerak péñker ana nujái jeamminiaiti. Nii péñker jeamtinian wakerak kurijíjaisha, kuítjaisha, shíirmach kayajaisha jeamminiaiti. Chíkich jeamkuka numijíjaisha, kenkujáisha, nukajaisha jeamminiaiti. Núnisan shuar Yúsnan takaak péñker takasminiaiti túrasha nánkamas takasminiaiti. <sup>13</sup> Tura amuukatin tsawant jeakui ashí ni takatrí paant átatui. Nu tsawantaisha Yúsaiya ji átatui tura nu jisha ni takatrí péñkera nunasha tura yajauchia nunasha nekapsattawai. <sup>14</sup> Tura shiir jeamuka tura nu jeasha esaachmatainkia shiir akinkiattawai. <sup>15</sup> Antsu nánkamas jeamuka imianínki jiniumia uwemprattawai, tura ni jemma esaa penké atsuttawai. <sup>16</sup> Enentáimpratarum. Yusa Wakaní atumín pujá asamtai Yusa Jee ajasuram nu nékatsrumek. <sup>17</sup> Shuar Yusa Jeen émesekuinkia Yus nu shuaran emesrat-tawai. Yusa Jeenka timiá shiir asamtai túrattawai. Nu Jeá atumketrumek.

<sup>18</sup> Ju nunkanmayan unuimiarua núnisrum “ti nekaitjai” tu enentáim-tumasrum ananmamawairap. Antsu ju nunkanmayan nékachu áinis ajas Yúsnan ti shiir unuimiártiniaiti. <sup>19</sup> Ju nunkanmaya aents nékainia nuna Yus “ántrai” tawai. Yus-Papinium áarmaiti:

“Ju nunkanmayan unuimiarun ni enentáimmiájain Yus sumantikiattawai.”

<sup>20</sup> Tura nu arantcha áarmaiti:

“Uunt Yuska “unuimiaru enentáimmian-cha penké ántrai” tawai.”

<sup>21</sup> Tuma asamtai “Páprunuitjai tárugna nusha, “Apurusnaitjai”, tura “Pítrunuitjai” tárugna nusha ántar enentáimprume, nii aya aents ásarmatai. Tu enentáimprarum warasairap. Antsu nekaatarum. Ashí írúnna nu atumin yainmaktiniaiti. <sup>22</sup> Páprusha, Apurussha, Pítrusha, ju nunkanmayasha, iwiaakmasha, jákatniusha, yamá írúnna nusha, ukunam átatna nusha, mash atumniaiti shiir yainmaktin. <sup>23</sup> Atumsha Kristunuitrumek, tura Kristusha Yúsnaiti.

### Yus akatramu takatrí

**4** Júnisan ashí shuar enentáimturmas-tiniaitji. Iikia aya Kristu yáintríntji. Kristu akatramuríntji Yusna yaunchu nekaachma ana nu yamá etserkatin. <sup>2</sup> Wátsek, akatramuka tána nujái métek umiktiniaiti. <sup>3-4</sup> Wi umikmancha umikchamuncha ii Uuntrí Kristu nékawai. Átum enentáimturarmena nusha tura chíkich aents enentáim-turainia nusha wíjiainkia ántrai. Imia wíkisha nekamatsjai. Kame winia tunaarun penké wáintsujai tura aya nujái “péñkeraitjai” tíchamniaitjai. Nínki Yus iirui. <sup>5</sup> Tsawant jeamtai ii Uuntrí Kristu atak tátatui. Tura ashí yamá kiritniunam uukma nuna tura shuar ashí enentáimprarma

nunasha paant awajsattawai. Nu tsawant jeatsain shuar umikiuashit tusarum enentáimtusairap. Tura nu tsawantai Yus ashí péñker umikiarun shiir awajsattawai. Péñker umikiuncha ishichik umikiuncha takasmajai métek Yus shiir awajsattawai.

<sup>6</sup>Átum “Ju shuar péñkeraiti tura chíkich péñkerchaiti” tu akannáirarum penké tíchatniuitrume, yatsuru. Nuka paant atí tusan “Átum “Wi Páprunuitjai” tura “Wi Apurusnaitjai” tírap” tajai. Antsu aya Yus-Papinium áarmajai métek enentáimsatarum. <sup>7</sup>Ámekachíkich shuarjai méteketme. Tura ashí takakmena nusha Yus amasmaiti. Tura Yus amasu asamtai çitiurak áminiukea áintsam nujai nankaamantu ajai tu enentáimtumam?

<sup>8</sup>Çiti kuítrinnia áintsan tura ashí takakua áintsan enentáimtsurmek. In nankaakarum uunt kapitían ajasua áintsan enentáimtsurmek? Nekas uunt kapitían ajasrumka maak. Nuñkia iisha atumjai akupkaintji. <sup>9</sup>Chíkich shuar mash nankaamantu áinis áiniakuisha Yus in ni akatramurin ashí amúamunam apujtamsaitji. Tu enentáimpramniaiti. “Yajauch áiniawai, máatái” tu pujurtamji shuar. Tura Yusa suntarisha ashí juyá shuarsha in ístai tusar káutramkaitji. <sup>10</sup>Iikia atumjai jeatsji. Kristu shuarí asakrin nékachua áinis enentáimturmajai shuar. Átum antsu Krístunam tí nékachuashitrum. Iikia kakarmachuitji. Átum timiá kakarmaitrume. Átumka ti penkeraitrume. Antsu iikia muíjtiaintji.

<sup>11</sup>Tuke yamaisha tsukamaji, kitiamaji, entsartin atsumaji. Katsumpramji. Jeasha atsumaji. <sup>12</sup>Ii ewejéjai takaakur ti pimpíaji. Shuar katsekramainiaji túrasha iikia shiir chichamjai aiyaji. Itiurchat awajtamainiakuiasha katsunteaji. <sup>13</sup>Tsanumprutmakrincha tuke shiir chichajai. Tsuata áintsarik

tuke yamaisha ashí yajauchia núnisan ajapramatniun enentáimturmainiaji.

<sup>14</sup>Atumin aya iniatsaartajtsan juní áattsujrume. Antsu winia aneamu uchirua áintsan jintintjarme. <sup>15</sup>Atumin Yus-Chichaman ujaakun Yus-shuar ajastinian unuiniamjarme. Nujai Jesukrístu enentáimtakrumin atumí aparía áintsan ajasmajai. Chíkich shuar Krístunun jintinrámatin timiá untsurí ákuisha aya wiki atumí aparíntjai. <sup>16</sup>Tuma asamtai wi wekaajna áintsan wekasatarum atumsha.

<sup>17</sup>Nu túratarum tusan winia aneamu uchirun Timiutéun akuptukmajrume. Niisha ii Uuntri Krístun enentáimtumunam winia uchiruiti tura Krístun enentáimtak tuke shiir wekaawai. Túrasha wi Krístujai wekaamun ataksha enentáimtikramprattawai. Núiti ashí Yus-shuarnum wena jintíajna nuka. <sup>18</sup>Papru yamaikia iraishtatui enentáimturainiak chíkich chíkich nankaamantuitjai tu enentáimtumainiawai. <sup>19</sup>Antsu Yus wakerakuñkia wárik íitjam tusan wakerajai. Nuñkia nankaamantu chichamen antukchattajai antsu wátskea, ni túramurisha ístái. <sup>20</sup>Yus akupeana nú shuar aya chíchainiatsui antsu Yusa kakarmarin iniaktuiniawai. <sup>21</sup>Wátsek, çwarí enentáimprum? Átum tuke núnisan enentáimkiurminkia wi winin asutiátniuitjarme. Tura péñker enentáimkiurminkia, aneakun shiir chichasminiaitjarme. Çatumsha túa wakerarum?

### Tsanirmamu ti tunaiti

**5** Atumíin shuar ti tunáa tura awai. Ju yamá ashí nekanaiti. Nu shuar ni aparí nuwé achikiuiti. Timia tunaaka nu tsanirmamu Yus-shuarchanumsha atsawai. <sup>2</sup>ÇNu tunaajaisha tuke nankaamantu enentáimprumek? Antsu úuttiniaitrum. Nu shuar

tunáa túraka atumíniā akankatniuiti. <sup>3</sup>Ayashur pujachkuisha wi nuí pujáa áintsan nuna tunaarín paant nekaamjai, tura asutiátniuiti tajai. <sup>4</sup>Tuma asamtai átum káunkakrumin ii Uuntri Jesukrístu kakarmaríjijai tura wi nuí pujáa áintsanak, ii Uuntri Jesukrístu kakarmaríjijai <sup>5</sup>nu shuar uunt iwianchrum surunkatniuiti ni ayashi wakeramurí amukati tusa. Nujai ní wakaní uwemprattawai ii Uuntri Jesukrístu támatai.

<sup>6</sup>“Iikia péneraitji” tárumna nu ántrai, tunáa atumíin tuke akui. Iis, “Karía ishichik yuminnium enketam mash karimtiktsuk” tiniu ániawai. Núnis átatui jú tunaajai. <sup>7</sup>Tuma asamtai nu karía ukartarum yajauch awajturmasajj tusarum. Núnisrum jú tunaanumiā kanakrum pénger átatrume. Yaunchu enentái karía núnis amuukatniuiti. Ashí yamarmak yuminia áintsan ajasuitrume. Tanta wakapruachusha enentáimpratai. Israer-shuar paskua nampernum aya wakapruachu tantan yuu ániawai. Atumí tunaari atsakui atumsha nu námper-tantaa áintsar pénger ajasuitrume. Paskua nampertincha Israer-shuar murikiun main ániawai. Núnisan Kristu jaka ii murikria áinis ajasuiti. <sup>8</sup>Tuma asamtai iisha paskua námper nájanku pujakur tuke núnisan shiir wekasatniuitji. Tuma asamtai ashí yajauch tunaasha írunna nuka karía yaunchu nawamua áintsankete. Nuka atsutniuiti. Antsu nekas ana nuka shiir enentáimsar wekasatniuitji. Nuka yuminia áintsankete.

<sup>9</sup>Nuik papin áatramajrumna nuí “Tsanirma shuarjainkia íschatniuitrume” tímiajrumne. <sup>10</sup>Ju nunkanam Yus-shuarchaka aya tsanirma, aya kuitniak ikiauwin, aya kasak, aya ántar-yusan tikishmatin ániatsuk. Nú shuarjainkia penké íschatniuitkiurmeka

jú nunkanmaya jíinkintrume. Núnaka tátsujai. <sup>11</sup>Antsu wi tájana nu júiti, Shuar “Yus-shuaraitjai” tákuñka tura tunáa túriniaitkuñkia níijijai íschatniuitrume. Tsanirmasha, kuítian ikiauwincha, ántar-yusan tikishmatniusha, tsanumniusha, nampencha, kasasha “Yus-shuaraitjai” tákuñkia íschatniuitrume. Penké níijijai yurumáshtiniaitrume. <sup>12-13</sup>Yus-shuarcha tunaari pachischatniuitjai. Yus núnaka ístatui. Átumka antsu atumíin Yus-shuar ainia nuna tunaari ístiniaitrume. Tuma asamtai nu shuar tunaarintin atumíiya akankatarum.

**Yus-shuar nuámtak iturchat awajnisarka Yus-shuarchajai nuna iwiarashtin ániawai**

**6** Yus-shuarka chíkich Yus-shuarjai iturchat pujakka kapitánjai chichas iwiarashtiniaiti Yus-shuarcha asamtai. Antsu Yus-shuar írunna nujai iwiarati. <sup>2</sup>Enentáimpratarum. Amuukatin tsawantai Yus-shuarka ashí jú nunkanmaya shuara tunaari mash nekaawartatui. Tura ashí tunáa nekaatniuitkiurmeka itieur yúpichuchia nu nekaashtatrum. <sup>3</sup>Nu arantcha Yusa suntari túramurísha nekaattaji péngerashit tusar<sup>1</sup>. Nayaimpiniam túrawarma nekaatniuitkiurkia itiura jú nunkanmaya nu tujinkiat<sup>2</sup>. <sup>4</sup>Pai, iturchat ákuñkia Yus-shuar penké tujintiainiana nujai iwiaratarum antsu. <sup>5</sup>Natsaruk tusan nuna tájarme. Warí, ¿atumíini chikichkisha atsawak ni yachi iturchat<sup>3</sup> pénger iwiamnia? <sup>6</sup>¿Urukamtai Yus-shuar ni yachijjai iturchat pujakka Yus-shuarchanum wea iwiaratniun? <sup>7</sup>Atumí iturchat<sup>4</sup> kapitannium jukirmeka nujainkia átum tujinkiamu páantaiti. Natsantchakait. Itiurchat ana nusha ¿urukamtai antsu katsuntram asakáatsum? Kasamkamusha ¿urukamtai katsuntram

asakáatsum? <sup>8</sup>Antsu átumka nuámtak yachijjaj itiurchat awajnáiyarme tura kasárnáiyarme.

<sup>9</sup>Tunáa túrinkia Yus akupeamunam pachiinkiachmin ainia nu nékatsrumek. Ananawairap. Ashí tsanirma nusha, ántar-yusan tikishmatniusha, nuamtak áishmanjaj tsanirmasha, <sup>10</sup>kasasha, ashí kuftian ikiauwinya, nampencha, tsanumniusha, yajauch chichainia nusha, chíkich shuaran anankawar atantin ainia nusha Yus akupeamunma nuí penké wayashtin ániawai. <sup>11</sup>Atumíyasha chíkich chíkich nuna túrin armái. Tura yamaikia ii Uuntrí Jesusa kakarmarijjajasha tura ii Yusrí Wakaní kakarmarijjaj atumi enentái shiir ajasuiti, atumsha Yusna ajasurme, tura tuke péñker ajasurme.

### Ii ayashí yajauch áchatniuiti

<sup>12</sup>“Ashí túramniitjai” tiniu ániawai tura nekasaiti. Tuma ain mash yáinkiashtatui péñker wekasatniun. Nekas ashí túramniitjai tura nánkamas túratniujaj nupetnakhattajaj. <sup>13</sup>Junasha tiniu ániawai: “Apatuk wakejainchu tura wake apatkujainchu mai ántraití.” Apatkujaj wakesha nekas mai metek enentáimpratin ániawai tura Yus mai metek amuktatui. Núnisan ii ayashí ii Uuntrí Krístunuiti tura Krístu ii ayashí nérenniuiti. Tuma asamtai ii ayashíjjaj tsanirmashtiniaiti. <sup>14</sup>Tura Yus ii Uuntrí Jesusan iniantkimia núnisan ii ayashíncha nu kakarmarijjaj iniantkittiawai.

<sup>15</sup>Ashí ii ayashíin Krístu ayashímki-aiti. ¿Nu átumka nékatsrumek? Winia ayashrusha Krístu ayashíyá asamtai ¿itiurak nuna tsanirí ayashín najanattaj? Penké túrachminiaitjai. <sup>16</sup>Kame ¿jusha nékatsrumek? Áishman tsanirijjaj tsaninkiar chíkichik ayashtinia áinis ajainiawai. Núnisan Yus-Papinium áarmaiti: Mai chíkichik ayashtinia áinis ajasarta-

tui. <sup>17</sup>Tura shuar ii Uuntrí Krístujaj tsaninkia mai chíkichík wakantin ajainiawai.

<sup>18</sup>Tuma asamtai tsanirmatniunmaya yajáyan wainkiarum tsékentiarum. Chíkich tunáa írúnna nu ii ayashínkia ti yajauch awajeatsui. Túrashashuar tsanirmakka ní ayashiniak yajauch awajeawai. <sup>19</sup>Yusa Wakaní ame enentáimin pujurtamu asamtai, ame ayashim ni jeente. Nu Wakaníinkia Yus amasuuti. ¿Nuka nékatsrumek? Tuma asamtai ame ayashmi nérenchaitme. <sup>20</sup>Krístu numpejaj sumakma asamtai, ayashmisha wakanmisha Yusna ániawai. Yusna asamtai ayashmijjaj péñker túratniuitme, Yus shiir awájásti tusam.

### Nuatkatniusha péñkeraiti, nuatkashtincha péñkeraiti

**7** Ayu. Átum áatrurmarmena nuna yamaikia ujaktajrume. Shuar nuat-teachkusha péñkeraiti. <sup>2</sup>Tura ti tsanirmatniun enentáimtuinia ásar ashí áishman ní nuwenak nuatkati tura ashí nuwá ní áishrinín iniumkati. <sup>3</sup>Áishmansha ni áishrj asa nuwen túratniua nuna umiktiniaiti. Núnisan nuwasha ni nuwe asa ni áishrin túratniua nuna umiktini-aiti. <sup>4</sup>Núwaka nínki ni ayashí nérenni-uchuiti, antsu ni áishrniuiti. Núnisan áishmansha nínki ni ayashí nérenni-uchuiti, antsu ni nuwénuiti. <sup>5</sup>Ni ayashí suritnaikiashtin ániawai. Tura mai itit awajnaitsuk Yus áusatin wakeruiniak ishichik tsawant kanakmin ániawai. Tura nuinkia atak tsanín pujustin ániawai. Túracharmatainkia uunt iwianch, Satanás, tunaanum iniartinian útsutkat-tawai katsuntratniun tujintiakui.

<sup>6</sup>Ayu. Tura nuna áarayatan nújjainkia “ashí shuar páchitsuk nuatkatniuiti” tátsujaj. Nuatkatniuitkiunka péñkeraiti. <sup>7</sup>Túramtai “ashí wíjjaj métek nuatkachuitkiunkia maak ainti” tajaj. Tura Yus ashí shuaran imiá métek

najanachuiti. Chikichan nuatkatniun súsaiti, tura chikichan yúpichuch katsuntratniun súsaiti.

<sup>8</sup>Natsancha wajencha juna tájai, “Wijjaj métek nuattsuk pujusrumka péñkeraiti.” <sup>9</sup>Tura katsuntratniun tujinkiarka nuatkartí. Ti katsuntratmin nekapeakum nuatkatniun péñkeraiti.

<sup>10</sup>Nuatnaikiarun antsu tájai, “Nuwa nuatkamuka ni áishriñ ikiukchatniuiti” tájai. Núnaka ii Uuntri Kristu akupkaiti aya winia chichampruchuiti. <sup>11</sup>Túramtai ni áishriñ ikiukkia niñki atak nuatnatsuk pujustí tura tsaniñ pujustinian wakerakka ataksha ni áishriñ waketkíti. Núnisan áishmansha ni nuwen ajapashtiniaiti.

<sup>12</sup>Chkích shuaran juna tájai wikia, ii Uuntri Kristu juna akupkachuiti. Yus-shuara nuwenka Yus-shuarchaitkiunka tura ni áishrijjaj pujustinian wakerakka péñkeraiti; ajapashtiniaiti, tájai. <sup>13</sup>Núnisan Yus-shuara aishri Yus-shuarchaitkiunka tura ni nuwejaj pujustinian wakerakka péñkeraiti; ikiukchatniuiti. <sup>14</sup>Nu nuwaka “Yus-shuarchajaj tsaniñ pujakun Yusjaj yajauch ajastatjaj” tu enentáimprashitiniaiti. Antsu nii Yus-shuar asamtai ni aishri niijjaj pujá asa péñker ajasminiaiti Yusjaj. Núnisan núwaka Yus-shuarchaitiat ni aishri Yus-shuaraitkiuinikia niijjaj tsaniñ pujá asa péñker ajasminiaiti Yusjaj. Núnisan ni uchirísha péñker ajasmin áiniawai Yusjaj. Núnischaitkiuinikia ni uchirí Yus-shuarcha uchiría áintsar ainti. <sup>15</sup>Tura áishmansha nuwasha Yus-shuarcha ana nu kanaktinian wakerakka túrati. Yus-shuar nujaj ankantaiti. Núnisan asati. Tuke máaniaktinian Yus nakitramaji. <sup>16</sup>¿Núwaka ni aishri Yus-shuar ajastatna nuna nekas nékawak. Tura áishmansha ni nuwe Yus-shuar ajastatna nuna nekas

nékawak? Yus-shuarcha nuka wétinia wakerakka wetí.

<sup>17</sup>Wátsek. Shuarka Yus-shuar ajaska Yus nin najanama áintsan tuke átiniaiti. Pujumia áintsan pujusminiaiti. Núnaka ashí Yus-shuarnum akupeajaj. <sup>18</sup>Iis, Yus-shuar ajasuka Israer-shuaraitkiunka tuke Israer-shuar atí. Tura Israer-shuarchaitkiunka Israer-shuar ajastin enentáimprashitiniaiti. <sup>19</sup>Israer-shuaraitkiunsha tura Israer-shuarchaitkiunsha nuka enentáimtuschatniuiti. Aya Yus tana nu umirkatin nekas enentáimtustiniaiti. <sup>20</sup>Yus-shuar ajasuka nuik pujumia áintsan pujusminiaiti. <sup>21</sup>Chkích shuara takarniuri asam ti itiurchat pujakmesha itiurchat enentáimpráip. Tura ankant jíinkimniaitkiunka jíinkitíaj. <sup>22</sup>Ankantchaitkiunka ankantaitkiunsha ju enentáimpratá. Takarniuka Yus-shuar ajas tuke chkích shuara takarniurinkiusha shiir enentáimpratniuiti Kristu nin tunaanumiá ankant awajsamtai. Tura shuar takarniuchua nu, Yus-shuar ajas Kristu takarin ajasuiti. <sup>23</sup>Ti wáitsamiayi Kristu in ankant awajtamsatniun. Ni numpejaj sumakma asarum shuar emetamu áirap. <sup>24</sup>Tuma asamtai shuar Yus-shuar ajas nuik pujumia áintsan yamaisha pujustí tura Yusan enentáimtus wekasati.

<sup>25</sup>Nuwa natsa túratniua nuna ya-maikia áujmatjai. Kristu juna akupkachmai tura Kristu anenkratmarí ti nekapsa asamtai wi tájana nu antukminiaiti. <sup>26</sup>Tuma asamtai juna tájai. Ti iturchatnum pujá asakrin shuar aya júnisan nuattsuk pujustin péñkeraiti. <sup>27</sup>Nuatkaitkiunka núwem ikiukip. Nát-saitkiunka nuwa eakaip. <sup>28</sup>Tura nu-atkumka tunáa túratsme. Nuwasha ini-urtukka niisha tunáa túrachuiti. Túrasa nuatnaikiaru itiurchatan ti wáinkiar-ta-

tui jū nunkanam. Nú itiurchatnumiā wi uwemtikraintjai.

<sup>29</sup>Yatsuru, juna tájarme. Ishichik tsawant taasai. Juyanka nuatkaru ainia nuka aya ni nuarin enentáimprashitini-aiti antsu Yúsna enentáimtustiniaiti. <sup>30</sup>Núnisan tuke Yúsnan enentáimsar útainia nusha uutcha áintsar pujustin áiniawai. Warainia nusha warascharua áintsar pujustin áiniawai. Súmainia nusha sumakcharua áintsar pujustin áiniawai. Jū nunkanmayajainkia itit awajmamsashitiniaiti. <sup>31</sup>Núnisan aya jú nunkanam péñker pujustin ti takaschatniuiti. Ashí jú nunkanmayanka amuukatniuiti.

<sup>32</sup>Jú nunkanmayajain itit ajaschak tusan wakerajrume. Nátsaka Yúsnan enentáimtawai ni wakera nuna umiktinian. <sup>33</sup>Túrasha nuatkaka jū nunkanman enentáimtawai ni nuarin shiir enentáimtiktsatta. <sup>34</sup>Núnisan nuwá nátsasha nuatkamusha niisháa enentáimiainiawai. Nuwá natsa Yúsnan enentáimtawai ni ayashísha ni wakanísha tuke Yúsjai shiir atí tusa. Tura nuátka-muka jū nunkanmayan enentáimtawai ni áishrín shiir enentáimtiktsatta.

<sup>35</sup>Atumin yáintajtsan juna tájarme. Itiurchat awajtsatsan wakeratsjai antsu shiir wekaakrum itit awajtsuk Yus shiir enentáimtustarum tusan wakerajai.

<sup>36</sup>Tura shuar ni nawantrí natsan nuatnaikiati tákunka péñkeraiti. Nawantrin natsa tuke apujsatniun nakitiakka surukminiaiti. Nusha tunaachuiti. <sup>37</sup>Tura chíkichka tuke natsan apujsatatj tákunka nekas péñkeraiti. Apujsatin itiurchatchaitkiuinikia tura ni nawantrí nuatnakchatniuitkiuinikia apujsatniuiti. Apujsanka nekas péñker túrait. <sup>38</sup>Tuma asamtai nuatmamtkianka péñker túrayi tura apujsanka nu nankaamas péñker túrayi.

<sup>39</sup>Nuwá aishri iwiaaku pujakuinikia tuke nijjai tsanin pujustiniaiti. Tura ni

aishri jakamtai ankant ajas ni wakera nujai Yus-shuaran iis nuatnaikiamniaiti, <sup>40</sup>tura tuke nuatnatskesha nu nankaamas nekas shiir pujustatui. Tú enentáim-jai wikia tura Yusa Wakanísha métek tátsuash.

### Yurumkasha namansha ántar-yusnum susamu

**8** Ayu. Yamaikia yurumkasha namansha ántar-yusnum susamun áujmatsattajai. Jujai túratniua nuka mash nékaji. Tura shuar “ti nékaitjai” enentáimkiunka nujainkia “neka asan nankaamantuitjai” tu enentáimui. Antsu shuar chíkich shuaran aneakka nin péñker atí tusa yayawai. <sup>2</sup>Shuar “ti nékaitjai” tákunka nekas nekaatniua núnaka unuimiarchaiti. <sup>3</sup>Tura Yúsán aneana núnaka Yus péñker nékawai.

<sup>4</sup>Wátsek. Ántar-yus susamu yúatin junis enentáimpratniuiti. Yuska aya chíkichiiti. Tura chíkich Yus atsakui, <sup>5</sup>aentsu yusrí nayaimpinmasha nunkaasha írunna nuka penké ántar áiniawai. Kame aentsu yúsrísha tura úuntrísha ti írunui. <sup>6</sup>Tura iikia nékaji, aya chíkichik Yus awai, nusha ii Aparínti. Ashí írunna nuna najanaiti tura ni wakera nuna umikiat tusa najatmamji in. Ii Úuntrísha chíkichiiti, Jesukrístu. Nijjainkia ashí najanamuiti. Tura iisha ni kakarmarijiai iwiaaku pujaji.

<sup>7</sup>Tuma asamtai ántar-yus susamu yuamniaiti tura Yus-shuar awai juna nékainiatsna nu. Nu shuar ántar-yusan yaunchu tikishmatraru ásar nú yusan susamun yuawarka itiurchat enentáimprar “enentáiruí yajauch ajasjai” tiartatui. <sup>8</sup>Watsek, yuamujai Yus in shiir enentáimtikrampratniun jeatsui. Yuarkia nujai péñker áhattaji tura yúachrikia yajauch áhattaji. <sup>9</sup>Ankantaitme yúatin wakerakmeka. Tura anearta. Ame yúakmin chíkich

shuar itiurchat enentáimna nusha ámin wáitmak yúanka ni enentáin tunáa ajastatui. <sup>10</sup>Íistá. Ámeke neka asam ántar-yusa jeen wayam tura nuí yúakminkia ame yatsum nuí wáitmákchanpiash. Tura niisha itiurchat enentáimiat ántar-yus susamun yúashtimpiash. <sup>11</sup>Nújainkia ame nékamujai ame yatsum Kristu jaka uwentikramia nu yajauch ajastatui. <sup>12</sup>Túramtai ame yatsum itiurchat enentáimna nu yajauch awajeakum Krístunmasha tunáa túraitme. <sup>13</sup>Nu asamtai winia yatsurun wi yúajna nujai yajauch awajeaknaka namannaka penké yuashtatjai nii tunáa ajasain tusan.

### Kristu akatramu túramnia nu

**9** Ashí Kristu akatramurí túratniua nuna wisha túramniaitjai ni akatramurí asan. Iis, wisha ii Uuntrí Jesusan wáinkiaitjai tura wisha Jesukrístu takatrín takaajai. Winia takatrujain átumka Yus-shuar ajasuitrume. <sup>2</sup>Chíkich shuar “Kristu akatramurínchuiti” túrutainiakuiasha átumka winia takatrujai Yus-shuar ajasu asakrumin nujai wi nekas Kristu akatramuríntiaj nu paant nekaamniaiti. Tura tu enentáimtursatniuitrume.

<sup>3</sup>Ashí shuar “Kristu akatramurínchuiti” túrutainia nuna júna tájai. <sup>4</sup>Wisha Yus-Chichaman etserkataj tusan shuárnum irakun ashí ajampruinia nuna yuamniaitjai tura umarminiaitjai. <sup>5</sup>Tura Pítrusha, Jesusa yachísha, tura chíkich akatramusha irainiak ni nuwen Yus-shuar ainia nuna jukimnia ániawai. Wisha núnisnak túramniaitjai. <sup>6</sup>Chíkich akatramuka kuit susamujai Yus-Chichaman etserainiawai. Wisha Pírnápísha núnisrik túramniaitjai. Kame ¿aya íichikik takastiniaitiaj? <sup>7</sup>Suntarka ¿ní kuítrijjaimpiash takaa? ¿Tsanimpian aráa nu nuna neren yúatsuk. Wáakan wainiua nusha muntsurin úmatsuk?

Núnisan Yus-Chichaman étsera nusha nú takasmanumia yurumámniaiti. <sup>8</sup>Aya aents enentáimmian chichaatsjai. Muisais akupkamunmasha métek tawai. <sup>9</sup>Muisais akupkamunam áarmaiti:

“Turu takaak jiníkaia saepen pakartaj tusa nájakui ni nují jiníkiatáshtini-aiti. Antsu ni wakerak yuati.” Tu áarmaiti.

Tura Yus aya túrunak enentáimprachmi-ayi jujai. <sup>10</sup>Antsu in jujai nekaawarat tusa tímiayi. Jiníkaia araana nusha tura júukmatai saepen pakaana nusha nuna jiníkaia mai yurumátin ániawai. Paant atí tusa Yus nuna áarmiayi. <sup>11</sup>Tuma asamtai Yus-Chicham atumiin etserkakrin nuyá átum takakrumna nujai in ajamsatniuitrume. ¿Nusha itiuurchatkai? <sup>12</sup>Chíkich akatramu atumiin irutainiak ajamsamun yuamniaitkuinkia iikia nekas túramniaitjai ii etserkamujai Yus-shuar ajasakrumin.

Tura wikia antsu túrachuitjai. Atsumaknasha ashí itiuurchat ana nuna kat-suntramjai Kristu shiir chichamen étserkui shuar itiuurchat enentáimturarain tusan. <sup>13</sup>Ashí shuar ni yúsriniun tuke pujurin ainia nu, ni yusrí jeen írunna nuyán yurumáiniawai. Tura yus-sutai namanken maawar nuyá yurumáiniawai. <sup>14</sup>Núnisan Yus-Chichaman etserniua nuka Yúsnan takasu asamtai pénger ajamsatniuiti. Nuna Kristu akupkamiayi. <sup>15</sup>Tura wisha ajamsamun yuamniaitiatan tuke winia kuítrujai yurumámjai. Tura yamaisha surúsúk tusan áattsujrume. Antsu nuna túrutsuk jakanka maak aintjai.

<sup>16</sup>Uwempratin chichaman wi étserkun aya nújain “ti penkeraitjai” enentáimtumatsjai. Kame Yus nuna túratniun surusuncha itiuurkatjak. Nuna túrachkunka ti itiuurchat pujusaintjai. <sup>17</sup>Wakerakun étserkunka, warasminiaitjai. Tura nakitiaknasha tuke Yus surusmanka umiktiniaitjai. <sup>18</sup>Tura



jujaj antsu nekas warasminiaitjai: Wi túramnian iniaisan chikichnan takatsuk aya winia kuítrujain uwempratin chichama éterjai. Nujaj waraakun akikma áintsan̄kete.

<sup>19</sup> Chíkich shuara takarniuchuitatan ashí shuara takarniuríya áintsan̄ketjai Kristu shuari untsurí ajasarat tusan.

<sup>20</sup> Israer-shuarjai pujakun niisha Yus-shuar ajasarti tusan Israer-shuara áintsan ajai. Kame Muisaisa akupkamurí umirkatin áiniakui wisha aun umirkashtiniaiatnak umirniuitjai.

<sup>21</sup> Tura Israer-shuarchasha Yus-shuar ajasarti tusan, nu shuar Muisaisa akupkamurín umirkashtin áiniakui, wisha nuna umirkashtinia áintsan ajai. Tura Kristu akupeana nuna umirkatin asan nekas Yus akupkamun umirniuitjai. <sup>22</sup> Yusjaj katsuarchasha ti penker Yus-shuar ajasarti tusan wisha katsuarcha áintsan ajai. Chíkich chíkich shuarjai métek ajajai ishichkisha Yus-shuar ajasarti tusan. <sup>23</sup> Ashí wi túraj núnaka uwempratin chicham tuke shiir atí tusan túrajai. Tura nu chichamjai wisha atsumtsuk shiir wekaajai.

<sup>24</sup> Shuar nekapnaisatniusha untsurí tsékentín átsuk tura aya chikichik awakmatsuk. Niñki, awakmakun súsatniua nú shiirmachin achiktatui. Núnisrum kakarum ajasrum awakmak shífirmachin achiktinia áintsarum Yusna takastarum. <sup>25</sup> Shuar nakurak nekapnaisatin ainia nuka nupetmaktaj tákunka ashí itit awajea nuna ikiuniawai. Iisha núnisrik nu enentáijjai Yusna nu takastiniaitji. Nakuruinia nu shuar awakmakun tawasap súsatniua nuna achikiarsha nú tawaspan wárik kajinmatkimniaiti. Antsu Yus in amastatjinia nú tawasap tuke amuukashtatui. <sup>26</sup> Wikia aya nánkamsan tsékeatsjai. Nasejai maania áintsan máaniatsjai. <sup>27</sup> Antsu winia ayashrun awatinia áitkiasnak

umimtikiajai. Túrachkunka chikichan unuiniariatan winiasha awakmakun súsatniua nú shiirmachin Yus surustinian nakitruiranti.

### Ántar-Yus tikishmatrashtiniaiti

**10** Enentáimpratarum, yatsuru. Yus yaunchu ii úntrin ashí métek yáinmiayi. Nusháa yuranmijjai jintian nekapruamiayi. Tura ashí ii uuntri nu yuranmin apapekar wearmiayi. Ashí núnisar Kapaaku Nayaantsan Yus akankamunam wekasar katitkiarmiayi. <sup>2</sup> Tura Muisaisan umirkar yuranminiam tura nayaantsanam ashí imiaimiu áintsan ajasarmiayi. <sup>3</sup> Núnisan ashí mash Yusnumia yurumkan yuawarmiayi. <sup>4</sup> Entsan̄cha ashí mash Yus susamunak umararmiayi. Kame Yus kayanmayá entsan akupkamtai ashí umararmiayi. Krístusha, nú kaya áintsan, niijjai tuke weakui ni wakaní atsumamurín Krístunmayan takusarmiayi. <sup>5</sup> Tuma aín Yus ti yáinmaitiat ni wakeramun umikcharmiayi. Tura ásar ni nunkeen jeatsuk atsamu nunkanam ti untsurí jákarmiayi.

<sup>6</sup> Iisha nujaj unuimiartiniaitji. Iikia ni wakeriarmia áintsar<sup>i</sup> yajauchia nu wakerukchatniuitji. <sup>7</sup> Nu asamtaí ántar-yus ni túrawarmia áintsarum tikishmatrairap. Iis, jiru yusrí shiir awajenakuí Yus-Papinium áarmaiti, “Nu shuar yurumáwar nampekar námper ti najanawarmiayi.” Tu áarmaiti.

<sup>8</sup> Nii túrawarmia núnisrik iikia tsanirmashtiniaitji. Nuna túrawar paintitres mir (23.000) chikichik tsawantai jákarmiayi. <sup>9</sup> Iisha tunáa túrar “Yus asutiúashtatui” tu enentáimprash-tiniaitji. Niisha nuna túrawar napijjai esaim untsurí jákarmiayi. <sup>10</sup> Yusha yajauch áujmatsashtiniaiti. Nuna

túrawarmatai Yus ni suntarin akupak untsurin maawarmiayi.

<sup>11</sup>Yaunchu ii úuntriijai túrunamu in amúamu tsawantnum pujajnia nuna jintintramat tusa áarmaiti.

<sup>12</sup>Tuma asamtai shuar “Tunaanum iniaarchattajai” tákuŋka anearti. Anearchamka iniaarminiaitme.

<sup>13</sup>Tura ame ititurchatrumka aya amek nekapeatsme. Chíkich shuarsha nu ititurchatjai métek nekapsatin áiniawai. Jusha ti enentáimpramniaiti. Ame katsuŋtratin tujintiamna nuna nankaamas ititurchatan Yuska péŋker asa tsan̄katramatsui. Antsu ititurchat tarutrammatai, nu ititurchatnum pujamin Yuska uwempratniun jintintramattawai. Nújain̄kia katsuŋtrattame.

<sup>14</sup>Nu asamtai aneamu yatsuru peŋke ishichkisha ántar-yus enentaimtusairap.

<sup>15</sup>Atumsha nékatsrumek. Wi tájana nu nekaschakait. <sup>16</sup>Kristu jakamu enentáimtustin námper najanar Yus áujeaji Kristu numpen nakumea nu shiir atí tuser. Tura métek umarar nujai Kristu numpé métek enentáimtaji taji. Tura apatkusha púurar<sup>i</sup> tura métek yuar<sup>i</sup> nujai Kristu ayashí in jarutramkamu métek enentáimtaji taji. <sup>17</sup>Apatkusha chikichkiitiat púuram untsurí ajatsuk. Iisha núnisrik untsurífiatar nu apatuk métek yuar<sup>i</sup> métek enentáimprar chikichik ayashtinia áintsar aji.

<sup>18</sup>Israer-shuartaisha enentáimpratai. Yus-sutai namaŋken yuinia nu, métek yuawar Yusan métek enentáimtuiniatsuk. <sup>19–20</sup>Núnisan

Yus-shuarcha ántar-yus sutai namaŋken suiniak nekas-Yusan suiniatsui antsu yajauch wakanin suiniawai. Kame ántar-yus ániak peŋké ántar ániawai, iwiaakuchu ániawai. Nu namaŋsha sutai namaŋketiat péŋker namaŋkete, yajauchichuiti. Aya junak tajai. Yus-shuarcha ántar-yus sutai namaŋken

suiniakui amesha niijiai métek yuamka yajauch wakanniasha niijiai métek enentáimtaji tame. Nu antsu yajauchiiti. <sup>21</sup>Kristu numpen nakumea nu úmakrum íwianch susamua nuka umarchatniuitrume. Kristu ayashin nakumea nu yúakrumka íwianch susamua nuka yúashtiniaitrume. <sup>22</sup>¿Warí, Yus akajkatin wakeramek. Iisha nin nupetkamniashitaj?

### Aya aneakur takastiniaitji

<sup>23</sup>“Ashí túramniaitjai” tiniu ániawai. Ayu, tura mash yáintkiashtatui péŋker wekasatniun. Nekas ashí túramniaitjai tura mash yáintkiashtatui wakaniur kakaram ajastin. <sup>24</sup>Nú arantcha chíkich yáintincha enentáimpratniuitji. Aya íniuk pachischatniuitji.

<sup>25</sup>Naman̄ súnakum inintrutsuk sumakta. Tura ántar-yusan susamusha yajauchichuashit enentáimtsuk páchitsuk yuata. <sup>26</sup>Ashí ju nun̄kasha tura ashí írunna nusha Yúsachuk ainia. Tuma asamtai péŋker ániawai.

<sup>27</sup>Yus-shuarchasha yurumkan ajampramkuisha ashí mash yajauchichuashit tu enentáimtsuk páchitsuk yuamniaitme. <sup>28</sup>Tura chíkich chichaak “Juka ántar-yus susamu namaŋkete” túramkuin̄kia nuikia yuawaip. Yúakminkia nu shuar ititurchat enentáimprattawai. <sup>29</sup>Ame páchitsuk yuamniaitkiumnisha nii antsu yúachmin asa ititurchat enentáimprattawai.

Tura amesha tíchatameash “¿Urukamtia nii tujintiakuwi wi yúachminiaitaj.

<sup>30</sup>Wi Yusan yuminsan yúakuisha urukamtia ititurchat enentáimturainia. Yus yuminsachmakait?” tíchatameash.

<sup>31</sup>Ayu, yúakmesha úmakmesha ashí túramna nusha ashí shuar Yusan shiir enentáimtusarti tusam túratá.

<sup>32</sup>Tuma asamtai ii túramujai chíkich shuar tunaanum ajuashtiniaitji.

Israer-shuarsha, Israer-shuarchasha, Yus-shuarsha ashí yáintiniaitji. <sup>33</sup>Wisha ashí shuaran yáintinian tuke enentáimjai. Ashí shuar uwemprarti tusan wi wakeraj nuna enentáimtsuk nin yáintinian tuke pujurjai.

**11** Kristu turamia áintsan takaajai **11** wisha. Atumsha núnisrum wi takaajna áintsarum takastarum.

### Nuwa Yusa jeen túratin

<sup>2</sup>Yatsuru, átum winia tuke enentáimturarum wi tímiajrumna nu umirniuitrume. Tuma asakrumin shiir enentáimtajrume. <sup>3</sup>Nu arantcha ujaajrume. Yus Apa Krístun akupea áintsan Kristu ashí áishman kan akupeawai. Núnisan áishmansha ni nuwen akupeawai. <sup>4-5</sup>Íjjiainkia shuar Yus áujenak tura núnisan Yus-Chichaman étserainiak áishman etsenkrukchatniuiti antsu nuwa múuknum nukumaktiniaiti. Tuma asamtai áishman nui etsenkrakka natsantaiti. Tura nuwa múuknum nukumakchan ka natsantaiti. Intiashin tsupimiarua áintsankete. <sup>6</sup>Nuwa múuknum nukumaktinian nakitiakka intiashin tsupirtí nuikia. Watsek, nuwa ni intiashin tsupirtinian nakitiakka, tura awampratniun natsamakka múuknum nukumakti nuikia. <sup>7</sup>Áishman kka Yúsan nakumeawai. Yusna shiir ana nuna nakúm káttsa Yus áishman kan najanamiayi. Tuma asamtai áishman kka etsenkrukchatniuiti. Antsu nuwan ka áishman na shiir ana nuna nakúm káttsa Yus najanamiayi. <sup>8</sup>Iis, Yus áentsun najaneak nuwan mayan áishman kan najanachmiayi antsu áishman ka ukunchíjjai nuwan najanamiayi. <sup>9</sup>Nuwan yáinkiat tusa áishman kan najanachmiayi antsu áishman kan yáinkiat tusa nuwan najanamiayi. <sup>10</sup>Tuma asamtai núwaka múuknum

nukumaktiniaiti, nayaimpinmaya aencha ísarti tusa. <sup>11</sup>Ayu, tura áishman nuwajainchu atsuinti tura nuwasha núnisan áishman jainchu atsuinti. Yus ju nun kan núnisan atí tusa najanaiti. <sup>12</sup>Iis, Yus nuwan áishman numia najanamiayi tura áishmansha nuwan maya akiiniaiti. Tura Yus mai najanaiti.

<sup>13</sup>Enentáimpratarum atumsha. Nuwa múuknum nukumatsuk Yus áujsatin ¿pénkerkai? <sup>14</sup>Ii shuartinkia áishman intiash ajakin natsantchakait. <sup>15</sup>Antsu núwaka intiash ajakin pénkerchakait. Múuknum nukumaktinian susamuiti. <sup>16</sup>Watsek, shuar tuke umiktinian nakitiakka juna nekaati, iisha tura ashí Yus-shuartisha aya tu enentáimji.

### Kristu jakamu enentaimtustin nampernum yajauch túramu

<sup>17</sup>Yamáí áarattajrumna nujain shiir enentáimtatsjarme. Atum irunkuram yáiniaiktiniaitrume tuke pénker wekasatin. Átum antsu iruntrarum yajauch awajnaiyarme. <sup>18</sup>Wats, Yusa Jeen irunkuram atumsháa enentáimprarum kanakurme. Kame tu ujatkarmai. Nekaschashit. <sup>19</sup>Tuke tupartatrumek Yúsnan ti nekana nu shuar paant nekanat tusarme. Antsu kajernaikiar kanaktin pénkerchaiti. <sup>20</sup>Kanakin asarum Kristu jakamu enentaimtustin nampernum atum iruntrarum yúarmena nu nekas Yúsnachuiti. <sup>21</sup>Iis, ashí ní yurumken itiaawai ai yurumáttsa tura chikichan náksuk niá niá wari yuattsa wakerawai. Chikichkia ishichik itiaana nu tsukamawai tura chikichcha nampekarai. <sup>22</sup>Yurumkan ishichik itiaana nu iniatsáarchamek. Atum áitkiarum núnisan Yusa jeen yurumashtiniaiti. Natsantaiti. Warí, chikich jea átsuk ai yurumátin. ¿Warimpait. Jujai shíirash áujsatjarum? Atsá. Jujai shiir áujsachminiaitjarme.

### Kristu jakamu enentaimtustin námper

<sup>23</sup>Ii Uuntrí Kristu jintintruama nú-naka ujakmajrume. Jútas tuke súrat-sain, nu kashi ii Uuntrí Jesus apatkun júkí <sup>24</sup>Yusan yumínsamiayi. Nuyá puur tímiayi “Yuatarum. Júsha winia ayashruiiti; atumin jarutramkatta núiti. Jú yúakrum Winia enentáimtursatarum” tímiayi. <sup>25</sup>Núnisan yurumá umik piniñ-nasha achik tímiayi “Jú piniñ Yamaram Chichamaiti. Tura winia numpar puár-matai Yamaram Chicham nekas uminkiatatawai tawai. Jú tuke úmakrum Winia enentáimtursatarum’ tímiayi. <sup>26</sup>Tuma asamtai jú apatuk yúakrum tura pininsha úmakrum ii Uuntrí Kristu jakamurí enentáimtarme. Kristu táatsain jú tuke túratniuitrume.

### Shiir enentaijijiai Kristu jakamu enentaimtustin nampernum yuatniuiti

<sup>27</sup>Tuma asamtai shuar Yusan enentáimtutsuk jú apatkun yuawar tura jú piniñnumiancha umarar Kristu ayashincha ni numpencha yajauch enentáimta asa tunáa túraití. <sup>28</sup>Nu asamtai ashí shuar jú apatkun yútsuk tura jú piniñnumiancha úmutsuk ni enentáin iwiaratniuiti Yusjai. <sup>29</sup>Kristu ayashí jakamu enentáimtutsuk yúakka tura úmakka nuna tura asa asutniáttawai. <sup>30</sup>Atumsha tura asarum jaarme tura pimpiruitrume. Chikichcha jákaru áiniawai. <sup>31</sup>Ímia-iik ímiakrinkia Yus in asutiámachaintji. <sup>32</sup>Tura ii enentáin Yus yajauchia nuna wáiniuk asutiámji. Túrachkupka ashí Yus-shuarchajai súmamtikramawaintji.

<sup>33</sup>Tuma asamtai, yatsuru, iruntrar yurumáttsa matsatkurmeke nákastarum métek yurumáin. <sup>34</sup>Shuar tsukamakka ni jéeniink<sup>i</sup> yurumáti. Nújainkia yajauchijiai irunchakrumin Yus asutiá-

mashtatrume. Ayu, chíkich áatrururmena núnaka wi aj jean iwiarattajai.

### Yusa Wakaní ni shuarin susamu

**12** Yusa Wakaní ashí ni shuarin súana nuna yamá ujaktatjarme. Nekaatarum, yatsuru. Yus-shuar takasarti tusa Yusa Wakaní juna súsaiti.

<sup>2</sup>Yaunchu átum Yus-shuar tuke ajat-suk chíkich shuarjai métek ántar-yus tikishmatramarme. Niisha ántar-yus ásar áujmatramsachmin ármiai. <sup>3</sup>Tura jú-jain shuar Yusa Wakaní kakarmarjijai chichaana nu nekaammiaiti. Yusa Wakaníjainkia shuar “Jesus yajauchiti” tíchammiaiti. Núnisan aya Yusa Wakaníjain “Jesus winia Úuntur asa akuptuktiniaiti” tíminiaiti.

<sup>4-5</sup>Yusa takatrí íruntuk. Tura Yusa Wakanínk<sup>i</sup> ashí nuna takastinian súsaiti. Tura shuar Yus-shuara Uuntrí chikichik ain ashí Yusa takatrin métek takaatsui. Antsu chikichkin ashí nankaamas pénger takaawai. Yusa Wakanísha nuna shiir takasat tusa súawai. Tura Nii wakera nuna Niñki ni shuarin chikichik chikichik niisháa niisháa súawai. <sup>6</sup>Yúskete ashí ni shuarin niisháa takamtikeana nu. Niñki ashí ni shuarin enentáin takaak takatnasha shiir takamtikeawai. <sup>7</sup>Yusak túratin súam Yusa Wakaní kakarmari paant átatui nu takasmanum. Tura ashí shuar ní takatrijiai yáiniaiktin áiniawai. <sup>8</sup>Júnaka Yus takamtikeawai. Nékana nu shuarnasha, unuimiarua nunasha Yúsnan ujaktinian súawai. Tura mai shuaran Yusa Wakaní kakarmarjijai nuna túratniun súsaiti. <sup>9</sup>Chikichnasha Yúsán áujenak Yúsán ti enentáimtusar nekas iturchat ana nuna iwiaratniun súawai. Nincha Yusa Wakaní kakarmarjijai nuna takastinian súsaiti. Chikichnasha jaan tsuártinian súawai. <sup>10</sup>Chikichnasha aents niñki túrachminian túratniun

súawai. Chikichnasha Yúsnan etserkatniun súawai. Chikichnasha shuar wari yajauch wakannia péñker wakanniasha apatka nekaatniun súawai. Chikichnasha niisháa chichaman chichastinian súawai. Chikichnasha niisháa chichasman jintíatniun súawai. <sup>11</sup>Tura ashí shuara enentáin nu Wakanik takaawai. Tura Nii wakera nuna ankant ankant súawai takastinian.

### Ashí Yus-shuar Kristu ayashía áintsan ajainiawai

<sup>12</sup>Iikia Kristu ayashía áintsar<sup>i</sup> ayashímkiaitji. Kristu ayashí muchitmarisha írunui. Niisha túmaitiat chikichik ayashtiniaiti. <sup>13</sup>Tura imianiakrin Yusa Wakaní chikichik awajtamsamji, Kristu ayashía áintsan. Israer-shuarsha, Israer-shuarchasha, ti itiurchat takaana nusha, ankant ainia nusha, ashí yamá chikichik ajasuitji. Tura Yusa Wakaní pimiutkamuitji Nijijai tsaninkia pujakur.

<sup>14</sup>Ayashi muchitmarí aya chikich-kichuít. <sup>15</sup>Tuma asamtai, winia nawer uwejruchuitiat tuke winia ayashrunuít. <sup>16</sup>Winia kuíshrusha jíiruchuitiat tuke winia ayashrunuít. <sup>17</sup>Wátsek winia ayashur aya jííkitkiuinkia ¿itiurak antukaintiaj? Winia ayashrusha aya kuíshkitkiuinkia ¿waríjiain nekapsaintiaj? <sup>18</sup>Nu asamtai Yus winia ayashru muchitmarí ni wakeramunam ikiusuít. <sup>19</sup>Chikichik muchitmajain ¿ayash áminkiat? <sup>20</sup>Antsu untsurí muchitma akuisha chikichik ayashkiiti. Iisha núnisrik chíkich chíkich iisháa takayatrik métek takasar Yus wakeramu takamtsuk umáji.

<sup>21</sup>Winia jíiru péñker ain winia uwejrúncha wakerishtatjak. Winia muukarsha péñker ain winia nawernasha wakerishtatjak. Núnisan Yus-shuar shiir enentáimtumak ni

yachin “atsumatsjame” tíchamniaiti. <sup>22</sup>Antsu ii muchitmarí ishichik enentáimtajnia nu atsakuinkia ti atsumawaintji. <sup>23-24</sup>Chíkich muchitmasha, ímiancha nu, shiir iwiarmamtaji. Tura nu muchitmaka shiir ísminia nujai nankaamas péñker wainji. Iis, shiircha nu antsu péñker wainji. Yus ii ayashin núnisan atí tusa najanamiayi. <sup>25</sup>Nujainkia ayashí muchitmarí máanaitasuk métek yáiniainiawai. <sup>26</sup>Chikichik muchitmaram najaimiakum ashí ayashniun wáitiatsmek. Núnisan chíkichik muchitmaram ayap ajakum ashí ayashniun shiir átsmek.

<sup>27</sup>Núniskete Kristu ayashíjjai ayashímkiaji nu. Tura chíkich chíkich ni muchitmarí aji. <sup>28</sup>Ayashniun muchitma írunna áintsan Yus ni shuarin untsurí takatan súsaiti. Emka Yus akatramu, nuyá ni chichamen etserin, nuyá jintinkartin, nuyá aents túrachminian túrin, nuyá tsuákratin, nuyá yáinkratin, nuyá akupin, nuyá niisháa chichamjai chicharin, mash írunui. <sup>29</sup>¿Ashí Yus akatramuk ainia. Ashí Yus-Chichaman etserniuk ainia. Ashí jintinkratniuk ainia. Aents túrachminian ashí túriniak ainia. <sup>30</sup>Ashí tsuákratniuk ainia. Ashí niisháa chichamjai chichamtiniak ainia. Ashí niisháa chichamjai chichasman jintinkratniuk ainia? Atsá. Túmachuít. <sup>31</sup>Túmaitkuinkia péñkera nu takastin wakerukturum. Tura imiá péñkera nuna juí jintintiatjarne.

### Aneatin

**13** Ju nunkanmaya aentsu chichamen untsurí chichayatnak tura nayaimpinmaya aentsu chichamencha chichayatnak anenkratchaknaka tampur meserua áintsanak aya ten-ten ajajai. Penké ántranak chichajai. <sup>2</sup>Yus-Chichamnasha ti shiir étseriatnak, túrasha ashí uuqmancha tura ashí

nekaamniancha nékayatnak, túrasha Yúsán ti enentáimtusán murá umuchiayatnak, anenkratchaknaka penké ánráitjai. <sup>3</sup>Ashí wi takakjana nuna atsumainian súayatnak tura Yus shiir awajsattsan winia ayashrúncha áesawarti tusán surumayatnak tura anenkratchaknaka ánrának túraitjai.

<sup>4</sup>Anenkartaka wari kajeatsui, tsánkaiti, chíkich shuaran shiir awajniuiti, péechach asa waantu enentáimtusui. <sup>5</sup>Anenkartaka natsanta nuna túrichuiti, níniunak enentáimchaiti, kajechuiti, páchichuiti.

<sup>6</sup>Chíkicha tunaarín wararchaiti antsu péñker shuaran wararniuiti. <sup>7</sup>Anenkartaka aya katsunteawai. Tsanú chichamnasha nakitiawai antsu aya péñker ana nuna nákwai. Tunáa shuar shiir ajastí tusa tuke nákwai.

<sup>8</sup>Anenkrattainkia tuke amuukashtini-aiti. Antsu ju nunka amuukmataisha Yus-Chicham etserkatin atsuttawai, tura niisháa chichamjai unuimiatsuk chichastincha amuukattawai, tura ashí nekanamtai unuimartincha atsuttawai.

<sup>9</sup>Kame yamaikia aya ishichik nékaji. Yus-Chichamsha amutsuk étsereaji. <sup>10</sup>Túra ukunam mash nekanamtai yámankamtaik nekaamuka ántar átatui.

<sup>11</sup>Yaunchu wi uchich asan uchichia áintsan enentáimkiun chichasmajai. Antsu yamaikia uunt ajasan uchiniun iniaisaitjai. <sup>12</sup>Núnisrik yamáí ju nunkanam Yus paant wáintsuji. Íspik kusurunam ímsatniua áintsankete.

Antsu ukunam mai métek paant wainniaikiattaji. Yamaikia aya ishichik nékajai. Nuí antsu Yus winia nékara áintsanak nekaattajai. <sup>13</sup>Watsek, menaintiu amuukashtin áiniawai. Ju áiniawai: Yus shiir enentáimtustin, shiir ana nu nákastin, tura anenkrattai. Ju menaintiunmasha anenkrattainkia ashí nankaamakuiti.

## Niisháa chicham unuimiatsuk chichastin

**14** Nu asamtai, anenkratin atarum. Tura núnisrumek Yúsán péñkera nu takastin wakerukturum. Imiánkaska Yus-Chicham etserkatin péñkeraiti. <sup>2</sup>Nújainkia niisháa chichamjai unuimiatsuk chichastin péñkerchaiti. Iis, nu shuar chíkich shuarjai chichatsuk aya Yusjai chichaawai. Ni chichame penké antukchamniaiti. Yusa Wakaní nin chichastinian súawai túrasha tana nu nekaachminiaiti. <sup>3</sup>Antsu Yus-Chichaman étserea nuka shuaran yayawai. Shuaran ikiatsuártasa, tura ikiakártasa, túrasha atsankrattsa yayawai. <sup>4</sup>Niisháa chichamjai unuimiatsuk chichaana nuka aya níñki katsuartinian yáinmamui. Antsu Yus-Chichaman étserea nuka ashí Yus-shuaran ikiatsuáwai.

<sup>5</sup>Atumsha ashí mash niisháa chichamjai chichastinian wakerajrume. Túrasha nuna nankaamas Yus-Chicham etserkatniun wakerajrume. Aya chichastinjinjainkia ju imiá péñkerchakait. Kame chichasma jintíakmekka maak. Nujai Yus-shuar tsakarartatui.

<sup>6</sup>Enentaimpratarum, yatsuru. Nuí iraakun aya niisháa chichamjai chichaaknaka ¿itiura yáintatjarum? Antsu Yus winia jintintruamuncha tura wi nékajna nunasha étserkunka yáintatjarume. Yus-Chichamnasha tura ashí Yúsáncha jintinkiuuncha yáintatjarume.

<sup>7</sup>Peemsha tura tumansha wi tájana áintsan áiniawai. Péñker tuntuíyamuka paant nekaamniaiti. Tura péñker tuntuíyachkuínkia, nu tuntuíyamu nekaachminiaiti. <sup>8</sup>Suntarsha mesetnum wéénakui ni kapitíantri ni wakeramun ujaktinian kachun umpuawai. Paant umpuakuínkia suntarsha ni

wakeramun nekaawartatui. Tura paant umpuachkuinkia suntarsha ¿itiurak mesetnum wétinian iwiarat? <sup>9</sup>Atumjajsha núniskete. Nekaachmin chichamjai chichaakminkia ¿támena nuna itiur nekaawartata? Nase chichartsumeash. <sup>10</sup>Ju nunkanmaya chichamka ti untsurí írunui. Nu chichaman nékákka ashí antukmin áiniawai. <sup>11</sup>Tura chíkích shuara chichamen ántachkunka níjijainkia yajaya apachia áintsanak ajajai. Niisha wíjijainkia yajaya apachia áintsankete. <sup>12</sup>Tuma asamtai, Yusa takatrí ti wakera asarum ashí Yus-shuaran ikjarartatna nú takat nekas wakerukturum.

<sup>13</sup>Nu asamtai niisháa chichamjai chichaitkiumka chichasumna nu jintiartin Yus seata. <sup>14</sup>Niisháa chichamjai Yusan áujeaknaka nekas winia wakantrujai áujeajai tura áujasjna nuna nékatsjai. <sup>15</sup>Antsu wikia júnisan enentáimjai. Yusan áujeakun winia wakantrujajsha áujasattajai tura enentáimtsuk áujasashtajai. Kantamkuncha kantamaj nuna enentáimkiun winia wakantrujajsha kantamattajai. <sup>16</sup>Amesha shuar iruntramunam aya wakanmijijai niisháa chichamjai Yus shiir yumínsakmincha nekaachmin asamtai nékachuka ámijijai métek áujasatniun jeatsui. <sup>17</sup>Ti shiir Yus yumínsam áujeatsmeash tura chíkíchka Yusjai ikiakáatsme. <sup>18</sup>Ashí átum nusháa chichamjai chicharmena nuna nankaamas wikia chichaajai. Nuna Yusan yumínsajai. <sup>19</sup>Túmaitiatnak untsurí chichamjai chichasan ántumtikiashtinjainkia nankaamas Yus-shuar iruntramunmanka aya senku chichamchijjain tiintjai, paant jintintiawartaj tusan.

<sup>20</sup>Yatsuru, uchía áintsarum enentáimprairap. Kuirchia áintsarum tunáa túrashtin enentáimpratarum tura chíkích írunna nujai uunt

enentáimpratniua áintsarum enentáimpratarum. <sup>21</sup>Yus-Papinium áarmaiti:

““Yajaya shuaran akupkan niisháa chichamjai chichastatjai. Tura nújajsha anturtukchartatui” tawai Yus.” Tu áarmaiti.

<sup>22</sup>Nújainkia páantaiti, nusháa chichamjai chichastinkia Yus-shuaran ashamtikiar enentáimtikratniun Yus súsaiti. Yus-shuaran tu enentáimtikratniun súsachuiti. Antsu Yus-Chichaman etserkatniunka Yus-shuaran enentáimtiktsuk Yus-shuaran yáintinian súsaiti. <sup>23</sup>Tuma ain, nékachusha tura Yus-shuarchasha Yus-shuar iruntramunam wayanka tura ashí niisháa chichamjai chichainianak wáinkianka “mash waurka ajasarai” enentáimturmarshartatuak. <sup>24</sup>Tura Yus-Chicham étserkurminkia nékachusha tura Yus-shuarchasha nuí wayanka ashí tárumna nujai ni tunaarin ímias enentáimturtatui. <sup>25</sup>Nújainkia ni enentáin úumak ana nuna paant wáiniak tikishmatar Yusan shiir awajsattawai. Tura “nekas Yus atumjai pujawai” títiatui.

### Ashí tuke shiir takastarum

<sup>26</sup>Ayu, júnisaiti, yatsuru. Átum irunkurmin shuar takastinian Yus nin susamu túratí. Kantamátiniuncha, jintintiatniuncha, Yus iwíainiakman ujaktinniasha, nusháa chichamjai chichastinniasha, nusháa chichasman jintiatniuncha, ashí Yus-shuar Yusjai tsakararti tusar juna mash takasarti. <sup>27</sup>Nusháa chichamjai chichainiakka chikichik chikichik chichasarti. Tura jímíarchik menaintiuchiksha chichasarti. Tura ni timianka jintiartiniaiti. <sup>28</sup>Jintiartin atsakuinkia nusháa chichamjai iruntramunam chichaschatniuiti. Antsu niniki Yusjai chichasti. <sup>29</sup>Núnisan jimiarchiksha

menaintiuchiksha Yus-Chichaman etserkarti. Tura chíkich shuar nuj iruntrar ni etserkamun enentáimprarti pénkerashit tusar. <sup>30</sup>Tura chikichik chichaakui Yus chikichan nuj pujana nuna yamaram chichaman súakuinikia emka chichaa nu iníaisatí. <sup>31</sup>Núnisrum Yus-Chicham etserkatin wakerarmena nu chikichik chikichik chichasrum ashí jeattarme. Nújaisha Yus-shuar unuimiarar kakarartatui. <sup>32</sup>Yúsnan étserainia nuka tuke enentáimprar chichastin ániawai. Enentáimtsuk nánkamsan chichasmin ániatsui. <sup>33</sup>Yuska pachintak chichaman nakitiak shiir chichasmanak wakerawai.

Chíkich nunkanmasha ashí Yus-shuar iruntramunam túrainia áintsarum túratniuitrume atumsha. <sup>34</sup>Yus-shuar iruntramunam nuwá chichastin surimkiamuiti. Yus akupea núnisan núnwaka chichatsuk umin átin ániawai. <sup>35</sup>Inintrustinianian wakerakka ni jeen waketkin ni aishrin nuj aniasti. Ashí iruntramunam nuwá chichastin natsantaiti.

<sup>36</sup>Jysha enentáimpratarum. Yus-Chicham atumjai nanamnachmai. Núnisan aya atumjinin Yus-Chicham jeartamchaiti. Chíkich nunkanmasha Yus-shuarti túrutai enentáimpratniuitrume atumsha. <sup>37</sup>Atumjin shuar “Yus-Chichaman tuke etserniuitjai” enentáimtumatsuash. Tura chíkich shuarsha “Yusa Wakaní tuke winia akuptaiti” enentáimtumatsuash. Nu shuarka wi áatjarmena nuna enentáimprar “nekas Yúsnan tíniuiti” tiartí. <sup>38</sup>Tu táchakuinikia niisha ántrar ániawai.

<sup>39</sup>Nu asamtai, yatsuru, Yus-Chicham etserkatin wakeruktarum. Nusháa chichamjai unuimiatsuk chichastincha surimkiairap. <sup>40</sup>Túmaitiat antukchamin awajtsuk ashí shiir túratarum.

### Kristu nantakmia

**15** Ataksha, yatsuru, uwempratin chichaman wi etserkamaj nuna atumin enentáimtikratsan wakerajrume. Nu chichamsha atumsha enentáimturarum tariarurme. <sup>2</sup>Nu chichamsha átum ántar enentáimtachkurmeke uwempraitrume. Wi ujakmajrum nu tuke enentáimtaitkiurmeke nekas uwempraitrume.

<sup>3</sup>Winia ujatkamunak ujakmajrume. Nu chichamsha ashí nankaamas úuntaiti. Júiti nu chicham: Ii tunaarin asakártasa Kristu jarutramkamiyai, Yus-Papinium tana núnisan. <sup>4</sup>Tura jakamtai iwiarsarmiayi. Nuyá menaintiú tsawant tsawarmanum Yus Nin iniantkimiayi, Yus-Papinium tana núnisan. <sup>5</sup>Nantakisha Pítrun wantintiukmiayi, nuyá ni akatramurin wantintiukmiayi. <sup>6</sup>Nuyanka kiniantusa (500) nankaamas Yus-shuaran wantintiukmiayi. Nú shuarnumiasha ishichik jákaru ániawai tura untsurí tuke pujuiniawai. <sup>7</sup>Nuyasha Sántiakun tura nuyá ashí ni akatramurin wantintiukmiayi.

<sup>8</sup>Ashí amúamunmasha winiasha wantintiurkamiayi, wi yajauch wekaa ain. <sup>9</sup>Wisha Yus-shuaran ti yajauch awajsa asan chíkich Yus-akatramujai ímianchaitjai. Nekas winia pénkerujai ni akatramurintjai tíchamniaitjai. <sup>10</sup>Antsu Yus ti shiir anentak winia enentáiruí pujurtus pénker najataiti. Nu asamtai winia kakarmarjai takaschaitjai, antsu Yus, anenkartin asa, winia enentáiruí takaakui ashí ni akatramurin nankaamas takasuitjai. <sup>11</sup>Tura wi takaakuisha tura ni takainiakuisha mai pénkerkete. Nu chichamka mash étseraji tura nu chichamsha átum enentáimtusmarme.



### Jákaru nantakiartatui

<sup>12</sup> Iisha “Kristu jakamunmaya nantakniuiti” tu étsereaji. ¿Itiur nuikia shuar jakamunmaya nantakchatniuiti tuinia? <sup>13</sup> Jakamunmaya nantakchatniuitkiuñkia nuikia Kristusha nantakchaiti. <sup>14</sup> Tura Kristu nantakchaitkiuñkia ii ujajnia nu penké ántraiti, atumsha Kristu enentáimtar-mena nusha ántraiti. <sup>15</sup> Núnisaitkiuñkia iisha “Yus Kristun iniantkimiayi” tákur waitruamji. Iis, nekas jakamunmaya nantakchamniaitkiuñkia nuikia nekas Yus Kristun iniantkichuiti. <sup>16</sup> Jaka nantakchatniuitkiuñkia imia Kristusha iniantkichmaiti. <sup>17</sup> Tura Kristu iniantkichmaitkiuñkia átum Kristu enentáimtamusha penké ántraiti. Tunaarmisha asakárchamu ániawai. <sup>18</sup> Núnisaitkiuñkia Yus-shuar jákaru ainia nu tuke menkakarú ániawai. <sup>19</sup> Iikia Kristu enentáimtusar tuke Niijjai shiir pujustin nákaaji. Tura aya jú nunkanam pujustiniaitkiurkia Kristu ántar enentáimtakrin ashí nankaamas waitnentrampnatniuitji.

<sup>20</sup> Antsu imiankas Kristu jakamunmaya nantakniuiti. Ashí ukunam jakanmaya tuke jákashtinian nantakiartatna nuna Nii émtukuiti. <sup>21-22</sup> Yaunchu Atan tunáa túramtai ashí shuar jákatin ániawai. Núnisan yamaikia Kristujain tuke atakka jákashtinian nantakiartiniaiti. Iis, chikichik áishmanjain jákatin nankamamiayi. Nuka Atankauyayi. Núnisan chikichik áishmanjai nantaktin nankamamiayi. Nuka Kristuiti. <sup>23</sup> Yus wakerana nuí Yusna nu mash nantakiartatui: Kristu emka-juukma áintsan émtukim nantakniuiti tura atak jú nunkanam tara ashí ni shuarin júuktinia áintsan iniantkittiwai. <sup>24</sup> Nuñkia mash amuukattawai.

Nuí Kristu ashí kapitíanniasha, ashí akupniuncha, ashí núnisan jú nunkanam írúnna nunasha nupetak emesrattawai. Kristusha ashí mash ni Aparín susattawai. Tura Yus Apa ashí akupin átatui nuikia. <sup>25</sup> Iis, júnisán átatui. Emka Yus Apa ashí ni nemasrín nupetak Kristun susattawai akupin atí tusa. <sup>26</sup> Tura ni nemasrín nupetak ashí amúamunam jákatniuncha nupetkattawai. <sup>27</sup> Yus Apa ashí Kristun súsaiti ashí akupin atí tusa. Yus-Papinium tu áarmaiti. Tura “ashí Kristun súsaiti” táyat Yus Apancha susamuiti tátsui. Antsu Yus Apa ashí Nin susa asa Niñki súsachmaiti. <sup>28</sup> Tura Yus Apa ashí mash ni Uchirín Kristun nekas susantai Kristu nuikia ashí akupin ajas atak ni Aparín mash awantuki núnisan surumaktatui. Nuñkia Yuska tuke ashí nankaamantu átatui.

<sup>29</sup> Ayu. Tura shuar jakan enentáim-tusar imiantinniasha ¿urukamtia nuna túruinia? Jákaru nantakchatniuncha ¿urukamtai imianainia?

<sup>30</sup> Iikia ¿urukamtai tuke jániñkiaruiti-aj? Nantakchatniuitkiuñkia ánta wáit-saintji. <sup>31</sup> Atsá, penké áintsachuiti. Nu asamtai átum ii Uuntrí Jesukristu enentáimtakrumin wi shiir enentáimtajrume. Tura wisha tuke tsawantin ti itiur-chat pujakun jákatniua áintsan pujajai. <sup>32</sup> Jakamunmaya nantakchatniuitkiuñkia wi ántanak kajen shuarjai Ipsiunam máaniakuitjai. Maa, uunt yawáa áinis kajen ármai. Wats, núnisaitkiuñkia antsu “yurumar nampektai, kashin jákashtatjik” titiai nuikia.

<sup>33</sup> Anannawairap. “Pénkeraitiatam ya-jauch shuarjai tsaniñkia wekakmeka yajauch máatrattame” tiniu ániawai. <sup>34</sup> Tunáa ikuakrum pénker wekasatin shiir enentáimpratarum. Iis, shuar Yúsán nékainiachu tuke awai. Atumin nat-saaruk tusan tájar-me.

### Iniantkimiu ayash átatna nu

<sup>35</sup> Shuarsha inintruschaimpiash j́ákarusha itirak nantakiarat. Nantakiarsha warí ayashniak takusarat? <sup>36</sup> Enentáimtsuk inintra<sub>wai</sub>. Jínkiaí araamsha jaka áintsan amúatsuk. Túrayat tsapaatsuk. <sup>37</sup> Tsapaitniurísha araatsme antsu trikiu jínkiaichisha chíkich ára<sub>ka</sub> jínkiaichirísha araame. <sup>38</sup> Nuyá tsapaakuisha Yus wakerana núnisan ní tsapaitniuríncha súawai. Tura an<sub>kant</sub> an<sub>kant</sub> tsapaitniurín<sub>ka</sub> súsaiti. <sup>39</sup> Núnisan ashí ayash métekcha ániawai. Áentsnaka niishaaiti. Kuntinniasha niishaaiti. Nanamtinniasha namaknasha niisháa ániawai. <sup>40</sup> Nayaimpiniam yaa írunui tura ju nun<sub>kanam</sub> írunna nujáí nusháa íimtin ániawai. Nayaimpinmayasha nun<sub>kayasha</sub> shífirmari nushaiti. <sup>41</sup> Etsá wincharísha nantunusha yáanusha mash nushaaiti. Nuamtak yaaksha chikicha wincharín<sub>ka</sub> chikichnájain<sub>ka</sub> nushaaiti. <sup>42</sup> Núniskete jaka nantaktíncha. Káurtinnium iwiarsam jákashtinnium nantaawai. <sup>43</sup> Antra nu iwiarnawai, shiira nu nantaawai. Kakarmachua nu iwiarnawai, kakarma nu nantaawai. <sup>44</sup> Juyá ayash iwiarnawai, nayaimpinmaya ayash nantaawai. Juyá ayash átsuk. Núnisan nayaimpinmaya ayashsha awai.

<sup>45</sup> Yus-Papinium nuní áarmaiti:

“Emka áishman ni naari Atan, aents ajas iwiaaku ajasmiayi.” Tu áarmaiti.

Ukunman<sub>ka</sub>, yamaram Atan<sub>ka</sub> áintsan, Kristu, wakan asa, ashí áentsun nekas iwiaaku átinian susamniaiti. <sup>46</sup> Nayaimpinmaya ayashkia émkachuiti antsu juyá ayash émkaiti tura nuyá nayaimpinmaya nu. <sup>47</sup> Emka áishman nun<sub>kajai</sub> najanamu asa nun<sub>kayai</sub>ti. Ukunmaya áishmansha ii Uuntri Kristu asa nayaimpinmayaiti. <sup>48</sup> Atan<sub>ka</sub> áintsan ainia nusha juyá ayashtin

ániawai. Kristu áintsan ainia nusha nayaimpinmaya ayashtin ániawai. <sup>49</sup> Yamái juyá ániakur ukunam nayaimpinmaya ayashtin ajastatji.

<sup>50</sup> Juna tájarme, yatsuru. Ayash númpentin asa nayaimpiniam, Yus akupeana nuí, wayachminiaiti. Iis, káutain<sub>ka</sub> káurchatniumam wayachminiaiti. <sup>51</sup> Yaunchu uu<sub>kma</sub> nu yamáí nekaatarum. Ashí jákashtatji, túmaitiatar ashí yapajniáttaji. <sup>52</sup> Tura pusa<sub>r</sub> muítsarnin ti wárik yapajniáttaji. Tura ashí amuukai tusa umpu<sub>artatui</sub>. Nú umpúamunmasha Yus-shuar jákaru ainia nu atak jákashtinian nantakiartatui. Iisha nuin yapajniáttaji. <sup>53–54</sup> Jú kautain<sub>ka</sub> yamáí jákatniuitiat káurchamnia ajastiniaiti. Túras<sub>ha</sub> jákachmin átatui. Nu túrunamtaisha Yus-Papinium aarma uminkiat<sub>tawai</sub>:

“Jákatniun Yus nupetak amukuiti.

<sup>55</sup> Itiur jákatjik yamaikia.

Jákatniusha itiur nupettam<sub>kan</sub> mantamataj<sub>i</sub>?” Tu áarmaiti.

<sup>56</sup> Yaunchu Yus akupkamu tiniu asam<sub>tai</sub> shuar tunáa tura jákatniuiti. <sup>57</sup> Yamái antsu ii Uuntri Jesukristu túramujáí jákatniunka Yus nupetkaiti. Tura in<sub>cha</sub> nujáí uwempratniun amaakui shiir yúmin<sub>kiaji</sub>.

<sup>58</sup> Nu asam<sub>tai</sub>, aneamu yatsuru, kakaram ajasrum yawetsuk nan<sub>kaamas</sub> Yusa takat<sub>ri</sub> takastarum. Ii Uuntri Kristujáí tsanín<sub>ka</sub> takaarum nuka pen<sub>ké</sub> ánrachuiti. Nu paant nékarme.

### Yusa kuitri irurtin

**16** Yusa kuitri irurtinkia, Yus-shuaran Karasea nun<sub>kanam</sub> t́miaj núnisnak atumniasha tájarme. <sup>2</sup> Ashí tumintin, Yus súramna áintsam akankam ikiusta. Nújain<sub>ka</sub> wi jeattaj nuí yaunchu akankamu mash irurmin átatui. <sup>3</sup> Nuí jeancha átum anaiyarmena nu shuaran papijjáí Jerusaré<sub>num</sub> akupkattajai. Tura atumí kuítrumin

aisha ii yachin súsartatui. <sup>4</sup>Wisha wéminiaitkiuin<sup>h</sup>ka wijia<sup>i</sup> wéartatui.

### Papru irastatna nu<sup>i</sup>

<sup>5</sup>Wi Masetúnia nun<sup>h</sup>kanam wétini-aitjai tura nuyá Kurintiunam jeattajai. <sup>6</sup>Nuisha untsur<sup>i</sup> tsawant pujuschatjash. Ishichik nantusha wéchamnianum pujuschatjash. Tura wi atak wéakui atumsha yáintkiarum shiir akuptukchat-tarpash. <sup>7</sup>Aya wárik nan<sup>h</sup>kaamaktinian nakitiajai. Antsu Yus wakerakuin<sup>h</sup>ka untsur<sup>i</sup> tsawant atum<sup>h</sup>jai pujustaj tajai. <sup>8</sup>Tura ju<sup>h</sup>n Ipisiunam pintikustis nampernum pujustatjai. <sup>9</sup>Ju<sup>h</sup>nkia Yusa takat<sup>r</sup>i tí shiir takastin awai. Tura untsur<sup>i</sup> shuar wi takaamun nakitiaiawai.

<sup>10</sup>Timiutéu nu<sup>i</sup> jeamtain<sup>h</sup>ka, shiir awajsatarum; sapijmiakain<sup>h</sup>. Niisha wijia<sup>i</sup> métek Yusa takat<sup>r</sup>in takaawiti. <sup>11</sup>Nu asamtai nakit<sup>r</sup>airap. Antsu yain<sup>h</sup>krum winí shiir akupkatarum. Chíkich yachijia<sup>i</sup> tatí tusan náka<sup>h</sup>jai.

<sup>12</sup>Apurusnasha chíkich yachijia<sup>i</sup> winí írmasartí tusan ti seamjai tura pen<sup>h</sup>kesha nakiar<sup>h</sup>mai. Kame nii an<sup>h</sup>kant aku nu<sup>i</sup> winishtimpiash.

### Áujmamsamu

<sup>13</sup>Aneara tariarum Yus nekas enentáimtustarum. Áishman<sup>h</sup>chakaitrum, kakaram ajastarum. <sup>14</sup>Anenkartamujai mash túratarum.

<sup>15</sup>Ayu, yatsuru. Estepanasa shuari ashí emka Akaya nun<sup>h</sup>kanam Yus-shuar ajararman nékarme. Niisha Yus-shuaran yáintajtsar tuke takainiawai. <sup>16</sup>Niisha tura ashí niijia<sup>i</sup> métek yain<sup>h</sup>kiar takainia nú shuar seatmana nu tuke túratarum. <sup>17</sup>Estepanassha Jurtunátusha Akaikiusha atum<sup>h</sup>iya táarmatai shiir waraajai. Átum yajá pujakrum tujintiarmena nuna túrawar<sup>h</sup>mai. <sup>18</sup>Niisha winia shiir enentáimtikrurarai. Núnisan shiir enentáimtikramprattarme. Nuní aents tuke shiir enentáimtustiniaiti.

<sup>19</sup>Asia nun<sup>h</sup>kanmaya Yus-shuar amikmáatmainiawai. Akirasha ni nuwe Prisiraja<sup>i</sup>isha ashí Yus-shuar ni jeen Yus-Chichaman irunturarusha Jesusa náari<sup>h</sup>n amikmáatmainiawai. <sup>20</sup>Ashí ii yachisha amikmáatmainiawai. Nuámtaksha shiir awaj<sup>h</sup>naisrum amikmáaniatarum.

<sup>21</sup>Wi Papru asan júchiniak winia uwejr<sup>h</sup>ujai áaran amikmaajrume.

<sup>22</sup>Ii Uuntr<sup>i</sup> Jesukristun aneachuka ya-jauchiniam yum<sup>h</sup>nkramu atí. “Ii Úuntr<sup>i</sup>, wari tatá.”

<sup>23</sup>Ii Uuntr<sup>i</sup> Jesukristu yainmakarti. <sup>24</sup>Jesukristunu asakrumin atumin ashí ti aneajrume. Nu atí.

## Papru

### KURINTIUNMAYA SHUARAN

#### Ataksha papin aar akuptukma

#### Kurintiunmaya Yus-shuaran Papru áatramiania nu

**1** Wi Pápruitjai Jesukrístu akatramu. Yus nuna wakerakui ni akatramurí anaikiamuitjai. Ii yachí Timiutéujai Yus-shuar Kurintiu péprunam íruntrumna nuna áatjarne. Kame ashí Akaya nunkanam Yusna ajasurmena nunasha áatjarne. <sup>2</sup>Apa Yussha, ii Uuntri Jesukrístusha shiir enentáimturma ásar imiatkinchanum tuke shiir pujustinian yáinmakarat tusan wakerajrume.

#### Papru wáitsamurí

<sup>3</sup>Ii Uuntri Jesukrístu Aparí, ii Yusrí ana nuna naarí uunt awajsatai. Niisha ii Aparínti. In waitnentrámaji. Tura Niisha ii Yúsrínti. Tuma asa in tuke atsantamji. <sup>4</sup>Ii wáitíajnia nuí Yuska in atsantamji. Tura in atsantamjinya nútiksarik iisha chíkíchshuar wáitíainia nuna atsankrarat tusa túrutmaji. <sup>5</sup>Warí, Kristu wáitsamurí núkap pachíinkíaitjinya núnisrik ni atsankramurín núkap pachíinkíaitji. <sup>6</sup>Tuma asamtai, wáitíajnia nu, Yusa uwentikrampratniurí tura ni atsankratniurí atumsha takustarum tusar wáitíaji. Tura Yus in atsantampramjinya nu, Yusa uwentikrampratniurí tura ni atsankratniurí átum takustarum tusar atsankramuitji. Wats, átum uwentikramu tura atsankramu asarum, ii wáitsajnia nútiksarmek wáitíayatrum shiir enentáimsarum katsuntramniaitrum. <sup>7</sup>Tura “túrattawai” tu enentáimtajrume. Warí, átum iijjai métek wáitsaitrum. Núnisan iijjai métek Yus atsantamtsurmek.

<sup>8</sup>Yatsurtiram, iikia Asia nunkanam ti itiurchat wáinkiamjinya nu nekaatarum tusar wakeraji. Imiá itiurchat wáinkiar iikia katsuintratin jeachmaji. <sup>9</sup>Nu itiurchatnumiá “iwiaaku jíinkishtatji” tu enentáimsamji. Túrasha “iikia tujinchaitji” tu enentáimtumatsuk, antsu jakamunmayan iniannia nú Yúsan enentáimtusarat tusa nu túrunamji. <sup>10-11</sup>Jakamnia itiurchatnumiá Yuska uwentikrampramji. Tura yamaisha uwentikrampratatsa pujurtamji. Tura atumsha in Yus áujtakrumniñkia “Yuska tuke uwentikramprattaji” taji. Tura untsurí shuar Yus aujsa asakrumin, ii uwempra asakrin untsurí shuar Yúsan yumínsartatui.

#### Kurintiunam wau wéchatniun Papru ujakmiania nu

<sup>12</sup>Yatsurtiram, ju nekaatarum tusar wakeraji. Ju nunkanam pujusar tura nekaska atumjai pujusar anantsuk tura Yus umirkar wekaimji. Aya ii nekatairíjjaiñ wekaichamji. Antsu Yus in waitnentrama asa péñker wekasatniun yainmakmaji. Nu nekaar shiir enentáimji. <sup>13</sup>Áatjarmena nu páantaiti. Átum áusarum nekaatin jearmena nunak aarjai. Chikichan nekaachminian aatsjai. Péñker nekaatarum tusan wakerajrume. <sup>14</sup>Ishichik nékayatrumek nú núkap tuke nekaki wetarum tusan wakerajrume. Nuñkia Jesukrístu tátinya nú tsawantaj átum winia shiir enentáimtursattarme. Tura átum péñker wekasa asakrumin shiir enentáimtustatjarne. <sup>15</sup>Tura ii shiir enentáimtoniaj nuna nékakun ataksha Yusá waitnenkartutairí nekapsak tusan ataksha atumiñ irastinian wakerimjai. <sup>16</sup>Masetúnia nunkanmaani wéakun íirkuta nankaikitjarum tusan enentáimmiyajai. Tura wáetkuncha ataksha íistajrum tusan wakerimjai. Túramtai wi Jutía nunkanam weakui átum yáintkiatarum tusan atumin íistinian wak-

erimjai. <sup>17</sup>Nuinkia çurukamtaí túrach-maj? ¿Pénker enentáimtsukek “weta-jai” tímiaj? ¿Wi Yus-shuarcha nunisan, jimiara chichamtiniaiti, tú enentáimtur-sarumek? <sup>18</sup>Núchaiti. Yus tana nuna tímiatrusan umiana nútiksarik iikia ii chichame umiktaí tusar wakeraji. Jú chichamaik, “Ee, atsá” tátsuji. <sup>19</sup>Wisha Serpanujai Timiutéujai Yusa Uchiri Jesukristunum ujakmajrume. Niisha jú chichamaik, “Ee, atsá” tíchaiti. Antsu nii tana nuna tume umiawai. <sup>20</sup>Ni-ijjaisha Yus tana nu tímiatrusan uminiui. Tuma asamtaí Jesukrístu enentáimtakur “nii tana nuna nekas túrattawai” tu enentáimji. Tu enentáimsar Yusa naari shiir awajeaji. <sup>21</sup>Atumniasha incha iki-akátmajnia nu Yúsaiti. Krístunu ajasu asakrin túrutmaji. Tura anaitiamak Ni-iniu awajtamji. <sup>22</sup>Tura ukunam ii achik-tatjinia nuna, nekas amastatjai tusa Yus ni Wakanin ii enentáin apujturmajai. Nu-jai Níiniuitji tusar paant nékaji.

<sup>23</sup>Atumín itirchatan wáinkiaij tusan nakitiakun atumí péprurin Kurintiunam jeachmajai. Wáitrakuinkia “Yus iirsati” tajai. <sup>24</sup>“Aya wi tájana nútiksarmek Yus enentáimtustarum” waantu enentáimtu-masar nu titin nakitiaji. Yus nekas enen-táimtusmaajai kakaarme. Antsu nekas warastarum tusar wakeraji.

**2** Tuma asamtaí, atak kúntuts awajsajrum tusan nakitiakun, “atumí tunaari íwiartsurminin jeashtatjai” tímiajai. <sup>2</sup>Wi atumin kúntuts awajkuncha, çyaki winia waramtikrusat? Aya atumek, wi nuik kúntuts awajsamjarmena nuke waramtikrusminiaitrum. <sup>3</sup>Wi jeakun atumí tunaari íwiartsurminin kúntuts enentáimsaj tusan nakitiakun, nu papin áarmaj nútiksanak áarmajai. Warí, atumketrum winia waramtikrustin. <sup>4</sup>Nekaatarum. Nu papin áarmiajai. Kúntuts awajsatjarum tusan áarchamjai;

antsu ti aneajrumna nu nekaatarum tusan wakerakun áatramajrume.

### Yajauchin túrana nu tsankuratin

<sup>5</sup>Túrasha kúntuts awajtusmia nu, aya wíniak kúntuts awajtuschamai. Antsu atumniasha ishichik kúntuts awajtamsayi. Patasa chichasaj tusan “ishichik” tajai. <sup>6</sup>Kame nu áishmañkan iruntra chicharkarum wáitkiastarum nuke máakete. <sup>7</sup>Antsu yamaikia tsankuratniuitrum. Shiir enentáimtikratniuitrum. Niisha imiá kúntuts pujus nú arant ajasáin tusarum túratniuitrum. <sup>8</sup>Túrakrum nii nekas anearmena nu paant iniaktustarum tusan seajrume. <sup>9</sup>Kame “aajna nuna umirtukartimpiash” tímiajai. Kame nuna nekaataj tusan wakerakun nu papin nuik áatramjarme. <sup>10</sup>Átum tsankurearmena nú shuaran wisha núnisnak tsankureajai. Tura tsankuratin ákuinkia, wi tsankurajna nu ashí atumnian enentáimtusan, Krístu ímmianum túrajai. <sup>11</sup>Kame uunt iwianch Satanás in emestampratajtsa wakerana nusha nékaji. Tuma asamtaí, túrawajin tusar tsankuratniuitji.

### Trúas péprunam Papru juákchamiania nu

<sup>12</sup>Krístunu shiir chichaman Trúas péprunam etserkatajtsan jean, ti pénker takastinian wáinkiamjai. <sup>13</sup>Túrasha ii yachi Titiun wáinkiachu asan, shiir enentáimsatniun tujinkiamjai. Tura asamtaí Trúasnumiá aentsun áujsan ikiukiaran Masetúnia nunkanam wémiajai.

### Krístujai nupetkamniaitji

<sup>14</sup>Krístu Jesusjai Yuska incha nupetmamtikramak ewekatmasuitji. Tuma asamtaí Nincha ti shiir yúminsa pujajai. Tura kukuji kunúkakuí, ashí nékainia núnisan ii etserkamujai

Kristu shiir chichamen Yuska ashí aentsun nekamtikiainiawai. <sup>15</sup>Kristu in pujurtamu asamtai Yusjají nekapsamka iikia kunjúaji. Ii kunjúajnia nuna uwentikramu ainia nusha tura uwentikrachma ainia nusha nekapramnia ainiawai. <sup>16</sup>Menkakatniunam weena nuka ii kunjúajnia nuna jakamnia mejea nekapramji. Tura iwiaaku átinnium weena nuka iwiaaku átin kunjúa nekapramji. Maa, nu túratniuncha ¿yaki jeá?

<sup>17</sup>Kame untsurí aents kuítian achiktaj tusa Yusa chichamen yapajinia núniskechuitji. Antsu Krístunu ajasu asar, Yus akupkamu asar, Yus ímmianum anantsuk esetsar étsereaji.

### Yamaram chícham najanamu

**3** ¿Nu tákurniníka, “ataksha niníka waantu enentáimtumainiawai,” tu enentáimsarmek? ¿Chíkich túruinia núnisrik, “Ju áishman nekas Yus-Chichaman etserin áiniawai” tusa papí aarma atumin iniaktustinkiaitají? ¿Chíkich iniaktustin nú papí atumin seatniukaitají? <sup>2</sup>Atsá. Átumka ii papiría núniskechukaitrum. Ii enentáin nu papí áarmaiti. Tura nú papí áujsatniua núnisan ashí aents atumí túramurí wáinkiar ii etserkamaj nu, Papru nekas Yusa takatrín takaawai tusa nekaamnia áiniawai. <sup>3</sup>Iis, tátsujak. Papí aarma núnisketrume. Nu papí Kristu áarmaiti tura iisha nú papí atumin súaji. Tíntiajainchu antsu iwiaaku Yusa Wakaníjiaí áarmaiti. Kayanmasha áarchamuiti; antsu shuara enentáin, auka, áarmaiti.

<sup>4</sup>Kame Krístunu asar, Yus enentáimta asar, nusha tíminiaitji, taji. <sup>5</sup>Ju nékaji; imia iik penké tujinkiaitji. Antsu ii túrajnia nu Yus ni kakarmarín súramkurin túraji.

<sup>6</sup>Yamaram chichaman Yus najanamia nuna, incha péñker etserkatniun suramsaitji. Yaunchu aarma chichamnum, ashí takamtsuk umirkachrikiya tuke jakamniuyaji. Antsu yamaram chichamnum, Yuska ni Wakaníjiaí yamaram wekasatniun súramji. Yusa kakarmaríjiaí nu chicham étserji. <sup>7</sup>Yaunchu chichamnaka kayanam aar Yus Muisaisan susamiayi. Susamia nuí, Muisaisa yapi ti wincha ajasmiayi. Túrunamtai Israer-shuar ni yapin ístinian tujinkiarimiayi. (Túrasha nu wincha mushatmaki wémiayi.) Túrasha nu chichaman shuar umirkatniun tujintiakui, nu chichamsha aya tuke jákatniunam shuáran ejemiayi. Túmayatan winchajai susamuyayi. <sup>8</sup>Tura yamaram chichaman Yusa Wakaní súramna nu, nujají nankaamas shíiraiti. <sup>9</sup>Kame mesertinnium ejeana nú chicham winchajai susamuyayi. Tura nujají nankaamas Yúsnum ejeana nú chichamka Yus ímmianum péñkeraiti. <sup>10</sup>Iista; yamaram ana nu imiá shiir asa, yaunchu wincha amia núnaka mushatmamtekiui. <sup>11</sup>Núkap arur pujuschamnia nu wincha áchamkia. Kame tuke átinia nuke nujají nankaamas shíiraiti.

<sup>12</sup>Nu nékakur ti paant étserji. <sup>13</sup>Muisais túramia nútiksarik túratsji. Ii uuntri Israer-shuar ni yapin wincha ajas menkaan wáinkiarain tusa tarachjají ni yapin Muisaiska nukumakmiayi. <sup>14</sup>Tura nu arantcha Muisaisan anturkarmia nuna enentáisha nukukmauyayi. Nekaatniun tujinkiarimiayi. Tura yamaisha núnisan yaunchu aarma chichaman áujsam antukar nekaatniun tujintiainiawai. Kristu enentáimtuschatin ni enentáin nukukma nu yapajíáchmaiti. Aya Krístujají nuka yapajíámniaiti. <sup>15</sup>Yamaisha Muisaisa áarmarín áujsar nékainiatsui, ni enentáimmiari

nukurkamu asa. <sup>16</sup>Tura aencha ni enentáin yapajíá Uuntna ajasmataikia ni enentáimmiariya nukurkamu ana nu jusamuiti. <sup>17</sup>“Uunt” tájini nu, Yusa Wakaníiti. Uunt Yusa Wakaní pujana nuí ankant ajastiniaiti. <sup>18</sup>Nuke asamtai, iisha ii yapí tarachjái nukukchamu asar íspikia núnisketji. Uunt Kristu péñkerí iniakmaji. Kristu péñkerí nú núkap takaki wéakur, Kristujái métek ajastasa pujaji. Yusa Wakaníakia nuna túrawai.

**4** Yusa in waitnentrana asa ni chichamen etserkatniun ataktamsaitji. Tuma asamtai yawetsuk takaaji. <sup>2</sup>Uuka túratin ana nuyá tura natsanmai ana nuyasha kanakmaji. Anankatai tusar wekaatsuji. Tura Yusa-Chichamjái nakuratsji. Étserkur aya Yusa-Chicham tana núchik étserji. Ashí aents nuna antukar, “nekas núiti Yusa-Chicham” tiarat tusar túraji. Wi tájana nuna Yusa nékawai. <sup>3</sup>Uwempratin Chicham ii étserjini nu páantaiti. Áyatik menkakatniunam weena nu “páantchaiti” tuíniawai. <sup>4</sup>Uunt iwianch, ju nunká uuntri ana nu, nu aentsu enentáin ukusturuiti. Uunt Kristunu shiir chichaman ii étsermajái tsáapnin enentáimpraráin tusa ukustawai. Nu Kristu Yúsán ímiatrusan nakumui. <sup>5</sup>Iisha étserkur, Jesukristu ii Úuntriníti tu étserajji. Iikia atumí úuntriníti tátsuji. Antsu, Jesus ii uuntri asamtai, atumí yáintriníti, taji. <sup>6</sup>Yaunchu kiritin aan Yusa tsáapin ati tusa tsáapnin awajsachmakia. Nú Yúsaiti ii enentáin tsaapnin awajtsamsamia nu. Nu tsaapnijíai ni shiirmarin, Jesukristu iniakmia nuna, ashí aents nekaawarat tusar Jesukristunun étserajji.

### Yusak enentáimtusar wekasatin

<sup>7</sup>Nu tsáapin imiá péñker ana nuna ii ayashiin Yusa ikiusuiti. Tura ii ayashi kakarmachu, nuwe najanamua áanin asamtai, warí, kakaram ájini nu Yús-

numiachukait. Ii ai nuna nekaawarat tusa Yusa ni tsáapnintrin ii ayashiin ikiusuiti. <sup>8</sup>Tuma asamtai ii itiurchatri árentmaku árinin tuke jiinkimniaitji. “Itiurkatjij” taji, túrasha Yusa yáinmaji. <sup>9</sup>Aents pataaturmainiakrincha Yusa iki-urmatsji. Emesrataj tukamá tujintiaini-awai. <sup>10</sup>Kame Kristun máataj tusa tuke wakerialmia núnisan incha tuke mantamataj turamainiaji. Túrasha jákachu asar Kristu kakarmari ii ayashiin iniakmaji. <sup>11</sup>Iisha Jesusna ajasu asar wekaajnia nuí tuke tsawant tsúumainium jasattuk ajaji. Túrar ii ayashi jakamniaitiat nu ayashnium Jesusa iwiaakmarí paant iniakmaji. <sup>12</sup>Iisha Yusa-Chicham étserkur ii ayashiin jasattuk ajaji, tuma ain atumsha umikiu asarum nekas iwiaaku atin wáinkiarne.

<sup>13</sup>Yusa-Papinium yaunchu áarmanum: “Yúsán enentáimtusmajai, tuma asan etserkamjai” tátsuk. Iisha núnisrik Yusa enentáimtusar wekaaji. Tuma asar étserji. <sup>14</sup>Yusa kakarmaiti. Uunt Jesusan jakamunmayan iniantkimiayi. Incha núnisan Jesusjái iniantamkittiaji. Tura atumjai métek ni pujamunam juramkittiaji. Nusha paant nékaji. <sup>15</sup>Atumsha untsurí aencha Yusa-Chicham antukakrumin, Yusa yáinmakurme. Tuma asamtai atumsha nútiksarmek Yusa yuminsarum pujarme. Nujái Yusa naari uunt awajsamuiti. Nu nekaar wáitsatin ashamatsji. <sup>16</sup>Tura yaweatsji. Ii ayashi amuiki wéakuisha ii enentáinkia yamaram ajaki wéawai. <sup>17</sup>Warí, ukunam tuke shiir pujustajjini nu enentáimtakrikia, ju nunkanam wáitajjini nu, ti itiurchataitiat, aya yamaiya asa tiikia itiurchatchaiti, tura wárik nankaamawai. Túrasha ii itiurchatrijái Yusa ti shiir ana nuna amuukachmin ana nuna núkap suramsattaji. <sup>18</sup>Tuma asamtai wáinjini nu ti enentáimtatsji. Antsu wáintsujini nu nekas enentáimtaji. Wáinjini nusha

aya yamaiyāiti. Antsu wáintsujnia nuka tuke amuukachminiāiti.

**5** Wats ju nékaji. Nayaimpiniam ii shiir pujustinian amuukachmin ayashin Yus najanamun ikiurtamsaitji. Aents najanachmaiti nu. Tuma asantai ii ayashī emesnakuisha warí itiurtamajia. Nuka aaka núnisan amuukamniāiti. <sup>2</sup>Ju ayashnium pujusar wáitijai, taji. Yamaram ayash nayaimpiniam pujana nu achiktai tusar wakeraji. <sup>3</sup>Ayashtichu ajasajj tusar, yamaram ayashin ajastaisar wakeraji. Pushía núnik yamaram ayash in nukurmaktai tusar wakeraji. <sup>4</sup>Tura juī ayashjai pujusar wáitsar pujakur shiir enentáimtsuji. Arut pushí áiktinia núnisrik ju ayash ikiuktiaitsar tátsuji. Antsu yamaram pushí entsartinia núnisrik yamaram ayashnium tuke pujusmī tusar taji. Iista, ju ayash amuukachminkiait. Yamaram ayashnium pujusar tuke iwiaaku pujustatji. <sup>5</sup>Yamaram ayashintin ajastinian iwiarturmaruitjnia nu Yúsaiti. Tura nekas túrattajai tusa ni Wakanin suramsaitji.

<sup>6-7</sup>Ju nékaji. Ju ayashnium pujajnia juin̄kia Uunt Jesusjai pujatsji. Tuma asantai, wáinjnia nu ti enentáimtut-suk Yus enentáimtusar tuke shiir enentáimsar wekaaji. <sup>8</sup>Tura ju ayashniunia jfinkir Uunt Jesusjai tuke pujustait-sar wakeraji. Tura túrattaji tu nékaji. <sup>9</sup>Tuma asantai ju ayashnium pujakrisha tura ju ayash ikiukrisha Uunt Jesus tuke waramtiksatat taji. <sup>10</sup>Warí, ju ayashjai ii túramajnia nu ujakam, “pénkeraiti”, “yajauchiiti” Kristu turutit tusar, ashí iisha Uunt Kristuj jeatniuitji. Tura ii túramujai métek akirmaktatji.

### Kristun waramtiksatat taji

<sup>11</sup>Tuma asantai ju nékaji: Uunt umirkashtin ti tsúumainti. Nu nekaar ashí shuar Yus-shuaran awajsatat tusar

ti takaaji. Tura incha Yus nékarmaji. Tura ii túramují átumka atumí enentáin paant nékarme, tajai. <sup>12</sup>Ataksha, “wi pénkeraitjai” tusar nu tátsuji. Antsu, ii túramu nekáa asakrumin enentáiniam ana nuna enentáimtsuk aya páatkea nujai warainia nú shuar tsanumprut-mainiakui yaintkiatarum tusar taji. <sup>13</sup>“Wáurkaiti” turamainiajiash. Nusha warí, itiurtamajia. Ashí túrajnia nu, Yus aneakur tura atumin yáintai tusar túrajai. <sup>14</sup>Kame ashí ii túrajnia nu Kristu anenkrattairijjai túrajai. Kame ju nékaji: Kristu ashí shuaran jaruku asantai, Yus fimmianum ashí iisha jaka núnisaitji. <sup>15</sup>Kristu ashí shuaran jaruk nantarkimiayi. Tuma asantai Krístunam iisha iwiaaku pujajnia juī, iik wararmamtsuk, Kristu umirkatniuitji. <sup>16</sup>Tura yamaisha aya ni ayashī firsar, “nu shuar pénkeraiti” tura “nu shuar yajauchiiti,” titin tujintijai. Kame yaunchu aya ni ayashī firsar “Kristu yajauchiiti” tu enentáimsamijai. Tura yamaikia yapajjár, esetsar enentáimkiur “Kristu Yusa Uchirinti” taji.

### Krístujai yamarmaitji

<sup>17</sup>Tuma asantai, Krístunu ajasúka yamaram najanamuiti. Yaunchu enentáimtaij menkakayi. Antsu núnaka fíkias ni enentáimtaij nekas yamarmaiti yamaikia. <sup>18</sup>Nunasha Yus túrait. In nawampramkattsa Krístun akupturmakuitji. Tura nu etserkatniun incha ataktamsaitji. <sup>19</sup>Yuska in tunaarinniutin asutiámatniun nakitiak Krístujai nawampramkamijai. Tura incha Yus-shuartin nu ujaktinian ataktamsaitji. <sup>20</sup>Krístunu ataksamu asar, Yuska “winia Uchirjai nawamnaikiatarum” tusa ii wenejai atumin seatmarme. Tuma asakrin, Kristu náariin “túrarum” tájarme. <sup>21</sup>Krístuka tunaan penké túrachmiayi. Túmanak ii tunaariin Yus Krístun



makuumiayi. Nuna tura Krístunam makuuchmin awajtamsamiaji.

**6**<sup>1-2</sup>Ni Papiriin Yus yaunchu Isayasan juna tímiayi:

Tsawant jeamtai, ame seatmena nuna anturkamjame. Uwempratin tsawant jeamtaisha yainmajme.

Wats yamaikia Yus seatin jeayi. Yamái Yúsnum uwempratin jeayi.

Tuma asamtai, iikia Yusa takatrin pachitkiajnía nu, Yusa anenkraitairi péñker achiktarum tusar seajrume.

<sup>3</sup>Tura “Papru etserkamuri ántraití” tírarin tusar chíkich yajauch enentáimtiktsuk péñker wekaaji.

<sup>4</sup>Nekas Yusa takarniurintji nuna paant nekaawarat tusar wáitiatyatrik, atsumayatrik, itiurchatnum pujayatrik shiir katsunteaji. <sup>5</sup>Ju itiurchat wáinkiamji: katumpramkarmaji; sepunam enketmáwarmiaji;

charáa-charáa awajtamarmiaji; takatcha ti itiurchat takasmiaji; kanutsuk pujumiaji; tura tsukasha ti tsukammiaji. <sup>6</sup>Tunáa nakitrar wekaaji;

Yus-Chicham unuimiátraitji; shiir enentáijiaji katsuntrar wekaaji. Chíkich shuar péñker awajeaji; Yusa Wakaní pujurtamkurin shuar nekas aneaji;

<sup>7</sup>nekas chicham ana nu étsereaji; tura Yusa kakarmarisha nú paant iniakmaji. Tura ni nemasrin nupettukain tusa suntar ni tantarin júana núnisrik iisha ii nemasri íwianch nupettamkajj tusar ii Yusri tuke umirkar wekaaji. <sup>8</sup>Shuar shiir enentáimturmainiakrincha, yajauch enentáimturmainiakrincha, péñker chichartamainiakrincha, yajauch chichartamainiakrincha tuke Yusjai shiir wekaaji. “Wáitruiniawai” turamainiakrincha tuke nekas chichaaji. <sup>9</sup>“Nu aents nékatsji” turamainiakrincha Yusnumka nékanji; jákatin tsúmainnium wekayatrik tuke iwiaaku pujaji; asutiámuitiatrik mantamnatsji. Yusa takarniurintiaji

nu ashí nujai paant nekaamniaiti. <sup>10</sup>Kúntuts pujayatrik ii enentáinkia waraaji; kuítrinchaitriatrik chíkich shuar kuítrintin awajeaji; penké takakchiatrik ashí wáinji.

<sup>11</sup>Yatsurtiram, Kurintianum pujarmena nu, ashí paant ujakchamkajrum. Ti aneajrumna nu nékarme.

<sup>12</sup>Wikia atumin paant chichastajtsan wakerajrume; antsu átumka anenttsuk paant chichastin nakitrame. <sup>13</sup>Winia uchirua núnisnak chichaajrume; wi tuke paant chichaarjarmena núnisrumek atumsha atumí enentáin ana nu, paant ujatatarum tusan seajrume.

### Yusa jeentji

<sup>14</sup>Yus-shuar Yus-shuarchajai tsaninktinian enentáimsashtiniaiti.

Warí, ¿Yusan umirna nú shuar, iwianchin umirna nú shuarjai métek enentáimiainiawak? ¿Tsáapnisha kiritjai máimtek áminkiait? <sup>15</sup>¿Kístuka uunt iwianchjai nawamnaikiamniakait? ¿Yus-shuar Yus-shuarchajai tsanin shiir pujusminkiait? <sup>16</sup>¿Iwiaaku Yusa jeencha ántar-yus pujustinkiait? Tura atumsha iwiaaku Yusa jeentrume. Yus Niniki ni Papiriin juna tíchamka:

Niijiaji tsaninkia pujusan, niijiaji wekasartatjai tura ni Yusri átatjai; tura niisha Wí aents ajasartatui.

<sup>17</sup>Tuma asamtai junasha tímiayi: Nii matsatainia nuyá jíinkitarum, tura niija kanaktiarum, tawai Uunt Yus; tura yajauch ana nu antinkiarap. Túrakrumninkia awayattajrume.

<sup>18</sup>Tura atumí Apari átatjai; átumka winia uchir átratume. Nuna Wi imiá kakaram uunt Yus asan tajai. Tu áarmaiti.

**7**Tuma asamtai aneamur yatsurtiram, nusha, Yus tímia nu, in túramji. Nu tuma asamtai ii ayashi tura ii enentáisha yajauch ajasain tusar, ashí tunáa ana nuyá kanaktiniaitji. Túrar “Yusak

nekas ii úuntrinti” takur, ii ayashisha, ii enentáisha takamtsuk tuke tsawant Yus íktustiniatji.

**Kurintiunmayá shuar  
enentáimprarmatai  
Papru warasmiayi**

<sup>2</sup> Ataksha nawamnaikiatai. Iikia shuar yajauch awajsachmaji; yajauch jintintra-chmaji; anankachmaji. <sup>3</sup> Makuutai tusan nuna tátsujai. Antsu nuik tíchamkajrum, iwiaaku pujakrishá jakarsha átumka ii enentáin áchitkiarme. <sup>4</sup> Araantutsuk áatjarme; shiir enentáimjai. Itiurchat-num pujayatnak, atumin enentáimtus-an enentairuí kakaram enentáimsan waraajai.

<sup>5</sup> Jui Masetúnianum penké ayamprachmaji. Antsu ti wáitsamji. Áentsnumiá itiurchat wáinkiamji, tura ii enentáijjainkia ashamkamji. <sup>6</sup> Tura kúntuts pujakrincha Yus ikiakátmartinian nékawai. Tuma asamtai Titiún akupturkamai. Nujai winia enentáirun ikiakármai. <sup>7</sup> Tura átum nii ikiakármarmuna nuna Titiu ujatkamai. Nuna antukan ti warasmajai. Títiuka átum írsatin wakerarmena nuna ujatkamai; túrunamia nuna kúntuts enentáimmiarumna nusha, tura winia anentu asarum enentáimturumna nuna ujatkamai. Nuna antukan nú nankaamas warasmajai.

<sup>8</sup> Papí nuik akupkamaj nu áujsarum kúntuts enentáimprarme; núnaka nékajai. Túrasha ii akupmainchu túraitjai tátsujai. Eta, nuikkia tímiajai, túrasha yamaikia tátsujai. Papí áujsarum ishichik kúntuts enentáimprarmuna nuna nekaan waraajai. <sup>9</sup> Kame kúntuts enentáimprarkumin waraatsjai. Antsu atumí tunaari nekaarum kúntuts enentáimprarm atumí enentáí Yusjai yapajíá asakrumin nuna nekaan waraajai. Kame Yus wakerana nútiksarmek kúntutsrum katsuntearme;

tuma asamtai iikia nu papijjai yajauch awajsachji. <sup>10</sup> Nekaatarum. Yus wakerana nútiksán kúntuts katsunteakka ni enentáí Yúsnum yapajíawai. Nuínkia ni tunaariya uwempraiti. Nuka “túrumainchu túraitjai” tíchamniaiti. Antsu Yusan enentáimtusuk kúntuts pujakka ni enentáí yapajíáshtatui; yapajítsuk ni tunaariya uwemtsuk jakattawai. <sup>11</sup> Tura iistarum; Yus wakerana nútiksarmek atumí kúntutsri katsuntearme. Tuma asarum wi áatjarmena nu esettsarum enentáimtusurme. Atumí túramuri ujatkatajtsa wakerimiarme. Tura nu tunáa nakitramarme; tura ashamkamarme. Tura yajauchin túramia nu asutiáarmeme. Tura winia anentu asarum wi timia tímiatrusrumek turatai tusarum ti wakerimiarme. Nu tura asakrumin penker túrarmena nu, paant iniakmarme. <sup>12</sup> Kame yajauchin túramia nuna ni tunaarín iniaisat tusan wakerakun, tura wáitias pujumia nu atak shiir enentáimsati tusan wakerakun nu papin áatramjarme. Tura nú nankaamas átum Yúsnum in anearmena nu nekamatarum tusan áatramjarme. <sup>13</sup> Atum umikiu asarum waraakrumin iisha shiir enentáimji. Tura shiir itiaamarumna nuna Titiu waraak ujatkamtai nú nankaamas shiir waraaji. <sup>14</sup> Atumin shiir enentáimtajrumna nuna Titiun ujakmajai. Tura nuna nekas aan Titiu nekaamai. Tuma asamtai atumin natsanrachmajrume. Kame atumin tuke nekas ana nuna tímiajrume. Núnisan atumnian Titiun tímiaj nusha nekasauyi. <sup>15</sup> Tura Títiuka atumin enentáimturmas ti waraawai. “Jiatmaktajtsa winiatsuash” tusarum ti ashamkachurmek. Túmayatrum, nii penker tati tusarum pachischarme. Tura nii taa seatmarma nu umikiurme. Títiuka nuna enentáimias waraawai. <sup>16</sup> Tura wikia, átum penker túramurmin

nekaan tura pé<sup>n</sup>ker túrawartatui tu enentáimsan waraajai.

### Yus-shuarti ii kuitri súsatin

**8** Yatsurtiram, Masetúnia núnkanmaya Yus-shuaran Yus waitnentainia nuna yamáí ujaktatjarme. <sup>2</sup>Ti itirchatnum nekapsamu ainiawai. Túmayatan warainiawai. Tura ti kuítríncha áiniyatan emeentutsuk kuítrinnia núnisan suiniawai. <sup>3</sup>Juna wi paant nekaan ujaajrume. Niisha wakeramujai súsatniun jeania nuna súiniawai; tura nú nankaamassa súiniawai. <sup>4</sup>Yus-shuaran kuítrinchan súsartaitsa ti wakeruiniak, nu túratniun ti seatmarmaji. <sup>5</sup>Tura ii enentáimmiaj nú nankaamas túrawarmiayi. Emka Yúsnum niñki sumamawarmiayi. Tura Yusa wakeramuri túratatjai tusar incha “yáintajrume” turammiaji. <sup>6</sup>Tuma asamtai, “Masetúnia nunkanam kuit júuktin nankamamamna nu, Kurintiu peprunmasha amukta” tusar Titiu seamiaji. <sup>7</sup>Atumsha ashí pé<sup>n</sup>ker túratin ti nékarme. Yus enentáimtustincha, unuiniartincha, ju nunkanmaya nekaatniusha, in aneatniusha nuka ashí nékarme. Wats, jusha túratarum. Yus-shuar kuítrincha ainia nu achikiarat tusarum Titiu támatai núkap susatarum.

<sup>8</sup>Kame atumí úuntria núnisnak akupeatsjarne, túratniuitrume tusan. Antsu chíkich shuar ni kuítrín susartasa ti wakeruinia nuna atumin ujakan, atumí anenkraitari nekaspashi tusan nekapsatajtsa pujajai. <sup>9</sup>Ii uuntri Jesukristu waitnenkartutari nékarme. Ashí takakuyayi, tura atumin anenma asa kuítrincha núnisan ajasmiaji. Ju nunkanam kuítrincha núnis ajasmatai átum nayaimpiniam kuítriniak tusa túramiaji.

<sup>10</sup>Juna enentáimjai. Nuik uwitin, “yáintatji” tíchamkarum. Tura nu túratin ti wakerimiarme.

<sup>11</sup>Nan kamarmena nu yamaikia amuktarum. Nuik ti wakerimiarmena núnisrumek yamaisha súsatin jearmena nu susatarum. <sup>12</sup>Iistarum. Ni kuítrín Yúsán nekas susatajtsa wakerakuinikia, nii jeana nuna susat tusa Yus wakerawai. “Jeana nú nankaamas susati” tátsui Yus.

<sup>13</sup>Chíkich ti núkap susarum atumnia táasat tusan tátsujai. <sup>14</sup>Antsu ashí métek takusarat tusan tajai. Iis atumsha yamaikia ti nukap takakrume; nujai atsuma nu súsatniuitrume. Ukunam chíkich tsawantaj átum atsumasharmeash. Nuinikia niisha atumin suramsarti. Nu túratin ákuinikia ashí métek takustin áttui. <sup>15</sup>Yusa Papiriin yaunchu áarman núnis tátsuk:

Núkap takusmia nu ampirchamiai; tura ishichik takusmia nu atsumachmiaji.

### Titu chíkich Yus-shuarjai Kurintianam wetin ármiaji

<sup>16</sup>Tura wi aneajrumna núnisan atumin aneatniun Yus Titium susamiai. Tuma asamtai Yúsán yuminsan pujajai. <sup>17</sup>Iis, wi takui wétinian wakerimiai. Tura nú nankaamas, atumin anenma asa, ni enentáijjain wéawai.

<sup>18</sup>Tura chíkich Yus-shuar Titium akupkatajtsa pujaji. Nu shuar Yusa Chichamen ti pé<sup>n</sup>ker etserainakui, ashí Yus-shuar iruntramunam nin pé<sup>n</sup>ker áujmatainiawai. <sup>19</sup>Tura nú shuarnaka ii tsaniakmari atí tusar ashí Yus-shuar iruntramunam nuna anaikiarmiayi. Iijjai kuítian jukiarti tusar anaikiarmiayi. Iis Yusa náarin ashí aents uunt najanawarat tusar tura ashí shuar atumí tsankarin nekaawarat tusar nu takat túratsjik. <sup>20</sup>Iis, ju kuit ii jukittiajnua nu, núkap asamtai, aents tsanumprutmawaraj tusar, Titium tura ju shuarjaisha wéaji. <sup>21</sup>Yus ímmianumsha, aents ímmianumsha ii

naka wekaajnia nuna nekaawarat tusar túrajai.

<sup>22</sup>Nu jimiara shuarjai chikich Yus-shuar akupeaji. Yusa takatrin takastasa ti wakerana nu nekas nekajai. Tura átum yáintin ti wakerarmena nuna nekáa niisha atumiin jeataj tusa ti wakerawai. Nuna túmak Yusa takatrin takastinian wakerana nuna paant iniakmawai. <sup>23</sup>Tura aisha chikich shuar Titium nekaataitsar anintruiniakuisha, “Titium Papru tsaniakmarinti. Incha yáinmaktajtsa Páprujai takaawai” titiarum. Chikich Yus-shuaran nekaataitsar anintruiniakuisha, “Yus-shuar akupkamu ániawai, tura Kristu náarin shiir awajin ániawai” titiarum. <sup>24</sup>Tura atumi anenkrattairi ashí Yus-shuar nekaawarat tusarum, nu shuar péñker itiaatarum. Nu túrakrum, atumnia ii shiir tímiaj nu nekasaiti tu iniaktustatrum.

### Yus-shuaran kuítrinchana súarmia nu

**9**<sup>1-2</sup>Kame átum Yus-shuar kuítrinchana súatin wakerarme; nuna nekajai. Tuma asan núnaka áatrachminiaitjarne. Atumsha súatin wakera asakrumin wi nunasha shiir enentáimsan, “Akaya nunkanmaya shuar nuik uwitinia wakerusmatak yáintinian wakeruiniawai” tusan Masetúnianmaya shuáran ujaajai. <sup>3</sup>Tura “kuítniasha súatniun ti wakeruiniawai” tímiaj nuna, “wáitiaiti” tíarain tusan nakitiajai. Tuma asan, kuit susatajtsa wakerarum nu iwiaratarum tusan nu menaintiu Yus-shuaran nuna yáinmakarat tusan emka akupenajai. <sup>4</sup>Wi ukunam Masetúnianmaya shuarjai atumiin jean, kuit súatin tímiamena nuna iwiarachman wáinkian natsaraij tusan, tura atumsha natsarairum tusan túrajai. Warí, “súatniun ti wakeruiniawai” tuke tu wéatsjak. <sup>5</sup>Nu tuma asamtai, au takui súarme tu enentáimsarain tusan ju Yus-shuaran

emka akupenajai. Niisha nu kuítian iwiaratniun yáinmakarti, tajai. Nuinkia wisha Masetúnianmaya shuarjai ukunam jeawakrin, nu kuit atumsha nekas atumi enentáijjaink<sup>i</sup> súatin wakerarmena nu nekaamnia átatui.

<sup>6</sup>Tura junasha paant tájarne: ishichik araana nu ishichik júuktatui. Núkap araana nusha núkap júuktatui. Kuit súatniusha núniskete. <sup>7</sup>Tura ashí shuar ni enentáin enentáimsana nunak susati. “Nakitiatnak susatjai” tíchamniaiti. “Turutainiakui susatjai” tíchamniaiti. Shiir enentáimias súana nuna Yuska shiir enentáimtawai. <sup>8</sup>Ashí péñker ana nuna suramsatniun Yus tujintiatsui. Nujai átum atsumashtatrum. Tura chikichan yáintin núkap takustatrum. <sup>9</sup>Yus-Papinium ju aarma awai: Kuítrinchana núkap susayi; nuna tura, tuke túratin átatui.

<sup>10</sup>Arakmaun araakan súana nusha Yúsaiti. Tura yurumkan súana nusha Yúsaiti. Niisha átum péñker araatniun suramsattarme. Tura araarumna nujai péñker túratarum tusa araakrumin ipiampartatui. <sup>11</sup>Tuma asamtai núkap juukma takaku asarum, núkap súatin jeattarme. Nuinkia súarmena nuna ii uwejejan chikich Yus-shuar achikiar Yúsana yuminsartatui. <sup>12</sup>Warí, ju kuit Yus-shuar kuítrinchana súakrin ni atsumamuríncha atsumachartatui. Tura nú nankaamas Yúsana ti yuminsartatui. <sup>13</sup>Nu shuar yáintai tusarum tura ashí Yus-shuar yáintai tusarum súatsrumek. Nujai Kristu shiir chichamen umiamena nuna nekainiawai. Tura kuítrum emeen-tutsuk sua asakrumin niisha Yusa náarin uunt awajsartatui. <sup>14</sup>Kame Yus atumin ti waitnentrainiakui kuítrum súatsrumek. Sua asakrumin nu shuar atumin ti anenmainiak Yúsana áujturmasartatui. <sup>15</sup>Tura ashí iisha ii Yusri ti yuminsatniuitji! ¿In súramjinia nuna yaki jintíartinian jeá?

### Papru nekas jintintiamniaiti

**10** Wats, “Papru iijjai pujak péejchach ajawai, tura yajá pujak kakaram chichaawai” chíkich shuar turutainiatsuk. Kame imia wiki Papru Kristu anenkartutairijjai juna seatjarum tusan pujajai. <sup>2</sup>Atumí weatkamuriya shuar chichainiak “Papru ni tsaniakmarijjai ju nunkanam akupin ajastai tusar wakeruiniak jintintiaiawai” turutainia nuna kíishtumaktajtsan enentáimjai. Wisha atumijn jean kakaram chichaschataj tusan, nu antukairap tu seajrume. <sup>3</sup>Áentstanka nunkanmaya áentsuitji, túrasha jú áents maania aintsar máaniatsji. <sup>4</sup>Ju nunkanmaya nan kijjai máaniatsji antsu ii nan kiri Yusa kakarmarinti. Nujai iwianchi kakarmari núpeteaji. <sup>5</sup>Ju nunkanmaya aentsu jintiamurinkia tura waantu enentáimtumamurinkia, Yus nekaatniun itit awajea nuka, nu nan kijjai núpeteaji. Tura ashí ju nunkanmaya enentáimsatin yapajniak, emetamu áintsan, Kristun umirkarat tusar nu nan kijjai núpeteaji. <sup>6</sup>Nekas umirkatin átum jeawakrumninkia nuinkia umirkatniun tuke nakitiainia nu, Yusa kakarmarijai asutiáttaji, tajai.

<sup>7</sup>Atumsha aya pátatek ana nu iiyarme. Wats, shuar nekas Krístunu ajasman nekamaka, núnisan winiasha Krístunuiti tu enentáimtursatniuiti. <sup>8</sup>Yusa kakarmarijai akupeaji tuke tákuncha natsaamatsjai. Nu kakarman atumin péñker jintintiatarum tusa Kristu suramsaitji. Kame atumin emesratniun suramsachuitji. <sup>9</sup>“Ni áarmarijai awaktamkatajtsa wakerutmaji” tátsurpash. Núchaiti. <sup>10</sup>“Papru áarmari ti kakaram áiniawai, tura juí pujak kakarmachuiti; tura etserkatniuncha nékatsui” turutainiawai. <sup>11</sup>Wats, tuinia nuka junasha nekaawarti. Yajá pujakur

kakaram áajinia núnisrik atumjai pujakrishu kakaram túrattaji.

<sup>12</sup>“Wiki imiá péñkeraitjai” tuinia nujai méteketji tátsuji. Ní shuaraitji tátsuji. Warí, niisha imia nin ki nekapmamainiawai. Tura ni ai íisar “nu nan kaamas péñkeraitjai” tu wéenawai. Nuna túruiniak netse túruiniawai. <sup>13</sup>Antsu iikia, ii nekamatin jeajnia nú nan kaamas waantu ajaschattaji. Ii takastajinia nuí Yus Nin ki jintinramji. Nu arant wéatsji. Kame atumijn takastinian Yus tsan katramkaitji. <sup>14</sup>Tuma asamtai, tájnia nu Yus tsan katramka nú iniankas túratsji. Warí, iisha emka Kristu chichamejai atumijn jeachmakaj. “Emka jeamji” tájnia nu ántrar tátsuji. Kame Yus tsan katramakrin jeamji. <sup>15</sup>Chíkich takasmanum iikia waantu enentáimtumasar, “ii takatrinti” tátsuji. Antsu yamá enentáimtarmenta nú nan kaamas Yus enentáimtustarum tusar wakeraji. Nu túrakrumninkia atumijn tuke takasminiaitji. <sup>16</sup>Nuyasha chíkich takaana nuí takatsuk átum pujarmena nú arant pujuinia nusha Yus-Chicham ujaktaj tusar wakeraji. Nu túrar chíkich shuar takasma “íiniuiti” tíchattaji.

<sup>17</sup>Tura péñker enentáimtumastaj tusa wakerakka, Yús naitjai tusa péñker enentáimtumasti. <sup>18</sup>Warí, nin ki “péñkeraitjai” tumamna nuka anturkachminiaiti. Antsu Uunt “péñkeraiti” tana nú shuar nekas péñkeraiti.

### Ántar etserniun Papru áujmateawai

**11** Waurua núnisnak chichastatjana nu anturtukaintrumeash. Ee, anturtuktarum tusan sea-jrume. <sup>2</sup>Atumniasha Krístunak anajmamtikrajrume. Tura nuwá chíkich áishman kan nékatsuk ni áishrijaink<sup>i</sup> nuatnaiya núnisrumek átum chikicha chichame umirtsuk aya ni chichamenk<sup>i</sup> umiakrumin Krístuí

ejetaj tusan wakerajrume. Nuna túrataj tusan atumin akasmatajrume. Nu akasmaktinian Yus surusuiti. <sup>3</sup>Túrasha íwianch ni nekatairijjaj emka nuwá Epan anankamia nútiksán atumniasha Yusa jintiyá awajimtikramar Kristu aneashtinian enentáimtikramprarmatai anankamu airum tusan tsuutajrume. <sup>4</sup>Warí, chíkich shuar Jesusnan nusháa étserkamujaj táiniakuisha péñker ántarme. Tura nusháa wakan achikiam, nusháa chichamjaj uwempramniaiti tu etserrainiakuisha, nekasapitia tárume. <sup>5</sup>Kame “Yúsnumiá akatramu asar etserkatin imiá nékaitji” tuinia nujaj nankaamas nékaitjai, tu enentáimjai. <sup>6</sup>Ti péñker chichastinian nékachiatnak winia nekaatairsha taamtsui. Núnaka ii túramurijjaj tuke paant iniakmaji.

<sup>7</sup>“Akirkata” tútsuk Yus-Chichaman atumin ujakmajrumna nuǐ ¿tunáa túrajak? Átum ankant ajastarum tusan wikia péejchach ajasu asan, “etserkamunam akirkata” tíchamjarme. <sup>8</sup>Antsu atumin yáintaj tusan pujakun chíkich Yus-shuarnumiá kuítian suruiniakuí achikmiajai. Nuna túran ni kuítrin emeentukmiajai. <sup>9</sup>Tura atumjaj pujusan atsumaknasha atumniaka seachjarme. Masetúnianmaya Yus-shuar taar, wi atsummiajna nuna surusarmiyi. Nu tuma asamtaí tájarme, seachjarme tura seashtatjarme. <sup>10</sup>Ashí Akaya nunkanam nuna ujaktinian suritrukchartatui. Nuna tákun Kristu nekasrijjaj tajai. <sup>11</sup>¿Urukamtaí nuna taja? ¿Atumin aneachu asanak taja? Atsá. Aneajrumna nuna Yus nékawai.

<sup>12</sup>Túrasha wi túrajna nuna tuke turu wétatjai. “Papru túrana núnisrik túrají” tuinia nuna tírarajin tusan túrattajai. <sup>13</sup>Warí, niisha Yúsnumiá akatrachma ániawai. Anankartin ániawai. “Kristu akatramurintji” tumá átaj tusar wekainiawai. <sup>14</sup>Nusha urukaku túmait tíchamniaiti. Warí, imia Satanáskesha

“nayaimpinmaya akatramuitjai” tumá átaj tusa wekaatsuk. <sup>15</sup>Nuinkia imia ni suntarisha péñkeran túrawai tumá atai tusar wekasachartinkiait; túrasha ni amuamurinkia tunáa túriarma nujaj métek nekappmá asutiátin átatui.

### Papru wáitsamia nu

<sup>16</sup>Ataksha tájarme “wáurkaiti” tu enentáimtursacharti. Kame “wáurkaiti” tu enentáimturiatrumek, chichastin tsankatruktarum. Ishichik waantu enentáimtumastaj tusan wakerajai. <sup>17</sup>Tura waantu enentáimtumastaj tájana nu, Uunta tsankatramurijjaj tátsujai. Antsu waurka núnisnak chichaajai. <sup>18</sup>Untsurí ju nunkanam uunt ajasar ti waantu enentáimtumainiakui wisha ishichik waantu enentáimtumastatjai. <sup>19</sup>Imiá nékayatrum waurka ainia nu shiir enentáimtusrum ánturearme. <sup>20</sup>Niisha atumin takamtikramainiakuisha, kasartamainiakuisha, atumí nérenniurí ajainiakuisha, yajauch chichartamainiakuisha, yapimin awatamainiakuisha ashí nu katsuntearme. <sup>21</sup>Natsamayatnak tájarme jikia nu túratin kakarmachuuji! Wats, niisha araanainiatsna nuna wisha araantatsjai. (Waurka núnisnak chichaajai.) <sup>22</sup>Niisha Ipríu-shuar ániakuisha wisha núnisnak Ipríu-shuaraitjai. Israer-shuar ániakuisha wisha núnisnak Israer-shuaraitjai. Apráama weeatrj ániakuisha pai, wisha núnisnak. <sup>23</sup>Kristu takarniurintji, tuiniawai. Wikia aujaj nankaamasaitjai. Kame nuna tákun waurka núnisnak chichaajai. Kame nijjaj nankaamas takasuitjai; nijjaj nankaamas asutiámuitjai; nijjaj nankaamas sepunam enkeamuitjai; ti núkap jániñkiamjai. <sup>24</sup>Israer-shuar chikichkí achirkacharmai. Antsu tímiajni senku jea achirkarmai. Tura emka achirkarmia nuǐ awa-awatatkua trainta nuiwi ejejarmiyi. Tura nu

tímiajni senku jea achirkarmia nuisha nútiksán nujai métek awatturarmiayi. <sup>25</sup>Numijjai menaintiú awatturarmai. Kayajai sha mantuatai tusar chikichikí tukurarmai, kanusha menaintiú wayamai wi enkempran wekaimiaj nuí. Tura nayaantsanam ajapén chikichik kashi nuí pujusan tsawarmajai tura nu tsawantcha tuke pujusmajai. <sup>26</sup>Ti nukap wekasaitjai. Tura entsá wekasán tsúumainian wáinkiaitjai. Tura kasa shuarjaisha, wíi shuarjaisha tura yajaya shuarjaisha tsúumainian wáinkiaitjai. Péprunmasha, kampuniunmasha, nayaantsanmasha tsúumainian wáinkiaitjai. Wait Yus-shuarsha yajauch awajustaj tusar wakeriarmai. <sup>27</sup>Itiurchatnasha ti wáinkiaitjai; takatnasha ti takasuitjai. Ti untsurí kánutsuk pujusuitjai. Tsukamaknasha, kitiamaknasha wáitsaitjai. Ti ijiarmaitjai. Pushir táasmatai tsetsekruf wáitsaitjai.

<sup>28</sup>Tura nuna nankaamas, kaarka kijin júkitniua núnisnak Yus-shuar péñker wekainiawash tusan ashí tsawant ti enentáimsan pujajai. <sup>29</sup>Chikichik Yus-shuar kakarmachu pujakui wisha kakarmachu nekapeajai. Shuar chikichan tunaanum ajuawarmatainkia wisha natsamakun kajekan wáitiajai. <sup>30</sup>Maa, waantu chichastin ákuinkia, antsu winia kakarmachu awajtuinia nuna ujakan waantu ajasaintjai. <sup>31</sup>Yus, ii Uuntrí Jesukristu Aparí ana nu (ni naari tuke shiir awajsamu ati) wi wáitratsjana nuna nékawai. <sup>32</sup>Tamasku péprunam pujai nu nunkanmaya akupin winia jinkia juruktiaj tusa wakerak pepru tanish téntakma wáitiriin suntaran apujsamiaiyi. Aretas uunt kapitíán pujai túramiaiyi. <sup>33</sup>Túrasha uunt chankinnium enketawar pepru aa tanishri áankamunam jiki itiararmiayi. Tu uwempramajai.

### Papru wáinkiamia nu

**12** Kame wiki shiir chicharmam-satniun nakitiajai. Túmayatnak ímiarjana nuna tura uunt Yus iniaktursamia nuna ujaktiniaitjarne. <sup>2</sup>Kristun umirin ana nú áishman kanékajai. Nu áishman jimiará nayaimpin nankaikin menaintiú nayaimpiniam junakniuiti. Nusha katurse uwí nankaamasuiti. Kame ayashtiuk wakaashit, tura ayashtichu wakaashit. Núnaka nékatsjai; aya Yúsak nékawai. <sup>3</sup>Tura nekas junakniua núnaka nékajai. Ayashtiuk wakaashit, ayashtichu wakaashit, núnaka aya Yúsak nékawai. <sup>4</sup>Yus-shuara wakaní shiir pujutainium junakmiayi. Nuisha paant awajsachmin ana nuna antukmiayi. Nii antukmia nú chicham paant awajsatniun suritkiamuiti. <sup>5</sup>Nu áishman ka túrunamurí nankaamakuiti tajai. Tura wikia nankaamakuitjai túmamtsuk, kakarmachuitjiana nuna paant ujaajai. <sup>6</sup>Nankaamakuitjai túmamtiaj tusan wakeraknaka nekas tímianiaitjai, ántran tíchaintjai. Túrasha túratsjai. Winia túramuruk wáinkiarum winia chichampruk antukrum, waritia enentáimsarum nujai métek enentáimtursatarum tusan wakerajai. <sup>7</sup>Wi nayaimpiniam wáinkiamajna nu timiá péñker asamtai ántar waantu enentáimtumaschatniun, janke mesertinia núnisan winia ayashruí najaimiatniun sunasmiajai. Nuka wi wáitsatin Satanásnumia akupkamuiti. <sup>8</sup>Nuka jurutkia tusan Úuntan menaintiú seamjai. <sup>9</sup>Tuma ain Uunt winia turutmiayi “Atsá. Jaa pujayatmek winia waitnenkartutairjai shiir pujame. Shuar kakarmachun winia kakarmarun Wi suakui ashí aents nu shuara ayashiin winia kakarmarun wáiniainiawai.” Tuma asamtai, Kristu kakarmari winia ayashruí paant ati

tusan kakarmachuitiatnak araantatsjai. <sup>10</sup>Tuma asamtai, wi Krístun aneakui shuar katsekruiakuisha, kajertuiniakuisha, winia kuítrusha, kakarmarsha atsain waraajai. Kame ashí itiurchat ana nuí kakarmachuitiatnak kakaram nekapeajai.

<sup>11</sup>Wi “pénkeraitjai” túmamkun waurua núnisnak chichaaajai. Tura atumsha winia péñker chichartusminiaitiatrumek, túrachu asakrumin tu chichasjai. Warí, wi penké ántraitiatnak, “ti péñker akatramuitji” tumamainia nú nunkaachichuitjai. <sup>12</sup>Atumjai pujumiaj nuí, itiurchat ámanman katsuntran takasmiajai. Yuska ni kakarmarín iniakmastaj tusa ti uuntan aents tujintiamun túratniun surusmiayi. Nujai “Papru nekas winia akatramuruíti” tusa paant iniakmasmiayi. <sup>13</sup>Warí, chíkich Yus-shuaran yáinmiaj núnisnak atumniasha yáinmajrume. Áyatik atumin “kuit surusta” tíchamjarme. ¡Nu yajauchiitkiuiníka tsankurturatum!

### Papru atak tátintrin ujakmiania nu

<sup>14</sup>Jújjainkia menaintiú iwiarnarjai atumin íistaj tusan. Tura jeaknaka, “etserkamun akirkatarum” tíchattajrume. Atumí kuítrin wakeratsjai. Antsu atumin wakerajrume. Warí, winia uchirchakaitrum. Uchisha aparín kuítian ikiauntukchatniúiti. Antsu aparí ni uchirín kuítian ikiauntuktiniáiti. <sup>15</sup>Atumniasha yáintaj tusan ashí takakjana júna ajapawaintjai, tura winia kakarmarnasha ashí emenkákaintjai. Wi ti wakeramaitiatrum átumka ishichik wakerutarminin túrawaintjai.

<sup>16</sup>Túrasha chíkich shuar chichainiak “Nekasaiti; Papru níñki ii kuítrin jurutramkichmaji. Túrasha anankartuatniun neka asa in anankramachmiashia” turutainiatsuk. <sup>17</sup>¿Nusha itiura? ¿Shuaran wi akupkamaj nujai kuítrumin achikjak?

<sup>18</sup>Atumin íirmasat tusan Titiun “wetá” tímiajai. Tura nin atampřit tusan chíkich Yus-shuaran akupkamjai. ¿Titiusha kuítrumin juruttramkimkiarum? ¿Wisha niisha mai metek enentáimsar métek takaschamkaji?

<sup>19</sup>¿Warí enentáimsarum? ¿Átum péñker ániawai turutik tusan nu tájik? Antsu, aneamu yatsurtiram, ii tájinya nu atumin Yúsnum ikiakártajrum tusan taji. <sup>20</sup>Wi atumiin jeaknasha, wi wáitkiataj tusan wakeraj nuna wáinkiashtatjai, tu enentáimsan itiurchat enentáimjai. Tura atumsha wakerarmena núnisrumek wáinkiashtatrumek, tu enentáimjai. Yajauch chicharnaikiatniuncha, yajauch enentáimtunaistinniasha, kajernaikiatniuncha, níñki enentáimtumastinniasha, tsanumpratniuncha, mái-tunai ajatniuncha, waantu enentáimtumastinniasha, yajauch wekasatniuncha, ashí nuna wáinkiashtajash tusan itiurchat enentáimjai. <sup>21</sup>Tura wi jeaknasha, átum yajauch túratniusha, tsanirmatniusha tura yajauch ti wakerarmena nu, yaunchu túriniarmena nu, untsurí shuurtiram iniaisachurmena nuna nekashtajash. Tura enentáim yapajítsuk tuke tura asakrumin úutchatjash tajai. Kame wi átum umikchamun nekaamtai Yus winia iniatsátrattawai tusan tsúumajai.

**13** Jujai menaintiú íistajrum tusan winiajai. Ashí iwiaratin ana nu, jimiará tura menaintiú shuara chichamejai iwiarnartatui. <sup>2</sup>Wi atumjai pujachiatnak, atumjai pujáa núnisnak áatjarme. Yaunchu tunáa túrimiarmena nuna tura ashí shuártirmin wi nuik tímiajrumna nuna ataksha tájarme, wi atak tana tunaarum iwiareachkurminkia iniaisashtatjarme. <sup>3</sup>Nuiníka wi Kristu kakarmaríjjai chichaaajna nu nekaattarme. Nu nekaataj tusarum wakeratsrumek. Tura Krístuka kakarmachuchuiti.



Antsu atumí enentáin kakaram takaawai. <sup>4</sup>Kristu nekas kakarmachua nútiksā krúsnum máamuitiat, Yusa kakarmarijijai iwiaakuíti. Ayashnium Kristu kakarmachu nekāpmia núnisrik iikia kakarmachuitji. Túrasha Yusa kakarmarijijai ni takatři takaaji. Nu atumin iniakmāstatji.

<sup>5</sup>“Nekas Yúsan umirniuashitiaj” tusarum nekāmatarum. Ímiastarum. Ántar Yus-shuarchaitkiurmeka Jesukrístu atumí enentáin pujurtama nu nekaattarme. <sup>6</sup>Tura iikia ántar Yus-shuarchaitji nu nekaatarum tusan wakerajai. <sup>7</sup>Tura átum tunáa túrawájrūm tusar Yus seaji. Aents in péñker enentáimtikramprat tusar tátsuji. “Ántar áiniawai” túrampriniñ, átum péñker wekasatarum tusar wakeraji. <sup>8</sup>Warí, Yusa nekas chichame emesratin tujintiaji. Antsu ii túrajnia nu Yusa nekas chichamejai túrajai. <sup>9</sup>Tuma asamtai, átum kakarmaitkiurminkia

iikia kakarmachuitiat shiir enentáimji. Atumsha nekas kakaram ajasúk tusar Yus tuke seaji. <sup>10</sup>Atumin emesratin Yuska winia akuptatsui. Antsu Yus akuptukuíti atumin ikiakártinian. Tuma asamtai, wi atumíin jeaknaka kakaram chicharkajjrūm tusan winitsuk jū papin áatjarne.

### Amikmaawai

<sup>11</sup>Ayu, yatsurtiram, shiir pujustarum. Krístunam tuke kakaram ajastarum. Yus shiir enentáimtikramprati. Chikichík enentáik enentáimsatarum. Shiir awaj-naisarum pujustarum. Tura Yus anen-marmena nu, shiir enentáimtikramna nu atumjai pujurtamsattarme. <sup>12</sup>Yús-num shiir enentáimtunaisrum amik-maanaisatarum. <sup>13</sup>Ashí Yus-shuar ainia nu amikmaatmarme. <sup>14</sup>Uunt Jesukrístu waitnenkartutairi, Yusa anenkrattair-isha atumíin pujurtamsati. Tura Yusa Wakanísha tuke nemartamsarti. Nu atí.

*Papru*

**KARASEANMAYA SHUARAN**

*Papí aar akuptukma*

**Karaseamaya Yus-shuaran  
Papru áatramiania nu**

**1** Wi Pápruitjai, Yus akatramu. Yúsak winia akatturuiti. Shuarka akatturchamai. Yussha chíkich shuáran akupturak akatturchamai, antsu Nunki, Yus Apa, Jesusan jakamunmaya iniantkimia nu, tura Jesussha winia akatturamai Yusa shiir chichamen etserkatniun. <sup>2</sup>Wisha, ashí Yus-shuar wijiaí pujuinia nusha, ju papí akupeaji. Ashí Yus-shuar Karasea nunkanam pujarmena nu áujsatarum tusan ju papin akuptajrume.

<sup>3</sup>Yus Apa tura ii Uuntrí Jesukrístusha waitnentramainia ásar yainmakarti imi-atkinchanum tuke shiir pujustinian. <sup>4</sup>Yus ii Aparí nuna wakera asamtai, Jesus ni ayashín surumak wáitsamiayi ii tunaari asakártinian. Nuna tura ashí tunáa ju nunkanam ana nuyá ankant awajtamsatai tusa in yáinmaji. <sup>5</sup>Tuma asamtai tuke Yus shiir atí. Ayu.

**Chíkich uwempratin  
chichamka atsawai**

<sup>6</sup>Maa, nekasaash timiá wárik Yus ikiukmiarum. Kristu in ti anenma asamtai Yus ni shuari ajastinian in anaitiamkamji. Urukamtaitsuk nuikia imiá wárik ni chichame inaisamarum nusháa chicham umikrum uwemprataj tusarum. <sup>7</sup>Wátsek, nekas chíkich chicham penké atsawai shuar umikiar uwempratin. Antsu yajaya shuar atumín taar péñkercha awajta-mainiawai. Tura nusháa chichaman etserkar Yusa shiir chichamen yapajilatniun wakeruinaiwai. <sup>8</sup>Tuma

asamtai Yus nin yajauchiniam yuminkrattawai. Wisha Yus-Chicham yapajiamun etserkamtainkia Yus winia yuminkrattawai. Nayaimpinmaya suntarsha nusháa chichaman wi etserkachmaj nuna étserkuinkia nunsha yuminkrattawai. <sup>9</sup>Paant ujakjarme túmaitiatnak ataksha ujaajrume: Nánkamas shuar niisháa uwempratin chichaman, wi etserkachmaj nuna étserkuinkia Yus yuminkrattawai.

<sup>10</sup>Ti kakaram chichaatsjak. Nuna chichaakun shuar shiir enentáimtursarti tusan chichaatsjai. Antsu Yus shiir enentáimtursati tusan nuna tajai. ¿Shuar wakeruinia nuna enentáimsan chichaajak? Nuna enentáimkiunka Kristu wakera nuna umirkachaintjai.

**Papru júnis Yus akatramu ajasmiai**

<sup>11</sup>Antsu nekaatarum, yatsuru. Uwempratin chichaman wi étserjana nuka áentsnumianchuiti. <sup>12</sup>Aentska ujakkachmai. Unuitiutnasha unuitiurchamai. Antsu Jesukrístuk winia paant jintintruamai.

<sup>13</sup>Tura wi yáunchu ti yajauchin túramiaj nuka antukchakaitrum. Israer-shuar Yúsnan takainia nútiksanak wisha takasmajai. Tuma asan Yus-shuaran ti kajerkan tuke pataatukmajai amuktaj tusan. Nusha nékarme. <sup>14</sup>Tura kakaram ajasan, ii uuntrí yaunchu tiarmia nuna yawetsuk umiktinian ti enentáimpramjai. Tura untsurí shuaran wijiaí métek uunt armia nuna nankaamas Yúsnan takasmajai. Túmaitiatan aya winia únunrun chichamen ti umirniuyajai. <sup>15</sup>Túrasha wikia akiintsain Yus winia achirkamiayi, tura ti anenkratmarijiaí winia anaitiukmiayi. <sup>16</sup>Nuikia shiir enentáimiuk ni Uchirín paant nekamtikruamai. Tura Israer-shuarchanum ni shiir chichamen etserkat tusa akuptukmiayi.

Tuma asamtai chíkich shuaran aniaschamjai. <sup>17</sup>Uunt péprunmasha, Jerusarénumka, wéchamjai winí emkaru Yus akatramujai chichastinian. Antsu wárik Arapia nunkanam wémajai. Tura nuí Yúsan enentáimtasuan atak Tamasku péprunam waketkimjai. <sup>18</sup>Tura menaintiú uwí nankaasmatai, nuyá Pítrujai áujmattsataj tusan Jerusarénum jeamjai. Tura jimiará semanachik pujusmajai Pítrujai. <sup>19</sup>Tura Jakupuncha, ii Uuntrí Jesusa yachja nuna, wáinkiamjai. Nú arantcha chikichnaka Yus akatramunka wáinkiachmajai. <sup>20</sup>Yus iirui. Wi tájana nu nekasaiti, wáitchaiti.

<sup>21</sup>Nú ukunmasha Siria nunkanmasha, Sirisia nunkanmasha wémajai. <sup>22</sup>Tuma asamtai ashí Yus-shuar Jutía nunkanam pujuarmia nu winia nekaracharmai. <sup>23</sup>Aya antukarmai. “Yaunchu in ti áin-trammiaj nu yamaikia Yus-Chichaman étseruk wekaawai. Yáunchuka in amut-maktinian wakeriniatiat yamaikia ini-aisaiti” tiarmai. <sup>24</sup>Túrawar winia enentáimtursar Yúsan shiir yuminsarmai.

### Chíkich Yus akatramu Paprun shiir enentáimtuiniawai

**2** Tura katurse uwí nankaasmatai wisha Pírnápíjajai Jerusarénum wémajai. Titiuncha jukimjai wijjai. <sup>2</sup>Yus akupta asamtai Jerusarénum wémajai. Tura nuí jean aya Yus-shuara úuntríjain áujmattsamjai. “Júnisnak ashí Israer-shuarchan Yus-Chichaman ujainiajai” tímiajai. Takasmajna nusha tura tuke takastin enentáimjiana nusha ántar ain tusan tu áujmattsamjai. <sup>3</sup>Niisha Yus-shuara úuntríntiat itiurchat enentáimpracharmai. Antsu chíkich shuarka Titiu Israer-shuarchaitiat wijjai pujakui niisha Israer-shuar ajastí tusa tsupimiamtikiatniun wakeriarmai. Túrasha tujinkiarmai. <sup>4</sup>Tura nu shuar ántar yachi ániak

antuktai tusar wayawarmai. Tura ii chichamen antukar itiurchat awájtámsatai tusar wakeriarmai. Iis, Kristu Jesus in uwentikrampra asamtai ti shiir iisha Yus yúpichuch umíaji. Tura nuna nekaawar, atakka, aya yáunchu akupkamu itiurchat ana nujai uwentikrampratniun wakerutmakarmaji. <sup>5</sup>Túrasha penké ishichkisha umikchamji. Antsu atumín Yus-Chicham yapajniátsuk métek jeartamat tusar ni chichame penké anturkachmaji. <sup>6</sup>Nu arantcha Yus akatramu uuntriñkia yamaram túratniunka suruscharmajai. Nincha ashí aents ti neka ainiawai tu enentáimtuiniawai. Kame nu shuar ti nékainiakuisa ti enentáimtatsjai. Yus ashí shuaran mash métek iyatsuk. <sup>7</sup>Yus akatramu uuntriñsha Yus winia Israer-shuarchan Yus-chicham ujaktinian akuptukma nuna nekarawarmai. Tura Pítruncha akupkamai Israer-shuaran Yus-Chicham ujaktinian. <sup>8</sup>Pítrun Israer-shuarnum akupkama nú Yusak winiasha akuptukmai Israer-shuarchanum. <sup>9</sup>Tuma asamtai Jakupusha, Pítrusha, Juansha, Yus akatramu uuntri ásar, Yus winia ti paant akuptan nekaawar, winiasha Pírnápínsa, “Ayu, átum, Israer-shuarchanum Yus-Chicham etserkatarum, tiarmai. Iisha Israer-shuarnum Yus-Chicham etserkattaji” tiarmai. Túrawarmatai shiir áujnaisar ii uwejejai achirnaikiamji métek enentáimji tusar. <sup>10</sup>Áyatik “Kuítrinchá enentáimtusum tuke yáintarum” tiarmai. Wisha núnaka ti wakerakun tuke túriniaitjai.

### Papru Pítrun chicharkamai

<sup>11</sup>Tura nú ukunam wi Antiukía péprunam pujain Pítiur tamai. Tura nuí yajauch túramtai, Yus-shuara úuntríniak chicharkamjai. <sup>12</sup>Iis, Israer-shuar tuiniawai, “Israer-shuarcha Muisais

timia núnisan tsupirnakcha asamtai, nu shuarjaj<sub>i</sub> yurumáshtiniaiti” tuiniawai. Túmaitiat Pítiur yurumámnian nékak, emka Sántiak shuar táatsain<sub>i</sub> Israer-shuarchajaj<sub>i</sub> yurumámai. Tura nuyá Sántiak shuar Jerusarénnumia<sub>i</sub> Antiuúkianam jeawarmatai Pítiur ashamak tsupirnakcha shuarnumia<sub>i</sub> kanakin yurumáchmai. “Tsupirnakhtiniaitme” tiniu ainia nuna ashamak túramai.

<sup>13</sup>Tuma asamtai chíkich Yus-shuar, Israer-shuar armia nu, Pítrujaj<sub>i</sub> métek emka yurumáwaru ániayat jimiará enentai takusar ukunam iniaisarmai. Pirnapísha neka áyat nútiksai<sub>n</sub> nupetnakmai. <sup>14</sup>Tura nuna íisan ashí íimiainia<sub>i</sub> Pítrun chicharkamjai. Yus Shiir Chicham tana nujaj<sub>i</sub> métek wekasachu ásmatai tímiajai “Ame Israer-shuaraitiatam Israer-shuarti ikiukim tsupirnakchajaj<sub>i</sub> yurumám Israer-shuarcha áintsamek túrame, tímiajai. Nuikia “Israer-shuarcha Israer-shuartijaj<sub>i</sub> métek wekasatin ániawai” tiip” tímiajai.

**Israer-shuarsha Israer-shuarchasha  
mai métek Yúsán  
enentáimtusar uwemprartatui**

<sup>15</sup>Iikia nekas Israer-shuaraitji. Israer-shuarcha, tunáa ainia ániuchuitji. <sup>16</sup>Túmaitiatar ju nékaji. Akupkamu umíamujaj<sub>i</sub> uwemprachminiaitji antsu Jesukrístu nekas enentáimtakum uwemprattame. Nu nekaar iisha Jesukrístu nekas enentáimtusmaji tunaajainchu atai tusar. Aya Kristu nekas enentáimtusar péñker átatji. Akupkamu takasar umirkarsha tuke nujaj<sub>i</sub> péñker ajaschattaji. Akupkamunka shuar umiktaj<sub>i</sub> táyat, chikichí shuarkesha nujaj<sub>i</sub> péñker ajaschamniaiti. Nu nekaar antsu Jesukrístu nekas enentáimtusmaji péñker ajastai tusar. <sup>17</sup>Tura Israer-shuar enentáimprashtimpiash, “Wátsek,

núnisaitkiuin<sub>i</sub>ka wisha Krístun enentáimtustaj<sub>i</sub> tákunka, emka tunáa shuaraitjai tu enentáimtumastiniaitjai” tíchanpiash. Nuka nekasaiti tura nuyá “Nu asamtai Kristu winia tunáa shuaran najataiti” péñké tu enentáimprashtiniaiti. <sup>18</sup>Antsu yaunchu, wi túrashtiniaitjai tímiaj<sub>i</sub> nuna awainkin túratniuitjai<sub>i</sub> tákunka nuikia nekas tunaitjai. <sup>19</sup>Iista, akupeamun umiktaj<sub>i</sub> tukaman péñké tujinkiamjai. Umiktinian tujinkian jaka áintsanak ajasmajai akupeamunam. Antsu Yusjaj<sub>i</sub> iwiaaku pujajai ni wakera nuna umiktinian. <sup>20</sup>Wisha Krístujaj<sub>i</sub> krúsnum jákaitjai. Tuma asamtai yamaikia wikia iwiaaksujaj<sub>i</sub> wi wakeraj<sub>i</sub> nuna túratniun antsu Kristu winí iwiaakui ni wakera nuna túratniun. Tura ju ayashniun pujayatan aya Kristu enentáimtakun iwiaakjai. Krístusha Yusa Uchiríntiat winia ti anentuk jarutkamiayi. <sup>21</sup>Yus ti péñker asamtai itiurak “Kristu ántar jakamiayi” títiaj. Iis, aya akupkamun umirkan péñker ajasminiaitkiuin<sub>i</sub>ka, nuikia Kristu ántar jákaayi.

**Yus akupkamu tura  
Yus enentáimtustin**

**3** ¿Warin<sub>i</sub> aa Karaseanmayatirmea. Waweamukaitrum netse enentáimprarum Yus tama umirkashtin. Kristu krúsnum máamun ti paant éterkun atumin iniaktuschkamkajrum? <sup>2</sup>Wátsek, aniastatjarne, enentáimpratarum. ¿Warijjain<sub>i</sub> Yusa Wakaní atumí enentáin<sub>i</sub> achikmarum. Akupkamu umirkarmek enentáimin<sub>i</sub> achikmarum, antsu Yus enentáimtusrum ni Wakaní achikchamkuram? <sup>3</sup>¿Tuke nétsekaitrum. Yusa Wakaní emka atumí enentáin<sub>i</sub> wayá takasmatai atumek yamaikia nu takat aya ayashí kakarmarjjai<sub>i</sub> umiktin enentáimprarmek. <sup>4</sup>Péñké ánrarmek wáitsamarum tura antsu ishichkisha unuimiarchamkarum?

<sup>5</sup>Naka enentáimpratarum. Yus ni Wakanín súrantsuk tura aents túrachminian atumín ti takaatsuk. Átum aya akupkamun umirkurmin Yus nuna túrachuiti. Antsu ni chichame antukrum Yus enentáimtakrumin Yus nuna túraití.

<sup>6</sup>Yaunchu ii uuntri Apráám enentáimpratai. Yus-Chicham nin tawai:

“Apráám Yúsan enentáimtusmatai Yus “Ayu, péñkeraitme” tímiayi” tawai.

<sup>7</sup>Iis, nujai páantchakait. Ashí shuar Yúsan enentáimtuinia nuka Apráámjai métek enentáimpraru ásar, ni uchiría áintsan ajasaru ániawai. <sup>8</sup>Yamáí páantaiti. Yus ashí Israer-shuarchancha tawai “Aya winia enentáimtursarum péñker átatrume”. Israer-shuarchasha nujai péñker ajastinia nuna ti yaunchu neka asa, Aprááman ujakmiayi,

“Ámijjai ashí aents ti shiir ajasartatui.” Tu ujakmiayi. <sup>9</sup>Tuma asamtai ashí shuar Yúsan enentáimtuinia nuke Apráámjai métek péñker ajasar shiir warasartatui.

<sup>10</sup>Antsu ashí shuar “akupkamun umirkan uwemprattajai” tuinia nuka yajauchiniam yuminkramu ániawai. Yus-Papinium áarchamukait

“Ashí shuar Yus akupkamun ashí aarma nuna takamtsuk umirkachka yajauchiniam yuminkramu ániawai.” Tu áarmaiti.

<sup>11</sup>Nújainkia páantaiti. Akupkamu umirkatniujai péñker ajaschamniaiti Yusjai, antsu aya Yus enentáimtusam péñker ajasam uwemprattame. <sup>12</sup>Shuar akupkamu umirkatniun enentáimna nuka aya nujai péñker ajastinian enentáimiui; Yúsan enentáimtak péñker ajastinian enentáimtsui.

<sup>13</sup>Tura Kristu yamaikia uwentikrampramji. Akupkamun umirkachu yuminkramuiti tana nuka in túramtsuji. Antsu Kristu in yainmaktin krúsnum jaka yuminkramu ajasmiayi. Kame áarmaiti:

Shuar jakati tusa numiniam nenasma yuminkramuiti.

<sup>14</sup>Tuma asamtai Jesukristu jakamujai ashí Israer-shuarchasha Apráámjai métek péñker shiir warasartatui. Iisha núnisrik nu shuarjai Yusa Wakaní, Yus akupkataj timia nusha, achiktatji Yus enentáimtusar.

### **Yus akupkamu tura Yus túrattana nu anajmarma**

<sup>15-16</sup>Iis, yatsuru, Yus Aprááman Chichaman najana anajmatuk, “Ámijjai tura amée weeá akiinkiattana nujajsha ashí aents ti shiir ajasartatui” tímiayi.

Kame ‘amée weeá akiinkiartatna nujai’ tíchamiayi, antsu ‘akiintiatta nujai’ tímiayi. Nuna taku chikichik átinia nuna enentáimpramiayi. Nusha Krístuiti. Aentstisha enentáimpratai. Shuar chichaman najana tura papinium aar nuyá ni naari apujas nuikia nekas yapajítsuk umiktiniaiti. Umitsuk iniaisachminiaiti. Patattasha patattsachminiaiti. <sup>17</sup>Wátsek, Yus núnisan Chichaman Apráámjai najana, ukunam umitsuk iniaisachminiaiti. Tura Chichaman najanamia nú ukunam, kuaru siantu nuyá trainta (430) uwí nankaamasmatai, Yus ni akupkamurin Muisaisan susamiayi. Túramaitiat nujai Yusa yaunchu Chichamen yapajíáchmiayi iniaisatniun. <sup>18</sup>Tuma asamtai Yus timia nuka tuke uminkiattawai, Yus yaunchu Apráámjai Chichaman najana asamtai. Nújainkia páantaiti, péñker ajastajtsar akupkamu umirikia shiir pujuschartatji antsu Yus timia nujai iikia takatsuk shiir pujustatji. Nuna tsanatkamiayi Yus Apráámjai Chichaman najaneak.

<sup>19</sup>“¿Nuikia Yus urukamtai akupkamun susamia?” tíchaintmeash. Ayu, Apráám weean, Kristu táatsain Yus tímía nu uminkiachminiuyayi.

Tuma asamtai nii táatsain ashí tunaan túrawarmia nu timiá yajauchiiti tusa Yus akupkamun susamiayi. Tura Yusa suntari ju akupkamun ashí iwiarar Muisaisan susar akatrarmiayi Israer-shuaran susárti tusar. <sup>20</sup>Antsu chikichik shuar niní takastinian enentáimkiunka chikichan atumatsui. Tura Yus aya chikichikiiti. Niní chikichan akattsuk ashí aentsun Apraámjai péñker awajsatniun Apraáma anajmatar nijiai Chichaman najanamiayi.

### Yus akupkamu itiúrkátin

<sup>21</sup>“¿Tura Yus jimiará chichamjai chichaaawak, tíchaintmeash. Emka Apraáman “Jujai uwemprattame” tíchamkia, nuyá Muisaisan ni akupkamurjn súsachmakia?” tíchaintmeash. Tura áintsachuiti. Nekaata, akupkamu umirkatniujai Yusjai tuke péñker pujusminiaitkiunka nuyá aya akupkamujai uwempram tunaajainchu ajasaintme. <sup>22</sup>Tura Yus-Chicham paant “Ashí tunáa áiniawai” tawai. Nu asamtai yamaikia ashí Jesukrístu enentáimtuinia nú shuar, aya Yus timiá asamtai, uwemprattatui. <sup>23</sup>Tura Kristu táatsain Nin enentáimtusamniauyayi. Tuma asamtai Nii táatsain akupkamuka in emettama pujurtamji aya akupkamu tana nu umirkatin. Tura ukunam ju nekanayi: Kristu enentáimtusar uwempratniuitji. <sup>24</sup>Akupkamu, nuika, in waitmakmaji uchin kuírchin wainnia áintsan. Kristu tatí tusa waitmakmaji. Tura Kristu támatai ashí nekas Nin enentáimtuinia nuka Yúsjai péñker áiniawai. <sup>25</sup>Yamáí Kristu nekas enentáimtustiniaiti tuma asamtai yamaikia akupkamu kuirchia áintsan wáitmatsji. <sup>26</sup>Antsu Jesukrístu enentáimtusar, nujai Yusa uchirí úuntmaru ajasuitji. <sup>27</sup>Ashí Kristu náariin imiaimiutirmeka Kristu áintsan

ajasuitrume. <sup>28</sup>Jesukrístujai tsanínkiu asar<sup>i</sup> imiá métek aji. Israer-shuar, Israer-shuarcha, ankant ainia nu, ankantcha ainia nu, áishman, nuwa, ashí mash Jesukristunuitkiuiníka yamaikia “niishaaiti” tu enentáimprashtiniaiti. Ni shuari mash chikichik áiniaji. <sup>29</sup>Tura Kristunuitkiurmeka Apraám weeá áintsan ajasurme atumsha. Tuma asarum, Yus Apraáman anajmatramia nu atumsha jurumkitniuitrume.

**4** Kufrinniu uchirí ashí ni aparí takakna nuna niiniu áhattawak ukunam. Tura uchichitkiunka ni aparí takarniuriya núkete. <sup>2</sup>Tuke uunt ajatsuk ni wáinnia nuna umirkatniuiti. Tura uunt ajasmatai tura ni aparí “Ayu” takui nuyá nii antsu ni aparíniu ashí wáinkiatniuiti. <sup>3</sup>Núnisrik iisha úchichik asarkia ashí aentsu akupkamurj umirkatniuji. <sup>4</sup>Tura tsawant jeamtai, Yus ni Uchirín akupkamiayi ju nunkanam. Niisha Yúsaitiat nuwanam akiiniamiayi. Tura aents ajasmiayi. Tura aents ajas yaunchu akupkamuncha umirkatniuyayi. <sup>5</sup>Nujai ashí aents akupkamun umirkatin armia nuna uwentikrataj tusa támiayi. Tura iisha yamaikia nujai ni uchirí uunt ajasminiaitji. <sup>6</sup>Atumsha nekas ni uchirí ajasakrumin Yus ni Uchirí Wakanín atumí enentáin akupturmakuiti. Tura nu Wakan atumí enentáiyá Yúsan “Aparú” tawai. <sup>7</sup>Tuma asamtai yamaikia aya takarniuchuitme antsu Yus ni uchirín najatmaiti ámin. Tura ni uchirí asakmin ashí Yus takakna nuna amastatui Kístuian.

### Papru nu Yus-shuaran yáiníntian wakerawai

<sup>8</sup>Yaunchu átum nekas Yus nékachkuram, ántar-yus írunna nu umirkarmarme nekascha yúsak. <sup>9</sup>Tura yamaikia nekas Yus nékarme, kame Yus atumin nekarmarme.

Núnis asamtai itiuṛtsuk atak aentsu akupkamurj umirkatin enentáimprum. Nujaj kakaram ajaschamniaitme tura umikmesha yainmakchattawai uwempratin. <sup>10</sup> Átumka jísat ti najanearme. Yaunchu jisat najanatin amia nú tsawantcha, nantusha, uwisha, jísat tuke najanearme Yus shiir enentáimtursati tusarum. <sup>11</sup> Ashamajai, atumjín ántrankeash takasmaj tusan. <sup>12</sup> Yatsuru, wi atumea áintsanak ajaschamkaj; atumsha yamaikia wi wekaajna áintsarmek wekasatarum. Wi nuj pujakui ishichkisha yajauch awajtuschamarme. <sup>13</sup> Antsu nekamarne ayashruj itiuṛchat pujayatan Yusa shiir chichamen emka ujakmajrume. <sup>14</sup> Tura winia sunkur ti yajauch awajtain atum winia nakitrurum mujrukchamarne, antsu Yusa suntarja áintsarmek itiaramarne. Jesukristu anturkatniua áintsarum anturtukmarne. <sup>15</sup> Maa, wi nekajai, nuik atumj jimi ukuinkiarum surusaarme, túramniaitkiurmeka. Tura shiir enentáimpramarmena nusha itiuṛtsukait yamaisha. <sup>16</sup> Yamaikia nekas chichaman étserkun ¿atumj nemasrj ajasjak? <sup>17</sup> Chíkich yajaya taaru ti shiir awajtamainiawai tura atumin yainmaktasa áitkiarmainiatsui. Aya winiya akantamkitiai tusa wakerutmainiawai, winia antsu shiir enentáimtursat tusar. <sup>18</sup> Niisha nekas yainmaktinian wakerutmainiakka atumin shiir awajtamatin tuke penker ainti, wi atumjai pujainsha tura pujatsainsha. <sup>19</sup> Uchirú, nuwa jurertaj tana núnisnak ataksha wáitajai Kristu atumjín paant atí tusan. <sup>20</sup> Atumjai pujaknaka maak aintjai. Yamái pujaknaka nekas nusháa chichasaintjarme. Itiuṛkatjarmetsuk nekatsjai.

### Akarsha, Sarasha jimiara Chichaman nakumainiawai

<sup>21</sup> Ayu, “akupkamu umirkatniuiti” támena nu nekaata; akupkamuka júnisaiti. <sup>22–23</sup> Aarma awai: Apraám jimiara uchirtiniuyayi. Emka ni takarniurj jurermiayi Ismaeran. Nuyá Apraáma nuwe jurermiayi Isakan. Ismaera nukurj Apraáma takarniuriyayi. Tura Apraám Yusan enentáimtutsuk niijai kanarmatai, ni takarniurj jurermiayi. Tura antsu Isaka nukurjinka takarniurinchuyayi, antsu nekas ni nuwe áuyayi. Niisha ti úuntchianiak, Yus “jurertatme’ tímiayi. Tuma asamtai Yus timiajai Isakan jurermiayi. <sup>24</sup> Ayu. Yamái tájana nuka Yusa Chichamen jimiaran nakumui. Ismaera nukurj Akar chikichik Chichaman nakumui. Yaunchu Senái muranam Yus ni akupkamurjín áarmiayi Israer-shuar, takarniua áintsan, umirkarti tusa. <sup>25</sup> Senái murasha Akara nunke Arapiam wajaawai. Akarsha Senái muran nakumak, ashí Israer-shuaran “Akupkamujaj uwempramniaiti” tuinia nuna nakumui. Yamaisha Israer-shuara uuntrj Jerusarénum pujuinia nuka tu chichainiawai. Tuma asamtai Akarsha, ashí nu shuarsha núnisar, akupkamu umirkatin ásar, ti takarniu áintsan wáitsar takainiawai. <sup>26</sup> Antsu ashí Yus-shuarti uwempra asar imiankas ankant pujaji. Nayaimpinmaya Jerusarénumia áentsuitji. Nuyá áentsti tuke ankant pujuinijai. Nuyá aents asakrin, nu yakiya Jerusárinka ii nukurja áintsan enentáimpramniaiti. <sup>27</sup> Júnis áarmaiti: Warasta, misurma, uchi takakchiatmek; Ti shiir warasta, uchí najawe nekachiatmek. Nuwa ajapamu uchin jurertatui; Nuwa áishrinnia núnaka nankaamas uchirtin átatui.

<sup>28</sup>Iisha, yatsuru, Isaka áintsar<sup>i</sup>, Yus timiajaj<sup>i</sup> akiiniaitji. <sup>29</sup>Yaunchu Ismaer Isakan kajerak itiurchat awajsamiayi. Núnisan<sup>u</sup> yamaisha Ismaera áintsan<sup>u</sup> aya ayashnumia<sup>u</sup> ainia nú aents Yusa Wakaníya<sup>u</sup> akiinia nuna yajauch awajenawai. <sup>30</sup>Tura Yus-Papinium áarmaiti:

“Takarniusha, ni uchirjijai<sup>i</sup>, ajapam awemata. Nekas péñker nuwá uchirjijai<sup>i</sup> tsanin<sup>u</sup> pujuschamniaiti. Apari<sup>u</sup> kufrincha achikchamniaiti,” tawai Yus-Papí.

<sup>31</sup>Ayu, yatsuru, nekaatarum. Takarniu uchirínchuitji antsu ankant<sup>u</sup> pujaji nekas péñker nuwá uchirí<sup>u</sup> asar<sup>i</sup>.

### Yusjaj<sup>i</sup> tuke ankant<sup>u</sup> atarum

**5** Kristu uwemtikrampramajia<sup>i</sup> tuke ankant<sup>u</sup> átinian. Tuma asamtai kakaram ajasam tuke ankant<sup>u</sup> pujustá. Ataksha nu itiurchatnum waketkip.

<sup>2</sup>Wi Papru asan ujaajrume. Átum Muisais timia núnisrumek tsupirnakrumniñkia ¿Kristu nuikia warí itiuertamkamniait? <sup>3</sup>Ataksha tájarne, ashí tsupirnakua nu shuar ashí Muisais timia nuna takamtsuk umirkatniuiti.

<sup>4</sup>Atum “Akupkamu umíakmin Yus shiir enentáimturmastatui” tárumna nu, nu shuartiram Krístuiya<sup>u</sup> tupañniuitrume. Yusa anenkrattairiya<sup>u</sup> kanakniurme.

<sup>5</sup>Iikia, antsu, Yusa Wakaníjijai<sup>i</sup> tura Yus enentáimtakrin Yus shiir enentáimturmastatji, tu enentáimji.

<sup>6</sup>Nekas Krístunuitkiurkia tsupirnaktin atsumatsji. Antsu aya Yus nekas enentáimtakur ashí anenaitniuitji.

<sup>7</sup>Atumsha Krístujaj<sup>i</sup> péñker wekaimiarme. ¿Urukamtai nekas Yus timia nu iniaisatin enentáimprum ataksha akupkamunam waketkitin? <sup>8</sup>Nú enentai Yúsaiyanchuiti. Niijijai<sup>i</sup> wekasatniunka Yus achirmakuitrume. <sup>9</sup>Ju enentáimpratarum: Karía ishichik yuminium enketam mash<sup>i</sup> karimtiktsuk. An-

eartarum atumsha. <sup>10</sup>Ayu, Yus yáinmakrumin wi tájana nu nusháa enentáimprashtratume, nékajai. Tura atumin yajauch áujmatramainia nuna Yus asutiáttawai páchitsuk.

<sup>11</sup>Wíkie, yatsuru, yamaisha “tsupirnaktniaiti” tuke tákuñkia Israer-shuar yajauch awajtuscharanti. Antsu Kristu jakamun étsereatnak “tsupirnaktniaiti” tákuñkia kajertukcharanti. <sup>12</sup>Atumin yajauch awajtamsatin wakeruiniana nú shuar antsu niñki tsupimiakar yajauch awajmamsarti.

<sup>13</sup>Atumniasha, yatsuru, Kristu tuke ankant<sup>u</sup> awajtamsarme. Tura ankant<sup>u</sup> ajasrum, “Aya wi wakerajna nuna túramniaitjai” tu enentáimprairap. Antsu nuámtak aneniakrum péñker yáiniáiktarum. <sup>14</sup>Ju chichamjai<sup>i</sup> ashí akupkamu mash uminkiatstawai: Ame ayashim aneamna áintsamek chíkich shuarsha aneata. <sup>15</sup>Tura aneartarum. Aneniachkurmeke, antsu esanairum mai yunai ajakrumka nuámtak amunaiktatrume.

### Ayash<sup>u</sup> wakeramu tura Yusa Wakaní<sup>u</sup> wakeramu

<sup>16</sup>Juna tájarne: Atumí ayashí<sup>u</sup> wakerana nu umikijaj<sup>i</sup> tusarum Yusa Wakaní<sup>u</sup> kakarmarjijaj<sup>i</sup> wekasatarum.

<sup>17</sup>Yusa Wakaní<sup>u</sup> wakera nuna ame ayashim nakitiawai. Tura ame ayashim wakerana núnaka Yusa Wakaní<sup>u</sup> nakitiawai. Mai maanai ajainiawai. Túmaitkui péñker wekasataj tukamam tujintiame. Páantchakait. <sup>18</sup>Tura Yusa Wakaní<sup>u</sup> jintinramkuñkia, aentsu akupkamurijijaj<sup>i</sup> itit áchattame.

<sup>19</sup>Wats, ayash<sup>u</sup> túramu ti paant áiniawai. Ju áiniawai: tsanirmatin, wapik túratin, yajauch túratin, <sup>20</sup>ántar-yus ainia nu tikishmatratin, wawekratatin, nemasnaikiatin, katsumnaikiatin, akasmaktin, wari kajektin, nankaamantu enentáimtumastin, aya niisháa niisháa



enentáimsartin, níniunak íistin, <sup>21</sup> ya-  
jauch enentáimtunaistin, mankartuatin,  
nampektin, nampernum aya ti yurumin,  
tura ti nampen átin. Chíkich nujaj métek  
áiniawai. Nuik ujakmajrumna núnisnak  
ataksha tájarne: Shuar nuna túrakka Yu-  
saj pujustinian penké tujinkiattawai.

<sup>22</sup> Ayu, yamaikia Yusa Wakaní  
kakarmarijiaí túratin enentáimsatai.  
Yusa Wakaní ii enentáin pujak,  
pénker túratniun nerektinia áintsan  
neremtikramji. Ju áiniawai: aneatin,  
shiir enentáimsatin, Yusjaj tura  
shuarjaj nawamnaikar wekasatin,  
shiir enentáijiaí katsuntratin, chíkich  
shuar shiir awajsatin, tsanka átin, tana  
nuna tímiatrusan umiktin, <sup>23</sup> péjchach  
ajastin, iik ímiasar tunáa túrashtin.  
¿Ju túratniuncha yaki surimia?

<sup>24</sup> Shuar Jesukristunu ainia nu, ni  
ayashí wakeramuríncha tura nunisan  
ni túramuríncha surimiak wekaawai.  
Ni ayashí krúsnum maatnua áintsan  
túraití.

<sup>25</sup> Yusa Wakaní kakarmarijiaí  
Yus-shuar ajasu asar, núnisrik Yusa  
Wakaní kakarmarijiaín wekasatai.

<sup>26</sup> “Wats, nekapnaisatai. Wi imiá  
pénkeraitjai” nuámtak túnaisuk,  
yajauch enentáimtunáischatniuiti.

### Yáinniaiktarum

**6** Túrasha, yatsuru, Yus-shuar  
tunáa túrashtimpiash. Atumsha  
nekas Yusjaj wekaarumna nu, nu  
wáinkiumeka, yátsum Yusjaj iwiarat  
tusarum yáintárum. Tura nankaamantu  
enentáimtumatsuk túratarum. Tura  
amesha nekamata. Tunaanum iniaraj  
tusam anearam wekasata. <sup>2</sup> Káarak  
kijin akui nuámtak yáiniaiktin átsuk.  
Núnisrumek atumsha, iturchatři akui  
nuámtak yáiniaiktarum. Túrakrumka  
Kristu akupeamurí umíarme.

<sup>3</sup> Shuar tujintiyat “nankaamantuit-  
jai” tákuñka ananmamui. <sup>4</sup> Shuar ní

túramuríniak enentáimtumastiniaiti.  
Níniunak enentáimtumakuñkia tura  
pénkeraitkiuñkia chíkicha túramurí  
iirtsuk, antsu níniun pénker iis  
wararsattawai. <sup>5</sup> Iis, ashí ní káarkariniak  
júkishtinkiait.

<sup>6</sup> Shuar Yus-Chichaman unuimiatna  
nu, nu shuar nin jintíana nuna ashí  
takakna nujaj yáintí.

<sup>7</sup> Ananmamawairap. Shuar Yúsán  
anankatniun tujintiawai. Ame  
araamna nuna nereñ júuktatme.  
Chíkich nere áhattawai. Atumi  
enentáincha núniskete. <sup>8</sup> Iista.  
Shuar ni ayashí wakeramunak tuke  
enentáimtakka, jataj nereñ áintsan  
araaiti. Nerekmatai jákatniun júuktatui.  
Tura Yusa Wakaní wakera nuna  
tuke enentáimtakka Yusjaj tuke shiir  
pujustinian júuktatui. <sup>9</sup> Nu asamtai  
pénker túratin yawetkishtiniaiti. Tura  
pimpitsuk takasar júuktin tsawant  
jeamtai, páchitsuk júuktatji. <sup>10</sup> Tuma  
asamtai yáinmin ákuñkia ii jeajnia nu  
túratniuitji nekaska ii yachí yáinkíartin,  
Yus-shuar ainia nu. Tura ashí shuarsha  
yáintinaiti.

### Jesukristunu ajasar yamaram akiiniatin nekas pénkeraiti

<sup>11</sup> Ímsakua, winia uwejruijaj urutá  
uuntna áatjarum. <sup>12</sup> “Nekas tuke tsupir-  
naktiniaitme” tuinia nuka áyatik shuar  
shiir enentáimtursartí tusa tuiniawai.  
Kristu krúsnum jakamun étsereakuñkia  
itiurchat awajtusarajin tusar “tsupirnak-  
tiniatme” tuiniawai. Shuar “ashí akup-  
kamun umiktajai” tusa, Muisais timia  
núnisan tsupirnaktiniaiti. <sup>13</sup> Pai. Tura ní  
shuar tsupirnaku ániayat ashí akupka-  
mun umiiniatsui. Muisais timia nuna  
ajapén ikiuniawai. Túmaitiat tsupir-  
nakuk tusa wakerutmainiawai. Áyatik  
atumin “Pai, niisha tsupimiatkiakji”  
titiai tusar wakerutmainiawai. <sup>14</sup> Wikia,  
antsu, aya ii uuntri Jesukristu krús-

num jakamunak wararsatniun enentáimjai. Tu enentáimkiun Kristu krúsnum jakamia áintsanak ju nunkanmayá ana nuna jaka áintsan páchiatstjai; tunaanum winia útsutkatin atsawai. <sup>15</sup>Krístunu ajasrikia tsupirnaktincha tsupirnakchaitkiursha mai ántraititi antsu yamaram akiiniatin nekas péñkeraiti. <sup>16</sup>Ashí nekas Yus-shuaran,

wi tájana nujai métek wekainia nuna, Yus shiir enentáimias yáinti tuke shiir pujustinian.

<sup>17</sup>Yamaikia itiurchat najatawarain. Jesusa takatri takaakui asutiuawarma paant ayashruj chimikma írunui.

<sup>18</sup>Yatsuru, ii uuntri Jesukrístu atumin shiir yainmakarti. Nuke atí.

*Papru*

**IPISIUNMAYA SHUARAN**

*papí akuptukma*

**Ipisiunmaya Yus-shuaran  
Papru áatramiania nu**

**1** Yus nuna wakerakui Jesukrístu aka-tramuitjai. Jesukrístu nekas enentáimtusurum Yus-shuar ajasrum Ipisiunam pujarmena nuna ju papin áatjarne. <sup>2</sup>Yus ii Aparísha tura ii Uuntri Jesukrís-tusha waitnentramainia ásar imiatkinchanum shiir pujustinian yainmakarti.

**Krístujai tsaninkiu asakrin Yus ti shiira nuna tsankatramji**

<sup>3</sup>Ii Uuntri Jesukrístu Apari Yus nekas shiir awajtustiniaiti. Iisha Krístujai tsaninkiu asar ii enentáin ashí nayaimpinmaya ana nujai warasminiaitji. Túmaitkiui Yus nu waratain ashí suramsaitji. <sup>4</sup>Krístujai uwemprar ti shiir tunaajainchu Nijijai pujusarat tusa Yus, ju nunka atsajsha, anaitiamkamiaji. <sup>5</sup>Yámankamtaiksha incha ti anenmak Jesukrístu túrunamujai ni uchiri ajasat tusa wakerutmakmiaji. <sup>6</sup>Ni aneamu Uchirijjai tsaninkiu asakrin nekas ti anenmaji. Nu enentáimsar ti shiir awajsatniuitji. <sup>7</sup>Yus ti anenmakrin ni aneamu Uchiri numpé puarmatai, nu jakamujai ii tunaarín akikmatramak uwemtikrampraitji. <sup>8</sup>Tura ti anenmak ni enentáimtairín tura nekatairíncha suramsamiaji. <sup>9</sup>Nujai shiir enentáimturmak in uwemtikrampratniun wakerutmakmiaj nuna, yaunchu nekaachman, yamá paant awajturmajai. <sup>10</sup>Ashí jú nunkanam írúnna nunasha tura nayaimpiniam írúnna nunasha Kristu ashí akupin ati tusa Yus tsankatkattawai. Nunasha Yus

yaunchu enentáimturum asamtai tsawant jeamtai ashí uminkíáttawai.

<sup>11</sup>Iisha Krístujai tsaninkiu asakrin Yus yaunchu achirmakmiaji ashí Niiniu ana nuna tsankatramkatniun. Nunasha, ashí Nii túrana núnisan, aya Nii wakera asa túramiayi.

<sup>12</sup>Iikia Israer-shuar asar Kristu emka umirkakrin in imiá penker túrutmamun nekaawar ashí shuar Yúsán ti shiir awajsamín ániawai. <sup>13</sup>Núnisan atumsha nekas uwempratín chicham antukrum Kristu nekas enentáimtusurme. Túrarum Kristu-shuar ajasakrumin Yus ni shiir Wakanín akuptuktaj timia nuna akupturmakmai. Nuna tura “nekas Wíi shuaraitrume” tawai. <sup>14</sup>Yamá Yusa Wakani ii enentáin pujuruk tuke uwemtikramji. Tura takas umik nu tsawantai ashí tsankatramkattaji. Tura ii enentáin pujá asamtai Yus ukunam Nijijaisha ashí tsankatramkattaj nu paant nékaji. Maa, Yus ti penker asamtai Nin ashí ti shiir awajjarti.

**Papru Yus-shuaran áujtushmania nu**

<sup>15</sup>Átum ii Uuntri Jesukrístu nekas enentáimtamuncha tura ashí Yus-shuarjai shiir awajnaiyamuncha antukjai. <sup>16</sup>Túran shiir enentáimkiun Yúsán áujkun tuke yúminkiyajai. <sup>17</sup>Ii Uuntri Jesukrístu Apari Yus ti shiir asamtai Nin áujeakun ni Wakani ni nekatairín suramas ashí jintinramawarti tusan seajai. Nujai nuna nankaamas Yus nekaattarme. <sup>18</sup>Tura enentáimincha paant enentáimtikramprarti tusan seajai. Nujai shiir túrutmataj tusa achirmakuitrum nu nekaattarme. Nu arantcha imiá shíira nu, Yus ni shuarín ashí tsankatkattana nusha nekaattarme. <sup>19</sup>Nu arantcha Yus umirkurin ti kakaram tujincha asa in yáinmaj nu nekaattarme. Tura nu kakaram ti kakaram asamtai <sup>20</sup>nujai Krístun

jakamunmaya iniantkimiayi. Tura nayaimpiniam jukí ni untsuuriní akupin pujutainium apujsamiai. <sup>21</sup>Tura ashí ju nunkanam akupin ainia nújajisha tura ukunam nunka átatna nuí akupin áminia nújajisha tura ashí akupin ainia nújajisha tura ashí naarí nékamú ainia nujajisha Yus Krístun ashí nankaamas akupin najanamiai. <sup>22</sup>Tura ashí írúnna nu, Krístun umirkartin ániawai. Tura Yuska Krístunak ashí Yus-shuara Akupniurí awajsamiai. Túramtai Krístu ni shuarí muuké áintsankete. <sup>23</sup>Tura ashí nunkanam Yus-shuar ainia nu Krístu ayashí najanainiawai. Tura Krístu ashí ni ayashín pimiutkaiti tura nu arantcha ashí írúnna nunasha pimiutkaiti.

#### Yus anenma asa uwentikramji

**2** Átum yajauch túrakrum tunaanum tuke wekaakrum Yúsnumiá kanakin asarum jákauyarme. <sup>2</sup>Nu tunaanum jú nunkanam pujuinia nujají métek tuke wekainiuyarme. Túrarum uunt iwianchi wakeramurí umirniuyarme. Uunt iwianch ashí Yúsán umirainiatsna nuna akatenawai. <sup>3</sup>Ashí iisha núnisrik yaunchu nu shuarjají métek ii ayashí wakerakmu umirniuyaji. Tura íi enentái wakeramusha umirniuyaji. Tuma asar tura tunaajají akiinia asar chíkich shuarjají métek ti kajernakmiaji. <sup>4</sup>Antsu Yus ti waitnenkartin asa in ti anenmami. <sup>5</sup>Tuma asa ii tunaanum tuke jaka pujarnin Krístujají métek iwiaaku awajtamsami. Aya ti anenkartin asa uwentikramprami. <sup>6</sup>Tura Krístujají métek iniantamkimi. Nuyá Jesukrístujají métek, akupin pujutainium yamaisha apujtamas tuke nupetkatniun tsankatramkaitji. <sup>7</sup>Nujají ni ti anenkratmarincha tura Krístu túrunamujají waitnentrampramuncha tuke iniaktusmin átatui. <sup>8</sup>Jesukrístu nekas enentáimta asakrumin Yus

waitnentramar uwentikrampraiti. Juka átumkeka túrunachuitrume. Antsu Yuska Niní kuítchajají suramsaitrume. <sup>9</sup>Shuar ni takatríjjají uwempratniuitkiunka nankaamantu enentáimsainti winia kakarmarjají uwemprajají tusa. Nu enentáimsatniuka atsutí tusa Yuska átumka takaatsrumnin uwempratniun suramsamiarme. <sup>10</sup>Yus najanamuitji. Kame Jesukrístujají tsanfákrin yamaram iwiaakman suramas tuke péñker túratniun najatmamji. Yáunchuk nuna enentáimturmasmi. <sup>11</sup>Nuik ámarum nu enentáimpratarum. Ashí Israer-shuar ni ayashín tsupirnaku ásar ashí Israer-shuarchan, tsupirnakcha ániakui, penké Yús-nachua núnis enentáimtuiniawai. Tura atumsha Israer-shuarcha asakrumin “tsupirnakcha” turamniuyarme. <sup>12</sup>Nuik Krísturtinchauyarme. Israer-shuarcha asarum ashí ni túrutairísha tura ashí Yus nin tsankatkarmasha nekaachuyarme. Tura jú nunkanmaya asarum nekas Yusa nu enentáimtichuyarme tura shiir pujustin nánkamsarum enentáimprarmarme. <sup>13</sup>Antsu yamaikia Krístujají tsaninkiu asarum, yaunchu Yusaíyá yajá pujuwitiatrum, yamaikia Krístu numpé puármatai ni jarutramkamujají tántaitrume. <sup>14</sup>Israer-shuarjají Israer-shuarchajají nemasmanai. <sup>15</sup>Nuik aya Israer-shuar Muisais akupkamu untsurí armia nuna umirkartin ániak nujají chíkich shuarjají nemasmanainiarmi. Tura Krístu jaka nu akupkamun ántar awajas chikichik shuar yamaram awajtamsami. <sup>16</sup>Núnisan ámiayi. Krístu krúsnum jaka nemasjai mai

#### Krístujají tsaninkiu asar shiir nawamnaikiar pujají

<sup>11</sup>Nuik ámarum nu enentáimpratarum. Ashí Israer-shuar ni ayashín tsupirnaku ásar ashí Israer-shuarchan, tsupirnakcha ániakui, penké Yús-nachua núnis enentáimtuiniawai. Tura atumsha Israer-shuarcha asakrumin “tsupirnakcha” turamniuyarme. <sup>12</sup>Nuik Krísturtinchauyarme. Israer-shuarcha asarum ashí ni túrutairísha tura ashí Yus nin tsankatkarmasha nekaachuyarme. Tura jú nunkanmaya asarum nekas Yusa nu enentáimtichuyarme tura shiir pujustin nánkamsarum enentáimprarmarme. <sup>13</sup>Antsu yamaikia Krístujají tsaninkiu asarum, yaunchu Yusaíyá yajá pujuwitiatrum, yamaikia Krístu numpé puármatai ni jarutramkamujají tántaitrume. <sup>14</sup>Israer-shuarjají Israer-shuarchajají nemasmanai. <sup>15</sup>Nuik aya Israer-shuar Muisais akupkamu untsurí armia nuna umirkartin ániak nujají chíkich shuarjají nemasmanainiarmi. Tura Krístu jaka nu akupkamun ántar awajas chikichik shuar yamaram awajtamsami. <sup>16</sup>Núnisan ámiayi. Krístu krúsnum jaka nemasjai mai

apattamak chikichik awajtamas Yusjajisha nawamnaitikramkamiayi.

<sup>17</sup>Kristu taa nawamnaikiatniun chichaman Israer-shuaran ujakmiayi. Tura nu chichamnak atumin Yus nékachuyarmena nunasha ujaktinian akupkamiayi. <sup>18</sup>Yamaikia Israer-shuartaisha tura Israer-shuarchasha mai metek Kristu túrunamujaj tura Yusa Wakani takaku asar Yusaj jeatniuitji. <sup>19</sup>Tuma asamtai yamaikia chikich shuarchaitrume, antsu ashí Yus-shuarjaj métek ajasuitrume. Nekas Yusa shuarintrume.

<sup>20</sup>Átum uunt jea jeamma núnisaitrume. Uunt jea jeamtin, emka kaya apujtuktiniaiti jea ti wewe atí tusa. Núnisan yaunchu Yúsnan etserniusha tura Kristu akatramurisha Yus-Chichaman etserainiak imiá nekas enentáimtustinia nuna apujtukarmiayi. Tura ashí nujaj nankaamas Jesukristu enentáimtustiniaiti. <sup>21</sup>Jea apujtukmari Kristu asamtai Nij ti penker ekeniar jea jeamnaki wéawai. Tura ii Uuntri Kristujaj Yusa Jee ti shiir átatui. <sup>22</sup>Núnisrumek atumsha Kristujaj tsaninkiu asarum átum ashí Yus-shuarjaj Yusa Jeeya áintsan ajasuitrume. Tura Yusa Wakani ashí Yus-shuara enentáin pujú asamtai nekas Yusa Jeeente.

### Papru Israer-shuarchanum

#### Yus-chichaman etserkatniuya nu

**3** Nu asamtai atumin Israer-shuarchatirmin yáintaj tusan Jesukristunu étserkun sepunam pujajai. <sup>2</sup>Yus anentak Yus-Chichaman atumin etserkatniun akatar akuptukuiti. Nu nékatsrumek. <sup>3</sup>Yus nuna túrutak yaunchu nekaachmancha paant awajtursamiayi. Núnaka ishichik áatraitjarne. <sup>4</sup>Nu áujсарum Kristunu yaunchu nekaachman yamaikia paant nékajna nu nekaattarme. <sup>5</sup>Nú

chichaman yáunchusha chikichkinkesha ujankachmiayi. Túrasha yamaikia Yusa Wakani Kristu akatramurincha etserniurincha nu chichaman paant awajtusarai. <sup>6</sup>Nu chicham juiti: Uwempratin chichaman umirkar Israer-shuarcha Israer-shuarjaj métek Kristujaj tsaninkiaru ásar chikichik shuar ajasartatui. Tura nu arantcha Yus ni shuarin ashí shíran tsankatkatniun anajmatrama nu métek pachiinkiertatui. <sup>7</sup>Yus ni kakarmarijaj winia yáintiuk tura ti anentu asa nu uwempratin chichaman etserkat tusa akatturmiayi. <sup>8</sup>Ashí Yus-shuarjaj nankaamas wi penkercha ain Israer-shuarchanum shiir chichaman etserkat tusa Yus tsankatrukmiayi. Kristujajinkia kuitjaj nankaamas penker, enentáimtustin jeatsjinia nu, takakji. Nusha ti shiir chichamaiti. <sup>9</sup>Yuska, ashí najana nu, nu enentáimmiann yáunchusha etsertsuk yamaikia ashí shuar nu chichaman nekaawarat tusa winia akatturmiayi. <sup>10</sup>Yamaikia ashí nayaimpiniam pujuinia nuka Yus ni shuarin túrunamun íisar Yuska imiá neka asa ashí enentáimniua nuna paant nékainiawai. <sup>11</sup>Yus júnis túratniun yáunchuk enentáimpramiayi. Tura ii Uuntri Jesukristujaj mash uminkiamiayi. <sup>12</sup>Tura Kristujaj Yusaj yúpichuch jeaji. Tura Nin nekas enentáimtusar sapijmiatsuk Niin tantamniaitji. <sup>13</sup>Tuma asamtai tájarne, atumin yáintaj tusan sepunam pujakui kúntuts enentáimprairap. Antsu nujaj Yus atumin ti shiir awajtamkurmin átum warasuk tusan wakerajrume.

#### Kristu ti anenkratniuiti

<sup>14</sup>Nu asamtai ii Uuntri Jesukristu Aparin tikishmatran áujtajrume. <sup>15</sup>Ashí nayaimpinmasha tura nunkaasha Yus-shuar ájinia nu nekas ni shuari áini-aji. <sup>16</sup>Yus ti kakaram asa ni Wakanijaj

atumí enentáin pujureak ashí ni kakar-mariyan atumin suramsarat tusan áujtajrume. <sup>17</sup>Yus nekas enentáimtakrumin Kristu atumí enentáin pujusat tusan áujtajrume. Tuke yapajítsuk anenkratin átarum tusan áujtajrume. <sup>18</sup>Túrakrum ashí Yus-shuarjají Kristu anenkrattairi nekaattarme. Imiá uunt asa nan̄kantsuk tuke amuukachminiati. <sup>19</sup>Nu anenkrattaiti ashí takamtsuk nekaachmin aín nekaatarum tusan áujtajrume. Nujají Yus takamtsuk pimiutramkattarme.

<sup>20</sup>Nekas Yus shiir awajnasti. Ni ti kakaram asa ii seajnia nuna nan̄kaamas tura enentáimprachminia nunasha nan̄kaamas iin pujurtamuk ashí túramniati. <sup>21</sup>Ashí Yus-shuarjají tura Krístujajísha Yusa péñkeri tuke paant wantinin atí. Yus tuke iniaitsuk shiir awajnasti. Núnisan atí.

#### Yusa Wakanjijají tsaninkiar pujakur túratin

**4** Atumsha ni shuari ajastin Yus achikma asarum péñker wekasatarum tájarme. Ii Úntriniun étserkun sepunam pujakun seajrume. <sup>2</sup>Nekasmiancha ajasrum aneniakrum katsunnairatarum. <sup>3</sup>Yusa Wakanj chikichik shuar awajtamkurmin shiir awajnisarum pujustarum. <sup>4</sup>Yusa Wakanjinkia chikichkiiti. Tura ashí métek Yus achikma asar métek Nijjijají shiir pujustin enentáimji. Iisha Kristu ayashí ayashímkia asar chikichik ayashkiitji. <sup>5</sup>Ii Uuntrj chikichkiiti. Nínki nekas enentáimtusar métek imiantiniatji. <sup>6</sup>Chikichkiiti Yus, ashí Yus-shuarti ii Aparinti. Ashí akuptamniuitji. Ashí ni shuariin pujak ii enentáin pujurtamji. Ti nekas ashí mash, Israer-shuartisha Israer-shuarchasha, imiá chikichik ajasuitji.

<sup>7</sup>Tura chikichik chikichik niisháa shiir takastinian suramsaitji. Tura Kristu wak-

erimia núnisan suramsaji. <sup>8</sup>Nu asamtai Yus-Papiniumsha tawai:

“Achikman júkí nayaimpiniam wakamiayi. Tura shuáran shíiran susamiayi.”

Tu áarmaiti.

<sup>9</sup>Tura “wakamiayi” tana nu ¿warintiu? Kristu nayaimpiniam pujá asa yakí wákanka emka tárashtinkiait. Nekas nunká taramiayi. <sup>10</sup>Nínki ataksha nekas nayaimpiniam wakamiayi. Nuna tura asa ashí ni shuarin pimiutkarmiayi. <sup>11</sup>Tura nujají chikichan akatramun awajsamiayi. Chikichnasha Yúsnan etserniun awajsamiayi. Chikichnasha uwempratin chichaman etserniun awajsamiayi. Chikichnasha Yus-shuara wáinniun awajsamiayi. Tura chikichnasha unuikiartinian awajsamiayi. <sup>12</sup>Túramtai ashí Yus-shuar ni takatrijjají yáiniaikiar ti péñker shuar ajainiakui Kristu ayashí takamtsuk katsuarartatui. <sup>13</sup>Nujají Yus nekas enentáimtamunam Yusa Úchirj ashí métekrak péñker nekaattaji. Nu túrakur katsukir Krístujají métek péñker ajastatji. <sup>14</sup>Tura uchía áintsar áhattaji. Úchikia ashí yamaram chichaman antukar wari yapajjiniawai. Tura anan̄kartinia chichamen antukar waaku áiniawai. Kame nu anan̄kartin shuar ti paant chichayatan ni shiir chichamejají anan̄katniun pujurenawai. <sup>15</sup>Antsu nekas aneniakur nekas chicham ujanaiktiniatji. Túrar Krístujají tsaninkiar tuke tsakakir ashí péñker túratniujají Nijjijají métek ajastatji. Krístuka ashí ni shuari muuké áintsan̄kete. <sup>16</sup>Tuma asa ni ayashin wáinkui ashí nuna muchitmarj péñker yáiniaikiar ashí ni túratniurj shiir takasartatui. Nujají nu ayashniun muchitmarj chikich chikich péñker takainiak métekrak shiir tsakartatui. Tura anenainiakui nu ayashsha péñker úuntmartatui.

**Kristujaj tsaninkiu asar yamaram  
iwiaakmanum wekaaji**

<sup>17</sup> Ii Uuntri Kristu ímmianum juna akatjarme: Chíkich aents Yúsan nékachu ásar ántar ni enentáimmiajajin wekainia núnisrum wekasairap. <sup>18</sup> Ni enentáin kusuru ániak Yusna nuna nekaatniun wakeruiniatsui. Tuma ásar shiir wekasatniun, Yus amaana nuna, nékainiatsui. <sup>19</sup> Nu arantcha, ni túramurijaj natsamtichu ásar ti yajauchiniam surumakar ashí tunaan wararainiak túrin ániawai. <sup>20</sup> Antsu átumka núnisrum enentáimtustin unuimiarchamarne. <sup>21</sup> Nekas Nii anturkaitkiurmeka tura Jesus nekas tama Kristu unuiniarmaitkiurmeka Nin shiir enentáimtustin unuimiarmarme. <sup>22</sup> Yaunchu enentáimtairmeka ayash wakeramu anankramin ainia nujaj piaku asa imiá yajauchiiti. Nu enentáimtaimesha yaunchu túrutairmesha ajapa iniaisatarum. <sup>23</sup> Túrarum penker enentáimsarum wakannium yapajiátarum. <sup>24</sup> Tura yamaram enentáimtairam emetatarum. Nuka Yusjaj métek najanamu asa nekas penker tura shiira nuna tuke túriniaiti.

<sup>25</sup> Nu asamtai chikichik ayashi muchitmarj asarum wáitruitsuk nekas chicham chicharnaisatarum.

<sup>26</sup> Kajeakrum tunáa túrawairap. Tura nu kajekmasha tsawant takamtsuk áchatniuiti. <sup>27</sup> Uunt iwianch yajauch awajtamsatin tsankatkaip.

<sup>28</sup> Kasasha kasamtsuk kakaram takakmasti. Tura ni uwejéjaj penker takaak atsumainia nú shuarnasha susati.

<sup>29</sup> Muijmiai chicham chichasairap. Antsu chichastin akui penker chicham, chíkich shuar penker awajsamnia nu chichastarum. Anturtuinia nuna yáintaj tusarum nu chicham ujaktarum. <sup>30</sup> Yusa Shiir Wakaní kúntuts awajsairap. Warí, Yúsnaiti tusa

pujurtamji. Tura pujurtamuk takamtsuk uwemtikramprattaji.

<sup>31</sup> Ashí yajauch ana nuyá kanaktiarum. Nakitratniusha, kajer-naikiatniusha, tura kakantrar charáa charáa ajatniusha, katsekmaktincha, tsanumpratniusha mash atsutí. <sup>32</sup> Antsu shiir awajkartin ajasrum waitnennairarum, Kristu jakumajaj Yus atumí tunaarin tsankurtampra nútiksarmek tsankurnairatarum.

**Yus-shuar túratin**

**5** Nekas Yusa Uchirí aneamu asarum Nii tura núnis túratin wakeruktarum. <sup>2</sup> Kristu in anenmaj núnisrum anenaitiarum. Kame ii tunaarin akikmaktaj tusa jákatniunam surumakmiayi. Túramtai Yus shiir enentáimtusmiayi.

<sup>3</sup> Yusna asarum tsanirmatniusha yajauch túratniusha tura jú nunkanmayan ikiaunkatniusha ishichkisha enentáimtuschatniuitrume. <sup>4</sup> Natsanmaincha, ántar chichamsha yainmakchamnia asamtai chichaschatniuitrume. Antsu Yus shiir yuminsatniuiti. <sup>5</sup> Shuar chíkich nuwajaj tsanirmakka tura ashí yajauchin wakerakka tura jú nunkanmayan ikiaunkatniun wakerakka Yusaj Kristu akupea nuj penké pachiinkichminiaiti. Kame ju nunkanmayan ikiaunkatin ántar-yus tikishmatratniua nujaj méteketete. <sup>6</sup> Nu túramniaiti tusar ántar chichamjaj anankramacharti. Warí, nuna túruiniakui Yúsan umirainiachun Yus ti asutiáwartatui. <sup>7</sup> Tuma asamtai nu shuar penké pachischatniuitrume.

<sup>8</sup> Yáunchuka atumsha kiritniunam wekainiuyarme. Tura yamaikia Kristujaj tsaninkiu asarum penker tsáapninium wekaarme. Shuar tsáapninium wekainia nujaj métek wekasatarum. <sup>9</sup> Tsáapninium

wekainiaka shiir awajkartincha tura nekas chichamtincha tura penker túrin

áiniawai. <sup>10</sup>Ii Uuntri Kristu wakeramu nekaatin wakeruktarum. <sup>11</sup>Kiritniunam wekainia nu túramu pachisairap. Antsu nu shuar tsáapninium enkeatarum. <sup>12</sup>Ni uuḱ túruinia nu áujmatsatin natsanmainiaiti. <sup>13</sup>Tura ashí tsáapninium itiamu ashí paant ajawai. Tsáapnikia ashí paant awajeatsuk. <sup>14</sup>Nu asamtai Yus-Papinium tawai:

“Kanaruitme nu shintiártá. Jakamun-maya nantáktiá. Tura Kristu tsáapin awajturmastatui.”

Tu áarmaiti.

<sup>15</sup>Nu asamtai átum túramu ímias-tarum. Nékachu áintsarum pujusairap. Antsu péñker enentáimprarum wekasatarum. <sup>16</sup>Péñker túratin tsawant wasúrkaíp. Tunáa ti pampaatsuk. <sup>17</sup>Enentáincha áirap. Ii Uuntri Kristu warinia wakera nu enentáimtustarum. <sup>18</sup>Nampekairap. Nampeakmeka aya yajauch ajame. Antsu Yusa Wakani winia enentáiruḱ takamsuk pujurtusti, tu enentáimsatarum. <sup>19</sup>Túrarum Yus shiir enentáimtakrum Yus-kanta kantamkirum shiir áujnaisatarum. <sup>20</sup>Ii Uuntri Jesukristu náarijjaḱ ashí irunna nu Yus Apa tuke yuminsatarum.

### Yus-shuar túratin

<sup>21</sup>Yus-shuar asarum nuámtak umirnaikiatarum. Túrakrum Kristu shiir awajsattarme.

<sup>22</sup>Núwaka Krístun umirna núnisaḱ ni áishrincha umirkatniuiti. <sup>23</sup>Kristu ni shuarin akupeana núnisaḱ áishmansha ni nuwen akupkatniuiti. Kristu ni shuarin ayashimiak ni muuké áintsankete. Tura nin uwentikiartiniiaiti. <sup>24</sup>Nu asamtai Yus-shuar Krístun umirin áiniawai. Núnisaḱ ashí ana nujai nuwá ni áishrin umirkatniuiti.

<sup>25</sup>Kristu ni shuarin ti aneak nin yáin-taj tusa jákatniun surumakmiayi. Núnis-rumek áishmantirmesha atumí nuwé aneatniuitrume. <sup>26</sup>Kristu ashí ni shuar-

in ni Chichamejai tura entsajai nijjar ní shuar péñker árat tusa jakamiayi. <sup>27</sup>Nujai ashí ni shuarin tunaarinniuchu tura yajauch máatrachu antsu ti péñker shiir awajas Niini ejetaj tusa túrami-ayi. <sup>28</sup>Núnisaḱ áishman ni ayashin anea núnisaḱ ni nuwen aneatniuiti. Shuar ni nuwen aneak nujai ni ayashincha aneawai. <sup>29</sup>¿Yaki ni ayashin nakitniuit? Antsu péñker wáiniuk áyureatsuk. Kristu núnisaḱ ni shuarin wainui <sup>30</sup>ni ayashí asamtai. Kame ni ayashí muchitmarin-tji. <sup>31</sup>“Tuma asamtai áishman ni aparincha nukurincha ikiukin ni nuwejai tsanin-kiar chikichik ayashtin ajainiawai.” Tu áarmaiti. <sup>32</sup>Nusha Kristu ni shuar-ijjai tsaninmán tawai. Nuka yaunchu nekaachma yamaikia nekanaiti, tura ti enentáimturiniiaiti. <sup>33</sup>Tura núnisaḱ ashí áishmantiram atumí nuwé atumí ayashía nútiksarmek aneatniuitrume. Nuwasha ni áishrin umirkatniuiti.

**6** Uchitirmesha, Yus-shuar asarum apasha nukusha umirkatarum. Nuka ti péñkeraiti. <sup>2</sup>Emka akupkamu “umirkam nekas shiir átatme” tana nu júi:

“Apasha nukusha umirkata.

<sup>3</sup>Túrakmeka shiir átatme tura jú nunkanam untsurí tsawant pujustatme” tawai.

<sup>4</sup>Atumsha, uchirtintirmesha, atumí uchiri ántrarum akajkairap. Antsu Yúsan shiir enentáimtusarat tusarum ti péñker jintinkirum tsakatmartarum.

<sup>5</sup>Takakmautirmesha, atumí uuntri ju nunkanam pujuinia nu ti péñker umirkatarum. Kristu umirkatniau áintsarum wishiktsuk ashamakrum tuke enentáijjai takarsatarum. <sup>6</sup>Aya wáitmakui shiir enentáimtursat tusarum péñker takarsairap. Antsu Kristu takarniurja núnisrum ashí ame enentáimjai Yus wakera nu túratarum. <sup>7</sup>Aya shuárnak yayá nútiksarum takasairap. Antsu ii Uuntri



Kristu takarsatniua nútiksarmek ásump enentáijjaj takastarum. <sup>8</sup>Kame chíkich chíkich ni takasmajaj métek akinkiaratui. Ii Uuntri Kristu nu shuar penker túramujaj métek akiktatui.

<sup>9</sup>Tura atumsha, iniamniutirmesha, atumí takartamu wakaní mántutsuk shiir enentáijjaj iniartarum. Nekas enentáimpratarum. Ii Uuntri nayaimpiniam pujana nuna niisha atumjaj métek umirainiawai. Tura Yuska ashí shuaran akantsuk métek iyawai.

### **Yusa kakarmarijjaj íwianch taritratarum**

<sup>10</sup>Wátsek, yatsuru, ii Uuntri Yusjaj tsaninkiu asarum ni ti kakarmarijjaj iwianchjaj máanaiktin kakaram ajastarum. <sup>11</sup>Apach máanainiak jiru entsarua núnisrum Yus susamujaj entsartarum. Nujaj íwianch nupettamkui tariartatme. <sup>12</sup>Kame Yusna takáa asar penké áentsjaj máaniatsji antsu yajauch wakan kakaram írunna nujaj máaniaji. Niisha ju nunkanam, kiritniunma áintsan, tunaanum wekainia nuna akupin áiniawai. <sup>13</sup>Jiru entsartinia áintsarum Yus súramna nu entsartarum. Nu entsarmajaj itiurchat tsawant taritra nupetkarum tuke tariarum wajastatume. <sup>14</sup>Wats, nekas tariartin nekas chicham emenmamatarum. Tura penker túratnuijaj jatairum ajaktarum. <sup>15</sup>Suntar iwiarnak sapatán aweá áintsarum Yusa shiir chichame etserkatin iwiarnartarum. <sup>16</sup>Nuyasha

ashí nankaamas, tantar takustinia áintsan, Yus tuke nekas enentáimtus-tarum. Nujaj íwianch eketrámkamusha uwemturtatme. <sup>17</sup>Múukem ajaktincha Kristu uwentikrampramu múukmiin etsenkruktarum. Tura Yus-Chicham puniáa áintsan achiktarum. Nuka nekas Yusa Wakaní puniarinti. <sup>18</sup>Yusa Wakanijjaj Yus áujeakrum tuke seatniuitrume. Tura tuke aneara pujustarum wake mesetsuk, tura ashí Yus-shuar ainia nusha Yus áujtustarum. <sup>19</sup>Núnisan winiasha áujtustarum. Wi sepunam pujayatan Yus winia chichastinian surusat tusarum seatritiarum. Tura wi chichaakun sapijmiatsuk Shiir-chichaman yaunchu nekaachma paant awajsat tusarum áujtustarum. <sup>20</sup>Yus nu chichaman etserkatniun akuptukuiti. Nuna túrakun sepunam pujajaj. Sapijmiatsuk etserkat tusarum Yus áujtustarum.

### **Amikmaamu**

<sup>21</sup>Ii aneamu yachi, Tíkikiu, ashí wi túramun ujatmaktatui. Niisha Ii Uuntri Krístunu etserkatniun ti penker yáinniuiti. <sup>22</sup>Tuma asamtai ii juí pujamun ujatmak ikiantamprarat tusan akuptajrume.

<sup>23</sup>Yus Apasha tura ii Uuntri Jesukrístusha ashí Yus-shuartirmin anenmak shiir imiatkinchanum pujustinian suramsarti. Tura Nin tuke nekas enentáimtustinian suramsarti. <sup>24</sup>Ashí ii Uuntri Jesukrístun tuke enentáijjaj aneana nuna Yus shiir yáintí.

Nuke atí.

*Papru*

**JIRIPIUSNUMIA SHUARAN**

*papí akuptukma*

**Papru sepunam pujus Jiripiusnumia  
Yus-shuaran áatramiania nu**

**1** Wi Papru Timiutéujai Jesuskristu takarín asar ashí Yus-shuar Jiripius péprunam pujarmena nu ju papí akuptaji. Yus-shuaran wainin árumna nusha tura Yus-shuaran yain árumna nusha ashí Yus-shuarsha nunisan Yusna asarum tura Jesukristujai tsanínkiu asakrumin ju papí áateajrume. <sup>2</sup>Yus ii Aparísha Jesukristu ii Úuntrísha atumin waitnentramaiania ásar imiatkinchanum tuke shiir pujustinian yainmakarti.

**Papru Yus-shuaran Yúsan áujtawai**

<sup>3</sup>Ashí tsawant atumin enentáimtakun Yúsan tuke shiir yúminíajai. <sup>4</sup>Yúsan áujeaknasha ti warasan seatjarme. <sup>5</sup>Kame iikia yámankamtaiknumia Yus-Chicham métek yáiniáikiar iniaitsuk takasuitji. <sup>6</sup>Yus atumín ti péñker awajsatniun naníkaasa asa núnisan Jesuskristu táatsain tuke shiir awájtámki nekas péñker najatmattarme. Nuka ti nekasaiti. <sup>7</sup>Atumin ashí ti aneajrume. Kame wi sepunam pujakun Yus-Chichaman akasmatkun tura Yus-shuar kakararti tusan takaakui átum yáintiarme. Yus ti anenkartin asa nu túratniun mai metek tsaníkatrámkaitji. Tuma asamtai atumin júnisan enentáimtustin ti péñkeraiti. <sup>8</sup>Jesuskristu anenkrattairíjiai wi atumin aneamun Yussha paant nékarui. <sup>9</sup>Yúsan áujeakun anearmena nú naníkaamas aneak tusan seatjarme. Tura nújajisha ti neka ajarum <sup>10</sup>ashí péñkera nu achikiuk tusan Yúsan áujtajrume. Atumin nu túrunamtaínkia yamaisha

tunáajainchu pujustatrume tura Kristu támatai sumamashtatrume. <sup>11</sup>Núnisan Jesukristu kakarmaríjiai ashí péñker túrin áatrume. Tura nújají ashí shuar Yúsan ti shiir enentáimturartatui.

**Wi ju nuníkanam aya Krístunak  
enentáimtakun pujajai**

<sup>12</sup>Winin túrunamu itiurchat ain nu jai uwempratin chicham nekas pam-paawai. Nu nekaatarum tusan wakera-jrume, yatsuru. <sup>13</sup>Iis, uunt akupniu sun-tarísha tura ashí shuarsha wi Krístunun etseru asan sepunam pujamun paant nékainiawai. <sup>14</sup>Ti untsurí Yus-shuar wi sepunam enketman nekaawar ii Uuntrí Jesusan nekas enentáimtusar sapijmiatsuk Yus-Chichaman etserainiawai.

<sup>15</sup>Kame shuar awai winia kajertuiniak tura naníkaamantu enentáimtumainiak Krístun páchiniawai. Antsu chíkich shuarka nekas enentáijíai Krístun etserainiawai. <sup>16</sup>Yajauch shuarka Krístun shiir enentáimtutsuk antsu ashí shuar ní chichamenak anturkar wí shuar ajararat tusar etserainiawai. Túruiniak wisha sepunam pujakui nu arant itit awajtustinian wakerutainiawai. <sup>17</sup>Antsu péñker shuar Krístun nekas aneenak etserainiawai. Nu uwempratin chicham imiá péñkeraiti wi titin asamtai winiasha anentainiak shiir etserainiawai. <sup>18</sup>Wats, mai metek chíkich yajauch enentáijíai tura chíkich shiir enentáijíai Krístun etserainiakui shiir enentáimjai.

Tura nuna naníkaamas shiir enentáimprattajai. <sup>19</sup>Kame Yus áujtursa asakrumin tura Jesukristu Wakanísha yaintiu asamtai ti péñker uwempran jíinkittíajai. <sup>20</sup>Nekas juna wakerajai: Natsamtsuk uunt akupniu Jesukristun paant ujakartinian wakerajai. Nujají winí Kristu kakarmari pujamu ti paant nekanattawai. Mántuiniakuisha tura mántuiniachkuisha ashamatsjai. Aya

Kristu kakarmarin winí nankaamas nekaawarat tusan wakerajai. <sup>21</sup> Wíjiainkia ju nunkanam iwiaaku pujakun aya Krístunak enentáimtakun pujajai. Tura jákatniusha juí pujajnia nuna nankaamas pénkeraiti. <sup>22</sup> Ju nunkanam pujakun Uunt Jesusnan takasminiaitjai. Nu asamtai tunatsuk achiktaj nékatsjai. <sup>23</sup> Wíjiainkia itiurchataiti mai achiktin. Jákatniuncha wakerajai Krístujai tsaninkian pujustaj tusan. Wíjiainkia nu imiá pénkeraiti. <sup>24</sup> Túrasa atumin yáintaj tusan tuke ju nunkanam iwiaaku pujusminiaitjai. <sup>25</sup> Kame tuke pujustajai nékajai. Núnisnak atumjai pujakun Yus nekas enentáimtakrum nankaamas waraakrum tuke katsuaruk tusan yáintatjarme. <sup>26</sup> Nu asamtai wi atumjai pujakuí Jesukrístu yuminsarum shiir warastatrome.

<sup>27</sup> Kristu chichame ti penker asamtai atumsha aya pénkerá nuke túratarum. Wi atumjai pujaknasha tura yajá pujaknasha átum ti shiir túrarmena nuna antuktinian wakerajai. Ashí shuar uwempratin chichaman nekaawar umirkarat tusarum chikichik enentáijjai kakaram ajastarum. <sup>28</sup> Atumí nemasrisha ishichkisha sapijmiamtikramkarin. Nu túrakrumin nu shuar emesratniunam weena nusha tura átum uwempratniusha paant nekanattawai. Núnisan atí tusa Yus túraití. <sup>29</sup> Krístunu asarum Nii nekas enentáimtustinniaasha tura Niiniu asarum wáitsatniusha Yus anenma asa tsankatramkairume. <sup>30</sup> Yus-Chicham pamparat tusar maimetek ti takáa asar wáitajai. Wi nuik ti takasmaj nu nekamarme. Tura yamáí tuke takaaj nusha ántarme.

### Kristu péechach ajasmatai Yus ti uunt awajsamiayi

**2** Kristu ikiantamkuisha, ni anenkrattairi atsantamkuisha, ni Wakani atumjai pujakuisha, anenkratniuitkiurmesha, waitnenkratniuitkiurmesha <sup>2</sup> waramtikrustarum. Métekrak takastarum. Mai metek anenaitiarum. Yusa Wakani atumí enentáin pujá asamtai chikichik enentáik enentáimsatarum. <sup>3</sup> Átum wakeramuk túrawairap. Nankaamantu ajastaj tíirap. Antsu péechach ajasrum chikich shuar atumjai nankaamas pénker enentáimtusta. <sup>4</sup> Aya níniak pénker átatna nunak shuar túrashti. Antsu chikich shuar yáinminia nuna túrati.

<sup>5</sup> Kristu Jesus enentáimpramia núnisrum enentáimpratarum. <sup>6</sup> Niisha Yúsaitiat ju nunkanam winiak tuke Yusjai métek átinian emettsuk <sup>7-8</sup> antsu nuna ikiuak aents ajas péechach asa ashí aentsu takarin ajasmiai. Tura aentsu ayashin ayashimiak tura Yúsán umireak jákatniuncha surimiakchamiayi. Maa, imiá tunaarinnua áintsan krúsnum natsanmainium jakamiayi. <sup>9</sup> Túramtai Yus nekas nankaamantu awajsamiayi. Ni náarincha ashí paant awajsamiayi. <sup>10</sup> Tuma asamtai ashí nayaimpiniam írunna nusha, nunka írunna nusha, tura iwiarsamusha Jesusa náarin antukar tikishmatrartatui. <sup>11</sup> Tura ashí shuar Jesukrístu ashí akupin ajasman paant nekaawartatui. Nújainkia Yus Apá kakarmarisha paant nekanattawai.

### Yus-shuar kiritniunam keeák tsáapin awajeana áintsan áiniawai

<sup>12-13</sup> Nu asamtai, aneamu yatsuru, wi atumjai pujakuí umirtukmarmena nuna nankaamas yamaikia arant pujakuisha umirtuktarum. Iis, Yus atumí enentáin

takaak ni shiir wakeramu wakeruktin-niasha tura umiktinniasha pujurtam-prume. Nu asamtai atumsha kakaram ajastarum Yus ti penker awajtamsatniun wakera nu túrunati tusarum. Tura péechach enentáimprarum awajirminiaitjai tusarum aneara wekasatarum.

<sup>14</sup> Ashí yajauch tunaitsuk tura jianaitsuk wekasatarum. <sup>15</sup> Túrakrum makuumatsuk tunaajainchu átatrume. Antsu Yusa uchirí átatrume. Ju nunkanmasha shuar imiá tunaan túrinjaisha máatrachu asarum kiritniunam ji keeá áintsanketrume <sup>16</sup> iwiaaku pujustin chicham paant awajeakrum. Nújai Kristu támatai atumín ántran takascha asan ti shiir wararsattajrume. <sup>17</sup> Winia takatrujai Yus-shuar ajasakrumin wi jákatniuitkiuncha nújaisha warasaintjai. Atumsha wi waraajna juí núnisrumek warastarum tusan wakerajrume. <sup>18</sup> Atumsha waraakrumin métek wararnaisatai.

### Timiutéuncha Epaprutítiuncha Papru ujatkamiania nu

<sup>19</sup> Ii Uuntri Jesus wakerakuinkia Timiutéun írmainiarat tusan ti warik akuptuktatjarme. Tura átum shiir pujamu ujateakui warastatjai. <sup>20</sup> Kame Timiutéu wijjai métek enentáimna áinis chíkich shuar atsawai. Niisha átum shiir pujusuk tusa ti nekas enentáimturmarume. <sup>21</sup> Chíkichka Kristu wakeramun iniaisar ní wakeramunak páchiniawai. <sup>22</sup> Túrasha átumka Timiutéu tuke penker túramu nékarme. Uchi ni aparíjiai takaana áinis Yusa shiir chichame etserkatniun yáintkiati. <sup>23</sup> Winia itiurtukartiñ nuna nekaan Timiutéu írmainiarat tusan akuptuktatjarme. <sup>24</sup> Kame Kristu yáintkiui wíkisha wárik íimniaitjarme. <sup>25</sup> Wi atumaj nuna írsati tusarum Epaprutítii akupturkamarme. Wijjai métek tsaniñ takasuiti. Tura métek

wáitsaitji. Áunkesha akupkamnia enentáimjai. <sup>26</sup> Nii jaawai taman átum antukman nekáa, írmainiun ti wakerutmarume. <sup>27</sup> Maa, nekas ti janinkiamai. Túrasha Yus nin waitnentramai. Kame winiasha wi juí wáitiakun nii jakamtai nu arant ti kuntuts pujuschatniun waitnentrurmai. <sup>28</sup> Tuma asamtai akuptuktinian wakerajrume. Tura atumsha ataksha wáinkiarum waraakrumin wisha ti kuntuts enentáimchakun akuptuktatjarme. <sup>29</sup> Kristu yuminsarum ti shiir warasrum wáinkiatarum. Chíkich shuar nijjai métek penker Yus-shuar ainia nusha shiir enentáimtustarum. <sup>30</sup> Kristu takatrin takaak ti janinkiamai. Átum yáintkiachminia nuna winia yáintkiataj tusa pujus jáninkiamai.

### Kristu nekaatin ashí nankaamas penkeraiti

**3** Ayu. Warastarum, yatsurtiram, ii Uuntri Kristu ti penker asamtai nuik áatramajrum nuna ataksha títiatjarme. Ataksha ujam yainmakminiaitkiuinkia wíjjiinkia itiurchachaiti atak enentáimtikratin. <sup>2</sup> Yajauch shuarjai aneartarum. Nu shuar Muisais timia núnis tuke yamaisha tsupirnaktiniaitrum tuiniawai. <sup>3</sup> Antsu iikia ayash tsupirnakmajai penker átiniaitji tu enentáimtatsji. Iikia antsu ii wakaníjiai Yus shiir awajeaji tura Jesukristunu asar Niñki shiir wararji. Nu túrakur Muisais timia nu umintikia iitji. <sup>4</sup> Ju nunkanam írunna nujai waantu enentáimpramniaitkiuinkia ashí shuarjai nankaamas wikia waantu enentáimtumaraintjai. <sup>5-6</sup> Israer-shuar asan Muisais timia núnisan wi akiiniamtai uchu (8) tsawant nankaasmatai tsupirtukarmiyai. Israer-shuarnum Pinjamín weeitjai. Winia aparsha nukursha mai Israer-shuar ániakui wi imiá Israer-shuaraitjai. Wisha Pariséu

tuinia núnisan Muisais akupkamun ti umirin asamtai chíkichka winia sumamtiatniun tujintrin ármiai. Tura Pariséu asan Kristu-shuarin ti kajerkan áintramjai. <sup>7</sup>Ashí nujajinkia waantu enentáimtumauyajai. Antsu yamaikia Krístujajinkia penké ántar áiniawai tajai. <sup>8</sup>Ashí enentáimpramnia ákuisha winia Úuntur Jesukrístu shiir enentáimtustin nekas péñkeraiti. Nu asamtai Krístunu ajakun wi takusmaj nu muijmiais ajasmatai núnaka iniaisamjai. <sup>9</sup>Nuna túran Niijjaj tsaninikian pujajai. Tura akupkamu umirkatniujaj péñker ajaschaitjai antsu Krístun enentáimtakui Yus “pénkeraitme” túrutui. <sup>10</sup>Tuma asamtai ashí nankaamas wakeraj nu júiti: Krístun péñker nekaan nekas enentáimtustinniasha tura ni iniantkimiu kakarman takustinniasha wakerajai. Tura Niijjaj métek ajastinian wakerakun ni wáitkiamunam tsanintinniasha tura Nii jakamia núnisan jákatniuncha wakerajai. <sup>11</sup>Túraknaka Krístujaj métek jakamunmayá nantaktiaj tusan wakerajai.

### **Papru kakaram ajasmiai Kristu wakeramun umiktinian**

<sup>12</sup>Kame wakerukuitjia nuna mash umirkachuitjai. Krístujaj métek nekas péñker shuar ajaschaitjai. Túrasha Kristu Jesus “nuí ejetajam” emka túrutkui, wisha nuí jeataj tusan kakaram ajasan pimpitsuk takaajai. <sup>13</sup>Yatsuru, wisha nuí jeajai tátsujai. Antsu yaunchu túrutain kajinmatkin kakaram ajasan Kristu wakeramunam jeatniun takaajai. <sup>14</sup>Tura nuna umikmatai nayaimpiniam Jesukrístujaj tsaninikian shiir pujustinian Yus surustatui.

<sup>15</sup>Ashí shuar Yusjaj katsuaru ájinia nu wi tájana núnis “jeachuitjai” tu enentáimpratniuitji. Tura “jeaitjai” enentáimkiurminkia Yus nunasha atak

enentáimtikramprattarme. <sup>16</sup>Tura aneartarum. Naki pujutsuk jeajnia nujaj métek umirkatin pimpitsuk takastiniatji. <sup>17</sup>Yatsuru, wisha tura chikichcha wijjaj métek péñker túrajnia nu wáinkiuaram atumsha núnisrumek túratarum. <sup>18</sup>Tura yajauch shuarsha írunui. Wi nuiksha ti ujakmajrume tura ataksha úutkun ujaajrume, nu shuar Kristu krúsnum jakamun mujjaiiniawai. <sup>19</sup>Tuma ásar emesratniunam akupnakartatui. Ni ayashí wakeramun, ni yusria áintsan, tuke umirainiawai. Natsanmainian túruiniayat wararainiawai. Tura ju nunkanmayanak enentáimtuiniawai. <sup>20</sup>Antsu iikia nayaimpinmayá shuar asar ii Uuntri Jesukrístu in uwemtikrampra asamtai nayaimpinmayá tatí tusar náka. <sup>21</sup>Nii taa, ii yajauch ayashin yapajjá ni ayashíjjaj métek ti shiir awajsattawai. Ashí uunt akupin ajas nu kakarmajaj túrutmattaji.

### **Krístujaj tsaninkia wekáa asarum warastarum**

**4** Nu asamtai, aneamu yatsuru, ii Uuntri Krístujaj tsaninkiu asarum kakaram ajastarum. Maa, ti aneakun atumin enentáimtakun ti waraajai tura ístajrum tusan wakerajrume. Tawasap achikiar shiir enentaimsatniua núnisnak shiir enentáimtajrume.

<sup>2</sup>Ewautiancha tura Séntikincha, ii Uuntri Kristu shuarí ásar, mai metek enentáimsarat tusan seajai. <sup>3</sup>Amincha, winia airú, nu nuwá yáinkta tusan seajme. Niisha wi iwiaaku chichaman étsereakui wijjaj métek takasarmai. Tura Krimintisha tura chikichcha wijjaj métek takasarmai. Nuna náarin iwaaku átinnium Yus áatraitui.

<sup>4</sup>Nu asamtai Uunt Jesusjaj tsaninkia pujá asarum warastarum. Ataksha “warastarum” tájarne. <sup>5</sup>Uunt Jesus tátin ishichik ajasai. Tuma asamtai

tsaṅka enentái takakrum nu paant nekanati.

<sup>6</sup>Itiurchat enentáimsatin atumjai penké atsutí. Antsu tuke Yus áujkum ashí itiurchatrum ujakta. Atsumamuram Yus seata. Túram Yus yuminsata. <sup>7</sup>Nuinkia atumí enentái ankant átinian, áentstikia penké nekaachminia nuna, Yus amastatui. Yus atumin ankant awajtamsa asa atumí enentáin tura atumí enentáimsamuríncha yajauch wayawain tusa shiir waitmaktatrumé Jesukrístujai tsanínkiu asakrumin.

### Ashí pēnker ana nu enentáimsatarum

<sup>8</sup>Yamaisha yatsuru, júchiniak títiatjai. Yus-shuarti enentáimsatniun chichasatjai yamaikia. Ashí nekas ana nu enentáimsatarum. Tura ashí anturkamnia ana nusha, naka chicham ana nusha enentáimsatarum. Tura yajauch chichamsha enentáimsairap. Tura antsu ashí shiir ana nusha, chíkich shuarnasha pēnker enentáimtusminia nusha, kame ashí pēnker ana nu enentáimsatarum. Nuyásha chíkich shiir anturkamnia ana nusha enentáimsatarum.

<sup>9</sup>Wi unuinarmajrumna nu umiktarum. Tura wi túramur ísurmena nu tura antukurmena nusha umiktarum. Túrakrumnínkia Yuska ankant átinian amastaj tusa pujurtamsattarme.

### Jiripiusnumiá Yus-shuar Páprun kuítian akuptukarmiania nu

<sup>10</sup>Ii Uuntri Kristu anea asarum winiasha ataksha enentáimturú asakrumin ti waraajai. Kame kajinmatrukmiarme tátsujai antsu kuítrum atsakui yáintkiatin tujinkiamarme. <sup>11</sup>Tura kuítian atsumakun tátsujai. Antsu wi takakjana nujain warastinian unuimiáruitjai. <sup>12</sup>Kuítrinchati pujustinia nuna nékajai

tura ti nukap takustinia nunasha nékajai. Tsukamaknasha jéemarnasha, itiarar takustinniasha tura penké takutsuk pujustinniasha unuimiáruitjai. <sup>13</sup>Kristu ni kakarmarín surakui ashí túramniaitjai. <sup>14</sup>Tuma ain atumsha wi atsumamu akupturkarum ti pēnker túramarme.

<sup>15</sup>Jiripiusnumiá shuurtiram, jú ti pēnker nékarme. Masetunia nunkanam Yus-Chichaman etserumtai aya atumek kuit akupturkamiarme. Wi etserkamujai atumí wakanín yáinma asamtai yuminsarum akupturkamiarme. <sup>16</sup>Atumek wi Tisarúnkia nunkanam atsumakun pujaisha kuit akupturkamiarme. <sup>17</sup>Aya kuit akupturkakrumin tu enentáimtsujai. Antsu nu kuit Yusai kawentramkaku tusan wakerajrume. <sup>18</sup>Epaprutítuijai akupturkamarum nujaiasha atsumamaj nuna nankaamas tiaruncha wáinkiajai. Akupturkamarum nusha ti kunkuin Yus susamua áinis ti shiir auyi. <sup>19</sup>Winia Yúsrusha ti pēnkeran núkap takakui. Atumsha Jesukrístunu ajasu asarum Yus seamniaitrumé. Tura Yuska ti takakna nujai ashí atsumarmena nuna suramsattarme. <sup>20</sup>Ii Aparí Yus tuke shiir atí. Nuke atí.

### Amikmaamu

<sup>21</sup>Winia náaruisha tura Jesukrístu náaríncha ashí Yus-shuar ainia nu chícham ujatruktarum. Niisha shiir pujusarti. Wi írutramusha núnisañ shiir pujusarti tusa akupturmainiawai. <sup>22</sup>Tura ashí akupin Sésarai pujuinia nuyá Yusna ajasaruka tura chíkich Yus-shuarsha shiir pujusarti tusa chichaman akupturmainiawai.

<sup>23</sup>Ii Uuntri Jesukrístu atumniasha ti shiir yainmakarti. Nuke atí.

*Papru*

**KURUSENMAYA SHUARAN**

*papí akuptukma*

**Kurusenmaya Yus-shuaran  
Papru áatramiania nu**

**1** Wi Pápruitjai. Yus wakerutak Jesukristunun etserkat tusa akatra akupkamuitjai. Wisha ii yachi Timiutéujai <sup>2</sup>ju papí áarar nuí Kuruse péprunam Kristu péñker umirkarum Yusna ajasuitrumna nu akuptaji. Yus ii Apari atumin wáitnentaimturma asa yainmakarti imi-atkinchanum tuke shiir pujustinian.

**Papru Yus-shuaran  
Yúsán áujtusmianis nu**

<sup>3</sup>Iisha atumin Yus áujtakur ii Uuntri Jesukristu Apari Yus ashí tsawant yúminkiaji. <sup>4</sup>Atumsha Jesukristu ti shiir enentáimtamusha tura ashí Yus-shuar aneamusha antukji. <sup>5</sup>Uwempratin chicham nekasa nu antukrum atumsha nayaimpiniam atumnian Yus ti shiir ikiusman wáinkiatái tusarum nákarne. <sup>6</sup>Nu chicham ashí nunkanam pampaakui shuara enentáin nereá áinis nusháa ajasar yamaikía péñker túrin áiniawai. Núnisan atumíncha túrunaiti. Yus ti nekas anenkartiniaiti tu etserkamu ántakrumin nu chicham atumí enentáincha nerekmiaiyi. <sup>7</sup>Nu chichaman Épapras ujatmakmarme. Niisha iijjai métek takasu asantai ti aneamuiti. Atumniasha Kristu takatrin ti shiir takartamsaiti. <sup>8</sup>Niisha átum Yus-shuar asarum mai anenai ajamun ujatmakmaji.

<sup>9</sup>Iisha nu antukar Yus ashí tsawant áujtajrume. Yus ni wakeramun ti paant nekaprutmawarat tusar seaji. Ashí Yús-nan ni enentáimtaiijjai ashí Níiniun paant nekaatniun Yus jintintramat tusar

seaji. <sup>10</sup>Atumsha Krístunu ainia núnisrum péñker túrutak tusar seaji. Tura ashí ni wakerana nu umiákrum ashí péñker ana nu, nerektinia áintsarmek, túrat-tarme. Núnis túrarum Yus unuimiatki wéakrum Nin ti péñker nekaak tusar seaji. <sup>11</sup>Yus ti kakaram asa ikiantamprat tusar seaji. Nujai ashí itiurchat ákuisha páchitsuk ti shiir warasrum kat-suntrattarme. <sup>12</sup>Yus ni shuarin tsáapninia nuí ashí péñkeran susattawai. Tura incha nuí pachiinkiatniun tsankatramka asakrin Yus Apa yuminsamniaitrum. <sup>13</sup>Yus iwianchin nupetak íwianch akupeana nú kiritniunmaya uwentikramar ni aneamu Uchiri akupeana nuí wearmakmaji. <sup>14</sup>Ni Uchiri krísnum jaka ii tunaarín nijjar tsankurtamar uwentikrampramaji.

**Kristu jakamujai Yusjai  
nawamnaikiar shiir pujustin**

<sup>15</sup>Yus wáinkiachminiaiat ni Uchiri akiiniamai tura ayashimkiamiaiyi. Túmaitiat ashí najanamua nuna yaunchu pujú asa ashí akupniuiti. <sup>16</sup>Niijjai Yus ashí nayaimpiniam írunna nunasha nunká írunna nunasha, ashí wáiniaj nunasha núnisan wáintsuj nunasha mashi najanamiyai. Nu arantcha ashí akupin ju nunkanam írunna nusha, nayaimpiniam írunna nusha, iwianchnium írunna nusha, ashí Niijjai najanamu áiniak Nin umirkarti tusa najanamu áiniawai. <sup>17</sup>Ashí najanamua nuna yaunchu, Krístuka tuke pjuwiti. Ashí najanamu írunna nuna emestsuk wáinniuiti. <sup>18</sup>Ashí Yus-shuar métekrak chikichik ayashtinia áinis enentáimkiumka nuna muuke Krístuiti. Tura nu ayashín ni iwiaakmarijjai iwiaaku átinian súsaiti. Niisha ashí jakamunmaya nantakniujai imiá nankaamantuiti. Nújainkia ashí enentáimpramnia írunna nunasha akupniuiti. <sup>19</sup>Yus ashí takamtsuk

Kristuj shiir pujumiayi. <sup>20</sup>Núnisan Yus Kristu krúsnum jakamujai ashí nayaimpinmasha tura ju nunkanmasha írúnna nuna Niijjai nawamnaikiar shiir pujusarat tusa wakerukmiayi.

<sup>21-22</sup>Atumsha nuik tunáa túrin asarum atumí enentáin Yusa nemasri ámarne. Tuma asarum yajá wekaimiarme. Antsu Kristu, aentsu ayashín ayashimiak, krúsnum wáitias jakamujai ii tunaari asakármatai yamaikia Yusjai nawamnaikiar shiir pujaji. Nujai Kristu in péñker ajasuncha tunaan máatrachmancha tura sumamachuncha Yúsai ejetamtatji. <sup>23</sup>Tuma asamtai Jesukristu shiir enentáimtusrum kakaram ajasrum katsuartiniaitrum. Tura uwempratin chicham antukuitrum nuyá kanakchatniuitrume. Ju uwempratin chichaman ashí nunkanam etsernakuiti. Wisha, Papru asan, etserkatniun yaimjai.

### **Papru ashí Yus-shuaran yáinkratniuiti**

<sup>24</sup>Atumin wáitiaknasha ti shiir waraajai. Kristu ni shuarin nekas péñker awajsat tusa wáitiana nuí pachiinkia asan waraajai. Ashí Yus-shuar Kristu ayashí áintsan áiniakui Yus-shuaran yáintajtsan ayashrujai wáitiakun shiir enentáimjai. <sup>25</sup>Atumin yáinikiai tusa Yus akatur Yus-Chichaman takamtsuk ujakai tusa akuptukmai. Nuna takaakun ashí Yus-shuara yáinrintjai. <sup>26</sup>Yámankamtaiknumiá nekaachman Yus yamaikia ni shuarin paant awajsaiti. Nu chichamnasha ujakarai tusa winia akatar akuptukuiti. <sup>27</sup>Nu chichamsha júiti: Kristu atumí enentáin pujak Niijjai métek ti shíiram awajtamsattawai. Nu imiá shiir chichamnum Israer-shuarchasha pachiniainian Yus ashí ni shuarí nekawaarat tusa wakerimiayi.

<sup>28</sup>Iisha Kristu étsereaji. Túrar ashí enentáimtikrar péñker nekaawarat tusar

jintintiainiai. Nujai Krístujai tsaninikar ashí péñker tsakarartatui. <sup>29</sup>Tuma asamtai Kristu ni kakarmarin tí surakui nekas kakaram takaajai.

**2**Yáintaj tusan ti takaajai. Tura atumíncha, Rautiséanmayá shuarnasha, tura ashí winia waitcha ainia nunasha yáintaj tusan ti takaitjai. <sup>2</sup>Ashí shiir enentáimtikratniun ti takaajai. Núnisan aneniarum chikichik enentáijjai métekrak wekasatarum tusan wakerajrume. Nu arantcha, ashí Yusna ti péñker nekaarum tuke katsuaruk tusan takaajai. Nujai Kristu ti péñker nekaattarme. Tura yaunchu nekaachman Yus yamá paant awajsaiti. Nuka Krístuiti. Tura Nii nekaatin nekas shíiraiti. <sup>3</sup>Tura kakaram ajasam Kristu péñker nekaam ashí shiir enentáimpramnia nusha tura ashí Yusna nekaamnia nusha nekaattarme. <sup>4</sup>Atumin chíkich shuar niisháa chichamjai shiir chichartamas anankramawarain tusan nuna tájarne. <sup>5</sup>Wi nuí atumjai pujachkuncha nuí pujajna áintsanak enentáimtajrume. Tuma asan átum métek enentáimprarum tura kakaram ajasrum Kristu nekas enentáimturumena nuna ísnaka shiir enentáimjai. <sup>6-7</sup>Nu asamtai átum ii Uuntrí Jesukristu nekas enentáimtusrum Yus-shuar ajasmarmena núnisrum yamaisha Nii nekas enentáimtusrum Niijjai tsaninikrum ashí túratarum. Nu túrakrum Nii enentáimtakrum tuke tsakaki wétatrum. Tura te tariara wajasrum Yusjai kanakchattarme. Yus-Chicham núnisan etsernakmatai nekamarne. Tuma asarum Yus tuke yuminsarum, núnisan péñker wekasatarum.



### Kristujaj yamaram iwiaakma takakji

<sup>8</sup> Aneartarum atumsha. Shuar aentsti enentáimmiajain ashí ju nunkanmayan enentáimprar tura Kristun enentáimtutsuk niisháa chichaman áujtamainiak nekaschajaj anankramataj tusa wakerutmainiawai.

<sup>9</sup> Kristunam Yus ashí takamtsuk pujuwiti. <sup>10</sup> Túmakui atumsha Kristujaj tsaninkiu asarum ni iwiaakmarj takamtsuk takakuitrume. Kristusha ashí akupniun akupniuiti. Áentsnumsha iwianchniumsha tura nayaimpinmasha ashí akupin írunna nuna akupniuiti.

<sup>11</sup> Nu arant átum ayashnium tsupir-natskesha Kristu shuarj ajasakrumin ashí ayash wakeramun, tsupirkatniua áintsan, Kristu ajapamiayi. <sup>12</sup> Tura atumsha Yus ni kakarmarjijaj Kristu jakan iniantkimia nu enentáimtusrum imianmiarme. Túrarum Kristujaj métek iwiarnasmarme. Tura núnisrumek Kristujaj métek nantakmiarme. <sup>13</sup> Nuikkia átumsha tsupirnatuk atumí tunaarij tuke akui atumí wakanin jákauyarme. Tura yamaikia Jesukristujaj tsaninkiu asakrumin Yuska atumí tunaarij tsankur yamaram iwiaakman suramsaitrume. <sup>14</sup> Tura ashí ii tumashrin sumantikramatin amia nuna japoruiti. Kristu krúsnum jakamta ashí akupkamujaj sumantikramamun tsankurtampramijaj. <sup>15</sup> Núnisan Kristu krúsnum jaka, iwianchnium ashí akupin ainia nuna nupetak ashí fimiainain iniatsararmiayi.

### Nayaimpiniam írunna nu enentáimtustarum

<sup>16</sup> Akupkamunmayaj Yus ankant awajtamsamtaí chíkich shuar ame túramujaj yajauch enentáimturmarain. Yúamna nujaj, úmamna nujaj, uwitincha, nantutincha, tura tsawantincha namper-mam nujaj chíkich shuar yajauch áu-

jmatramkuisha ¿warí urukatin? <sup>17</sup> Nu nampernum Israer-shuar Kristu túrat-tana nuna nakumainiak túrin ármiai. Tura Kristu taa imia Ninkí pujá samtai nakumkamuka ántraiti. <sup>18</sup> Tura shuar “Péejchach ajasam Yus áujtsuk aya Yusa suntarij shiir awajatsniuiti” túramkuinkia anturkairap. Nu shuar mesekranam wáinkiamun áujmatenak ántar nankaamantu enentáimtumaini-awai. Aya aentsti enentáimian chichaini-awai. <sup>19</sup> Tuma ásar Kristujaj tsaninkiar wekainiatsui. Kristu ashí akupin asa ni shuarin Yúsnan jintintiá shiir tsakarar tusa péñker wáiniui. Nu arantcha ashí ápateak Yus wakerana áintsan chikichik awajeawai.

<sup>20</sup> Atumsha Kristujaj jaka asarum aya aentsti enentáimtai ikiukniuitrume. Nuikia ¿urukamtaí ju nunkanmayaj ana nu tuke páchiarum? Nii tuinia nu umirkashtiniaiti. <sup>21</sup> “Ju antinchatniuiti, tuiniawai. Ju yúashtiniaiti. Tura ju achikchatniuiti” tuiniawai. <sup>22</sup> Nusha ¿warí, takasam amuukashtatuak? Kame áyatik aents akupkamu áiniawai. <sup>23</sup> Shuar nu akupkamu umiiniak Yúsnan ti nékaitjai tura Yus shiir enentáimturui tu enentáimtumainiawai. Nu arantcha péejchach ajasan winia ayashrun ti asutiájaj tu enentáimtumainiawai. Túrasha ayash wakeramunka nupeteatsui.

**3** Nuikia Kristujaj nantakin asarum nayaimpinmayaj írunna nu wakeruk-tarum. Nu Kristu pujawai Yusa untsu-urini. <sup>2</sup> Ju nunkanam ana nu enentáimt-suk aya nayaimpinmayaj ana nu enen-táimtustarum. <sup>3</sup> Atumsha Kristujaj tsan-inkrum jakamarme. Tuma asarum Kri-stujaj tsaninkrum Yusjaj iwiaaku pu-jarme. <sup>4</sup> Kristukete ii iwiaakmarj. Nii nayaimpinmayaj wantinkuisha atumsha Nijijaj métek wantinkiattarme. Tura Ni-ijijaj métek ti penker átatrume.

### Yaunchu iwiaakmasha tura yamaram iwiaakmasha

<sup>5</sup>Tuma asamtai ju nunkanmaya ana nu ajakratniua áintsarum iniaisatarum. Tسانirmatniusha, tunáa wakeruktincha, tura takakna nujai nankaamas wakeruktincha ántar-yus tikishmatratniua áintsarum iniaisatarum. <sup>6</sup>Shuar Yúsán umirtsuk aya nuna túrin ásarmatai Yus nin kakerak ti asutiáttawai. <sup>7</sup>Atumsha núnisrumek túrinuiyarme. <sup>8</sup>Tura yamaikia jusha iniaisatarum: kajektincha, yajauch wakeruktincha, yajauch túratniusha, katsekmaktincha, yajauch chicham chichastincha, mash iniaisatarum. <sup>9</sup>Yus-shuar ajasrum yaunchu enentáimtairam iniaisamarme. Tura yaunchu túrutairmesha iniaisaitrume. Tuma asarum nuamtak tsanumprunairairap tura wáitruawairap. <sup>10</sup>Yaunchu enentai, pushí mamuru áiktinia áintsarum, iniaisaitrume. Núnisrum yamaram enentái, shiir pushí entsartinia áintsarmek, wekasaitrume. Tura Yus nu yamaram enentáin najana asa ashí tsawant pujurtawai nuna nankaamas Nijijai métek shiir atí tusa. Túramtai Yus ti penker nekaki wéaji. <sup>11</sup>Krístuka ashí írúnna nujai nankaamas ashiyaiti. Niiniun pujurui. Tuma asamtai ashí ni shuari enentáin pujá asamtai nusháa enentáimtunairchatin áiniawai. Kriaku-shuarsha tura Israer-shuarsha, tsupirnakusha tura tsupirnakchasha, apachcha tura yajaya shuarsha, takarin ainia nusha tura ankant ainia nusha, Kristu ashí ni enentáin pujakui nusháa enentáimtunairchatniuiti.

<sup>12</sup>Yus atumin anenmak Niiniu arti tusa achirmakmarme. Túrutma asamtai jujai shiir iwiamampratniua áintsarum tuke túrin atarum: waitnenkartin, shiir awajkartin,

péejchach átin, émtin áchatin, tura katsuntin átin. <sup>13</sup>Kristu atumí tunaarin tsankuramia núnisrumek nuamtak tsankúrnáiratarum. Chíkich yajauch awajtamkuisha shiir katsuntram yapajniaitsuk tsankúrnáiratarum. <sup>14</sup>Tura ashí nankaamas anenaitiarum. Túrakrumka chikichik ajasrum mash pénker túrattarme. <sup>15</sup>Kame chikichik ayashtinia áintsarum ajastarum tusa Yus ni shuari ajasat tusa achirmakmarme. Tuma asamtai Yusa shiiri atumí enentáin pujurtamsati. Nujai Yus yuminsatarum.

<sup>16</sup>Kristu shiir chichame atumí enentáin piakti. Nekas naka enentáimprarum jintinniaiyarum mai ikiakánai ajatarum. Yus kanta kantamarum tuke enentáijjai Yus yuminsarum shiir awajsatarum. <sup>17</sup>Tura takaakmesha, chichaakmesha, kame ashí túramna nuka Jesukrístu shiir awajsataj tusam ni kakarmar-ijjain túrata. Túrakum Krístujai Yus Apa yuminsata.

### Yus-shuar túratniua nu

<sup>18</sup>Nuwatiram, atumí aishri umirkatarum Uunt Yus nuna wakerakui. <sup>19</sup>Áishmantiram, atumí nuwé aneatarum. Atumí nuwejai kajernaikiairap. <sup>20</sup>Uchitiram, ame apa nukusha tuke umirkatarum. Nu túrakrum Yus shiir enentáimtiksat-tarme. <sup>21</sup>Uchirtintiram, atumí uchiri ti kakantrairap. Ti kakanteamka uchisha ti kuntuts pujus pénker wekasatniun nakitchanpiash. Nu túrunawain tusarum ántarum atumí uchiri kakantrairap. <sup>22</sup>Takarniutiram, atumí uuntri shiir umirkatarum. Ju nunkanmaya uuntri ain aya nii iimkiui shiir enentáimturati tusarum takaschatniuitrume. Antsu Yus enentáimtakrum tuke pénker takastiniaitrume. <sup>23</sup>Ashí túramna nu asump enentáijjai takakmasta. Aya aentsuk yáintinia áintsachu

antsu nayaimpinmaya Úuntrum yaya áitkiasrum takastarum. <sup>24</sup>Ame Úuntrum Kristu asa nayaimpiniam ashí shiir takustinian tsan̄katramkattawai. <sup>25</sup>Antsu tunáa túrin ni yajauch túramujai métek akinkíáttawai. Yus ashí áentsun métek iyawai.

**4** Úuntirmesha, atumí Uuntri atu-min wáiniuk nayaimpiniam pujat-suk. Tuma asamtai atumí yáinma jiatsuk péñker iniertiniaitrum.

<sup>2</sup>Yus áujkuram Nii yuminsarum asummiarum iniaitsuk áujstarum.

<sup>3</sup>Incha Yus áujtustarum. Kristu-chicham yaunchu nekaachman yamáí étserkun sepunam pujajai. Tuma asamtai nuna shiir an̄kant etserkat tusarum áujtursatarum. <sup>4</sup>Tura wi paant etserkatniuitaj núnisan etserkat tusarum áujtursatarum.

<sup>5</sup>Yus-shuarhajai shiir túratarum Yus-Chichaman yajauch enentáimturarain̄. Kakaram ajasrum tsawant ántrorum inian̄kasairap. <sup>6</sup>Ti shiir chichamtin átini-aitrume tura anturújamin átini-aitrume. Núnisrum chíkich chíkich Yus-chicham paant ujaktin nekaattarme.

### Amikmaamu

<sup>7</sup>Ii aneamu yachi Tíkikiu ashí wínian ujamtatrume. Niisha wíjjai métek Yúsnan pimpitsuk ti péñker takasuiti.

<sup>8</sup>Nu asamtai ii jui pujajnia nuna ujamak ikiantamprarat tusan akuptajrume.

<sup>9</sup>Núnisan̄ ii aneamu yachi Unisemu ni-ijjai winiawai. Niisha atum wééaiti, tura Yusjai shiir wekaawai. Nu shuar ashí jui túrunamun ujamtatrume.

<sup>10</sup>Aristarku wi sepunam tsan̄inkia pujamur amikmaatmarme. Núnisan̄ Markus, Pirnapí kaná yachia nu, amikmaatmawai. Niisha nui jeamtai antukmarum núnisrum péñker wáinkiatarum. <sup>11</sup>Justu Jesus náartin amikmaatmarme. Júchik áiniawai Rúmanmaya Israer-shuar winia Yúsnan etserkatin atutkaru ainia nu. Túmainiak ti shiir ayantikruiniawai. <sup>12</sup>Épaprassha, atum weeá, Krístunun etserin asa atumin amikmaatmarme. Niisha ashí tsawant Yúsán áujeak Yusjai kakaarum tuke shiir Yus wakera nu túrak tusa seatramprume. <sup>13</sup>Wisha Épapras atumin ti enentáimturman nékajai. Núnisan̄ Rautiséanmaya shuarnasha tura Iarapurisnumia shuarnasha ti páchiniawai. <sup>14</sup>Rukas, aneamu tsuákratin, núnisan̄ Témassha amikmaatmarme.

<sup>15</sup>Tura Rautiséanam pujuinia nú Yus-shuarsha amikmaatruatarum. Núnisan̄ Nímpiassha tura ni jeen irunainia nú Yus-shuarsha amikmaatruatarum. <sup>16</sup>Átum ju papí áujsarum umikrum Rautiséanmasha nuyá Yus-shuar áujserti tusarum akupkatarum. Tura atumsha núnisan̄ Rautiséanmaya papí támatai atumsha áujstarum. <sup>17</sup>Tura ju Arkipiu titiarum: “Ii Uuntri Jesus ni takatrin̄ suramsa nu péñker umikta” tawai, titiarum.

<sup>18</sup>Wi, Papru, winia uwejujai júchiniak áatkun amikmaajrume. Sepunam pujajna ju enentáimturatarum. Yus shiir yainmakarti.

Nuke atí.

*Papru*

**TISARÚNIKIANMAYA SHUARAN**

*Emka papín aar akuptukma*

**Papru ni tsaniakmarijjai  
Yus-shuaran áatramiania nu**

**1** Wikia Pápruitjai. Wisha Serpanujai tura Timiutéujai Tisarúnikianmaya Yus-shuar ajasuitrumna nuna áatjarne. Atumsha Yus-shuar asarum Apa Yús-naitrume, tura Uunt Jesukrístunuitrume. Ii Apari Yus, tura ii Uuntri Jesukrístu waitnentrana ásarmatai, ti shiir imiatk-inchanum pujustarum, tu wakerajrume.

**Tisarúnikianmaya shuar Yus nekas  
enentáimtusar umirkatniun  
jintintiarmaniania nu**

<sup>2</sup>Iisha Yus áujkurkia atumniasha tuke enentáimtusar Yus shiir yuminsaji. <sup>3</sup>Atumsha Yus nekas enentáimtakrum umirkarumna nu nékaji. Núnisrumek, Yus aneakrum takaarme. Tura Jesukrístu tatí tusarum tuke tsawant nákarne. Nu neka asar, ii Apari Yus áujkur, nusha ashí enentáimsar áujtajrume. <sup>4</sup>Yatsurú, Yus anenmarme. Anenma asa Winia arti tusa achirmakurmena nusha nékaji. <sup>5</sup>Enentáimpratarum. Iisha Yúsai Uwempratin Chicham atumin ujakmajnia nusha aya chíchamjain tíchamji. Antsu nú arant, nu chicham nekasaiti tusar Yusa Wakani kakarmarijjai tímiaji. Tura átum pénger matsamsarat tusar atumjai pujusar shiir iruntrar wekasarmiaji. Nusha paant nékarne.

<sup>6</sup>Atumsha yamaikia íksarmek ii túramiaj nu, tura ii Uuntri Jesukrístu túramia nu túrarme. Itiurchat ain Yus-Chicham umikiurme. Tura wáitiayatrume Yusa Wakani shiir

enentáimtikramkui warasrum pujarme. <sup>7</sup>Nu túrakrum ashí Masetúnia tura Akaya nunkanmaya Yus-shuarsha shiir wekasatin jintintiarne. <sup>8</sup>Tuma asarum Uunt Yusa chichame ti ipiamparurme. Tuma asamtai Masetúnia tura Akaya nunkanmaya shuar nuna nékainiawai. Tura nú nankaamas Yus nekas umirkarmena nuna ashí aents nékainiawai. Nuna nékainia ásar ii étserman atumainiatsui. <sup>9</sup>Antsu átum in pénger itiaamun nii íksan ujatmainiaji. Tura nuyasha ántar-yus enentáimtustin iniaisarum nekas iwiaaku Yus nekas enentáimtusrum umirkarumna nunasha ujatmainiaji. <sup>10</sup>Tura nuyasha Yusa Uchiri Jesus jakamunmayan Yus iniantkimia nu, nayaimpinimaya tatí tusarum átum nákamuncha ujatmainiaji. Iis, Jesus Nínkiti Yusa kajétairi tsawantri jeattana nuyá uwemtikrampratin.

**Yus-chichaman paant  
ujakarmiania nu**

**2** Atumsha nékarne, yatsurú, iisha ántrar atumín jeachmaji. <sup>2</sup>Antsu itiurchat wáinkiaitiatar arantutsuk shiir Uwempratin Chichaman ujakmajrume. Iis, nuik Jiripius péprunam incha katsekramkarmiaji. Tura nú arant, ti itiurchat wáinkiamiajai. Túmaitiatan Yus yáintkiui Yusa chichamen ujakmajrume. Nuka atumsha ti pénger nékarne. <sup>3</sup>Wari, iisha Yus-Chicham atumin ujakmiaj nu nekasauyi. Tura yajauch enentáimsan, anankatjarum tusan tíchamjarne. <sup>4</sup>Antsu Yus in pénger enentaimturmas Uwempratin Chicham etserkatarum tusa akatrampramajai. Tuma asamtai núnisrik étsereaji. Túrasha aya aents waramtiksatatí tusar étsertsuji. Antsu Nínki Yúsak ii enentáin nekartamin asamtai, shiir enentáimtiksatatí sar túraji. <sup>5</sup>Átumka nékarne, péngesha

shíirmach chichasan anankachjarme. Nuyasha, kuit achiktai tusar ánrar chichaschamji. Núnaka Yus nékawai. <sup>6</sup>Iisha Kristu akatramurintji. Tuma asar ni kakarmarjijai akupkatin takakuji. Páchitsuk túramniauji. Túrasha waantu ajastaj tíchamji. Nuyá atumsha tura chikichcha in waantu awajtamsataj tákuisha iikia nakitmiaji. <sup>7</sup>Antsu uchi kuírchin ni nukurí péñker iis tsakatmana ántsarik iikia atumniaka shiir íismajrume. <sup>8</sup>Iisha ti shiir aneajrume. Tuma asar Yus-Chicham ujaktai tusar ti wakerukmaji. Tura aya ujakar iniaisatin wakerukchamji. Antsu ii jákatniuitkiursha iniaisachaaji, atumín ti anea asarí. <sup>9</sup>Yatsurú, ii atumaj nu sumarmaktai tusar kakaram takakmasmaj nu ¿kajinmatkintrumek? Atsá. Nékarne. Iis, Yus-Chicham étserkur, tsawajsha káshisha takasmiaji. Nusha, akirkata, tíj tusar takakmasmiaji.

<sup>10</sup>Yatsurú, atumjai pujumiaj nuí iisha Yus wakerana nu túrimiaji, tura yajauch túrutsuk shiir wekasamiaji. Nujai incha chikichkisha yajauch chichar-tamkatniusha atumiayi. Nuka atumsha nékarne tura nú arant Yus nékawai. <sup>11</sup>Tura atumniasha ankant ankant Yúsnum ikiakármajrumna nu nékarne. Tura uchin ni aparí átsankeana nútiksarik shiir enentáimtikramajrumna nusha nékarne. <sup>12</sup>Tura Yúsjai shiir wekasatarum tímiajrume. Yus nankaamas uunt asa ashí akupeawai. Tura Yus-shuaritrumna nuna, Winin pachiinkiarat tusa, Yus untsurmarne. Yus untsurma asamtai Níniuitrume. Niiniu asarum Yusa uchirja núnisrumek wekasatniuitrume.

<sup>13</sup>Yus-Chicham ii étserma antukrum, aya áentsnumianchaiti tímiarme. Yúsnumiáiti tímiarme. Nu tiniu asarum umirkamarne. Kame nekas tárume. Ii étserjinia nu nekas Yusa chichamente.

Átum nu chicham umirka asakrumin, atumí enentáin kakaram ajastinian amaawai, Yus-Chicham asa. Átum Yus-Chicham umirkaru asakrumin iisha tuke tsawant Yus yúminkiaji. <sup>14</sup>Yatsurú, ju nekaatarum. Aya atumek wáitiatsrume. Ashí Jutía nunkanam Israer-shuar, ni shuarinketiat, Yus-shuaran wáitkiascharmakia. Iis, Yus-shuaran Kristu Jesusan umirkaru ásarmatai wáitkiasarmiaji. Yamaikia atumniasha atumí shuarín wáitkiarmainiawai. Nujai Jutía nunkanmaya Yus-shuarjai métekrak ajasurme. <sup>15</sup>Niisha Israer-shuaraitatan Yus-Chichaman etserin armia nuna nuamtaketiat máawarmiaji. Tura nú weeák Uunt Jesusnasha máawarmiaji. Tura incha aa jiiiki akuptamkarmiaji. Maaj, niisha Yúsán shiir enentáimtikiainiatsui. Tura núnisan ashí áentsun kajerainiawai. <sup>16</sup>Warí, Israer-shuarcha Uwempratin Chicham ujaktaj tákurnisha niisha suritramainiaji. Nuna túruiniak yaunchu tunaan túriarmia nújainkia nankaamas yamaikia túrawarai. Pai, túrasha yamaikia Yusa kajetairi imiá tsuumaj ana nuí pujusarai.

### Papru ataksha Tisarúnikianam irautajtsa wakerimiania nu

<sup>17</sup>Iisha, yatsuru, ishichik tsawant atumiya kanakir jeachat pujayatrik, atum-jajsha wáinniaiyachiatrik tuke ii enentáinkia enentáimtimjarme. Tuma asar ataksha atumin iistai tusar ti wakerimji. <sup>18</sup>Nekas winitiaitsar wakerimji. Imia wíkisha winitniun ti nukap enentáim-samjai. Tura iwianchi uuntrí Satanás tuke nuna suritrammiaji. <sup>19-20</sup>Atumsha shiir wekasa asakrumin iisha ti shiir enentáimsar waraaji. Nu tuma asar Uunt Jesukristu tátintri shiir enentáim-sar nákaji. Nii támatai imiá warastatji. Atumin Yus-shuar awajsa asar, Nii tá-

matai atumsha iijjai Jesus shiir inki-untatji. Tuma asamtai nu enentáimsar tawasap achiktinia áintsar waraaji.

**3**<sup>1-2</sup>Iisha ataksha atumin íistaisar ti wakerimji. Tura tujintiakur iikia Atenas péprunam júakur ii yachi Timiutéu atumin íirmainiarat tusar akupkatai, timiaji. Iisha Kristui Uwempratin Chicham etsermiaj nuí, Timiutéuka iijjai métek takasuiti. Tuma asa niisha Yusa takatrin takáa asa atumniasha Yusaj kakartarum turamarti tusar akupkamji. <sup>3</sup>Tura nú arant, itiurchatan wáiniuk iniaisarain tusa ikiakátmararti tusar Timiutéu akupkamji. Yatsurú, átumka nékarme, ashí Yus-shuaraitjinia nuka páchitsuk wáitsatniuitji. Iis, tuma asamtai atumsha ti nekas itiurchatnum pujarme, Yus-Chicham umirka asarum. <sup>4</sup>Iimiatarum, atumjai nuik tuke pujumjinia nuí “iisha wáitsartatji” tíchamkajrum. Iis, túrunachaik. Nuka nékarme. <sup>5</sup>Tura atumin íwianch tunaanum ajunmarchariash tusan, wisha kúntuts enentáimsamijai. Tura ánrar takaschajish tu enentáimsamijai. Tuma asamtai nekaataj tusan ti wakerakun, wisha ti nukap tsawant nákaschamijai. Antsu wárik Timiutéun akupkamijai. Yúsjai péñkerash wekainia tusan, “nu inin-trusam ikiuuta” timiajai.

<sup>6</sup>Tura yamaikia Timiutéu Tisarúnikianmaja waketki tayi. Niisha taa, átum Yus aneakrum shiir enentáimtamuncha ujatmaji. Tura átum in anenma asarum tuke enentáimsar pujamuncha tura ii atumin íistaisar wakerajnia núnisrumek atumsha incha íirmaitiai tusarum wakeramuncha Timiutéu ujatmaji. <sup>7</sup>Tuma asamtai, yatsuru, ashí itiurchat tura wáitsatin wáiniatrik átum Yus shiir enentáimta asakrumin iisha shiir enentáimji. <sup>8</sup>Atumsha Yúsjai tariara weká asakrumin, shuar jaa péñker ajas enentái chinkiana áintsarik

enentáimji. <sup>9</sup>Yus péñker umirka asakrumin, iisha shiir waraaji. Warasu asar ii Yusri ti yúmiñkijai. <sup>10</sup>Incha Yus akuptamkurninkia atumiin tímiajaik jeartiai tusar wakeraji. Túrar Yusna nekaatin mash nékatsrum nu jintintiatai tusar tuke ti seaji.

<sup>11</sup>Atumiin weri íistinian ii Apari Yussha tura ii Uuntri Jesukrístusha in yáinmaktai tusar wakeraji. <sup>12</sup>Atumin ii aneajnia núnisañ Yus atumniasha mai anenai ajatniun tura chikichcha aneastianian enentáimtikrampartí. Tura nú nukap anenkrattain Yus amasartí tusar wakeraji. <sup>13</sup>Yus ikiakátmakui átum tunáa túrutsuk Yus umirkarum wekasatarum tusar ii Apari Yus seaji. Ii Uuntri Jesus Níiniurijjai winiak péñker wekaarmin tati tusar taji.

#### Péñker túratniun Yus wakerana nu

**4** Iikia Uunt Jesus akupkamuitji. Tuma asar nu kakarmajai atumniasha ju túratarum tusan akupeajrume. Atumsha iwiaaku pujarmena nuí Yus shiir waramtiksataram tura tuke péñker túrukum wetarum tusar seajrume. Iisha nuik atumin unuiniarmajrumna nútiksarmek túratarum. <sup>2</sup>Uunt Jesusa akupeamurijjai tura nu kakarmajai atumniasha nuik unuiniarmajrumna nu átumka nékarme. <sup>3</sup>Atumin Yus wakerutmarmena nu júiti: “Shuar aya Winin sumama pujusat tusan chikichkinkesha shuar tsanirmaashti”. <sup>4-5</sup>Yus-shuarcha ainia nu, Yúsan nékainiachu ásar, aya nínki enentáimtumasar aya ni ayashi wakeramunak umiktinian wakeruiniak nuwan enentáimtuiniawai. Atumsha núnisrumek túrawairap. Antsu atumsha atumí nuari péñker enentáimtusrum shiir aneasrum ayastarum. <sup>6</sup>Nú arant, amesha ame yatsum anankam ni nuari yajauch awajtusaip. Nu túrakrumninkia ii tímiajrumna nútiksañ Uunt Yus ti

kakaram asutiámawartatui. <sup>7</sup>Warí, Yus incha péñkercha yajauch túratarum turamchaitji. Antsu aya péñkerak túratarum turamji. <sup>8</sup>Tuma asamtai shuar ju chichaman nakitiakka áentsun nakitiatsui, antsu Yúsan nakitrait. Tura nu Yussha ni Wakanin amaawiti tunaan túrashtianian.

<sup>9</sup>Tura yamaikia nuamtak Yus-shuar aneniastin ana nuna ti neka asakrumin áatrashtatjarme. Warí, imia Niñki Yus atumin mai anenai ajatniun jintinramawarmatai nékarme. <sup>10</sup>Iis nútiksarmek aneniatsrumek ashí Masetúnianam matsatainia nujai. Túrassha, yatsuru, atumí anenkrattairi nú nukap ajasti tusan, seajrume. <sup>11</sup>Yamaikia tímiaj nútiksarmek, yayauchin túruinia nuí wekatsuk, chíkich shuarna pachittsuk, atumí takatriin shiir ankant pujusrum atumí uwejejin takakmá pujutarum. <sup>12</sup>Átum táasairum tusan tájarme. Túrakrumninkia atumniasha chíkich shuar péñker enentáimturmasartatui.

### Kristu tátintri

<sup>13</sup>Yatsuru, Yus-shuarcha ni shuari jakamtai “ataikka wáinkiashtatjai” tusa ti kuntuts enentáimainiawai. Tuma asamtai atumsha nútiksarmek kúntuts enentáimsairum tusan juna tájarme. Jákaru ainia nu urukawartinkit paant nekaatarum. <sup>14</sup>Jesus jákayat nantakchamkia. Núnisan Yus Jesusan iniantkin Nin umirkar jákaru áiniana nunasha iniantkittiawai. Paant nékaji nusha. <sup>15</sup>Tuma asamtai Yus-Chicham nekaprutamnia nuna atumniasha jintintiajrume. Iisha tuke iwiaaku pujarin Kristu táakuisha jákaru ainia nuka ikiuakur émkishtatji. <sup>16</sup>Antsu Yus akupeakui, Yusa suntarí uuntri unsumkui tura Yusa kachurin umpuarmatai Uunt Jesukristu unsumuk Yus pujamunmaya tarattawai. Nuínkia

Kristunu ajasar jákaru áiniana nu iwiarsumunmaya nantakiartatui emka. <sup>17</sup>Tura nuyá iisha Yus-shuar tuke iwiaaku pujajnia nu Kristujai yuranminiam ajapén inkiunaikiartatji. Nuní ashí nayaimpiniam ii Uuntri Jesukristujai tuke iwiaaku pujusartatji. <sup>18</sup>Tuma asamtai ju shiir chicham atumin ujakjana kujai mai ikiakánai ajatarum.

**5** Túrassha, yatsuru, ni tátintri waritiñ tura warí tsawantai, nuka áatratin atsumatsrume. <sup>2</sup>Ni tátintri júnis átin nékarme. Kiritniunam kasá shuar kasamkataj tusa tátatna nu nekaachminiati. Núnisan nákatsuk pujuiniaj Uunt Kristu tsawantri jeattawai. <sup>3</sup>Ashí shuar “Pai, yamaikia ti nekas shiir péñker pujuiniaj” tu matsatainiaj, aya aneachma nunka mesertin tsawant jeattawai. Nuwá ajamtin aya aneachma jatema áintsan, nékachmanum átatui. Túmakui pisartin penké atsuttawai. <sup>4</sup>Túrassha, yatsuru, átumka ujakmaitrume. Nu tsawant atumsha aneara pujarmin jeattawai. Atumsha aneara pujá asakrumin kasá áintsan tarutrámashatui. <sup>5</sup>Enta, átumka tsáapninium wekáa asarum Yus-shuartirmeka nékaitrume. Iikia kiritniumianchuitji. <sup>6</sup>Nu tuma asar, chíkich uruka núnisrik, ii enentáin kanartinia núnisrik “Warí, winia itiurtawa” tíchami. Antsu naka enentáimsar anearmi. <sup>7</sup>Iis, kashi kanarchatniukait. Tura nampeena nu kashi nampeenawai. <sup>8</sup>Túrassha iikia shiir tsáapninium wekainiaj nuka naka enentáimprar tuke nampetsuk pujustiniaitji. Suntar ni nemasri anañkruawain tusa anear wekasatniuiti. Tura iisha núnisrik íwianch yajauch awajtamsaj tusar anearmi. Yus enentáimtusar aneetniuitji. Tura núnisrik iisha, ju nunkanmaya uwemprar Yúsaj tuke pujustatji, tu

enentáimprar wetái. <sup>9</sup>Páantchakait. “Jiniun wéchatniuitrume” Yus incha túramji. Antsu ii Uuntri Jesukristujai uwempratniun tsankatramkaitji. <sup>10</sup>Nijijai métekrak iwiaaku ami tusa Jesukristu in jarutramkamiaji. Nu tuma asamta iisha ii ayashijijai iwiaaku pujakrishha Nijijai iwiaakji, tura ii ayashijijai jáakrishha Nijijai tuke iwiaakji. <sup>11</sup>Tuma asamta shiir enentáimtiknaisarum núnisrumek, shiir enentáimtiknaisarum mai ikiakánai ajatarum.

### **Papru Yus-shuaran jintintiamiania nu**

<sup>12</sup>Yatsurú, juna seajrume. Atumjai pujuinia nú shuar Yúsnan takakmainiakui shiir enentáimtustarum. Jintinramuk chichartamainiakui umirkatarum. <sup>13</sup>Yúsnan takainia ásarmatai ti péñker enentáimtusrum aneestarum. Tura yajauch awajnaitsuk ti shiir nawamnaikiarum matsam-satarum. <sup>14</sup>Tura junasha seajrume, yatsuru. Takastinian nakitiana nusha chicharkatarum. Tura yaweena nusha ataksha enentáimtikrarum ikiakártarum. Kakarmachu ana nusha yáintarum. Tura ashí shuarjai kajetsuk katsuntrarum wekasatarum.

<sup>15</sup>Aneartarum, yatsuru. Chíkich yajauch túrutmamtaí amesha nútiksamek yapajkiaip. Antsu nuka túrutsuk átumka mai péñker awajnai ajatarum. Tura nú arant, ashí nunkanmasha ashí shuar-

sha nútiksarmek túratarum. <sup>16</sup>Tuke shiir warasrum pujustarum. <sup>17</sup>Tuke tsawant iniaitsuk Yus áujstarum. <sup>18</sup>Péñker pujakmesha, itiurchat pujakmesha ashí warí wáiniam nuisha Yus shiir yuminsa-tarum. Kristu Jesusai Yus-shuar ajasuti-ram nu túratniun Yus wakerawai.

<sup>19</sup>Ji ikiajniaktinia núnisan Yusa Wakaní enentáimin keana nuka tunaajai téenmamtikiarum ikiajniakairap.

<sup>20</sup>Yus jintintrar akupkamu asa péñker chichaman etserainia nu nakitairap.

<sup>21</sup>Ashí etserkamu ana nu nekasashit tusarum nekaatarum. Túrarum aya péñker ana nuke achiktarum. <sup>22</sup>Ashí yajauch ana nuyanka kanaktiarum.

<sup>23</sup>Yuska, imiatkinchanum wekasatin amaana nu, atumin takamsuk shiir awajtamsartí. Tura ii Uuntri Jesukristu táatsain, atumí wakaní atumí enentai tura atumí ayashisha mash métek tunaajainchu awajtamsati. <sup>24</sup>Yus atumin untsurmakmarumna nu tímianak umini-aiti. Nii tana nuna yawetsuk túrattawai.

### **Amuamunam amikmaatin**

<sup>25</sup>Ashí yatsurtiram winiasha Yus áuj-tursatarum. <sup>26</sup>Ashí Yus-shuar árum nu, amikmaaniatarum. <sup>27</sup>Winia Uuntru Jesukristu chichamejai juna tájarme. Ju papí ashí Yus-shuar antukartí tusarum ashí iruntramunam áujstarum. <sup>28</sup>Ii Uuntri Jesukristu atumin yáinmákartí. Nu atí.



## Papru

### TISARÚNIKIANMAYA SHUARAN

#### Ataksha papin aar akuptukma

#### Papru ni tsaniakmarijjai Yus-shuaran áatramiania nu

**1** Wikia Pápruitjai. Wisha Serpanujai tura Timiutéujai iruntran atumin Tisarúnikianmaya Yus-shuar árumna nuna ju papin áatjarme. Atumsha ii Apari Yusna tura Uunt Jesukristunu ajasuit-rume. <sup>2</sup>Tuma asakrumin ii Apari Yus tura ii Uuntri Jesukristusha waitnen-trama ásarmatai yáinmakar péñker awajtamsarat tusan wakerajrume.

#### Kristu támatái tunáa shuáran Yus asutiáttawai

<sup>3</sup>Yatsurú, átum péñker matsatu asakrumin iisha Yus tuke yúminkiaji. Átumka Yus nekas enentáimtustin nú núkap nekaakrum wéarme. Tura nuamtak aneniastincha nú núkap nékarme. Nu tuma asamtai Yus yuminsatniuitji. <sup>4</sup>Átum Yus-shuar asakrumin chíkich shuar atumin yajauch awajtamainiawai. Tura itiurchat wainiu asarum ti wáitjarme. Nu tuma ain átumka katsuntearme, tuke Yus enentáimta asarum. Nu tuma asakrumin, iisha Yus-shuar matsatainia nuka warasar ujainiaji. <sup>5</sup>“Yusa akupeamurin pachiinkiamniaitrumé” Yus túramprume. Nu pachiinkiatatj tau asarum ju nunkanam wáitjarme. Tura wáitiakrumsha nuna nankaamas iwiarnaruitrume nu pachiinkiatin. Kame nújainkia Yus atumin achirmak péñker túraití, nuka páántaití. <sup>6</sup>Núnisan atumin wáitkiarmainia nunasha Yus tímiatrusan wáitkiasartincha nekas péñkeraití. <sup>7</sup>Tura wáitiarmena nusha Yus ijjaisha ayamtikramprartin

péñkeraití. Ii Uuntri Jesukristu ji keana ímianisan kakaram suntarijjai nayaimpinmaya tara wantinkiamtai, nu tsawantai Yus ayampratniun suramsartatji. <sup>8</sup>Tura nú tsawantaisha Yúsan nékainiatsna núnaka ii Uuntri Jesukristu ti asutiáttajtsa tátatui. <sup>9</sup>Taa, nincha menkkatniunam akupkartatui. Chichaak “Wi pujajna juyá akupeajrume” títiatui. Tura winia ti kakarmar atsana nu akupeajrume, átum winia umirtukcha asakrumin” nin tiartatui. <sup>10</sup>Kame Uunt Jesukristu tátin tsawantri jeamtai, ni shuari, ni enentái péñker awajrsaru áinia nu, ni náarin shiir pachisartatui. Tura Yúsan umikiaru ásar, ti shiir enentáimsar Jesukristun fístartatui. Ii ujakmajrumna nu antukrum umirka asarum atumsha nu pachiinkiatarme. <sup>11</sup>Nu tuma asamtai ii Yusrin atumin tuke áujtajrume. Yus atumin achirmakuitrumé. Nuinkia Yuska atumí enentáin takas Nii wakera nujai métek awajtamsati, taji. Yus umirka asarum péñker wekasataj tusarum wakerarme. Túrarum Yus enentáimtusrum péñker túratin wakerarme. Tura wakerarmena nu umiktin Yuska ni kakarmarijjai yáintí, tu áujtaji. <sup>12</sup>Átum péñker wekasa asakrumin chíkich shuarsha ii Uuntri Jesukristu náarin nankaamantu enentáimtusartatui. Nusha auka ii Yusrí tura ii Uuntri Jesukristu waitnentáimturmasar péñker wekasatniun yáinmakui túrarme. Túramtai chíkich shuar shiir enentáimturmasartatui.

#### Tuke Tunaarintin wantinkiatana nu

**2** Tura, yatsuru, ii Uuntri Jesukristu tátatna nuna tura Niiijai inkiunaikattajinia nunasha ujaktinian wakerajrume. <sup>2</sup>Chíkich shuar anankramawar “Uunt Jesukristu tsawantri jeayi” tu ujatmaktaj

tusar wakeruiniawai. “Iimiarmaj nujaj nékajaj” turamainiakui sha, “chícham étserman antukmaj nujaj nékajaj” turamainiakui sha, tura “Papru papí áarmari nuna takui nékajaj” turamainiakui sha, páchim enentáimprairap. Tura sapijmiakairap tusan seajrume. <sup>3</sup>Penké anañawairap. Nekaatarum. Nu tsawant jeatsajin Yúsnumia kanaktin átatui. Tura nú arant, Tuke Tunaarintin, emesnartatna nu wantinkiatwawai. <sup>4</sup>Niisha aya wíniak enentáimtursarat tusa wakerak, ántar-yusnasha tura nekas Yúsasha shuar tikishmatrarajin tusa ti nakitrattawai. Niñki ti nankaamantu enentáimtumas, Yusa nuke ajas, Uunt Yusa Jeen wayáa pujustatui. “Júiti Yus” shuar turutiarat tusa mash túrittawai. <sup>5</sup>Yatsurtiram, wi atumjaj pujakun nuna ashí ujakmajrume. ¿Nuka kajinmakniurmek? <sup>6</sup>Yámaikikia, ni tsawantri jeatsajin, Tuke Tunaarintin wantinkiajin tusa surimia nu nékarme. <sup>7</sup>Tunaasha yamaisha awai, tura paantcha. Túrasha tunaan surimia nu juramkitniuk taasai nu tunaaka paant átin. <sup>8</sup>Nuñkia nu Tuke Tunaarintin wantinkiatwawai. Tura Uunt Jesus ni wenejaj umpuí aun máattawai. Tara ni wincharijaj nuna amuktatui. <sup>9</sup>Nu Tuke Tunaarintin, iwianchi uuntri Satanás akupkam tátatui. Ni kakarmari iniakmastaj tusa, aentsti túrachminian túrak anañkawartatui. <sup>10</sup>Jinium wémin ainia nú shuaran ashí tunáa ana nujaj anañkawartatui. Nu shuar Yus-Chichaman nekas ana núnaka nakitraru ásar uwemprachmin ániawai. <sup>11</sup>Iis, nekas ana nuna nakitia ásarmatai, ti anañmamawar wait-chichaman umirkarat tusa Yuska tsanekatwawai. <sup>12</sup>Warí, niisha ni tunaarín wararainiak, nekas ana nuna nakitraru ásarmatai, Yuska “jinium wétatrume” tiartatui nuna.

### Uwempramin ainia nu

<sup>13</sup>Tura, yatsuru, Uunt Jesus aneamu árumna nu, iisha atumin enentáimtusar ii Yusri yuminsaji. Átum nekas ana nuka umikiurme. Tuma asakrumina Yusa Wakaní atumí enentáin penker awajtamsaitrume. Nu tuma asantai yámankamtaikniumia Yuska “átum uwempramniaitrume” túramprume. <sup>14</sup>Nu túrunat tusa Yus wakerutmarme. Krístujaj Uwempratin Chicham ii ujakjina nujaj Yus unturmakmarme. Ii Uuntri Jesukrístu ti penker pujana nu pachiinkiamniuram tusan ujakmajrume, nú chichaman.

<sup>15</sup>Wátsek, yatsuru, Yusjaj katsuartarum. Yus-Chicham etserkamu antukurmena nu, tura wisha áaran akuptukjarmena nusha kajinmatkiirap. <sup>16</sup>Ii Uuntri Jesukrístusha tura ii Apari Yusha ti penker ásar incha anenmatsjik. Tura waitnentrama ásar incha shiir enentáimtikramji. Tura nú nankaamas ii tuke penker pujustinian ikiurtamsaitji. <sup>17</sup>Nu tuma asantai, penker chichastarum tusa, tura penker takastarum tusa Jesukrístuka shiir enentáimtikramar ikiakátmarartí.

### Papru “áujtursatarum” tímiania nu

**3** Nuyá, yatsurú, Yusa chichame shiir pampartí tusarum Yus áujtursatarum. Átum Yus-Chicham wakerukmarmena áintsan ashí nunkanam wakerukartí tusarum Yus seatarum. <sup>2</sup>Tura yajauch shuar, penker ana nuna ti nakitiainia nu, incha yajauch awajtamsachartí tusarum Yus áujkartustarum. Kame chíkich aents Yúsan umirkacharu ániawai. <sup>3</sup>Túrasha Uunt Jesusak atumin iniaitsuk wáitmarktatrume. Tura atumin ikiakátmartatrume. Tura iwianch anañkramataj takui kíishturmaktatrume. <sup>4</sup>Kame Yus

atumin yainmaktatrumē, taji. Ii tájnia nu yamáí umíarme. Tura tuke umirkattarme. Nusha nekaar shiir enentáimji. <sup>5</sup>Uunt Yus yainmakartí ni anenkrattairin nekaatniun. Kristu itiurchatan katsuntrama núnisan atumniasha katsuntratniun Yus yainmaktí.

### Takastiniaitji

<sup>6</sup>Yatsurtiram, antuktarum. Ii Uuntri Jesukrístu chichamejai ju taji: “Nuyá Yus-shuar wi jintinramun nakitiak aya wékana nu ikiuktiarum.” <sup>7-8</sup>Ii túrajnia núnisrumek túratin nékarme. Júiti: atumjai pujusmaj nuí tuke takakmasmiaji. Atumí yurumkarí iisha akikmakar yurummiaji. Atumjai itiurchat áchatí tusar tsawajisha káshisha tuke takakmasmiaji. <sup>9</sup>Kame iisha, Kristu akatramu asar “yáintkiatarum” tíminiuji; túrasha nu tútsuk, ii túrajnia núnisrumek túratin nekaatarum tusar, iisha tuke tsawant takaamiaji. <sup>10</sup>Warí, atumjai pujumiaj nuí “Takastinian nakitiana nuka yurumáshti” tíchamkají. <sup>11</sup>Iis, atumiinia

weeá, nánkamas enentáimiainiak tura nánkamas túruiniak penké takatsuk pujuiniawai, túramainiaji. <sup>12</sup>Nú shuáran ii Uuntri Jesukrístu chichamejai “Tákamtak shiir takakmasartí” taji.

<sup>13</sup>Yatsurtiram, yawetsuk shiir túratarum. <sup>14</sup>Ju papinium ii tájnia nuna, shuar umiktinian nakitiakuinkia “umichuiti” tákuram, ni natsarat tusarum ikiuktiarum. <sup>15</sup>Túrasha “Yus-shuara nemasrinti” tiip. Áyatik jintintrata, tura Yúsai enentáimtikrata, ame nekas yatsumeá áitkiasmek.

### Papru aujsua ikuiamu

<sup>16</sup>Uunt Yuska, imiatkichu enentái susamniaiti. Jú Yus, itiurchatnum pujarminin atumin tuke imiatkichu enentáimtikramsartí. Uunt Yuska atumin pujurtamsartí, taji.

<sup>17</sup>Ju wi Papru juna aajai. Wi papin akupeaj nuí júnisnak winia náarun áaran apujeajai, wíniaiti tusan. <sup>18</sup>Ii Uuntri Jesukrístu atumin ashí yainmakarat tusan wakerajrume. Nu atí.

## Papru

### TIMIUTÉUN

#### *Emka papin aar akuptukma*

**1** Wi Papru Jesukristu akatramurint-jai. In uwemtikkiartin Yussha tura ii Uuntri Jesukristusha winia akuptuku áiniawai. Jesukristujai métek ti shiir ajastai tusar nákJai. <sup>2</sup>Timiutéu, ju papin áateajme. Wi ujakam Yus-shuar ajasu asam nekas winia uchirua áinkiaitme. Tuma asakmin Yus Apasha tura ii Uuntri Jesukristusha ti anenma ásar waitnen-tramainiak imiatkinchanum ti shiir pu-justinian yainmakarti.

#### Wait chichamjai anearta

<sup>3</sup>Masetúnia nunkanam wéakun “Ipsiu péprunam pujuuta” timiaj núnisnak tá-jame. Shuar nuji wait-chichaman jintin ainia nu suritkiarta. <sup>4</sup>Niisha Israer-shuara weátrin áujmatsamunak tura ni weátri naari ti untsurí irurtinniak Yus-Chichamjai nankaamas enentáimtuini-awai. Nunak áujmatsar tuke ántar tuini-awai. Nu túramuka Yus enentáimtusar Nin shiir umirkatniun yáinmatsji. Tuma asamtai nusha surítkiatá.

<sup>5</sup>Yus-shuar tuke enentáijjai Yúsan shiir enentáimtusar tura tunáa túrutsuk aya péñkera nuna wakerukar anenkartin ajastin ániawai. Núnisan péñker ajasat tusar Yus-Chicham étseraeji. <sup>6</sup>Chkích shuar juna iniaisar ántar chichaman áuj-matainiawai. <sup>7</sup>Yúsnan nékachiat “jintin-niuitjai” tuiniawai. Tura unuiniainia nuna nékainiatsui.

<sup>8</sup>Yus wakeramun nekaatin tura tunaan suritkiatin akupkamuka nekas péñkeraiti. Nu paant nékaji. <sup>9</sup>Kame akupniuka péñker shuaran itit awajsat-niun akupenatsui. Antsu yajauch shuar juna túrin ainia nuna itit awajsatniun akupenawai: Tunáa shuarnasha,

umichuncha, Yúsnasha tura ashí Yúsnancha nakitiainia nunasha, aparín máinniasha, nukurín máinniasha, kame mankartinniasha, <sup>10</sup>nuwancha tura áishmannasha tsanirma ainia nunasha, shuaran kasamak juu ainia nunasha, wáitrinniasha, tsanumniuncha, ashí nuna itit awajsatniun akupenawai. Kame ashí péñkercha nuna iwiaratniun akupenawai. <sup>11</sup>Núnisan tawai ti shiir uwempratin chicham Yus suramsamajnia nu. Nu chichamnaka etserkatniun Yus péñker asa tsankatrukuiti.

#### Yus waitnenkartin asamtai Papru yumiñsamiayi

<sup>12</sup>Ii Uuntri Jesukristu shiir enentáimturu asa Níiniun etserturkat tusa kakarman surusuiti. Túruta asamtai yumiñkijai. <sup>13</sup>Wi Yúsan imiá yajauch chicharniuyajai. Yus-shuarnasha áintrarimijai. Yusnasha katsekniuyajai. Túrin ain Yus winia waitnen-trurmiayi. Kame Jesuska Yus Anaikiamun nékachu asan wi túramu yajauchiiti tu enentáimchauyajai. <sup>14</sup>Tura ii Uuntri Jesukristu ti nekas waitnen-trurmiayi. Tura Jesukristujai tsaninkia pujakuí Yus nekas enentáimtustinniasha tura anenkartin ajastinniasha surusuiti.

<sup>15</sup>Ju chicham ti nekasaiti. Tunáa shuáran uwemtikrataj tusa Jesukristu ju nunkanam taramiayi. Nunasha ashí shuar nekaatin ániawai. Tura wikia ashí shuarjai nankaamas tunáan túriniaitjai. <sup>16</sup>Ti tunáa ain Jesukristu ti anenkartin ana nu paant nekanati tusa Yus winia waitnen-trurmiayi Tuma asamtai chkích shuar, wijjai métek, Yúsan nekas enentáimtusar Niijjai tuke iwiaku pujusarta-tui. <sup>17</sup>Yus tuke jacha asa tuke iniaitsuk akupniuiti. Wáinchataitiat imiá nankaamas nékaiti. imia Niñki Yúsaiti. Tuma asamtai imia Niñki tuke iniaitsuk ti shiir awajsatniuiti. Núnisan tuke atí.

<sup>18</sup>Uchiru, Timiutéu, yáunchuya Yus-shuar ámin “Ju shuar péñkeran túrat-tawai” túramarmia nútiksam yamaikia kakaram ajástá. Nii timia enentáimsam suntara áintsam Yúsna kakaram takastin asumprurta. Nuna tájame. Tura Yus tuke nekas enentáimtusam tura tunaan túrawajj tusam anearam túrata. <sup>19</sup>Chí-kich shuar tunaajajj anearcharu ásar Yúsna ikiukiarmaj. <sup>20</sup>Iminíusha tura Arejántrusha núnisanj Yúsna ikiukiarmatai uunt iwianchnium surukarmajai. Nujajj Yúsna ti yajauch chicharsacharat tusan túraitjai.

### Yus áujsatin

**2** Wátsek, emka seajrume Yus áujeakum Yus yuminsam ashí shuar yainkiat tusam áujtusarta. <sup>2</sup>Imiatkinchanum pujusar Yusjajjisha tura áentsjajjisha shiir túratatj tusa ashí akupin ainia nusha péñker akupkarat tusa Yus áujtustiniatj. <sup>3</sup>Áitkiasar seatin péñker asamtai, uwemtikramajnia nú Yus wakerawai. <sup>4</sup>Ashí shuar nekas chichaman nekaawar uwemprarat tusa wakerawai Yus. <sup>5</sup>Aya chikichik Yus awai. Tura Jesukrístu aents ajas Yusjajj áentsun nawamnaitikiartiniatj. <sup>6</sup>Ashí shuara tunaarín akikmatkataj tusa jákatniunam Jesukrístu surumakmiayi. Tura tsawant jeamtai nu chicham ashí shuar-num etsernaktiniuyi. <sup>7</sup>Nuna túratniun Yus winia akatar akuptukuiti. Israer-shuarcha nekas chichaman enentáimtusarti tusa Yus akuptukmiayi. Krístunu asan wáitrusuk nekas tajai.

<sup>8</sup>Nu asamtai áishmanikka kajetsuk yajauch tunaitsuk antsu péñker enentáijjajj uweje takuiniar Yúsna áujstati. <sup>9-10</sup>Núnisanj núwaka iwiamamuk nekasmiancha péñker enentáijjajj entsartati. Chíkich shuar nu nuwan iis temashmarmaríncha, sháukríncha, kurimkiamuncha, iwiamampramuríncha núnaka

enentáimtutsuk antsu ni péñker túrunamun enentáimtusarti. Núnisanj áchatniukait nuwá Yús-shuar ainia nujajj. Ni péñker túramujajj nekas shiir awajmamsashtinkiait. <sup>11</sup>Núwaka takamtak pujusar umiiniak unuimiararti. <sup>12</sup>Nuwánka ashí iruntramun unuiniartinniasha tura ni áishrín akupkatniuncha suritijajj. Antsu takamtak pujustiniatj. <sup>13</sup>Yus emka áishmankan Atankan najanamiayi. Nuyá nuwan Épan najanamiayi. <sup>14</sup>Tura Yus timian umirkach Atanka anannachmiayi. Antsu Épa ananna asa tunaan túramiayi. <sup>15</sup>Túmaitiat jurertin asa, emesnartinniumiã uwempraiti. Tura Yúsna nekas enentáimtak anenkartiniatituk tura esetar enentáimiuk péñker wekasatniuiti.

### Yus-shuaran wáinin

**3** Shuar Yus-shuaran wáinkiatniun wakerakka péñker takatan achikiuiti. Nuka nekasaiti. <sup>2</sup>Tura Yus-shuaran wáinin ajastinian wakerakka chíkich shuar nin yajauch áujmattsachmin átiniaiti. Nuwá apatka áchatniuiti. Niisha péñker esetar enentáimin naka wekasatniuiti. Íraran ni jeen ti shiir itiaatniuiti. Péñker jintinkratin átiniaiti. <sup>3</sup>Nampechusha tura suiir enentáimtichusha átiniaiti. Aya kuítian ikiaunkatniun enentáimtuschatniuiti. Antsu tsanka átiniaiti. Kajechusha átiniaiti. Chikichnancha wakerutkashtiniatj. <sup>4</sup>Ni shuarín shiir akupeakui ni uchirísha umin tura shiir awajkartin ártiniatj. <sup>5</sup>Kame ni shuarín akupkachminiaitkiunka ¿itiurak Yus-shuaran wáinkiat? <sup>6</sup>Yus-shuaran wáinniuka yama Yus-shuar ajasu áchatniuiti. Túmaitkiunka ti nankaamantu enentáimtumak iwianchjajj métek tunaan túrak sumamattawai. <sup>7</sup>Yus-shuarchasha nin shiir enentáimtusatin áiniawai.

Núnischaitkiuinkia nin yajauch  
chicharainiakui íwianch wárik  
tunaanum ajuartatui.

### Yus-shuaran yain

<sup>8</sup>Núnisan Yus-shuaran yaincha  
pénker asamtai ashí shuar nin shiir  
enentáimtustin ániawai. Nii tana nuna  
tímatrusan umin átiniaiti. Nampechu  
átiniaiti. Aya kuítian ikiaunkatniun  
enentáimtuschatniuiti. <sup>9</sup>Yúsnan ti  
penker nekaatniuiti. Tura esetar  
enentáimsatniuiti. <sup>10</sup>Emka pénker  
ístiniaiti nuyá pénker wekaakka  
Yus-shuaran yain átiniaiti. <sup>11</sup>Nuwasha  
pénker asamtai ashí shuarsha nin  
shiir enentáimtustin ániawai.  
Tsanumniuchu antsu esetar enentáimiar  
nii chichaa ímatrusan umin átiniaiti.  
<sup>12</sup>Yus-shuaran yainkia nuwan  
apatkachu átiniaiti. Tura ni uchiríncha  
ni shuaríncha ashí shiir akupin átiniaiti.  
<sup>13</sup>Yus-shuaran yayak nekas pénker  
takaakka shiir enentáimtusmin asa  
páchitsuk Kristu Jesus enentáimtamun  
arantsuk etserkamniaiti.

### Yusna ana nu imiá nankaamas pénkeraiti

<sup>14-15</sup>Wárik ítniun wakerajme.  
Túmaitiatnak sétaknasha Yus-shuarjai  
takastin nekaak tusan juna áatjame.  
Ashí Yus-shuar, iwiaaku Yusna ainia  
nu, nekas chichaman tuke emetawar  
akasmatainiawai. <sup>16</sup>Maa, imiá  
nekasaiti, Yus iwiainturmakma ashí  
nankaamas ti penkeraiti. Tura júiti:  
Yuska aents ajas jú nunkanam paant  
wantinkiamiyai.  
Yus Wakancha “ti shiiraiti” Nin tímiyai.  
Yusa suntarisha Nin wáinkiarimiayi.  
Ashí nunkanam nu etsernakmiyai.  
Túramtai ashí nunkanmaya shuar  
umirkarmiayi.  
Tura nayaimpiniam waketkimiayi.

### Amuukatin tsawantin

**4** Yusa Wakani ti paant tawai,  
amuukatin tsawant jeakui untsurí  
aents Yus enentáimtustinian iniaisar  
antsu yajauch wakanin nemarsar  
íwianch jintíamun anturkartatui.  
<sup>2</sup>Yajauch shuaran anturkartatui.  
Nu shuar ni enentái narúa ánin  
ásar ni tunáa túramun penké  
enentáimtichu ániawai. Tuma asa shiir  
chichainiyatan wáitrin ániawai. <sup>3</sup>Nu  
shuar nuatnaikiatniun suritiainiawai.  
Núnisan chíkich chíkich yurumak  
yúatniuncha suritiainiawai. Warí,  
Yus ashí yurumkan najana asamtai  
Yus-shuar nekas chichaman nékainia  
ásar Yúsán yuminsar páchitsuk yuámin  
ániawai. <sup>4</sup>Ashí Yus najanamu pénker  
asamtai nakittsuk antsu Yusan yuminsar  
yúatniuiti. <sup>5</sup>Yus-Chicham tana  
nújajsha tura yuuniak Yúsán yuminkias  
áujsamujai ashí pénker ajasuiti.

### Jesukristu pénker takarín

<sup>6</sup>Wi tájamna nu chíkich Yus-shuar  
jintintiakmeke Jesukristu pénker  
takarín átatme. Tura ashí Yus-Chicham  
pénker jintíamu unuimiaru asam  
nujai kakaram ajastatme. <sup>7</sup>Ántar  
chichamsha tura netse chichamsha  
enentáimtutsuk nekas Yusna ana  
nu túratin kakaram ajasta. <sup>8</sup>Kame  
ayash kakaram awajsatniusha ishichik  
pénkeraiti. Antsu Yusna nu túratin  
kakaram ajastinkia imiá pénkeraiti.  
Yamá jü nunkanmasha yáinmaji  
tura ukunmasha Yusjai pujustin  
asakrin nankaamas pénkeraiti. <sup>9</sup>Nu  
imiá nekas asamtai ashí shuar nuna  
enentáimtustiniyai. <sup>10</sup>Nekas iwiaaku  
Yus ashí shuaran uwemtikramniaiti,  
tura ashí Nin enentáimtuinia nú shuaran  
nekas uwemtikratniuiti. Nu chicham  
imiá nekasaiti tu enentáimtakur  
katsekramainiakrincha kakaram takaaji.

<sup>11</sup>Nuka ashí ame jintiakum akupkatniuitme. <sup>12</sup>Ti úuntchaitkiumnisha nakitrampraraín. Antsu péñker túrakum Yus-shuar unuiniarta. Chichammijiaísha, túramurmijiaísha, anenkratmarmijiaísha, nekas Yus enentáimtamujiaísha, tura esetra enentáimsam Yusna péñker túramujiaísha níisha túrawarat tusam iniaktusarta. <sup>13</sup>Wi jeatsaín Yus-Chicham áujeakum shuar jintintiata. Túram Yus-shuar ikiqákararta. <sup>14</sup>Yus-shuara uuntri Yúsnan takastin anaitiamak uwején awantramsarmai. Nuna túramainiak “Ju shuar kakarman Yúsnamian takustatui” túramarmia nu, kakaram ajasam tímiatrusam túratá.

<sup>15</sup>Tuke enentáimjai wi tájamna nu enentáimtakmin ame péñker túruki wéamun nekaawartatui. <sup>16</sup>Túramna nusha tura unuiniamna nusha péñker wáinmamkata. Nu túratin pimpikiip. Nu túrakmeka uwemprattame amesha tura ujainiam nusha uwemtikrattame.

### Yus-shuarjai itiuur túratniuit

**5** Uunta nu kakantraip. Antsu nekas ame apa nútiksamek chicharkata. Nátsasha nekas ame yátsumea nútiksamek shiir awajsarta. <sup>2</sup>Nuwa úuntchisha nekas ame núkua nútiksamek shiir awajsarta. Nuwa nátsasha nekas ame umaimia nútiksam shiir enentáimjai péñker awajsarta.

<sup>3</sup>Waje nekas atsumin ainia nusha yáinkiararta. <sup>4</sup>Tura waje uchirtiniaitkiuinia tura tirankrinniuitkiuinia, nu shuar wajen wáinkiarati. Emka ni shuarin péñker wáinkiatniun unuimiarati. Ni aparí anemia núnis awantuiniak shiir wáinkiarati. Núnaka Yus ti shiir enentáimtawai. <sup>5</sup>Nekas waje níñki pujana nu Yúsan enentáimtak tsawáisha káshisha iniaitsuk Yúsan áujeawai. <sup>6</sup>Antsu aya wárastiniak wakera nuka iwiaakiat jaka áintsanqete.

<sup>7</sup>Tura wajenka ni shuari wáinkiarati. Yus-shuaran yajauch chicharnaktin atsutí tusam wi tájamna nu ashí Yus-shuar ujakarta. <sup>8</sup>Shuar ni jeen pujuinia nuna nekaska wáinkiatniuiti. Tura nuyá chíkich shuárnasha yáintiniaiti. Túrachkunka Yus tana nuna umíatsui, tura Yus-shuarcha nujai nankaamas yajauchiiti.

<sup>9</sup>Yusa kuítrijiai yáinniaiktiniaitkiunka waje sesenta (60) uwí nankaamas takustiniaiti. Tura chíkichik aishriniak takusu átiniaiti. <sup>10</sup>Ti paant péñker túrin átiniaiti. Ni uchirín péñker tsakatmaashit, íraran péñker táata tíniuashit, nekas-miancha enentáimtumar Yus-shuaran yáiniaashit, wáitiainia nuna waitnenni-uashit, tura chíkichnasha péñker túrini-aitkiunka maak.

<sup>11</sup>Tura sesenta (60) uwí takakchaka chíkich wajejai iruraip. Ni ayashí wakeramuri Kristuiya kanamtikiainiawai tura ataksha nuatnaikiatniun wakeruiniawai. <sup>12</sup>Tura emka enentáimtiarmia nuna iniaisar sumamainiawai. <sup>13</sup>Nu arantcha nakimiainiak ántar irauwear chíkicha itiuurcharin áujmatsachminia nunasha áujmatin áiniawai. <sup>14</sup>Nu asamtai waje úchipiak ainia nuka uyurtukar uchin takusarti. Tura nuwa nuatkamu takastinia nuna túrawartí. Tura ni túrunamurijiai in kajertamainiaj nú shuar yajauch enentáimturmarcharti. <sup>15</sup>Kame nuik chíkich chíkich waje Kristuiya kanakiar iwianchin nemarsaru ásar-matai nuna tájai.

<sup>16</sup>Áishmansha nuwasha Yus-shuar ainia nu ni shuariin waje ákuinika Yusa kuítrin seatsuk nii yaintí. Nujai chíkich wajén nekas atsumainia nuna Yusa kuitri yáintatui.

<sup>17</sup>Yus-shuara uuntri Yus-shuaran péñker wáinkiarua nu, nekas shiir enentáimtustin áiniawai. Tura akinkiamniasha áiniawai. Nekaska Yus-Chichaman etserkatniuncha

tura unuiniartinniasha tuke takaaka imiá shiir enentáimtustinaiti.

<sup>18</sup> Yus-Papiniumsha núnisan áarmaiti: Jínkiaia saepen pakartaj tusa turu takaak nájakui ni nují jínkiatáshtiniiaiti. Antsu ni wakerak yuati. Tu áarmaiti.

Tura nu arantcha áarmaiti: Takakmasua nu nekas akinkiatniuiti. Tu áarmaiti.

<sup>19</sup> Chikichik shuarak Yus-shuara uuntri tunaarín etsertukmataínkia anturkaip. Antsu jímíarsha menaintiusha tsanumsuk métek tuiniakui anturkata. <sup>20</sup> Chíkich shuarsha ni tunaarín ikiuktinian nakitiainia nu, ashí iruntramunam chicharkarta. Chikichcha, nuna ísar, ashamkarti. <sup>21</sup> Yussa ii Uuntri Jesukrístusha tura nayaimpinmaya suntarsha ímiainiamunam “túrata” tájame. Ashí shuarjai niisháa enentáimtusuk métekrak túrata. <sup>22</sup> Yus-shuara uuntri atí tusam wárik anaikiaip. Wárik túramka chikicha tunaarín sumamattame. Ashí tunaanum penké pachiinkiaip.

<sup>23</sup> Wakemjai jau asam aya éntsak úmutsuk karía ishichik pachimpram umarta.

<sup>24</sup> Chíkich shuara tunaari wáitsatin imiá paant áiniawai wáitsatin tsawant jeatsain. Tura chíkich shuara tunaarínkia paantcha áiniawai antsu ukunam paant nekanawartatui. <sup>25</sup> Núnisan penker túramusha ti paant áiniawai. Tura yamá páantchaitiat tuke paantcha áchamniaiti. Páchitsuk nekanattawai.

**6** Takarniutirmesha, atumí uuntri ti shiir umirkatarum. Túrachkumnínkia chíkich shuar Yusnasha ii unuiniamuncha yajauch áujmattsartatui. <sup>2</sup> Atumí uuntri Yus-shuar áiniakka aya Yusjai yatsum asamtai nakiarchatniuitrume. Antsu nuna nankaamas penker

takarsatniuitrume. Warí, ame yayamna nu Yus-shuarchak ainia, tura ame aneamu yatsumchak ainia. Ame, Timiutéu, tu jintintiata.

### Yusna wakeruktincha tura kuit wakeruktincha

<sup>3</sup> Shuar ti shiir naka chichaman ii Uuntri Jesukrístunu ana nuna nakitiak antsu niisháa chichaman étserkunka <sup>4</sup> nu shuar nankaamantu enentáimtumayat ántrai. Ni enentáimmianak chichaak aya ántar chichaman antumtiknaikiatniun chichaawai. Tura nu chichamjai nupetmaktaj tusar nankaamas áujmatainiak kajernaikiar tura katseknaikiar penker enentáimtunaisuk <sup>5</sup> tuke kakannainiawai. Tura tu aujmatnaisatniun wakeruiniana nú shuar nekaschichaman nékachu ásar aya tunaan enentáimtin áiniawai. “Yusna ana nujai kuítrintin ajasminiaiti” tuiniawai. Nu shuar pachisaip. <sup>6</sup> Shuar takakna nujain waraakka Yusna ana nujaisha waraak ju nunkanmasha tura nayaimpinmasha nekas kuítrinniuiti. <sup>7</sup> Iis, ju nunkanam misuk támaji; núnisar misuk jiinkittiaji. <sup>8</sup> Tuma asamtai yurumkasha tura entsataisha takakkurkia nujain warasa pujustiniatiji. <sup>9</sup> Antsu kuítrintin ajastaj tuinia nu, tunaanum awankemkar iniainiawai. Tura antra nuna wakerukar itiurchatan wáiniainiawai. Nujai emesratniunmasha jeainiawai. <sup>10</sup> Kame kuit aneatniuka ashí tunáanum útsutkaminiaitji. Chíkich shuar nuna wakerukar Yus enentáimtustinian iniaisar ti iturchatjai yajauch awajmamsarai.

### Yusna nu túrunat tusam kakaram ajástá

<sup>11</sup> Antsu ame Yus-shuar asam nuyá pisarta. Yus nekas enentáimtakum penker túrata. Waantu enentáimtusuk Yus penker umirkata. Aneakum katsuñtrata. <sup>12</sup> Yusna nu túrunat



tusam kakaram ajástá. Tuke amuicha iwiaakma emetata. Nu túratniun Yus anaitiamkaiti, tura ame Yus nekas enentáimtamú untsurí shuar iruntramunam etserkaitme. <sup>13</sup>Yuska ashí iwiaaku átinian súwiti. Jesukrístusha Punsiu Piratují nekasa nuna ti paant ujakmiayi. Tuma asamtai Yussha Jesukrístusha írainiamunam nuna tájame. <sup>14</sup>Ii Uuntri Jesukrístu táatsain wi tájamna nu yapajítsuk tura yajauch chicharnakchamnia péñker umiktá, tájame. <sup>15</sup>Tsawant jeamtai Jesukrístu tatí tusa Uunt Yus, imiá péñker asa, akupkattawai. Nínkiti Yus. Akupniuncha Akupniuiti. Uuntjai nankaamas Úuntaiti. <sup>16</sup>Iwiaaku átinia nérenniuri Nínkiti. Ti tsáapninnium pujakui nuntumtuachminiaiti. Wáinchatai asamtai shuar péñké wáinkiacharu áiniawai. Niñki ashí shiir awajsatniuiti tura Niñki tuke ashí akupin atí. Núnisañ ati.

<sup>17</sup>Jú nunkanam kuítrintin ainia nusha nankaamantu enentáimtumasharti. Kuitcha yúpichuch menkakamnia asamtai kuítniak enentáimtusar pujuscharti. Antsu iwiaaku Yus ashí in ti péñkeran núkap súramaj nuna nekas enentáimtusarti. <sup>18</sup>“Péñker túratarum” tiarta. Tákumin niisha shiir enentáijiai ni takakman ajamsarti. Nuyá nú péñker túramujai Yusai ikiáunkartí. <sup>19</sup>Nuna túruiniak kuítriniawartatui. Núnisañ tuke iwiaaku átinian wáinkiertatui.

#### Amuak Timiutéun akatramu

<sup>20</sup>Timiutéu, ashí ame túratniua nu tuke enentáimturta. Jú nunkanmaya ántar chichainia nu anturkaip. Tura wáitruiniak “wi imiá nékajai” tuinia nusha anturkaip. <sup>21</sup>Chíkich shuar nuna umirkar Yusaiya kanakiarai.

Wátsek, Timiutéu, Yus shiir yainmakti.

Nuke atí.

Papru

TIMIUTÉUN

*Ataksha papin aar akuptukma*

**Papru Timiutéun áatramiania nu**

**1** Wi Pápruitjai. Yus wakerakuí Jesukrístu akatramurí ajasuitjai. Ashí Jesukrístujai tsaniñkiarun “Nekas iwiaaku átinian susattajai” tñiuiti Yus. Tuma asa nuna etserkat tusa akuptukuiti. <sup>2</sup>Aneamu uchiru, Timiutéu, ju papín áateajme. Yus Apasha tura ii Uuntrí Jesukrístusha ti anenma ásar waitnentrainiak imiatkinchanum shiir pujustinian yainmakarti.

**Krístunu takastiniaitjinia nu**

<sup>3</sup>Tsawajsha káshisha Yúsan áujeakun ámin tuke enentáimtusan ti shiir Yúsan yúminñkijajai. Winia weatur túrawarmia nútíksanak Yúsan enentáimtakun ti shiir awajeajai. <sup>4</sup>Kanakmiaj nuí eantramiam nuna tuke enentáimtajme. Ataksha wararnaisatai tusan íitniun wakerajme. <sup>5</sup>Yus nekas shiir enentáimtiniaitmena nuna nékajai. Nukuchrum Ruítiasha tura ame nuku Eunisiasha emka Yúsan nekas enentáimtin ármiai. Amesha núnisketme.

<sup>6</sup>Tuma asakmin tájame: Yusna takasái tusan winia uwejrún ámin awanteakui Yus kakarman suramsamia nujai atak kakaram takasta. <sup>7</sup>Yus sápij enentáin suramsachuitji. Antsu kakaram ajastinniasha anenaitniuncha péñker wekasatniuncha suramsaitji. <sup>8</sup>Ii Uuntrí Jesukrístunu etserkatin natsantraip. Níiniun étserkun sepunam pujamusha étserkum natsantruraip. Antsu Yus kakaram awajtamkui ame étseream nujai shuar yajauch túramainiakui surimiamtsuk wáitsatin

enentáimtumarta. <sup>9</sup>Ii péñker túrichu árinin Yus in anenma asa uwentikramar péñker túratniunam apujtamsaitji. Iisha Jesukrístujai tsaniñkiaru asakrin tura Yus nuna túratniun wakerak túramiai. Yaunchu ju nunka atsaisha in tuke waitnentrampromiaji. <sup>10</sup>Tura yamá in Uwentikkiartin Jesukrístu támatai nu anenmam paant ajasuiti. Niisha jákatniun nupetak emesramiai. Tura uwempratin chichamjai jáchatai iwiaakman paant awajturmajai.

<sup>11</sup>Nuna etserkat tusa Yus anaitiukmiayi. Tura akattur Israer-shuarchanum akuptukmiayi. <sup>12</sup>Túruta asamtai ti wáitijajai. Túrusha Yúsan nekas enentáimta asan natsamatsjai. Imiá kakaram asa amuukatin tsawant jeatsain ashí wínian susamaj nuna ti péñker waitruktatui.

<sup>13</sup>Shiir chichaman jintintiamajmena nuke emetata. Jesukrístujai tsaniñkiu asar Yus nekas enentáimtaji tura nujai anenkratniuitji. Tuke núnismek túrata. <sup>14</sup>Yus ámin takasat tusa suramsamu shiir takasta. Tura Yusa Wakaní in pujurtamaj nuna kakarmarijjai túrata.

<sup>15</sup>Asia nunñanmayá shuar mash iniaitiusarmái. Nu nekaachmaashum. Nu shuarnumiá Pijirusha Ermujenessha armái. <sup>16</sup>Antsu Unisépuru niisháa shuar amái. Ti nukap shiir enentáimtikrurmai. Tura wi sepunam pujamuncha natsantruchamai. Ii Uuntrí Kristu ni shuarincha waitnentrarti. <sup>17</sup>Rúmanam taasha natsantrutsuk eatak wáittsuk iniaitíuschamiayi. <sup>18</sup>Ipisiu péprunam pujarin ti yainmakmiaj nu paant nékame. Tuma asamtai amuukatin tsawant jeamtai nincha Uunt Yus waitnentrati.

**Kakarman ajasta**

**2** Amesha, uchirú, Jesukrístujai tsaniñkiu asam nu kakarmajai kakaram ajasta. <sup>2</sup>Untsurí ántuiniamunam wi etserkamaj nu, shuar umikmin

ainia nu jintintiawaram chikichnasha jintintiawarat tusam akupkarta.

<sup>3</sup>Ame ti penker Jesukristu suntari asam waitsatin katsuntrata. <sup>4</sup>Suntarka ni uuntri tana nunak umiktin asa chikich takatan pachintiukschatniuiti. <sup>5</sup>Núnisan nakurincha nakurustinia nujai métek nakurachkunka nekas penkeran awakmakun súsatniua nuna achikhamniaiti. <sup>6</sup>Ataksha núnisan shuar ajan takaana nu, ashí shuara nankaamas nuyān yúashtinkiait. <sup>7</sup>Wats, ju maintiu métek-taku chicham ániawai. Penker enentáimtakmin ii Uuntri Kristu paant awajturmastatui.

<sup>8</sup>Jesukristu jaka nantakmia nu enentáimprata. Tura Uunt akupin Tawit ni weatri asantai Jesussha uunt akupin átiniaiti. Núiti wi uwempratin chichaman étsereaj nu. <sup>9</sup>Nuna étsereakun sepunam jirujai jinkiamu pujakun wáitijai. Túrasha Yus-Chicham jinkiachminiaiti. <sup>10</sup>Ashí shuar ni shuari arti tusa Yus achikiarua nuna yáintajtsan ashí iturchatan katsunteajai. Nujai Jesukristujai tsaninkiaru ásar uwemprar tuke shiir pujusartatui Yusjai.

<sup>11</sup>Ju imiá nekasaiti:

Jesukristujai jákaiikiurkia Níjiaisha tuke iwiaaku pujustaji.

<sup>12</sup>Wáitiakrishā Níjiaí akupkattaji.

Natsantakrinkia Niisha natsantramprattaji.

<sup>13</sup>Umichuitkiurniisha Ninkia tuke uminiaiti. Warí, Yuska ni enentáimmiájain yapajniátsuk tuke umiktiniaiti.

### **Yusai natsarajj tusam ashí túrata**

<sup>14</sup>Shuar jintintiakum ju enentáimtikrata. Ii Uuntri Yus íimmianum chichamjai yajauch tunaiyarain tusam chicharkarta. Nu tunaitin penké áantraiitsu ántuiniana nuna yajauch awajenawai. <sup>15</sup>Yus-Chicham tuke

enentáimjai penker unuimiátram shiir jintintiawarta. Túrakum Yus penker íirsat tusam penker takarin atá. Túrangka Yusai natsaarchattame. <sup>16</sup>Jú nunkanmayanak ántar áujmatin ainia nujai kanaktia. Shuar nuna áujmatainiak tunaanum nuna nankaamas wáiniawai. <sup>17</sup>Ni jintiniamusha sunkurjai métek pampaawai. Iminíusha tura Piritiusha nu shuar ániawai. <sup>18</sup>Niisha nekas chichaman iniaisar tura ashí Yus-shuar nantaktincha nankaamasai tuñiakui chikich chikich shuar Yúsan naka enentáimtuiniatsui yamaikia. <sup>19</sup>Túrasha Yus ashí nankaamas enentáimtustinia nuna paant awajsaiti. Júnisaiti: “Uunt Yus ni shuarin nékainiawai,” tura nuyá “Ashí Kristu shuari ainia nu tunaanumiá kanakiarti.”

<sup>20</sup>Kuítrinniu jeen kurijai najanamusha kuitjai najanamusha írunui. Nújainkia ti shiira nu takastin ániawai. Tura numijiai najanamusha nuwejai najanamusha írunui. Antsu nújainkia nekasmancha ainia nu takastin ániawai. <sup>21</sup>Núniskete Yusa takatrájiai. Ashí tunaanumiá kanakir penker wekasar shiira nu takasmin átatji. Kame ashí penkera nu takasmin asakrin ii Uuntri Jesukristu wakerak penker takata nu apujtamsamniaitji.

<sup>22</sup>Natsá wakerutai iniaisam esetram penker wekasata. Amesha ashí shuar shiir enentáijjai Yúsan áujena nujai Yus nekas enentáimtakum aneniakum ti shiir pujustá. <sup>23</sup>Enentáimtsuk chichainiak aya ántar tunaitinian chichainia nu pachisáirap. Nusha aya némasmanainiawai. <sup>24</sup>Ii uuntri Jesukristu takarniuka chikich shuarjai nemasmanaikiashtiniaiti, antsu ashí shuarjai penker nawamnaikiatniuiti. Tura waitnentáimturar penker jintintiatniuiti. <sup>25</sup>Tura umircha shuarnasha Yus ni enentáin yapajtiakui

nekas chichaman shiir enentáimturarat tusa péñker enentáijjaj̄i jintintiatniuiti. <sup>26</sup>Nujaj̄i iwianch ni wakeramu túrawarat tusa achikmaitiatan̄ uwemprartatui.

### Amuukatin tsawant jeatemamtai aents ti tunaan túrawartatui

**3** Amuukatin tsawant jeakui ti itiurchat ártatui. <sup>2</sup>Shuar aya niñki enentáimtumasarartatui. Kuftian ti wakeriartatui. Nan̄kaamantu enentáimtumarartatui. Yúsnasha yajauch chicharsartatui. Aparíncha umirkachartatui. Yuminsatniuncha nékachu ártatui. Ashí Yúsnancha enentáimtuschartatui. <sup>3</sup>Aneetsuk waitnenkartichu ártatui. Tsanumin ártatui. Ni ayashí wakeramun katsuncha ártatui. Aya kajen ártatui. Ashí péñker túrinia nuna nemasr̄i ártatui. <sup>4</sup>Amikríncha surukartatui. Arantsuk tunaan túrawartatui. Waantu enentáimin ártatui. Yúsan nakitrar aya ni wakeramunak enentáimtusartatui. <sup>5</sup>Yusa kakarmari “ántrai” tuíniak péñker umirkachartatui. Túrasha Yúsan umirua núnisar túrawartatui.

Nu shuar penké pachisáip. <sup>6</sup>Nu shuarsha shiir chichayatan̄ anan̄kawar jeá wáiniawai. Tura nuwá esetar enentáimchan nekas tunaarinniun anan̄kainiawai. Nu nuwá ashí yajauch wakeramujaj̄i anan̄nainiawai. <sup>7</sup>Tuma ásar ashí shuara chichamen̄ tuke ántuiniayatan̄ nekas-chichaman nekaatniun tujintiainiawai. <sup>8</sup>Yaunchu Ejiptu nun̄kanam Muisais uunt akupniujaj̄i chichaakui jimiará iwishin, Jánissha Jámprissha, Muisaisan kajerainiak “ántar tawai” tiarmiayi. Núnisan̄ ju shuar nekas-chichaman nakitainiawai. Naka enentáimiainiachu ásar Yúsnan naka jintíatniun penké tujintiainiawai. <sup>9</sup>Túrasha nuna nan̄kaamas kuakchartatui. Shuar ti paant ni netse túruiniamur̄in

nekarawartatui. Núnisan̄ nu jimiará iwishniujaj̄i túrunamiayi.

### Amúak Papru Timiutéun akatramiania nu

<sup>10-11</sup>Tura ámeke wi tímiaj nu umireame. Wi Yusjaj̄i shiir wekaamusha métek túriniaitme. Wi enentáimmiasha nékaitme. Áintruiniakui wáitsamaj nu nékame. Tura Yúsan enentáimtakun tura anen̄krat̄kun shiir enentáijjaj̄i katsuntramjai. Antiukía péprunmasha, lkiuniu péprunmasha, Ristra péprunmasha ashí yajauch túrutawarmatai wáitsamaj nu paant nékame. Túrasha ii Uuntrī uwentikurmiayi. <sup>12</sup>Nekasaiti, shuar Jesukrístujaj̄i shiir túrataj tákun̄ka ni nemasr̄i ántiam ti wáitsatniuiti. <sup>13</sup>Tura ashí anan̄kartin ainia nusha kame ashí yajauch shuarsha nú yajauch túrukiar wétatui. Iwianchjaj̄i anan̄kamu ásar chikichnasha anan̄kiar weartatui.

<sup>14</sup>Antsu ámeke unuimiam nu imiá nekasaiti tu enentáimtakun tuke emetata. Jintinramawarmia nú shuarsha wáitrichua nu nékame. <sup>15</sup>Úchichinmayan̄ Yus-Chicham nékame. Yus-Chichamka uwempratniun jintinramamniaiti. Nusha “Jesukrístu nekas enentáimtakun uwemprattame” tawai. <sup>16-17</sup>Ni Papir̄in árat tusa Yus ni shuarin̄ áamtikramiayi. Ashí shuar ni Chichamen̄ nekaawar péñker túrawarat tusa túramiayi. Tuma asamtai Yus-Papí shuartin unuiniakartin asa imiá penkeraiti. Tunáa túrajnia nu Yus-Papijjaj̄i nekamatniuitji. Tura awajiakrincha Yus-Papí núnaka paant jintinramji. Nuyá naka wekasatniun jintinramji.

**4** Ii Uuntrī Jesukrístu amuukatin tsawantaj̄i Uunt Akupin̄ ajas iwiaakuncha tura jákaruncha ashí péñker túramuncha tura yajauch túramuncha nekaattawai. Tuma asamtai Niisha tura Yus Apasha

íimiainiamunam juna akateajme.  
<sup>2</sup>Uwempratin chicham etserkata. Yúpichuchia nuísha tura itiuurchata nuísha tuke etserkata. Yus-Chicham nekas enentáimtikrarta. Tura shiir enentáimtusam chicharkam yáintaj tusam unuiniararta. <sup>3</sup>Ukunmanka péñker chichaman nakitrar ii wakeraj núchik nekaatai tusar, shuar teremak péñker pujuschamnia nekeapa áintsan, nankaamas unuimiaru atai tusar, nánkamas unuikiartinian ti untsurí eakartatui. <sup>4</sup>Nekas shiir chichaman iniaisar ikiuniak ántar áujmatsamun enentáimtusartatui. <sup>5</sup>Antsu ámeke tuke péñker túratin wakerakum ashí itiuurchat katsunrata. Uwempratin chicham étserkum takatrum péñker umikta.

<sup>6</sup>Ishichik ajasai winia iwiaakmar Yusai surumaktin. Mantamnan nayimpiniam wétin jeatimiai. <sup>7</sup>Shuar kakaram maanainia núnisnak tuke kakaram takasmajai. Tséken péñker tsekea áintsanak yawetsuk takasmajai. Tura Yus-Chichaman nekas akasmatkun péñker wáinkiaitjai. <sup>8</sup>Tuma asamtai tawasap nukajai najanam tsékena susamua áintsan wisha péñker túramunam akinkiattajai. Tura aya wíniak akirkashtatui. Antsu ashí ni tátinian shiir enentáijijai ná kainia nunasha nekas péñkera nuna akikiartatui.

### Timiutéu túratin akatmamturma

<sup>9</sup>Wárik iiraitin enentáimturata. <sup>10</sup>Témas aya jú nunkanmayanak wakerak ajapa ikiuruk Tisarúnikia péprunam weyi. Tura Kresentisha Karasea nunkanam weyi. Núnisan Títiusha Tarmasia nunkanam weyi. <sup>11</sup>Túrawarmatai aya Rúkas wijijai

pujawai. Márkus eaka wáinkiam ame itiaritia. Jui ti penker yainkiamniaiti. <sup>12</sup>Tura Tíkikiunka Ipisiu péprunam akupkamjai. <sup>13</sup>Tura winiakum nuparam pushí Trúas péprunam Karpu jeen ikiukmij nu takurtuktia. Núnisan nuparam papísha tura nekaska penké papí takurtuktia.

<sup>14</sup>Arejántruka jirujai takawa nu ti yajauch awajtusuiti. Túrutaitkiuisha ni túramujai métek Yus akiktí. <sup>15</sup>Nu amesha péñker wáinkiatá. Ii étsereamun penké nakitiawai.

<sup>16</sup>Emka akupniunam ayamprumaktaj tusan chichaakui chikichkisha yáintkiacharmiyai. Antsu sapijmiainiak ikiurkiarmiyai. Yus nu shuaran yajauch enentáimturcharka maak. <sup>17</sup>Tura ii Uuntri Jesukrístu ni kakarmarín surus yaintkiamiyai. Nujai uwempratin chichaman ashí nunkanam Israer-shuarcha antukarti tusan etserkamjai. Tura núnisan akupniunmayasha ii Uuntri uwentikrurmiyai. <sup>18</sup>Tura núnisan ashí yajauchia nuyá uwentikrurmatai Nii akupeana nuí nayaimpiniam jeattajai. Niñki tuke shiir awajnasti. Núnisan atí.

### Amikmaamiania nu

<sup>19</sup>Piriskancha ni áishri Akirancha amikmainiajai. Núnisnak Unisépuru shuarincha amikmainiajai. <sup>20</sup>Erastu Kurintiu péprunam juakmai. Tura Trúpimiunka Miritiu péprunam jaan ikiukmijai. <sup>21</sup>Michá nantu jeatsain iiraitin enentáimturata. Tura Eupurusha Putentesha Ríniusha Kráutiasha tura ashí Yus-shuarsha amikmaatmainiawai.

<sup>22</sup>Ii Uuntri Jesukrístu ámijijai tsanin pujustí. Tura Yus ashí péñker waitmakarti.

Nuke atí.

*Papru*

**TITIUN**

*papí áatramu*

**Papru Titium áatramiania nu**

**1** Wikia Pápruitjai Yusa takarniurí. Tura Jesukristu akatramuríntjai. Yus achikma ainia nú shuar niisha antukar Yúsan umirkarat tusan akatramuitjai. Shuar nuna nekaawar péñker wekasartatui. <sup>2</sup>Tura nú arant, nú shuarsha tuke iwiaaku pujusarat tusan ét-sereajai. Nú shuarnasha, nunkan najantsuk, “uwentikrattajai” Yus tímiayi. Tura Niisha wáitruatniun tujintiawai. <sup>3</sup>Tura yamaikia, tsawant jeamtai, nuna nekaawarat tusa ii Yusrí uwentikkiartinia nu, winia chichamur ujakarta tusa, winia akatturmiayi.

<sup>4</sup>Tituu, wi Yusna étserma umikiu asakmin winia uchirua áitkiasnak papin áateajme. Iis, iijjai métek Yus nekas enentáimtatsjik. Yus waitnentrama asa shiir awajtamsati tusan wakerajme. Tura ii Aparí Yussa, ii Uuntri Jesukristusha, Uwentikkiartin ana nu, enentáimin imiatkincha awajtamsati, tajai.

<sup>5</sup>Wats, wi iwiarachmajna nu ame iwiarata tusan Kreta nunkanam ikiukchamkajam. Tura “ashí péprunam Yus-shuar írunmanum, Yus-shuaran wáinkiarat tusam shuar anaikiarta” tíchamkajam.

**Yus-shuaran wáinin**

<sup>6</sup>Yus-shuaran wáinin júnis atí. Niisha makuuchmin ti péñker wekasatí. Tura chikichík nuwentin átiniaiti. Tura ni uchirísha Yusna ártiniaiti. Tura shuar yajauch chicharsachmin niisha tutupnisan wekain ártiniaiti. <sup>7</sup>Enentáimprata. Yus-shuaran wáinin Yusna ana nuna wáinkiat tusa

anaikiamuiti. Tuma asamtai nekas makuuchmin wekasatniuiti. Waantu enentáimtumatsuk, kajetsuk, tura nampechu átiniaiti. Chikichan waitkiau áchatniuiti. Tura ananma kuírintin ajastaj tusa wakerukchatniuiti. <sup>8</sup>Antsu shuar ni jeen írar winiana nuna itiaatniuiti. Tura ashí péñker ana nuna wakerin, esetas enentáimin átiniaiti. Tura ju nunkanmaya akupeamuncha, núnisan Yús akupeamuncha umirkatniuiti. Tura niñki ímiastiniaiti. <sup>9</sup>Tura nú arantcha, chikich shuáran péñker jintintrataj tusa tura Yus-Chichaman nakitin áinia nuna nupetkataj tusa, Yúsnumiá nekas chichaman, nii unuimiátramiania nuyá kanakchatniuiti. <sup>10</sup>Nekaata. Umichu ti irunui. Niisha ántar chichau ásar ananmau áiniawai. Israer-shuar weenam ti irunui nú shuar. <sup>11</sup>Niisha kuítian achiktaj tusar wakeruiniak, yajauch unuiniarchatniua nuna unuiniainiawai. Nuna túruiniak untsurí shuáran, ni írutkamurijjai yajauch enentáimtikianiawai. Tuma asamtai auka, ni wene epetkatniuiti, ántar chichainiakui. <sup>12</sup>Warí, imia Krétanmaya chichaman etserin juna tíchamka: “Krétanmaya aentska tuke wáitrin áiniawai. Tura nákitiat ti yurumin áiniawai. Yajasma núnisan áiniawai.” Nuna tíchamka. <sup>13-14</sup>Maa, niisha nékasan tímiayi. Nu tuma asamtai, Tituu, Israer-shuar ántar tuinia nuna, Yus-shuar anturkachartí tusam, tura nekas chichaman nakitiana nuna akupeamurín umirkachartí tusam, antsu Yúsan nekas umirkarat tusam, umichu shuar kakaram chicharkarta.

<sup>15</sup>Enentáimprata. Yus-shuarka, ni enentái chamir ajasu ana nuka, ashí ni wainnia nuna péñkernak enentáimtawai. Tura chikich shuar, Yúsan umirkachu asa, ni enentái wapik asa, péñker ana nuna enentáimustinian

tujintiawai. Achapai enentáimiuk, péñkercha ana nuna “pénkeraiti” tawai. <sup>16</sup>Tura niisha “Yus-shuaraitjai” tuíniayatan, Yúsan umirtsuk niisháa túruiniawai. Tuma ásar mujjmiai áiniawai niisha. Umichu ásar péñkeran túratniun péñké tujintiainiawai.

### Pénker jintintiatin

**2** Tura amesha, Titiu, péñker chicham etserkata. Yus-Chicham tátsuna nu etserkaip. <sup>2</sup>Antsu áishman katsunt Yusna ainia nu, ju jintintrata. Nampechu, nánkamas enentáimcha, esetas enentáimin arti. Yus tana nuna umirin tura anenain arti. Ni itiurchatrin Yúsan enentáimtusar katsuntin arti. <sup>3</sup>Tura núnismek nuwa katsunt Yusna ainia nusha ju jintintrata. Niisha núnisaran Yus-shuarti túramnia nuna péñker túrawartí. Tsanumin tura nampen áchartí. Antsu péñker wekasatniun unuinin arti. <sup>4</sup>Niisha yama nuatnakua nuna ni áishrin ni uchirincha nekas aneetniun unuiniantartí. <sup>5</sup>Junasha jintintrartí. Esetas enentáimin, péñker wekain ártiniaiti. Ni takatrin péñker takastin áiniawai. Ni áishrin umirin ártiniaiti. Tura waitnentin ártiniaiti. Yus-shuarcha Yus-Chichaman yajauch chicharkarain tusar túrawartiniaiti. “Tu jintintrarta” titiá.

<sup>6</sup>Nuyá, Titiu, natsa áinia nu “nánkamsar enentáimsarum wekasairap” titiá. <sup>7-8</sup>Tura amesha, Titiu, ashí tsawant péñker wekasatá. Nu natsa wi túramun júkiar nunak túrawarmi tusam, nu túrata. Tura anturtamna nu “nekaschapitia” tiin tusam, esetsam enentáimsam, Yus-Chicham tana nu ímiatrusmek jintintiata. Nú túrakmiñkia, Yus-Chichaman nakitiana nu shuar “Titiu nánkamas chichaawai” títiáj tukamá, natsaamak tujintramkattawai.

<sup>9</sup>Takaran ainia nu, ni takartairin umirkarat tusam jintintrarta. “Shiir enentáimsarum, yajauch áimtsuk shiir umirkatarum” titiá. <sup>10</sup>“Kasamkairap, tura anankawairap. Iis, péñker túrakrumka, takarniuitiatrum, shiir tura asarum ii Uwentikramin Yusri chichamen shíiraiti, tu enentáimtikrattarme” titiá.

<sup>11</sup>Yus in waitnentrama asa ashí áentstin uwentikramprataj tusa wakerutmaji. <sup>12</sup>Kame Yus waitnentrama asamtai, tunáa ana nu iniaisatniuitji, nu nékaji. Tura ju nunkanmaya yajauch ana nu wakerukchatniuitji. Tura antsu ju nunkanam pujayatrik esetsar enentáimsar ananma wekatsuk tuke tsawant Yus anear wekasatniuitji. <sup>13</sup>Túrar ii Yusri Jesukristu, uwentikramajnia nu, imiá shiir iwiarnar tatí tusar nákastiniaitji. <sup>14</sup>Jesukristuka in jarutramkamajji, ii tunaariniá uwentikrampratajsa. Tura, Winia ajasar tuke enentáijjai péñker túrawarat tusa, ii tunaarin japirtampramajji.

<sup>15</sup>Titiu, anaikiamu asam arantutsuk nu jintintrata. Yajauch ana nuna túrawarain tusam chicharkarta. Péñkeran túruinia nu ikiakárta. Tura yajauch chichartukarain tusam tuke péñker wekasata.

### Yus-shuarti túratin

**3** Titiu, shuar enentáimtikrarta. “Ashí akupin ainia nusha tura chikich uunt akupena nusha antukrum umirkatarum” titiá. “Pénkeran túratin ana nuna páchitsuk túrattajai” tíftiniaitrume” titiá. <sup>2</sup>“Tsanumpirairap, kajernaikairap, antsu shiir enentáimtunaistarum” titiá. Nankaamantu enentáimtumatsuk ashí shuar péñker awasatarum tusam tu jintintrarta. <sup>3</sup>Warí, iisha núnisrik Yus-shuar ajatsuk nánkamsar wekaimji, Yuska umirtsuk.

Tura íwianch emetamu pempée wekaimji. Tura ii ayashí wakeramu tuke túriniuyaji. Tunaasha túriniuyaji. Chíkich atankittsar wakeriniuyaji. Chíkich shuar kajerkar tura nuamtaksha kajernainiuyaji. <sup>4</sup>Túrasha Yus in uwentikkiartin ana nu, anenkratin asa, ni anenkrattairin ashí áentsun iniaktus in uwentikrampramijai. <sup>5</sup>Yus in waitnentrama asa, iikia júksha péñker túrachma ain uwentikrampramijai. ¿Itiurak uwentikrampramijai? Ii tunaarin asakátrampramijai, nijiahtinia áintsan. Tura Yusa Wakaní pujurtamkurin, ii iwiaakmarin yamarman amasmaji. <sup>6</sup>Jesukrístu jakamujai Yus in emeenturmatsuk ni Wakanin suramsamijai. <sup>7</sup>In anenma asa nuna túramiayi. Nuinkia iisha yamaram awajsamu asar tuke iwiaaku átin, ti wakerimij nu íiniuiti. <sup>8</sup>Nuka ti nekasaiti. Tuma asamtai Yúsan umirkarmia nu, péñker túratniun tuke wakerukarat tusam tuke jintinki wetá. Wi tímiajna nu, péñker asamtai, ashí aents nuna nekaatniun atsumainiawai. <sup>9</sup>Shuar netse áujmatainiakui ameja pachisaip. Tura “aya winia úuntruk péñker áiniawai” tu chichasaip. Tura Israer-shuara akupkamuri ititurkit

tusa shuar ti áujmatainiakui nusha pachisaip. Ántraiti nuka. Péñker wekasatniun yayatsui.

<sup>10</sup>Shuar tsanumprur yajauch enentáimtunaimtikiana nu chicharkata. Ántachkuinkia ataksha chicharkata. Tura penké tujinkiamka jiki akupkata. <sup>11</sup>Nujai juna nekaamniaitme: nuna tura asa awajiruiti. Tura ni tunaarin jakattui.

### Papru wakerana nu

<sup>12</sup>Wisha Artemasan akatran akup-tukchatjameash. Nin akupeachkunka Tíkikiun akuptuktatjame. Nii jeamtai amesha wari winitritia Nekapuris péprunam. Jui Nekapurisnum yumí nantu asamtai seturan pujuttajai. <sup>13</sup>Senas, chichaman ti unuimiaru pujana nu, amikiur Apurusjai jeamtai, nii atsumtsuk shiir weartí tusam, ame túratin jeamna nu yainta. <sup>14</sup>Iini Yus-shuar ainia nusha péñker túratniun tura atsumainia nunasha yaintinian nekaawartí. Antar pujusarain tusan nuna tajai.

<sup>15</sup>Ashí wijjai pujuinia nu amikmaat-mainiawai. Tura ii amikri Yus-shuar ainia nu amikmaatruata. Atumniasha Yus shiir yainmakat tusan wakerajrume. Nuke atí.



*Papru*

## JIRIMIÚŃKAN

*papí áatramu*

### Papru JirimiúŃkan papin áatramiania nu

**1** Wi Papru ju papin áaran akupta-  
jme ámin, JirimiúŃká. Ii yachi Tim-  
iutéusha juna akupturmawai. Wi Je-  
sukrístu takaru asan sepunam pujajai.  
Ame iijjai tsaninka takáa asakmin ju pa-  
pin akuptajme. <sup>2</sup>Núnisan ame jeemiin  
Yus-shuar irunainia nunasha tura ii  
umai Apiancha tura Arkipiuncha iijjai ti  
kakaram takasu asamtai ju papin akup-  
tajrume. <sup>3</sup>Yus ii Apari tura ii Uun-  
tri Jesukrístu shiir enentáimturma ásar  
yainmakarti imiatkinchanum tuke shiir  
pujustinian.

### JirimiúŃ penker Yus-shuar ámiayi

<sup>4-5</sup>Ame Uunt Jesus shiir enentáim-  
takum ashí Yus-shuar ainia nusha anea-  
mun antukjai. Nuna antukan ámin ti  
shiir enentáimtakun Yúsan áujeakun  
yúminikajai. <sup>6</sup>Áujeakun chíkích shuar-  
sha ámijjai métek Yúsan nekas enen-  
táimtuiniak ashí penker ana nuna ti  
paant nekaawarat tusan seajai. Ashí  
penker ana nuka Jesukrístu shiir awa-  
jsamujai takakji. <sup>7</sup>Wisha ame anenkrat-  
majai ti shiir enentáimtakun waraajai.  
Yatsurú, ámijjai ashí Yus-shuarsha shiir  
enentáimiainiawai.

### Papru Unisemun waitnentratniun JirimiúŃkan seamiani nu

<sup>8</sup>Nu asamtai kakaram tátsujme. Kame  
wakeraknaka Kristu akatramu asan “Ju  
túrata” túminiaitjame. <sup>9</sup>Antsu aneakun  
aya júnisan tájame. Wi Papru úuntach  
asan tura Kristun takarkun sepunam

pujakun <sup>10</sup>Unisemu waitnentraí tusan  
seajme. Niisha wi ujakmajai Yus-shuar  
ajasu asa winia uchirua áintsankete.  
Sepunam pujayatan ni aparíya áintsanak  
ajasjai.

<sup>11</sup>Nuikkia Unisemu ántrauyi  
antsu yamaikia aminiisha winiisha  
yáimniuiti. <sup>12</sup>Ataksha awantajme.  
Wi ti penker aneamu asamtai penker  
itiaata. <sup>13</sup>Wi Yus-Chichaman étserkun  
sepunam pujajai. Túmakun ame yajá  
pujakun yáintkiatin tujintiakmin nii  
antsu wijjai pujus yáintkiat tusan  
wakerimjai. <sup>14</sup>Túrasha ámin ujatsuk  
túrachmin enentáimpranjai. Kame ame  
wakerakum útsukchamujai “pujustí”  
tákumninkia maak. <sup>15</sup>Júnissha  
enentáimpramniaiti. Unisemu ishichik  
tsawant menkakamai tura yamaikia  
waketki ámijjai tuke pujustatui.  
<sup>16</sup>Kame yamaikia emetachma antsu  
ame aneamu yátsumeá áinis átatui.  
Nuka ti penkerchakait. Wisha nin ti  
aneajai. Tura yainmakmin asamtai tura  
Kristunam ame yatsum ajasu asamtai  
winia iniankattsam aneashtapash.

<sup>17</sup>Wisha ti penker amikrumchakaitiaj.  
Tuma asam winia itiaarua nútksam  
shiir awayáta. <sup>18</sup>Yajauch awajtamkaitk-  
iuiŃkia tura ámijjai tumashitkiuisha wi  
akiktatjai. <sup>19</sup>Wi Papru nekas winia uwe-  
jrujai juna áaran ti nekas akiktatjame  
tájame. Túrasha winia tumashitmena  
nuna páchittsujme. Kame wi ujakam  
Yus-shuar ajaschamkun. <sup>20</sup>Wátsek, yat-  
surú, amesha Yus-shuar asam wi seajme  
jú túrutata. Kristu enentáimtakum shiir  
enentáimtikurta.

<sup>21</sup>Ti penker uminiaitme nuna  
nékakun júnisan áatjame. Tura wi  
seajmena nuna nankaamas túrattamna  
nuna nékajai. <sup>22</sup>Ayu. Átum Yus  
áujturkurmin Yus winia tsankatrucktati  
atumijn iiraitniun. Tuma asamtai wi nu  
jean pujustin iwiarturata.

**Amikmaamiania nu**

<sup>23</sup>Épapassha niisha Jesukristunu étseruk sepunam wiji*ai* pujus amikmaatmarme. <sup>24</sup>Núnisa*ŋ* Márkussha Aristárkusha Témassha tura Rúkassha

Yus-Chichaman etserkatniun yáintiainia nusha amikmaatmainiawai.

<sup>25</sup>Ii Uuntri*ŋ* Jesukristu atumniasha ti shiir yainmakarti.

Nuke atí.

## ISRAER-SHUARAN

*papí akuptukma*

### Yus ni Uchiríjaj ni chichamen ujatmakji

**1** Yáunchuka Yúsnan etserniujaj chichas Yus ni enentáimmian ii úuntrin ujakmiayi. Tura untsurí nuñkanmasha tura untsurí uwitíncha niisháa niisháa chichas ujakmiayi. <sup>2</sup>Antsu ju amúamu tsawantaikia ni Uchirí Jesukristujain ashí Niiniu ana nuna ujatmakji. Yus Niijjaj ashí írúnna nuna najana asa mash Nin súsaiti. <sup>3</sup>Nýyaiti Yúsan imiá métek nakumeana nu. Tura Nýyaiti Yus nankaamas shiira nuna paant awajeana nu. Niisha aya ni chichamejaj kakarma nujaj ashí írúnna nuna wáiniuk emeta pujurui. Tura ii tunaarin nijiatramak akupin pujutainium, Yusa untsuurini, pujusmiayi.

### Nayaimpinmaya suntarjaj Kristu nankaamantuiti

<sup>4</sup>Yusa Uchirí nayaimpinmaya suntarjaj imiá nankaamantu awajnasuiti. Tura ti nankaamantu asamtai Yus nayaimpinmaya suntar nankaamas Nin ti shiir awajtawai. <sup>5</sup>Wátsek, nayaimpinmaya suntaran chikichinkesha juna tútsuk Krístitun tímiayi:

“Ame winia Uchiruitme. Túmaitkiui yamáikia winia kakarmarun átakeajme.”

Tura núnisan tímiayi:

“Wi ni aparí átatjai, tura Nii winia uchir átatui.”

<sup>6</sup>Tura jú nuñkanam ni Iwiairín akupeak tímiayi:

“Ashí Yusa suntarí tikishmatrarti.”

<sup>7</sup>Nayaimpinmaya suntarnan júnis chicharui:

“Nayaimpinmaya suntarín takartursarat tusa nasea áintsan awajsaiti. Ni suntarín chárpia áinis akupeawai.”

<sup>8</sup>Antsu ni Uchiríniun tímiayi:

“Ame, Yusá, tuke akupniuitme. Ame akuptairmesha aya péñkeraiti. <sup>9</sup>Péñkera nu anenaitme, tura yajauchia nu muñjniuitme. Tuma asamtai ashí shuar shiir warartamu asamtai Yus, ame Yúsrum, ashí akupniujaj nankaamas uunt awajtamsaiti.”

<sup>10</sup>Nu arantcha tawai:

“Uuntá, yámankamtaik Ame ju nuñka najanamiamé. Túram ame uwejmijaj nayaimpisha najanaitme. <sup>11</sup>Nusha mai amuukarmataisha Ame tuke pujuttame. Tarachjaj métek mamurartatui. <sup>12</sup>Tura ipijram ikiustatme. Pushiya áintsam yapajíáttame. Túrasha Ámeká núnismek átatme. Játsuk tuke pujuttame.”

<sup>13</sup>Ataksha tímiayi:

“Akupin pujutainium, winia untsuurini, pujusam nákarstatá. Ame nemasrumin nupetkan Ámin umirtamkarti tusan amastatjai.”

Núnisan nayaimpinmaya suntaran peñké tíchamiayi. <sup>14</sup>Antsu Yusa suntarí wakan ániak ashí shuar uwemprartatna nuna yáñkiarat tusar Yus akupkamu ániawai.

### Anearta. Uwempratin Chicham nakitrashtiniaiti.

**2** Nuikia Kristu ti uunt asamtai ashí Niiniu antukajnia nujaj kanakchatin ti enentáimtustiniaitji.

<sup>2</sup>Yaunchu nayaimpinmaya suntar Muisaisan súsarmia nú akupkamu nekas uminkiatniuyayi. Shuar umitsuk tunaan túramtai ti kakaram asutniáwarmiayi.

<sup>3</sup>Antsu ii Uuntri Krístuka Uwempratin Chichaman emka itiamiayi. Tura

imiá nekas tuíniak Nin anturkaru in ujatmakarmaji. Tuma asamtai Uwempratin Chicham nakitiakrikia nuna nan̄kaamas uwemtsuk asutniáttaji. <sup>4</sup>Kame nu arantcha, Uwempratin Chicham ujatmainiakrin imiá nekas tuíniawai tusa aents túrachminian kakarman Yus iniakmasmiayi. Núnisan̄ ni Shiir Wakan̄i ni wakerana núnisan̄ niisháa niisháa kakermajai takantikeawai. Nujai Yus-Chichama nu paant nekanamniaiti.

### Jesukrístu aents ajasmiania nu

<sup>5</sup>Ayu. Nuik áujmatkur “jú nunka amuukattawai” taji. Tura yamaram nunkanam nayaimpinmaya suntar akupkachartatui. <sup>6</sup>Antsu ii akupkattajnia nu, Yus-Papinium áarmaiti:

“¿Shuarti warimpiaitiaj ame imiá enentáimtitniusha? Kame, ¿shuar warí asamtai pujursataj tamea? <sup>7</sup>Ishichik tsawant nayaimpinmaya suntarjai péejchach awajsamiame. Túram ti shiir nan̄kaamas uunt awajsattame. Ame najanamun ashí akupkati tusam tsan̄katkattame. <sup>8</sup>Ashí nin umirkarti tusam susattame.” Tu áarmaiti.

Yus “ashí nin umirkarti” takui nin umirkashtinkia atsawai. Túrasha yamaikia ashí umirainiaka wáintsuji. <sup>9</sup>Tura wáinjinia nu Kristuiti. Niisha aents ajas ishichik tsawant nayaimpinmaya suntarjai péejchach ajasmiai. Yus ni shuarin̄ ti aneak jarukarti tusa wakerimiayi. Tura ni wáitias jakamujai yamaikia ti shiir nan̄kaamas Uunt awajsamuiti.

<sup>10</sup>Ashí írunka nu Yus najanamu ásar ni wakeramun umiktin ainiawai. Tura ashí ni uchirisha ni shiirmarin̄ pachiinkiarat tusa wakerawai. Tuma asa Yuska Jesukristun, nu shuaran Uwemtiknia nuna, ni waitsmujai nekas

Uwemtikkiartin awajsamiayi. <sup>11</sup>Yusna atí tusa shiir awajsamuncha tura Kristu nin shiir awajea nunasha Yuska mai metek ni Aparinti. Nu asamtai Yusa Uchiri nu shuaran “yatsur” títinian natsantatsui. <sup>12</sup>Yus-Papinium núnisan̄ tawai:

“Ame náarmin winia yatsurun ujakartatjai. Ashí iruntramunam kantampruattajme.”

<sup>13</sup>Ataksha ni shuarijai métek enentáim-tamun tawai:

“Yúsan ti shiir enentáimtustatjai.”

Tura ataksha:

“Yus surusmia nú uchirjai Yúsan umirkun pujajai” tawai.

<sup>14</sup>Tura nu uchi aents ásarmatai núnisan̄ Jesussha aents ajasmiai. Tura aents ajas jaka, iwianchin, jatai nérenniurin̄, ashí emesramiai. <sup>15</sup>Tura ti untsurí shuaran uwemtikrarmiayi. Nu shuar yaunchu jákatniun ashamainiak tuke wáitin ármiayi. Antsu ni jakamujai yamá an̄kant áiniawai. <sup>16</sup>Maa, imiá nekasaiti, nayaimpinmaya suntaran yáintaj tusa táchamiayi. Antsu ashí Apraám weean, ashí Yus-shuar ainia nuna yáintajtsa támiayi. <sup>17</sup>Túratin asa pen̄ké métek ni yachía áinis ajasmiai. Nujai in tuke waitnentramparniaitji. Tuma asa Yúsnan pujurniu uuntrī ajas Yúsan tuke pen̄ker chichartamsarniaitji. Núnisan̄ murikiun maa Yus súsatniua áintsan̄ ni jakamujai ashí shuara tunaarin̄ tsan̄kurniuiti. <sup>18</sup>Tura imia nin̄ki waitsa asa tura íwianch nekapsamu asa yamaikia iisha wáitiakrincha tura íwianch nekaprampurnisha yainmakminiaitji.

### Jesus Muisaisjajisha nan̄kaamantuiti

**3** Tuma asamtai, pen̄ker yatsuru, atumniasha Niiniu atí tusa Yus achirmakuitrume. Tuma asarum Kristu Jesus pen̄ker enentáimtustarum.

Niisha Yus nekas Akatramuyayi. Tura ashí Yus-shuar ajasarua nujají Yúsnan pujurniu uuntriá núnisaiti. <sup>2</sup>Nu atí tusa Yus anaikiamiayi. Túramtai Kristu nuna ti penker takasuiti. Núnisan Muisais ashí Yusa aentsrín, Israer-shuar armia nuna ti shiir wainkiamiayi. <sup>3</sup>Túrasha Muisaisjají nankaamas Kristu ti shiir awajnasuiti. Jeajají nankaamas jea jeamniuka nekas péñkerchakait. Núnisan Kristu Muisaisjají nankaamas péñkeraiti. <sup>4</sup>Kame ashí jean shuar jeamtsuk. Tura Yus ashí írúnna nuna najanaiti. <sup>5</sup>Wats. Muisais Israer-shuaran wáiniuk Yusa Jeen takastinia áintsan péñker takarniuyayi. Tura ni takaak ukunam Yus títiatna nuna etserkatniuyayi. <sup>6</sup>Túrasha Kristu Yusa Jeen takarniuchu asa antsu Yusa Uchirí asa nuí ashí akupeawai. Nu jeasha iitji. Tura tuke iniaitsuk kakaram ajasar Yus suramsattaj nu wararsar nákastiniatiji.

### Yusa shuarí shiir pujustin

<sup>7</sup>Nu asamtai, Yusa Shiir Wakanjí Yus-Papinium tawai:

“Yamaikia, Yus tana nu ántakrumka <sup>8</sup>nakittsuk shiir anturkatarum. Israer-shuar yaunchu aents atsamunam wekainiak Yus taman nakitrar Yúsán nekapsar akajkarmiayi. <sup>9</sup>Túramtai Yus tímiayi “Nuí atumí uuntri nekaprusar akajtukarmiayi. Kuarenta (40) uwitin wi kakaram túramun ísarsha nakitrurarmiayi. <sup>10</sup>Tuma ásarmatai nu shuaran kajerkan tiarmajai “Nu shuar ni enentáin tuke awajiniawai. Tura Wi taman umirkatniun nakitiainiawai” tímiyajai. <sup>11</sup>Tura kajerkan nekas tákun “Wijjají shiir pujustinian penké tsankatkachartatjai” tímiyajai” tímiayi Yús.”

Tu áarmaiti.

<sup>12</sup>Anearta, yatsuru. Yajauch enentáimsarum tuke iwiaaku Yus enentáimtutsuk kanakiirap. <sup>13</sup>Kame kashinkia tunaajají anannam enentáimin Yúsna naki-trashtapash. Tuma asamtai yamaik tura ashí tsawant ikiakánairatarum. <sup>14</sup>Yá-mankamtaik Kristu shiir enentáimtus-maj núnisrik tuke iniaitsuk émeteakrikia Krístujají shiir tsaniñkiar pujustatji. <sup>15</sup>Nu asamtai Yus-Papí tawai:

“Yamaikia, Yus tana nu ántakrumka nakittsuk shiir anturkatarum. Israer-shuar yaunchu Yus taman naki-trarua núnisrum ajasairap.”

<sup>16</sup>Muisais Ejiptu nunkanmaya jiiikmia nú shuar Yusa chichamen anturkariat nakitrarmiayi. <sup>17</sup>Tura umiiniachkui kuarenta uwí kajerkarmiayi. Tunaan túrawaru ásar untsurí shuar aents atsamunam kajinñkiarmiayi. <sup>18</sup>Kame umirkacharunka Yus “Wijjají shiir pujustinian penké tsankatkachartatjai” tímiayi. <sup>19</sup>Iis, Yúsán enentáimtachu ásar Nijjají shiir pujustinnium wayatniun tujinkiarmiayi.

**4** Nu asamtai, ii wayatin tsankatkamu áyatar Yusjají shiir pujustinnium páchitkiachu aij tusar aneartiniatiji. <sup>2</sup>Yaunchu nu shuaran ujakarmia núnisan incha Uwempratin Chichaman ujatmakuitji. Nu shuar Yúsán enentáimtutsuk antukaru ásarmatai nu chicham yáincharmiayi. <sup>3</sup>Antsu iikia ni chichame enentáimta asar Yusjají shiir pujustinnium nekas wayaji. Tura chikichan Yus tímiayi:

“Nu asamtai kajerkan nekas takun “Wijjají shiir pujustinian penké tsankatkachartatjai” tímiyajai” tímiayi. Kame Yus jú nunkan najana umik nuyá shiir pujus ayampramiayi. <sup>4</sup>Yus-Chichamnum ayampramun júnis tawai. “Yus sais tsawant takakmas nuyá tsawantají ayampramiayi.”

<sup>5</sup>Tura ataksha tawai:

“Wijjaj shiir pujustinnium wayá ayamprashtatui.”

<sup>6</sup>Shuar nuj wayawar ayampratin tuke awai. Tura emka Uwempratin Chichaman antukarmia nuka umichu ásar wayacharmiayi. <sup>7</sup>Nu asamtai ataksha Yus wayatin tsawantan áanturmaitji. Nusha yamá tsawantaiti. Wats, Israer-shuar ni nunké Yus susamunam wayáwarmiayi. Tura nuna ukunam Uunt Tawit timiajaj Yus ni chichamen ujatmaji:

“Yamaikia, Yus tana nu ántakrumka nakittsuk shiir anturkatarum. Israer-shuar yaunchu Yus taman naki-trarua núnisrum ajasairap” tímiayi.

<sup>8</sup>Kame ni kapitántri Jusué Israer-shuaran ni nunkeen awayá ayamtikraitkiuinjia Yus ukunam ataksha tsawantan áanturmachajaj.

<sup>9</sup>Nujaj páantaiti, ashí Yus-shuar Yusjaj shiir pujusar ayampratin tuke awai. <sup>10</sup>Yusjaj ayampra nu, ni kakarmarijjaj takastinian ayampraiti Yus ni takatríjjaj ayampramia núnisan.

<sup>11</sup>Nu asamtai iisha Yusjaj shiir pujustinnium pachiinkiachajj tusar Yus shiir enentámtusar kakaram ajastiniatji. Israer-shuar yaunchu Yus taman nakitrarua núnis ajaschatniuitji.

<sup>12</sup>Yusa chichame iwiaaku chichamaiti, imiá kakarmaiti. Puniá mai érea núniniatiti. Tuma asa shuara enentáin init wayá ashí ni enentáimmian tura wakeramurin ti paant awajtai. <sup>13</sup>Yus najanamuka penké Nin umprukchamniatiti. Ashí írúnna nu Yus íimmianum misúa áintsan paant ániawai. Tura ii túramu ashí paant ujakartatji.

### Jesus nekas Yúsnan pujurniu úuntriinti

<sup>14</sup>Jesus Yusa Uchiri nekas Yúsnan pujurniu uuntri ajas Yusaj wayá iiniun chichartamji. Nu asamtai iniaitsuk tuke

nekas enentámtustiniatji. <sup>15</sup>Niisha iijjaj métek ashí tunaanum nekasamuiti. Túrasha tunaan túrachmiayi. Tuma asa ii tujintiaj nuna paant nékak ii itiurchatrin waitnentranniuitji. Tura Yúsnan pujurniu uuntri asamtai <sup>16</sup>Yús-akuptainium shiir enentájjaj sapijmiatsuk jeamniatiti. Tura Yus in anenma asa waitnentramak itiurchat pujajnia nuj yainmaktatji.

**5** Tura Yúsnan pujurniu úuntriikia shuar anaikiamuiti tura ni takatrí jímiairaiti. Yusaj shuarán chicharsatniuiti. Nuyasha Yus suíniamun súsatniuiti tura núnisan namanken maa Yúsán súsatniuiti shuara tunaarin asakátratniun. <sup>2</sup>Tura Yúsnan pujurniu uuntri niisha shuar asa ni tujintiamun nékak shuar nékachuncha tura waak yujainia nunasha waitnentranniaiti. <sup>3</sup>Tura niisha tujintia asa ni tunaarincha chikichnajaj métek tsankurnarat namanken maa Yúsán súsatniuiti.

<sup>4</sup>Shuar ni enentájjajinkia Yúsnan pujurniu uuntri ajaschamniatiti. Antsu Yus nu shuaran anaikiatniuiti. Núnisan Arunkan anaikiamiayi. <sup>5</sup>Núniskete Krístujaj. Niisha ni enentájjaj Yúsnan pujurniu uuntri ajaschamiayi. Antsu Yus Nin anak nujaj shiir awajsamiayi. Tura tímiayi:

“Ame winia Uchiruitme. Túmaitkui yamaikia winia kakarmarun átakeajme.”

<sup>6</sup>Tura ataksha Yus-Papinium júnis tawai:

“Mirkisetékka Yúsnan pujurin amia núnismek Amesha tuke Yúsnan pujurin átatme.”

<sup>7</sup>Kristu jú nunkanam pujak kakantar úutuk Yúsán ti seamiai. Nin jákatniun-maya uwemtikramnia asamtai seamiai. Tura Yusa wakeramurin tuke enentájjaj enentámtakui Yus anturak ti yáinmiayi. <sup>8</sup>Nujaj Kristu Yusa Uchiríntiat ni wáit-

satniujaj umirkatniun unuimiarmiayi.  
<sup>9</sup>Nujaj ti nekas Uwemtikin ajasmaiyi.  
 Tura shuar umirainia nuna tuke uwem  
 ataksha Yus-Papinium júnis tawai:

“Mirkisetékka Yúsnantikrarminiaiti.  
<sup>10</sup>Túramtai Yus Nin Yúsnan  
 pujurniu uuntri Mirkisetékjaj métek  
 awajsamiayi.

### **Anearta. Yusjaj kanakchatniuiti.**

<sup>11</sup>Ju ti nukap áujmatsatin awai.  
 Túrasha ántichu asakrumin mashi  
 ujakchamniatjarme. <sup>12</sup>Átumka

yaunchu mash nekaamaintrume.  
 Túmaitiatrum ataksha yaitiás Yúsnan  
 jintintruat tusarum atsumarme. Warí,  
 kuirchia núniniaitrum. Kátsuram  
 yútsuk muntsu muntsúatniuitrum.  
<sup>13</sup>Kuírchikia Uwempratin Chichaman  
 áujenak péñker unuimiainiatsui.  
 Tíñkiamnumiá ásar tujintiainiawai.  
<sup>14</sup>Apatuk kátsurman aya uunt  
 yuámniaiti. Uunt ainia nuka  
 péñkernasha tura yajauchincha apatkar  
 paant nékainiawai.

**6** Uunt ajastai. Krístunu ana nuyá aya  
 yúpichuchia nuke enentáimtusuk  
 nu arantcha unuimiartai. Kame emka  
 unuimiartinia nu ju ániawai: shuar  
 ni tunaarín jákatniunam júana nuna  
 kúntuts enentáimtur Yúsan shiir  
 enentáimtustincha, <sup>2</sup>imiantinnium  
 nekaatniuswai:

“Mirkisetékka Yúsnanha, Yus-shuar  
 yainmanum uweje awantsatniusha,  
 jakamunmaya nantaktincha,  
 tura sumamtikiatin tsawanta  
 nu nekaatniusha. <sup>3</sup>Tura Yus  
 yáinmakrin nuna nankaamas  
 nekaattaji.

<sup>4</sup>Shuar Yusna nuna nekaaŋka tura  
 Yus susamun takakkuŋka tura Yusa  
 Shiir Wakaní kakarmarín nekapsaitki-  
 unka <sup>5</sup>tura Yusa chichamencha péñk-  
 eraiti nekaaŋka tura Yusa kakarmari  
 ukunam nuŋka yamarmanum takastatna

nuna yamáí nekapeakka, <sup>6</sup>nu shuar  
 nuna nakitiak kanakniaka atak ni tu-  
 naarín enentáimtak ikiuktinian waker-  
 achuk tujinkiattawai. Warí, ní enen-  
 táijjaj Yusa Uchirín krúsnum máini-  
 aiti túrak ashí íimiainiáj natsanmain  
 awajeawai. <sup>7</sup>Nu shuar yajauch nuŋka  
 áintsan ániawai. Yumi yútakui péñker  
 nuŋka arakan péñker tsapatmakka arak-  
 maun yayawai. Túramtai Yus shiir enen-  
 táimiui. <sup>8</sup>Antsu jaŋkí nupan tsapat-  
 makka nu nuŋka yajauchiiti. Yus áeseak  
 emesattawai.

### **Yus tsan̄katramkattajnia nu enentáimtakur kakaram ajaji**

<sup>9</sup>Aneamu yatsurú, tu chicharkursha,  
 nú shuarchaitrum nu nékaji. Antsu  
 uwempra asarum nú péñker túrattarme.  
<sup>10</sup>Yus ti péñker asa átum takasmancha  
 tura ni aneakrum Yus-shuar yainmancha  
 kajinmatkishtatui. Tura yamaisha  
 tuke túrarme. <sup>11</sup>Tura nuik túrarmena  
 núnisrumek tuke iniaitsuk kakaram  
 takasrum ashí Yus tsan̄katramkatta  
 nu wáinkiatarme. Núnisan atí tusar  
 wakeraji. <sup>12</sup>Nakimtsuk kakaram  
 ajastarum. Niiniua nuna Yus ni  
 shuarín susattawai. Tura shuar Yúsan  
 enentáimtak shiir enentáijjaj nákakka  
 nuna wainkiattawai. Tu takastarum  
 tusar wakeraji.

<sup>13-14</sup>Yus yaunchu Apraámjaj  
 chichaak “Ti nekas shiir awajsattajme  
 tura ti nukap pampamtikrattajme”  
 tímiayi. Nuna taku imiá nekas tajai  
 tusa tura chíkich Niijjaj nankaamas  
 uunt atsakui imia Niñki pachiiimas  
 tumammiai. <sup>15</sup>Tutai Apraám  
 yáitmataik nákas Yus timia nuna  
 wáinkiamiayi. <sup>16</sup>Shuar “nekas tajai  
 Yus íirui” tákuŋka chíkich niijjaj  
 nankaamas úntan páchiawai. Tura  
 tu chichasmatain̄kia nuyánka imiá  
 nekas tana nu nekaamniaiti. <sup>17</sup>Tuma  
 asamtai Yuska “ti nekasan yapájítsuk

túrattajai” tusa imia Niŋki pachiimias tumammiayi. Nujai ni tsan̄katkamun júkiartatna nu shuar Yus ti nekas umiktatna nuna nékainiawai. <sup>18</sup>Yus pen̄ké wáitruachmin asa áyatik ni tamajai nekasaiti. Nuna arant nuikia imia Niŋki pachiimias ti ikiakátmaji in. Nujai iisha uwempratai tusar Niini weamkatikia tsan̄katramkattajnia nu ti shiir enentáimsar wáinkiatin nákaji. <sup>19</sup>Nu enentáimsar kakaram ajaji. Yusaia in umuchtiamkamnia pen̄ké atsawai. Yusai áchitkia asakrin ti kakaram emettamji. <sup>20</sup>Jesussha emka Yusaia wayá mash iwiarturmaji. Tura Mirkiseték amia núnisan Niisha yamá tuke amuukashinian Yúsnan pujurniu uuntri ajasuiti.

### Mirkiseték amia núnisan Jesussha Yúsnan pujurniu uuntri ajasuiti

**7** Nu Mirkisetéksha Sarem nunkanam akupniuyayi. Tura ashí nan̄kamas kakaram Yúsnan pujurniuyayi. Apraám chíkich akupniun mesetjai awakak tá-matai Mirkiseték jiintiuki in̄kiun ti shiir awájsamiayi. <sup>2</sup>Túramtai Apraám nupet-makar kuit jukimiun tias (10) akantuk susamiayi. Mirkisetéka naari tana júka “ti pen̄ker uunt akupin” tawai. Tura Saremka “ti shiir imiatkincha” tawai. Tura Mirkiseték Sarema akupniuri asa “ti shiir imiatkinchanum akupin” tawai. <sup>3</sup>Nukurisha aparisha Yus-Chichamnum atsawai. Núnisan ni uuntri sha atsawai. Ni akiiniamurincha ni jakamurincha ujaatsui. Tuma asamtai Yusa Uchiría áintsan tuke iniannakchatniun Yúsnan pujurniu uuntri ajasuiti.

<sup>4</sup>Mirkiseték timiá uuntauya nu enentáimprata. Ii uuntri Apraámsha nupetmakar kuit jukimiun tias akantuk susamiayi. <sup>5</sup>Tuma asamtai Apraám nan̄kaamas úuntaiti. Muisais akupkamujai Riwi weeáka Yúsnan pujurin ániawai. Niisha

ashí Israer-shuarjai métek Apraám weeá ániawai. Túmaitiat pen̄ké Israer-shuar ni waririn tias akantuk Riwi shuaran suu ármiai. Muisais tu akupkamiayi. <sup>6</sup>Túrasha Mirkiseték Riwi weeachunak Apraám tiásan akantuk nin susamiayi. Apraám Yus shiira nuna tsan̄katkamuitiat Mirkisetékan niijjai uunt asamtai susamiayi. Túram Mirkiseték Apraáman shiir awajsamiayi. <sup>7</sup>Imiá nekas Mirkiseték Apraáma nan̄kaamas páantin asa Apraáman shiir awajsamiayi. <sup>8</sup>Israer-shuarti tias akankamun súajnia nú shuar aya aents ásar tuke pujuschamin ániawai. Antsu Mirkiseték jakamun Yus-Chicham pen̄ké ujaatsui. <sup>9</sup>Yamá Riwi weeá shuar kuit akankamun achiktin ániawai. Túrasha Apraám Mirkisetékan súakui Riwi weeá nujai susa ániawai. <sup>10</sup>Apraám weeá ániak ni ayashía áinis enentáimtusmin ániawai.

<sup>11</sup>Muisais akupkamunam Riwi-shuarnumiá aya Arun weeá shuar Yúsnan pujurin ármiai. Niisha Muisais akupkamu timia nujai métek pen̄ké shuarjai takasarmiai. Tura Riwi-shuarnumiá Yúsnan pujurniu takatrijiai tunáa nekas asakárminiaitkiuinkia Yúsnan pujurin yamarmak, Arun weeachu, anaikiashtin ainti. Túrasha Yus Jesusan, Mirkiseték amia áinis, Yúsnan pujurniun anaikiai. Nusha Arun weeachuiti. <sup>12</sup>Tura Yúsnan pujurin yapajniámtai Muisais akupkamusha yapajniátniuiti. <sup>13-14</sup>Nu arantcha, ii Uuntri Jesukristu Riwi-shuarcha antsu Jutá-shuarauyayi. Tura Muisais akupkamujai Jutá-shuarnumiá Yúsnan pujurin atsutniuiti. Antsu nuna takarin pen̄ké túrashtiniuyi. Tuma asamtai nújaisha Muisais akupkamu yapajniátniuiti.

<sup>15</sup>Nú páantcha awajsamniaiti. Wats, Yúsnan pujurin yamarma nuka



Mirkisetékjaj méteketete. <sup>16</sup>Nin<sup>ki</sup> Riwi shuar asa Yúsnan pujurin ajaschamiayi, antsu jákashtin asa nu kakarmajaj Yúsnan pujurin ajasmiai. <sup>17</sup>Tuma asamtai juna Yus Jesusan áujmatui:

“Mirkisetékka Yúsnan pujurin amia núnismek Amesha iniannatsuk Yúsnan tuke pujurin átatme.”

<sup>18</sup>Nujaj yaunchu akupkamu péñkercha ajasmatai japirmaiti. <sup>19</sup>Muisais akupkamuka shuáran péñker awajsachminiuyayi. Antsu Yus in ti shiir awajtam-sattajnia nu nákJaj. Nujaj Yusaj ti shiir jeeáitji.

<sup>20</sup>Nunasha Yus “nekas tajaj” tusa Nin<sup>ki</sup> pachiiimas tumammiai. <sup>21</sup>Riwíshuarnumiá Yúsnan pujurin Yusa naari pachitsuk anaikiamu ármiayi. Antsu jú Yúsnan pujurniunka Yus imia Nin<sup>ki</sup> pachiiimas anaikiamiayi. Tura Nin júnis tímiayi:

“Uuntka imia Nin<sup>ki</sup> pachiiimas tiniu asa penké yapajjáshstatui. Niisha “Mirkisetékka Yúsnan pujurin amia núnismek Amesha tuke Yúsnan pujurin átatme” tímiayi.”

<sup>22</sup>Tuma asamtai Jesuska nekas uwentikrattajaj tusa yaunchu amia nujaj nan<sup>ka</sup>amas péñker Chichaman iwiarturuiti. <sup>23</sup>Yaunchu Yúsnan pujurin untsurí ármiayi. Chíkích jakamtai chíkích tuke takaarmiai. <sup>24</sup>Antsu Jesus tuke jákashtin asa chikichan ikiurkishtatui. <sup>25</sup>Tuma asa tuke iwiaaku pujak ni shuarin tuke Yúsán áujtusminiaiti. Tuma asa shuar Nin enentámtusar Yusaj weankarun tuke uwentikramniaiti.

<sup>26</sup>Tuma asa Jesus Yúsnan péñker pujurin asa ii atsumajnia núkete niisha. Niisha ti shiir asa penké tunaarinchaiti. Ashí tunaariniunmayá kanakniuiti. Tura Yusaj métek Uunt ajasuiti. <sup>27</sup>Niisha yaunchu Yúsnan pujurniu uuntri armia núnikchaiti. Yaunchua nuka murikiun máawar ashí tsawant Yúsán suu ár-

miayi. Nujaj emka ni tunaarin nuyá ashí shuara tunaarin asakátin ármiayi. Tura Jesuska jákatniunam chikichki surumak ashí shuara tunaarin asakátramiayi. <sup>28</sup>Muisais akupkamuka penké shuarnak tuke péñkercha aín Yúsnan pujurniu uuntrin anaikiaiti. Tura nu ukunman<sup>ka</sup> Yus, nekas nin<sup>ki</sup> pachiiimas, ni Uchirín, tuke péñkera nuna, Yúsán pujurniu uuntrin anaikiaiti.

### Nan<sup>ka</sup>amas péñker Chichaman Jesus takartamji

**8** Nekas juna tájame: Yúsnan pujurniu uuntri Jesus in ti shiir yainma asa akupin pujutanium Yusa untsuurin<sup>i</sup> nayaimpiniam pujusuiti. <sup>2</sup>Nekas Yusa Jee nayaimpinma nu aents najanachma antsu Yus najanamuiti. Nui Jesus Yúsnan pujurui. <sup>3</sup>Ashí Yúsnan pujurniu uuntri ainia nu, shuar Yúsnan susamuncha tura naman<sup>u</sup> maar Yus sútaincha Yúsán ashí súsatin ániawai. Núnisan<sup>u</sup> Jesukrístusha Yúsán súsatniuiti. <sup>4</sup>Juyá Yúsnan pujurin Muisais timia nuna Yúsán yamaisha susamin akui Jesus ju nun<sup>kan</sup>am pujakka Yúsnan pujurin áchainti. Antsu nayaimpiniam takaawai. <sup>5</sup>Yus yaunchu Muisaisan nayaimpiniam írunka nuna iniaktus tímiayi “Ame wáinkiamna nujaj métek ashí najanata.” Túramu asamtai ashí yaunchu Yúsán pujurin Muisais najanamujaj takainia nu aya nayaimpiniam ana nuna nakumkamujain<sup>u</sup> takainiawai. <sup>6</sup>Antsu Jesus ti nekasa nujaj nayaimpiniam takaawai. Muisais akupkamuka shuáran péñker awajsachminiaiti. Antsu Yus in ti péñker awajtam-sattajaj. Kame Yamaram Chichamnum Yus ashí túrutmattajnia nu Muisais akupkamunam ana nuna nan<sup>ka</sup>amas ti péñker ániawai. Tuma asamtai nan<sup>ka</sup>amas péñker Chichaman Jesus takartamji.

<sup>7</sup>Kame Emka Chicham, Yus Muisais-jai yaunchu najanamia nu, nekas pénk-eraitkiuin̄kia Yamaram Chichaman najanachaayi. <sup>8</sup>Antsu péinkercha ániakui Israer-shuaran tímiayi:

“Uunt Yus tawai: “Tsawant jeamtai ashí Israer-shuarjai Yamaram Chichaman najanattajai. <sup>9</sup>Yaunchu ju shuara uuntrin̄ Ejiptunmaya yaruakmij nuí Emka Chichaman najanamjai. Tura Yamaram Chichaman najanattaj nu núnischa átatui. Emka nuna uminiachkui ajapan iniaisarmajai.” Núnis tawai Uunt Yus. <sup>10</sup>Tura nu arantcha tawai: “Tsawant jeamtai Israer-shuarjai Yamaram Chichaman najanattaj nuka júnis átatui. Wi akupeajna nuna enentáin̄ paant enentáimtikrartatjai. Nuyá ni Yusrí ártatjai tura niisha Wíi shuar ártatui. <sup>11</sup>Nuisha Yúsán nekaat tusa jintinnaiyachartatui. Kame ni aisha ni yachisha kame ashí shuar, uchisha uuntcha, ashí nekarawartatui. <sup>12</sup>Tura ashí ni tunaaríncha tsankuraran ni yajauchirin̄ atak penké enentáimtuschartatjai” tímiayi.” Tu áarmaiti.

<sup>13</sup>Wats, Emka Chicham yajauch ajakui Yus Yamaram Chichaman najaneak pujurui. Tura yajauch ajasua nuka wárik ajapnattawai.

### **Yusa Jee nayaimpinmasha tura ju nunkanmasha**

**9** Ayu. Yus shiir awajsatniuka Emka Chicham timia nujai métek túratniuyayi. Tura ju nunkanmaya Yusa Jee weriar Yús shiir awajsatniuyayi. <sup>2</sup>Nu Jeeasha júnis tesakmauyayi. Nékatka Shiir Tesaamu tutainti. Nuí asutin̄ ekeemakar tsáapin awajtaisha tura misasha Yus iniaktusma tantajai pujuyayi. <sup>3</sup>Nuyá-tesaamuka

Imiá Shiir Tesaamu tutainti. <sup>4</sup>Nu kun̄kuin̄ ekeemataisha kurijjai kuerma tura Chícham Aarma Chumpitiaisha pujuyayi. Nusha ashí kurijjai kuérmauyayi. Tura init kurijjai najanamu ichin̄kian maná yurumak enkemniuyayi. Nuyá Yúsán pujurniu uuntri Arun̄ka ushukrutairi yaunchu tsapaak jan̄kukmia nusha enkemniuyayi. Nuyá Yus najanamu Chícham Muisais kayanam aarmasha enkemniuyayi. <sup>5</sup>Nuna úkurin̄ Kirupín, nayaimpinmaya suntara nu, kurijjai nakumkamu wajarmiayi. Nusha Yusa shíirmarin̄ nakumkarmiayi. Tura ni nanapéjai shuara tunaarín̄ ayamprutain nukúakuyayi. Nuna arantka yamá etserkatin̄ atsumatsji.

<sup>6</sup>Núnis aa asamtai Shiir Tesaamunam ashí Yúsán pujurin̄ tuke wáiniak Yúsán takasarmiayi. <sup>7</sup>Tura Imiá Shiir Tesaamunman̄ka aya ni uuntrin̄ wáini-auyayi. Tura niisha ashí uwitin̄ aya chikichik tsawant wayamiayi. Wayak ni tunaarisha tura ashí shuara tunaari tsankurnarat tusa Yus súsatniun̄ namanké numpen̄ juu ámiayi. <sup>8</sup>Yusa Wakan̄i núnis atí tusa nuna mash iwiaramiayi. Tura asa juna paant awajturmajai. Jú nunkanmaya Yusa Jee pujakui tura aya nuin̄ Yus shiir awajsamniaitkiuin̄kia nekas Imiá Shiira nuí Yus pujamunam wayatin̄ tuke itiurchat ainti. <sup>9</sup>Nusha yamá pujuin̄iaj nuna enentáimtikrampratniuitji. Shuar Yus shiir enentáimtikratniun̄ namanken̄ maa suíniaksha nu shuar ni tunaarijai tuke itit enentáimtumainiawai. <sup>10</sup>Warí, aya yurumátniusha umartin̄cha nijartin̄cha tura ashí núnisan̄ túratniujai aya pátatek asamtai enentáin̄iam ana nuna iwiarachmin̄ ániawai. Antsu Yus nú túratniunka yapajátniuyayi. Tuma asamtai yapajniátsain̄ túratin̄ ániawai. <sup>11</sup>Tura yamaikia Kristu táwiti tura Yúsán pujurniu uuntrī ajas Yamaram Chichamnum Yus ti

penkeran túrutmatniua nuna pujurturmaji. Niisha ti shiir Yus Jeá aents najanachmanum takaawai. Nu Jeá ju nunkanmayanchuuti. <sup>12</sup>Tura Kristu Imiá Shiir Tesaamunam namanke numpéjaj wayachuiti antsu ni numpejaink<sup>i</sup> wayaiti. Tura aya chikichkí wayá ii tunaarín asakturmar tuke uwemtikrampramiaji. <sup>13</sup>Nekas namanké numpesha tura áisamu yunkunmirisha tunáa shuarnum páatek ukatkamu aya páatek shiir awajsamniuyi. <sup>14</sup>Túrasha Kristu numpé ii tunaarín penké asakáruiti. Túramtai yamaikia tunáa jákatniunam júana nujaj itit enentáimtumatsuk nekas iwaaku Yus shiir umirkamniatji. Kristu penké tunaaríncha asa tuke jákashtin Wakaní kakarmarijjaj jákatniunam Yusaj surumakmiayi.

<sup>15</sup>Nu asamtai Jesukristu Yamaram Chichaman shiir takarniuiti. Yaunchu Chichamjaj tunáa nekas tsankurachma asamtai Kristu jaka nu tunaancha tsankurarmiayi. Nujaj ashí Yus-shuarti Yus achikma asar Yus tsankatramajnia nu wáinkiar tuke wararsattaji. <sup>16-17</sup>Shuar ni kufrín akantrattak chichaman najanatniuiti. Tura jáatsajin nu kuit akantrashtiniaiti. Aya nii jakamtai nu chicham najanamu uminkiatniuiti. <sup>18</sup>Nu asamtai Emka Chicham Muisaisjaj najanamusha maamu numpé ukatramujaj akupkamuyayi. Nujajisha naman máatniuyayi. <sup>19</sup>Muisais nu akupkamun ashí shuáran ujakarmiayi. Nuyá ure kapaakujaj tura nupajajisha namanké numpé entsajaj pachimpramujaj ayak akupkamu papíncha ashí shuarnasha ukatkarmiayi. <sup>20</sup>Tura tiarmiayi “Ju numpajaj “Chícham Yus akupturmarmena nu nekas umiktiniaiti” tawai.” <sup>21</sup>Nuyá nu numpajaj Yusa Jeencha ashí nuí takastin irunmia nunasha ukatkarmiayi. <sup>22</sup>Nu akupkamujaj penké ishichik

numpajainchu shiir awajsamniaiti. Túrasha numpajainchu tunáa penké asakárchamniaiti.

### Kristu jakamujaj tunáa asakárminiaiti

<sup>23</sup>Tuma asamtai Muisais najanamu nayaimpiniam ana nuna aya nakumkamu ásar namanké numpejaj shiir awajsamu árimiayi. Antsu nayaimpiniam nekas írunna nu, nankaamas kakaram numpajaj shiir awajsatin ániawai. <sup>24</sup>Krístuka yaunchu Yusa Jeen aents najanamunam takastaj tusa wayachmiayi. Nuka nayaimpinmayan aya nakumkamuiti. Antsu nekas nayaimpiniam Yus pujamunam wayá asa in áujturmaji. <sup>25</sup>Yaunchu Yúsnan pujurniu uuntrj ni numpejainchu ashí uwitin Imiá Shiir Tesaamunam wajin árimiayi. Tura Krístuka untsurí wayachuiti. <sup>26</sup>Kame untsurí wayatniuitkiuin<sup>ki</sup> ni numpejaink<sup>i</sup> wayá asa yámankamtaiknumia untsurí jákaayi. Antsu yamaikia ju nunka amúamunam Kristu chikichkí jákatniunam surumak tunaan ashí asakáruiti. <sup>27</sup>Ashí shuar chikichkí jakar nuyá ni túramun Yusaj nekamatniun nantaktin ániawai. <sup>28</sup>Núnisan Kristu chikichkí jákatniunam surumak shuara tunaarín asakáruiti. Tura atakka tunaan asakártinian wantinkiashtatui. Antsu ni tátinrín nákania nuna uwemtikktratts wantinkiattawai.

**10** Muisais akupkamuka ukunam ti penker átatna núchaiti. Antsu nuna aya nakumeawai. Tuma asa ashí uwitin naman maar Yus sítaijjajisha shuara tunaarín asakátrachminiaiti. <sup>2</sup>Kame asakátraka shuar nekas shiir awajsamniaitkiuin<sup>ki</sup> Yusa naman maar súsatniun atsumachuk iniaisarajayi. Iis, mash tsankuramuitkiun<sup>ka</sup> ni tunaaríjjaj itit enentáimtumascharainti. Túrawar naman maar Yus súsatniun

iniaisarainti. <sup>3</sup>Antsu naman̄ken maar ashí uwitin tuke suíniak nujaī ni tunaar̄in tuke enentáimtuiniawai. <sup>4</sup>Warí, naman̄ké numpejaī ii tunaarī pen̄ké asakárchamniaiti.

<sup>5</sup>Nu asamtaī Kristū jú nun̄kanam taa Yúsan chicharuk tímiayi:

“Naman̄ maar sútaisha pen̄ké nakitráme.

Antsu ayash̄ iwíaram surusuitme.

<sup>6</sup>Naman̄ áesamusha tura tunaan asakártin naman̄ susamusha wakeratsme. <sup>7</sup>Tuma asamtaī “Yusrú, tími-ajai. Winia áatrurma núnisnak ame wakeramurmin umiktajtsan táwitjaī” tímiajai” tímiayi.

<sup>8</sup>Emka, Muisais akupkamu ain̄, naman̄ susamuncha, tunaan asakárat tusa naman̄ maar susamuncha, naman̄ áesamuncha Yus ashí nakitraiti tawai Kristu. <sup>9</sup>Nuyá “Yusrú, ame wakeramurmin umiktajtsan táwitjaī” tawai. Nuna taku naman̄ maar sútain “Asakáiniaiti” tawai. Tura chikichan ikiuawai. <sup>10</sup>Jesukristū Yúsan umiruk jákatniun chikichkí surumakmatai Yus in tunaar̄incha shiir awajtamsaitji.

<sup>11</sup>Tura Israer-shuarnumiá Yúsnan pujurin ashí tsawantaī nú naman̄nak máawar tunaan asakáchunak Yúsan ti suu áiniawai. <sup>12</sup>Antsu Jesukristuka jákatniunam chikichkí surumak ashí shuara tunaar̄in asakár atakka pen̄ké jákashtiniaiti. Nuna tura Yusa untsuurin̄i nekas akupin pujutainium pujusuiti. <sup>13</sup>Tura Yus ni nemasr̄in nupetak nin umirkarti tusa súsartatna nuna nákawai. <sup>14</sup>Chikichkí jakamujaī ni shuar̄in tuke tunaar̄incha awajsaruiti. <sup>15</sup>Yusa Wakanīsha núnisan̄ tawai. Emka tímiayi:

<sup>16</sup>“Yamaram Chichaman najanattaj nuka júnisan̄ átatui: Wi akupej nuna ni enentáin̄ paant enentáimtikrartatjaī.” <sup>17</sup>Nuyásha tawai: “Ni yajauch tunáa túramur̄in pen̄ké enentáimtuschat̄tajaī.”

<sup>18</sup>Tuma asamtaī, ii tunaarī tsanku-ramu asamtaī atak in jarutramkatin atsumatsji.

### Yus tuke shiir enentáimtusar Yusaī jeartai

<sup>19</sup>Tuma asamtaī, yatsurú, Jesukristū numpejaī pen̄ker awajsamu asar sapijmiatsuk shiir enentáijjaī Imiá Shiira nūi, nekas Yus pujamunam wayamni-aitji. <sup>20</sup>Nūi wayatniuka Kristū jaka Yusa Jēen tesaamun júsatniua áintsan̄ ántur-mamijai. Yamaisha tura tuke wayamnia átatui. <sup>21</sup>Jesus Yúsnan pujurniu uuntrī asa ashí Yus-shuartin wáitmak pujurtamji. <sup>22</sup>Tuma asamtaī, tuke enentáijjaī Yus imiá nekas enentáimtusar Yusaī jeartai. Ii enentáī Kristū numpejaī nijiarma asamtaī nekas enentáimtakur ii tunaar̄ijjaī itit enentáimtumaschatniuitji. Tura ii ayash̄isha pen̄ker entsajjaī imianniuuitji. <sup>23</sup>Yus tsankatramkat-tajnia nu shiir enentáimtamun iniait-suk kakaram ajar tuke emetatniuitji. Yus tsankatramkaitji nuna umiktatui. <sup>24</sup>Pen̄ker anenain tura pen̄ker túrin ajarantaī tusar mai yainiaikiartiniaitji. <sup>25</sup>Yusa Jēen Yus-shuar̄jaī tuke iruntrat̄in iniaiashtiniaitji. Chíkich iniainiakuisha iikia tuke iruntrat̄niuitji. Nūi irunkurkia ikiakánairtiniaitji. Tura Kristū tátin tsawantrī ishichik ajasu asamtaī nú nukap túratniuitji.

### Anearta. Ti tsúumainti iwiaaku Yusa kakarmar̄ijjaī asutniátin.

<sup>26</sup>Túrasha shuar̄ nekas chichaman nékayat wakeramur̄ijjaīn tunaanum wekaakka Kristū jakamun nakitia asamtaī chíkich atsawai ni tunaar̄in asakátratniun. <sup>27</sup>Áyatik ashamak ti tsuumai sumamatin tsawantan nákasminiaiti. Nu tsawantaī Yus ni nemasr̄in ti kajerak asutíak mash emesrattawai. <sup>28</sup>Shuar̄ Muisais akupkamun umikchamtai

tura jímíar shuar maintiusha etserkarmatai waitnentsuk máatniuyayi.

<sup>29</sup>Núnisaitkiuinkia shuar Yusa Uchirín wishikiainiakka ni numpencha nakitiainiakka tura Yus nin anea nuna Wakaníncha katsekainiakka nuna nankaamas asutniáchartatuak. Warí, nii nakitiana nu numpajai Yamaram Chicham nekas umirkatin awajsamuyayi. Tura nújaisha nii ti péñker awajnastiniuyayi. <sup>30</sup>Ii Uuntrí Yus júnis tímiayi “Wi asutiátniuitjai. Wi yapajkiattajai.” Nuyásha tímiayi “Wíi shuara tunaarín ti paant nekarattajai.”

<sup>31</sup>Ti tsúumainti iwiaaku Yusa kakarmarijiai asutniátin.

<sup>32</sup>Tura atumsha yámankamtaik Yusna nekaarum Yus-shuar ajasmarum nu enentáimsatarum. Kakaram ajasrum ashí itiurchat katsuntramarme.

<sup>33</sup>Chíkichtirmeka katseknakmarme tura ashí íimiainiamunam yajauch awajnasarmarme. Chikichcha nu shuarnum pachitkia asarum itit awajnasarmarme. <sup>34</sup>Atumsha sepunam pujuinia nusha waitnentrarmarme.

Tura shiir warasrum kufrumin atantramainiakkuisha katsuntramarme. Nayaimpiniam tuke amuukashtin kuit pachiktin asarum túramarme.

<sup>35</sup>Tuma asarum yawetsuk Yus tuke enentáimtusrum kakaram ajastarum. Túrakrum nankaamas akinkiatarmarme.

<sup>36</sup>Atumsha esetra enentáimsarum Yus wakera nu túrakrum Yus atumin amastinia nu wainkiattarmarme. <sup>37</sup>Kame Yus-Chichamnum áarmaiti:

“Tátinia nu ishichik ajasai. Wárik tátatui. <sup>38</sup>Shuar Yúsán nekas enentáimtak péñker wekaak uwemprattawai. Tura iniaiyakuinkia nin wararsashtatjai.”

<sup>39</sup>Tura iikia iniaisar mesena nú shuar-chaitji. Antsu Yus shiir enentáimtusar uwempraitji.

### Yus nekas enentáimtustin

**11** Yus nekas enentáimtakur “náka-jnia nuna, Yus nekas suramsattaji” taji. Tura wáinchaitiatar “nekas wainkiattaji” taji. <sup>2</sup>Yaunchu ii uuntrí Yúsán nekas enentáimtuiniakui Yus “péñkeraitme” tiarmiayi.

<sup>3</sup>Aya Yus enentáimtakur ju nékaji: Yus aya ni chichamejain ashí nunkan najanamiayi. Túramtai ashí wáiniainiaj nu wáinchataijiai najanamu áiniawai.

<sup>4</sup>Apir Yúsán nekas enentáimtak Kaín-jai nankaamas péñkera nuna Yúsán susamiayi. Túramtai Yus “péñkeraitme” taku shiir yuminsamiayi. Tuma asamtai Apir jákaitiat tuke enentáimtikramji.

<sup>5</sup>Eruksha Yúsán nekas enentáimtak iwiaakuk nayaimpiniam junakmiayi. Yus jukimiu asamtai wáinkiacharmiaiyi. Tura Yus-Chichamnum aarma “Eruk júnatsuk Yúsán ti shiir enentáimtikniuyayi” tawai. <sup>6</sup>Tura Yus nekas enentáimtachkumka ¿itiurak Nii shiir enentáimtiksatam? Nekas enentáimjai Yúsán weantuktaj tusam wakerakmeka, emka, Yus iwiaaku pujawai, tu enentáimpratniuitme. Nuyásha, Wi Yúsán eakuinkia Yuska winia yáintkiattawai, tu enentáimsatniuitme.

<sup>7</sup>Yus, ‘amaarkatniun akupkattajai” tiniu asamtai, Nuaisha Yúsán nekas enentáimtak, amaarun wáinchaitiat, “túrunattawai” tímiayi. Túrak Yus timiajai métek uunt kanun najana ni shuaríncha uwemtikramiaiyi. Tura Yúsán nekas enentáimta asamtai Yus “péñkeraitme” tímiayi. Tura ni umirkamujai chíkich shuar Yúsán enentáimtachun súmamtikiawarmiaiyi.

<sup>8</sup>Tura Apraámsha Yúsán nekas enentáimtak Yus “núñkem ikiukim wetá” tuta shiir umikmiayi. Yus tuke nin súsatniua nú nunkanam wémiayi. Turasha ni nunken ikiuak ni jeatniun nékatsuk

jiinkimiayi. <sup>9</sup>Yúsan shiir enentáimtak nú nunkanam Yus nin tsankatkamuitiat írara áinis pujusmiayi. Nuap jeanam pujuyayi. Núnisan ni uchirí Isaksha tura ni tirankí Jakupsha nuíñ tsankatkamuiti-atan írara núnisar pujuarmiayi. <sup>10</sup>Kame Apraámka nayaimpinmaya ashirchamin péprunam pujustinian nákasmiayi. Yus nu pepru péñker iwiar jeamka asamtai umuchkiachiniati.

<sup>11</sup>Apraáma nuwé Sarasha Yúsan shiir enentáimta asa úuntach áyat ajaprukmiayi. Yus timia nuna umiktatui tau asa uchin takusmiayi. <sup>12</sup>Tura nujai Apraám ti úuntchitiat ti pampanmiayi. Nii chikichkitiat ni pampanmari ti untsurí ajasar yaajai métek tura náikmijiai métek nekapmarchamnia ajasarmiayi.

<sup>13</sup>Ashí nu shuar Yus tsankatkamun wáintsuk jákarmiayi. Túrasha Yúsan nekas enentáimtuiniak arantiá wáinkiar warasar shiir enentáimtiarmiayi. Túrawar “ju nunkanam nekas aya íraraitji” tiarmiayi. <sup>14</sup>Íraraitji” tu chichainiak chíkich nunka eamun páant awajainiawai. <sup>15</sup>Niisha matsatu winármia nuí atak waketkitniun wakeruniakka páchitsuk waketkiaraayi. <sup>16</sup>Tura antsu niisha nuna nankaamas péñker nunkan nayaimpinmaya nuna enentáimtiarmiayi. Túmainiakui Yuska péprun iwiartur susa asa “wi ni Yusríntjai” títinian natsantatsui.

<sup>17</sup>Ataksha Apraám Yúsan nekas enentáimtak “chikichik uchi amasmaj nu, namánkea áitkiasmek maam surusta” takui Apraám Isakan ni uchirín Yus susatniun penké suritkiachmiayi. <sup>18</sup>Kame Yus “Isakjai ti pampanatme” tau asamtai <sup>19</sup>Apraám “máamtaisha Yus iniantkittiawai” tu enentáimpramiayi. Tura Yus ukunam máatiun suritkiamtai Isakan máachiat nekas jákatniunmaya uwempran nantakniua áintsan wáinkiamiayi.

<sup>20</sup>Isaksha Yúsan nekas enentáimtak ni uchirín Jakupnasha Esauncha ukunam ni túrunattana nuna ujakarmiayi. <sup>21</sup>Núnisan Jakup Yúsan nekas enentáimtak jatsuk ni tirankín, Jusé uchirín, shiir túrunattana nuna ujakarmiayi. Tura ti uuntach asa máshtunkrín ushukruma Yúsan shiir awajsamiayi. <sup>22</sup>Tura Jusesha jákatniurí ishichik ajatesmatai Yúsan nekas enentáimtak Yus ukunam Israer-shuaran Ejiptu nunkanmaya júkiartatna nuna ujakarmiayi. Tura jíiniainiak ni ukunchín júkiar Yus tsankatkamu nunkanam iwiarsarat tusa akupkamiayi.

<sup>23</sup>Muisaisa aparísha nukurisha Yúsan nekas enentáimtuiniak Muisais ti shífirmach asamtai suntar máawarain tusa akiiniamunmaya menaintiu nantu úukarmiayi. Tura uunt akupin akupkamun ashamkacharmiayi.

<sup>24</sup>Muisaissha Yúsan shiir enentáimtak uunt ajas Ejiptunmaya uunt akupniu nawantrí uchirí ajastinian nakitramiayi.

<sup>25</sup>Antsu Ejiptu nunkanam ishichkisha tunaan warartsuk Yusa shuarijijai métek wáitsatniun nankaamas wakerukmiayi.

<sup>26</sup>Nujai Krístun yajauch awajsarmia núnisan niisha wáitsatniuuui. Túrasha ashí Ejiptu nunkanam péñker irunmia nuna nankaamas Yus nin ukunam tsankatkatta nuna shiir enentáimtusmiayi. <sup>27</sup>Niisha Yúsan shiir enentáimtak uunt akupin kajeramu ain ashamtsuk Ejiptu nunkanmaya jíinki wémiayi. Yúsan wáinchiat shiir enentáimtamujai wainiua áinis kakaram ajas ashí katsuntramiayi.

<sup>28</sup>Muisais Yúsan shiir enentáimtak yá-mankamtaik paskua namperan najaneak ashí Israer-shuaran numpajai ni wáitirín kuérat tusa akupkarmiayi. Nujai Yus timia núnisan nayaimpinmaya suntar nuna iis nu jeanam iwiarín máatsuk nankaikit tusa tímiayi.

<sup>29</sup> Israer-shuarsha Yúsan shiir enentáimtuinia ásar Kapaantin Entsa nakaakamtai ajapén ti penker kukarnum katinkiarmaiya. Ejiptunmaya suntarsha núnisan katintai tukamá jakerarmiyai.

<sup>30</sup> Israer-shuarsha Yúsan shiir enentáimtuinia ásar Yus timian umirkar siati tsawant Jerikiú péprun téntakarmatai aa tanish ásanákmiyai. Nujai ti yúpichuch nupetkarmiyai. <sup>31</sup> Raapsha nu péprunam pujak, Yúsan nekas enentáimtak tsanirmatai áyat Israera suntarın mamikmak wekaan ti penker itiaá asa chíkich shuar Jerikiúnam matsatua nujai jákachmiyai.

<sup>32</sup> Nu arantcha Yúsan shiir enentáimtin ti írunui. Jeteúnsha, Paraksha, Sansunsha, Jiptísha, Tawitcha, Samuer-sha, Yúsnan etserniusha nu shuar ármiai. Mash ujaktinian jeatsjai. <sup>33</sup> Niisha ashí Yúsan nekas enentáimtuinia ásar Yusa kakarmarın niisháa niisháa iniaktusarmiyai. Nuna túruiniak chíkich chíkich nunkanmaya aentsun nupetkarmiyai, nuisha pénger akupkarmiyai, tura Yussha ni timia núnisan yaınkıarmiyai. Uunt yawancha kajeche awajsarmiyai, <sup>34</sup> uunt jiniasha ikiajniakarmiyai, puniajai mantamnatniuncha uwemprarmiyai. Kakarmachussha kakaram ajasar mesetnumsha ni nemasrıńcha nupetkarmiyai. <sup>35</sup> Nuwasha ni uchiri jakan iniantkimiun wáinkiarmaiya.

Chikichcha wáitias mantamawarmiyai. Ti shiir pujustinnium nantaktiai tusar nú tsawantai uwempratniun nakitrarmiyai. <sup>36</sup> Chikichcha katseknakarmiyai, asutniáwarmiyai, jirujai jıńkiawar sepunam enkenawarmiyai. <sup>37</sup> Kayajai tukú mantamawarmiyai, jímiapetek tsupinkıarmiyai, Yúsan iniaisarat tusa nekapnasarmiyai, puniajai mantamawarmiyai. Aya wékainıarmiyai, kuıtrincha ásar nuapen entsararmiyai, shuar nincha áıntrar wáitnenmai

awajiarmaiya. <sup>38</sup> Atsamunmasha, naincha, waanmasha, ashı nunkanam wekain ármiai. Nu shuarjainkia ju nunkanmaya shuar imia yajauch ásar niijiai pujumainchu ániawai. <sup>39</sup> Nu shuar Yúsan shiir enentáimtuiniakui Yus “pénkeraitrume” tiarmiyai. Túmaitiat ni tsankatkamun wáinkıacharmiyai. <sup>40</sup> Yuska nuna nankaamas péńkeran iwiarturaru asa tura in yamáı pujajnia juna enentáimturma asa niisha iisha mai metek tsanıńkiar ti penker ajasarti tu enentáimsamiya.

### Jesus tuke enentáimtusar tsékeńtiaı

**12** Ashı ju nunkanam túrajnia nuka shuar nakuruiniak tsékena nujai nakumkamniaiti. Ashı shuar yaunchu Yúsan shiir enentáimtusaruka téntakar írmainiaı. Tuma asamtai ashı kijin ana nusha tura ashı tunaaka itit awajtamaj nusha ajapa iniaisar tura katsuntrar tsékeńkir jeataı. <sup>2</sup> Túmakur Jesus tuke enentáimtusar tsékeńtiaı. Ashı shuarjai nankaamas Jesus Yúsan ti nekas enentáimtak aya péńkernak túramiyai. Tuke nekas awakmakmiyai. Imia tunaa shuáran krusnum máatin aın núnisan natsanmainium jákatniun surimiakchamiyai. Antsu ukunam ti shiir warastin átatna nuna enentáimtak nuna ashı katsuntramiyai tura nuyá Yusa untsuurini akupin pujutainium pujusuiti.

<sup>3</sup> Tunaa shuar Jesusan wáitkiasarmia nu enentáimpratarum. Túrarum pimpitsuk katsuntratarum. <sup>4</sup> Átum tunaajai máaniakrum Jesus túramia áıntsarum numpemsha puárchaitrume tura jákachuitrume. Nuisha katsuntrarum jeatniuitrume. <sup>5-6</sup> Yus nekas ni uchiriń chicharkatniua áinis túramprum nu kajınmatkíchımashuram. Júnis tawai:

“Uchirú, wi jintinramajmena nu kajınmatkıp. Asutiámkuisha kúntuts pu-

jusaip. Kame Uuntka Nii aneana nuna jintintiawai. Tura ni uchiri<sub>i</sub> ajasat tusa achána nuna asutiawai.”

<sup>7</sup>Tuma asamtai Yus ni uchiri<sub>a</sub> áinis asutiámkuisha katsuntratarum. Warí, ashí apa ni uchiri<sub>n</sub> chicharkashtatuak.

<sup>8</sup>Tura ashí uchin chicharkatniua núnis Yus atumin chichartamchakrumn-inkia nekas ni uchiri<sub>n</sub>chuitrume. Antsu chikichnaitrume.

<sup>9</sup>Nu arantcha ii aparí uchich árinin<sub>n</sub> chichartamkurin umirni-uyaji. Nu arant nuikia nekas ii Aparí nayaimpiniam pujana nu shiir umirkar tuke shiir pujustin wakerishtatjik.

<sup>10</sup>Ii aparí ishichik ni enentáijiai<sub>i</sub> wakeramu chichartamniuyaji. Antsu Yuska ti penker awajtamsataj tusa nekas atsumajnia nujai<sub>i</sub> métek chichartamji.

<sup>11</sup>Kame nekasaiti, ashí asutiámu yamaikikia waraschamniaiti, antsu kúntuts enentáimtikramji. Túrasha ukunam nu asutiámujai<sub>i</sub> unuimij nuka penker túratniun tura shiir pujustinian yáinmaji.

### **Anearta. Yus tana nu nekas antuktiniaiti.**

<sup>12</sup>Nujai<sub>i</sub> pimpirarusha tura kakarmachu ainia nusha ikiakár-tarum. <sup>13</sup>Túrarum penker esettsa enentáimsarum wekasatarum. Túrarum tujintiainia nusha shiir wekasatin yaintarum.

<sup>14</sup>Ashí penker túrakrum ashí shuarjai<sub>i</sub> nawamnaikiarum penker wekasatarum. Tunaan túrinkia Yusai<sub>i</sub> penké jeashtatui. <sup>15</sup>Aneartarum. Shuar nakitiakuinkia Yus nu shuáran shiir yáintinian tujinkiat-tawai. Nu shuar yajauch enentáim-iuk chíkich shuárnasha itit awajas tu-naanum útsukartatui.

<sup>16</sup>Tsanimawairap.

Yusna nusha nakitrap. Isaka uchiri<sub>i</sub> Esau penkera nuna nakitramiayi. Yus “iwiair<sub>n</sub> núkap súsatniuiti” timia nuna enentáimtuschemiayi. Tura asa aya ishichik yurumkajai<sub>i</sub> yapajíamiayi.

<sup>17</sup>Tura nuyá ni aparí ukunam túrunattana nuna takui Esau ti penkeran wakerimiayi. Tura ti útkuisha ni aparí nin nakitramiayi tura ni chichasman yapajíatniun tujinkiamiayi.

<sup>18</sup>Atumjai<sub>n</sub>kia Yusna enentáimtus-minia nuka yaunchu Israer-shuarjai<sub>i</sub> ashammain amia núnischaiti. Yáunchuka Yus ni akupkamurin Israer-shuaran súakuí Senai muranam jeeárimiayi. Muranam uunt jisha kiritniusha teesha nasesha ajamiayi.

<sup>19</sup>Tura kachu kakaram umpúamusha ámiayi. Tura Yus kakaram nin chichaream antukar ashamkar atakka chichaschati tu searmiayi.

<sup>20</sup>Kame Yus chichaak “Shuarsha tan<sub>n</sub>kusha ishichkisha nú muranam najarmatai nuka kayajai<sub>i</sub> tukurar tura nan<sub>n</sub>kijiaisha máatniuiti” tímiayi.

Nu akupkamu ti ashammai asamtai “chichaschati” tiarmiayi.

<sup>21</sup>Wáinkiaromia nu ti tsummai asamtai imia Muisaisha “Ashamakun kuraajai<sub>i</sub>” tímiayi.

<sup>22</sup>Antsu atumjai<sub>n</sub>kia Yusna enentáimtustin nujai<sub>i</sub> nan<sub>n</sub>kaamas penkeraiti. Átumka nayaimpinmaya<sub>i</sub> Seun<sub>n</sub> náinnium, Jerusarén iwiaaku Yus pujutai péprun nakumeana nuí jeeáitrume.

Nuisha ti untsurí nayaimpinmaya<sub>i</sub> suntarsha <sup>23</sup>ashí Yus-shuarsha shiir iruntrarú ániawai.

Yus-shuarka ashí nayaimpiniam ni naari<sub>i</sub> anujtukma ásar ni uchiri<sub>i</sub> ániawai. Nuisha Yus, ashí shuaran ti nékana nu, pujawai. Niisha shuáran ti penker awajsamtai nu shuar jákar ni wakaní nuí shiir pujuiniawai.

<sup>24</sup>Nuisha Yamaram Chichaman in takartamajnia nu, Jesus, pujawai. Nuna numpe ukatramujai<sub>i</sub> ashí shiir awajsaiti. Nu numpasha Apira numpejai<sub>i</sub> nan<sub>n</sub>kaamas penkeraiti.

Kame Apir ántar máamu asamtai yapajmiatrukta titinia áintsan enentáimtaji. Antsu Jesus tunáa shuáran penker awajstartaj tusa jakamiayi.



<sup>25</sup>Nuka ti penker asamtai Yus chichartamprumna nu nekas anturkatniuitrume. Yaunchu Yus jú nunkanam murá chichaamun anturkachar asutniátniunam uwempracharmiayi. Nuikia Yus nayaimpinmaya chichartamkurin ántachkurkia ishichkisha uwemprashtatji. <sup>26</sup>Yaunchu Yus chichamejai nunkan úrmamtekiarmiayi. Tura yamaisha tawai “Ataksha aya núňkankechu antsu nayaimpinmasha úrmamtekiattajai.” <sup>27</sup>“Ataksha” tana nujai “ashí muchitrámnia nu amuukartatui” tawai. Tura muchitrachminia nu juakartatui. <sup>28</sup>Yus in akupkatniun tsankatramaj nuka umuchnakchattawai. Tuma asamtai Yus yumiŋsatniuitji. Yus wakerana núnisrik wishiktsuk shiir enentáimtusar Yus shiir awajsatniuitji. <sup>29</sup>Maa, ii Yúsriňkia kajerkanka uunt já nuke áesaa mash emesramniaiiti.

### Yus shiir enentáimtiksatın

**13** Nuamtak yachia núnisrum tuke mai anenai ajatarum. <sup>2</sup>Tuke írar shiir itiaatarum. Nuna túruiniak shuar nékachminiak nayaimpinmaya suntaran itiaawaruiti.

<sup>3</sup>Sepunam pujuinia nusha atumsha niijjai pujáa núnisrumek waitnentrarta. Wáitkiasarma nusha wisha núnisnak wáitsamniapitjia tusarum waitnentratarum.

<sup>4</sup>Nuatnaikiatin penkeraiti. Shuar ni nuwejai tsanin pujustin penkeraiti. Tura nuatkamu ainia nusha chikichan eakchatniuiti. Tsanirmana núnaka Yus asutiáttawai.

<sup>5</sup>Aya kuťiak enentáimtusam puju-saip. Yuska “Kanakchattajai tura penké ikiukchattajme” túramui. Tuma asamtai ame takakmena nujai shiir enentáimsam “maakete” titiá. <sup>6</sup>Tiniu asamtai arantut-suk ju tímniaitji: “Winia yainnia nuka

Uunt Yúsaiti. Nu asamtai shuar túrutamnia nuna ashamkashtatjai.”

<sup>7</sup>Atumin Yus-Chichaman jintin-tramawarmia nu enentáimtustarum. Yúsan shiir enentáimtuiniak penker wekasarmia núnisrumek atumsha túratarum.

<sup>8</sup>Jesukrístuka tuke yapajítsuk nuikiya núnisan yamaisha tura ukunmasha tuke núnisan átatui. <sup>9</sup>Chíkich chicham niisháa írunna nu anturkairap. Yus in anenma asakrin kakaram ajasartai. Shuar niisháa yurumkajai enentáiruı kakaram ajastaj táyat penké yáinçhaiti. Yurumeaj nújainchu antsu Yusa anenkrattairijjai ii enentáin kakaram ajasminiaitji.

<sup>10</sup>Yáunchu Yúsnan pujurin naman maar Yus susamunmayan yuu ármiayi. Tura iikia Yus-sutai nusháa ana nu súaji. Nusha Kristu jakamu asamtai yaunchua nu Yúsnan pujurin nuı pachiinkiachmin áiniawai. <sup>11</sup>Israer-shuarnumiá Yús-nan pujurniu uuntri tunaan asakártaj tusa namanké numpen júkiar Imiá Shiir Tesaamunam wain ármiayi. Tura nu naman arant áesatniuyayi. <sup>12</sup>Núnisan Jesussha péprunam arant wáitkianas mantamniayi. Nujai ashí shuara tunaarın ni numpejai nijiatkaiti. <sup>13</sup>Núnisrik iisha péprunmaya arant wétinia núnisrik Jesusai weri Niijjai métek wishik-main katsuntutai. <sup>14</sup>Kame ju nunkanam amuukachmin pepru atsawai. Antsu ukunam ti shiir pepru átatna nu náakaji. <sup>15</sup>Tuma asar naman maar Yus sútsuk antsu shiir chicham súakur tuke Yus shiir yúmıňkiaji. Tuke núnisar túratui. <sup>16</sup>Penker túrakrum takakrum nu ajamnaisatin kajinmatnaikiirap. Nusha ti shiir Yus sútainti.

<sup>17</sup>Yus-shuaran akupin ainia nu umirkarum shiir enentáimtikratarum. Ni takatrın Yúsan ujaktin ásar atumı wakanın shiir wainiainiawai. Niisha itiurchatcha antsu wakerumainian

túrawarat tusarum shiir yáíntarum. Nu túrachkumka çitiurak yainmakarat?

<sup>18</sup>Incha Yus áujstarum. Iisha ashí péñker túratin wakeraji. Túraji enentáimji. <sup>19</sup>Tura Yus áujkuram Yus ataksha atumjai wainniaikiatniun wari tsañka-trukat tusarum seatritiarum.

### Amúak shiir chichaawai

<sup>20-21</sup>Imiatkinchanum apujkartinia nú Yus, Jesukrístun jakamunmaya iniantkimia nuka, ni numpé kakarmar-ijjai ashí péñker ana nuna suramsarti. Nujai ni wakeramu túrattarme. Tura Jesukrístu kakarmarijjai ashí ni wakeramun in pujurtamas takasti. Ii Uuntri Jesukrístu ashí Yus-shuaran ti penker Wáinniuiti. Tura ni numpejai

Yamaram Chichaman kakaram awajsamiayi. Nu Chichamsha tuke menkakashtatui. Aya Kristu tuke shiir awajnasti. Núnisañ atí.

<sup>22</sup>Yatsurú, kakaram chicharkajrumna ju shiir enentáimjai anturkatarum. Kame ti wárik áatrajume. <sup>23</sup>Yamaikia ii yachi Timiutéu sepunmaya jiinki ankant ajasai. Nuna ujaajrume. Wárik támataĩkia atumin íitaj tusan winiakun niijjai winittijai.

<sup>24</sup>Atumí úuntri sha tura ashí Yus-shuarsha amikmaatarum. Itiaria nunkanmaya shuarsha amikmatmainiawai.

<sup>25</sup>Ashí Yus ti shiir yainmakarti. Nuke atí.

## SÁNTIAK

*papin árar akuptukma*

### Sántiak aarmiania nu

**1** Wi Sántiak Uunt Yúsan tura núnisan ii Uuntri Jesukrístun umirin asan ju papin aajai. Ashí Yus-shuartermin ashí nuñkanam tsakiñmakarum mat-satrumna nuna amikmaajrume.

### Nekatainkia Yúsnumiãiti

<sup>2</sup>Yatsuru, ashí itiurchat wáinkiu<sup>r</sup>me-sha tuke warastarum. <sup>3</sup>Iis, itiurchat-num pujakrum nekas Yus enentáimtaik-iurmeka katsuntratin unuimiartatrum. <sup>4</sup>Tura tuke páchiachkuram, tuke katsunteakrum, nuikia Yúsja<sup>i</sup> ti penker katsu<sup>a</sup>r-tatrum. Penké atumashtatrum.

<sup>5</sup>Átum nánkamsarmek nekaatin tujintiakrumka Yusa nekairi<sup>i</sup> seata. Shuar seaku<sup>i</sup> Yuska kajetsuk tura ementutsuk antsu patatas súawai. Tuma asantai seakminkia suramsattawai. <sup>6</sup>Túrasha Yus nekas enentáimtusam, “túratpiash” tútsuk seata. “Cha, nékatsjai surustimpiash” tu seakmeka ánttram seame. Nayaantsa tsukatur<sup>i</sup> juní taa, atúu waketki ajatsuk. Amesha áintsamek túmame. <sup>7</sup>Enentáimiin núnisketkuin<sup>k</sup>ia, seamna nuna Yus penké suramsashtatui. <sup>8</sup>Shuar jimirá enentáimna nuka shiir wekasatniun tujintiawai.

<sup>9</sup>Yus-shuar, ju nuñkanam kuítríncha ainia nu, Yus shiir awajsamu nujai<sup>i</sup> warasti. <sup>10-11</sup>Tura Yus-shuar kuítrinniu<sup>i</sup>tkuisha péejchach enentáimtikramsha warasti. Iis, nupa kuánkam tura nantu ti sukuam kaar miniatsuk. Kuítrinniuka ántska ánttram seame. Nayaantsa tsukatur<sup>i</sup> juní taa, atúu waketki ajatsuk. Amesha áintsamek tánkete. Tuke súrutnak

pujurkusha itiurchat wáiniuk wárik amuukattawai.

### Ii itiurchat<sup>r</sup>i ana nu

<sup>12</sup>Shírait<sup>i</sup> shuar ni itiurchat<sup>r</sup>in nekas katsunteana nuka. Nekapsam jíinkiuñka akinkiatniun wáinkiat<sup>r</sup>awai. Iwiaaku átinian, tawasap achik<sup>r</sup>inia núnisan, wáinkiat<sup>r</sup>awai Yus ni aneam tsan<sup>k</sup>atka nuna. <sup>13</sup>Shuar tunáa túramnia nekapeakka “Yus nuna útsutrutui” tu enentáimprash<sup>r</sup>ini<sup>a</sup>iti. Yuska yajauch túramnia enentáimtsui túrasha Niisha penké chikichkinkesha tunaanum útsuchuiti. <sup>14</sup>Antsu ni wakeramuriji<sup>a</sup>in aents tunaan nin<sup>k</sup>i ikiatmamkai<sup>t</sup>i yajauch túratniun. Nújain<sup>k</sup>ia tunaanum útsukmaiti. <sup>15</sup>Nu yajauch wakeramunmay<sup>a</sup> tunáa akiiniui. Tura nu tunáa mash amuukam<sup>t</sup>ai jákatin akiiniui.

<sup>16</sup>Yatsuru, aneakun tájar<sup>m</sup>e, anan<sup>m</sup>awairap. <sup>17</sup>Ashí penker ana nu, ashí shiir ana nusha nayaimpinmay<sup>a</sup> Yusak amasuiti. Yus ashí tsáap<sup>n</sup>inia nuna najanaiti. Tura Niin kiritin atsain yapajít-suk tuke tsáapni<sup>i</sup>ti. <sup>18</sup>Nii wakera asa ni nekas chichamea nujai<sup>i</sup> ni uchir<sup>i</sup> najatmam<sup>j</sup>i. Tura ashí ukunam átatna nujai<sup>i</sup> ii émkaitji.

### Yus nekas shiir awajsatin

<sup>19</sup>Tuma asantai aneamu yatsuru, wárik chichastin enentáimprairap antsu antuktin emka enentáimprata. Núnisan wárik kajekaip. <sup>20</sup>Kajena nuka Yus penker wakeramun túratsui. <sup>21</sup>Nu asamtai, ashí penkercha nu tura ashí yajauch írunna nusha iniaisata. Tura tuke enentáij<sup>a</sup>ai Yus-Chicham ame enentáimin araamu anturkata. Tura nu Chicham kakarmaiti uwemtikrampratniun.

<sup>22</sup>Yus-Chicham umikta. Aya ántukaip. Aya ántakmeka amek ananmamattame. <sup>23-24</sup>Shuar íspikia ímiak ni yapin wapikian wáiniak tura

nuyá jáupmitsuk we, ni urukuit nuna wárik kajinmatkishtimpiash. Shuar Yus-Chicham umitsuk aya ántana nuka nujají méteketete. <sup>25</sup> Yus tana nujají ankant ajasminiaiti. Shuar íspikia iimia áintsan nekas Yus péñker táman tuke iniaitsuk enentáimtus, nu shuar kajinmattsuk aya antukhattawai antsu tuke umiktatui. Tura ti shiir waras pujustatui.

<sup>26</sup> “Nekas Yúsan shiir umirjai” tana nu tura eeser chichaachkunka imia niniki ananmamui tura “Yúsan shiir umirjai” tana nuna ántar tawai. <sup>27</sup> Nekas Yus Apa awajitsuk shiir umirkatin júiti: mitiaikiasha wajesha itiurchatnum pujuiniakuisha yáintiniaiti tura ju nunkanam ashí tunáa ana nújajisha máatrashtiniaiti.

### Shuar antra akantrashtin

**2** Yatsuru, ii Uuntri Jesukrístu ti shiir nankaamantua nu enentaimtatirmeka shuar akantratin enentáimsairap. Shuara enentáí enentáimtsuk antsu aya pátatke wáinmena nujají aents akantram niisháa enentáimturairap. <sup>2</sup> Iis, iruntrumna nuí shuar kuítrintin kurí aniyu aweera tura péñker iwiarmampra wayashtimpiash. Tura núnisan chíkich kuítrinchá aruta entsaru wayashtimpiash. <sup>3</sup> Tura kuítrinnia nu “Péñkera juí pujusta” tíchatameash. Tura kuítrinchaka “Atu wajauta, túrachkumsha juí nunkansha pujusta” tíchatameash. <sup>4</sup> Nu tákumka yajauch enentáimpram jimiará enentáijjají aents enentáimtame.

<sup>5</sup> Aneamu yatsuru, antuktarum. Ju nunkanam kuítrinchá ainia nuna Yus achikiuiti Ní shuar ajasar Nin nekas enentaimtin ajasartinian. Tura ashí nayaimpiniam írúnna nunasha Yus nin tsankatkattawai. Ashí shuar Yúsan aneena nuna anajmatra asa nin tsankatkattawai. <sup>6</sup> Átum antsu kuítrinchá natsant awajearme. Iista, kuítrinnia nuka timiá itiurchat

awajtamainiatsuk. ¿Nuikia níchuk ainia achirmak kapitíánnium japiki júramprumna nu? <sup>7</sup> ¿Nínkichuk ainia Kristu naari shiira nuna ántar pachikiar penké yajauch áujmatainia nu? Tura átumka nuna naari tuke shiir awajkurmin, ashí shuar “Kristu shuari” túramainiawai.

<sup>8</sup> Yus-Chichamnum ju akupeamu nekas péñkeraiti:

“Ame ayashim aneamna núnismek ame írutamuram aneeta.”

Nu nekas umirniuitkiurmeka maak. <sup>9</sup> Nú enentáijjají kuítrinniujaí chichasminiaiti. Tura nuyá kuítrinchajají shiir chichaachkumka, niisháa enentáimta asam, nu akupkamu umirkachuitme. Tunáa túrame. Núnismek Yusa akupeamurijjají amek sumamame. <sup>10</sup> Chíkich akupkamu írúnna nu ashí umikiam tura aya chikichik akupkamu umikchamka nuikia ashí akupkamu umircha ajasume. <sup>11</sup> Iis, Niniki Yúsak chichaak tíchamka “tsanirmawaip.” Tura chikichnasha “mankartuawaip” tímiayi. Nu asantai, shuar tsanirmatsuk túrasha mankartakka ni wakeramun umirtsui.

<sup>12</sup> Kristu ankant awajtamsantai ii yamá ni akupeamuri yúpichuch umirkamniaitji. Nu asantai nu akupkamujají métek wekakurninkia Yus “péñker túraitme” turamtatji. Tura umikchakrínkia “péñker umikchaitme” turamtatji. Tura nu enentáimsar péñker chichasar takasar wekasatniuitji. <sup>13</sup> Chikichan waitnentachkunka waitnennatsuk asutniáttawai. Tura waitnenkratniuitkiurninkia tsawant jeamtai Yus in waitnentramprattaji.

### Yus enentáimtustin tura umirkatniusha

<sup>14</sup> Yatsuru, shuar “Yusan shiir enentáimtajai” táyat tura péñker túrachkuínkia péñkerashit. Nujají

uwemprattawak. <sup>15</sup> Wátskea, Yus-shuar, áishmansha nuwasha, entsátáirín tura yurumken atumashtimpiash. <sup>16</sup> Tura ame nékayatmek ayashí atumana nu sútsuk tíchatapash “Pénker wetá, entsatai entsaram túram pénker yurumáta.” ¿Nu sútsuk tákum pénkerkait? <sup>17</sup> Núnisan takatsuk Yus enentáimtustin ántraití.

<sup>18</sup> Tura shuar tíchanpiash, “Chíkich takaawai tura chikichcha Yúsan shiir enentáimtawai. Mai pénkerchakait” tichanpiash. Wats, ame Yus enentáimtamú takatsuk paant inaktusminiashitiam. Tura wi antsu pénker takatrujái Yus enentáimtamun paant inaktustatjai. <sup>19</sup> Nekas Yus chikichkiiti tu enentáimtame. Nuka pénker túrame. Túrasha iwianchcha nunasha nékainiawai. Tura umircha ásar ashamainiawai. <sup>20</sup> Netse enentáimpraip. Ashí Yus wakera nu takaachkumka, Yus enentáimtustin ántraití. ¿Nu nekaatin wakeramek? Iista. <sup>21</sup> Apraáman Yus chicharuk “Winia ti shiir awajtusat tusam ame uchiram Isak maam surusta” tutai suritkiachmiayi. Máachiat suritkiachmiayi. Tura suritkiacham Yus “Pénkeraitme” tímiayi Apraáman. <sup>22</sup> Páantchakait. Apraám Yusa shiir enentáimtak umirkamiayi. Umirtsuk Yúsan enentáimtakka nuikia ántar enentáimtiqayí. Tura umirak Yus enentáimtamun umikmiayi. <sup>23</sup> Nujái Yus-Chicham aarma nu uminkiamiayi. Júiiti:

Apraám Yúsan shiir enentáimtusmiayi tura Yus chicharuk tímiayi “Máakete. Nújainkia tuke pénker túraitme Wijjái” tímiayi. Apraámsha nekas “Yusa Amikrj” tu náamkamiayi.

<sup>24</sup> Páantchakait. Shuar aya Yúsan shiir enentáimtamujainchuk tura pénker takasmajáisha Yus nin

shiir enentáimtawai. <sup>25</sup> Núnisan Raap tsanirmataiyayi. Túmaitiat Israeran suntarín mamikmauta tusar akupkamun ni jeen itiaawar tura úukar chíkich jántianam akupak uwentikrarmiayi. Nuna túramtai Yus “pénkeraitme” tímiayi nincha. <sup>26</sup> Ayash wakantichuka jákachukait. Núnisan Yus enentáimtustin tura ni wakeramu takaachkurkia, jaka áintsan ántraitíj.

### Ii iniaí

**3** Atum untsurí jintin<sub>ki</sub>artin ajastin wakerukairap. Yus in, jintin<sub>ki</sub>artin ájinia núnaka, nan<sub>ka</sub>amas neka asar, awajiakrin nan<sub>ka</sub>amas Yus asutiámattaji. <sup>2</sup> Iis, ashí mash ti awajiatsjik. Tura shuar chichaak, aya pénkernak chichaakka, nu shuar tuke eseer enentáimniuiti. Tura ayashíisha tuke pénker ana nuna túriniaiti. <sup>3</sup> Kawaisha enentáimpratai. Jiru wenuchiniam ikiursam ni ayashí ashí ayantaatsuk. <sup>4</sup> Kanusha ti úuntaitiat tura kakaram wéayat ishitiapach wiantaijjái shuar wakera nuí ayantarminiaiti. <sup>5</sup> Núniskete ii iniaí. Timiá ishitiapchitiat awakmaktinia tímianu chichaatsuk. Ji ishichik kapaajái ashí numi tsaruaku ekeemakchamniakait. <sup>6</sup> Ii iniaísha jijjái métekete. Ashí tunáa piákuiti. Tura ii ayashíin tunáa túratniun útsutmaji. Túnkuruanmaya jijjái ikiapármaiti tura ashí ii wekajnia nuí émesewai. <sup>7</sup> Shuar ashí yajasmañ nawamkamin ániawai. Ashí kajen írunna nunasha, nanamtincha, napincha, tura entsayan<sub>cha</sub> ashí nawamkaruiti. <sup>8</sup> Tura iniaikia penké nawamkachminiaiti. Ti yajauch asa penké nupetkachminiaiti. Iniaikia ti taráa tseasaiti. <sup>9</sup> Nu iniaijjái Yus Apa shiir awajeaji tura nu iniaijjain aentsti yajauch chichárnaiyaji. Áentsun Yus Nijjái métek-taku najanamaitiatar yajauch chicharnaiyaji. <sup>10</sup> Nu iniaijjain pénkersha tura yajauchisha chichaaji.

Yatsuru, nuka penké atsutniuiti.  
<sup>11</sup> ¿Púkununmaya entsa sáawijjiai kusuku jíinkimniakait? <sup>12</sup> Yatsuru, ¿Kushin̄kiap shuinian nereawak. Munchisha kushin̄kiapen nerektatuak? Núnisan púkununmaya entsa sáawijjiai kusuku jíinkichminiaiti. Ii iniajjiai núnisan aya penkera nu chichastiniaitji.

### Yusa nekatairi

<sup>13</sup> Shuar ti neka enentái takakna nu, penker túrattawai. Nekas nékaitkiun̄ka péechachia núnis tuke penker ana nuna túrattawai. <sup>14</sup> Antsu atumí enentáijjiai penké yajauch enentáimtunairum tura atumek penker pujustin enentáimtumarum, nékaitiatam penker túrachiatam “penkeraitjai” tiip. Nuka wáitrame. Nekaska núchaiti. <sup>15</sup> Nú enentaikia Yúsaiyanchuiti. Antsu ju nunkanmayaiti, shuara enentáiyaiti, núnisan iwianchnumiaiti nú enentaikia. <sup>16</sup> Shuarsha yajauch enentáimtunairar tura nin̄ki enentáimtumainiakui, nujai ashí meseawai tura ashí yajauch ti awai. <sup>17</sup> Antsu Yusaiya enentái takakua nu júnisaiti: ashí nan̄kaamas emka eseeratin, nuyá nawamkartin, shiir ajá, penker anturnain, waitnenkratin, ashí penker takáa tura anantsuk naka chichamtin. <sup>18</sup> Eseera enentáimsatniusha shiir takawai ashí shuar penker ana nuna túrawarti tusa.

### Ju nunkanam írunna nu aneashtin

**4** ¿Urukamtaitsuk tuke kajer-naikiarum ti máanaisrum pujarum. Mesetnumsha urukamtai wéarum? Júnisaiti: Atumin yajauch enentái katsuntrachmin útsutmakrumin tuke máaniarme. <sup>2</sup> Wakerarmena nu takustin wakerarme tura nu wakeramu takustin jeachkuram nérentin maarme juruktiaj tusam. Chíkich takakna nujai itit enentáimtuniarme tura

ataitin tujinkiam máanaitrume. Wakerarmena nusha Yus seachu asarum wáintsurme. <sup>3</sup> Tura seakrumsha yajauch searme. Atumí penkerijjiai warastin enentáimiu asarum searmena nusha wáintsurme. <sup>4</sup> Jú nunkanmaya wakerakum Yusa nemasrijjiai tsanirma áintsan̄ketrume. Nékatsumek atumsha. Ju nunkanmayan wakerakrikia Yusa nemasrintji. Shuar ju nunkanmayan wakerakka Yusa nemasri ajawai. <sup>5</sup> Yus-Chicham juna tawai:

Yus ni Wakaní ii enentáin apujturmasuitji. Nu Wakan in anenma asa ti akasmatramaji, táwai.  
 Tura nuna ¿antran̄keash ta? <sup>6</sup> Tura anenma asa ti yáinmaji. Tuma asamtai Yus-Chicham tawai:  
 Kajemtinian Yus ístatui tura péechachin Yus nin aneak ti shiir yáintatui, tawai.

<sup>7</sup> Yusaj ikiumastarum, tura íwianch taritratatum. Túrakrumin íwianch ikiurmaktiatui. <sup>8</sup> Yúsainí weamkata tura Nii atumin wearmaktatume. Tunáa shuartiram Kristu numpejai nijiamartatum. Tura átum, Yussha tura ju nunkanmayasha mai métek wakerarmena nu, atumí enentái naka eseeratarum. <sup>9</sup> Atumí tunaari enentáimsarum kúntuts enentáimpratarum. Nu kúntutsjai ti úttiarum. Nuik shiir enentáimpratum wishikmiarumna nuka iniaisarum kúntuts enentáimpratum úttiarum. <sup>10</sup> Yusjai péechach ajasta, túrakmin shiir awajtamsattawai.

### “Yajauchiitme” tunaichatin

<sup>11</sup> Yatsuru, yajauch áujmatnaisairap. Yus-shuar ni yachin yajauch áujmatas tura yachí tunaari tuke áujmatuk Yus “aneniatarum” tana nuna umichuiti. Antsu umichu asa “nu akupkamu ánt-traiti, umirkashtiniaiti” tawai nu shuar. Nujai nu shuar umirtsuk Yus akupkamu nan̄kaamas enentáimtumawai. <sup>12</sup> Yus

Nínki akupkamu najana asa Nínki nu akupkamu umirkamun nekas nekaamniaiti tunaashit tusa. Nínkiti uwentikratniun tura emesratniunam akupkatin jea nu. Amesha yáitiam chikicha tunaari fistincha.

### Kashin átatna nuna Yusak nékawai

<sup>13</sup> Watsek, átum áujmateakrum “Arumsha kashincha nu péprunam weri nuí chikichik uwí takasar kuit achikattaji” tíchattarpash. <sup>14</sup> Ishichkisha penké nékatsrume kashin átatna nu. Ju nunkanam ii iwiaakmari wárik amúatsuk. Yurankim utsanar tura nantu sukuam mash wárik menkaatsuk. Núnisketji. <sup>15</sup> Antsu júnis tíminiaitrume: “Yus wakerakuinkia iwiaaku pujakrikia nusha túrattaji” titiarum. <sup>16</sup> Túrachkurmeka átumka Yusjai nankaamantu enentáimprume. Tura ashí nu enentáikia yajauchiiti. <sup>17</sup> Shuar pénker túratniun nékayat, túrachkuinkia, nuka tunaiti.

### Kuítrintin enentáimpratniua nu

**5** Kuítrinniutiram ju antuktaram. Ti úttiarum. Ti wáitsatin asarum ti kakantra úttiarum. <sup>2</sup> Kuítrum mash mamukarai tura iwiarmampramurmesha mash tinkishap yúkayi. <sup>3</sup> Kurirmesha tura kuítrumsha ashí ijiakmamkarai. Ijiakmampramurisha ame pénkercha túram nuna paant iniakmawai. Tura jinium áesamua áintsan ame kuítrum yajauch awajtamsattawai ayashmiin. Amuukatin tsawant jeamunam anearchamame antsu ame kuítrum ikiaunkamame. <sup>4</sup> Ame takat iniararam ementushim akirarmamna nu “akirkati” turamainiawai. Anearta. Yakiyá Yus, nayaimpinmaya suntara uuntri, nu takartamniu chichamen antukai. <sup>5</sup> Ashí ju nunkanam írunna nu wararsaruitrume. Tuma asarum

kapunka nuke machararme tura yamaikia máatin tsawant jeayi. <sup>6</sup> “Nu shuar tunaiti” tírum tunaachu tsanumprurum máamarme, tura nínkia surimiakcharmai.

### Yawetsuk takastin tura Yus áujsatin

<sup>7</sup> Nu asamtai, yatsuru, nu páchitsuk ii Uuntri Kristu tatin nákastarum. Arakmausha ni arakri pénker tsapaiti tusa yumi yutuktinian shiir enentaijiai nákatsuk. Yútasua umirmatai esatrurmatai júuktatjai tusa nákatsuk. Tura júurmaksha ti waraatsuk. <sup>8</sup> Núnisan atumsha katsuntsatarum tura yawekiirap. Kristu tatin yuntumtemayi. <sup>9</sup> Yatsuru, nuámtak “ju yajauch túrutui” tunainirap. Tákurminkia Yus írmastatrume. Nínkichukait nuna ístin tura anearta nu Yúsak tíjiuch wajatramui. <sup>10</sup> Yatsuru, yaunchu Yúsnan etserin enentáimpratarum. Tuke ii Uuntri Yus timia nuna shiir etserkarmiayi. Túmaitiat wáitsarmiayi túrasha pachischarmiayi. Núnisrumek enentáimsatarum. <sup>11</sup> Itiurchatan katsuntainia nuka nekas shíiraiti, tu enentáimji. Shuar itiurchatan ti katsuntin ámiayi, ni naari Jup. Tura ni itiurchatri nankaamasmatai Yus ti núkap kuítrin susamiayi. Nu nékatsrumek. Ii Uuntri Yus ti waitnenkrachakait.

<sup>12</sup> Ju ashí nankaamas enentáimtus-tiniaiti, yatsuru. Ame “ee” tákumka nekas titiá. Tura “atsá” tákumka nusha nekas titiá. Nekas chicham chichaachkumniinkia Yus írmastatui. Nu asamtai nayaimsha nunkasha ashí írunna nusha páchitsuk, aya támena nu tuke nekas atí.

<sup>13</sup> Wáitakmeka Yus áujсата. Waraakmeka, warasam kantamám Yus shiir awajsata. <sup>14</sup> Yus-shuartiram, shuar jáakka, Yus-shuara úuntrin untsukti. Tura niisha taarti. Tura Jesusa naari

pachikiar asuitijj*ai* jaa shuaran ishichik kuerarti. Túrawar Yúsan áujtusarti nu shuaran. <sup>15</sup>Tura “Yus nuna nekas anturtamkattaji” tu enentáimsar áuj*sarti*. Túrawarmatai jaa shuar pé*nker* ajastatui. Yus nin tsuártatui. Tura tunaan tura asa jáakuin*kia* Yus nu tunaan tsan*kurattawai*. <sup>16</sup>Nu asamtai, atumí tunaar*i* paant etsertunaiktarum. Túrarum Yus áujtunaistarum atumí tunaar*i* tsan*kurnarat* tusarum. Pé*nker* shuar Yúsan tuke enentáijj*ai* áujeamurin*kia* ti kakarmaiti. <sup>17</sup>Yaunchu

Yus-Chichaman etserin ámiayi, ni naar*i* Erías. Niisha iijj*ai* méteketiat yumi yutuk*ai* tusa Yusa áuj*sam*tai menaintiu uwí nuyá nan*kaamas* yutukchamiayi. <sup>18</sup>Ataksha yutukti tu áuj*sam*tai ataksha yutukmiayi tura araksha ataksha tsapainiarmiayi.

<sup>19</sup>Yatsuru, shuar eseera wekatinmaya kanaakuin*kia* chíkich nin waketk-itniun yain*ti*. <sup>20</sup>Shuar tunáa shuaran yajauch wekaan awakeakka jákatniunmaya uwemtikrattawai tura ti untsur*i* tunaar*i* tsan*kurnartatui*.



## PÍTIUR

*Emka papin aar akupkamu*

### Pítuur Yus-shuaran áatramiania nu

**1** Wisha ju papin aajna nu Pítruitjai. Wisha Jesukrístu akatramurintjai. Israer-shuar Yus-shuar árum nuna atumin ankant ankant tsakinmakarum chíkich chíkich nunkanam matsatrumna nuna áatjarne. Puntu nunkanmasha, Karasea nunkanmasha, Kapatúsea nunkanmasha, Asia nunkanmasha, Pitinia nunkanmasha pujarmena nuna áatjarne. <sup>2</sup>Yaunchu Apa Yus, “uwentikrataj” tímia núnisan achikmaitrume. Tura, Winia ajasat tusa ni Wakanjijai akantamkamiarme. Umirtukat tusa nuna túramiayi. Tura Jesukrístu numpejajsha atumí enentáin atsajkir chamir awajturmasmiarme. Wats, Yus tuke waitnentramar ti shiir awajtamsarat tusan wakerajrume.

### Shiir enentáimsar pujustin

<sup>3</sup>Wats, Yus, ii Uuntrí Jesukrístu Aparí ana nuna naarí shiir awajsatai. Yussha ti waitnentrama asa, atak akiiniatniun suramsaitji. Jesukrístu jakamunmayá nantakin asamtai, iikia atak akiiniar tuke iwiaaku pujustiniaitiajnia nu arutramji. <sup>4</sup>Tura nayaimpiniam ikiurtamsamu ana nuna achikmintrum tusa Yus wakerawai. Nu ikiurtamsamu meserchamnia amuukachminiati. Tura nusha yajauchichuiti. <sup>5</sup>Yus nekas enentáimta asakrumin ni kakarmarijjai wear-marme. Tura tuke uwentikrampratiun, nunka amuuamunam paant iniakmastatna nu achikmintrum tusa tuke tsawant ni kakarmarijjai wáitmarme.

<sup>6</sup>Nu enentáimsarum wararme. Kame ju nunkanam pujakrum itiurchat wáinkiashtarmeash. Tura ju nunkanam

pujustin ishichkichukait. Ukunam pénker pujustaj tu enentáimsarum wararme. <sup>7</sup>Enentáimsatarum. Shuar kurin wakerana núnisan atumniasha umirtukat tusa Yus wakerutmarme. Aents kurin jinium áesainiawai, aya kurik juakat tusar. Kurin ti wakeruina ásar, amuukamnia aín túruiniawai. Atumsha, itiurchat wáinkiarmana nujai, Yusan nekas enentáimtusartimpiash tusa nekapsamuitrume. Nu enentáimtamú kurijjai nankaamas pénkeraiti. Ukunam, Jesukrístu támatai, Yuska atumin “pénker túraitrume” turamtajtsa wakerittiawai. Tura “Ashí shuar nuna nekaawar winia naarun uunt awajsarat” tusa túrutmattarme. Nu tuma asamtai ju nunkanam nekapsamuitrume, itiurchat wáintrumna nujai.

<sup>8</sup>Jesukrístu wáinchaitiatrum anearme. Tura yamá wáinchiatrumek nekas enentáimtarme. Tuma asarum ti wararme. Nu warastin nayaimpiniam warastatjnia núniskete; nuka paant titin jeatsji. <sup>9</sup>Iimiatarum. Uwentikrurat tusarum Yus umirkachurmek. Nu uwempratin wainiu asarum waraarme.

### Krístujai ii uwempratniun yaunchu etserkarmiayi

<sup>10-11</sup>Yus áentsun waitnenta asa, uwentikrataj tusa tuke wakerimiayi. Núnaka Yúsnan etserin etseriarmiayi. Kristu Wakani ni enentáin pujuriarmia nu, túruntsain Kristu wáitsatniurín jintiarmiayi. Tura ukunam ni ti shiir pujustinrincha etseriarmiayi. Túrusha “tuu áishmankait Kristu tutai, tura urutiák túrunat” tusar nu etserin émamkesar anintrusarmiayi. <sup>12</sup>Tura nii pujuiniaínkia túrunashtinian, antsu ti ukunam, ii pujajnia juí túrunatniun Yus nekaamtikiarmiayi. Núnaka Yusa shiir chichamen ujamakarmia nú shuar nekaprutmarme. Nú shuar Yusa Wakani, nayaimpinmayá akupkamu

ana nuna nekatairijjaj ujatmakurme. Maa, nu uwempratniun tájana nuna, nayaimpinmaya suntar nekaatai tusar wakeruiniawai, túrasha tujintiainiawai.

### Pénker wekasatin

<sup>13</sup>Tuma asamtai, pénker enentáimsarum tura pénker ímiasrum wekasatarum. Tura Jesukrístu ukunam wantiniak waitnentramp Prattana nu yawetsuk nákastarum. <sup>14</sup>Umin uchi áintsarmek yaunchu nékachu asarum wakerimiarmena nu iniaisarum Yus umirin atarum. <sup>15</sup>Ashí túramurmijjaj timiá penker wekasatarum. Yus, untsurmakuana nu, pénker asamtai, átumka ni shuari asarum pénker wekasatarum. <sup>16</sup>“Wi pénker asamtai atumsha pénker wekasatarum” Yus tana nu ni Papiriin áarchamukait.

<sup>17</sup>“Yus winia Aparuiti” tárumna nu aneartarum. Ashí aentsu túrutairin métek Yus nekaattawai. Nu neka asarum, ju nunkanam pujarmena jui Yus ashamkatarum. <sup>18</sup>Warí, ánta wekasatniun atumí uuntri jintintramar-mena nuyá Yus uwemtikramprarme. Túrasha kurisha kuitcha amuukamnia ainia nujaj uwemtikrachmaitrume. <sup>19</sup>Antsu Kristu numpe ti shiira nujaj uwemtikramuitrume. Nu nékarme. Yaunchu, shuar tunáa túrakui, Yus tímiayi, “murik yajauchichu tunamarcha maarum, Yus sútainiam ikiustarum. Nuna numpen wáinkian, atumí tunaarin tsankurattajaj” tíniuyayi. Núnisan Kristu in jarutramka asa ii tunaarinia uwemtikrampraitji. <sup>20</sup>Nunkan nájantsuk áentsun jaruktinian Krístun anaikiamiayi Yus. Tura wárik akupkachmiayi. Antsu yamá tsawantin, átum pujarmin, pénker pujusúk tusa wakerak, atumin jarutramkat tusa Krístun akupkamiayi. <sup>21</sup>Niijjaj átumka Yus umiirume. Yuska Krístun jakamunmayan

iniantki nankaamantu awajsamiayi. Yus nekas enentáimtakrum, aya pénkernak túrawai titiarum tusa túraiti. <sup>22</sup>Yus nekas tana nuna, Yusa Wakani yainmakui, umirka asarum atumí wakaniin pénker ajasuitrume. Yus-shuarjaj yajauch enentáimtunaisuk mai anenai ajatai tusarum tura asarum, nekas shiir enentáimtunaisrum mai anenai ajatarum. <sup>23</sup>Nekaatarum. Yusa chichame umirka asarum atak akiini-aitrum nuka ju nunkanmayanchuiti. Antsu Yusa chichame iwiaaku tuke amuukachmin ana nú chichamjaj tuke iwiaaku átiniaitrume.

<sup>24</sup>Ju ayash tuke pujuschamniaiti. Yusa Papiriin junis áarmaiti:

Ashí aentsti nupáa áaniuitji. Ii pénker-isha kukujja áaniuiti. Nupa wárik kaawai. Kukujsha núnisan wárik ini-aawai. <sup>25</sup>Tura Yusa chichamesha tuke amuukachminiaiti.

Nu Chichamjaj uwempramnia asamtai atumin etsernakuiti.

**2** Tuma asamtai, ashí yajauch ana nu iniaisatarum. Anankatin, ántar-chichamtin átin, chikichna wakeruk-tin, ashí tsanumpratniusha iniaisatarum. <sup>2-3</sup>Antsu, Uunt Jesukrístu waitnenkartu-tairi nekapsa asarum, uchi yama akiinia muntsun ti wakeruinia áintsarmek, Yusa chichame aya penkerkea nu ti wakeruk-tarum. Yusa chichamejaj tuke tsawant tsakakrum tuke uwemprami tusarum túratarum.

### Iwiaaku kaya

<sup>4</sup>Ii Uuntri Kristu kayáa áantsankete. Tura shuar kayan yajauchin nakiti-ainia núnisan Jesukrístun nakitrarmi-ayi. Tura kayan ti penkeran wakeru-inia núnisan, Yuska, “winia Uchir ti penkeraiti” tusa Jesukrístun achikmi-ayi. Atumsha Jesukrístu weantuktarum. Nii iwiaaku kayaiti. <sup>5</sup>Atumsha iwiaaku kaya áantsanketrume. Tuma asarum Yus

wijjaj ni jeen jeamti tusarum tsankamaktarum. Tura nútiksarmek Jesukristutuj atumí iwiaakmarj tsankamaktarum, Yus wakerana nuna túrutati tusarum. Jesukristujaj tura asarum Yus shiir enentáimtikrume. <sup>6</sup> Jesukristunun Yusa Papiriin júnis áarmaiti:

“Iistarum. Kayan ti penkeran achikjaj”  
Yus tímiaji. Jeen emka apujtuamurj atí tusan Seunnum apujeajai.

Nin enentáimtana nu ántar enentáimtatsui. Aarma ana nu penké kayan chichaatsui. Antsu Jesukristun tawai. <sup>7</sup> Yus umirkaitrumna nu, “kaya ti penkeraiti” tarume. Tura Yúsán umirainiat-sna nuka Yusa Papiriin tana nujaj métek áiniawai. Ju áarmaiti:

Jeen jeamin nakitrarmia nú kaya jeen emka apujtuamurj atí tusa apujamuiti.

<sup>8</sup> Tura jusha aarma awai:

Tukumak iniaartin kayaiti.

Kame shuar Jesukristunun etserkamun nakitiakka, zenentáinium itiur penker wekasat?

Wats, nú shuar, Kristun umirainiachu ásar, tuke túrunatin asamtai tukumainiawai.

### Yusna ajasaru ainia nu

<sup>9</sup> Tura átumka Yus achikmaitrume. Tura, wínian pujurtursarat tusa yajauchinmaya Uunt Yus akantamkairume. Yusna asarum penker enentáimin ajasurme. Tura Yus sumakmaitrume. Niisha winia penkerun etserturkarat tusa túraití. Kame kiritniunmaya jínkirum ni tsáapnintrin wekasatniun achirmakurme. <sup>10</sup> Yaunchu nusháa shuar áuyarme. Tura antsu yamaikia Yus-shuar ajasrum, Niiniu ajasurme. Yus-shuar ajatsrumnin, zy waitnentrampromia? Antsu yamaikia Yus waitnentrामuitrume.

### “Yúsnaítjai” tu enentáimsatin

<sup>11</sup> Yatsurtirmin tájarne, Yusna ajasrum, ju nunkanam írar matsatu asarum, atumí ayashí wakerana nu tsankatkairap. Ayashim wakerana nu túrakmiñkia ame enentáim nujaj yajauch ajastatui. <sup>12</sup> Yus-shuarchanum penker wekasatarum. Túrakrumniñkia niisha yamáí “Yus-shuar yajauch túruiniawai” ántar tuíniayatan, ukunmanka, Yusjaj inkiunaktin tsawant jeamtai, penker wekarmena nuna enentáimturmasar, nú shuarsha Yúsán shiir awajsartatui.

<sup>13</sup> Kristu atumí Uuntrj asamtai, ju nunkanam akupin áiniana nusha umirkatniuitrume. Uunt akupin ashí akupin asamtai umirkatarum. <sup>14</sup> Tura ni akupeamurj ainia nusha tunaan túruinia núnaka asutiáti tura penkeran túruinia núnaka shiir awajsati tusa uunt akupin akupkamu ásarmatai umirkatarum. <sup>15</sup> Nekas penker wekaamurmijjaj enentáimcha ainia nu netse chichaamurj itiatmamtikiatarum tusa Yus wakerawai.

<sup>16</sup> Tunaanumiá ankant ajasu asarum penker wekasatarum. Túrasha wi ankant ajaschajak tusarum nánkamsarum yajauch túrawairap. Antsu Yusna asarum, ni wakerana nuna umirkatjai tusarum anearum wekasatarum. <sup>17</sup> Chkíkhcha shiir enentáimtustarum. Yus-shuar ainia nusha aneetarum. Yus penker asamtai ashamkatarum. Uunt akupin shiir awajsatarum.

### Yus-shuarti katsuntratin

<sup>18</sup> Takarniutirmesha ame úuntrum penker shiir enentáimturmakuiisha tura yajauchiitkuisha umirkatarum. <sup>19</sup> Nekaatarum. Ántar wáitkiarmainia nuj, “Yus iirui” tu enentáimsa katsunteakrumka, ti penkeraiti. <sup>20</sup> Yajauch túrawakmin asutiámamtai

katsunteakmeka nuisha warin ati. Antsu penker túrawakmin asutiámamtai katsunteakmeka juka ti penker túrame Yusai. <sup>21</sup>Núnisan túrunatin achik-maitrume. Kristu waitrutmasmiarme nuí, Wi túraj núnisan túrawarmi tusar wáitsamiayi. <sup>22</sup>Krístuka tunaan penké túrachmiayi. Tura chikichkinkesha penké ananachmiayi. <sup>23</sup>Kátsekeamsha Ninkia katsekachmiayi. Wáitkiamsha “yapajmiaktaj” tíchamiayi. Antsu “winia Apar Yus iisti” tímiayi, Yus penker túrin asamtai. <sup>24</sup>Kristu Nínki ni ayashin ii tunaarin entsaki krúsnum jarutramkamiaji. Tunáa enentáimtusairum tusa, antsu Yusai penker wekasamniuram tusa jarutramkamiaji. Atumí enentáin tsuártaj tusa Kristu asutniámiayi. <sup>25</sup>Murik ni pujutairin waketkitniun nékatsna ántsarmek atumsha menkaka wekaimiarme. Tura yamaikia atumí wáitmaurin waketkintrume. Atumí wáitmau Krístuiti, atumí enentáin wáinnia nu.

### Nuatnaikiaru itiur túratniuit

**3**<sup>1-2</sup>Tuma asamtai, nuwatiram atumí áishri umirkatarum. Amesha penker, Yus umirka weká asakmin, áishrum Yus-Chichaman umirchaitiat, ame túramurmin nekáa, ámeke chichaatsminin, niisha Yus-shuar ajastinian wakerittiwai. <sup>3</sup>Nu asamtai aya pátatek iwiarmampratniusha ti enentáimtusairap. Intiash ti penker iwiaratniusha, kurijiaj iwiarmampratniusha, pushí ti kuitjaí entsartíncha ti enentáimtusairap. <sup>4</sup>Antsu, “nekas shíirmach ajastaj” tákumka, enentáimin “shiiir kajechu átajai” tu enentáimsatarum. Nuka sakarchattawai. Tura nuka Yúsnumka ti penkeraiti. <sup>5</sup>Yaunchu núnisaran nuwá Yúsan enentáimtusarmia nu, tura Yúsan shiiir enentáimtikratniun

wakeriarmia nu, ni áishrin umirkar nujaí ni enentáin shíirmach ajasar pujuarmiayi. <sup>6</sup>Atumí weatri Sara ni áishrin Apraáman umirmiayi. Umirin asa, “winia uuntru” tíniuyayi nin. Atumsha penker túrakrumka tura sapijmiatsuk wekaakrumka, Sarajai métek átatrume.

<sup>7</sup>Tura áishmanfirmesha Yus wakerana nu nekaarum atumí nuwe shiir enentáimtusum tsanintarum. Nuwemsha, nuwá asa, áishmanjai métek katsuontra-chminiaiti. Tura niisha, ámiijai métek Yusa waitnenkartutairijiaj tuke iwiaaku átinian takusminiaiti. Tu enentáimta asam ame núwem shiir enentáimtustá. Yus áujkura itirchat atsuti tusarum túratarum.

### Yúsnum penker wekasatin

<sup>8</sup>Nuyasha ashí Yús-shuartermin tájarme, aya chikichík enentaik atí. Waitnennairatarum. Nekas yatsum aneam núnisrumek anenaitiarum. Aya áminiuk enentáimtutsuk chikichan yáintaj tu enentáimsatarum. <sup>9</sup>Yajauch turamainiakuiasha “yapajkiataj” tiirap. Katsekramainiakuiasha “iikkiataj” tiirap. Antsu “Yus winia shiir awajtusuiti” tu enentáimsarum, yajauch turamainiana nu penker awajsatarum. <sup>10-12</sup>Yus-Chichamnum júnis aarma asamtai nu túratarum:

Uunt Yus penker wekaana nuna wainiui, tura ni áujmancha ántawai. Tura yajauchin túrana nuna nakitrawai. Tuma asamtai, shiir pujustaj tákunka tura tuke tsawant warastinian wakerana nu, penker íimiastí, yajauch chichakaj tusa tura wáitruawaj tusa. Tunaanumiá kanaki penkeran túratí. Tuke enentáijiaj shiir átinian eakti.

Tu áarmaiti.

### Itiurchat aijn péñker túratin

<sup>13</sup> ¿Yaki yajauch túrutmat péñker turamnisha? <sup>14</sup> Túrasha péñker túrayatmek wáitiakminkia Yus shiir enentáimtikramprattarme.

Tuma asamtai ashamkartutsuk, sapijmiatsuk wekasatniuitrume. <sup>15</sup> Tura “Kristu winia Úuntruiti” tu enentáimtustarum. Tura “¿urukamtia Yus-shuar ajasuitiam?” turamainiakuiasha, péñker áimkiamnium iwiarnarum pujustarum. Waantu enentáimtumsuk, nin péñker enentáimtikrataj tusam túrata. <sup>16</sup> “Yúsjaí péñker wekasataj” tu enentáimsarum wekasatarum. Yus-shuar asakrumin chíkich shuar ántar áujmatramainia nu ni ántar áujmatramsamun nekaawar natsaararat tusarum Yusjaí péñker wekasatarum. <sup>17</sup> Yajauch túrakur wáitsatniujajinkia nankaamas, Yus wakerakuinkia péñker túrakur wáitsatniuka ti penkeraiti.

<sup>18</sup> Kristu ii tunaarín asakártaj tusa jarutramkamiaji. Ashí asakárma asamtai atak tunaan jarukchatniuiti. Niisha tunaan penké túrichuiat, ii tunáa asakrin wáitrutmasmiaji, Yúsnum ejetamtai tusa. Ayashíinkia jakayat ni wakaníjiaí ni ayashí ataksha iwiaaku ajasmiayi. <sup>19</sup> Ni wakaníjiaí jakáa wakanín emetamu armia nuna etserkataj tusa wémiayi. <sup>20</sup> Nusha yaunchu Nuai uunt kanun nájanuk siañtu painti (120) uwi pujurmia nuí Yuska umirtukarat tusa ti nákamaitiat Nuai étserman umikcharmiayi. Nú kanunmasha ishichik, uchu, aents kanunam pujuinian yumijiaí uwemtikrarmiayi. <sup>21</sup> Nu yumi Yus-shuarti imiantinian nakumui. Ii ayashí chamir awajsatai tusar imiantsuji. Antsu ii enentái péñker atí tusar Yus sear imianji. Nujai iisha uwemji. Jesukrístu nantakin asamtai, nujai uwempraitji. <sup>22</sup> Tura Niisha

nayaimpiniam we akupin pujutainium Yusa untsuuríni apujsamuiti. Túramtai nayaimpinmaya suntarsha, tura ashí kakaram akupin áiniana nusha Jesukrístun umirainiawai.

### Ju nuñkanam wáitsatin

**4** Kristu ni ayashíin wáitsa asamtai atumsha núnisrumek wáitsatin ákuisha, katsuntratjai titiarum. Ni ayashíin wáitiana nú shuar yajauchin páchiatsui. <sup>2</sup> Antsu “iwiakjana nuíka Yusa wakeramurín tuke umirkatjai” tu enentáimui. Ni ayashí wakerana nuna yamaikia páchiatsui. <sup>3</sup> Warí, Yúsán nékainiatsna nú shuar túruiniana nu atumsha núkap túrichmakuram. Yus-shuar ajatsuk tsanirmatin wakerimiarme. Yajauch túratniusha, nampernum nampekrum ti yurumárum, enentáincha ajasrum charaatum ajatniusha, ántar-yusa namperiin yajauch ana nu najanatniusha nusha ashí wakerimiarme. <sup>4</sup> Tura surimiatsuk yajauch túrimiarmena nu iniaisa asakrumin, yaunchu atumjai nuna túrin armia nu, “urukamtai iniaisara?” tusar yajauch áujmatramprume. <sup>5</sup> Túrasha ukunam nu aents ni túramurín etserkartatui. Iwiaaku ainia nunasha tura jákaru ainia nunasha Neka awai. Nii nu aentsun sumamtikiawartatui. <sup>6</sup> Túrasha jaka armia nu Yusa shiir chichame ujankarmiayi. Ni ayashíin ashí shuarjai métek jakamniaitatñ Yus iwiaaku pujana núnisan ni wakaní iwiaaku pujusarat tusa ujankarmiayi.

### Shuar yáintinaiitji

<sup>7</sup> Ashí amuukatin jeatemayi. Tuma asamtai péñker enentáimsatarum; túrarum anearum Yus aju pujutarum. <sup>8</sup> Aneniamujai untsurí tunaasha tsankuratin awai. Tuma asamtai ashí nankaamas nuamtak anenaistarum. <sup>9</sup> Kajé-kajejainchu atumí jeen

itiaaniátarum. <sup>10</sup>In ankant ankant shiir awajtamsatniun Yus ti núkap takakui. Tura in shiir awajtamsamujai chíkich shuarsha shiir awajsatarum tusa chíkich chíkich túratniun suramsaitji. Tuma asamtai péñker takaawa áintsarmek Yus amasmania nujai ame íruramuram yainá. <sup>11</sup>Etserkatniun Yus amasuitkiuinikia ame tamena nu, Yus tana nujai métek atí. Chíkich shuar yáintiniaitkiunka Yus amaana nú kakarmajai túrata. Ashí túramna nu Yusa naari shiir atí tusam Jesukrístu náarijijai túrata. Jesukrístun ashí aents shiir enentáimtusartí. Tura ashí áentsnum ni kakarmari tuke atí. Nuna tajai.

### Yus-shuarti wáitsatin

<sup>12</sup>Aneamu yatsurtiram, ti waitsatin nekaprasmartin jeartampramna nu nusháa enentáimprairap. Wáitsatin támatai, “¿urukamtai waitsa pujaj?” tu enentáimsairap. Kame túrunamniaiti. <sup>13</sup>Tuma ain shiir enentáimsatarum. “Kristu wáitsamurín métek-taku wáitiakun péñkeraiti” tu enentáimsatarum. Ukunam Kristu wincharí wáinkiarum timiá warasmi tusarum túratarum. <sup>14</sup>Krístunu asakrumin katsekkramkachartimpiash. Túmaitkiuisha Yusa Wakani shiir ana nu atumijin pujurtamkui shiir awajsamuitrume. Katsekkramainia nú shuar imia Yusa Wakani yajauch áujmatainiawai. Tura áumka Yusa Wakani shiir awajearme. <sup>15</sup>Túra atumsha yajauch túrawairum aneartarum. Mankartana nu, kasamkana nu, tunáa túrana nu, tura chikichna páchiana nusha ni wáitsatniurinkete. Atumjainkia nu wáitsatniuka atsutí. <sup>16</sup>Tura antsu Krístunuiti tusar wishikramuk wáitkiarmainiakui natsaarairap. Krístunu asam wáitiayatmek, natsamtsuk Kristu naari shiir awajsata.

<sup>17</sup>Yuska ni shuarín nekapsatajtsa nankamatniuiti. Tura nu tsawantcha jeayi. Yus imia in nekaprakuiisha Yus-Chichaman umirainiatsna nú shuarsha urukawartín. Ti asutniáwartatui. <sup>18</sup>Imia Yus umirjinia nu uwempratniurí itiruchataitkiuisha tunaan túruiniana nusha urukawartín. <sup>19</sup>Tuma asamtai Yus wakeramujai wáitiainia nu, niisha Yus najanamu asa Yus iirsatí tusa tuke péñker túratí. Warí, Yuska tuke péñker túrichukait.

### Yus-shuara uuntri túratin

**5** Yamaikia Yus-shuara úuntritiram, jintintjarme. Wisha núnisnak Yus-shuara úuntritnjai. Kristu wáitsamurín wáinkiaitjai wisha. Tura ukunam ti shiir átatna nuí chíkich Yus-shuara uuntria núnisnak wisha pachiinkiaitajai. <sup>2</sup>Yus-shuar ame ístiniaitmena nu, péñker iistá, murikiu wáinin ni murikrín wainnia áintsamek. Nakittsuk, shiir enentáimsam túrata, Yus wakerana nuke. “Chíkich akupta asamtai túrattajai” tútsuk tura nujai kuítrintin ajastin enentáimtsuk nekas wakeritia, Yusa takatri asamtai. <sup>3</sup>Turasha, “Yús-shuara uuntri ajasan, Yus-shuara akuptiaj” tu enentáimsaip. Antsu shiir túramurmijijai Yusa murikrj jintintiata. <sup>4</sup>Nuinikia murikiu wainniu Uuntri taa wantiniak iwiarmamtaí tawasap ti shífirmachia núninian suramsattawai. Aents súana nú shífirmach wari mamurtiniaiti. Tura Úuntrum ámin suramsattana nuka penké mamurchattawai.

### Yus-shuarti umirnaikiatin

<sup>5</sup>Tura natsatirmesha atumí uuntri umirkatarum. Kame yaunchu Yús-Papinium aarma asamtai ashí Yus-shuartiram nankaamantu enentáimtumatsuk umirnaikiatarum. Waantu enentáimtuma núnaka Yus nakittiwai. Antsu nankaaman-

tuchu enentáimtuma nuna Yus waitnentak yayawai. Tu aarmaiti.

<sup>6</sup>Wats, Yus timiá kakaram asamtai, amek nekamam, péejchach enentáijjai enentáimtumasta. Nuiñkia tsawant jeamtai ni wakerak Yus ámin penkeri awajtamsattawai. <sup>7</sup>Yus ámin ti enentáimturmakui ame itiuurchatrum ainia nu Yus ashí iiktusta.

<sup>8</sup>Aneartarum tura ímiastarum. Íwianch atumí nemasri ana nu, uunt yawáa nuke, yanak emesraintiaj tusa eak tentaa wekaawai. <sup>9</sup>Tura tuke Yus nekas enentáimtusrum surimiaktarum. Ashí nunkanam Yusnum atumí yachi ainia nu átum wáitiarmena núnisan wáitiainiawai. Nusha kajinmakchatniuitrume. <sup>10</sup>Wats, ishichik tsawant wáitsarmena nu nankaasmatai Yus ataksha penker awajtamsattarme. Tura numi wewe wajana núnisan ikiakátmartatrume. Tura Yus ikiakárma asarum ni jintiin tuke penker wekasattarme. Ju Yus tuke in waitnentramtsujik. Tura iisha

Jesukristunu asakrin Niijjai métek Yus ni shiir pujutainium tuke shiir pujusmintrum tusa achirmakuitji. <sup>11</sup>Nú Yúsnasha ashí aents shiir enentáimtusartí. Tura ashí áentsnum ni kakarmari tuke atí. Nuke ati.

### Amíak áujmamsamu

<sup>12</sup>Serpanujai ju papin ishichik áarmaj nuna akupejai. Serpanu Yusjai penker wekaak Yusnum winia yatsur ajasuiti; núnaka nékajai. Yus waitnentrama asa ti yainmakmania nuna enentáimtikeajrume ju papijjai. Tura tuke ni waitnenkartutairin wekasatarum tájarme.

<sup>13</sup>Papirúnianmaya atumjai métek Yus achikma áinia nu amikmaatmarme. Winia uchir Markus núnisan amikmaatmawai.

<sup>14</sup>Yusai yachi ajasu asarum anenaisrum shiir awajnalisatarum. Jesukristunu ajasuitrumna nuna Yus imiatkinchanum pujustinian suramsarat tusan wakerajai. Nu atí.

## PÍTIUR

### *Ataksha papin áarar akupkamu*

#### **Pitiur Yus-shuaran áatramiania nu**

**1** Wikia ju papin aajna ju Semun Pítruitjai. Jesukrístu akatramu asan ni takarniurintjai. Ii Yusri tura in Uwentikramin Jesukrístu umirumna nuna atumniasha juna áatjarme. Niisha ashí áentsun métekrak enentáimtin asamtai atumsha iijjai métek Niiniu ajasurme. Nuka ti penkeraiti. <sup>2</sup>Yus, tura ii Uuntri Jessusha nékarmena nú nukap nekaki wéakrumin, Yuska atumin ti nukap yáinmaktatrum tura ti nekas imiatkinchanum pujustinian suramsattarme. Nuna nekaan tuke núnisan atí tusan wakerajrume.

#### **Yusai páchitkia atin**

<sup>3</sup>Yus uunt asa tura ashí túramnia asa, umirtukat tusa achirmakuitji. Nii neka asar atsumajnia nu wáinkiaitji. Yus-shuarti wekasatniusha, tura Nin aneatniusha ii atsumajnia nuna Yuska kakaram asa suramsaitji. <sup>4</sup>Niisha uunt asa tura tujinkiachu asa ni chichamen suramsaitji. Nu chichamsha ti kakarmaiti tura ti penkeraiti. Nu chichamjai atumsha atumí ayashi yajauch wakerana nuyá uwemprarum, Yusai páchitkia átinian suramsaitrume. <sup>5</sup>Yus umirkarme. Yamaikia juna túrataj tusarum kakartiniaitrum. Ti penker wekasatniuitrum. Nuyá Yusna nekaatniuitrum. <sup>6</sup>Nuyá yayauch túrashtin íimiastiniaitrum. Nuyá katsuntratniuitrum. Nuyá Yus shiir enentáimtusum wekasatniuitrum. <sup>7</sup>Tura nuyá ashí shuar shiir enentáimtustiniaitrum. Tura nu nankaamas ashí shuar aneatniuitrum.

<sup>8</sup>Ashí nu túrakrumka, tura tuke túrukum wéakrumka, nakiarchattarme. Túrarum ni takatri émamkesrum takastatrum. Tura ii Uuntri Jesukrístu nekas nekaattarme. <sup>9</sup>Tura nuna túruiniatsna nuka, kusurua áanin áiniawai. Jesukrístu wakeramurin enentáimtuiniatsui. Ni tunaariya uwemprarmia nuna kajinmatainiawai. <sup>10</sup>Tuma asamtai yatsurtiram, Yus atumin anaitiamak achirmakurmena nu tuke enentáimsarum wetarum. Túrakrumka penké iniarchattarme. <sup>11</sup>Tura ii Uuntri Jesukrístu uwentikramprajnia nu, Nii tuke akupeana nu, nakittsuk shiir awaintiamattarme.

<sup>12</sup>Tuma asamtai nékarminin tura Yusna nekas ana nuyá kanaat-srumnin tuke enentáimtikratjarme. <sup>13-14</sup>Nekaatarum. Winia jákatniurum jeatema nuna ii Uuntri Jesukrístu ujakayi. Tuma asamtai iwiaaku pujajna juik atumin tuke enentáimpratarum tusan jintinratniuitjarme, tu enentáimsajai. <sup>15</sup>Tura wi jakamtai, wi aajna juna tuke kajinmatkiirum tusan, wi jeajna nuna túrattajai.

#### **Kristu waantu ajasun wáinkiarminia nu**

<sup>16</sup>Ii Uuntri Jesukrístu kakarmari tura ni táratniuri etserkamajnia nu, aya áentsnumiá ántar chichamchaui. Antsu imia ii jiiijai Uunt Jesukrístu waantu ajasu wáinkia asar ujakmajrume. <sup>17</sup>Tura Apa Yus Jesukristun shiir waantu awajsamia nu, ni imiá shiir pujutairiya chichaak tímiayi, “Juka winia ti aneamur Uchiruiti. Nin ti wararjai.” <sup>18</sup>Iisha naint “Yusna” tájinia nu, Niiijai pujá asar nu nayaimpinmaya chichaamu paant antukmaji.

<sup>19</sup>Tura nuna nankaamas ti nekasa nu, Yúsnan etserin yaunchu etserkarmia nusha nékaji. Ju étserma jusha, tsawant tsawaatsain kiritniunam ji keak tsápin



awajeana áintsan̄ asamtai, péñker enentáimta asarum péñker túrarme. Tura Kristu taa, yáñkuam etsantea núnisan̄ atumí enentáin̄ ashí paant awajsattawai. Tura nu tsawant jeatsain̄ nu étserma tuke péñker enentáimtustarum. <sup>20</sup>Tura ju emka nekaatarum. Shuar aya ni enentáimmiarijiāin̄, Yusa Wakan̄jiāin̄chu, Yus-Chicham urukamtai tu chicháa nuna nekaatniun jeatsui. <sup>21</sup>Warí, Yúsnan̄ etserin yaunchu etserkarmia nu, aya ni wakeramurijiāin̄ tícharmia. Nu áishman̄kan enentáin̄ Yus pujursarmia. Tuma asa ni tiarmia nuna Yusa Wakan̄jintintiam tiarmia.

### Wait chichaman unuiniainia nu

(Jútas 4-13)

**2** Tura Israer-shuarnum wait chichaman etserniusha páchitkiarmia. Atumiin̄cha wait chichaman unuiniu páchitkia ártatui. Niisha awajimtikrampratniun wakeruiniak wáitian̄ ti yajauchin̄ uūkar unuiniartatui. Tura “Uunt Jesus uwemtikrurmia nusha ántrai” tiartatui. Nuna takui ni amuukatniurísha wárik jeartatui. <sup>2</sup>Tura untsurí shuar ni yajauch túruiniamurin̄ firsar métek túrawartatui. Iis, “Yus-Chichaman unuiniaitjai” tuñniayatan̄ imiá yajauch túruiniakui untsurí aents “Yus-Chicham ántrai” tiartatui. <sup>3</sup>Kuñtian̄ ti wakeruinia ásar, wait chichaman unuitiamprar akiam kuñtriniawartatui. Tura nú shuar yaunchu Yus jákatniunam sumamtikiawarma ásar, ni amuukatin̄ tsawantrí jeatemayi. <sup>4</sup>¿Warí? Yuska ni suntarí nayaimpiniam pujuarmia nunasha péñké tsankurachmia. Antsu nayaimpinmayā jinium akupkarmia. Tura nekapsatin̄ tsawant jeatsain̄ kiritniunam jinkiamu emetamu pujuiniawai. <sup>5</sup>Yáunchuyā shuarnasha Yus tsankurachmia. Antsu amuukat

tusa amaarkatniun akuptukarmia. Antsu aya Nuain, Yusjaj̄i wekasatniun etserin asamtai ni shuarí siati armia nujaj̄i uwemtikramia. <sup>6</sup>Enentáimpratarum. Sutuma pépruncha tura Kumura pépruncha nayaimpinmayā jin akuptuk Yus mash amukmia. Aya yúnkunmik awajsamiai. Ukunam nu túrunamun nekaawar, shuar tunáa túratin̄ tsúumainian̄ nekaawarat tusa túramiai. <sup>7</sup>Tura Yus Ráutan̄ uwemtikramia. Péñker shuar asa, Sutumanmayā shuar imiá yajauch ásar tunáa túruiniakui, Raut kúntuts enentáimsamiai. <sup>8</sup>Péñker áishman̄ asa, nuyá shuara yajauchirin̄ wáitianiak, ni enentáin̄ péñker asamtai tuke tsawant kúntuts enentáimiuk wáitmiayi. <sup>9</sup>Tura incha tunaan̄ iniakturmakin̄, nu tunaanum nupetnakchati tusa Uunt Yus uwemtikrampramniaitji, ni umirka asakin̄. Túrasa yajauch shuárnaka nekapsatin̄ tsawant jeakui ti asutniáwarat tusa Yus yámaikikia apujeawai.

<sup>10</sup>Tura Yus akupeana nuna umirkatniun nakitrar ni yajauch wakeramurin̄ túruinia nunasha Yuska nekas asutiáttawai. Enentáimcha ániawai. Tura ni wakeramurin̄iak wakeruiniawai. Ni-ijjaj̄i nan̄kaamas akupin̄ ainia nuna yajauch áujmatainiawai. <sup>11</sup>Warí, imia Yusa suntarí Yusaj̄i matsatania nu, nuna túratniun tsúumainiawai. Nan̄kaamas kakaram tura nan̄kaamas uunt ániayat nu akupniun katsekainiatsui.

<sup>12</sup>Nu áishman̄sha enentáin̄cha yajasma núnin̄ ániawai. Achikiar man-tamnatniuk akiinia ániawai. Enentáimtsuk nan̄kamsar yajauchin̄ chichainiawai. Tuma ásar yajasma núnisan̄ jákartatui. <sup>13</sup>Chikichan wáitkiamia áintsan̄ wáit-sartatui. Tuke tsawant ni wakeramunak túruiniak “waraajai” tuiniawai. Tura atumjaj̄i irunar yurumáiniayatan̄ atu-

min anan̄kramawar warainiawai. Nuka natsantaiti.

<sup>14</sup>Nuwan wakerutskeka íniatsui. Tunaan yawetainiatsui. Yúpichuch ainia nú shuaran netse túratniun wakerumtikiainiawai. Kuftian wakeruk-tinniasha ti nékainiawai. Jákatniunam sumamawaru áiniawai. <sup>15</sup>Yúsnumaani naka wétsuk awajirarai. Peura uchiri Paraam Yúsnan etserniuitiat yaunchu awajimia núnisan̄ awajiniawai ju shuar. Paraamka tunaan tura, kuftian achiktinian ti wakerukmiayi. <sup>16</sup>Tura niisha tunáa túratajtsa weaj Yuska umpuurun chichachun aents chichaana nujai métek chichamtikiamiayi. Nuinkia umpuuru timia nujai Yúsnan etserin ni netse túratniur̄in enentáimiar iniaisamiayi.

<sup>17</sup>Nu áishmansha yumirmat kuyua núnis áiniawai. Tura núnisan̄ yuranmisha kíariat nase umpuim menkaana nu, yumi ajuarcha ásar, penké ántar áiniawai. Warí, Yus-Chichamjai áentsun yainiainiatsui. Niisha imiá kirit ámanum tuke pujustin áiniawai. <sup>18</sup>Niisha ti chichainiyat ántar chichainiawai. Yajauch túratniujai tura ayash wakera nujajisha páchim túriarmia nuyá kanakiarua nú shuaran ataksha tunaanum ajuartajtsa wakeruiniawai. <sup>19</sup>“Iiya núnis túrakrumka an̄kant átrume” tu wénawai. Túrasha imia ninki ni tunaariin emetamu áiniawai. Páantchakait. Shuar warí tunaajaim̄ nupetnaka, nuna emetamur̄inti. <sup>20</sup>Kame shuar, uunt Jesukristu uwemtikiartin ana nuna chichamen nékainiak ju nunkanam yajauch ainia nuyá uwempra ainia nu, tunáa nupetkam atak yajauchiniam iniainiakka, nuik pujumia nujainkia nan̄kaamas yamá imiá yajauch pujuiniawai. <sup>21</sup>Yusa akupkamur̄in imiá pénkera nuna Yus nú shuarnasha súsarmiayi. Túrasha

nékainiyat tunaanum waketkiaru ásar ti asutniáwartatui. Tuma asamtai, nekas jintia nekaachuitkiun̄ka maak árainti. <sup>22</sup>Tíchamukait, “yawá iyak ataksha yúawai,” tura, “kuchisha imiaimiuitiat ataksha tsakusnum maajkimiui.” Nu áishmansha núnisan̄ yajauchiniam ataksha wáketainiawai.

### Uunta tátintri

**3** Aneamu yatsurtiram ju papin jimiará áatjarne. Mai papinium winia jintintiamurjai atumí chamir enentáin enentáimtikratjarum tusan wakerajrume. <sup>2</sup>Yúsnan etserin, pénker wekain armia nuna etserkamur̄i enentáimturtarum. Tura ii Uuntri akupkamur̄in ni akatramur̄ijiai ujatmakarmia nusha enentáimpratarum. Jesukristu uwemtikrampramaj nuna chichamen̄ tajai.

<sup>3</sup>Jusha emka nekaatarum. Amuamu tsawantin Yúsnan wishikin wantinkiertatui. Tura niisha ni yajauch wakeramur̄in túrusar wekasartatui. <sup>4</sup>Tura juna tiartatui. “¿Krustuka “wi atak tátatjai” timia nusha urukuit? Warí, ii uuntri yaunchu kajinkiarumia nuyá yapajíachmaiti. Yus yaunchu ju nunkan najanamia nuyá yamaisha tuke núniskete” tiartatui. <sup>5</sup>Túrasha nunkan̄cha nayaimpincha Yus yaunchu najanamia nuna nekaatniun nakitiainiawai. Yusa chichamejai nun̄ka entsayā jinkimiayi tura nun̄kasha entsá nanatrawai, Yus timia nujai métek. <sup>6</sup>Tura ukunam nu nunkan amaarkamujai Yus emesramiayi. Ashí nuna nekaatniun nakitiainiawai. <sup>7</sup>Tura Yus tiniu asamtai nayaimpisha nun̄kasha yamáiya nuka jijjai emesnarat tusa ikiusma áiniawai. Yus áentsun nekapsattana nu tsawantai yajauch aents emesnartatui; tura jisha nu tsawantai nunkan̄cha nayaimpincha áesattawai.

<sup>8</sup>Tura júsha, aneamu yatsurtiram, enentáimsatarum. Uunt Kristujainkia chikichík tsawant mir uwiya núniskete; mir uwisha chikichík tsawanta núniskete. <sup>9</sup>Uunt Kristu, “atak tátatjai” tana nuna umitsuk menkakashatui. Áyatik áentsti “wau taatsui” taji. ¿Urukamtai wau taatsua? In áentstin nákarmaji. Shuar chikichíkísha menkakajin tusa nakitiawai. Antsu ashí shuar enentáin yapajíáwarat tusa wakerawai. <sup>10</sup>Túrasha Uunta tsawantri aya aneachma jeattawai. Kasa aya aneachma kiritniunam taana núnisan tátatui. Nu tsawantin nayaimpisha ipiamta núnis charáa timiatai menkakattawai. Tura nuí ashí írunna núurtiuk esaawartatui. Tura nunkasha tura ashí írunna nusha esaawartatui.

<sup>11</sup>Ashí nu emesnartin neka asarum atumsha imiá nekas Yus tuke enentáimtusurum, takamtsuk umirkarum wekasatniuitrume. <sup>12</sup>Yusa tsawantri wárik tati tusar, jintiá ímprusar nákastiniaitji. Nu tsawantai nayaimpisha esáa emesnartatui, tura ashí írunna núurtiuk ti tsuer ajas entsamnattawai. <sup>13</sup>Tura iikia yamaram nayaimpisha, yamaram nunkasha ati tusar nákaji. Nu átatui, tímiayi Yus. Tura nuísha aya pénderak átatui.

<sup>14</sup>Nu tuma asamtai, aneamu yatsurtiram, ju túrunati tusarum

nákarmena nuí, imiatkinchanum wekasam chamir enentáimjai makuuchmin Yus wáitkiati tusarum wekasatarum. <sup>15</sup>Ju nekaatarum. In uwentikramprataj tusa Yus ti nákarmaji. Ii aneamu yachi Páprusha núnisan Yus ni nekatairín susamia tímiatrusan áatramprarme. <sup>16</sup>Ashí papí aarmia nuí Pápruka wi tajana nuna chichaawai. Kame ni áarmari chíkichka ishichik nekaachminiusha áiniawai. Nékachu ainia nú shuarsha, tura Yúsnum tariarcha ainia nusha Papru áarman yapajíáwar nusháa jintintiainiawai. Tura chíkich chichamsha Yus-Chichamnumia ana nuna núnisan túruiniawai. Túmainiakka niniki emesmamainiawai.

<sup>17</sup>Wátsek, aneamu yatsurtiram, túruntsain ujakjarmena nu neka asarum, yajauch shuar anankramattsa wakerutmainiak awajimtikrurain tusarum, tura Yusaj tariarurmena nuyá iniarajj tusarum anearum wekasatarum.

<sup>18</sup>Tura ii Uuntri Jesukrístu in Uwentikkiartin ana nu, yamáí nékarmena nú nankaamas nekaatarum. Tura enentáimin nú nankaamas tariarum wetarum. Yamaisha tura tuke, ii Uuntri Jesukristu náarin uunt awájsartí. Nu atí.

## JUAN

### *Emka papin áarar akupkamu*

#### **Tuke iwaaku átinia nérentin Chicham ana nu**

**1** Ashí nan̄kamamia nú yaunchu Yusa Uchir̄i tuke pujuuyayi. Nusha iisha anturkait̄ji. Nekas ii jiījiāi wáinkiait̄ji. Wáinkiarsha ii uwejējāisha ant̄inkiūit̄ji. Niisha Yúsan ti paant awajeak̄, Chícham t̄miniati. Tura tuke iwiaaku átinia néren̄nuiti. Nuna áateajrume. <sup>2</sup>Iwiaaku átinia néren̄niusha paant nekanamiayi, nusha Jesukr̄istuiti. Iisha Nii wáinkia asar nu étsereaji. Tura tuke iwiaaku átinia néren̄niur̄i asa tuke Yus Apajāi pujuyayi. Tura yamaikia īini paant ajatramsakrin atum̄niasha ujaajrume. <sup>3</sup>Ii Yus Apajāisha ni Uchir̄i Jesukr̄istujaīsha tsan̄inkiar nekas chikich̄ík ajaji. Tura atum̄sha núnisrumek īijiāi chikich̄ík ajasuk tusar wáinkiamajnia nuna anturkamajnia nunasha ujaajrume. <sup>4</sup>Ti shiir warastarum tusan juna áatjar̄me.

#### **Yus tsáap̄niniati**

<sup>5</sup>Yus imiá tsáap̄nin asam̄tai kiritin Nīinkia pen̄ké atsawai. Nu chichaman Jesukr̄istu in unuitiamprakrin nuna atum̄niasha ujaajrume. <sup>6</sup>“Nīijiāi tsan̄inkia pujaji” táyatar kirit̄niunam pujustinia áintsar tunaanum pujakr̄ikia wáitraji tura nekas pen̄ker ana nu túrats̄ji. <sup>7</sup>Yuska tuke tsáap̄ninium pujuwiti. Iisha núnisrik tuke tsáap̄ninium pujakr̄ikia nuámtak nawam̄naikiar pujuinīaji. Túrakrin Yus ni Uchir̄i Jesukr̄istu numpé̄jāi ashí ii tunaar̄i japirtam̄ji.

<sup>8</sup>“Wi tunaan túrichuit̄jai” tákurkia ímia iik anan̄mamaji. Nekas ana nu nékats̄ji. <sup>9</sup>Antsu ii tunáar̄i Yus paant

ujakr̄inkia Yuska tsan̄kurtamprattaji. Tura ii tunaar̄in asakátramprattaji. Yuska ti pen̄ker asa Nii tana nuna t̄miatrusan̄ umikmin asa túrattawai. <sup>10</sup>Kame “Tunaan túrichuit̄jai” tákurkia nujaī “Yus wáitr̄iniati” taji. Ni chichamesha ii enentá̄in pujurtam̄tsuji.

#### **Jesukr̄istu in Yúsan áujtur̄mait̄ji**

**2** Yus-shuartiram, tunaanum iniaar̄irum tusan jū papí áateajrume. Túrasha Yus-shuar tunáa túram̄tain̄kia Apa Yusan ii áujtur̄mau awai. Nuka Jesukr̄istuiti. Niisha ti pen̄keraiti. Niisha Yúsan áujtur̄makui Yus̄jāi ataksha iwiaarar pujustat̄ji. <sup>2</sup>Jesukr̄istu ii tunaar̄in asakártaj tusa jarutram̄kiāji. Túrasha aya íniunkechu antsu ashí shuara tunaar̄in asakártaj tusa jarukmiayi.

<sup>3</sup>Yus tana nu umirkur̄kia nuikia Yus nekas nékait̄ji. <sup>4</sup>Tura shuar “Yúsan nékait̄jai” tayat Yus tana nuna umirchakka wáitrawai. Nekasa nuka ni enentá̄in atsawai. <sup>5</sup>Antsu shuar Yus tana nuna umireakka Yúsan ti shiir aneawai. Túrakur Nīijiāi tsan̄inkiar pujamu nékaji. <sup>6</sup>“Yus̄jāi tsan̄inkia wekaājai” tana nú shuar Jesukr̄istu wekasamia núnisan̄ wekasat̄niuiti.

#### **Yamaram akupkamu**

<sup>7</sup>Yatsuru, yamaram akupkamun áattsujrume. Áyatik yámankam̄taiknumīa antukmiarum nunak tájar̄me. Ashí atumin jintintiamu yaunchu akupkamuiti. <sup>8</sup>Túmaitiat nekas yamarma áitkiasnak áateajrume. Nu akupkamun Kristusha nekas iniakmasmai. Atumīincha nu akupkamu nekas paant awajsamuiti. Nujaī kiritin men̄kaatemka asam̄tai tura nekas tsap̄n̄inkia paant tsap̄nirtasa pujakui nu akupkamun ataksháa aateajrume.

<sup>9</sup>Shuar “tsáap̄ninium pujajai” táyat ch̄íkich Yus-shuaran nakitiakka tuke

kiritniunam wekaawai. <sup>10</sup>Yus-shuaran aneana nu nekas tsáapninium pujawai. Niisha iniaatsuk chikichnasha tunaanum ajuarchamniaiti. <sup>11</sup>Tura shuar chíkích Yus-shuaran nakitiakka kiritniunam tuke wekaawai. Tura kiritniunam iimiu asa itiuraani wea nuna nékatsui.

<sup>12</sup>Uchitirmincha, Jesukrístu jakamu-jai atumí tunaari tsankurnaru asakrumin juna áateajrume. <sup>13</sup>Úntirmincha yámankamtaiknumiá tuke pujuuya nu nekáa asakrumin juna áateajrume. Únmarutirmincha uunt iwianch nupetka asakrumin juna áateajrume.

Uchitirmincha, Yus Apa nekáa asakrumin áateajrume. <sup>14</sup>Úntirmincha yámankamtaiknumiá tuke pujuuya nu nekáa asakrumin juna áatjarne. Únmarutirmincha atumí enentáijijai Yus-Chicham umirkarum kakaram asarum íwianch nupetka asakrumin juna áatjarne.

<sup>15-17</sup>Aya áentsnumiá ana nu yakiyanchuiti. Apa Yus súsachuiti. ¿Warimpiait nu? Júiti: ame ayashim wakerana nusha, ame ísam takustaj támena nusha, tura nankaamantu ajastin. Nuka ju nunkanmaya áiniawai. Shuar aya nunak wakerak Yúsnaka aneatsui. Kame ju nunkasha amuukattawai. Ashí nu wakeruktincha ti nekas amuukattawai. Túrasha shuar Yusa wakeramurin umiana nu tuke iwiaaku pujustatui Yusjai. Nu asantai atumsha ju nunkanam ana nu pachikiairap. Tura aya juyá ana nu aya tákustin enentáimsáip.

### Nekas chicham tura wait chicham

<sup>18</sup>Uchirú, amuukatin tsawant jeatemayi. Atumsha Kristu nemasri tátin antukuitrume. Yamaikia untsurí Kristu nemasri wantinkiarumatai amuukatin tsawant jeatemayi. <sup>19</sup>Nusha ii weeak

ármayi. Túmaitiat nekas Yus-shuar ácharmayi. Nekas Yus-shuar áiniakka tuke iijjai irunar pujuaraayi. Tura jíinkiarumatai nekas Yus-shuarcha ainia nu paant nekanamniaiti.

<sup>20</sup>Antsu atumniaka Yusa Shiir Wakanin Kristu suramsantai ashí paant nékarme. <sup>21</sup>Nékachuitrume tu enentáimkiun áattsujrume. Antsu nekas chicham ana nu neka asakrumin paant áatjarne. Wáit-chichamsha nekas-chichamsha penké nushaachuk ainia.

<sup>22</sup>Wáittrin júiti: Jesusan “Yus anaiki-amuka Krístuchuiti” tana núiti. Núiti nekas Kristu nemasri. Yus Apancha ni Uchirincha nakitia asa Kristu nemasrinti. <sup>23</sup>Yusa Uchirin nakitiaiania nu Yus Apajaisha tsanin pujatsui. Tura Yusa Uchirin shiir awajea nu, Yus Apajaisha tsanin pujawai.

<sup>24</sup>Yámankamtaiknumiá antukmiarum nu atumí enentáin pujurtamsati. Nu túrakrum atumsha Yusa Uchirijjaisha Yus Apajaisha tuke tsaninkrum pujustatrume. <sup>25</sup>Jesukrístusha Nijjai tuke iwiaaku pujustinian tsankatramkaitji.

<sup>26</sup>Anankartin írunkui juna áatjarne. <sup>27</sup>Atumniasha Jesukrístu Yusa Shiir Wakanin suramsakrumin, nu Wakan tuke pujurtamkurmin shuar jintintramatin atsumatsrume. Antsu Yusa Wakaní ashí jintintramprume. Ni jintintrammasha imiá nekas asa wáitchaiti. Tuma asantai Nii jintintramna áintsarum Krístujai tuke tsaninkrum pujustarum.

<sup>28</sup>Yamaikia, uchiru, Krístujai tuke tsaninkrum wekasatarum. Nu túrakrikia Nii támatai natsamtsuk ti shiir inkiunaiktatji. <sup>29</sup>Atumsha Jesukrístu ti penkera nu nékarme. Núnisan ashí shuar penkeran túruinia nuka Yusa uchiri áiniawai. Nusha nekaatarum.

### Yusa uchirĭ áiniana nu

**3** Maa, shiir enentáimpratarum. Yus Apa ti anenma asa “winia uchir” tu anaitiamkaitji. Kame nekas ni uchirintji. Tuma asakrin jú nunċanmaya Yús-shuarcha nekarmainiatsji. Kame Yunasha nékainiatsui. <sup>2</sup> Aneamu yatsurtirnea, júna tájarme: nekas Yusa uchirĭ ajasuitji. Kame ukunam urukuk átaj<sup>1</sup> nusha nékatsji. Túrasha jú paant nékaji: Jesukrístu támatai imia Nii paant wáinkiar Niiĵiaĭ métek ajastatji. <sup>3</sup> Tura shuar shiir enentáijĵiaĭ nuna nákkaka imia niŋki shiir awajmamui Jesukrístujĵiaĭ métek shiir atajai tusa.

<sup>4</sup> Shuar tunáa túrakka Yus akupkamu umirkachuiti. Kame núiti tunaaka Yus akupkamu umirkashtin. <sup>5</sup> Jesukrístu ii tunaari asakártaj tusa jú nunċanam támia nu nékarme. Tura Niŋkia tunaan túrichuyayi. <sup>6</sup> Tuma asamtai shuar Niiĵiaĭ tsaniĭ wekáa nuka tunaanum wekaatsui. Antsu shuar tunaanum wekaakka nu shuar Krístun wáinchaiti, núnisanĭ nékachuiti. <sup>7</sup> Uchiru, shuar ananċramawairap. Péŋker túrinkia Kristu ti peŋker asamtai niisha péŋkeraiti. <sup>8</sup> Antsu shuar tunaanum wekaana nu iwianchnaiti íwianch tuke tunaan túrin asamtai. Yusa Uchirĭ jú nunċanam táwiti ashí íwianch túramun emesrataj tusa.

<sup>9</sup> Shuar nekas Yusĵajĭ akiinia nu tunaanum wekaatsui. Yusa uchirĭ asa Yusa iwiaakmarijĵiaĭ wekaawai. Tuma asa tunaanum tuke wekaatsui. <sup>10</sup> Shuar péŋker túratsna nuka tura Yus-shuarcha kajera nuka Yus-shuarchaiti. Nujĵajĭ Yusa uchirĭ ainia nusha tura iwianchi uchirĭ ainia nusha paant nekaamniaiti.

### Mai anenai ajatin

<sup>11</sup> Atumsha yámankamtaikniumiĵ chicham antukmiarum nu júiti: mai anenai ajartin. <sup>12</sup> Iisha Kaŋŋkia áanin

áchatniuitji. Íwianch-shuar asa ni yachin máamiayi. Tura ĵurukamtai maamia? Enentaimprata. Nii yajauch asa tura ni yachi péŋker asamtai máamiayi.

<sup>13</sup> Yatsurtiram, jú nunċanmaya shuar nakitramainiakui ti enentáimsairap. <sup>14</sup> Iikia jákatniunmaya uwempra asar<sup>1</sup> nekas iwiaaku pujaji. Túmakur Yus-shuar ainia nu aneaji. Nujĵajĭ yamaram iwiaakma takakjina nu imiá páantaiti. Shuar Yus-shuarcha aneachkunċa tuke jákatniunam wekaawai. <sup>15</sup> Shuar Yus-shuarcha nakitiakka maŋkartinia núnisaiti. Tura maŋkartinkia tuke amuicha iwiaakmanum pujuiniatsui. Nuka nékaji. <sup>16</sup> Jesukrístu in jarutramka asakrin nujĵajĭ nekas in anenmaj nu nékaji. Iisha núnisrik Yus-shuar ainia nu ti aneakur ni yaŋtai tusar jarukmin átiniaitji. <sup>17</sup> Túrasha shuar chíkich Yus-shuar atsumana nuna takakiat waitnentachkunċa nekas ni enentáijĵiaĭ Yúsan aneawash. <sup>18</sup> Uchiru, aya chíchamĵainĭ anenain áchatniuitji antsu nekas aneniakur péŋker túrar yáiniaiktiniaitji.

### Yusaj natsamtsuk jeamniaitji

<sup>19</sup> Jujĵajĭ ii Yúsajĭ sapijmiatsuk jeatniusha tura nekas Yus-shuaraitji nu nekaatniusha nekapmampramniaitji. <sup>20</sup> Ii enentáĭ yajauch túramun enentáimtikramkurnisha Yus iijĵiaĭ nanċaamas ashí mash nékatsuk. <sup>21</sup> Tura, aneamu yatsurtiram, ii enentáĭ yajauch túramun enentáimtikramchakrinkia Yúsajĭ sapijmiatsuk jeamniaitji. <sup>22</sup> Tura ni wakeramu túrakrikia tura ni chichamesha umiru asakrin ashí ii seaj nuna suramsattaji. <sup>23</sup> Júiti Yus akupkamu: ni Uchirĭ Jesukrístu nekas enentáimtustin tura Kristu timia áintsarik shuartisha mai anenai ajartin. <sup>24</sup> Shuar ni chichamen umía nuka

Yusjaj tsanin wekaawai tura Yus nijjaj tsanin wekaawai. Mai chikichik ajasu ániawai. Tura Yusa Wakanjii enentáin pujá asamtai nujaj Yus ijjaj tsanin wekaana nu nékaji.

### Yusa Wakanjisha tura Kristu nemasrj wakancha

**4** Aneamu yatsuru, untsurí shuar wáitruiniak “wi Yúsnan etserniuitjai” tuiniawai. Tuma asamtai ashí shuar “wi Yusa Wakanin takakkun chichaajai” tuinia nu péñker nekapsuk enentáimtusairap. Antsu ísrum nekas Yusa Wakanímpiashit tura chíkich wakaniashit nu nekaatarum. <sup>2</sup>Jujaj nekapsarum ya nekas Yusa Wakanin takaka nu nekaattarme: Shuar “Jesus Yusa Uchirí Krístuítai nekas aents ajas ayashimkiamiayi” tana nu Yusa Wakanin nekas takakui. <sup>3</sup>Tura Jesusan tu enentáimtatsna nuka Yusa Wakanin takaktsui antsu Kristu nemasrj wakanin takakui. Kame Kristu nemasrj wakan tátin tama ántichukaitrum. Nu wakan yamaikia ju nunkanam táwiti.

<sup>4</sup>Uchiru, átumka Yusna asarum Yus atumí enentáin pujawai. Tura ju nunkanmaya shuara enentáin íwianch pujawai. Atumíin pujana nuka nijjaj nankaamas kakaram asamtai wáitrin ainia nu nupetkaitrume. <sup>5</sup>Niisha ju nunkanmaya ásar aya ju nunkanmayan áujmatainiawai. Túmainiakui ju nunkanmaya shuar ti penker anturainiawai. <sup>6</sup>Antsu iikia Yúsnaitji. Tuma asakrin Yúsan nékainia nu anturtamainiaji. Tura Yúsnachu ainia nu anturtamainiatsji. Nujaj nekas Wakanin takakusha tura wáitrin wakanin takakusha nekaamniaiti.

### Yus tuke anenkratniuiti

<sup>7</sup>Aneamu yatsuru, anenaitin Yúsnumiá asamtai mai anenai ajartai. Shuar anenkratniua nuka Yusa uchirí asa Yús-

nancha nékawai. <sup>8</sup>Shuar anenkratcha nuka Yúsnanka nékatsui. Kame Yuska tuke anenkratniuiti. <sup>9</sup>Tuma asa ni Uchirí chikichiniak ju nunkanam akupturmakmiaji. Iisha ni túrunamujaj nekas iwiaaku pujaji. Nujaj Yus in yáinmak ni anenkrattain paant iniaakturmasmiaji. <sup>10</sup>Jujaj nekas anenkrattainkia paant nekanamniaiti: ii Yus aneaj núchaiti. Antsu ii ti tunáa árinin Nii aneachmaitaitan Yuska ti anenma asa ni Uchirin ii tunaarin asakarat tusa akupturmakmij nujaj nekas nekanamnaiti.

<sup>11</sup>Aneamu yatsuru, Yus núnis anenma asakrin iisha núnisrik mai anenai ajartai. <sup>12</sup>Chikichikisha Yúsan wáinkiachuiti. Túmaitiat mai anenai ajakrikia Yus ii enentáin pujurtamkui Nijjaj métek anenkratin ajaji. <sup>13</sup>Yus ni Wakanin suramsa asakrin Yus ijjaj tsanin wekaana nusha tura ii Nijjaj tsaninkia wekaajnia nusha, nujaj nékaji. <sup>14</sup>Yus Apa ni Uchirin ashí shuaran uwemtikrarat tusa ju nunkanam akupkama nu wáinkia asarí étsereaji. <sup>15</sup>“Jesus Yusa Uchirinti” tana nu shuarjaj Yus tsanin wekaawai tura niisha Yusjaj tsanin wekaawai. Mai chikichik ajasu ániawai.

<sup>16</sup>Yus in anenmajnia nu ti nekas nékaji. Yus tuke anenkratniuiti. Tuma asamtai shuar anenkartakka Yusjaj tsanin wekaawai tura Yussha nijjaj tsanin wekaawai. Mai chikichik ajasu ániawai. <sup>17</sup>Núnisar ti penker anenkartin ajaji. Túrarí súmamtikiatin tsawantaj natsamsuk wajastatji. Kame ju nunkanam pujayatrik Jesukristujaj méteketji. <sup>18</sup>Nekas anenaiyamunam sápij atsawai. Antsu nekas anenaiyamunam sápij menkaawai. Aya asutiátin akui sápijmiaiktinaiti. Tuma asamtai ántar sápijmiana nu nekas anenkratchaiti.

<sup>19</sup>Yus emka in anenma asakrin iisha Nii aneaji. <sup>20</sup>Tura shuar “wi Yúsan

aneajai” táyat chíkich Yus-shuaran nakitiakka nuka wáitriniaiti. Kame Yus-shuaran tuke wainnia nuna aneachkunka çitiurak Yusan wáinchasha aneat? <sup>21</sup>Yus incha juna turammiaji: Yúsan anea nu shuar chíkich Yus-shuarnasha aneatniuiti.

### Ju nunkanmaya írunna nu núpeteaji

**5** Ashí “Jesus Yusa Uchirí Krístuiti” tu enentáimtana nú shuar Yusa uchirinti. Tura aparí aneakrikia ni uchirísha aneattaji. <sup>2</sup>Yus Apa aneakur tura Nii wakera nu umirkur Yusa uchirísha ashí aneattaji. <sup>3-4</sup>Yus aneakur Nii tana nu umikatji. Ashí Yusa uchiríya nu Yúsan nekas enentáimta asa, ashí ju nunkanmaya írunna nuna núpeteawai. Nu asantai Yus tana nu umirkatin itiurchachaiti. <sup>5</sup>Aya “Jesus Yusa Uchirinti” tu enentáimtana nú shuar ju nunkanmaya ana nuna awakkamniaiti.

### Jesukristu “Yusa Uchirinti” tu etserainia nu

<sup>6</sup>Jesukristu jú nunkanam taa entsajai imiankui Yus nayaimpinmaya chichaak “Juka winia aneamu Uchiruiti” tímiayi. Tura nuyá Jesus jakamtai ni numpé puarmiayi. Entsajai imianin ni takatrín nankamamiayi túrasha in jarutramak ni takatrín amukmiayi ju nunkanam. Chikichinkia túrutsuk mai metek túra asantai Yusa Uchiríya nu paant nekanamniaiti. Yusa Wakanísha tuke nekas tiniua nu métek tawai. <sup>7-8</sup>Nu asantai menaint “Yusa Uchirinti” Jesusan tuiniawai: Nayaimpiniam Yus Apa tura Jesukristu, Chícham aa nu, tura Yus Wakancha; nunkanmasha Yus Wakancha, entsasha tura numpasha. Mash métekrak tuiniawai. <sup>9</sup>Aents étserainiakui ántureaji. Nuna nankaamas Yus ni Uchirín tana nu nekas anturkatniuitji. <sup>10</sup>Yusa Uchirín enentáimtana nú shuar ni enentáincha

nékawai. Antsu Yus ni Uchirín timian enentáimtatsna nú shuar Yúsan enentáimtachu asa Yúsan “wáitriniaiti” tawai. <sup>11</sup>Yus ni Uchirín timia júiti: Tuke iwiaaku pujutai nérenniuiti tura nu iwiaakmancha in suramsaitji. <sup>12</sup>Yusa Uchiríjiaí tsaniñ wekaana nú shuar, nu iwiaakmajaí iwiaaku pujuiniawai. Tura Yusa Uchiríjiaí tsaniñ wekaatsna nú shuar, nu iwiaaku átinnium pujatsui.

### Amuak Yus nekas enentáimtustinian áarmiania nu

<sup>13</sup>Yusa Uchirí nekas enentáimtakrum tuke amuicha iwiaakmajaí iwiaaku pujarme. Nu nekaatarum tusan juna áatjarne.

<sup>14-15</sup>Yus wakeramujai métek seakrinkia anturtamji. Tura anturtamkurin ii seamaj nu nekas takusua nu enentáimpramniaitji. Nu neka asar Yus ti shiir enentáimtajai.

<sup>16</sup>Tunáa awai jákatniunam júana nu. Shuar nu tunaan túramtainkia Yus áujtustin ántrai. Tura shuar chíkich tunaan túrakuinkia nuka nekas Yus áujtustiniaiti. Nekas jákatniunam júatsna nú tunaan túraitkiuinkia iwiaaku átinian Yus susattawai. <sup>17</sup>Ashí yajauchí ana nuka tunaiti. Tura jákatniunam júatsna nú tunaasha awai.

<sup>18</sup>Nekas Yusjají akiinia nú shuar tunaanum tuke wekaatsui. Antsu Yusa Uchirí nin ti penker wainkiui íwianch antínkiachminiaiti.

<sup>19</sup>Iikia nekas Yúsnaitji tura ashí ju nunkanmaya shuar iwianchnia áiniawai. <sup>20</sup>Yusa Uchirí ju nunkanam taa nekas-Yus aa nuna paant jintintramji. Yusa Uchirí Jesukristujai tsaniñkia wekaakur nekas-Yusa nujajísha tsaniñkiar wekaaji. Nekas-Yus asa tuke iwiaaku átinia nuna nérenniuiti. <sup>21</sup>Uchirú, ántar-yus írunna nu pachiinkiairap. Antsu nujají aneartarum. Nuke atí.



## JUAN

### *Ataksha papin aar akupkamu*

#### **Nekasa nunasha tura anenaitniuncha ujaawai**

**1** Wi Juan Yus-shuara uuntri asan ii umai Yus achikma nuna tura ni uchir<sup>in</sup>cha ju papin áateajai. Wisha nekasan atumin aneajrume. Tura aya wí-kichu antsu ashí Yus-shuar ainia nusha nekas chichaman nekaawaru ásar atumin anenmarme. <sup>2</sup>Nekas-chicham tuke amuutsuk ii enentáin pujá asamtai aneajrume. <sup>3</sup>Yus ii Aparísha tura ii Uuntri Jesukristusha, Yus Apa Uchiri asa, atumin anenmak imiatkinchanum shiir pujustinian waitnentramak yainmakarti. Nujai nekas-chicham nekaarum anenaittiarme.

<sup>4</sup>Ame uchiram Yus Apa akupkamujai métek umiiniakui nuna nekaan ti shiir enentáimprajai. Nekas-chichaman umin áiniawai. <sup>5</sup>Yamaikia, umaru, tájame: mai anenai ajartai. Yamaram akupkamun áattsujme antsu yámankamtaik antukmiaj nunak tájame. <sup>6</sup>Nekas anenkartinia nú shuar Yus akupkamun uminiaiti. Tura Yus akupkamuka “anenkartin tuke atarum” tawai. Nusha yámankamtaikn-umiã antukuitrume.

#### **Anankartincha írunui**

<sup>7</sup>Ju nunkanam anankartincha ti írunui. Jesukristu nekas aents ajas akiiniamia nuna enentáimtuiniatsui. Nu shuar anankartin ásar Kristu nemasri áiniawai. <sup>8</sup>Nu shuarjai aneartarum. Yajauch shuar ántar yayakrumin Yus átum takasman métek akirmakchamniaiti. Antsu aneara takasakrumin Yus métek akirmakarmi.

<sup>9</sup>Ashí shuar Kristu jintíamun ini-ais “nankaamas nékajai” tana nu, Yúsnachuiti. Antsu Kristu jintíamun umíana nu shuar Yus Apajaisha tura ni Uchir-ijiaisha mai tsanin pujawai. <sup>10</sup>Shuar Kristu chichamen jintíachu atumí jeen írmástaj tusa jeakui awayáwairap tura “shiir taume” tiirap. <sup>11</sup>Kame nu shuar “shiir taume” tákumka nu shuar yajauch jintíamu jímiareame.

#### **Umíamu chicham**

<sup>12</sup>Ti nukap atumjai áujmatsatniun wakerajai. Túrasha ju papinium mashi áatrashtatjarme. Antsu imia wiki atumin iyakun jeátjai. Nuyá naka chichasar ti shiir warastatji.

<sup>13</sup>Ame kaim Yus achikma nuna uchiri amikmaatmainiawai.

Nuke atí.

## JUAN

### *Nuyá Ukunam papin aar akupkamu*

#### **Kayu ti penker shuaraiti**

**1** Wi Juan Yus-shuara uuntri asan winia amikrun Kayun ju papin áateajai. Wisha ti nekas aneajme. <sup>2</sup>Aneamu yatsurú, Yusjají péñker wekaakum ame wakanim péñker pujana núnisan ame ayashmisha péñker atí tusan Yúsán áujtajme. <sup>3</sup>Ame nekas chicham umirman shuar juí taar ujatarmayi. Tura nuna antukan ti warasmajai. <sup>4</sup>Yus-shuar nekas chichaman umiiniakui imiá shiir enentáimtuinijai.

<sup>5</sup>Aneamu yatsurú, chíkich Yus-shuar ti penker yayame. Kame yajaya yujainia nusha nekas yayame. Nu péñkeraiti. <sup>6</sup>Nu shuar ame nekas anenamun juí taar Yus-shuar iruntramunam etserkarai. Ataksha irauwenakui atsumainiana nu súsam shiir akupkarta. Péñker wáinkiumka Yus shiir enentáimtikrattame. <sup>7</sup>Nu shuar Jesukristun takarsatai tusar wekainiawai. Túrawar Yus-shuarcha ainia nuna kuftrijjají yurumátniun nakitrarmatai <sup>8</sup>ii Yus-shuartikia nii atsumainia nu ajamsatniuitji. Nekas chichaman etserainia nu, yainkiartai tusar túratniuitji.

#### **Tiútrepes yajauch túriniaiti**

<sup>9</sup>Ashí Yus-shuar árumna nuna papin akuptukmajrume. Kame nékajai,

Tiútrepes nankaamantu enentáimtumak ii tájinia nuna umiktinian nakitiawai. <sup>10</sup>Nu asantai nuí jean ni yajauch túramun etsertuktatjai. Nii ántar ti áujmatuk tsanumprutmaji. Tura nu arantcha Yúsán takainia nu irainiakui awayáiniatsui. Tura chíkich awayátaj tákuisha suritiawai. Tura nuyá Yus-shuarjají iruntratniun surimiawai.

<sup>11</sup>Aneamu yatsurú, nu yajauch túramu jumamkiirap antsu péñker túratarum. Péñker túrinia nuka Yúsnaiti. Antsu tunáa túrinia nuka Yúsán nékachuiti.

#### **Timitriu péñker túriniaiti**

<sup>12</sup>Imiá nekas péñker shuar asantai ashí shuar Timitriun péñker áujmatainiawai. Iisha núnisrik péñker shuaraiti tákurin nekas tájinia nusha nékarme.

#### **Umíamu chicham**

<sup>13</sup>Wi ti nukap títinian wakerajme. Túrasha ju papinium mashi áatrashatjame <sup>14</sup>wárik ítin asan. Nuí jean chichasmi.

<sup>15</sup>Shiir pujustá. Juyá amikrum amikmaatmainiawai. Ii amikrisha chikichik chikichik amikmaatruata.

## JÚTAS

### *papin árar akuptukma*

#### Jútas Yus-shuaran papin áateawai

**1** Wi Jútas Jakupu yachintjai. Je-sukristu takarin asan ashí Yus Apa ni shuarí átinian achikma ainia nuna ju papin áateajai. Jesukristujai tsaninkiaru áarmatai Yus nin wainiainiawai niijiai kanakchatniun. <sup>2</sup>Yus ti waitnentramak imiatkinchanum tuke shiir pujustinian yainmakarti. Ti anenma asa túrati.

#### Ti tunáa shuar írunui

*(2 Pítiur 2.1-17)*

<sup>3-4</sup>Aneamu yatsurú, iikia mai metek Yus-shuar asar ju uwempratin chichaman áatratniun wakerukjarme. Túrasha ti yajauch shuar anankramawar atumín pachiinkiarmai. Niisha “Yus ti anenkartin asamtai páchitsuk tunáa túramniaitji” tuiniawai. Nu arantcha Yus in Akuptamniuncha tura ii Uuntrí Jesukristuncha nakitin áiniawai. Nu asamtai nu shuaran “yaunchu sumamawaruiti” tímiayi Yus. Tuma asamtai tájarme “Tuke Yus-Chicham yapajíashtinian ashí Yus-shuar akasmatkarat tusar susamuiti. Wátsek, kakaram ajastarum” tájarme.

<sup>5</sup>Yaunchu Uunt Yus Israer-shuaran túramia nu nékarme. Nuna atak enentáimtikratjarme. Ejiptu nunkanmaya júkiar Nin umirkacharua nuna máawarmiayi. <sup>6</sup>Nayaimpinmaya suntuarsha ni pujutairin ajapa ikiukiari Yus susamun umitsuk iniaisarmiayi. Túrawarmatai Yus kiritniunam jirujai tuke jinkíá sepunam apujas pujurainiawai. Tura Uunt Tsawant jeamtai súmamtikiawartatui. <sup>7</sup>Núnisan Sutuma péprusha Kumura péprusha tura tíjuuch péprusha áishmanjajsha

nuwajajsha ti yajauch nuamtak tsanirmanainiakui ti tunaan penké túrachmin ana nunasha túrin ármiai. Túmainiakui ashí shuar ashamkarat tusa Yus amuicha jinium asutiáwarmiai.

<sup>8</sup>Ayu. Atumín yajauch shuar ainia nu, yaunchu túrunamun enentáimtsuk tuke yajauch enentáimiaiaini ni ayashin yajauch awajmmainiawai, Yusnasha nakitiainiawai, tura ashí akupin ainia nunasha yajauch áujmatainiawai. <sup>9</sup>Antsu Mikiar, nayaimpinmaya suntuara kapitántrintiat, iwianchjai máaniak Muisaisa ayashin akasmatak “áaniumsha” tu chicharkachmiayi. Antsu áyatik “Yus írmastí” tímiayi. <sup>10</sup>Túrasha ju shuarka nékainiatsna nuna nánkamsar yajauch chicharainiawai. Tura nékainiana nuka yawá áinis enentáimtsuk áyatik nékainiawai. Tura nújajsha imia niníki yajauch emesmamainiawai.

<sup>11</sup>Maa, anearartí. Kaín yajauchin túramia núnis tura ásar jákartatui. Tura Parama áinis kuftian ti wakeruiniak imia niníki tunaanum tsankamakaru áiniawai. Tura Kurea áinis ashí akupniun nakitin áiniak kajinkíartatui. <sup>12</sup>Átum nuamtak anenaitiai-jisat nájankurmin nu shuar chikichan enentáimtutsuk Yusnasha ashamtsuk imia niníki enentáimtumainiawai. Penké ántar áiniak yumi kíar tee ajasua núnin áiniawai. Tura nase umpuim yútutsuk nankamainiawai. Árak nerektin nantutin nerechua áanin áiniawai. Tuma ásar uwemu penké jaka áanin áiniawai. <sup>13</sup>Entsa nujan Krak saurín ajekeawai. Nu shuarsha núnisar ni natsantrín natsamtsuk ajekenawai. Tura yaa waakua áanin áiniawai. Tuma ásar nekas kiritniunam tuke menkakatin áiniawai.

<sup>14</sup>Atanka tirankiyayi Eruk. Ti penker Yúsnan etserin asa juna tímiayi “Uunt Yus ti untsurí ni shuarijiai winittiai.

<sup>15</sup>Nuyá ashí shuar túrawarman nekaat-tawai. Tura ashí yajauch shuarnasha ti tunáa túrawarua nujaj̄i tura Yúsán ya-jaucho áujmatsarua nújaj̄isha súmamtiki-awartatui” tímiayi Eruk. <sup>16</sup>Nu shuarka péñkera nujaj̄i waratsuk “yajauchiiti” tuiniawai. Aya ni ayashí wakeramunak wakeruiniawai. Nan̄kaamantu enentáimtumainiak chichainiawai. Tura chikich shuaran shiir chicharainiaksha aya ni wakera nuna túrutati tusa péñker chichainiawai.

### Yus-shuar enentáimtikratin

<sup>17</sup>Tura atumsha, aneamu yatsurú, ii Uuntrī Jesukrístu akatramur̄i yáunchu “aneartarum” tiarmiania nusha enentáimtustarum. <sup>18</sup>“Amúamu tsawant ishichik ajatesmatai shuar Yúsán wishikrar nakitrartatui. Tura ni yajauch wakeramur̄iniak umíi pujuartatui” tiarmiayi. <sup>19</sup>Nu yajauch shuar atumín akantamenawai. Ju n̄nkanmayanak páchiniak Yusa Wakan̄in takakainiatsui.

<sup>20</sup>Tura átumka, aneamu yatsurú, tuke Yus nekas enentáimtusurum kakaram ajastarum. Yusa Wakan̄i kakarmarij̄ij̄ai

ashí Yus seatarum. <sup>21</sup>Yus ti anenmakui nii wakera nu wakeruktarum atumsha. Túrarum ni anenmamu shiir nekaat-tarme. Tsawant winiawai, ii Uuntrī Jesukrístu in waitnentrama asa tuke shiir Niij̄ij̄ai pujustinian amastat̄ji. Nu tsawant naká pujutarum.

<sup>22</sup>Mai yapaj̄i ajá ainia nu naka enentáimtikratarum. <sup>23</sup>Chikich shuarsha jiniumiá júsatniua áitkiasrum uwentikratarum. Tura chikichcha ti yajauch ásarmatai anearum waitnentratarum. Tura ni pushir̄isha ni tunaarij̄ij̄ai maatra asantai muj̄kiatniuiti.

### Yúsán shiir awajeawai

<sup>24–25</sup>Yus chikichkiiti. Ti nekaiti. In uwentikkiartin asa ni kakarmarij̄ij̄ai yainmakminiaiti tunaanum iniarchat-niun. Tuma asa tunaaj̄aj̄i máatrachu awajtamas ni ti shiirmar̄in ejetamtatrum. Túrutma ti waramtikramsattarme. Ii Uuntrī Jesukrístu túrunamuj̄aj̄i Yuska Niñki shiir awajsatniuiti tura nan̄kaamantu enentáimtustiniaiti. Yáunchusha, yamaisha, tura tuke ashí akupin atí.

Núkete.

## APUKARÍPSIS

*Jesukrístu Juánkan paant iniaktusma*

### Jesukristu paant awajsamu

**1** Jú áarman Jesukristun Yus ujakmiayi. Wárik túrunatta nuna ni shuarin ujakarát tusa ujakmiayi. Tuma asamtai Jesukrístu ni suntarin akupak ashí winia paant awajtursamai. Wisha Juánkaitjai. <sup>2</sup>Yus timia nunasha tura Jesukrístu ujakamia nunasha tura wi íis-maj nunasha ti paant aya nekasa nuna tájai. Penké wáitratsjai.

<sup>3</sup>Jú papin áujea nu shuarsha tura núnisan juna ántana nusha nekas enentáimtuiniakka shiir ártatui. Ukunam átatna nuna ujaawai tura jeatemayi.

### Juan siati péprunam Yus-shuar írunun juna áateawai

<sup>4</sup>Wi, Juan, Asia nunkanam siati (7) péprunam Yus-shuar írunun ju papin áateajai. Yus anenma asa imi-atkinchanum shiir pujustinian yainmakarti. Nu Yus tuke yaunchu pujuyayi. Núnisan yamaisha pujawai. Tura nuke winittiwai. Akupin pujutainium Yusa Wakaní siati naka pujurainia nusha shiir yainmakarti. <sup>5</sup>Núnisan Jesukrístu shiir yainmakarti. Nii tana nu imiá nekasaíti. Niisha emka jakamunmayá yamaram iwiaakmajai nantakniuiti. Tura ju nunkanmayá akupniu Uuntrinti. In anenma asa ni numpejai ii tunaarin nijiatramkaitji. <sup>6</sup>Túrutma akupin awajtam-saitji. Tura ni Apari Yúsnan pujursarat tusa anaitiamkaitji. Nii ti kakaram asa tuke shiir awajnasti. Núnisan atí.

<sup>7</sup>Wats, Krístuka yuranmijijai winittiwai. Tura jjiuarmia nusha tura ashí shuarsha nuna wáinkíartatui. Túrawar ashí sapijmiainiak úutiartatui. Maa, nekas nunis átatui.

<sup>8</sup>Krístuka “yámankamtaiknumia amúamunmasha ashí nérenniuitjai, tawai. Wisha A rétranmayá Y rétranam ashí retra áintsaitjai” tawai ti kakaram Uunt Kristu. Tuke yaunchu pujuyayi. Núnisan yamaisha pujawai. Tura nuke ataksha winittiwai.

### Kristu ti shiir wincha ajasun Juan wainkiamiania nu

<sup>9</sup>Wi Juan atumjai métek waitia asan atumí yachintjai. Núnisan nayaimpiniam, Yus akupeana nuí, métek jeattaji. Tura katsuntrar nákastinian Jesukrístu máí métek súrámji. Yus-Chichamnasha tura Jesukrístu timiancha étsereakun nayaantsa ajapén atentramunam Pátmus nunkanam sepunam apujusama núnisan pujumjai. <sup>10</sup>Tumai tumin tsawantai Yusa Wakaní pujurtakui winia úkuruiní kakantar untsunman antukmajai. Kachu umpúamua núnis ti kakarmauyayi.

<sup>11</sup>Tura turutmiai “Wiitjai. Yámankamtaiknumia amúamunam ashí nérenniuitjai. Wisha A rétranmayá Y rétranam ashí retra áintsaitjai, tímiai. Tuma asamtai wáinmena ju, papinium áaram Asia nunkanam siati péprunam Yus-shuar írunna nuí akuptukarta. Ju peprunam akupkarta: Ipiussha, Ismirnasha, Pírkamusha, Tiatirasha, Sártissha, Piratírpíasha, tura Rautiséasha.” Tu turutmiai.

<sup>12</sup>Túrutkui yaki túruta tusan apajasan íikman siati shirikipi ikiutain kurijjai najanamun wainkiamjai. <sup>13</sup>Tura nuí ajapén Aents Ajasua núninan wajan wáinkiamjai. Tura pushirísha nawea timiai nuntuaru entsaruyi. Emenmamkesha kúrinia netsepnum emenmamaui. <sup>14</sup>Tura ni muuke intiashísha murikiu uré nijiamua núnisan tura micha núnisan ti puju chárauyi. Tura ni jiiisha jiya

núniskeyi. <sup>15</sup>Ni nawesha ti wincha asa jiru yan̄kutaku jiamua áinis néwar ajarmiayi. Ni chichamesha ti kakaram asa uunt entsa téter ajá áintsauyi. <sup>16</sup>Ni untsuurin̄i siati yaan takakuyi. Tura ni weneniasha puniá áinis tsakatskat mai ere awajsamu jínmiyai. Ni yapisha etsa ti etsantuk fischamnia núnisauyi.

<sup>17</sup>Nuna wáinkian jaka áintsanak naweēn iniaarmajai. Túrasha ni untsuurí uwejen awaantrus turutmiayi, “Ashamkaip. Wiitjai. Yámankamtaiknumiá amúamunmasha tuke pjuwitjai, timiai. <sup>18</sup>Wikia tuke iwiaakuitjai. Jakamijai tura nantakin jákashtinian tuke iwiaaku pujajai. Jákatniuncha tura jaka pujuinia nuna yawir̄n takakkun nérenniuitjai, timiai. <sup>19</sup>Tuma asamtai wáinkiamna jusha, yamá wáinmena nusha, tura ukunam átatna nusha aartá, timiai. <sup>20</sup>Wáinmena nu júnisaiti. Siati shirikip-ikiutai kúrik wainkiam nu, siati péprunam Yus-shuar írunun nakumeawai. Tura winia untsuuruin̄i siati yaa wainkiam nu, siati péprunmayá Yus-shuaran wáinnium nakumenawai, turutmiyai.

### Ipisiunam chícham áatramu

**2** Nuyá turutmiyai ‘Ipisiunmayá Yus-shuaran wáinin ju áatratá: Siati yaan untsuurnum takakna nu tura núnisan̄ siati shirikip-ikiutai kúrinman ajapén atenta wekáa nu, tawai: <sup>2</sup>“Ashí ame túram nuna nékajai. Ti kakaram takaakum katsunteamuncha nékajai. Yajauch shuar nawamtsuk awemaitrume. Shuar “Yus akatramuitjai” ántar tuinia nu nekaamarme. Wáitrinia nusha nékaitme. <sup>3</sup>Ti wáitiyatmek katsuntram yawetsuk Winia ti takartusuitme. <sup>4</sup>Túrin áminin̄ juna títiatjame. Yus aneakum yámankamtaik ti pen̄ker wekainiuyam núnisam túratsme. <sup>5</sup>Tuma asam ikiuknium nu enentáimpram

yaunchu túriniuyam núnismek ataksha túrata. Túrachakminkia ame shiripkirmin wari jurustajame. <sup>6</sup>Tura ju pen̄ker túriniaitme. Nikiurás shuar nakitniuitrume. Nu shuar “ayash wakeramu páchitsuk túramniaiti” tuiniakui Wisha núnisnak nakitiajai. <sup>7</sup>Kuíshtinia nu shuar Yusa Wakani ashí Yus-shuaran timian antukti: Nupetmakunka tuke iwiaaku pujutai numi nerēn yúatniun tsankatkattajai. Nu numi Yus pujana nuí wajaawai.” Tu áartá’ turutmiyai.

### Ismirnanam chícham áatramu

<sup>8</sup>Nuyá turutmiyai ‘Ismirnanmayá Yus-shuaran wáinin ju áatratá: Yámankamtaiknumiá amúamunam tuke pjuwa nu tura núnisan̄ jaka nantakmia nu, tawai: <sup>9</sup>“Ashí ame túram nuna nékajai. Ti wáitiam nunasha tura kuítrinchaitmena nunasha nékajai. Antsu Yusain̄kia ti kuítrinniuime. Tura shuar uunt iwianch Satanása shuari áiniyat “Israer-shuaraitjai” tuiniak yajauch áujmatramena nuna nékajai. <sup>10</sup>Ti wáitsattamna nu ashamkaip. Íwianch ashí nekapramsataj tusa atumiñian sepunam en̄keattawai. Nuí tias tsawant wáitsattarme. Jáakmesha tuke Yus shiir enentáimtusakminkia tawaspan nakurin susatniua nútiksank nekas iwiaakman tuke shiir pujustinian amastatjai. <sup>11</sup>Kuíshtinia nu shuar Yusa Wakani ashí Yus-shuaran timian antukti: Nupetmakuka jimiará jákatniuka waitsashatui.” Tu aartá’ turutmiyai.

### Pírkamunam chícham áatramu

<sup>12</sup>Nuyá turutmiyai ‘Pírkamunmayá Yus-shuaran wáinin ju áatratá: Puniá áinis tsakatskat mai ere awajsamun takakna nu, tawai: <sup>13</sup>“Ashí ame túram nuna nékajai. Uunt iwianch Satanás akupea nuí pujayatmek tuke shiir

enentáimturmena nuna nékajai. Winia shiir umirtínian Ántipasan máawar-mataisha Winia enentáimtursatin ishichkisha iniaitiuschamame. Nusha íwianch pujutanium pujakrumin túrunamai. <sup>14</sup>Túrin áminin juna títiatjame. Atumiiniá shuar yaunchu Yúsnan etserin Param yajauch jintíamun tuke emetainiawai. Niisha Israer-shuaran tunáa awajsat tusa kapitán Parakan unuiniarmiayi. Nuyá Parak Yus-sutai namanken maar yúatniun Israer-shuaran jintintiamiayi. Núnisan ti tsanirmatniun jintintiamiayi. <sup>15</sup>Atumiiniá shuarsha Nikiurás jintíamuncha, Wi nakitiaj nuna, iniaisatniun nakitiainiawai. <sup>16</sup>Wats, enentáimpram iniaisata. Túrachakminkia Wi wari winin winia wenuruiya puniá jiinia nujai máaniaktajai. <sup>17</sup>Kuíshtinia nu shuar Yusa Wakaní ashí Yus-shuaran timian antukti: Nupetmakunka maná yurumkan uukma nuna ayurattajai. Nuyá kaya pújun susattajai. Nu kayanam yamaram naari aarma átatui. Nunasha chíkich shuarka penké nékatsain aya achía nuke nekaattawai.” Tu aartá’ turutmiai.

### Tiatiranam chícham áatramu

<sup>18</sup>Nuyá turutmiai ‘Tiatiranmaya Yus-shuaran wáinin ju áatratá: Yusa Uchirí jii jijjiai métek keena nu tura núnisan nawe jiru yanikutaku jiamua núnis néwar ajawa nu, tawai: <sup>19</sup>“Ashí ame túram nuna nékajai. Yus shiir enentáimtakum aneam nuna nékajai. Tura katsuntram péñker takaamna nuna nékajai. Yáunchujai nankaamas péñker túrame yamaikia. <sup>20</sup>Túrin áminin juna títiatjame. Nu nuwá Jesapír awematsme. “Yúsnan unuiniyajai” tinia Wíi shuaran ti anankenawai. Tura ti tsanirmatniuncha tura ántar-yus-sutai namanken maar

yúatniun jintintiaiainiawai. <sup>21</sup>Niisha ni tunaarin enentáimiar iniaisat tusan nákasuitjai. Tura nakitiawai. <sup>22</sup>Wátsek, sunkurmatkiakan peaknum áepsattajai. Tura chíkichcha niijjai tsanirma ainia nunasha niijjai métek ti wáitkiastatjai. Ni tunaarin enentáimiar iniaisacharmatainkia túrattajai. <sup>23</sup>Ni uchirincha mantúattajai. Nujai ashí Yus-shuar Wi nekas shuara enentáin nékaitjia nuna nekaawartatui. Atumniasha chikichik chikichik takasmajai métek akiktatjarme. <sup>24</sup>Tura chíkich shuar Tiatiranmayatiram, nú chicham enentáimtuscharmena nu, “nekas iwianchnia uukma” tútaiya nu nékachu asakrumin atakka túratniun patatkashtatjarme. <sup>25</sup>Tura Wi jeatsain takakrum nu emetatarum. <sup>26</sup>Nupetmakunka Wi wakeraj nunak tuke initsuk túrana nuna untsurí nunkanam akupkatniun tsankatkattajai. <sup>27</sup>Winia Apar tsankatrukmiá núnisnak akupkatniun tsankatkattajai. Tura nuwe najanamu jirujai awati ijiakratniua áinis ti kakarmajai akupkattawai. <sup>28</sup>Yánkuam káshik jiinia nuna susattajai. <sup>29</sup>Kuíshtinia nu shuar Yusa Wakaní ashí Yus-shuaran timian antukti.” Tu aartá’ turutmiai.

### Sártisnum chícham áatramu

**3** Nuyá turutmiai ‘Sártisnumiá Yus-shuaran wáinin ju áatratá: Siati Yusa Wakanin takakna nu tura núnisan siati yaan takakna nu, tawai: “Ashí ame túram nuna nékajai. Iwiaakua áintsan wekayatmek Wíjjainkia jákaitme. <sup>2</sup>Shintiarta. Kajinia nu umpuím ekeemakta. Kame Yusjai ísam péñker túrichuitme. <sup>3</sup>Yus-Chicham ti shiir enentáijjai emka antukmam nu ataksha enentáimpram emetata. Tura tunaarumsha enentáimpram iniaisata. Tura iniaiyachkuminkia kasa núnisnak nékatsmin jeartiatjame. <sup>4</sup>Tura Sártisnum shuar ishichik

pushiri wapik máacharu pujuiniawai. Nusha ti penker ániak pushí pújun entsarar Wijíai wekasartatui. <sup>5</sup>Nupetmakuka pushí pújun entsartatui. Tura iwiaaku átinia nu papiniumiá ni naari áarman japirashtatjai. Antsu winia Apar tura ashí nayaimpinmaya suntar ímmi-anum shiir áujmattsattajai. <sup>6</sup>Kuíshtinia nu shuar Yusa Wakaní ashí Yus-shuaran timian antukti.” Tu aartá,” turutmiai.

### Piratírpianam chícham áatramu

<sup>7</sup>Nuyá turutmiai ‘Piratírpianmaya Yus-shuaran wáinin ju áatratá: Ti shiir túrin tuke nekasana tana nu, uunt akupin Tawitia yawiri takaku asa uraimtai chíkich penké epenchamniaiti. Tura epenmiatai chíkich penké uraichminiaiti. Juna tawai: <sup>8</sup>“Ashí ame túram nuna nékajai. Kakarmachuitatmek winia chichamur shiir enentáimtakum Winia initieschaitme. Tuma asakmin wáitin uratjiamé. Nuna chíkich penké epenchamniaiti. <sup>9</sup>Wátsek. Shuar wáitruiniak “Israer-shuaraitjai” tuíniayat uunt iwianch Satanás-shuar ániawai. Nu shuarán, nekas ámin aneajna nuna nekaawarat tusan amíini tikishmatkiarartatjai. <sup>10</sup>Katsunrata tmiáj nu, shiir umirka asakmin Wissha ti wáitsatin ashí nunkanam átatna nuyá uwentikrattajme. Nu wáitsatniujai ashí nunkanmaya shuar nekapnasartatui. <sup>11</sup>Wárik winittajai. Takakmena nu emetata. Akinkiatniuitmena nuna chíkich shuar atantramkiarain. <sup>12</sup>Nupetmakunka winia Yusrú jee tankirin awajsattajai. Tura nuyá penké jíinkichartatui. Tura níin winia Yusrú náarin áatrattajai. Tura winia Yusrú pépruri náarincha áatrattajai. Nu pépruka nayaimpinmaya yamaram Jerusarénka Yúsnumiá tára núiti. Núnisan winia yamaram náarun níin áatrattajai. <sup>13</sup>Kuíshtinia nu shuar

Yusa Wakaní ashí Yus-shuaran timian antukti.” Tu aartá,” turutmiai.

### Rautiséanam chícham áatramu

<sup>14</sup>Nuyá turutmiai ‘Rautiséanmaya Yus-shuaran wáinin ju áatratá: Wáitruitsuk nekasa nunak tiniua nu tura núnisan ashí Yus najanamun Úuntriya nu, tawai: <sup>15</sup>“Ashí ame túram nuna nékajai. Tura michaash míchachuitme. Núnisan tsuersha tsuérchaitme. Míchaitkiumsha tura tsuéraitkiumsha maak. <sup>16</sup>Kame míchachu tsuercha antsu aya tsuétuetak asakmin imiutkattajme. <sup>17</sup>Iis, “Kuíttrinuitjai, ti irumpraitjai, warinkisha atsumatsjai” tame. Túrashashí yajauch, wáitnenmai, kuítrincha, kusuru, tura misú iyajme. <sup>18</sup>Tuma asam Winí ti shiir kuri sumakam nekas kuítrintin ajasta. Turam puju pushí Winí sumakam misú ajasma shiir entsarta. Pénker ímprataj tusam jíinim enketai enkeeta. <sup>19</sup>Aneajna nuna chichareajai. Nu asamtai kakaram ajasam tunaarum enentáimpram iniaisata. <sup>20</sup>Enentáimprata. Shuar wáitiniam wajas unsumna áintsanak Wi ámin untsúajme. Winia anturtukam ame enentáimin awaintiakminkia Wi wáintiuattajme. Tura wayan ámijíai yurumáttajai. Tura amesha Wijíai yurumáttame. <sup>21</sup>Nupetmakuka akupin pujutainium Wijíai pujustatui. Wissha núnisnak nupetmaku asan winia Aparjai akupin pujutainium pujusuitjai. <sup>22</sup>Kuíshtinia nu shuar Yusa Wakaní ashí Yus-shuaran timian antukti.” Tu áartá,” turutmiai.

### Nayaimpiniam Yúsán shiir awajenawai

**4** Nu nankaamasmatai nayaimpiniam waiti uranniun wainkiamjai. Tura nuyá kakaram unsumman antukmajai. Nuik kachujai métek kakaram chichartukma nu turutmiai “Jú yaki wakatá.



Ukunam átatna nuna iniaktustatjame”  
turutmiai.

<sup>2</sup>Nu chichamaik Yusa Wakani akantukmiai. Túrutamtai nayaimpiniam akupin pujutainium pujan wainkiamjai.

<sup>3</sup>Niisha jaspi kayasha tura kurnarínia kayasha nujai métek ti wínchayui. Akupin pujutain tuntiak téntakuyi. Nusha ismirarta kayajai métekeyi.

<sup>4</sup>Chíkich paintikuatru (24) akupin pujutain nu pujutain téntakarun wainkiamjai. Tura paintikuatru uunt píju entsarainian tura kurin etsenkrakainian, nuí pujuinian wainkiamjai. <sup>5</sup>Akuptainiumiá peemsha ipiamtasha unsummasha jíniarmai. Tura nu pujutainium naka siati shirikip kearmai. Nusha siati Yusa Wakaninti. <sup>6</sup>Núnisan nu pujutainium naka nayaantsa áanin ti saar amai.

Nu pujutainium wakenmaanisha ni-  
isháa tanku kuartru téntakar ármiai. Ukurínisha tura eemsha jii irunmiai. <sup>7</sup>Emka tanku úunt yawaa áanniuyi. Chíkí-  
kichka turu uchichia áanniuyi. Tura chíkí-  
kichcha shuara yapia áanniuyi. Tura chíkí-  
kichka churuwia nanamua áanni-  
uyi. <sup>8</sup>Nusha sais nanamtin ármiai. Tura  
jiiisha ti irunainiak ashí wainmarmai. Káshisha tsawaisha tuke iniaitsuk juna  
tinu armái:

“Ti nekas péñkeraiti Uunt Yus. Ashí  
nankaamas kakarmaiti. Tuke  
yaunchu pujuyayi. Núnisan  
yamaisha pujawai. Tura ataksha  
juke winittiwai” tinu armái.

<sup>9</sup>Tura uunt pujutainium pujana nu  
tuke iwiaaku pujú asamtai nu tanku  
ti shiir awajsar yúminíkiak pujuriarmai.

<sup>10</sup>Túruiniakui paintikuatru uunt tuke  
iwiaaku pujun tikishmatainiak ni et-  
senkrutairin naka áepuiniak tuiniawai:

<sup>11</sup>“Úuntá, ii Yúsrinme. Tuke shiir  
awajmainme. Ashí nankaamas  
kakarmaitme. Amek ashí írunna nu  
najanaitme. Tura aya wakerakum

najanamame. Ame wakerakmin  
irunainiwai” tuiniawai.

### Murikkia papin urakminiaiti

**5** Nuyá akupin pujutainium pujuya  
nuna untsuurin papí penuarma áan-  
niun wainkiamjai. Nu papisha initi-  
aanísha tura páatkesha áarmauyi. Tura  
urakchamnia atí tusa siati anujtukma-  
jai kaki peekmauyi. <sup>2</sup>Tura nayaimpin-  
maya suntar ti kakarma nu, ti kakan-  
tar inintran wainkiamjai. Niisha tímiai  
“¿Ya akupniuk ju papin kaki anujka-  
mun jaak urakminiait?” <sup>3</sup>Tura nayaimp-  
inmayasha nunkanmayasha tura jaka-  
munmayasha chikichkisha nu papin  
urakmin atsumiai. Áujtsuk ístinni-  
asha tujinkiarmai. Tímianu akupin at-  
sumai. <sup>4</sup>Nu papin uraktincha tura áu-  
jsatniusha, kame ístincha atsakui ti  
úutmiajai. <sup>5</sup>Nuyá chikichik uunt tu-  
rutmiai “Ti úutíp. Israer-shuarnumiá  
Úunt-yawa, Jutá weeá awai. Niisha  
uunt akupin Tawit weeaiti. Nupetmaku  
asa nu papí siati anujtukman jaak  
urakminiaiti.”

<sup>6</sup>Nuyá uunt pujutaiya nuí tura kuartru  
tankunam ajapén tura úuntnum ajapén  
Murik wajan wainkiamjai. Maamua  
áintsanketiat iwiaakuyi. Kachurisha  
siátiyi. Ni jiiisha siátiyi. Nusha  
Yusa Wakani siati ashí nunkanam  
akupramua nuuyi. <sup>7</sup>Nu Murik we  
nekas uunt Akupniun untsuurínian  
nu papin achikmiayi. <sup>8</sup>Tura papin  
achikmatai kuartru tankusha tura  
paintikuatru uunt arma nusha Murikiun  
tikishmatrarmiai. Ashí uunt arpa  
tuntuitaiin takaku armái. Tura ashí  
kunkuin enketain kuri najanamun  
takaku armái. Nu kunkuin Yus-shuar  
áujsamuiti. <sup>9</sup>Ju yamaram kantancha  
kantampriarmai:

“Amek imiá nankaamas akupniuitme.  
Amek papí achikiam anujtukmari  
jáakminiaitme. Yus-sutai

namankea áinis mantamna asam túramniaitme. Ashí nunkanmaya shuarnumiasha Yusna árat tusam ame numpemjai in sumakmiame.

<sup>10</sup>Turam akupin awajkartusuitme tura núnisan ii Yúsriniun pujurin awajkartusuitme. Tuma asakmin akupin ajasar ju nunkanam akupkattaji.” Tu kantamainiawai.

<sup>11</sup>Tura untsurí nayaimpinmaya suntar uunt pujutaincha tan̄kuncha tura úunt-nasha éñkekawarun wainkiamjai. Nusha nekapmarchamnia ti untsurí armia nu <sup>12</sup>kakantar tiarmai:

“Murik mantamnamia nu akupin ajas ashí kakarmancha, kuítniasha, nekaatniuncha Niñki achikminiaiti. Tura nupetmaku asamtai yuminsar Nin ti shiir awajsatin áiniawai.” Tu tiarmai.

<sup>13</sup>Núnisan ashí Yus najanamu, nayaimpiniam írunna nusha, nunkanam írunna nusha, nunká inít írunna nusha, nayaantsanam írunna nusha, tuíñian antukmajai:

“Muriksha tura akuptainium pujana nusha ti shiir tura ti kakaram ásar tuke iniaitsuk shiir awajnasarti.” Tu tuiniawai.

<sup>14</sup>Tura kuaru tan̄kusha “Tuke núnisan atí” tiarmai. Tura paintikuatru uuntka nekas tuke iwiaaku pujá nuna tikishmatar shiir awajsarmai.

### Murikkia siati anujtukman jaakmai

**6** Wi iyakui Murikkia chikichik anujtukman jaakmai. Túramtai chikichik tan̄ku ipiamtajai métek kakantar untsumun antukmajai. “Winim iitiá” turutmiai. <sup>2</sup>Túrutkui kaway pújun wainkiamjai. Nuí ekeemia nu tishimkiun takakuyi. Akuptai tawaspasha susamuyi. Tura tuke nupetmaktinian jíinkimiai.

<sup>3</sup>Nuyá Murik anujtukma jímiaran jáakmatai tan̄ku jímiara nu “Winim

iitiá” turutmiai. <sup>4</sup>Túrutkui chikich kawai kapaakun wainkiamjai. Nuí ekeemia nuna puniá úuntan susamuyi. Nusha shiir pujuscharat tusa ashí jú nunkanmaya shuaran máanaimtikiatniun akupkamuyi.

<sup>5</sup>Nuyá Murik anujtukma menaintiun jáakmatai tan̄ku menaintiua nu “Winim iitiá” turutmiai. Túrutkui kaway mukusan wainkiamjai. Nuí ekeemia nusha kijin nekapmatain takakuyi. <sup>6</sup>Tura kuaru tan̄ku ajapeniá chichaamun antukmajai. “Tsawant takamtsuk takaakmasha apatkuka penké ishichik sumakmin átatme. Tura núnisan machasha niji-amchisha amuukacharat tusam péñker wainkiata.” Tu timiai.

<sup>7</sup>Nuyá Murik anujtukma kuátrun jáakmatai tan̄ku kuarua nu “Winim iitiá” turutmiai. <sup>8</sup>Túrutkui kaway yan̄kun wainkiamjai. Nuí ekeemia nusha Jákatín náartiniuyi. Tura nuna úkurin Jatai nemark winimiai. Nusha ashí nunkanmaya shuar kuaru akankamunmaya chikichkin máatniun akupkarmauyi. Nusha mesetjaisha tsukajajsha sun̄kurjaisha tura yajasmajai máawarmai.

<sup>9</sup>Nuyá Murik anujtukma sénkun jáakmatai Yus-sutai kun̄kuin ekemtai wakenmaani fismajai. Túran Yus-Chichaman etserainiakui máawarma wakanin wainkiamjai.

<sup>10</sup>Nusha kakantar untsumainiak tiarmai “Uuntá, ti penker asam támena nu umíatsmek. ¿Urutiak nunká pujuinia nú shuar ii mantamnamunam yapajmiátruktam?” tiarmai.

<sup>11</sup>Tuiniakui pushí pújun susar tiarmai “Chikichcha Krístunun etserainiakui mantamnatin áiniawai. Nu náakrum ishichik ayampratarum” tiarmai.

<sup>12</sup>Nuyásha Murik anujtukma sáisan jáakmatai ti úurun wainkiamjai. Tsawai-nantusha iturchat ajasua áintsan mukusa ajasmai. Kashí-nantusha

numpá áintsan ajasmai. <sup>13</sup>Tura yaasha wampú nere nase umpuim ti majüwa áintsan kákekarmai. <sup>14</sup>Nayaimpisha papí penuara júamua áintsan menkakamai. Tura naintcha yajá apujnasarmai. Tura nunkasha nayaantsanam ajapén atentrainia nusha yajá apujnasarmai. <sup>15</sup>Tura jú nunkanam akupin ainia nusha náinnium wear kayá wáanam uumkarmai. Nijjaisha ashí shuar, uuntcha, kufriniusha, suntara kapitiántrisha, ashí kakaram ainia nusha, tura takarniusha ankant ainia nujai náinnium wearmai. <sup>16-17</sup>Túrawar náinniasha kayancha tiarmai “Asutniátin tsawant jeayi. ¿Yaki aun katsuntrat? Nu asamtai saanakim in yutukratata. Túrarum Murik ti asutiámataj nuyásha tura akupin pujana nuyásha uukratkatá” tiarmai.

### Israer-shuarnumia anujturma armia nu

**7** Nu nankaasmatai kuatru nayaimpinmaya suntar, nunkaa kuatru yantamén wajan wainkiamjai. Nusha kuatru nase kukarsha, nayaantsanmasha tura kampunniunmasha nasenkacharat tusar wajatiarmai. <sup>2</sup>Kame kukarsha tura nayaantsanmasha yajauch awajsatniun akupkamu armai. Tura chíkich suntarnasha nantu tátainmaaniá winian wainkiamjai. Tuke iwiaaku Yusa anujtutairin takakauyi. Nusha kuatru suntaran kakantar untsuak tímiai, <sup>3</sup>“Ii Yusri takarin ainia nu nijiainium árar anujtatsrinin kukarsha, nayaantsasha, tura kampunniusha nasejai yajauch awajsairap” tímiai.

<sup>4</sup>Tura tímiajni untsurí aara anujtukman antukmajai. Ashí Israer-shuar tuse (12) shuar weeá ainia nuyá chikichik siantu kuarenta kuatru mir (144.000) armai. <sup>5</sup>Jutá weeanmaya tuse mir (12.000) anujtukma armai. Rupin

weeanmayasha tuse mir anujtukma armai. Kat weeanmayasha tuse mir anujtukma armai. <sup>6</sup>Aser weeanmayasha tuse mir anujtukma armai. Niptarí weeanmayasha tuse mir anujtukma armai. Manasés weeanmayasha tuse mir anujtukma armai. <sup>7</sup>Semeun weeanmayasha tuse mir anujtukma armai. Riwi weeanmayasha tuse mir anujtukma armai. Ísakar weeanmayasha tuse mir anujtukma armai. <sup>8</sup>Sapurin weeanmayasha tuse mir anujtukma armai. Jusé weeanmayasha tuse mir anujtukma armai. Pinjamín weeanmayasha tuse mir anujtukma armai.

### Ti untsurí shuar pújun entsararu

<sup>9</sup>Nuyá ti untsurí shuaran wainkiamjai. Ashí nunkanmaya nusháa shuaraim iruntrarú ásar nekapmarchamnia armai. Tura nusha uunt akupin pujutainium tura Muriknium naka wajaarmai. Tintiuki nukéa áaniun takaku armai. Tura ashí pújun entsaru armai. <sup>10</sup>Ashí kakan-tar untsumainiak tiarmai:

“Ii Yusri uunt akupin pujutainium eketna au tura Muriksha imia Niñki Uwemtikin áiniawai” tiarmai.

<sup>11</sup>Tura nayaimpinmaya suntarsha uunt akupin pujutaincha, kuatru tanjkuncha, tura úuntnasha téntatkar armia nu piniakum nunká tepersar Yúsan shiir awajsar <sup>12</sup>tiarmai

“Nekasaiti. Tuke iniaitsuk ii Yusri ti shiir awajsatniuiti. Niñki ti neka, ti kakaram, ti akupin, tura ti penker asamtai tuke yuminsatniuiti. Núnisan atí.”

<sup>13</sup>Nuyá chikichik uunt inintsamai “Pújun entsaru ainia júsha ¿ya ainia tura tuyá ainia?”

<sup>14</sup>Túrutkui “Uuntá, amek nékame” tímiajai.

Tutai nii túrutmiai “Ju shuar ti wait-saru áiniawai. Túrawar Murikiu numpé-

jai ni pushiri nijiamawar puju awajsaru áiniawai. <sup>15</sup>Nuna túrawaru ásar yamaikia Yusai naka pujusar tsawaiasha káshisha Yúsnan ni Jeen takainiawai. Tura akupin pujutainium eketna au tuke wainkiartatui. <sup>16</sup>Yamaikia tsukajajisha kitiakajajisha wáitsachartatui. Tura etsasha sukuiniak yajauch awajsachartatui. <sup>17</sup>Murik, akupin pujutainium naka wajana au, ni murikrin wáiniuk áyureak ti penker púkuini entsa waana nú apujartatui. Tura Yus ni neajkincha ukujtiurartatui.” Tu túrutmiai.

### Anujtukma siatia nu jaakma tura kunkuin ekeemataijjai túrunamu

**8** Nuyá Murik anujtukma siatin jaakmatai nayaimpiniam chikichik ura jeastatuk ajapén mitia ajasmai. <sup>2</sup>Nuyá siati suntar Yusai naka wajainia nuna wainkiamjai. Nusha siati kachun susamu armai. <sup>3</sup>Nuyá chíkich suntar kunkuin enketain kurijjai najanamun itiamai. Tura Yus-sútainium ayamas wajasmatai núkap kunkuin sunasmai. Nu kunkuin ashí Yus-shuar áujsamujai métek kunkuin ekeematainimum ekeemaktiniuyi. Nu ekeematai kurijjai najanamuyi tura uunt akupin pujutainium naka pujumai. <sup>4</sup>Tura suntar ekeemakmatai kunkuinia mukuintiuri Yus-shuar áujsamujai métek Yúsan amainkiamai. <sup>5</sup>Nuyá nu kunkuin enketain suntar achik ekeematainimaya ji kapaan káirin áimyak ju nunkanam ukaamai. Túramtai ipiamtasha unsummasha, peemsha, tura uusha armai.

### Kachu umpuarma

<sup>6</sup>Nuyá siati suntar kachun takakainia nu umpuartaí tusar iwiarnararmai.

<sup>7</sup>Emka suntar kachun umpuarmatai micha kákekamai. Nunasha ji numpajai pachimpramuncha nunkanam ajapawar-mai. Túmakui menaintiu nakakma jeeán

numincha tura ashí írunna nuí ekeemak-mai. Tura ashí nunkanam chírichrin takamtsuk ekeemakmai.

<sup>8</sup>Nuyá suntar jímiara nu kachun umpuarmatai uunt naintia áanin kean nayaantsanam ajunmai. Túramtai menaintiu nakakma jeeá nayaants numpa ajasmai. <sup>9</sup>Núnisan menaint jeeá nayaantsanam matsatainia jákarmai. Tura menaint jeeá uunt kanua nu emesnararmai.

<sup>10</sup>Nuyá suntar menaintia nu kachun umpuarmatai ti uunt yaa nayaimpinimaya kapaá kákekamai. Tura entsasha tura púkuninmasha menaint nakakam jeeánum kákekamai. <sup>11</sup>Nu yaasha Yapá-numi náartiniuyi. Tura menaintiu nakakam jeeá entsa yapá ajasarmai. Túrunamtai ti untsurí shuar nu entsa yapá ajasmájai jákarmai.

<sup>12</sup>Nuyá suntar kuarua nu kachun umpuarmatai menaintiu nakakam jeeá tsawai-nantusha kashí-nantusha tura yaasha emesnarar ajapén tee ajasarmai. Túrunawar tsawaiasha káshisha menaintiu nakakam jeeánum tsáapnircharmai.

<sup>13</sup>Nuyá chíkich suntar nayaimpiniam nanamun wainkiamjai. Nusha kakantar untsukum timiai “Maa, chíkich menaintiu suntar umpuiniakui nunkanam pujuinia nu ti wáitsartatui.” Tu timiai.

**9** Nuyá suntar senkua nu, kachun umpuarmatai yaan nayaimpinimaya nunká kákeran wainkiamjai. Tura nu yaan tunáa shuar jákaru matsamtaí yawirín susamuyi. <sup>2</sup>Tura uraimtai nu nánkatkachu wáanmaya ti mukuint jiniimiai uunt jiniumiá áintsan. Tura etsanacha tee awajsamai, yurañmincha tee awajsamai. <sup>3</sup>Nuyá nu mukuintiummaya manchi jíintrar nunká ti yujaarmai. Tura ju nunkanimaya titinkia áinis najamin ajastinian susamu armai. <sup>4</sup>Chírichrincha ashí arakmancha ashí numincha yajauch awajsatin suritkiamuyi. Antsu áyatik

shuar nijiainium Yusa naari áarar anuj-tukchamunak yajauch awajsatin armai. <sup>5</sup>Túrasha ajaktsuk senku (5) nántutin wáitkiastin susamu armai. Kame titin, shuaran ijiú, najaweá núnis najaweatin susamu armai. <sup>6</sup>Nuj shuar wari jakataj tuñiyatayán jákachartatui. Ti wakeruini-ayatan jákatniun tujinkiartatui.

<sup>7</sup>Manchisha ísam mesetnum weena nu kawaiya áinis armai. Kurí tawaspa áinis etsenkraku armai. Yapišha shuarna áinis armai. <sup>8</sup>Intiashísha nuwanua núnis armai. Najsha úunt yawá naiya núnis armai. <sup>9</sup>Netsepén namaka saepea áinis jiru péeramu armai. Tura nanamenaksha kaway karu japiiniak mesetnum tsékeena núnisan téter ajarmai. <sup>10</sup>Ujukésha titinki ujukea áinis asa janke ajakin armai. Nujai tuke senku nantu yujarsar shuaran íjiuar wáitkiastin armai. <sup>11</sup>Ni uuntrišha nánkatkachu wáa uraimia nuyaiti. Nusha Israer-chichamjai Apatún tutainti. Tura Kriaku-chichamjainkia Apuriún tutainti. Nuka Yajauch Awajkartin tawai.

<sup>12</sup>Jujai emka wáitsatin nankaamasai. Túrasha tuke jimiar taasai.

<sup>13</sup>Nuyá suntar saisa nu kachun umpuarmatai chichaman antukmajai. Yusai naka kunkuin ekeemaka Yus-sutai kurimpramu amai. Tura ni kuaru yantame kachu jiiñmiai. Tura nuyá chichaak <sup>14</sup>suntar kachu takakun saisa nuna timiai “Kuaru suntar Eupratis kanusá pujuinia nu atiram akupkarta.” <sup>15</sup>Túramtai nu kuaru suntar wear menaintiu nakakam untsurí shuaran maatai tusar weriarmiayi. Kame nuna túrawarat tusar ikiusma armai. Tura nu uwitin, nu nantutin, nu tsawantin, tura nu úratin atiatin ikiusma armai. <sup>16</sup>Tura suntarnasha kawainium eketainian wainkiamjai. Tura timiá untsurí nekapmarchamnia asamtai aya

númirurjñ antukmajai. Nusha jimiará siantu miyun (200.000.000) armai.

<sup>17</sup>Tura íimiamunam suntarnasha kawaincha júnisan wainkiamjai: Eketainiaka netsepnum jirun entsaru armai. Nusha kapaaku wiñkia tura yanke armai. Tura kawaisha úunt yawáa muuke áinin armai. Tura ni wenyasha jisha, mukuintiusha, asupriša ti tsuer keá nu jíniarmai. <sup>18</sup>Nu menaintiu ti yajauch wáitsamujai menaintiu nakakam shuar untsurí jákarmai. Jijjajsha, mukuintiujajsha, asuprijajsha jákarmai. <sup>19</sup>Nujai nu kaway ni wenejai shuaran wáitkiasarmai. Tura ni ujuké napí múukeya áinin armai. Nujajsha shuaran wáitkiasarmai.

<sup>20</sup>Tura nujajsha jákacharmia nú shuar tuke tunáa túratniun iniaisacharmai. Tura yajauch wakanniasha tura ántar-yusnasha tikishmatratniun ini-aisacharmai. Nu ántar-yus kurijajsha, kuítjajsha, jiru yanikutakujajsha, kayajajsha, numijajsha najanamú ásar wainmaktinniasha, antuktinniasha, tura wekasatniuncha tujintiainiawai. <sup>21</sup>Núnisan mankartuatniuncha, wawekratatniuncha, tsanirmatniuncha, tura kasamkatniuncha iniaisacharmai.

### Papichin suntar takusmia nu

**10** Nuyá chíkich kakaram suntar nayaimpinmayá táarun wainki-amjai. Nusha yuran kim amúamu tura múuknum tuntíak téntakmauyi. Yapišha etsajai métek wínchayui. Tura kujapésha ji keá áintsankeyi. <sup>2</sup>Nusha papin urak takakayui. Tura imiá uunt asamtai ni nawé untsuurnumaní nayaantsanam tura menarini kukar tarimias wajas-mai. <sup>3</sup>Tura úunt yawá kakar shiniak chicháa áinis ti kakaram untsumkamai. Nujai siati (7) ipiamtasha chichasarmai. <sup>4</sup>Nii chichasarmatai ni chichamen áartiniujai tura nayaimpinmayá chichar-

tak “Áaráip, túrutmiai. Jűka nekanashti” túrutmiai.

<sup>5</sup>Tura nuyá, suntar nayaantsanmasha tura kukarsha tarimias wajama nu ni uweje̋ untuurin̄ nayaimpinmaanī takuimiai. <sup>6-7</sup>Tura timiai “Pe̋ké ishichik ajasai. Suntar siatia nu umpúakuin̄kia Yus ashí yaunchu enentáimpramia nu uminkiattawai. Emka ujatsuk ukunam ni shuarin̄ Yúsnan etserniua nuna ujakmiayi.” Tu timiai. Nuyá chichaak:

“Yus tuke iwiaaku pujawai. Tura imiá kakaram asa nayaimpincha, nűnkancha, nayaantsancha, tura ashí nű írunna nunasha najanaiti” timiai.

<sup>8</sup>Nayaimpinmaya “áaráip” túrutmiai nu ataksha chichartak turutmiai “Suntar nayaantsanam tura kukar tarimias wajana nu weritiá. Turam ni untuurin̄i papin urak takakna nu achiktá” turutmiai.

<sup>9</sup>Nuyá túrutkui werin papichin seamjai.

Tura surak turutmiai “Papái. Yuátá. Tura yúamka ti yumin átatui. Tura antsu wakem̄inkia yapamprattame” túrutmiai.

<sup>10</sup>Nuyá papichin suntarnumiā jukin yuamjai. Tura nii turutmia núnisan̄ wenuruin̄kia ti yumin nekapramjai. Tura antsu yuan wakeruin̄kia yapampramjai.

<sup>11</sup>Tura nuyá turutiarmai “Waketkim ataksha ashí nűnkanmayā shuaran tura ni kapitántr̄incha Yus tana nu ujakar-tiniaitme.” Tu túrutmiai.

### Jimiará shuar Yusaiyā akupkamu

**11** Nuyá karisun nekapmatia áaniun surus turutiarmai “Weme Yusa Uunt Jee nekapmartá. Túram namān-maa-Yus-sutaisha nekapmartá. Tura nű Yúsnan shiir awajeena nusha nekapmartá. <sup>2</sup>Antsu jeā áarin̄kia yajayā shuar susamu asamtai nekapmatsuk ikiuktiá. Nu shuar ti shiir péprun Jerusarén̄kan kuarentitús (42) nantu nű akupeenak mash yajauch awajsartatui. <sup>3</sup>Túruiniakui Wikia

Wii-shuaran jímiar̄an akatran akup-kattajai. Nusha chikichik mir jimiará siantu sesenta (1.260) tsawant pujusar Winian etserkartatui. Nuka menaintiu uwí nan̄kaamasaiti. Útkur-entsatai pushin entsaru ártatui.” Tu turutiarmai.

<sup>4</sup>Nu jímiar shuarsha nayaimpiniam nakumkamu áiniawai. Uriwiu numisha jímiar tura shirikip ekeemataisha jímiar nayaimpiniam awai. Nusha jű nűnkā Uuntrī Yusaī wajainiak, jímiar akatramua nú shuaran nakumainiawai. <sup>5</sup>Shuar nin yajauch awajsataj tutai ni wene-niá jiniā jīiki nemasrī ashí áesatniuiti. Núnisan̄ nin yajauch awajsatniun wakera nuka jákartatui. <sup>6</sup>Nu aentska Yúsnan áujmatainiak yumi yutukaip̄ tí-tinian kakarman takakainiawai. Núnisan̄ entsancha numpa awajsatniun kakarman takakainiawai. Tura ashí yajauchia nűjaī aentsun wáitkiastinian takakainiawai. Nuna ashí ni wakeruinia nű pá-chitsuk túramin áiniawai. <sup>7</sup>Tura ni takatr̄in̄ umikiarmatai Ti Kajen Yajasma nán̄katkachu wāanmayā j̄in̄ia nu mese-tan najata nupetak máawartatui. <sup>8</sup>Tura iwiarnatsuk ni ayashī uunt pepru j̄in̄-tīin̄ ajapén tepeartatui. Nu péprunmasha ii Uuntrī Jesukr̄istuncha máawarmiayi. Nu péprunmayā shuar tuke tunaan túrin ásar̄matai Ejiptu tūniak tura núnisan̄ Sutuma tūniak nu péprun páchiiniawai. <sup>9</sup>Tura menaintiu tsawant nuyá nan̄kaamas ashí nűnkanmayā shuar jaka tepan íisar iwiarnascharti tiártatui. <sup>10</sup>Nu jákarmatai ashí nűnkanam pujuinia nú shuar ni jakamun ti wararainiak mai sunai ajartatui. Kame nu jimiará aents Yúsnan áujmatenak ashí shuaran wáitki-asaru ásar̄matai ti warasarmai. <sup>11</sup>Nuyá menaintiú tsawant nuyá nan̄kaamas jaka tepesarmatai Yus ataksha iwiaaku awajsarmai. Tura nantakiarmatai nuyá shuar nin wainkiar ti ashamkarmai.

<sup>12</sup>Nuyá nu nantakiaru nayaimpinmayā kakaram untsunnan antukar-

mai: “Jui yakí wakatarum.” Tu untsum-miai. Tutai ashí ni nemasri íimiaini-ain yurankim amuam nayaimpiniam wákarmai. <sup>13</sup>Túmainiaí ti úurkamtai tias nakakam jeeá pepru saanakmiai. Tura siati mir (7.000) shuar jákarmai nu uujai. Chíkichkia sapijmiainiak Yus nayaimpiniam pujana nuna shiir awajarmai.

<sup>14</sup>Jímiar wáitsatin nankaamasai. Chikichik ajasua nu túrunatin ishichik ajasai.

### Suntar siatia nu kachun umpuarmai

<sup>15</sup>Nuyá suntar siatia nu, kachun umpuarmatai chícham kakaram chichainian nayaimpinmayaan antunkamai. Juna tímiayi:

“Yamaikia ii Uuntri Yus tura ni Anaikiamu Kristu ashí shuaran akupin ajasarai. Niisha tuke amutsuk akupkartatui.”

<sup>16</sup>Nuyá paintikuatru uuntka akupin pujatanium Yusai naka pujuarmia nu piniakum tepersar Yúsan shiir awajenak tiarmai:

<sup>17</sup>“Uunt Yusá, ti kakaram asam Ámijiai tujinkiatin atsawai. Yáunchusha, yamaisha, tura tuke amuutsuk iwiaaku pujuwitme. Ame ti kakarmarmijiai nekas akupkatin juarme yamaikia. Tuma asakmin yuminsajme, tiarmai. <sup>18</sup>Ashí shuar kajertamkaru ain yamaikia amesha kajerkatin tsawant jeayi. Jákarusha iniantkim ni túramuri íisartatme. Turam amée shuarka shiir etserturmakua nusha, tura Aminiak enentáimturmasarua nusha, tura Ámin shiir awajtam-sarua nusha ashí mash ti shiira nuna súakum akiktatme. Antsu ju nunkan emesniuka ashí emesratniunam akupkattame.” Tu tiarmai.

<sup>19</sup>Tuíniakui Yusa Uunt Jee nayaimpiniam ana nu uranmiatai wakenmaani Chícham Aarma

Chumpitiai paant amai. Túrunamtai peemsha, ipiamtasha, cháarpisha, uusha amai tura michasha ti kakekamai.

### Nuwasha tura Ti Kajen Yajasmasha

**12** Nuyá nakumkamu ti enentáimpramnia nayaimpiniam wantinkiamai. Nuwá etsajai penuarma wantinkiamai. Nawesha nantunam ekeemai. Tura múuknum tuse yaan etsenkrakuyi. <sup>2</sup>Nu nuwá ajamtin asa jurertaj tusa wáitiak ti kakantar uttmiai.

<sup>3</sup>Tumaj ataksha ti enentáimpramnia nayaimpiniam wantinkiamai. Ti Kajen Yajasma kapaaku wantinkiamai. Muukesha siati asa siati akuptai tawaspán etsenkraku áрмаi. Tura kachurisha tíasaui. <sup>4</sup>Menaintiu nakakam jeeán yaan ni ujukéjai japiki akakermai. Tura nunká utsamai. Nu Ti Kajen Yajasma nu nuwá jatema nui wajasmai. Júrmataik yuruataj tusa wajattsamai.

<sup>5</sup>Tura nuwasha áishmankan jurermai. Nu uchi uunt ajas ashí nunkanam ti kakaram akupkatin asa, nu uchi akupin pujatanium Yus pujana nui junakmiai.

<sup>6</sup>Tura núwaka atsamunam pisarmai. Nui pujustinian Yus iwiarturmai. Tura chikichik mir jimiará siañtu sesenta (1.260) tsawant ayurnat tusa akupkamai. Nuka menaintiu uwí nankaamasaiti.

<sup>7</sup>Nuyá nayaimpiniam meset amai. Nayaimpinmaya suntara kapitíantri Mikiar ni suntarijiai Ti Kajen Yajasmajai máanaikiarmai. Ti Kajen Yajasmasha ni suntarijiai ti máanaikiarsha <sup>8</sup>nupetmakcharmai. Túramtai nayaimpinmaya jiki akupkamuyi.

<sup>9</sup>Núnisan Ti Kajen Yajasma ashí ni suntarijiai nunká akupnakmai. Nu Yajasmasha iwianchi kapitíantri Satanás tutainti. Yáunchuya-napiiti niisha. Ashí nunkanmaya shuáran ananniuiti.

<sup>10</sup>Nuyá nayaimpinmaya kakaram untsumman antukmajai. Tura timiai:

“Uunt iwianch ii yachin yajauch áujmatin jiki akupkamu asamtai yamaikia ii Yusrí uwemtikratniusha tura ni kakarmarin iniakmastincha tura akupkatniusha jeayi. Anaikiamu Krístusha ashí akupin ajastincha jeayi. Tura uunt iwianch ii yachin tsawaiasha káshisha iniaitsuk Yusai yajauch áujmatniua nuna <sup>11</sup> fiksán ii yachí nupetmakarai. Yus-susamu murikiu numpea áinis Jesukrístu numpejai nupetmakarai. Niisha jákatniuitkiusha surimiatsuk nekas-chichaman páchitsuk etserkarmai. Nujajisha uunt iwianchin nupetkarmai. <sup>12</sup> Tuma asamtai nayaimpiniam pujarmena nusha warastarum. Antsu nunká tura entsá pujarmena nusha uunt iwianch atumin tarutmarmatai, maa, waitnentajrume. Ni tsawantri ishichik ajatesman nekáa ti kajekuiti.” Tu timiai.

<sup>13</sup> Nuyá Ti Kajen Yajasma nunká ajapna nuwa áishmankan jurerma nuna áintramai. <sup>14</sup> Turakui nuwan uunt nanapen churuwia nanapea áinis sunasmai. Nujai nanamuk yáunchuya-napiya pisar atsamunam wemai. Tura ni ayuratroniam menaintiu uwí nuyá sais nantu pujusmai. <sup>15</sup> Nuyá nu napi ni weneya entsá jiki nujantrumamai nuwan ajekrataj tusa. <sup>16</sup> Túrasha nunka nuwan yayak nakaak nu entsan mash ukuyámai. <sup>17-18</sup> Túrantai nuwan ti kakerak ni weeá chikich írunka nujai máaniaktaj tusa wemai. Nu shuarsha Yus akupkamun umirainiak Jesusan ti shiir áujmaténakui, nijijai máaniaktaj tawai.

### Nuyá Yajasma jimiara nu

**13** Nuyá nayaantsa káanmatkariin wajasan nayaantsanmaya

Yajasman jiiniun wainkiamjai. Muukeshá siátitiat kachuri tias tura akuptai tawaspasha tias armai. Ashí muuken Yúsan yajauch chicharin tu áarmauyi. <sup>2</sup> Nui wáinkiamaj nu Yajasma nekas uunt yawáa áinniuitiat nawenka chai nawea áinniuyi. Weneshá nekas kajen yawáa áinniuyi. Tura Ti Kajen Yajasma Entsaya Yajasman ni kakarmarincha tura ni akupkatniuríncha susamai nujai ti kakaram akupkati tusa. <sup>3</sup> Entsaya Yajasma muuké chikichkin jakamnia awatmian wainkiamjai. Túrasha pénger awajnasmai. Túrantai ashí nunkanmaya shuar nuna ísar ti enentáimturar nemarsarmai. <sup>4</sup> Túravar nin tikishmatrar shiir awajsar “¿Yaki jujajisha jeá. Imiá kakaram asamtai yaki nijijai máanaikminiaiit?” tiarmai. Tura Ti Kajen Yajasma ni kakarmarin Entsaya Yajasman susa asamtai ashí shuar nincha tikishmatrarmai.

<sup>5</sup> Núnisan nu Entsaya Yajasma waantu enentáimtumak Yúsan yajauch chicharkatniusha tsankatnakmai. Tura kuarentitús (42) nantutin kakaram akupkatniun sunasmai. <sup>6</sup> Núnisan túrak Yúsan yajauch áujmatuk ni náarincha ni Jeeincha tura ashí ni shuari nayaimpiniam pujuinia nunasha katsekkarmai. <sup>7</sup> Tura Yusna ainia nujai mesetan najana nupetkatniun tsankatnakmai. Tura ashí nunkanmaya shuaran akupkatniun tsankatnakmai. <sup>8</sup> Túrantai ashí shuar tuke iwiaaku áinia nu papinium ni naari yámankamtaiknumia anujkamu atsúarma nuka nu Yajasman tikishmatrarmai. Nu papincha Murik jaka nantakmia nu takakui.

<sup>9</sup> Shuar juna ántakka enentáimprati:

<sup>10</sup> “Shuaran emeté juinia nusha emetnattawai.

Núnisan shuaran nan kijijai mainia nusha nan kijijai mantamnattawai.”



Tuma asamtai Yajasma mesetan najanamtai Yus-shuar Yus iistí tusar tuke enentáimtusar katsuntsar pujustin áiniawai.

<sup>11</sup>Nuyá chíkich Yajasman kukariá wáakun wainkiamjai. Nusha murikiu áanin jimiará kachurtiniuyi. Tura Ti Kajen Yajasma áinis kakaram chichaakuyi. <sup>12</sup>Niisha Entsaya Yajasma kakaramin súam akupniuyi. Tura ashí nunkanmaya shuaran “Entsaya Yajasma penké jaa tsuarma nu, shiir awajnasti” tímiai. <sup>13</sup>Núnisan shuarti túrachminian ti turin asa ashí shuar ímiainain nayaimpinmaya jinia nunká ajuarmai. <sup>14</sup>Tura Entsaya Yajasma súam aents túrachminian ti turak ashí nunkanmaya shuaran anankawarmai. Túrak Entsaya Yajasma nakumkamurin najanawarat tusa akupkamai. Túramtai puniajai penké jakamnia awatmia pénger ajasma nuna nakumkamurin najanawarmai. <sup>15</sup>Kukariá Yajasma kakaram sunasmai. Nujai Entsaya Yajasma najanamun iwiaaku awajsatniua áintsan ichachkiamai. Túram ashí níniak shiir awajeacham máatniun susamai. <sup>16</sup>Nu arantcha ashí shuar anujmamprarat tusa akupkamai. Uuntcha uchisha kufrinniusha kufrinchasha ankantcha ankantchasha ashí ni nijiaíncha tura wakerakka untsuuríncha anujtuktiniuyi. <sup>17</sup>Entsaya Yajasma náarin tura wakerakka ni náari númerurin anujtuktiniuyi. Túrachuka sumatnasha sumakchamniuyi, surutnasha surukchamniuyi. <sup>18</sup>Wats, wi tájana ju nekaatniuka ti nekas enentáimtustiniaiti: Entsaya Yajasma númeruri áishmanka númeruri asa sais siantu seséntisáisaiti (666). Ashí ti neka ainia nú shuar Entsaya Yajasma númerurin nekapmar nin nekaati.

## 144.000 shuar Yúsan kantampruawarma

**14** Nuyá Murikiun Seun náinnium wajan wainkiamjai. Nijiaísha siantu kuaréntikuátru mir (144.000) shuar wajaarmai. Nusha nijiaí Murikiu náarincha tura ni Aparí náarincha anujtukma aarmai. <sup>2</sup>Ti untsurí áran nayaimpiniam túntuiniak teer awajenak kanusa uuntri nujanrakrak téter ajá núnisan antukmajai. Ti kakaram ipiamta núnis amai. <sup>3</sup>Nu tuntuiyamujai siantu kuaréntikuátru mir shuar akupin pujutainium naka wajasar yamaram kántan kantamáwarmai. Niisha kuaru tan kunmasha tura paintikuatru uuntnumsha naka wajasar kantamáwarmai. Nu kántanka chíkichka nekaachmin armai. Aya nu siantu kuaréntikuátru mir shuarka jú nunkanmaya shuarnumiá uwempraru ásar nu kántan kantamiarmai. <sup>4</sup>Nu shuarsha nuwajai yajauch ajascharu ásar ti shiir áiniawai. Túrawar Murik weana nuj nemarainiawai. Ju nunkanmaya shuarnumiá uwempraru ásarmatai Yussha tura Muriksha ti shiir enentáimtiarmai. Niisha emka juukma ti shiira núnisan armai. <sup>5</sup>Nu shuar penké wáitruachu ásar Yúsaísha ti shiir tunáa máatrachu armai.

## Menaintiu suntar chichaman etserainiawai

<sup>6</sup>Nuyá nayaimpiniam suntar nana-mun wainkiamjai. Nusha uwempratin chicham tuke amuukashtinia nuna ashí nunkanam pujuinia nú shuaran ujakartiniuyi. <sup>7</sup>Nusha ti kakantar untsumuk timiai: “Yus ashamkatarum. Niñki shiir awajsataram. Yamaikia ashí shuaran súmamtikiawartin tsawant jeayi. Nayaimpincha nunkancha nayaantsanacha ashí entsanacha najana asamtai shiir awajsataram.”

<sup>8</sup>Nuyá chíkich suntar, jímiara nu, taa timiai: “Pai, Uunt Papirúnia pépruka penké meserai. Niisha tuke tsanirmaua núnisan ashí shuaran anampratniua núnisan utsuurmai. Tuma asa niisha nú shuarjají nupetnak tuke emesnarai.”

<sup>9</sup>Nuyá chíkich suntar, maintiua nu, taa timiai: “Shuar Entsaya Yajasmancha tura ni nakumkamuríncha shiir awajeakuínkia tura nijaiinimsha uwe-jnumsha ni naari anujtukmaitkuínkia

<sup>10</sup>Yus nin kajerak ti asutiáttawai. Yapá pachimprachman áartinia áintsan ti kajerakatawai. Túramtai asupri ti tsúer keá nujají jinium wáitsartatui. Yusa suntari tura Murik íimmianum apenáwar jinium wáitsartatui. <sup>11</sup>Ni wáitsatniuri jí esaak kajintsuk tuke mukuintia nuniskete. Entsaya yajasman tura ni nakumkamurin shiir awajeenak ni naari anujmmainia nuka tsawajsha káshisha ayamtsuk wáitsartatui. <sup>12</sup>Nu asamtai ni chichamen umirainiak Yusna ainia nuka Krístun ti shiir nemarainia ásar nu tsawantají itiurchatnum pujuiniak kat-suntratin áiniawai.”

<sup>13</sup>Nuyá nayaimpinmaya chichaman antukmajai. Nusha turutmiai “Jú áatratá: “Uunt Jesusan umirainia nu yamáí jakarusha tura ukunam jakarusha ti shiir pujusartatui.” Tu aartá” timiai.

‘Núnisan Yusa Wakaní tawai. “Eta, ti takasaru ásar jakar yawerman ayamprartatui. Tura ti penker túrwar akinkiaratui” tawai” turutmiai.

### Jú nunkanam arakma juukma

<sup>14</sup>Nuyá yuraním pújun wainkiamjai. Tura yuranminiam Aents Ajasua nuna eketun wainkiamjai. Akuptai tawaspan kurijjají najanam etsenkrakuyi. Tura machitian éren takakuyi.

<sup>15</sup>Tura chíkich suntar Yusa Uunt Jee-nia jiinki yuranminiam eketun kakantar chicharuk tímiai “Árak júuktin tsawant jeayi. Machitrumjai tsupiram juuktá.”

<sup>16</sup>Tutai yuranminiam eketu ni machitrijjají nunká arakman tsupir juukmai.

<sup>17</sup>Nuyá chíkich suntar Yusa Uunt Jee nayaimpiniam ana nuyá jíinkimiai. Niisha ni machitri éren takakuyi.

<sup>18</sup>Tura chíkich suntar naman maar Yus-sútainmaya jíinkimiai. Niisha jinia wáinniyui. Tura máchit ti éren takakun kakantar chicharuk tímiai “Machitrum ti érea nujají uwa nunká arakma nu tsupiram juuktá. Mash tsamakarai.”

<sup>19</sup>Tutai suntar ni machitrijjají ashí nunkanmaya uwa neren tsupir juukmai. Tura neketainiam chumpiamai. Nu neketai Yus ti kajerak shuáran ti asutiáttá nuna nakumeawai. <sup>20</sup>Tura uunt péprunmaya arantach ijiurarmai. Tura neketainmaya numpa jíinkimiai. Nu numpa tres sianu (300) kirumitrua nuí pajamar kawayu nujjjají métek ajasmai.

### Nayaimpinmaya suntar amúamunam wáitkiastinia nuna pininnumian ukainiawai

**15** Nuyá ashammian ti enen-táimprannian nayaimpiniam wainkiamjai. Siatí suntar amúamunam wáitkiastinia nuna takusarmai. Nujají jú nunkanam yajauch shuáran ti wáitkiasar Yus kajeamun umirtatui.

<sup>2</sup>Nuyá antumianka áiv 20 Tura uunt péprunmaya arantsan ti saar jijjají pachimpramun wainkiamjai. Ni káanmatkaríncha Entsaya Yajasman tura ni nakumkamuríncha nupetkarma nu nuí wajaarmai. Tura nin arpa tuntuítian Yus súsarmai. <sup>3</sup>Túramtai kantamáwar-mai. Yusa yaintri Muisaisa kantarincha tura Murikiu kantarincha kantamainiak tiarmai:

“Uuntá, ashí tujinchaitme. Ti penker tura ti enentáimturmin ashí najanaitme. Ashí Uunt Akupin asam ashí nekasa nu túrasha penkera nu túriniaitme. <sup>4</sup>Uuntá,

¿yaki ashampramkachat<sup>1</sup>. Tura yaki ti shiir awajtamsachat<sup>1</sup>? Aya Amek ti shiir tunaarinchaitme. Ashí nun<sup>2</sup>kanmaya<sup>2</sup> shuar ame ti shiir túramun wáinkiár Aminiak jeartamar ti shiir awajtamsartatui.”

Tu kantamáwarmai.

<sup>5</sup>Nuyá atak Yusa Uunt Jeen úsan, Ti Shiir Tesaamun uranniun wainkiamjai.

<sup>6</sup>Tura Ti Shiir Tesaamunmaya<sup>6</sup> siati suntar siati wáitkiastinjai<sup>6</sup> jíinkiarmai. Nisha ti shiir pújun entsaru armai. Netsepnumsha kurin emenmama armai. <sup>7</sup>Nuyá kuaru tan<sup>7</sup>kunmaya<sup>7</sup> chikichik kurí pin<sup>7</sup>inkian súsarmai. Nu pin<sup>7</sup>in tuke iwiaaku Yusa kajetairíjiai<sup>7</sup> piaku armai. <sup>8</sup>Tura Yusa kakarmari<sup>8</sup> ti ashammai Ti Shiir Tesaamunam mukuintiua núnis piakmai. Túramtai nu siati suntar wáitkiastinian ukarar amuiniatsain<sup>8</sup> Yusa Jeen wayachminiuyi.

### Wáitkiastin pinin ukararma

**16** Nuyá Imiá Shiir Tesaamunmaya<sup>16</sup> ti kakaram chichaamun antukmajai. Nusha siati suntaran tiarmai “Nun<sup>16</sup>ká werum Yusa kajetairí<sup>16</sup> siati pin<sup>16</sup>inum ana nu ashí ukartarum.”

<sup>2</sup>Tutai emka suntar we, pin<sup>2</sup>innumiá kukar ukarmai. Túramtai ashí shuar Entsaya<sup>2</sup> Yajasma náarin anujmamprar ni nakumkamurin<sup>2</sup> shiir awajiarma nuna ti najamin kuchap jiiintiarmai.

<sup>3</sup>Nuyá chíkich suntar jímiara nu, we Yusa kajetairin<sup>3</sup> nayaantsanam ukarmai. Túramtai nayaants jakáa numpéa áinis ajasmai. Tura ashí nu<sup>3</sup>juinia nu kajinkiarmai.

<sup>4</sup>Nuyá suntar menaintiua nu, entsanam tura púkunimasha ukarmai. Túramtai ashí numpa ajasarmai. <sup>5</sup>Nuyá suntar entsá wáinniua nuna chichamen antukmajai. “Uuntá, amek ti pen<sup>5</sup>ker Yus asam jútikame. Yáunchusha tuke pujú asam ti shíiraitme. <sup>6</sup>Iis, nu shuar amée shuárumincha tura ame chichammin

etserniuncha máawar ni numpen ukatraru áarmatai Amesha núnismek numpa áarume. Maa, páchitsuk áitkianatin áiniawai.”

<sup>7</sup>Tutai naman<sup>7</sup>-maa-Yus-sútainmaya<sup>7</sup> chichaman antukmajai. “Eta, Uuntá. Nekas kakaram asam ashí ti tujinchaitme, Nekas túratniua nu ti pen<sup>7</sup>ker túrin asam nu shuar túramujai<sup>7</sup> métek akiruitme, timiai.”

<sup>8</sup>Nuyá suntar kuarua nu, tsawai<sup>8</sup> nantunam ukarmai. Túramtai jijiai<sup>8</sup> shuáran esaamujai<sup>8</sup> wáitkiastin kakaram sunasmai. <sup>9</sup>Tura shuar ti sukuám wáitarmia nu, nu wáitkiastinian nérenniun Yusan yajauch chicharkarmai. Tura ni tunaarin enentáimsuk Nin shiir awajsatniuncha pen<sup>9</sup>ké nakitrarmai.

<sup>10</sup>Nuyá suntar sen<sup>10</sup>kua nu, Entsaya<sup>10</sup> Yajasma akupin pujutairin<sup>10</sup> ukarmai. Túramtai ni nun<sup>10</sup>keen ashí kashi ajasmai. Tura shuar ti najaimiainiak inia<sup>10</sup>incha esamiarmai. <sup>11</sup>Tura nújajisha<sup>11</sup> yajauch túratniuncha iniaisacharmai. Antsu kuchapríjiaisha<sup>11</sup> tura ti najaimiainiak wáitaiainiak nayaimpinmaya<sup>11</sup> Yúsan ti yajauch chicharkarmai.

<sup>12</sup>Nuyá suntar saisa nu, Eupratis entsanam ukarmai. Túramtai kuyuámai. Nujai<sup>12</sup> nantu tátainmaaniá akupin taarti tusa jintiamnamai.

<sup>13</sup>Tura nuyá júna wainkiamjai. Ti Kagen Yajasma weneyasha, Entsaya<sup>13</sup> Yajasma weneyasha tura núnisan<sup>13</sup> pen<sup>13</sup>ké Kukariá Yajasma ántar yúsnan etserniua nuna weneyasha puachia núnin yajauch wakan menaint jíiniarmai. <sup>14</sup>Iwianch áiniak aents tujintiamun túruiniak ashí nun<sup>14</sup>kanmaya<sup>14</sup> akupniun irurarmai. Ti Tujincha-Yusai<sup>14</sup> ni uunt tsawantri<sup>14</sup> jeamtai mesetan najanatai tusar weriarmai. <sup>15</sup>(Yamáí Kristu “Aneara pujustarum, tawai. Nékachmanum kasa núnisnak jeattajai. Kánutsuk tuke iwianar pujak ni entsatairin<sup>15</sup> pen<sup>15</sup>ker wánia nú shuar ti shiir átatui. Misuchu asa nat-

saarchattawai.” Tu tawai.) <sup>16</sup>Tura ya-  
jauch wakan uunt akupin áinian Ar-  
majetún nunkanam irurarmai. Israer-  
chichamnum nu nunka tu anaikiamuiti.

<sup>17</sup>Nuyá suntar siatia nu, nasenam  
ukarmai. Túramtai nayaimpinmaya  
Yusa Uunt Jeeniá ti kakaram chicham  
Yus akupin pujutainmaya chichaak  
“Mash uminkiai” timiai.

<sup>18</sup>Tura nuyanka peemsha, chárpisha,  
ipiamtasha ajamai. Tura nunkasha  
ti kakaram úrkamai. Maa, aents jú  
nunkanam yámankamtaik pujuarmia  
nuyá júnis úrkamuka atsuwiti. <sup>19</sup>Ti  
Uunt Péprusha menaint nakantramai.  
Ashí nunkanmaya péprusha  
saanakiarmai. Nuisha Yus ti kajerak  
Papirúnia pépruncha kajinmattsuk  
ni kajetairin yapá umutaia áintsan  
aarmai. <sup>20</sup>Entsá ajapén atentrasha  
tura murasha menkaramai. <sup>21</sup>Núnisan  
nayaimpinmaya uunt kaya núnisan  
micha kákeramai. Ti uunt ániak  
kintiarjai métek kijin armai. Shuarsha  
nujai ti wáitiainiayatán áyatik Yúsan  
yajauch chicharkarmai.

### Tsanirmatai nuwá asutiámú

**17** Nuyá siati suntarnumiá chikichik  
taruti turutmiai “Winitia. Tsanir-  
matai nuwá ti asutiátniun iniaktustat-  
jame. Nu nuwá nayaantsanam uku eke-  
tui. <sup>2</sup>Ashí ju nunkanmaya akupin ni-  
ijjai tsanirmawaru áiniawai. Núnisan  
ashí ju nunkanmaya shuar, nu nuwá  
tsanirmatniun tsankateam, nijiamanch  
umartinia áintsar nijjai ti yajauch  
túrawar nampekarmai.” Nuna taku Yus-  
numiá kanaktinian nakumkamai. <sup>3</sup>Nuyá  
mesekranam kampuntin atsamunam ju-  
rukmi. Tura nuju Yajasma kapaaku-  
nam nuwá eketun wainkiamjai. Nu  
Yajasma nasha ashí Yúsan yajauch  
chichareamu áatramuyi. Muuke siátitiat  
kachuri tiásauyi. <sup>4</sup>Nu nuwasha tarachin  
yamakai kapaakujajisha ti shiir iwiar-

mamar entsaruyi. Kurijjajisha, shiirmach  
kayajajisha, ti shiir sháukjajisha iwiar-  
mamprauyi. Kurí pininkian mujmi-  
ainniasha tura ashí ni tsanirmatairi  
imiá yajauch armia nunasha piakun  
ajamak takakauyi. <sup>5</sup>Nijjainiumsha ni  
naarja áintsan yúpichuch nekaachminia  
nu júnis áarmauyi: UUNT PAPIRÚ-  
NIA, Ashí Tsanirmauncha tura Ashí  
Ju Nunkanam Mujmiainian Túrinia  
Nunasha Nukurinti. <sup>6</sup>Nu nuwasha Yus-  
shuar Krístunun etserkar máawarma  
ainia nuna numpen nampekuyi.

Nuna wáinkian ti enentáimturmajai.  
<sup>7</sup>Túrunamtai nayaimpinmaya  
suntar túrutmi. “¿Urukamtai imiá  
enentáimtam? Wats, ashí nuwanun  
paant ujaktatjame. Núnisan yajasma  
ekenak júana nunasha paant  
ujaktatjame. Muukesha siátichukait tura  
kachurjisha tiáschak áinia. <sup>8</sup>Nu yajasma  
wáinkiam nuka yaunchu pujuwiti tura  
yamaikia juju pujachiat amúamunam  
tuke játsuk nánkatkachu wáanmaya  
jiiinkítiiawai. Shuar nuna wáinkiar ni  
naari tuke iwiaaku pujutai papinium  
yámankamtaiknumiá anujtukchamua  
nuka nu yajasma ashamkartatui. Nu  
yajasma yaunchu pujú yamaikia atsayat  
atak wantinkiattawai’ turutmiai.

<sup>9</sup>‘Nekas neka ainia nu júna enen-  
táimturarti: Siati muuke nka siati náin-  
tian nakumui. Nu nuwá nuju eketui.  
<sup>10</sup>Núnisan ni siati muuke siati akup-  
niun nakumui. Kame senku akupniuka  
nankaamasaru ainiawai. Chikichik tuke  
akupniuiti tura chikichka tuke taatsui.  
Nii taasha núkap tsawant akupkashtatui.  
<sup>11</sup>Nuyá ashí ukunmanka yaunchu amia  
nú yajasma wantiniak nuju uchu akupin  
ajastatui. Túmaitiat chikich siati akupni-  
ujai iruram métek enentáimpramniaiti.  
Tura nu yajasma yamaikia atsayat wan-  
tiniak akupak umik tuke emesnartin-  
ium wétatui’ turutmiai.

<sup>12</sup>“Tias kachurj wáinkiam nuka tias akupin tuke akupeenatsna núiti. Niisha nu yajasmajaj métek penké ishichik tsawant akupin ajasartatui. <sup>13</sup>Ju tias akupniusha métekrak enentáimiainiak ni kakarmarín yajasman sústartatui nújajsha akupkat tusar. <sup>14</sup>Murikajajsha mesetan najanawartatui. Túrasha Murik nupetkartatui. Niisha uuntjaj nankaamas Uunt asa tura núnisan akupniujaj nankaamas Akupin asa nupetmaktatui. Tura Nijijaj írutraa nu, Yus Winia atí tusa achikma ásar tura Nin tuke umirin ásar Nijijaj nupetmakartatui.’

<sup>15</sup>Suntar tuke chichartak turutmiai ‘Tsanirmatai nuwá nayaantsanam uku eketu wáinkiachumek. Nu nayaantsaka ashí nunkanmaya shuáran nakumeawai. <sup>16</sup>Tura tias káchuka yajasmanum wáinkiam nu, tsanirmatai nuwan nakitrar ajapawar misú ikiukiartatui. Ni ayashíncha yuawartatui tura áesawartatui. <sup>17</sup>Nu akupniu enentáin Yuska ni wakeramurín apujsaiti. Nii timia nu umintsain akupniusha métekrak enentáimprar ni kakarmarín takamtsuk yajasman súsatniun enentáimtikramai. <sup>18</sup>Nuwá wáinkiam nuka ashí nunkanmaya akupniun akupeana nu pépruiti.”

### Papirúnia emesramuiti

**18** Nuyá nayaimpinmaya suntar táarun wainkiamjai. Ti kakaram akupin asa nunkancha tsáapin awajsamai. <sup>2</sup>Tura ti kakantar chichaak timiai “Pai, Uunt Papirúnia penké meserai. Tura yamaikia íwianch matsamtaisha ashí yajauch wakanj pujutairisha ajasai. Muijmiais nanamtincha tura ashí yajauch nanamtin ainia nusha nuj pasunmainiawai. <sup>3</sup>Nu péprunmaya shuar tuke tsanirmaua núnisan ashí nunkanmaya shuaran anampratniua núnisan ni ti yajauch

turamujaj utsuurmai. Núnisan ashí jú nunkanmaya akupin Yúsan iniaisar nijijaj tsanirmawarua áinis ániawai. Tura shuarsha ni yajauch wararmajaj ti kuítrintin ajasaruiti.” Tu timiai.

<sup>4</sup>Nuyá nayaimpinmaya ti kakantar chichaman antukmajaj. “Wfi shuaraitrumna nuka nú peprunmaya jíinkitiarum. Túrachkurmeka ni tunaarj jumamkirum ni wáitsatniuríncha pachiinkiatarme. <sup>5</sup>Ni tunaarisha ti piak nayaimpiniam jeastatuk ajasai. Tuma asamtai Yus ni tunaarín kajinmatkichuiti. <sup>6</sup>Ni tunáa túramujaj métek akikiam ataksha nuna nankaamas métek patattsata. Ni yajauch túramu nijiamchin ashí áararma núnisan nuna nankaamas ti wáitsatin nijiamanch pachimpruram susata. <sup>7</sup>Waantu enentáimtumak yajauchin wararsama nujaj métek ti wáitkiastá yamaikia. Tunáan ti túriniaitiat ni enentáinkia enentáimias “Uunt Akupniuitjaj. Wajechu asan penké wáitsashtiniatjaj” tu enentáimtumawai. <sup>8</sup>Tuma asamtai ti wárik chikichik tsawantaj ni wáitsatniurj tarittiawai. Jákatniusha ti wáitsatniusha tura tsukasha tarí ashí jijijaj ekeemankattawai. Uunt Yus ashí Tujincha nu kajer kamu asa nujaj asutniáttawai.” Tu timiai.

<sup>9</sup>Ashí nunkanmaya akupin nijijaj tsanirmawaru ainia nu ashí yajauchin nijijaj wararsaru ásar nu pepru esaak múkuint ajakui eáarmai. <sup>10</sup>Ti esaak wáitiakui nuj pachiinkiar wáitsatniun ashamainiak arant wajasar tiartatui “Maa, Papirúnia ti uunt pépruitiat nekas wáitnenmai ajawai. Imiá wárik ni wáitsatniurj tarini.”

<sup>11</sup>Núnisan ashí nunkanam súrin ainia nusha nu péprun ti kuntuts enentáimturar eáartatui. Ni surutain itiamun zyaki sumarkat? <sup>12</sup>Kame juna itiaru ániawai: kurincha, kuítniasha, kaya shíirmachincha, ti shiir

sháuknasha, ti pé<sup>n</sup>ker tarachniasha, akupin entsatai shiirmachin yamakaincha kapa<sup>a</sup>niuncha, sétancha, itiaru ániawai. Núnisa<sup>n</sup> ashí ku<sup>n</sup>kuin numincha, ti shiir awara najanamuncha, ti shíiram numincha, ya<sup>n</sup>kú jiruncha, pe<sup>n</sup>ké jiruncha, mármur kayancha itiaru ániawai. <sup>13</sup>Núnisa<sup>n</sup> ishpi<sup>n</sup>nasha, nusháa ku<sup>n</sup>kuinniasha, mira ku<sup>n</sup>kuinniasha, umutaincha, asuitincha, trikiu nerencha, tura trikiu ti pé<sup>n</sup>ker nekenmancha itiaru ániawai. Núnisa<sup>n</sup> áintstai ta<sup>n</sup>kuncha, murikniasha, kawaincha ni kárurijia<sup>i</sup>, tura nú arantka shuárnasha suruktinian itiaru ániawai.

<sup>14</sup>Tura nu péprun tiarmai “Numí neren ti wakeruk súmauya nu yamaikia nu<sup>i</sup> atsawai. Ashí ni kuítrisha tura ashí ni pé<sup>n</sup>kerisha tuke pe<sup>n</sup>ké amuukayi.” Tu tiarmai.

<sup>15</sup>Ashí nuna súrin armia nu, nuna surukar kuítrintin ajasaru ásar, ti wáit-samun ashamkar arant wajasar e<sup>a</sup>rar-tatui. <sup>16</sup>Túrawar tiartatui “Maa, uunt pépruiat ti wáitnenmai ajakai. Nuwa ti pe<sup>n</sup>ker iwiarmampra áinis nuyá shuar akuptai tarachin yamakaijia<sup>i</sup> kapa<sup>a</sup>ku entsarmai. Kurijia<sup>i</sup>isha kaya ti shíirma-chijia<sup>i</sup>isha tura ti pe<sup>n</sup>ker sháukja<sup>i</sup>isha ti shiir iwiarmampraru<sup>y</sup>i. <sup>17</sup>Ti wárik ashí ju kuit amukaiti.” Tu tiarmai.

Ashí uunt kanú kapitiántrisha, ashí nayaantsanam katiinia nusha, ashí kanú wiánniusha, tura ashí kanú nérennurisha árantak wajasarmai. <sup>18</sup>Tura pepru esaak múku<sup>i</sup>int ajan wáinkiar ti kakantar útainiak tiarmai “Timiá shiir pepru atsuwiti.” <sup>19</sup>Tiar ti kuntuts pujuiniak awatmamar kakantar útainiak tiarmai “Maa, ti uunt pépruiat ti wáitnenmai ajakai. Ashí uunt kanu nérentin nayaantsanam nijia<sup>i</sup> takasar kuítrintin ajasarmai. Tura ti wárik mash emesnarai.” Tu tiarmai.

<sup>20</sup>Antsu nayaimpiniam pujarumna nu, ashí Yus akatramutirmesha, ashí

Yusna etserniutirmesha, tura ashí Yus-shuar árumna nu ni wáitsamujai warastarum. Nu wáitsamujai atumin yajauch awajtamsamarmena nuna yapajtiurmakurme.

<sup>21</sup>Nuyá ti kakaram nayaimpinmaya suntar ti uunt neketai kayan jukí nayaantsanam ajun timiai “Júnisa<sup>n</sup> uunt pepru Papirúnia emesnar atakka wainniakchatin tuke me<sup>n</sup>kakattawai. <sup>22</sup>Tura atakka jantsemma pin<sup>k</sup>iuisha tampursha shakapsha antunkashtatui. Nu arantcha nu<sup>i</sup>nkia shuar pe<sup>n</sup>ké takakmaschartatui. Túramtai nekeamusha antunkashtatui. Ashí mitia átatui. <sup>23</sup>Shiripkincha ekeemakchartatui. Nuatma nampersha antunkashtatui. Nuikkia ni shuari súrin arma nu ashí nu<sup>n</sup>kanam na<sup>n</sup>kaamantu armai. Tura ashí nu<sup>n</sup>kanmaya shuaran waweatniua áintsan níiya núnis ajasarat tusa ana<sup>n</sup>kawarmai. Túrasha núnisa<sup>n</sup> ti kakarmaitiat ju mash túrunayi.” Tu timiai.

<sup>24</sup>Kame ni akupkamujai pé<sup>n</sup>ker shuar ti mantamnewaru asamtai nu péprunam ashí yaunchu Yusna etserniu numpesha, ashí Yus-shuara numpesha tura pé<sup>n</sup>ker shuar ashí nu<sup>n</sup>kanam maamu ainia nuna numpesha nu<sup>i</sup> paant wáinkiamniaiti.

**19** Nuyá nayaimpinmaya ti untsurí aents kakantar untsumainian antukmajai.

“Ju ti shiir enentámtumainti. Yuska uwempratniuncha, nekas shiir átinniasha, na<sup>n</sup>kaamaku átinniasha, tura ashí kakarmancha nekas nérenniuiti. <sup>2</sup>Niisha aya nekas pé<sup>n</sup>ker túratniua nuna túrin asa ti nukap tsanirmaun ashí shuaran tsanirijia<sup>i</sup> utsuun ti asutiáyi. Nin ti wáitkias ashí ni shuari máawarman yapájmíátkaiti” tiarmai.

<sup>3</sup>Ataksha kakantar untsumainiak tiarmai:

“Ti shiiraiti. Nii wáitsatin ji esaak tuke kajintsuk múkuint ajawai.” Tu tiarmai.

<sup>4</sup>Tuínia kui paintikuatru uunta nu tura kuaru taṅkusha nuṅká piniakumawar akupin pujutainium Yus pujana nuna shiir awajsarmai. Túrawar “Imiá nekasaiti. Ti shiir túriniaitme” tiarmai. <sup>5</sup>Akupin pujutainmaya chícham jíinkimiai.

“Yusna takarniutirmesha tura ni umirniutirmesha, úuntaitkiurmesha úchitkiurmesha kapitánitkiurmesha péejchachitkiurmesha, ii Yusri tuke shiir awajsatarum.” Tu timiai.

### **Murik nuatnaikiatin namperi**

<sup>6</sup>Nuyá ti untsurí aents chichainiak kanusa uuntri nujanṅkrak téter ajá núnisan antukmajai. Ti kakaram ipiamta núnis amai.

“Tí shiiraiti, tiarmai. Ii Uuntri Yus ashí tujincha asa ashí akupkatiun nanṅkaamayi. <sup>7</sup>Tuma asamtai shiir enentáimsartai. Murikiu anajmarmari shiir iwiarnarmatai ni nuatnaikiatin tsawantri jeayi. Tuma asamtai ti shiir warasar nincha shiir awajsatai. <sup>8</sup>Murikiu anajmarmarínkia iwiarnarti tusa ti shiir pushí sunasmai. Nusha yamaram máatrchu asa ti pújuiti.” Tu tiarmai.

Nu pushí Yus-shuar péṅker túramun nakumeawai.

<sup>9</sup>Nuyá nayaimpinmaya suntar turutmiai “Jú áatrarta: “Murik nuatma námpernam ipiaamu ainia nuka ti shiir warasarti.” Tu aartá, turutmiai. Júka Yus timia asa imiá nekasaiti.”

<sup>10</sup>Takui nu suntaran shiir awajsataj tusan tikishmatramjai. Túramtai turutmiai “Peṅke áinkiaip. Wisha Yusa yáinṅrintjai ámijjai métek tura yatsumjai métek Kristu nekas chichamen tuke umirin ainia nu. Yúsak shiir awajsatniuiti.” Tu turutmiai.

Kame Kristu imiá nekas timia nuna ashí Yúsnan etserainia nú shuar paant awajkartin ániawai.

### **Kaway pújunam eketna nu**

<sup>11</sup>Nuyá nayaimp urannium wainkiamjai. Nuṅ kaway puju wantinkiamai. Nu kawaynium ekeema nuna naari Ti Peṅker Umin tutaiyi. Núnisan Ti Nekas Turin tutaiyi. Ti peṅker Akupin asa aya nekas péṅker túrak mesetan najanaiti. <sup>12-13</sup>Ni jíisha jíijai métek keeármiai. Múuknumsha akuptai tawaspan untsurí etsenṅkrakuyi. Nuṅ ni naari Yus Chicham áarmauyi. Túrash tana nuna Niṅki takamtsuk nekaamai. Numpajai enkerman entsaruyi. <sup>14</sup>Ti untsurí nayaimpinmaya suntar mesetnum weena áintsar kawainium ekemkar ti shiir pújun entsaru Nin nemariarmai. <sup>15</sup>Nu suntara Uuntri weneeyá, ashí nuṅkanmaya yajauch shuaran máatin, puniá mai ere tsakatskatin jíinmiai. Tura jirujai asutiátniua áintsan ti kakaram akupkattawai. Túrak Ashí Tujincha Yusa kajetairi ti kakarma nujai shuáran asutiáttawai. Uwa nekeṅkar ijiuratniua áitkiasan wáitkiasartatui. <sup>16</sup>Ni pushiríncha makuíncha ni naari áarmauyi: Ashí Akupniun Akupin tura Ashí Uunta Uuntri.

<sup>17</sup>Nuyá tsawái-nantunam suntaran eketun wainkiamjai. Nusha nayaimpiniam nanamtin nanamainian kakantar untsuak timiai “Yusa uunt namperin yurumátiarum. <sup>18</sup>Akupniu namankéssha yuítarum. Suntara kapitántri namankéssha, kakaram suntara namankéssha, kaway namankéssha tura eketainia nuna namankéssha, kame ashí shuara namankéssha nanṅkaamantu ainia núnasha tura peṅké shuar ainia núnasha yuítarum.” Tu untsukmai.

<sup>19</sup>Tura nuyá Entsaya Yajasmancha tura jú nuṅkanam akupin ainia nunasha

ashí ni suntarijiaí wainkiamjai. Niisha kawainium eketka nujai tura nuna suntarijiaí mesetan najanatai tusar iruntrar-mai. <sup>20</sup>Tura nu mesetnum Yajasmasha tura Kukaria Yajasmasha, penké ántar yúsnan etserniua nu, mai achinkiarmai. Nuikkia Entsaya Yajasma ni kakarmar-in súam nu Kukaria Yajasmaka aents tu-jintiamun ti turak shuáran anankawar-mai. Túramtai nu shuar Entsaya Ya-jasma náarin apujmamsar ni nakumka-murin shiir awajsarmai. Tuma asam-tai Entsaya Yajasmacha tura Kukaria Yajasmacha íwiakuk asuprijiái ti kea nu ji-antumiannum apeáwarmai. <sup>21</sup>Chí-kichka kawainium eketkanumiá puniá tsakatskatin weneya jiinmia nujai man-tamnawarmai. Túramtai nanamtin ni ayashin yuawar ejemakarmai.

**Kristu mir uwí jú  
nunkanam akupkattawai**

**20** Nuyá nayaimpinmaya suntar táarun wainkiamjai. Nusha nánkatkachu waa yawirín tura jinkiatai jirun kampurman takakuyi. <sup>2</sup>Nu suntarsha Ti Kajen Yajasma jiru kampurmajai jinkiamai. Nu Yajasma iwianchi kapitíantri Satanas tutainti. Yáunchuya-napiti niisha. Tura nu iwianchin jinkiá mir uwí pujusat tusa <sup>3</sup>nánkatkachu wānam epenmiai. Tura waiti uraichminian anujtukmai. Mir uwí nankaamatsain ashí nunkanmaya shuaran anankawarain tusa túramai. Antsu mir uwí nankaamasmatai ishichik tsawant ankant akupnaktiniaiti.

<sup>4-5</sup>Nuyá akupin pujutainium pujuinian wainkiamjai. Tura shuara túramurin írsarat tusa kakaram sunasarmai. Tura núnisan muuke tsupirka maamu wakanincha wainkiamjai. Nusha Yusa chichamen etserainiak tura Kristu chichamencha etserin ásar maamu armai. Niisha Entsaya Yajasmacha ni nakumka-

murincha tikishmatracharu armai. Núnisan náarincha nijjainiumsha tura uwejniumsha anujmampracharu armai. Nu shuar ataksha nantakiar emka nantaktin tsawantnum pachiinkiarmai. Túmainiak Krístujai métek mir uwí akupeamun wainkiamjai. Antsu chíkich jákaruka mir uwí nankaamatsain nantakcharmai. <sup>6</sup>Antsu emka nantaktin tsawantnum pachiinkiarua nú shuar, ti penker áimak, ti shiir warasmin ániawai. Nu shuarka jimiará jákatniunam pachiintsuk Yusna tuke takarin tura núnisan Krístunu tuke takarin ártatui. Tura Krístujai métek mir uwí akupkartatui.

<sup>7</sup>Tura mir uwí nankaamasmatai uunt iwianch urani akupnaktatui. <sup>8</sup>Túram ashí nunkanmaya shuáran anankawartaj tusa jfinkittiwai. Kuk nunkanmasha tura Makuk nunkanmasha ashí pujuinia nuna anankawartatui. Tura mesetan najanataj tusa ni suntarin nekapmarchamnia ti untsurí irurtatui. <sup>9</sup>Tura ashí nunkan enetak Yus-shuar matsamtaincha tura Yus ti aneamu pépruncha mash énekarmai. Túramtai Yus nayaimpinmaya jinia akuptuk mash áesawarmai. <sup>10</sup>Tura iwianchi kapitíantri, nin anankawarmia nu, asuprijiái keá ji-antumiannum apenámai. Nu yaunchusha Entsaya Yajasmasha tura Kukaria Yajasmasha, penké ántar yusnan etserniua nu, nuí apenáwarmai. Nuisha tsawaisha káshisha iniannatsuk ti wáitsartatui.

**Ashí amúamunam  
súamtikiatin tsawant**

<sup>11</sup>Nuyá akupin pujutain úntan tura ti pújun wainkiamjai. Tura nuí pujancha wainkiamjai. Niisha ti kakaram asamtai nunkasha nayaimpisha aya menkarar tuke atsúarmai. <sup>12-13</sup>Tura túrunatsain nayaantsanam jákarua nusha jíinkiarmai. Núnisan iwiarsamunam



jaka pujuinia nusha jíinkiarmai. Tura jákaruncha, nan̄kaamantu arma nunasha tura pen̄ké shuar arma nunasha, ashí wainkiamjai. Tura Yusai naka wajaarmai. Nuyá ashí shuar túramu aakma papí urantrarmai. Tura nu papinium aarma nujai métek ashí ni turamurí paant nékaneakui súmamtiknawarmai. Tura ch̄kích papisha tuke iwiaaku pujustin papí urankamai. <sup>14</sup>Nuyá jákatin amuukati tusa ji-antumiannum apenámai. Nu ji-antumiannum wétin jimiará jákatin tútainti. <sup>15</sup>Tura ashí shuar ni naari tuke iwiaaku pujustin papinium atsúarma nusha nuí apenáwarmai.

### Nayaim yamaram tura yamá nun̄ka

**21** Nuyá nayaimpisha tura nun̄kasha men̄karamtai nayaim yamarman tura yamá nun̄kancha wainkiamjai. Tura nayaantsasha atsumai. <sup>2</sup>Wi, Juan, ti shiir péprun, Yusnumiá yamaram Jerusarénkan nayaimpinmaya táarun, wainkiamjai. Anajmarma ni áishrin in̄kiuntaj tusa ti shiir iwiarmampra áintsan̄ ti pen̄ker iwiaramuyi. <sup>3</sup>Nayaimpinmaya ti kakantar chichaamun antukmajai. “Iisiá, Yus yamaikia aentsjai pujawai. Tuke niijjai pujakui ashí ni shuari ártatui. Tura niijjai tuke pujak nekas tuke ni Yusri átatui. <sup>4</sup>Yus ni neajkin ujujturartatui. Tura nuik amia nuka ashí amuukarmatai jákatniusha, úttincha, wáitsatniusha, tura najaimiatniusha atsuttawai.”

<sup>5</sup>Tura akupin pujutainium ekema nu “Iistá, Wi ashí pen̄ké yamarman nájanjai” timiai. Nuyá nu arantcha turutmiai “Juka imiá nekas asamtai aartá. Nekas enentáimtustiniaiti.” <sup>6</sup>Ataksha turutmiai “Yamaikia mash uminkiyi. Wiitjai. Yámankamtaiknumiá amúanmasha tuke pujuwitjai. Wisha A rétranmaya Y rétranam ashí

retra áintsaitjai. Ashí kitiana núnaka tuke iwiaaku pujutai entsan pen̄ké kuitchajai áartatjai. <sup>7</sup>Nupetmakunka ashí yamarma juna mash susattajai. Wisha ni Yusri átatjai. Núnisan̄ niisha winia uchir átatui. <sup>8</sup>Antsu sápijkia, Yúsán enentáimtichusha, yajauchin máatrasha, man̄kartincha, tsanirmtan pujurniusha, wawekratniusha, ántar-yusan tikishmatniusha, tura ashí wáitrincha asuprijjai keá ji-antumiannum apenáwartatui. Nuka jimiará jákatin tútainti.”

### Yamaram Jerusarén

<sup>9</sup>Nuyá siati suntar pinin̄ amúamunam wáitkiastinjai piakun takakua nuyá chikichik taruti túrutmiai “Winitíá. Murikiu anajmarmarin̄ iniaktustatjame.” <sup>10</sup>Taku mesekranam naint yakí juruki Yusnumiá ti shiir Jerusarén pepru nayaimpinmaya táarun iniaktursamai. <sup>11</sup>Nu péprusha Yusa wincharijjai tsáapniniuyi. Nu tsáapnincha kaya ti shiirmachia núnis jaspi kaya nuní saar asa ti tsáapniniuyi. <sup>12</sup>Pepru yantamesha ti yakí pen̄kramuyi tura wáitiri tuse amai. Tura nu wáitinium suntar wajatiarmai. Nu wáitinmasha Israer-shuara uuntri tuse armia nuna naari áarmauyi. <sup>13</sup>Nantu tátainmaan̄i menaintiu waiti amai. Nantu akatainmaan̄isha menaintiu waiti amai. Nun̄kaan̄isha menaintiu waiti amai. Arakaan̄isha menaintiu waiti amai. <sup>14</sup>Ti uunt kaya tuse apujsamu armai. Tura nuí ekenir pen̄kramuyi. Nu tuse kayanam Murikiu akatramuri tuse armia nuna naari áarmauyi.

<sup>15</sup>Suntar wijjai chichaua nu, nekapmatain kurin takakuyi. Nujai pépruncha, wáitirincha, tura pen̄kramurinch̄a nekapmartiniuyi. <sup>16</sup>Pepru esant̄isha wan̄kant̄isha yakir̄isha mash métekrak armai. Suntarsha péprun nekapmataijjai nekapmaram esant̄isha wan̄kant̄isha

tura núnisan jeamkamu yakirisha jimi-ará mir jimiara siantu (2.200) kirúmitru amai. <sup>17</sup>Nuyá pé<sup>n</sup>krincha nekapmar-mai. Santar aents nekapmataijjai nekap-maram sesentikuatru (64) mitru amai. <sup>18</sup>Nu pé<sup>n</sup>kramusha jaspi kayajai najanamuyi. Péprusha aya kúrikíyi. Nu kuri ti penker sáarauyi. <sup>19</sup>Pe<sup>n</sup> apuj-tukma kayasha ti shiir kaya ainia nu-jai najanamu asa ti shiir iwiamuyi. Emka nu jaspi káyauyi. Jímiara nusha sapíru káyauyi. Menaintia nusha ákata káyauyi. Kuarua nusha ismirátau<sup>y</sup>i. <sup>20</sup>Se<sup>n</sup>kua nusha únise káyauyi. Saisa nusha kurnarinia káyauyi. Siatia nusha krisuritiu káyauyi. Uchua nusha períru káyauyi. Nuiwia nusha tupasiu káyauyi. Tiasa nusha krisuprasa káyauyi. Áuntsea nusha jasentu káyauyi. Tusea nusha amatísta káyauyi. Ti kayaim apuj-samu asamtai ti shífirmachi<sup>y</sup>i. <sup>21</sup>Pe<sup>r</sup>u wáitirí tuse ainia nu, ti shiir nayaantsan-maya shaukjai chikichik najanamu ar-mai. Pe<sup>r</sup>u jintísha aya kúrikíyi. Nu kuri ti penker sáarauyi.

<sup>22</sup>Yusa Uunt Je<sup>e</sup>ncha wainkiach-majai. Antsu nu peprunam Uunt Yus ashí tujincha nu tura núnisan Muriksha nu pé<sup>r</sup>un pímiutkui takamtsuk Níiniuyi. <sup>23</sup>Nu pé<sup>r</sup>unmasha tsawai-nantusha kashí-nantusha atsumchamai. Antsu Yusa wincharí tsáapin awajmíai. Núnisan Muriksha tsáapin awajmíai. <sup>24</sup>Nu tsáapnijai<sup>í</sup>sha ashí nun<sup>n</sup>kanmaya shuar wekasartatui. Tura ashí nun<sup>n</sup>kanam akupin ainia nusha nuí yujainiak ni pé<sup>n</sup>kerijjai nuna shiir awajtuiniawai. <sup>25</sup>Tura kashi atsá asamtai tuke tsawaiti. Tuma asamtai wáitirí tuke epenchamu ártatui. <sup>26</sup>Tura ashí nun<sup>n</sup>kanam pé<sup>n</sup>ker ana nuna nuí itiaartatui. <sup>27</sup>Tura yajauchikia penké wayashatatuí. Muíjmiainian túrincha tura anan<sup>n</sup>kartincha penké wayachartatui. Antsu áyatik shuar tuke iwiaaku pujutai papinium naari aarma

ainia nuke wayawartatui. Nu papincha Murik takakuí.

**22** Nuyá santar tuke iwiaaku pu-jutai entsan ti sáaran iniaktur-samai. Nusha uunt akupin pujutainmaya ti saawi jii<sup>n</sup>míai. Nu pujutaisha Yusna tura Muriknauyi. <sup>2</sup>Pe<sup>r</sup>u jintincha tura entsá mai paen tuke iwiaaku pujutai numi wajamai. Nusha ashí tuse nantutin neremai. Ni nukésha ashí nun<sup>n</sup>kanmaya shuar tsuámatainti. <sup>3-4</sup>Ashí yajauchia nuka atsuttawai. Uunt akupin pujutai, Yús<sup>n</sup>asha Murikniasha, nuí<sup>n</sup> aa asam-tai ni shuarí ti paant wainiainiak tik-ishmatrartatui. Tura nijia<sup>n</sup>incha ni naari anujmankartatui. <sup>5</sup>Tura káshisha atsut-tawai. Nuí pujuinia nuka shiripkincha etsan<sup>n</sup>cha atsumchartatui. Uunt Yúsak tuke tsáapin awajtiatui. Tura ni shuarí tuke inia<sup>n</sup>natsuk akupkartatui.

### Jesukrístu tátintri penké nuntumsai

<sup>6</sup>Nuyá santar turutmíai “Ju chicham ti nekas asa nekas enentáimtusminiaiti. Uunt Yus yaunchu níiniun etserniun ni chichame<sup>n</sup> enentáimtikramia núnisan yamaikia ni santarín akuptuk wárik túrunatta nuna ashí ni shuarín ujakuíti.”

<sup>7</sup>“Ti wárik winittiajai” tawai Murikkia.

Shuar ju papinium Yusa Chichame áarman umirna nuka shiir warasminiaiti.

<sup>8</sup>Wi, Juan, juna mash ísan mash antukmajai. Tura mash ísan antukan nayaimpinmaya santar iniaktursama nuna shiir awajsataj tusan tikishmatramjai. <sup>9</sup>Túram turutmíai “Penke áinkiaip. Wisha Yusa yáintri<sup>n</sup>tjai ámijjai métek tura yatsumijjai métek. Yús<sup>n</sup>an etserin ásar tura ju papinium áarma nuna umirainiak Yusa yáintri áiniawai niisha. Yúsak shiir awajsatniuíti.”

<sup>10</sup>Nuyá ataksha turutmíai “Ju papinium aarma Yusna asamtai úkam

ikiusaip. Ashí túrunatin tsawant ishichik ajatesai. <sup>11</sup>Nu jeatsainkia yajauch shuarka tuke yajauch túruki wetí. Núnisan muǰmiainian túraka tuke túruki wetí. Antsu pénkeran túraka pénkeran túruki wetí. Núnisan esetar enentáimniusha tuke esetar Yusǰai wekasati.”

<sup>12</sup>Muriksha tawai “Eta, ti wárik winittiajái. Túran ti shífirmachin ashí pénker túramuǰai métek súsatniua nuna takukin winittiajái. <sup>13</sup>Wiitjai. Yámankamtaiknumiǰ amúanmasha tuke pujuwitjai. Wisha A rétranmaya Y rétranam ashí retra áintsaitjai.” Tu tawai.

<sup>14</sup>Ni pushiri pénker nijiamatniua núnisan pénker túrinia nú shuar shiir warasminiaiti. Nu shuar nu pepru wáitirincha wayamniaiti. Túrar tuke iwiaaku pujutai numinmaya yuamniaiti.

<sup>15</sup>Tura antsu Yúsán enentáimtachuka, wawekratniuka, tsanirmatan pujurainia nuka, mankartinkia, ántar-yus tikishmatniuka, tura ashí shuar wáitian wararainiak tuke túrin ainia nuka aǰ matsatainiak pénké wayachmin áiniawai.

<sup>16</sup>“Wi, Jesus, ashí Yus-shuaran ujakarat tusan winia suntarun

akupkajai. Wikia Tawit Weeaitjai. Túrasha Tawitia Úuntrintjai. Wikia ti tsáapin yaa, yánkuamia áintsanketjai.” Tu tawai.

<sup>17</sup>Yusa Shiir Wakanisha tura Murik anajmarmasha “Winitiarum” tuiniawai.

Tura ǰuna ántana nusha “Winitiarum” tití. Tura ashí kitiama nuka winití. Wakerakka tuke iwiaaku pujutai entsan pénké kuítchajái umartí.

<sup>18</sup>Ashí shuar ǰu papinium Yus-Chicham aarma nuna antukarun ǰuna ujaajai: Shuar ǰui áarman chikichan pataakka Yus nin ti wáitsatin ǰui aarma nuna patattsattawai. <sup>19</sup>Núnisan shuar ǰui aarman emeneakuinkia Yus ni naarin iwiaaku pujutai papiniumiǰ japirattawai. Tura ti shiir péprunam wayaǰniun suritkiattawai. Nu péprusha tura nu papisha ǰui paant ujakma áiniawai.

<sup>20</sup>Jú papí áantratniun ujakua nu tawai “Eta, ti wari winittiajái.”

Pai, núnisan atí. Wari winitiaí, Uunt Jesúsá.

<sup>21</sup>Ii Uuntri Jesúsakrístu atumniasha shiir yainmakarti.

Nuke atí.